

清
實
錄

高宗純皇帝實錄(三)

卷一五八至卷二三一
乾隆七年至九年

清實錄

第二冊

中華書局影印

清 實 錄

(第 一 冊)

高 宗 實 錄 (三)

•

中 華 書 局 出 版

(北京王府井大街36號)

北京市中國書店發行

中國建築工業出版社印刷廠印刷

•

787×1092毫米 1/16 • 621/8 印張

1985 年11月第 1 版 1985 年11月北京第 1 次印刷

印數 0,001——1,500 冊

統一書號: 11018 • 1355—11 定價: 46.00 元

清實錄第一一冊目錄

高宗純皇帝實錄(三)

卷一五八	乾隆七年正月上	一
卷一五九	乾隆七年正月下	九
卷一六〇	乾隆七年二月上	一七
卷一六一	乾隆七年二月下	二三
卷一六二	乾隆七年三月上	三五
卷一六三	乾隆七年三月下	四七
卷一六四	乾隆七年四月上	五九
卷一六五	乾隆七年四月下	七九
卷一六六	乾隆七年五月上	九五
卷一六七	乾隆七年五月下	一二三
卷一六八	乾隆七年六月上	一二七
卷一六九	乾隆七年六月下	一四〇
卷一七〇	乾隆七年七月上	一五五
卷一七一	乾隆七年七月下	一六七
卷一七二	乾隆七年八月上	一八六
卷一七三	乾隆七年八月下	二〇六
卷一七四	乾隆七年九月上	二三八
卷一七五	乾隆七年九月下	二四三
卷一七六	乾隆七年十月上	二六二
卷一七七	乾隆七年十月下	二七三
卷一七八	乾隆七年十一月上	二九〇
卷一七九	乾隆七年十一月下	三〇四
卷一八〇	乾隆七年十二月上	三二三
卷一八一	乾隆七年十二月下	三三四
卷一八二	乾隆八年正月上	三五三
卷一八三	乾隆八年正月下	三六一
卷一八四	乾隆八年二月上	三七〇
卷一八五	乾隆八年二月下	三七八
卷一八六	乾隆八年三月上	三九六
卷一八七	乾隆八年三月下	四〇六
卷一八八	乾隆八年四月上	四二〇
卷一八九	乾隆八年四月下	四二九
卷一九〇	乾隆八年閏四月上	四四二
卷一九一	乾隆八年閏四月下	四五二

卷一九二	乾隆八年五月上	四六四
卷一九三	乾隆八年五月下	四七五
卷一九四	乾隆八年六月上	四八六
卷一九五	乾隆八年六月下	四九八
卷一九六	乾隆八年七月上	五一五
卷一九七	乾隆八年七月下	五二七
卷一九八	乾隆八年八月上	五四二
卷一九九	乾隆八年八月下	五五三
卷二〇〇	乾隆八年九月上	五六四
卷二〇一	乾隆八年九月下	五七三
卷二〇二	乾隆八年十月上	五九四
卷二〇三	乾隆八年十月下	六一一
卷二〇四	乾隆八年十一月上	六二四
卷二〇五	乾隆八年十一月下	六三六
卷二〇六	乾隆八年十二月上	六四九
卷二〇七	乾隆八年十二月下	六六三
卷二〇八	乾隆九年正月上	六七八
卷二〇九	乾隆九年正月下	六八六
卷二一〇	乾隆九年二月上	六九六
卷二一一	乾隆九年二月下	七〇七
卷二一二	乾隆九年三月上	七二二
卷二一三	乾隆九年三月下	七三一
卷二一四	乾隆九年四月上	七四四
卷二一五	乾隆九年四月下	七五四
卷二一六	乾隆九年五月上	七七三
卷二一七	乾隆九年五月下	七八七
卷二一八	乾隆九年六月上	八〇六
卷二一九	乾隆九年六月下	八二五
卷二二〇	乾隆九年七月上	八二九
卷二二一	乾隆九年七月下	八四〇
卷二二二	乾隆九年八月上	八五九
卷二二三	乾隆九年八月下	八七〇
卷二二四	乾隆九年九月上	八八八
卷二二五	乾隆九年九月下	九〇三
卷二二六	乾隆九年十月上	九二〇
卷二二七	乾隆九年十月下	九三〇
卷二二八	乾隆九年十一月上	九四四
卷二二九	乾隆九年十一月下	九五二

卷二三〇

乾隆九年十二月上

九六三

卷二三一

乾隆九年十二月下

九七六

大清高宗法天隆運至誠先覺體元立極敷文奮武孝慈神聖純皇帝實錄卷之一百五十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆七年壬戌春正月辛酉朔

上詣

奉先殿行禮○詣

堂子行禮○率王以下文武大臣詣

壽康宮慶賀

皇太后禮成御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○御乾清宮賜宗室王公等宴○

奉

皇太后幸重華宮侍宴○壬戌以兵部尚書史

貽直為吏部尚書調禮部尚書任蘭枝為兵

部尚書以兵部左侍郎趙國麟為禮部尚

書○甲子定旗員子弟隨任之例諭向來

旗員子弟隨任在外年至十八歲者例應

來京若有欲留任所協辦家務者准督撫

代為題請聽候部議其新授外任之員子

弟在京長養年過十八歲以上者非奉特

旨不得隨任此舊例也朕思旗員子弟不

許擅隨任所者一則恐在地方滋事一則

留京以備該旗當差如外任旗員能嚴加

約束為督撫者又不時稽查則皆知守分

循理可無慮其多事至該旗佐領若本有

可以當差之人而父兄外任者將子弟帶

往則本人既可省兩處之食用該佐領間

散之人又得當差支領錢糧以資養贍洵

為兩便之道嗣後外任旗員子弟年至十

八歲以上者。在外仍令該督撫題請。在內著呈明該都統查奏。俱准其隨任。其不願隨任者亦聽之。若隨任之後。或出署交遊。及干與地方之事。著該督撫即行查叅。從重議處。○乙丑。

上詣

皇太后宮問安。○丁卯。

世祖章皇帝忌辰。遣官祭

孝陵。○

上詣

奉先殿行禮。○閩浙總督兼管浙江巡撫宗室德沛奏。漕糧例應乾圓潔淨。米色不純。自干詰叅。蒙俯鑒江蘇省秋雨連綿。米色定減。特諭有漕地方。不必照常較論。地方官酌量可收。即日收兌。浙省收穫時。亦苦雨多。秋禾碾出。間有青腰白臍。與江省事同一體。即飭州縣紅白兼收。粃粳並納。俾小民易於輸將。請飭下倉場漕運兩督臣。浙漕過淮抵通。免其

駁換。下部知之。○又奏。抽漕運白。原有成例。江蘇白糧經費。優於漕糧。宜抽調以均苦樂。浙省漕白費等情形。與江南不同。積年分運無誤。誠以一幫中南兌北交。沿途一切。協力辦理。猝然輪運。事既不習。同幫又非熟識。跋扈頓形。倏爾五年。不知誰漕誰白。各顧目前。諸弊並萌。應請免其五年抽調。俾駕輕就熟。現屆冬兌期迫。先飭照舊辦理。下部議。○戊辰。享

太廟。遣和親王弘晝恭代行禮。○遣官祭

太歲之神。○駐藏副都統紀山奏。本年係達賴喇嘛郡王頗羅鼐進貢班次。特遣堪布囊蘇來京。班禪厄爾德呢非屬年班。因感戴國恩。亦遣堪布赴京進貢。已奉旨准其來京。至來年係班禪厄爾德呢進貢正班。郡王頗羅鼐陪班。查從前準噶爾人等。欲赴藏熬茶。數年來頗羅鼐辦具防備。地方護送。官弁事宜。土伯特等處唐古忒人衆。辦理官差。已屬出

力。若來年班禪厄爾德呢。頗羅鼐。復遣使進京。則唐古忒人衆。又有辦差之苦。請將來年進貢正陪班。加恩停止。俟次班仍照舊例。得旨。從前達賴喇嘛。班禪厄爾德呢。每年輪班遣使進呈方物。郡王頗羅鼐。俱遣副使同來。因班禪厄爾德呢。涅槃。朕降旨達賴喇嘛王頗羅鼐。每年遣使。未免勞苦。定以隔一年遣使一次。上年達賴喇嘛。王頗羅鼐。使臣等年班來時。班禪厄爾德呢。呼畢爾罕。亦遣使呈進丹舒克。若仍照前例。今歲又係班禪厄爾德呢。呼畢爾罕年班。連歲遣使。恐擾累唐古忒人衆。班禪厄爾德呢。呼畢爾罕。今歲年班著停止。下次照例輪班。至王頗羅鼐。向係每年遣使為副。嗣後遇達賴喇嘛年班。著仍遣副使同來。班禪厄爾德呢。呼畢爾罕。遣使年班。頗羅鼐不必遣使為副。○是日起。

上以祈穀於

上帝。齋戒三日。○己巳。實授協領沈之仁。為福

州左翼副都統。○庚午。和碩莊親王允祿等奏。乾隆六年。十二月二十日。奉

上諭。常朝樂章。每月各以其律其呂為宮。

壇

廟朝會。爾等俱經議奏其大畧。俟朕細加審詳。另降諭旨。至

皇太后陞座還宮樂章。應用何律何呂之處。爾等未經議及。理合考古準今。求其至是。擬議奏聞。候朕酌定。伏惟十二律呂。皆生於黃鍾。故黃鍾為聲氣之元。但黃鍾既專用於南郊。以尊

上帝。自不便擬用。且律協於乾。呂協於坤。坤元允宜用呂。惟大呂為黃鍾之呂。恭擬

皇太后樂。以大呂為宮。又按禮記曰。天子日也。后月也。酉為月之正位。謹援禮記之義。恭擬皇后樂。以南呂為宮。又和碩履親王允禔奏。在館諸臣。所謂

皇太后樂。以大呂為宮。臣愚以為大呂南呂。並

是陰呂。有所未便。

皇上曾有凡慶賀大典。

皇太后宮慶賀。應用陽律之吉。敬惟

皇上萬壽聖節。在八月。如八月常朝。自當用八月之呂。至於萬壽慶賀大典。似應仍用陽律。查舊制。一切大典。俱以黃鍾為宮。恭請仍循舊制。

皇上冬至元旦萬壽三大節。並以黃鍾為宮。

皇太后。

皇后三大節。亦仍循舊制。並以黃鍾為宮。得旨。萬壽節。履親王所議是。餘著畫一定議具奏。

○又奏。乾隆六年十二月二十一日。奉

上諭。冬至以黃鍾為宮。倍夷則為羽之說甚合。至

社稷壇。與

方澤同之處。

方澤用蕤賓之呂為林鍾。尚可。朕意

社稷究不可同。或亦同

文廟春秋分用夾鍾南呂之處。一并再議。又帝王廟。春用夾鍾亦妥。秋祭以九月。或用無射。或仍用南呂之處。再議。查古制。祀天曰郊。祭地曰社。社之文與郊對。猶地之文與天對也。凡經文舉地而後土者。即不別言祭社。舉祭社者。即不別言祭地。而周禮。大宗伯大司樂典瑞。戴記月令。郊特牲。禮運。中庸篇。並可證據。自漢匡衡始建議。別為北郊。遂析社與方澤之祭為二。後世因之。而社稷降為中祀矣。

臣等前議。謂社亦地也。宜用林鍾。仰蒙

聖訓。謂與祭地宜有分別。伏思

社稷典禮。既不與

方澤齊等。樂章自應不同於地。

聖訓周詳。尤宜遵改。查

社稷壇祭。以春秋二仲月之上戊。宜以夾鍾南

呂為宮。至

歷代帝王廟。大清會典開載。並以二月八月致祭。然每年多有用三九月者。咨查禮部太

常寺欽天監乃據選擇通書。稱係清明霜降前。擇吉致祭。蓋二八月祀典甚多。次第舉行。此則排至末後。但未屆清明霜降。仍是夾鍾南呂。似未便以時日在三九月。而即用姑洗無射也。仍請照前議。亦以夾鍾南呂為宮。得旨。依議。○大學士鄂爾泰等議覆。將軍補熙奏稱。自殺虎口。距額爾德尼昭。相隔三千餘里。倘經調動。適值青草暢茂之時。沿途歇養馬駝。必須二十餘日始到。雖有備派兵丁。恐不能應期而至。懇賞價。先於額爾德尼昭沿途地方。置備馬駝聽用。查現在喀爾喀四部落所存餘駝。二萬七千餘隻。馬。三萬四千餘匹。內地扎薩克哲里木等處。五盟長所存駝一千餘隻。馬。二萬五千餘匹。無須另行置買。而此項兵丁。與尅期起行者不同。調聚日久。必致傷損。若屆期備辦。又恐趕送不及。應令額駙策凌等。由該處探賊消息。將喀爾喀等部落所存馬駝。就近豫備。俟補熙兵到時。酌

量撥補更換。又奏稱。綏遠城右衛兩處。所存子母礮四十八位。向無馱駝。遇有調遣。運礮維艱。請陸續買駝備用。查現在右衛兵三千五百餘名。馬三千五百餘匹。駝一千七百餘隻。綏遠城兵三千九百名。馬三千九百匹。駝九百九十餘隻。合計兩處。共馬七千四百餘匹。駝二千六百餘隻。所有此項備派兵二千名。如有調用。約計每人給馬三匹。兩人合給駝一隻。惟需馬六千匹。駝一千隻。尚餘馬一千四百餘匹。駝一千六百餘隻。礮位即撥餘駝九十六隻馱往。又奏稱。蒙古地方用兵。棉甲最為有益。本處惟自熱河撥來兵一千名。攜有棉甲。懇再賞給棉甲三千副。令綏遠右衛兵丁備貯。查現在軍營收存備用軍器內。有棉甲二千副。補熙既稱棉甲有益。兵行時請免其攜帶鐵甲。即將備用棉甲一千副。令其攜往。抵軍營後。無甲兵丁。行令額駙策凌查明。於此項棉甲內。撥給充用。從之。○又議覆。

將軍補熙等奏稱。查綏遠城兵三千九百餘名。右衛兵三千五百餘名。應備挑二千名。歸化城土默特兵五千名。應備挑一千名。八旗游牧察哈爾兵七千餘名。應備挑二千名。俱由該將軍總管等咨報該部。及軍營存記。查歸化綏遠存貯軍需銀二十七萬餘兩。足敷備辦。右衛綏遠歸化官兵起行之用。其張家口口北道衙門原存軍需銀十萬餘兩。除陸續用過外。現實存銀四萬餘兩。於備撥察哈爾兵二千名。尚不敷用。俟該處派出官兵數目。造報到日。由部覈計官兵應得銀數。豫為妥備。一經檄調。即由部作速解往。並行文額駙策凌等。酌量事勢之緩急。相度近日賊衆情形。得有確實。一面奏聞。一面檄調。查現在各處兵足敷應用。倘有需檄調之處。合計內地扎薩克之首隊兵丁四千五百名。已足盈萬。派委該管官催令前進。雖道路遠近不

齊。然約計一月之內。俱可到齊。二隊兵丁六千五百名。亦可繼踵而至。似此軍威壯盛。足資應援。抵禦得旨。撥給察哈爾官兵銀兩。俟得確數。由部即行解送。口北道衙門存貯。餘依議。○辛未祈穀於上帝。
上親詣行禮。○詣大高殿行禮。○奉皇太后居長春仙館。○詣恩佑寺。
安佑宮行禮。○幸圓明園。○奉皇太后幸奉三無私殿進茶果。○命定樂宮。諭考定樂章。訂正律呂。欲以垂之永久。非祇用之一時也。爾等因萬壽節樂章。兩議請旨。朕思黃鍾為聲氣之元。同於穆之運。帝王誕生。昊天有成命。萬壽節以黃鍾為宮。俾人君聞樂傲心。思保明於夙夜。義甚深遠。不必因朕誕辰在八月。而以南呂為宮。已降旨准履親王所議行矣。朕又思朝會之樂。旋相為宮。是

以萬壽節。不妨仍用黃鍾。若云朝廷大典。必當用黃鍾。則編鐘之內。必有不用之鐘。反墮於啞鐘之誚矣。且此鐘律。非朝廷之上。孰敢用之。似不必拘於黃鍾之說也。爾等又議稱皇太后樂。應用大呂。夫大呂者。即黃鍾之呂也。朕萬壽節用黃鍾律。而

皇太后萬壽節用黃鍾之呂。似猶未安。況以律呂相生次第言之。一黃鍾。二林鍾。三太簇。四南呂。今既遵古三統之說。以其序為尊卑。用

黃鍾尊

上帝。用林鍾尊

后土。用太簇尊

宗廟。而議

皇太后樂。用大呂。大呂之序。在南呂之後。爾等

既議皇后樂用南呂。是皇后樂先於

皇太后也。尤為未協。禮記帝日后月之義。固不易之經。

皇太后母后也。此古今之通稱。似亦宜用南呂

為宮。朕意如此。爾等悉心詳議。畫一具奏。○壬申。賜廣西巡撫楊錫鏞。

世宗憲皇帝硃批。上諭一部。○癸酉。

上奉

皇太后幸同樂園。侍早晚膳。復奉

皇太后幸山高水長。至乙亥。皆如之。○和碩莊

親王允祿等奏。臣等遵旨傳集禮部和聲

署內務府掌儀司各樂工。在城隍廟演丹

陛樂。其鼓節既與樂章不符合。並與明代樂

章亦不相符。且兩處多寡不等。實係相沿訛

謬。亟宜改正。臣等酌議。嗣後應用七言四句。

排班趨進立定之節候。為第一句完。奏以節

鼓。下三句。每一跪三叩頭起立之節候。各完

一句。奏以節鼓。九叩禮畢。恰完四句。至

皇上於

皇太后前行禮。不便與臣下詞同。應為五言四句。其節奏如前。得旨。所奏五言四句。近於詩句。樂章仍以長短句為是。準其字數。與相仿

佛可也。餘依議。○甲戌。

上御奉三無私殿。賜宗藩宴。○乙亥。

上御正大光明殿。賜朝正外藩及內大臣大學士等宴。召烏珠穆沁和碩車臣親王阿喇布坦那木扎勒喀爾喀車臣汗達瑪林科爾沁多羅郡王和碩額駙齊默特多爾濟鄂爾多斯多羅郡王扎木揚四子部落多羅達爾漢卓里克圖郡王阿喇布坦多爾濟喀爾喀多羅郡王德木楚克厄魯特多羅郡王和碩額駙色卜騰旺布喀喇沁多羅貝勒和碩額駙僧衮扎卜翁牛特多羅達爾漢岱青貝勒朋蘇克敖漢固山貝子固山額駙羅卜藏阿霸噶達爾漢輔國公鄂勒哲依圖喀爾喀和碩額駙根扎卜多爾濟等。至御座前賜酒成禮。○順天府行鄉飲酒禮。

大清高宗法天隆運至誠先覺體元立極敷文奮武孝慈神聖純皇帝實錄卷之一百五十八

大清高宗法天隆運至誠先覺體元立極敷文奮武孝慈神聖純皇帝實錄卷之一百五十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆七年壬戌正月丙子。

平定縣志卷二十九

上奉

皇太后幸同樂園侍早晚膳至癸未皆如之○

御正大光明殿賜大學士尚書等宴○奉

皇太后幸山高水長至己卯皆如之○戊寅諭

據副都統紀山奏稱前因準噶爾請進藏熬

茶派官兵護送令那克素三十九部落番民

等豫備馬匹牲畜接濟應用伊等率先集事

惟恐後時甚屬急公且伊等頭目入見俱言

蒙國家泰養之恩從無擾累各得安生惟願

誠心報効等語此次準噶爾人等未曾進藏

伊等所備之馬匹牲畜雖未經應用但番民

生長遼遠感戴國家之恩詎勉報効甚屬可

嘉宜施特恩著將伊等今年應輸錢糧盡數

寬免以示鼓勵○大學士鄂爾泰等議覆呼

倫貝爾副都統銜瑪爾拜奏稱呼倫貝爾地

方向無辦事傳遞文報之員嗣由理藩院派

筆帖式一員領催一名前往輪班辦事彼時

因未設立筆帖式故如此辦理今呼倫貝爾

地方已添設蒙古筆帖式二員若仍由京

理藩院派往筆帖式更換未免徒勞驛站

請嗣後停止派往其現在辦事之筆帖式

等如果行走勤慎五年期滿咨送該將軍

處遇有應陞缺出准與彼處人等歸併揀

選以示鼓勵等語應如所奏從之○盛京刑

部侍郎覺羅吳拜以母老請留京侍養以

內閣學士兆惠為盛京刑部侍郎吳拜為

內閣學士○調廣東督標中軍副將張元

佐來京引見。○庚辰。工部議准湖北布政使嚴瑞龍奏稱。覈減工程銀兩。係浮開應繳之項。承修官值陞遷事故。往往拖欠。承追之員。因未定有年限處分。因循延緩。嗣後應照承追雜項錢糧例。定以年限。限滿不完。如例降罰。承修官逾限不繳。叅處從之。○辛巳。諭大學士等。朕於二月初二日。恭謁

泰陵。一切應行事宜。各該衙門備辦。○壬午。諭

朕前因直隸。山東。河南。三省有老爪賊一種。狠毒異常。大為行李之害。是以特頒諭旨。令地方官設法查拏。近又聞得此種老爪賊。北五省皆有。而陝省固原州等處尤多。每於春月空身而出。俱走潼關。分散各處謀劫。及至秋冬。各挾贓物而回。恐被捕役盤獲。多於山僻小徑。遶回本籍。行蹤詭秘。變遷百端。必須該地方官齊心協力。不分疆界。互相查拏。庶可淨厥根株。著尹繼善。岱奇。黃廷桂等。檄飭

委員。將老爪賊出入取道之處。躡訪查捕。務期嚴密周詳。毋使漏網。○理藩院奏。喀爾喀協辦台吉齊巴格扎卜故。得旨。據奏喀爾喀協辦台吉齊巴格扎卜。出痘病故。伊在軍前効力行走。人尚去得。又於京城來往甚久。朕因令其在乾清門行走。學習禮儀。今伊患痘溘逝。深為惻然。著賞銀一百兩。派章京一員。與同來台吉海都卜等會同辦理。事畢。將該台吉靈柩。帶往游牧處去。○定外藩蒙古生身人。不必來京例。諭曰。喀爾喀協辦台吉齊巴格扎卜。從前因伊曾否出痘。知之不真。至京染痘病故。舊例未曾出痘。蒙古等俱不准來京。但恐伊等內有似齊巴格扎卜。誤行來京。染疾者。正復不少。朕心深為憫惻。嗣後如本身未能確知出痘之王公台吉等。俱不必來京。若欲瞻仰朕顏。於朕出哨時。行圍之所。亦得瞻仰。斷不可冒昧來京。著將此旨行文。通行曉諭。眾扎薩克等知之。○癸未。宗人府

奏

玉牒自雍正十一年告成後。已屆十年例修之期。臣府應會同內閣禮部纂修。從之。○甲申。上詣長春仙館。問

皇太后安。奉

皇太后居暢春園。○諭。上江鳳。賴等屬。於上年夏秋連被水災。朕已降旨。加意賑恤。蠲緩各項錢糧。並於定例賑濟月分之外。將災重地方。加展兩月一月不等。頃聞滁和二屬。及無為州。係偶爾偏災。得賑之後。已足支持。惟鳳。賴。泗三屬。連年被潦。民困為甚。今麥秋之期。尚在五月。其加賑至三月止者。仍有四月一月之食。加賑至二月止者。仍有三四兩個月之食。賑至正月止者。仍有二三四三個月之食。雖該州縣例有平糶倉糧。而貧民無錢糶買。深可軫念。著將鳳。賴。泗三屬已賑貧民。再借與口糧一個月。其正月止賑之處。去麥秋尚遠。應查明最貧之民。借與口糧兩個月。至

五分災不賑者。定例於春月酌借口糧。應同六分災不賑之次貧。一體照例酌借。以接濟之。統於秋成交穀還倉。若近處穀石不敷。由遠處撥運。恐緩不濟急。即照上年之例。用銀折給。俾小民買食大麥。秫。秫等雜糧。以餉其口。該部即速行文江南督撫知之。○又諭。甘省地處邊徼。土瘠民貧。朕所加意撫恤。頃聞涼州府屬之武威。平番。永昌。古浪。四縣。頻歲歉收。上年又被旱災。民情甚苦。積欠頗多。查

自雍正十三年至乾隆四年。武威縣未完額糧八萬一百餘石。草六十四萬二千餘束。平番縣未完額糧一萬三千八百餘石。草一十九萬二千餘束。永昌縣未完額糧一萬五千二百餘石。草二十萬四千餘束。古浪縣未完額糧四千三百餘石。草九萬三百餘束。又西寧府屬之西寧縣。自雍正十三年。至乾隆三年。未完額糧二萬八千九百餘石。草二十九萬八千餘束。碾伯縣未完額糧一萬一千一

百餘石。草一十三萬七千餘束。以上六縣。皆西陲苦寒之地。雖上年尚屬有收。然積歉之餘。元氣未復。若將新舊額糧草束。於一歲之內。合併徵收。民力實為艱窘。著將舊欠之項。分作三年帶徵。俾閭閻易於輸將。示朕加惠邊氓之至意。○乙酉。

上詣暢春園。問

皇太后安。○諭。朕此次恭謁

泰陵。著怡親王。大學士鄂爾泰。張廷玉。在京總

理事務。○吏部議覆。直隸總督高斌奏稱。各省河工。佐雜缺出。惟河東係出具考語。咨部。委署一年。保題實授。直隸。江南。多暫行委署。按季彙報。並不出考咨部核覆。補授時始具題。有懸缺數年。仍係暫委者。請行令該河督。將現在署員出考補咨。嗣後畫一辦理。應如所請。從之。○授淳度親王女為郡君。壻貝勒僧滾扎布子瑚圖凌阿。為多羅額駙。○丙戌。諭曰。直隸總督高斌。到任伊始。正料理地方

事務之時。朕此次謁

陵。高斌不必前來接駕。○禮部議准。廣西巡撫楊錫紱奏。請增建廣西鄉試號舍四百二十間。從之。○丁亥。命編修秦蕙田。在尚書房行走。○準噶爾部人羅斯瑪特。多喇特。率親屬五人來降。命賞給安插如例。○戊子。諭和碩莊親王允祿等。前奏周禮六樂。以律之次第。分神之尊卑。顧律呂同用。而清濁之間。有同均者。有不同均者。見諸實用。礙難施行等語。朕偶閱周禮。其文曰。奏黃鍾。歌大呂。以祀天神。奏太簇。歌應鍾。以祭地示。奏姑洗。歌南呂。以祀四望。奏蕤賓。歌林鍾。以祭山川。奏夷則。歌仲呂。以享先妣。奏無射。歌夾鍾。以享先祖。禮從其宜。周制固不可強同於今。但六樂相配。亦非無其義。因思黃鍾。子也。大呂。丑也。子與丑合。故奏黃鍾。則歌大呂。太簇。寅也。應鍾。亥也。寅與亥合。故奏太簇。則歌應鍾。推而至於無射。夾鍾。莫不皆然。蓋月之斗建。與日之

躔度相配合之位也。唐賈公彥疏所云。奏據出聲而言。歌據合曲而言。其實歌奏通也。此語則似有訛。夫清濁同均者。尚不可用。豈有清濁不同均者。而可合用之理。蓋既云奏。則但奏其樂而不歌。既云歌。則始作樂以合人聲耳。奏與歌自必各為一事。惟奏以黃鍾為宮者。歌時則以大呂為宮之樂配之。奏以太簇為宮者。歌時則以應鍾為宮之樂配之。如此。則無所謂礙難施行者矣。朕亦不固執此語以為必是。但與爾等奏詞稍有不同。可再詳閱查奏。○和碩莊親王允祿等奏。臣等議得

皇太后樂。

皇后樂。立宮應以何律何呂之處。

皇上所降諭旨。用禮記帝日后月之義。以南呂為宮。南呂位在第四。既不至與

郊

廟有並尊之嫌。又與朝廷之樂。旋相為宮者。先

後次第。兩無妨礙。最為妥協。若隨皇帝樂。一例立宮。於義亦通。但在宮在廷。無所分別。既不若以內外有別為長。且無以彰旋相為宮。惟

帝始可隆禮備物之義。謹遵原降諭旨。以南呂為宮。得旨。依議。○山西巡撫喀爾吉善。綏遠城建威將軍補熙會奏。查大口外地畝。派委佐雜及防禦驍騎校各二員。查旗員無養廉。往返數百里。且非數月可竣。難令枵腹從事。應照經歷巡檢一體賞給盤費。下部議行。○兵部議准。江南提督吳進義奏。請江南提標並崇明鎮標。准將餘存息銀內。各動支二千兩。買米存貯。借給兵丁。照原價扣還。報部查核。侵冒剋扣者嚴叅。從之。○己丑。

上詣暢春園。問

皇太后安。○諭大學士等。六部纂修則例。次第進呈。朕皆逐一詳覽。其中或有更正。或有刪除。俱照新定之書遵行。夫舊例有未協之處。

理應變通者。自應酌量刪改。但從前舊本。各衙門仍當存貯。以備稽查。且數年之後。或又有更易之例。亦可將舊例參訂。此亦愛禮存羊之意也。可將此傳諭各部知之。再如現今吏部進呈則例內。擬刪官員考較律例一條。云內外官員。各有本任承辦事件。律例款項繁多。難概責以通曉。嗣後將官員通曉律例。咨明註冊之例刪去。止留吏攢通曉律例一條。朕思律例有關政治。即以司官而論。若謂各部律例。未能盡行通曉。則可。若於本部本司律例。茫然不知。辦理事件。徒委之書吏之手。有是理乎。此條著仍舊例。不應刪去。○又諭。從來苗地匪類。詭名甚多。即如黔粵逆苗石金元戴老四。乃案內之首犯。一人而有數名。易於濛混免脫。今經數省合力查拏。不遺餘力。始得正身。似此則為從之黨羽。借詭名而漏網者。恐不少矣。著傳諭廣西。貴州。湖南。雲南等省之督撫提鎮。嗣後於始初拏獲苗

犯之時。將一人幾名。詳細訊問。開寫明白。知會辦理。此案之隣省員弁。并不許稍有隱匿。則彼此易於查察。庶可杜奸宄詭名煽惑之伎倆。○庚寅。諭。前曾降旨大學士徐本。每年賞銀二千兩。今徐本出差之處甚多。每年著再加賞銀二千兩。○御史沈廷芳奏。崇文門內智化寺。明英宗為逆閹王振立祀。李賢撰碑。稱其豐功大節。諛閹亂道。觀者髮指。乞勅有司。毀像仆碑。並將英宗諭祭碑。移瘞他所。得旨。如所請行。○是月。直隸總督高斌奏。現值永定河凌汛。必須察看。懇恩仍准迎覲。得旨。既已就道。見朕即回署辦事。或察看河干。不必隨駕可也。○又奏。原任江南河庫道張師載。吏才未見優裕。而端正清勤。不愧張伯行之子。現已服滿。可否量才召用。得旨。知道了。有旨諭部。○兩江總督那蘇圖奏。據揭題。叅之叅將王從繩。可否送部引見。得旨。此奏甚屬不明。既云操練疎懈。廢弛營伍。則是一

無能之員。又何云巡查汎地。著有成效。二者不並立也。可詳悉奏來。○又奏。拏究崇明靖江。丹徒寶應。捏災藉賑。賴祖冒蠲。罷市抗官之犯。民風已肅。並分別上江。莠民饑民。恩法並施。得旨。所見甚正。妥協為之。○江西布政使彭家屏奏。分咨勒追各前司。應賠穀石。通飭州縣錢糧。不許銀匠包傾包解。得旨。好。勉力為之。○浙江布政使張若震。奏請歸養。得旨。汝奏固屬應行。但巡撫係新任。汝不便復換。俟秋冬間再奏。○湖廣總督孫嘉淦奏。遵查謝濟世所注經書。立說淺陋固滯。不足以欺世盜名。無庸逐條指瀆。謹將原板查燬。並通飭收燬已印之本。得旨。所辦甚妥。只可如此而已。○又奏。查桂陽郴州屬舊開銅礦。不礙田廬。又無苗犛雜處。可以復開。其餘試采之處。有名無實。俱應封禁。得旨。所奏俱悉。○又奏。武昌關沿用明尺。較工部營造尺短一寸五分。請飭鑄五尺發關遵用。俟一年後酌

定徵額。以泯盈縮。得旨。知道了。但事屬瑣碎。待朕緩酌之。○又奏。遵查前任楚臬吳龍應。在官廢事。經管關稅。侵隱入己。得旨。這所參吳龍應著革職。發往楚省。交該督嚴審定擬具奏。該部知道。○河南巡撫雅爾圖奏。飭屬嚴緝奸匪。盜案較少。得旨。若有意期其少。則諱盜之弊生矣。戒之。○又奏。飭令標營馬兵。練演技勇。請下各省通行。得旨。此等事。汝且於汝省行之。以期其效可也。○山東巡撫朱定元奏。臨清關徵收名色。有宅用一條。捐項一款。既非正額。又不併解。浮費累商。現已全革。得旨。知道了。○又奏。准部咨裁閒冗。東省如安東衛守備及教授。登州府鹽捕通判。鉅野縣丞。諸城縣南龍灣。掖縣海倉。兩巡檢。又德州安德水驛。梁家莊水驛。良店水驛。武城縣甲馬營水驛。臨清州清源兼渡口水驛。清平縣清陽水驛。東昌府崇武水驛。陽穀縣荆門水驛。汶上縣開河水驛。濟寧州南城水驛。

魚臺縣河橋水驛。嶧縣萬家水驛。東平州安山水驛。共驛十四。丞十三。又德州衛中右二所千總。均可裁。得旨。所奏俱悉。○又奏。東省給兵生息銀。交州縣發商。州縣事繁。散給不時。請令各弁具狀。豫領貯營。歲底報銷。捏冒侵扣。及扶同徇隱者。並叅。可否各省一體辦理。得旨。汝先試行於汝省可也。○甘肅巡撫黃廷桂奏。部推撫標叅將黃天貴。粵東人。恐未諳邊務。請與直隸涿州營叅將蔣璉對調。得旨。此例恐不可開。但甘省屬員中。汝酌量調補可也。○貴州提督韓勲奏。報到任日期。恭請聖訓。得旨。制苗之道。惟在寬嚴相濟。馭兵之方。亦惟訓練常勤。汝其勉之。而其要尤在實心也。○安西提督永常奏。報準噶爾夷使入貢。得旨。朕已料彼定為熬茶而來。知道了。○又奏。夷使赴京帶售之貨物馬駝。暫留哈密。得旨。知道了。其留牧馬駝。若倒斃少則可。若多量為補賜。亦無不可。至期奏聞可也。

○河東鹽政尚琳奏。請將充公未報之附餘錢糧。報部核銷。緣河東公務。每平五十兩。加重二錢。以為鑄成元寶之費。現在各項支給。只需庫平。所餘加增二錢之數。悉行充公。向未報部。請自乾隆七年起。造冊送部。候撥充餉。又查蘆葦變價銀兩。貯庫充公。嗣後應分晰款項。由部核銷。節省銀兩。或係公務內節省。或係各兵役空缺。自應各歸本款核銷。不得別附名色。致多牽混。得旨。此事不便交部。汝如是據實陳奏。澄清辦理。固屬可嘉。恐太清則後難為繼。汝其酌量辦理。或既稱附餘。至歲底奏明。或交內務府。或賞何人之處。請旨。尚屬可行之事耳。將此旨。汝處記檔。亦不必咨部也。

大清高宗法天隆運至誠先覺體元立極敷文
奮武孝慈神聖純皇帝實錄卷之一百六十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞尋奉

敕修

乾隆七年壬戌二月辛卯朔諭曰準泰所管

鹽政事務繁多其揚州關稅務難以兼顧著

陳大受於屬員內遴委一員管理○吏部議

覆安徽巡撫張楷疏薦浙江舉人嚴森守潔

才優熟諳吏治襄幕明敏查與保舉之例相

符應令該撫給咨送部引見從之○壬辰

上詣暢春園問

皇太后安○

上啟鑒謁

泰陵○實授劉於義為直隸布政使○是日駐

大清高宗法天隆運至誠先覺體元立極敷文
奮武孝慈神聖純皇帝實錄卷之一百五十九

蹕黃新莊。○癸巳。吏部議准。直隸總督高斌奏稱。熱河一帶。旗民雜處。設有理事同知。與承德州分管。地廣事歧。瞻顧輾轉。多至盜颺傷變。甚或廳袒旗人。州偏民戶。請裁知州。改設滿缺理事通判。移駐喀喇河屯地方。治西南。同知移駐州署。治東北。以灤河為界。均歸熱河道轄。並裁州同。州判。吏目。改為三巡檢。分駐要隘。從之。○是日。駐蹕半壁店。○甲午。遣官祭

先醫之神。○諭沿途得雪。甚有裨於田功。但道路泥濘。隨從之兵丁。拜唐阿。校尉。太監等。衣服未免濡溼。著各賞一月錢糧。○調湖北布政使嚴瑞龍為山西布政使。以署廣西巡撫安圖。仍為湖北布政使。○是日。駐蹕五里河。○乙未。

上詣

泰陵。未至碑亭。即降輿慟哭。步入

隆恩門。詣

寶城前行禮。躬奠哀慟。王以下文武大臣官員隨行禮。○具摺遣太監詣

皇太后宮問安。○禮部議准。陝西巡撫岱奇奏陝西科場。有左右聿字號。聿右試卷較聿左僅三之一。應將額中舉人二名。一科憑文通取。一科左右分中從之。○工部議准。江蘇巡撫陳大受奏稱。松太海塘各工。與前估各異。有宜停止者。有宜酌辦者。○寶山縣楊家嘴等處。前請接築二層坦水石壩。及原築坦水兩頭石壩等工。准修在案。今該處續被風潮。原坦椿石。愈見外欹。水深四五六尺不等。難以簽釘施工。應將此項工程。請即停止。○楊家嘴採淘港月浦塘。應建護塘單路石壩。并該工段落零星處所。一律接築完固。其外無土塘。內逼城坦之處。應斜填土坡。夯礮堅實。漫以碎石。即將前停修之工價改建。○華亭縣金山嘴。漂缺。胡家廠。林家灣。蔡家馬頭。五處。塘身逼近海洋。最為緊要。先宜加高二

尺均及水涸之時辦理以防春汛從之。○是日駐蹕五里河。○丙申駐防哈密安西提督李繩武奏準噶爾使臣吹納木喀於正月十八日入境二十二日到哈密據云赴京進貢並去歲蒙恩許熬茶齊默特等去歲不遠中道而返恐天朝見責故遣使謝罪並懇仍許熬茶得旨朕已料彼必為熬茶之事再來陳請也。○以禮部左侍郎張廷璐為會試知貢舉大學士鄂爾泰刑部尚書劉吳龍為正考官。

兵部左侍郎汪由敦副都御史仲永檀為副考官。○是日駐蹕半壁店。○丁酉祭

先師孔子遣怡親王弘曉行禮。○吏部議准四川巡撫碩色奏稱綿州屬之魏城驛為西北要衝原設驛馬三十匹該州統轄五縣實難兼管州判分駐豐谷井距驛百里鞭長莫及應添設驛丞一員專司驛務州屬綿竹縣同城主簿所管鹽茶事務知縣可以兼管請即裁改為魏城驛驛丞從之。○禮部議覆

吏部左侍郎蔣溥奏稱會試同考官精神不振者並不加意搜羅輒於額滿後取佳卷未薦者添用薦字圖記掩人耳目嗣後請將圖記交內監試御史庶同考官不得任意補用於校閱益加詳慎應如所請順天鄉試一體遵行從之。○又議准僉都御史彭啟豐奏稱近日學政與督撫相見不遵會典儀注幾同屬官甚至諂拜門生督撫觀風取錄與州縣前列童生輒不論文之佳否暗記坐號拔錄結歡以致孤寒屈抑士怨沸騰查學政與督撫儀注平行奏得專達毋容貶損且文章有一日短長尤宜屏私採錄請飭學臣遵儀制勵丰裁不得自損名節並飭督撫不論學政是何出身但當以公正廉明相勗不得以勢位相凌從之。○工部議覆河南山東河道總督白鍾山奏稱山東運河內南旺西湖隄工原以逼水濟運現在東省瀕河地方年穀順成小民足食無藉傭工反以為苦且運河水

已富有漕船往來迅速。若能以時節宣。可無阻滯之患。此項工程。不特重勞民力。抑且虛費帑金。應請停止。俟水旱不齊之年。資工代賑。再令河撫二臣。會勘估題。應如所請。仍令飭道廳等。不時查察。蓄水濟運。無致阻礙漕路。從之。○禮部題。朝鮮國王李昫。遣使表賀萬壽冬至元旦三大節。及進歲貢方物。賞賚筵宴如例。○是日。駐蹕黃新莊。○戊戌祭大社。

大稷。遣誠親王允祕。恭代行禮。○

上幸南苑行圍。○是日。駐蹕南苑。至辛丑皆如之。○己亥。

上具摺遣太監詣

皇太后宮問安。○琉球國中山王尚敬。遣紫巾

官翁鴻業等。表進正貢。賞賚筵宴如例。○庚子。

上詣

永慕寺行禮。○禮部議。覆貴州學政鄒一桂奏稱。永豐州學係新開。未設廩增。每屆科考。諸

生試居優等。無以勸勉。且亦無人辨認童生頂冒。應如所請。額設廩增二名。稽查童試。但必俟食餼十年。方准出貢。以後四年一貢。廩餼照例撥給。從之。○緩徵安徽鳳陽潁州泗州屬。乾隆六年水災額賦。兼帶徵銀米。○辛丑。

孝康章皇后忌辰。遣官祭

孝陵。○補行乾隆四年分大計。山東卓異官四員。不謹官一員。罷軟官二員。年老官九員。有疾官四員。才力不及官一員。浮躁官一員。分別陞賞處分如例。○壬寅。

上自南苑還宮。○癸卯。命定漢軍考職就銓例。諭國家定制。漢軍人員。俱歸併漢缺一體錄用。其另置有漢軍額缺者。雖選用之法。微有不同。亦仍由漢缺陞轉。惟外官主簿以下等微員。舊例不用漢軍。故貢監考職。至縣丞而止。朕意嗣後漢軍貢監。應一體准其考取主簿吏目等職銜。有願改降各項雜職者。亦准

改降。其如何另立班次。分別銓選之處。該部酌議具奏。○大學士等議覆。御史薛澂奏。請于會試下第舉人內。擇其明通者。取用教職。不必更派閱卷官。即令總裁先錄薦卷。不足再挑備卷。大省六十名。中省四十。小省三十。與正榜同揭。勅下禮部。揀選引見。到官六年。優者准督撫保用知縣。應如所請。從之。○戶部等部議准。黑龍江將軍博第等奏。呼蘭官莊糧石。原以備黑龍江等處兵丁接濟。今黑龍江倉貯不敷。于呼蘭撥穀一萬二千五百石運貯。從之。○調天津府同知楊灝來京引見。○甲辰。遣官祭黑龍潭。

昭靈沛澤龍王之神。○定拔貢十二年舉行。并飭科舉毋冒濫。諭國家於科目取士之外。又有拔貢一途。所以收未盡之人材。以廣備用之數也。我朝教澤涵濡。人文日盛。又復屢開恩科。加添中額。是以所取進士。濟濟多人。而舉人則日積日衆。竟有需次多年。而不得

一官者。此亦事勢之必然。無足怪者。朕為此時屢於懷。屢籌疏通之策。若又添取拔貢。以分其缺。數年一次舉行。則人愈多而缺愈少。舉人銓選。更遥遥無期矣。朕思拔貢乃係生員中之優者。夫既為文學華瞻之青衿。則應科舉時。自能脫穎而出。又不專藉選拔。以為呈身之路也。查從前選拔。或十數年一舉。今則六年一舉。為期太近。理應酌量變通。嗣後著定為十二年選拔一次。永著為例。再者各省應試生員貢監。由學臣錄送入場。向例每舉人一名。額取科舉三十名。嗣後加至一百名。亦不為不多矣。乃學臣等博寬大之名。於科舉之外。遺材大收。一概錄送。且有督撫好行其德。普收送考者。以致文理荒疎之人。皆得濫冒入場。試卷太多。不但試官於倉猝之中。難於別擇。而浮薄之士子。將以觀光為遊戲。而不復攻苦於寒窗。於賓興大典。甚有關係。嗣後學臣各宜留心。慎重辦理。毋得濫溢。

永著為例。○戶部議覆。湖北巡撫范琛奏稱。湖北州縣常平倉穀。多寡懸殊。平糶時。此豐彼嗇。價有昂減。應於捐監項下。酌盈劑虛。以符定額。但本色報捐之例。奉文三載。捐者寥寥。實緣本色重於折色。請將原例所稱百石之數。准以九折報捐。其苗疆與不產穀處。准用雜穀從之。○工部議准。直隸總督高斌奏稱。北運河楊村廳所屬。磚廠郭官屯曹家園沈家子各隄。均屬緊要。卑淺殘缺。請急加高培厚。以資鞏固。從之。○四川巡撫碩色奏。重慶府渝關木稅。與雜稅不同。大木伐自深山。水溢順流而下。水涸則積於深溝淺溪。未能抵渝。木筏多寡既懸。稅銀盈虛亦異。乾隆三年四年。短稅銀三百兩有奇。五年。額外餘銀三千八百餘兩之多。管關知府。不敢匿報。稟請扣盈補乏。臣恐涉扶同徇隱。許其全解。請豁格於部議。現已准咨轉飭補解。但恐臣言不足取信於屬員。無以責其潔已奉公。仍懇

免賠解。得旨。如所請行。○乙巳春分。朝日於東郊。

上親詣行禮。○諭兵部。原任廣東左翼總兵官章隆。現在來京引見。著兵部存記。有事簡總兵缺出。將章隆請旨。

大清高宗法天隆運至誠先覺體元立極敷文奮武孝慈神聖純皇帝實錄卷之一百六十

大清高宗法天隆運至誠先覺體元立極敷文奮武孝慈神聖純皇帝實錄卷之一百六十一

上修總纂官經筵講官太子太傅文淵閣大學士文淵閣領閣事傅衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級奉常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

奉常紀錄十四次臣德琳經筵講官太子少保工部尚書紀錄六次臣曹振鏞等奉

敕修

乾隆七年壬戌二月丙午

上御乾清門聽政○遣官祭

關帝廟○遣官祭昭忠祠○諭朕愛養黎元盱眙

宵衣惟恐薄海內外有一夫不獲其所邊徼疲乏

之地尤所廕念不惜沛恩於常格之外固已

屢降諭旨矣頃思甘肅一省地處西陲民貧

土瘠前此頻歲軍興嗣後連遭亢旱雖去年

各屬內有收成稍稔之州縣而民間元氣未

能遽復加意培養正在此時查自雍正六年

起至上年春夏止各屬民欠借糧積至一百

一十四萬餘石例應按數徵收以清公項但

思小民當積困之後若將新舊糧石一時並

徵恐因竭蹶輸將以致生計窘迫非朕撫綏

培養之本懷著將雍正六年至十三年借欠

之項一概蠲免其乾隆元年以後借欠之項

從壬戌年為始分作六年帶徵至涼州西寧

二府所屬之武威平番永昌古浪西寧碾伯

等六縣乃甘省最寒苦之區上年又被旱災

深可憫惻昨已降旨將此六縣民欠額糧草

束等項分作三年帶徵今既加恩通省將雍

正十三年以前舊欠悉行蠲免此六縣民欠

雖在雍正十三年以後而彼地民力艱難甚

於他邑著將此帶徵之項一併蠲免以示朕

加惠邊氓之至意○又諭江南廬鳳宿州淮

徐等處上年遭值水災黎民乏食朕已屢降

諭旨多方賑濟期蘇閭閻之困近聞百姓餬

口無資仍不免於流離艱苦蓋由該地方屢

年疊遭饑饉督撫等雖照例辦理但不能淪

洽普周登之衽席。當此春耕之時。黎民苟失其所。秋成何望焉。用是深為軫念。著刑部侍郎周學健。馳驛前往。會同總督那蘇圖。巡撫陳大受。張楷。實心體察。和衷籌畫。務使朝廷德意。得以下逮。無致一夫失所。至於此等地方。屢被水患。必有致此之由。不可忽視。即如陂塘溝洫之類。亦當加意講求。使除其害而收其益。著周學健會同該督撫一併悉心妥議具奏。○又諭。近因直隸。山東。河南等省。老爪惡賊。甚為害於地方。屢諭各省設法嚴拏。以除凶暴。而安良善。今有人奏稱。陽信縣拏獲老爪賊馬佩天。楊開等二十一名。供稱行劫方法。俱係馬佩天一人傳授。而馬佩天又得之於河南祥符縣人朱繩武。又有李名旺。吳三毛等二人。均籍隸祥符。與朱繩武同夥。又有山西陽曲縣人趙崇武。並伊姪趙三。俱係積慣老爪賊等語。朕思此等兇徒。既已流毒於隣省。則本地自必更甚。著雅爾圖。喀爾

吉善密行查拏務獲。審明從前謀劫各案。從重治罪。如事隔多年。朱繩武等本犯已故。即查其有無子孫。是否為匪。黨羽何人。藏匿何處。必須一一究出。務淨根株。毋使一名漏網。○丁未。以舉行仲春經筵。遣官告祭奉先殿。

傳心殿

上御文華殿。講官暨侍班之大學士九卿詹事等。行二跪六叩禮。分班入殿內序立。直講官四人出就講案前。行一跪三叩禮。復位。直講官三泰。陳惠華進講。大學詩云。樂只君子。民之父母。民之所好好之。民之所惡惡之。此之謂民之父母。一節講畢。上宣御論曰。樂只君子。民之父母。民之所好好之。民之所惡惡之。此之謂民之父母。蓋言君子與民相關之切。亦猶父母之愛其子耳。設云民之所好不能自遂。君子從而遂其好焉。民有所惡不能自去。君子從而去其惡焉。是猶視乎民之好惡以為則。父母之謂何。細味詩云。民之父母。大學以為民之

所好好之。民之所惡惡之。蓋其相關之切。有不待民之好民之惡。而君子已同其好惡者。此之謂民之父母也。盍亦觀乎父母之於嬰孩乎。啼而知其飢焉。笑而知其愉焉。其飢也亦憂之。其愉也亦咻之。豈必待嬰孩之自言乎。君子之於民。亦猶是而已矣。故父母之於子。雖竭盡劬勞。初不自謂能盡父母之道。而責報於其子。君子之於民。雖惠鮮懷保。初不自謂能盡君子之職。而責報於其民。夫萬民之心。一大君之心也。董子曰。君心正而天下莫不歸於正。蓋得絜矩之

本。講官暨侍班官跪聆畢。興。直講官索柱。梁詩正進講。易經元者善之長也。亨者嘉之會也。利者義之和也。貞者事之幹也。一節講畢。上宣御論曰。元者善之長也。亨者嘉之會也。利者義之和也。貞者事之幹也。天具四德而為春夏秋冬。人體四德而為仁義禮智。然夏秋冬咸統於春。而義禮智實歸於仁。故曰元者善之長也。惟其善之長。故亨亦元之亨。利亦元之利。貞亦元之貞。天道一人道。故曰仁也。

者人也。合而言之道也。苟失其仁。則不可以為人。於義禮智乎何有。故氣成形而理成性。苟無其氣。不可以成形。苟無其理。不可以成性。而其氣其理。總一元為之樞紐。大哉乾元。萬物資始。乃統天。夫子蓋明示之矣。講官暨侍班官跪聆畢。大學士張廷玉奏曰。

皇上明君民一體之情。闡天人同符之理。洞悉治要。直揭本原。廣大精微。發千古所未發。臣等不勝欽服。奏畢。諸臣出就拜位。行二跪六叩禮。禮成。

上還宮。賜講官及侍班官等宴於協和門。○管理荆關稅務員外郎西寧奏。荆關稅課正項火耗歸公。公費不敷。請於一年期滿。在贏餘項下動支三千兩。分款據實報銷。得旨。如所請行。○戊申。上詣暢春園問。

皇太后安。○幸圓明園。○以通政使鄧鍾岳為禮部右侍郎。太常寺卿朱必堦為大理寺卿。太僕寺卿彭樹葵為宗人府府丞。○以吏部左侍郎蔣溥充經筵講官。○己酉。禮部尚書

趙國麟以病乞休。得旨卿簡任秩宗。正資料理。覽奏以患病求罷。著在任調治。照舊供職。○吏部議准。理藩院奏稱。臣院筆帖式。每旗六缺。考取候補者多。若照例將土默特筆帖式補用。恐致壅滯。且窮苦蒙古。無恒產在京。需次必困。請將歸化城保送人員。陞授八品空銜筆帖式。回籍行走。並飭該管將軍試看。有行走好者。即以應陞官與各項効力人。一同揀用。從之。○庚戌。工部議覆江西巡撫陳宏謀奏稱。江西郡縣。非濱江湖。即環山嶺。全賴圩堤閘壩陂塘堰圳。以資防禦灌漑。已飭牧令親勘督修。不得觀望後期。敷衍塞責。其本無蓄洩之備。及年久工廢者。即督令創修。民力不及者。應准其支鹽項充公銀。以資要工。虛冒侵蝕者。叅革治罪。至稱三年之內。著有實效。將各該員保題陞用之處。應令該管上司將該員督率事實。以及並無需索一併申報。倘有扶同捏飾。及借端需索者。分別叅

處。從之。○命大學士徐本。刑部侍郎張煦。工部侍郎德齡。閱會試迴避卷。○辛亥。上詣暢春園問

皇太后安。○戶部議覆閩浙總督兼管浙江巡撫宗室德沛奏起運白糧事。查從前丁船。附近水次長運。易滋弊竇。定五年抽換之例。江省久經遵行。惟浙省白糧。節據總漕咨題。請免抽調。臣部議令照例辦理。今署撫奏請。漕自為漕。白自為白。免其五年抽查。俾得駕輕就熟。易於遵辦。但查漕白各丁。不願更張。果否確情。而白幫各丁。令其長運。果否永無貽誤。摺內俱未聲叙。應令會同漕督。將該省運白幫船。實在不能抽調情形。及免其抽調無誤運白之處。詳查具題再議。從之。○壬子。

皇后千秋節。奉

皇太后懿旨。今年停止行禮筵宴。○癸丑。大學士徐本等進呈閱定迴避卷得旨。此三卷著

照所擬取中。交與主考官酌量名次。填寫入榜。○甲寅諭。畿輔近地上冬少雪。今春雖有得雪之處。而京師一帶。未曾霑足。茲當耕種之時。待澤孔殷。而春霖未降。朕心甚為憂惕。著禮部太常寺擇日敬謹祈禱。以展朕為民請命之忱。○又諭。上年浙江杭湖二府屬之仁錢等九州縣。田禾被水。民力拮据。其成災田畝。所有應徵漕糧。朕已降旨。按分蠲免。其蠲剩並歉收田畝。應完米石。部議令於今年照例徵收起運。計此時正民間應行完納之期矣。朕思田畝即屬歉收。所獲自然不足。自上秋以至今春。為時已久。即有餘粒。業已日食無存。若令按期完納。勢必買米交倉。輸將竭蹶。查漕糧早已開兌北上。此米尚可緩期。著將歉收田畝。應徵漕糧。并改漕米石。緩至今冬徵收起運。俾民間從容輸納。以紓民力。該部即行文該督撫知之。○戶部議覆。署閩浙總督策楞奏稱。福寧府新設。計應貯穀

四萬石。僅有倉三十七間。應增建十三間。從之。○刑部等衙門議覆。廣西巡撫楊錫紱奏稱。逆犯吳金銀。主使殺官。拒傷官兵。應凌遲處死。楊老裏手斃命官五員。逆惡已極。雖伏冥誅。仍應戮屍梟示。應如所請。從之。○乙卯。上詣暢春園。問

皇太后安。○遣官祭賢良祠。○諭曰。歸化城都統瑪尼。著來京候旨。所遺員缺。著吉當阿補授。歸化城副都統色克圖。既係吉當阿之弟。亦著來京。其所遺員缺。著鑲白旗蒙古副都統札木蘇調補。札木蘇所遺員缺。著色克圖補授。○兵部議准。兩江總督那蘇圖奏。請增建海州營營房八十七間。馬棚三間。東海營營房十八間。從之。○丙辰。

孝昭仁皇后忌辰。遣官祭

景陵。○戶部議准。山西巡撫喀爾吉善奏。請裁晉省州縣之次衝及簡僻者。民壯四百四十名。從之。○工部議准。雲南巡撫張允隨奏。

請濬築保山縣黑龍碕。魯甸、箐口、河思安縣、龍碕、李子灣、水塘壩、灑魚河等處泉源水開。於官莊變價銀內支銷。從之。○兵部則例告成。總裁以下議敘有差。○調原任六安營叅將王從繩來京引見。○丁巳。蠲福建無田浮賦。諭朕聞福建崇安縣有荒缺田額一千二百五十一頃零。雖載在賦役全書。實係坍塌年久。並無現在可墾之土。雍正七年清查地畝。分別限墾。知縣陳同善不行查核。惟將原額內約舉三分之一。捏報可墾田四百一十九頃零。照例限年墾復。雍正十年。知縣劉靖亦照三分之一。捏報墾復田一百三十九頃零。雍正十一年。又捏報墾復田一百五十頃零。共加徵銀二千二百三兩零。米二百六十石零。此項錢糧俱係灑派里戶代完。實屬無田浮賦。朕心軫念。特頒諭旨。按數蠲除。以免小民之累。至從前捏報之歷任知縣及失察之上司。理應交部議處。姑念事在恩赦以前。

免其察議。○又諭嗣後鴻臚寺隨駕查取沿途官員職名。不必將查斯海奏派戶部議准山西巡撫喀爾吉善奏稱。綏遠城駐防兵草折銀兩。於開墾地畝歲徵銀內給四分之一。但口外九月開徵以前。無項可支。難按月給放。又不便借動他款。請統於估項冊內一體撥給。所有額徵草折銀一萬二千七百兩零。飭各屬徵報。以抵採買米豆之需。從之。○授莊親王女為鄉君。塔大學士伯鄂爾泰子鄂欣為鄉君。額駙。○戊午。遣官祭歷代帝王廟。○諭曰。從前廷臣議准張渠買補倉穀一事。以本歲之贏餘為本邑之撥補。其他州縣不得通融。如歲歉穀價昂貴。不敷採買。准其展限。朕思積穀原以備民間緩急之需。必及時買足。方於蓄儲有益。若一概不許通融。而無贏餘之州縣。或又值歲歉價昂。咨部展限。則倉儲必致久懸。非濟民利用之道也。嗣後如該州縣當秋成之時。穀價高昂。不能買補。而

該處存倉穀石。尚可接濟者。照例詳請展限。於次年買補。倘穀價既屬不敷。而貯倉穀石。又係不足者。准其詳明上司。以別州縣穀價之贏餘。添補採買。為酌盈濟虛。挹彼注茲之計。該管督撫不時查察。一面辦理。一面奏聞。又從前張渠奏請減價糶穀。於成熟之年。每一石照市價覈減五分。米貴之年。每一石照市價覈減一錢。此蓋欲杜奸民賤糶貴糶之弊也。但思尋常出陳易新之際。自應遵此例行。假若荒歉之歲。穀價甚昂。止照例減價一錢。則窮民得米。仍屬艱難。不能大沾恩澤。嗣後著該督撫臨時酌量情形。將應減若干之處。豫行奏聞請旨。如有奸民賤糶貴糶之弊。嚴拏究治。目今江南督撫。即同欽差遵照此旨。一面辦理。一面具奏。○軍機大臣會同戶部議覆。兩廣總督公慶復廣西巡撫楊錫紱奏稱。桑江逆苗入官之產。可作堡田者二千四百畝。驟募堡卒不及。暫與苗民耕種完租。

其畸零瘠薄之田。即給苗民自種。薄徵其出。但堡卒皆無產游惰之民。安分守法者。不肯承充。其素無產業游手惰民。重以官之招募。視苗徭有如奴隸。且聞多不自耕。仍資苗代。久之。又主持教唆。使為不法。前首逆張老金。即堡卒也。又苗性兇貪。以其世受族居之地。為他人所據。不得佃耕。積怨不能相安。本年釐產募耕。點者已不能平。桑江一隅。設重兵彈壓。堡卒直無所用。不但缺者不必足額。即已募者亦可令其回籍。將田全給就近苗徭。分耕薄斂。且以為該地積貯。責理苗通判經理。可備新設協營之餉。可免柳慶二府山運之艱。無損有益。應如所請。但已招堡卒承種一載。勒令復回。房屋牛具籽本。均有所費。宜熟籌不致失所之道。妥協辦理。從之。○兵部議覆。議政大臣和碩裕親王廣祿等。會議寧古塔將軍鄂彌達奏稱。船廠屯莊居住人。離城較遠。各佐領驍騎校。鞭長莫及。設有屯長。

族長多係黥奴或以閑散人丁家僕充數請挑留素行尚端者餘俱革退所遺名缺請於因公墨誤廢員及領催披甲內揀選令協領等具保補放應如所請有管教好者酌量獎勵所稱廢員以原職用領催披甲以驍騎校用之處不惟過優且啟廢員僥倖致兵丁陞階壅滯礙不可行從之○予故太子少保兵部尚書銜致仕甘肅提督路振聲祭葬如例○命工部郎中蔣蔚提督四川學政翰林院檢討阮學浩提督湖南學政○調山西按察使陳高翔為江蘇按察使○己未禮部以會試中額請得旨這會試滿洲蒙古取中十一名漢軍二名直隸二十八名奉天二名山東十九名山西十八名河南十五名陝西十五名江南三十五名浙江二十八名江西三十名湖北十五名湖南九名福建二十名廣東十九名廣西七名四川十名貴州九名雲南十名旗卷五經一名南卷八名北卷

三名中卷二名○旌表守正捐軀之江蘇銅山縣民趙文賢妻吉氏○是月御史沈世楓郎中官保奏賑例凡家有斗儲及執藝者不與又一家數口不偏給臣奉使經過上江男婦老幼尪羸呼籲知為成例所拘請飭下欽差督撫一體加賑得旨此奏著寄與周學健看尋周學健奏奉寄閱御史沈世楓等奏加賑一摺徐州府屬災民應就原賑戶口於恩旨外加賑一兩月不等並收養外籍流民得旨所奏俱悉若往返待旨恐緩不濟急汝可便宜從事一面辦理一面奏聞○直隸總督高斌奏瑞雪普徧得旨覽此似尚未為霑足我君臣俱不可稍存驕泰之心也○江西巡撫陳宏謀奏江西社穀州縣多少有無不均請撥常平倉貯分作社本貯鄉令民就近借還源源生息得旨所辦甚屬妥協知道了○署閩浙總督策楞奏漳浦海澄長泰平和詔安五縣鹽經前督臣郝玉麟以招商未集暫

委該縣官運。具運銷盈絀。辦理勤惰。部無從覈。書吏家人。弊混病民。現飭歸商運。俟招足查請定引。得旨。是。查明題請可也。○兩江總督那蘇圖奏。六安地處深山。素稱盜藪。所叅叅將王從繩。在任三年。地方寧謐。所管營汛遼濶。往來巡哨。致疎操練。功過自不相掩。得旨。知道了。○又奏。遵查淮徐地方。清明節後。種高粱者。十居三四。春水涸處。不致荒廢。低窪之區。無從宣洩。為數無多。不納錢糧。民以葦草魚蝦為利。涸則隨時播種。積水未消。不足礙民生計。至各屬賑借。恩已無可復加。來往飢民。或虞顛仆。煮粥接濟。飭舉應動工程。寓賑於工。俟春耕酌借籽粒。設廠平糶。得旨。覽奏朕懷稍慰。但以朕所聞。淮徐等處飢民。尚不無失所者。茲特差周學健前往查賑。卿與彼悉心酌議。以救災黎。以副朕如傷之念。○江蘇巡撫陳大受奏。淮北各屬。連年荒歉。十室九空。牛損七八。上年秋後。即飭屬發社

倉。借給麥種牛價。有請寓賑於工者。須俟物料備具。緩不及事。且庫項未充。因一費十。似可不必。現飭趕辦平糶。并稽防奸匪搶奪為害。得旨。所奏俱悉。已差周學健前往。汝等與彼悉心詳議。務使災黎毋致失所。以副朕已飢已溺之懷焉。○又奏。查沛縣飢民。採食野蒿草根。多致死亡。深堪憫惻。現飭司酌動減存餘平銀兩。除極貧現在加賑外。查實難存活者。照賑數折銀酌借口糧兩月。其災重未賑次貧之銅山。宿遷。清河。安東。桃源等處。有似此者。一體酌辦。得旨。自應如是辦理者。○安徽巡撫張楷奏。查宿州。靈璧。虹縣。泗州。天長。五河等處。積水涸出十九。其未消及消而泥濘者。一縣無幾。且半屬灘地。無糧者多。至已涸可種者。現查明借與籽種。得旨。覽奏稍慰朕懷。然朕猶恐地方官或有欺汝等之處。故特差大臣前往查賑。汝等與彼和衷妥辦可也。○湖廣總督孫嘉淦奏。諱匿災荒。督撫

錮弊。節省錢糧。亦督撫薪傳。幸聖諭諄諄。俾改陋習。即或辦理過厚。適彰覆育深仁。繫民心而召甘和。易災祲而為豐稔。實在於此。閱安寧奏摺。畧大言細。督撫稍知治體。總防濫賑。必不匿災。但恐下之從上。每不從令而從意。見抄示此奏。或妄生揣摩。借惜帑為名。以報災為戒。其流弊較之濫賑干譽。孰輕孰重。人臣不思贊襄至治。反倡經費不足之說。萬一衆口所咻。節財念勝。而行仁之意不堅。弊又不止災民之不被澤也。至於民氣之驕。由有司所行不足以服之。遇有災荒。正小民號呼赴愬之時。乃惡其驕而欲嗇其賑。以苦之。則是惡赤子之啼號。反嗇其乳哺。而曰吾以治驕。無是理也。得旨。覽奏甚合朕意。且朕於安寧之奏。並未明頒以示羣下者。正謂此耳。而其所指流弊。亦間或有之。是以令各省督撫知之耳。至卿言實為正論。上年十一月間。朕復有旨頒發。大約與卿所奏同也。○河南

巡撫雅爾圖奏京員奉差地方官迎送供帳。視為固然。雖清吏不能概絕。滋費習諂。殊乖體制。且恐以趨承末節。軒輊人才。所關非細。應請中禁。得旨。此奏固是。但所指者何人耶。明白奏來。朕再酌量。○又奏。遵閱安寧奏摺。言多過當。竊以請豁錢糧。請興水利。或開僥倖之門。或飽吏胥之壑。此數端宜詳慎辦理。若災傷賑恤。豫存節省之心。致赤子仳離。盜賊滋起。事後撫恤。地荒時違。補救更費。有司匿災釀事。本干例議。如謂當時姑容。因事再斥。舍重議輕。失大公之義。且恐玩愒成風。民隱無由上達。又內外災傷。理宜一視。邊地貧瘠。西南用兵。元氣未復。正當加意撫綏。況民風強勁。毗連外境。得其力捍衛可資。失其心走險亦易。安寧所言。非慎重邊防之道。得旨。安寧之奏。朕原未以為得中。故不曾頒發。僅令大學士等鈔錄寄字各督撫。不過令各督撫知有此奏。此後辦理。仍在各督撫之因地

制宜而已。即雅爾圖此奏當固當矣。若細按之。亦有扞格而不能行者。總之有治人無治法。然雅爾圖此奏。又不無補安寧未及之處。大學士等將朕諭並雅爾圖之奏。鈔寄各督撫知之。○川陝總督尹繼善奏。準噶爾以無用之產。易中國之財。實欲時通往來。探內地虛實。積年貿易。官賠商累。臣畧為裁制。並非苛刻。致啟猜嫌。其前假內地入藏。事原不順。因防範甚嚴。不能飽欲。中道而回。此番使臣

乃復詭詞問故。言雖卑抑。心更難知。總之夷人貪而無恥。狡而多疑。其恭順固不足喜。即詭詐亦不足慮。惟有修明邊備。慎固封守。在我無隙可乘。在彼自無所施其伎。至於近理之事。示以寬仁。非分之欲。即加裁抑。倘以所求不遂。交易漸疎。既省嫌釁。復除膠轕。於邊境更為有益。得旨。所見甚正。即如此辦理可也。○署陝西巡撫岱奇奏。通省常平社穀。徵收買補。共九十二萬一千餘石。尾欠暫停催

徵。以紓民力。得旨。所辦甚妥。知道了。○左都御史管廣東巡撫事王安國奏。瓊屬裁插。纔十之一二。望雨甚亟。迭經買撥。足資借糶。又廣肇等府。米價各增。飭屬平糶接濟。得旨。所奏俱悉。粵東連歲歉收。深厯朕念。一切政務。實心料理。毋徒為粉飾之計也。○雲貴總督張允隨奏。昭通府地阻舟楫。物貴民艱。查鹽井渡。水達川江。可通商運。自渡至敘州府安邊汛。七十二灘。惟黃角磳等十一險灘。宜大

疏鑿。暫須起剝。餘只畧修。并開緯道。其自昭通抵渡。旱路崎嶇九處。開廣便行。現運銅赴渡入船。腳費多省。以積省之費。開修險灘。帑不靡而功可就。不獨昭東各郡。物價得平。即黔省威寧等處。亦可運米流通。得旨。既已試行有效。即照所議辦理可也。○又奏。金沙江上游六百七十餘里。應修者三十五灘。其自雙佛至蜈蚣嶺。十五灘最險。開鑿後仍須數次盤剝。崖窄難行。查石聖灘南岸。有路繞出

碎瓊灘。約百里可開設馬站。銅船至碎瓊起剝。石聖下船。可免險路層剝。費省工易。已將大灘數處開修。空船可行。餘灘易竣。至下游六百餘里。如凹崖三腔鑼等十餘險灘。並宜大加疏鑿。現或興工。或勘估未畢。其工銀在銅息內動支。計年餘銅息足用。毋庸撥帑。得旨。知道了。勉力詳酌為之。而不可欲速也。○江南提督吳進義奏。提標右營及川沙南匯劉河三營兵米。請於各就近州縣關支。既免風濤。并省腳費。餘營仍舊得旨。即照此辦理可也。○湖廣提督王無黨奏。湖省軍裝殘缺。向以買馬餘朋銀兩。陸續領修。勢難畫一。請照黔省辦理。不拘動用何項。將餘朋銀兩按年補還。再演試本標子母礮鳥鎗。均係口敞堂寬。食藥輕薄。不能致遠取準。現飭修造。并檄各營畫一整理。得旨。知道了。然須用之實際。若徒為營員開銷之計。則將來汝不能辭其責也。○西安右翼漢軍副都統彭珠奏。參

正黃旗協領王璉。強以家奴占補。隔旗披甲。得旨。汝不聽將軍叅奏而越奏。甚屬不合。亦或其中別有故耶。將此旨交與綽爾多。聽其查叅。

大清高宗法天隆運至誠先覺體元立極敷文奮武孝慈神聖純皇帝實錄卷之一百六十一

大清高宗法天隆運至誠先覺體元立極敷文
奮武孝慈神聖純皇帝實錄卷之一百六十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文淵閣大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆七年壬戌三月庚申朔清明節

上詣

恩佑寺。

安佑宮行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○

上御勤政殿聽政。○飭九卿大臣體國盡職諭
入春以來雖得微雪而雨澤未沛朕心甚為
憂慮不知者視為無關已事其知者以為時
尚早無煩廛念朕謂當此旱勢將成未成之
際我君臣正當早作夜思力圖補救若早已
成災夫復何及近來九卿大臣朕實灼見其
無作奸犯科之人亦未聞有作奸犯科之事
然所謂公忠體國克盡大臣之職者則未可
以易易數也不過早入衙署辦理稿案歸至
家中閉戶不見一客以此為安靜守分其自
為謀則得矣如國事何朕亦非因天時稍旱
而以此責諸臣也凡朕所以責諸臣者皆朕
早夜之所自責國家繼緒百年累洽重熙至
於今日可謂承平無事然於無事之日而竟
謂無可事事則將來必有事隨之懷安即是
危機徂治即為亂本盈虛消息之理不可不

慎。朕實不能一刻去諸懷也。至於外而督撫內而九卿。朕之股肱心膂也。萬方億兆皆吾赤子。其為朕教養此赤子者。朕非爾等是賴。其將奚賴。今爾等惟以循例辦稿為供職。並無深謀遠慮。為國家根本之計。安所謂大臣者歟。如僅循例辦稿已也。則一老吏能之。且其律例規條之熟。爾等尚有不知者。豈朕之所望於諸臣耶。從前公卿大臣。因循成習。

皇考世宗憲皇帝。飭綱陳紀。肫切訓誡。惟時在廷震動恪恭。罔敢懈逸。朕承丕緒。嘉與士大夫。養以和平之福。乃今而知執兩用中之難。非過即不及。爾等不爭自濯磨。殫心體國。則風會所流。其因循苟且之習。不二三年。將復如舊矣。朕七年中宵旰孜孜。於一切政事。似無大過舉。然即有過舉。朕亦不能自知。爾等身為大臣。若有所見。自當據實指陳。試思朕七年中。誰是以言得罪者。孟子曰。責難於君。謂之恭。陳善閉邪。謂之敬。爾九卿中。能責難

於君者何人。陳善閉邪者何事。即有陳奏。不過請改一規條。更一律例。是即可為久安長治之大猷乎。朕廣開言路。而科道所奏。亦不過撝拾瑣碎。無裨政體。即有一二人言可採取者。要以意在立名。或期朕之見知。以邀超擢。此輩不必擢至公輔。但得僉都御史。副都御史等職。便已緘默不言矣。此皆為身家之念重。視國家之事輕故也。朕幼讀詩書。頗諳治理。御極以來。無日不思措天下於郅隆。今起視天下。太平果有象乎。八旗生計。固患不足。然但思八旗富足。所見亦小。天下百姓與八旗何異。但當熟計而深籌之。其所為根本之計。安在。從來教養兼施。而教即寓於養之中。今家給戶足。尚且未能。何云禮教。豈此數員教官。管轄秀才。便可為教乎。況並不能管轄秀才之教官。亦不少也。目今生齒益眾。民食愈艱。使猝遇旱乾水溢。其將何以為計。我君臣不及時籌畫。又將何待。歲月如流。迄以

無成乃曰俟諸後人不幾為天下後世笑乎
似此因循苟且之習不改竟與鄉原無異若
聽爾等為鄉原則朕亦一鄉原之主矣朕實
赧焉爾等年齡大率多長於朕更事較深其
互相警惕恚意遠思務為可久可大之圖不
徒以循分供職為事則庶幾古大臣之風而
有當於持盈保泰之道矣○召琉球國使臣
翁鴻業等進見○辛酉

上詣暢春園問

皇太后安○還宮○戶部議覆御史薛澂奏稱
各省設立義倉原應聽民樂輸穀石乃州縣
等官令鄉長里首舉報富戶按地畝之多寡
定穀石數目勒派輸納胥役遂得因緣為奸
閭閻滋累請勅下直省督撫飭屬聽民量力
捐輸違者照例嚴叅應如所請從之○禮部
議覆馬蘭鎮總兵布蘭泰奏稱

陵寢祭祀品物理宜精潔以昭誠敬先行呈樣
原慮承辦員役草率製備若將呈樣品物豫

留私署未免妄費嗣後每品祇許留貯數枚

可辨精粗又官員雖有公事承辦仍應每月
按期坐班嗣後大祭忌辰朔望外每逢三六
九之期齊集不得藉稱公事曠期又兵丁運
柴原因風水重地不便堆積但枵腹趨事無
以示鼓勵嗣後每兵酌賞錢三十文路可通
車者兵丁所領令其自運公用官為酌給車
輛其木柴舫重需車輛若干造冊報部又包
衣官員缺出並不報明總理衙門嗣後應照

盛京呈報將軍定例凡包衣官員仍歸總管
揀選呈明總理事務衙門從之○工部議准
閩浙總督兼理兩浙鹽政宗室德沛奏報橫
浦場華亭金山二縣境內下則場蕩因築海
塘挖廢二百三十一畝有奇請予豁除從之
○壬戌諭禮部凡外國使臣在京若遇禁止
屠宰其每日應得食物著照常給與嗣後永
著為例○山東巡撫朱定元進呈濟陽縣貢
生張爾岐儀禮鄭注句讀得旨此書交與三

禮館總裁官閱看。如有可採擇者。留於該館。以備採擇。○吏部等部議覆。御史孫灝奏。稱安民在於察吏。督撫為國用人。當屏伺察之風。杜告訐之路。近者大吏好寄耳目於人。其人或吏治未能周悉。或居心不免偏私。憑藉委任。顛倒是非。毀譽失實。請勅下直省督撫。務宜公正居心。精明自勵。即地方遠濶。不得不資採訪。亦必周詳慎重。毋偏聽生奸。應如所請。從之。○癸亥。

上耕耤詣

先農壇行禮。更服。至耤田所。

躬耕三推。復加一推。

御觀耕臺。命莊親王允祿。裕親王廣祿。和親王弘晝。各五推。吏部侍郎蔣溥。戶部侍郎三和。禮部尚書三泰。兵部尚書任蘭枝。刑部尚書來保。工部侍郎索柱。副都御史德爾敏。通政使五齡安。大理寺少卿盧承綸。各九推。畢。順天府府尹率農夫終畝。賞賚耆老農夫如例。

○甲子。諭理藩院承襲扎薩克圖汗號。爾衙門將原汗子孫。台吉圖巴扎卜多岳特。并現出缺之扎薩克圖汗之子巴爾達爾。帶領引見。朕思原扎薩克圖汗。從前獲罪。

皇考施恩。保全性命。革去汗號。與伊一族王格勒克雅木丕爾承襲。格勒克雅木丕爾奉職無過。且在軍前甚屬効力。此汗號應襲與伊子巴爾達爾。雖圖巴扎卜多岳特。稱係其嫡支子孫。然伊等並非應行承襲汗號者之子也。扎薩克圖汗著郡王巴爾達爾承襲。台吉圖巴扎卜多岳特。看來人去得。奏對亦甚明白。著加恩授為一等台吉。在乾清門行走。○以河南城守尉色爾圖。為寧夏左翼副都統。○乙丑。

上詣暢春園。問

皇太后安。○幸圓明園。○兵部議准。貴州總督張廣泗。議覆臣部咨。將貴州新兵。量為

汰減。謹酌裁撫標左右營。安龍鎮標中左右營。各五十名。威寧鎮標左右營。鎮遠鎮標中左右營。各百名。大定。平遠。黔西。定廣。遵義。清江。銅仁。上江。八協。一千三百五十名。長寨。丹江。台拱。朗洞。貴陽。畢赤。長壩。安南。歸化。下江。水城。天柱。永安。普安。仁懷。黃平。凱里。十七營。並安順城守營。二千一百名。古州道標一百名。古州八寨。清江。丹江。台拱。都江。各廳標三百名。其裁存馬兵改步者三百九十五名。又裁經制把總。及外委千把五十四員。從之。○以慎郡王允禧。大學士鄂爾泰。充

玉牒館總裁。大學士陳世倌。協辦大學士禮部尚書三泰。工部侍郎索柱。內閣學士覺羅吳拜。充副總裁。○丙寅。大學士等議覆。刑部侍郎張熙周。學健奏稱。婦人殺人。有名分。罪不至死者。比於姦盜不孝。決杖一百。餘罪贖。查婦人惟姦盜不孝。決罰。餘犯笞杖。及應決杖一百

者。贖。定例不必更易。但殺人有名分。而殘毒異常者。應聲明依例不足蔽辜之處。從重定擬。請旨。又該侍郎等奏。婦人虐夫妻。及毆夫。妾。毆家長。反勒夫贖。情理兩違。查毆夫不義。嗣後夫願離者。不准贖。其不願離。及妻毆妾。仍贖。若妾毆家主及嫡。以卑犯尊。杖責的決。又奏稱。習俗恃主僕之分。草菅人命。

世宗憲皇帝。飭分紅白契。白契以雇工論。乃問官俱照紅契擬。亟宜申明。查雍正十三年前。旗人白契。准作家奴。民人應照旗例。至買婢向不用紅契。乾隆七年前。准作紅契。嗣後通行曉諭。文契送印。不送印者聽。但遇毆殺故殺。須驗別紅白。科斷。又奏。僕於家主。萬難抵避。湯火炮烙。偶未即死。謂非故殺。亦太拘牽。查挾勢非刑。明知必斃。而任意橫加。顯係存心欲殺。毋論凡人主僕。詳究按擬。不得概以毆殺寬減。又奏。請家長殺奴僕案。彙題請旨。亦慎重命案之意。嗣後雖罪止杖枷。及例應

贖者。人犯先行發落。仍按季彙題。從之。○八旗則例告成。纂修官以下議叙有差。○丁卯。命大學士九卿督撫。舉可任言官者。諭朕御極以來。廣開言路。虛心納諫。其言之是者。不次超擢。未是者。亦曲予優容。科道官當體朕心。於國家綱紀。政事利弊。官吏賢否。民生休戚。一一據實指陳。方為無忝厥職。乃黽勉盡言者。固不乏人。而或者以訐為直。務自詡為名高。而朝廷卒不獲其益者。亦復不少。此皆用匪其人。官不稱職。朕亦不能辭其咎也。夫言官為風紀所關。若止為身謀。則將來或因以分門樹異。或因以植黨營私。必至惑人心而搖國是。史冊所垂。足為殷鑒。古者諫無專官。故進言之路廣。三代而下。始設官而責之以言。然如馬周陽城之起布衣。而為御史。其事猶可風也。茲特降諭旨。著大學士九卿擇其素所深知。其人有骨鯁之氣。質樸之風。而復明通內外政治者。不拘資格。列名封奏。朕

將量加錄用焉。其外而督撫。於各屬員中。有深知灼見。可備繩糾之任者。亦准列名封奏。○又諭。閩省吏治廢弛。惟事逢迎。辦理公事。一無實際。營伍鹽法諸務。弊壞已極。固當及時整頓。策楞辦理事務。尚屬黽勉。但閩省民俗刁悍。如上年該省雨澤稍遲。設壇祈禱。百姓或摘去帽纓。或手執麻旗。男婦多人。沿街叫號。及開倉發糶。又復爭先購買。鼓噪喧譁。種種惡習。誠宜懲治。然整理之道。貴持其大綱。釐剔之方。在去其太甚。必須因地制宜。從容辦理。若過於嚴急。失之苛細。百姓或不相安。以致滋生事端。殊非整飭地方之意。本年彗星夜見。在閩省分野。而日蝕分數。亦惟閩為多。可寄信策楞。令其諸務留心體察民情。酌量事勢。詳慎辦理。不必太急。○戶部議准。四川巡撫碩色奏稱。建昌永寧二道所轄銅鉛礱礦。苗甚盛。不礙田園廬舍。除例給礱費外。現議委員。專司抽課。取具商匠結冊。查核

銅數彙報。其長寧雲陽等處產黑白鉛鑛。應准一體開采。從之。○蒙古律書告成。總裁官以下議叙有差。○戊辰。吏部議准。河南巡撫雅爾圖奏稱。地方被盜。事主未報。止取無諱。盜印結。州縣恃無處分。漫不稽查。請嗣後本任獲訊補報者免議。經上司訪聞。及他處得賊究出者。照地方有殺死人命。不知情不行申報例。降一級留任。同城道府及不同城在百里內外者。議處有差。從之。○又議覆。山東

巡撫朱定元奏稱。州縣承審案件。如有捕蝗勘災。監賑入闡。檄委會審會勘。以及勘河防險。隣邑相驗等公出。准於本限內扣除。督撫查叅咨內聲明。其兼署別邑。本任內應審事。不准照公出例。再專司督催之道府廳承審案件。屬員審解。上司遇有公出。照州縣例扣展。其未經解審。及承緝承追承查承變等案。承辦之員。概不准將公出日期扣除。該管上司如之。均應如所請。從之。○兵部議准。署兩

廣總督雲貴總督慶復奏稱。肇慶協分防綠水等十汛。槳船長大。配兵十餘名。方能駕駛。內悅城馬墟二汛。兵數尚敷。餘除差防外。無兵配船。修造徒糜公項。應請裁。將該汛遞文三板小船。畧為改造。增長五尺。寬一尺。安二槳一櫓。沙礮一位。配兵五名。餘兵在汛巡守。兩得。應如所請。從之。○以翰林院檢討興泰。左春坊左庶子文保。翰林院侍讀龔學海。翰林院檢討陳兆崙。署日講起居注官。○己巳。

上詣暢春園。問

皇太后安。○遣官祭

先蠶之神。命督撫稽查關榷弊端。諭朕惟惠養萬民之道。以輕徭薄斂為先。自御極以來。於蠲租減賦外。豁除各省關稅。不下百萬。又令將稅課規條。刊刻木榜。遍行曉諭。不許額外徵收。宜其商民均沾惠澤。行旅各安牧圉。乃近聞各關過往商旅。尚不能普被恩施。怨聲嘖嘖。究其由來。皆因司榷之家人胥役。巧

立名色。重斂徵收。勒指需索。弊端百出。不飽其欲。則逗遛不肯放行。大為行旅之害。是國家徒有減稅損上之德。而商民未受減稅益下之恩。無知者尚嘵嘵於稅課之重。所謂不揣其本而齊其末。即使再減數百萬額稅。用是以往。朕知其於商民仍屬無益也。夫司權官員。一任家人胥役。肆橫無忌。漫無覺察。商旅其何以堪。朕思督撫有稽查通省之責。凡屬地方利弊。無一不當留心釐剔。而關稅弊竇若此。朕在京尚有所聞。督撫身在本省。豈竟一無聞見乎。總因視非己事。故爾漠不關心耳。嗣後著該督撫嚴行訪察。遇有此等弊端。立即嚴拿重究。如司權官員。瞻徇袒護。亦即據實奏聞。不得視為具文。以奉旨之後。一查即可了事。務期實力稽查。俾商旅永無苦累。倘朕再有所聞。或被科道知有實據。叅奏朕。惟該督撫是問。○兵部議覆。川陝總督尹繼善奏稱。陝甘所裁新兵。候缺糜餉者。尚八

千餘名。營弁遇缺出。多將舊兵幼弱子弟。及親黨濫充。請確查舊兵有無子弟註冊。缺出驗明強壯者充。其無子弟。及有而幼弱者。以新兵撥補。新兵衰疲者亦汰。至現無新兵之營。舊兵無子弟可補。將附近營汛新兵撥充。應如所請。並飭直隸山東河南畫一辦理。從之。○旌表守正捐軀之山東荷澤縣千總杜龍妻朱氏。舉人杜撰妻莊氏。○庚午。上御勤政殿聽政。○諭。江南淮徐等處。年來疊被水災。黎民乏食。朕屢降諭旨。令該督撫加意撫綏。昨又特差侍郎周學健前往。會同辦理。務使貧民不致失所。但平糶加賑。俱需米糧。若本地倉儲不足。何以濟用。目今江廣漕船尾幫。正在過淮之際。著截留七萬石。分撥被災各州縣地方。其如何減價平糶。及動用賑散之處。令該督撫欽差侍郎商酌妥協辦理。倘從前所報饑民冊籍之外。再有困苦不能餬口者。亦一體查明賑恤。該部即速行文

該總漕督撫。及欽差侍郎等知之。○兵部議覆。議政大臣和碩裕親王廣祿等會議。黑龍江將軍博第等奏稱。黑龍江城內貿易民人。應分隸八旗查轄。初至詢明居址。令五人互結註冊。貿易畢促回。病故回籍除名。該管官月報。如犯法將該管官查議。其久住有室。及非貿易者。分別註冊。回者給票。不能則量給限期。嗣後凡貿易人。娶旗女。家人女典買旗屋。私墾租種旗地。及散處城外村莊者。並禁再凡由奉天船廠等處。及出喜峰口古北口。前往黑龍江貿易者。俱呈地方官給票。至邊口關口查驗。方准前往。至黑龍江索倫等。交納官貂外。餘俱鈐給聽賣。未鈐者買賣均罪。買者呈驗。將數目及進何口之處註票。至口查對。得旨。回原籍之民人。著勒限三年。餘依議。○以右通政熊暉吉為太僕寺卿。右通政林令旭為太常寺卿。僉都御史彭啟豐為通政使。○福建巡撫王恕。緣廣東按察使任內

改招被議。以直隸布政使劉於義為福建巡撫。以河南按察使沈起元為直隸布政使。○廣西巡撫楊錫紱疏報。乾隆五年分興安縣鬱林州。開墾水田八頃五十畝有奇。○辛未諭。向來直隸山西沿邊副叅等缺。准以侍衛章京等員補用。原以滿洲騎射素優。防禦關隘。自屬相宜。而於綠旗營伍。恐未能周知。是以止將邊缺補用。朕思直隸一省。為京畿重地。所有營汛。均屬緊要。若將已任邊關將備滿員之內。擇其通曉營伍者調補。以在京滿員補用邊缺。則於職守既無貽誤。而滿員亦得藉此疏通。向來沿邊副叅等缺。以三分補用綠旗。以七分補用滿員。今內地副叅等缺。應酌以七分補用綠旗。以三分補用滿員。在綠旗將弁。原於各省通行陞轉。非若滿員之有界限。分缺無多。實無占礙之虞。而滿員歷任邊疆。留心營伍。亦收駕輕就熟之益。其如何分缺揀補。及如何定例題陞之處。該部詳

悉妥議具奏。○大學士等議覆。川陝總督尹繼善奏稱。哈密。赤靖等處駐防兵。例於五六月換班。現在安西新兵一到。舊兵即可撤防。隨換隨撤。兵勞費滋。又值夷人進貢。營伍均宜靜鎮。已移知甘肅提鎮。無庸派兵更換。但此次留防兵。出口二載有餘。計撤期在歲底。請照給出防兵丁銀數減半給與。用資兵乏。應如所請。從之。○吏部議覆。江南總督那蘇圖查覆。御史王興吾奏。請將乾隆四五年有蝗州縣。嚴行考察。江省上年蝗蝻甫生。即撲滅淨盡。間有外省飛來。關查未得確實。本任陞故。後人以日久無從指實。且有隨風旋入。難定方向者。不力職名。實難開報。應如所請。免其咨送。仍飭督屬先事挖子。一有飛蝗。嚴行查拏。不得藉口日久支飾。從之。○工部等部議覆。河南巡撫雅爾圖奏稱。豫省伏牛山。需員彈壓稽查。應建移駐之通判。州同。州判。守備。衙署。各營房。馬棚。墩臺。旗纛廟。烟墩。牌

坊。門樓。共估地基工料銀六千一百七十兩零。所有汝州。州同。移駐楊家樓。陝州。州判。移駐朱陽關。均本州地。原管水利河務。仍可查辦。應同原駐防之四巡檢。歸移駐孫家店之河南府通判轄。遇有逃盜匪類。詳報查辦。地方事仍歸州縣。嵩縣守備。既移駐孫家店。公事與通判互相移會。各城守營汛。即歸守備轄。有事詳報核辦。通判。州同。州判。分於本州縣及洛陽十州縣。派撥民壯。差遣巡緝。黑峪川。過風樓。二處。於守備帶往駐防外之存城馬步兵。各撥步兵四名駐防。其文移往來。嵩縣。南召。盧氏。三縣。各增設鋪司。再查伏牛山。岔徑要路甚多。所有馬市坪。留山店。三川店。各議撥兵巡防。應如所請。從之。○壬申。諭。去年上下兩江。及浙江之州縣。被水偏災。收成有歉收之處。朕恐民間米糧不足。降旨截留三省漕糧。八十萬石。以為備用。向來定例。漕糧停運之年。運丁月糧。止給一半。停給一半。

朕念運丁等當歉收之歲。食用艱難。已降旨將浙省停給項內。再減半給與。資其養贍。江南運丁。亦應一體加恩。著將停給項內。照浙例減半賞給。以昭特恩。後不為例。該部即遵諭行。○又諭。朝廷定有行取一途。原欲州縣內陞。使知部務。部屬外用。使知民情。且此等人。拔置言路。亦能通達事體。有所獻納。近來因行取人員。陞補無期。令其在任候陞。於單月補用主事。究之缺少人多。得用部屬者甚屬寥寥。自應酌量疏通。其現在由行取在部之司官。著該堂官秉公保舉。候朕分別簡用。至於從前行取人員內。大率拘謹守分之人多。而明通幹濟之才少。蓋由該督撫止照例將無參罰者咨送。即有揀選保舉者。亦不過以該省次等州縣塞責。甚非國家立法之本意。嗣後各省督撫。當行取之時。務將有守有為。聲名卓越者舉出。其有因公參罰者。亦准其入選。以收得人之效。著該部詳悉妥議具

奏。○癸酉。

上詣暢春園。問

皇太后安。○諭。湖北標鎮協營。於雍正九年。派調馬兵一千名。赴陝出口。駐劄涼州。隨帶馬一千匹。所有曾經支領乾銀。以部例折算。該扣還一千三百一十三兩。此項雖不在豁免之例。朕念各兵效力邊陲。勞苦可憫。且事歷多年。其中事故更換者不少。本兵家屬。既不可以著追。而現在之兵丁。所領糧餉。又僅敷每日之食用。難以扣抵從前之欠項。朕心軫恤。著將長支豆草價銀一千三百一十三兩。悉予蠲免。俾戎行得沾恩澤。該部可即行文該督撫知之。○大學士等議覆。雲南總督張允隨奏稱。蒙居租地方。係夷人二十一寨。扼要之區。應設汛彈壓。安兵百名。以東川營千總外委各一員。移駐該處。並移則補巡檢同駐。於溪羅紅著古途。都草頭道河者。那六處。各設一塘。兵各十名。即於東川營及昭通鎮

標四營抽撥。應如所請。從之。○刑部議覆。左侍郎張照奏稱。遣犯妻子。應分別查辦。一。發遣黑龍江。寧古塔。當差之犯。例應僉妻。及奉旨僉妻子者。同本犯羈管。妻女子孫。係情願隨往者。於僉解文內註明。免濫行羈管。本犯身故。妻子願抱骨回籍。即給照報部存案。從前各案。未經分晰註明者。詳查改正。奏明寬免。一。配所生長子孫。本犯在日。有欲於近地耕種貿易者。准呈明該管衙門。量給假限。逾限不回。查明究治。配所生女。或許嫁他處。或寄養與人。不得查禁。一。賞旗為奴人犯。子孫前往省視。赴該管衙門報名。回日呈明。給票放行。如旗主刁留計陷。照存養良家男女為奴婢。杖一百律治罪。應如所請。從之。○甲戌。以廣西蒼梧道儲龍光。為河南按察使。

大清高宗法天隆運至誠先覺體元立極敷文奮武孝慈神聖純皇帝實錄卷之一百六十二

大清高宗法天隆運至誠先覺體元立極敷文奮武孝慈神聖純皇帝實錄卷之一百六十三

監修總裁官經筵講官太子太傅文淵閣大學士文淵閣領閣事領銜內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德繼經筵講官太子少保工部尚書紀錄六次臣曹振鏞等奉

敕修

乾隆七年壬戌三月乙亥諭數月以來雨澤

臣等奏

稀少朕宵旰靡寧虔誠祈禱雖得微雨未為霑足從前因天時亢旱曾降旨清理刑獄今著刑部將在部各案內有牽連待質者及輕罪內情有可原者或應省釋或應末減會同都察院大理寺悉心詳查妥議具奏至于直隸山東江南三省目下雨暘不均亦著照此例行嗣後各省如遇災眚之年著該督撫將清理刑獄之處奏聞請旨○丙子諭軍機大臣等朕覽王安國奏報廣東各府米價一摺

內開瓊州府正月米價上米每石價銀一兩一錢至一兩九錢中米每石價銀一兩至一兩八錢六分下米每石價銀八錢四分至一兩八錢二分朕思米糧時價固有不同但一月之內相隔時日無多不應貴賤懸殊至此奏據郎中董啟祚等查看勝水峪地傍祖陵土色細潤自屬吉壤請俟謁

臣等奏

陵時閱視得旨萬年吉地定於勝水峪一應工料等物該部照例辦理至動土興工日期俟朕謁

陵之便親臨閱視再降諭旨○又議奏縣令親民之官豈可以年力衰邁之人濫膺民社請飭下九卿嗣後驗看月官有龍鍾者即註明請旨到任後並令督撫試看從之○丁丑上詣

恩佑寺行禮○詣暢春園問皇太后安○戊寅

上幸山高水長演耕○詣

劉猛將軍廟行禮○諭聞五旗王公宗室等屬下包衣佐領人內竟有不得錢糧其主不能養贍者甚多伊等皆係從龍入關舊家子弟累世効力聽其窮乏甚屬可憫前經

皇考諭將上三旗包衣佐領下人等分附漢軍旗分令其披甲現在八旗滿洲蒙古自加恩增設護軍馬甲養育兵額缺以來另戶閑散皆得錢糧缺丁之佐領遇馬甲拜唐阿缺出

不得其人且以家奴充補若由包衣佐領下人內挑補伊等生計既裕而該旗亦得好兵著王公等將包衣佐領下無錢糧者查明正身咨行本旗滿洲蒙古都統有馬甲拜唐阿缺秉公挑補至充補馬甲拜唐阿後不准開除本佐領若題補護衛及欲調別項差使者聽之○以原任安徽布政使晏斯盛為山東巡撫○吏部議奏漢軍歸併漢缺其貢監應一體考取主簿吏目職銜願改降者准以吏

目巡檢典史用其選法主簿吏目于四選一陞後用一人巡檢未入流于在京書辦一應一捐後用一人改降者不准遞行告降從之○戶部議准前署浙江巡撫宗室德沛奏稱杭州前右二衛額設鹽捕各三十名該屬地方業於鹽政衙門另派兵役分巡二衛鹽捕實屬冗設應行裁汰其工食銀兩歸運充餉從之○兵部議准江南總督那蘇圖奏稱上海一縣兩營弁兵過多請截黃浦營都司把總外委把總各一員兵一百名留千把總外委千把各一員兵一百六十名哨船九隻聽提督右營遊擊派撥巡查改為水師揀員題補又所裁弁兵抽存把總外委各一員兵六十名發柘林營以資巡防要汛益昭嚴密從之○已卯兵部議覆順天府尹蔣炳奏稱川陝總督尹繼善奏查核兵籍以期新兵速補祇嚴將來之頂充未議前此之混冒祇汰新兵之衰疲未議舊兵之姑容應令各省督撫

提鎮嚴飭標協營汛確查兵丁子弟年力倘無合式者缺出募補舊兵年力已衰者汰去另募應如所請但曾經出師者酌量留操餘不得仍前朦混從之○庚辰諭曰御史叢洞奏稱請停修理熱河一帶行宮以節帑金而昭聖德等語夫熱河等處行宮乃當年

皇祖巡幸駐蹕之所雍正年間

皇考未經出口行圍是以各處行宮皆置之閒曠然亦未嘗不畧為繕補以免傾圮今朕仰

承

祖制欲舉臨邊講武之禮舊日所有行宮酌加修葺此亦事理之不得不然者我朝土木之工甚少偶有興作亦皆不煩編戶之差徭不動司農之經費斷不至於勞民傷財為盛德之累但念人主一心於土木上多一分即於政治上減一分此理甚明乃朕時時用以省察者修葺不比營造雖難盡廢其工作有可緩者著該管官此時緩之叢洞身為言官有

見即行陳奏意亦可嘉所奏知道了○大學士等奏革職侍郎方苞奉旨在三禮館効力贖罪分纂周禮已竣年老患病可否准其回籍調治得旨賞給翰林院侍講品級頂帶准其回籍○予故禮部尚書原任蘇州巡撫張伯行入祀江寧賢良祠○免江蘇上元丹徒阜寧淮安等縣衛乾隆六年分被水額賦有差○辛巳諭和碩莊親王允祿今考定樂章以旋相為宮之法用之

郊

廟朝會鉅典攸關其登歌下管各工必肄業有素方免臨期舛誤此事非可猝就但及今亦當次第辦理太常寺樂舞生每月在神樂觀演樂雖有定例再當於春秋二季令赴掌儀司演習王悉心考察如有不協之處即為訓導俾律呂均諧用昭誠敬至禮部和聲署樂工皆民間屠沽之輩即加教訓豈易通曉伊等在署當差徒誤其衣食生理朕意須令掌

儀司人員承應。方能妥協。俟樂章既定之後。將和聲署樂工。作何裁汰。并朝會日期。如何令掌儀司率領所屬人員承應之處。王會同三泰詳悉定議具奏。○命督撫廣濟儉歲民食。諭各省常平倉穀。每年存七糶三。原為出陳易新。亦使青黃不接之時。民間得以接濟。當尋常無事之際。自然循例辦理。若遭值荒歉。穀價昂貴。小民難於謀食。而仍復存七糶三。則閭閻得穀幾何。大非國家發粟平糶之本意矣。嗣後凡遇歲歉米貴之年。著該督撫即飭地方官多出倉儲。減價平糶。務期有濟民食。毋得拘泥成例。著該部即行文各省督撫知之。○吏部議覆山西巡撫喀爾吉善奏稱。口外歸化綏遠二城。應照內地之例。凡巡道同知協理等官。承辦案件。有應查取職名者。均歸巡撫。以一體制。毋庸將軍查處。應如所請。從之。○兵部遵旨議奏。直隸營缺。將沿邊滿員。諳營務者調補。該省應行開列副將

四缺。歸部推叅遊都守七十三缺。七分用綠旗。三分滿員。如副將第一缺出。用滿員。二三綠旗。四滿員。五六綠旗。七滿員。八九十綠旗。餘如之。均由該督揀題。所遺邊缺。將在京旗員補。至叅遊都守。內調未題補者。接算從前邊俸。扣滿五年。送部引見。分發各省。遇缺即補。若調補內地之副將。係諳練營員。總兵缺出。即與綠旗一體論俸開列。從之。○又奏。雲貴川陝軍務已竣。沿邊營員。道遠任重。應請行文該省督撫提鎮。仍照例預保。以備要缺之用。從之。○準噶爾台吉噶爾丹策零遣使臣吹納木喀等奏。進表。並貢方物。請赴藏熬茶者。由噶斯。至京貿易者。由歸化城。往多巴。西寧貿易者。走噶斯之南。乞勿限定年分。至巡視科布多。請如前降旨。每年遣人前往。奏入。報聞。○壬午。

上詣暢春園問

皇太后安。○諭軍機大臣等。朕看帶兵駐劄哈

密之提督永常。辦事情形。竟不深曉。準噶爾性情。大有輕視之意。凡事視為易則難。視為難則易。必思其難以圖其易。方克於事有成。而無悔。準噶爾人等。性本狡詐。非我所屬。喀爾喀厄魯特蒙古等可比。不可輕視。爾等將此情節。詳悉指示。扎寄永常。令其凡事謹慎留心。○又諭。覽夷使吹納木喀。齎至噶爾丹策零奏章。意甚狡詐。朕斷不因言辭觸怒。遽爾興兵。亦不可不密為整備。著移知兩路軍營大臣。令伊等加意防範。具奏內情形。并詳悉寄知。○吏部奏。鑲白旗滿洲鄂爾和承襲之雲騎尉世職。定例准襲一次。今襲次已完。無庸給與勅書。得旨。鄂爾和所襲之官。著加恩再襲三次。○工部議覆。直隸總督高斌奏。稱。滹沱河溜北趨。正定府城西南隅。舊有斜角頭隄。已被衝去。城南一帶危急。前督臣孫嘉淦所請開挑引河。攔河築壩。費鉅功難。現有鑲墊埽工。止可護厓。不能挑溜。擬於斜角

頭隄迤下。北岸迎溜處。加築順流挑水柴土壩五座。各寬五丈。長十丈至二十丈不等。料物夫工。估銀四千兩。于水未發時告竣。河溜自將南趨。北岸可免衝塌。應如所請。從之。○以鑲黃旗前鋒叅領常在為

景陵總管。○癸未。以故四川土百戶白馬朗結之子工却單。瓦述更平。東撒土百戶登朱之弟納龍交。貴州湖耳司副土官楊應昌之弟楊應熊。襲職。○甲申。命寬學政攜眷之禁。諭

前據河南巡撫雅爾圖奏請。學臣停帶眷屬。以杜弊竇。經九卿議准。彼時朕降旨。如學臣差滿之後。復留原任。或調別省。欲攜帶家眷者。著本人自行具奏請旨。今思學臣之廉潔貪污。視乎其人之自主。初不在眷屬之有無。如謂攜眷即滋弊竇。則外省自督撫藩臬以下。又何嘗不攜眷屬耶。即使不准攜眷。而隨任之家人幕客。又豈能保其一一奉法惟謹耶。況父母妻子。相隔三年之久。不免內顧之

慮於情理亦未允協。嗣後不必禁止。○戶部議准。湖廣總督孫嘉淦前署督。那蘇圖奏稱。查開墾荒地。除平原沃壤。地雖畸零。仍照則分別升科。濱水坍卸者。開除。新淤復漲。可耕者。造報外。山頭地角。止宜種樹者。聽墾。免其升科。成坵段者。高阜種雜糧。二畝以上。照旱地升科。稍低種禾稻。一畝以上。照水田升科。不足一二畝者。仍免。並飭查丈。註冊給照。以杜豪井。從之。○又議。覆左都御史管廣東巡撫王安國奏。酌議沿海沙灘事宜。一。沙灘出水。方許報承。官勘給單。定限。工成執業。一。承墾人不過一頃。地廣頃多者。分承協築。報承時。查取保結。紳衿商賈。僑寓捏冒。有禁。一。三年工築。三年成熟。照水田起科。均應如所請。惟承後退出者。另承酌償工本。不必公項動買。從之。○丙戌。

上詣暢春園問

皇太后安。○大學士鄂爾泰等議奏。據山西巡

撫喀爾吉善奏稱。建威將軍補熙兩次寄字。稱口外現設歸綏道。凡刑名錢穀。既由通判同知道員。逐層審理。與各省州縣府司無異。若仍由巡撫將軍都統。三處核擬。實有鞭長不及之勢。嗣後或竟歸將軍。竟歸都統。就近咨題完結。竊念夷漢交涉。命盜案件。例由巡撫主稿。臣不敢違例諉卸。曾兩次札覆。誠恐補熙疑臣固執成見。理合將未經會奏緣由。奏明。查口外命盜案件。專係蒙古者。由將軍審理。夷漢交涉之事。由臬司成招。巡撫核題。乾隆五年五月內。欽奉諭旨。嗣後歸化城。土默特等處盜案事件。著綏遠城建威將軍一併管理。原指蒙古案件而言。又五年十一月內。刑部議覆補熙奏。蒙古民人交涉命盜等案。概由巡撫主稿。關會都統將軍。奉旨依議。又本年三月內。吏部議覆喀爾吉善奏。歸化綏遠二城辦理一切案件。如巡道同知協理等官。遇有疎防遲延失察等事。均歸巡撫咨

題叅處。毋庸該將軍查取職名。亦經奉旨依議。是夷漢交涉事件。統歸巡撫核題。定例已久。未便紛更。第口外相隔遼遠。關會審解。每致守候羈延。嗣後應令該撫嚴飭道廳。依限審結。以免拖累。案情不致有誤。職守亦有由歸。得旨依議。○吏部議准。甘肅巡撫黃廷桂奏稱。原隸蘭州之蘆塘驛。移駐口外。併為營盤水驛。應歸寧夏府西路同知轄。蘆塘松山驛。丞應裁去。蘆塘字。原隸蘭州之沙井驛。就近歸移駐省城之皋蘭縣轄。從之。○丁亥。吏部議准。貴州總督張廣泗奏稱。新設之貴東道。黃平舊州州同。銅仁松桃兩縣丞。都勻鎮遠兩府知事。施秉都勻清平三縣主簿。古州倉大使。舊設之思南府朗溪司。沿河司。兩吏目。或所治較前淳樸。或他員已足兼攝。應請裁汰。至黃平州居民稠密。奸良不一。應改設巡檢駐查。所裁貴東道屬六府。歸古州道轄。從之。○又議准。廣西巡撫楊錫紱奏稱。遷江

縣北四地方。道通馬平。來賓。忻城。漢土各縣。實為要隘。請於賓州營抽撥千總一員。帶兵五十名。駐劄彈壓。從之。○戶部議准。前署浙江巡撫宗室德沛奏稱。海沙蘆港二場。攤納西路場冊缺課銀。非本場額課。應與豁免。從之。○以吏部左侍郎蔣溥署刑部侍郎。○陝西提督周開建以病解任。以西寧總兵許仕盛署陝西提督。○以喀爾喀輔國公旺布之子蒙固襲爵。○江西巡撫陳宏謀疏報。新建。豐城。上高。泰和。萬安。上饒。弋陽。鄱陽。崇義。會昌。龍南。安遠。長寧。十三縣。乾隆五年分。開墾老荒。續荒。及額外新生田地塘。六頃十四畝有奇。○戊子。

上詣黑龍潭祈雨。祭

昭靈沛澤龍王之神。○諭軍機大臣等。江南淮。徐。鳳。潁。等處。連年被災。民人困苦。目今流離載道。至有茹草傷生者。朕屢次降旨。加恩賑濟。而所賑之戶口人數。遺漏甚多。百姓無

以自存。此等情形。出之南北往來人之口。俱無異詞。並非一二人之言也。頃覽周學健所奏徐州光景。亦大概相符。而從前那蘇圖等。俱有諱匿之意。並未據實陳奏。預為籌畫。其意不過以地方有一二奸民。恃衆逞刁。希冀冒濫。借口漸不可長。豈知所屬州縣官員。則以為上司諱言災荒。遂承奉意旨。以重為輕。以多為少。上下相蒙。而民隱不能上達矣。獨不思小民之指稱饑荒。望希恩澤者。不過數人。豈可以數人之詐偽冒濫。而使千百良善之民。飢餒窮阨。至不能完其家室。保其軀命乎。況多費錢糧之害尚小。而諱災病民之害甚大。朕已屢降諭旨。伊等尚不知仰體乎。昨特遣大臣前往。期登斯民於衽席。然總督節制通省。大小官員。皆聽其指揮。若復掣欽差大臣之肘。則彼力不能施。而朝廷之德澤。究不能普被。是誰之咎耶。那蘇圖等從前辦理甚屬錯誤。因念平日居官。尚無過失。姑且從

寬。若嗣後迴護前愆。仍不盡心辦理。朕必照匿災之例。加以嚴譴。爾等可即傳諭知之。○欽差侍郎周學健奏。訪聞河南儀封。考城等縣。盜匪滋事。山東桃源集。南陽鎮。盜風甚熾。江省饑乏。恐被隣省匪誘。現在招徠養贍。以清盜源。得旨。周學健奏摺。可即抄錄。寄與河南巡撫雅爾圖護理山東巡撫魏定國閱看。令其立速查辦。○緩徵山東歷城。章邱。鄒平。齊河。齊東。濟陽。禹城。臨邑。長清。陵縣。平原。肥城。平陰。博平。茌平。德平。高唐。十七州縣。被旱災地方。乾隆六年分漕糧額賦。○己丑。命督撫實力弭盜。勿分疆界。諭。朕嘗見各省督撫等。奏報查拏盜賊。皆稱鄰封境上。萑苻潛匿。搶奪橫行。而本省則極安靜。並無滋事。如江南則指稱山東河南。山東河南又指稱江南湖廣。其他處所報。亦往往類此。此固由於該督撫有互相推諉之心。亦由所屬官員欺誑上司。以卸已責。而盜賊因得以肆志。無所忌

憚矣。獨不思督撫皆朕簡用大臣。當視國事如家事。視鄰省如本省。豈可存此疆彼界之心。蹈恕已責人之習。此風不改。國家何所倚賴。伊等又何以副朕之委任耶。可即傳諭各督撫知之。○吏部議覆直隸總督高斌奏稱。新設熱河兵備道。地居口外。所屬同知通判。皆係理事滿缺。承辦案件。多屬蒙古旗人之事。應請改為滿缺。由部於滿洲人員內奏請簡用。應如所請。准其改為滿缺。嗣後缺出。臣部行文各部。令該堂官於滿洲郎中內揀選保舉。交與臣部帶領引見。恭候簡用。從之。○戶部議覆給事中陸尹耀奏稱。國家周恤旗丁。務從寬裕。缺乏掛欠。弊有由生。大約僉運殷實者少。以辦公之資。儘私家之用。尚未過淮。花銷殆盡。弊端百出。土宜外攬載客貨。沿途停泊。催漕弁兵。藉此需索。弊一。火丁包攬使費。預先勾通簽驗。各役簽米。以少報多。以潮雜報乾潔。弊二。簽手上船。旗丁暗擲小包。

簽手會意多報。無使費之名。巧於使費。弊三。趕過淮關。脫幫停泊。移前補後。為盜賣地。弊四。攬和沙粶。抵換官糧。弊五。聚飲賭博。釀錢演戲。誤公妨運。弊六。使水用藥。霉變虧缺。弊七。催漕弁兵。勾通丁舵。私買包米。弊八。領運隨幫等官。收受到任。節令生辰。規禮需索。銀錢借貸。土米。弊九。亦有乘運官收受規禮。挾制盜賣。運官染指。甘受箝制。通同徇隱。弊十。頭船伍長。指稱運官科斂各船財物。包交包受。弊十一。漕蠹奸丁。指稱過淮打點。兜收錢糧。肥己。弊十二。提溜打聞。雇募短絳。折給糧米。弊十三。正副旗丁。管駕船隻。過淮之後。私自回家。令舵工包運包交。弊十四。夾帶私茶私鹽硝磺違禁物。弊十五。潛留犯事衿監。訟師旗逃卦子。白蓮羅教。遠來不明之人。勾連生事。弊十六。至於攔截河流。欺壓民船。逞兇打降。盜竊攘奪。係水手之肆橫。所宜一體禁絕。但禁而復犯。犯而復禁。勢若循環。應請旨

勅部飭行永禁。刊刻木榜。列南北要津。先教後誅。犯者自少。應如所請。從之。○以太常寺少卿劉綸翰林院侍讀龔學海俱為右通政。○以大學士張廷玉徐本查郎阿協辦大學士禮部尚書三泰內閣學士覺羅吳拜詹事錢陳羣戶部尚書陳惠華吏部侍郎阿克敦吏部侍郎蔣溥戶部侍郎梁詩正工部侍郎德齡大理寺少卿周炎為殿試讀卷官。○免乾隆六年分福建福安縣被旱額賦。○賑甘肅平番碾伯寧朔真寧準蘭金縣華亭鎮原固原禮縣狄道寧州十二州縣。乾隆六年分被水被雹災民。○長蘆鹽政三保疏報乾隆六年分山東永阜場壑灘七幅計池地十畝有奇。○是月直隸總督高斌奏祈雨得旨。覽朕所憂者不在目前。看此光景。恐雨澤為期正遠耳。○又奏各屬米價得旨。二兩以外尚得謂之中價乎。此意即隣於諱災亦不可也。○又奏祈雨得旨。目下若再旬日不雨。則二

麥必大減分數矣。朕甚憂之。其未雨之綢繆卿不可不留心也。○又奏得雨日期得旨。覽奏稍慰朕懷。然京師一帶尚未得有霑足雨澤。殊切廑望也。○欽差侍郎周學健奏勘估各工請帑興修兼籌堵洩得旨。所奏俱悉。慎重為之。○又會同兩江總督那蘇圖江蘇巡撫陳大受奏遵旨減糶誠恐米價太賤商販不通酌中定價期濟民食並飭各災區多設米廠委員監買戶限一斗以內以杜奸民賤糶貴糶得旨。所辦甚妥知道了。○兩江總督那蘇圖奏會商淮徐等屬賑糶事宜籌辦水道得旨。觀卿似有諱飾之意。此甚非朕視民如傷之意也。已有旨向大學士處頒發矣。○江蘇巡撫陳大受奏江浦六合隄埂被水衝決動借常平倉穀資修得旨。辦理甚妥知道了。○又奏下江盜案淮徐海三府州屬為多被災之後時屆寒冬嚴飭地方官實力緝捕得旨。此處盜風頗熾不可不加之意也。○又

奏會同欽差及督臣分別加賑淮徐等屬銀穀兼放借撥運庫酌貸口糧飭屬濬河洩淤得旨所奏俱悉○江西巡撫陳宏謀奏拏獲私鑄首夥得旨好勉力妥協為之○湖北巡撫范璨奏兩江總督那蘇圖委員齎銀糴穀楚北上年有收不藉倉穀平糴安省急資接濟已飭近省各府照價糴給交員趕運得旨辦理甚妥知道了○湖南巡撫許容奏武陵桃源兩縣大風雨雹查明損壞營船房屋傾壓災民給銀殮埋補種打損秧田得旨知道了應賑恤者加意賑恤之母致失所也聞汝雖潔已奉公但畧過於嚴峻使人不能近汝之嚴峻亦朕所素知但出於公尚可若稍有私意於其間則有不能近之人亦必有能近之人矣此又非出於所聞而朕之意料恐汝正不能無此病也戒之慎之○河南巡撫雅爾圖奏將常平等倉貯穀借給兵丁令營員於月餉扣移買補因非種地農民可比免其

加息得旨知道了○又奏江南窩盜黨夥流入開歸等地方揀員選役懸賞緝緝得旨此皆汝向日有諱盜之心今至不可掩飾稱鄰省流來實屬無恥若再不實力緝獲汝罪不可辭矣○山東布政使署巡撫魏定國奏護理巡撫日期得旨聞山東頗有盜竊之風尤不可不思所以弭之也○又奏雨澤分寸得旨聞東省望雨甚急此奏不無掩飾況汝現護撫印一切政務更不可不勉力妥理也○又奏收恤江蘇被災流亡資送回籍東省並無流民滋事得旨恐亦未必無之汝尚未之知耳○川陝總督尹繼善奏續辦哈密安西善後事宜○安西城守營靖逆協暨塔爾灣橋灣共添兵一千三百名又標協營應補實各官親丁并公糧七百五十六名於現在駐防兵丁挑留三百十二名餘咨甘肅提鎮照數添送○哈密存粟米五萬七千三十餘石自本年起米四麩六搭支月支米十二日防

兵二千名。可食二十餘年。每年屯田所收。支舊存新。酌量出易。存白麩四百六十餘萬觔。歷久不堪再貯。回民公稱每年春。願借麩十一萬觔。秋還麥一千石。還糜穀者以一麥二穀計算。照例每年每石。折耗一升。免糧員賠累。駐防哈密之副將。防所副叅等官。俱聽調度。若仍給副將關防。體制未合。請勅部鑄給駐防哈密統領關防。沙州靖逆安西等處。共團練屯兵一千七百八十餘名。各設屯長稽查。已咨甘州提督。撥舊存餘剩鳥鎗。各給一桿演習。得旨。所奏俱悉。關防一事。軍機大臣議奏。廣西巡撫楊錫紱奏。乘江苗寨乏食。借給銀穀。許赴城營各工代賑。飭屬不得借緝拏逸犯。誘擾已經安撫之苗。得旨。所見是。知道了。貴州提督韓勲奏。嚴緝石金元案內遺孽。得旨。知道了。竭力督緝。務獲為是。

大清高宗法天隆運至誠先覺體元立極敷文奮武孝慈神聖純皇帝實錄卷之一百六十三

大清高宗法天隆運至誠先覺體元立極敷文奮武孝慈神聖純皇帝實錄卷之一百六十四

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲副都統軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆七年壬戌夏四月庚寅朔享

太廟遣和親王弘晝恭代行禮○策試天下貢士金甌等三百十三人於太和殿前制曰朕德弗類託於士民君公之上凜對越之小心思安危之至計茲爾多士釋褐觀光宜有以陳古今之通變直指當世之切務是以詳延於廷訊以政要均以啓告朕匪惟覘多士之所學亦以匡朕不逮思益下民耳蓋君之於民其猶舟之於水耶舟不能離水而成其功人主亦不能離民而成其治是以古聖先王惻隱懷保憫

然惟日不足者非斲民之懷惠而已也實有見於君民一體之故今君與民誠一體歟德之不修政之不宣賢才之不進民隱之不聞有一於此其能成治道者未之或聞也將欲補四者之闕又何術之從歟夫天下不必治也君明而臣良上令而下從天下雖亂識者知其有治之幾焉天下不必亂也君庸而臣諂上令而下違天下雖治識者知其有亂之幾焉其盈虛消息之機多士亦嘗籌之素而欲有辰告乎務民之本莫要於輕徭薄賦重農積穀我國家從無力役之征斯固無怨之可輕矣而賦猶有未盡合古者乎賦之外曰耗羨此固古之所無也抑亦古嘗有之不董之於官則雖有若無而今不可考耶且康熙年間無耗羨雍正年間有耗羨無耗羨之時凡州縣蒞任其親戚僕從仰給於一官者不下數百人上司之苛索京官之勒助又不在此限而一遇公事或強民以樂輸或按畝而

派捐業田之民受其累矣。自雍正年間耗羨歸公。所為諸弊一切掃除。而游民之借官吏以謀生者。反無以餬其口。農民散處田間。其富厚尚難於驟見。而游民喧闐城市。貧乏已立呈矣。人之言曰。康熙年間有清官。雍正年間無清官。亦猶燕趙無鑄。非無鑄也。夫人而能為鑄也。而議者猶訾征耗羨為加賦。而不知昔之公項皆出於此。而有餘。今則日見其不足。且動正帑矣。是以徒被加賦之名。而公私交受其困而已矣。將天下之事。原不可以至清乎。抑為是言者。率出於官吏欲復耗羨者之口乎。多士起自田間。其必不出此。而於農民之果有無利弊。必知之詳矣。又如常平之設。遍天下而卒不聞百姓無鮮飽之嗟。或者禾栖畝而給銀。稼登場而責穀。是民未受其益。先受其害矣。將欲改弦易轍。而天時不可必。其何恃以無恐耶。凡此數者。皆朕日夜躊躇而未得其要領者。多士其毋以朕為不

足告。而閔之隱之。其尚以朕為可告。而數之陳之。悉言其志。毋有所諱。○諭前因八旗生齒日繁。生計艱窘。是以屢沛恩施。今復賞借庫銀。用資接濟。倘兵丁等將此項銀兩任意奢靡。仍於生計無益。是在有教養兵丁之責者。善為訓導之也。當日之都統等視兵丁如子弟。唯以兵丁等生計。造就人材為要務。現今之都統等亦當如此存心。將所屬兵丁多方教誨。雖人數眾多。不能逐一訓誡。而與所屬之叅佐領等將兵丁等生計時刻留心。多方啟迪。俾兵丁等各知自愛。勉圖生計。況都統等應辦之事無多。教養旗人即是伊等專責。著傳諭八旗都統等務須加意經理。視兵丁之事如己事。痛除奢侈之習。勉循節儉之道。俾兵丁等亦能自愛身家。方為妥善。倘兵丁仍復任意浮華。致於艱窘。朕惟伊等是問。○準噶爾使臣吹納木喀等入覲。諭曰。爾台吉噶爾丹策零奏章。朕已入覽。令爾口奏之。

語朕之大臣亦悉以聞。前噶爾丹策零以其父故屢懇赴藏熬茶。朕廷臣議應勿許。朕特施恩念其為父諷經尊崇黃教。本屬善事。降旨允之。復遣大臣官兵護送。助以牲畜口糧。乃爾使齊默特等。既至東科爾。惟以貿易為事。遷延數月。並不進藏。遽欲還部。朕之大臣屢諭不聽。始以奏聞。朕時在木蘭降旨。此係噶爾丹策零奏懇之事。若等何得擅還。或其來時噶爾丹策零本如此授意。則嗣後復欲遣人進藏。決不允行。令朕之大臣再三開示。若等執意起程。想此意定出自噶爾丹策零。不然。雖彈丸小部落。必無使臣不遵主命之理。即如爾等此來。除噶爾丹策零所囑外。可任意增一詞乎。汝至肅州即返。可乎。既乞往藏。半途而還。更造為種種不根之語。欲變易成規。非故滋事乎。汝謂奏疏中並無傲慢。朕大臣等悉能通汝等語言。汝豈能隱匿乎。朕為天下共主。已許爾息兵。斷不因此遽復興。

兵。汝等若有妄舉。亦聽之而已。此次噶爾丹策零所奏。與汝口奏互異。朕實不解諸事。難以定奪。汝明記朕旨。詳諭噶爾丹策零可也。旋據吹納木喀奏稱。噶爾丹策零竭誠輸懇。奏章所載。乃中外言語不同之故。實非傲慢。至齊默特進藏熬茶。據云以奉旨巡視科卜多。為守卡人攔阻。半道空還。噶爾丹策零疑惑不信。令使臣等前來剖晰等語。又諭曰。汝稱噶爾丹策零不信齊默特故來具奏。今奏中何無此語。進藏熬茶。本噶爾丹策零最切要事。當遣可信之人。奈何委之齊默特伊等。還時降旨甚明。今汝等縱仍欲進藏。亦應候朕再降旨允行。然後得往。豈容竟自主張。但以道由噶斯為詞乎。噶斯豈汝等境內乎。抑聞朕前諭。難以再請。姑以此含糊嘗試乎。原議巡視科卜多。並無許入卡倫內巡視之語。去年爾人不言巡視科卜多。直入布延圖卡倫。至喀勒占和碩卡倫。朕之大臣。始禁止之。

朕所遣畧地之人。有越阿爾台。巡視爾卡倫
以內之地者乎。此事已明示蟒鼐矣。爾等豈
不知之。至來京貿易者。不得由綏遠城。亦與
哈柳定議。尚未經行一次。遽欲更張可乎。噶
爾丹策零。此次所奏。言詞不倫。左右支吾。殊
非和好之道。朕業已降旨。息兵。汝又稱實無
傲慢之意。朕亦不介懷。如果誠心懇乞。俟再
遣使來。此次姑無庸議。朕另有勅書。付汝齎
去。吹納木喀。又奏稱前齊默特還。並不以

大皇帝諭旨。告知噶爾丹策零。是以衆心懷疑。
此來何敢妄奏進藏一事。在噶爾丹策零最
為切要。伏祈

恩允。又諭曰。此事不得允行之故。噶爾丹策零
亦所明知。況人數日期。俱未議定。朕即欲加
恩。豈可令我護送官兵。先勞守候乎。天時近
暑。汝等可作速起程。朕已諭我大臣。為汝等
辦理矣。○大學士等會同工部議准。直隸總
督高斌奏稱。前河督顧琮請將子牙河下流

之金里河等處。開河引水。直達西沽之北。會
於三汊河歸海。不使渾流穿淀。亦屬疏通水
利之一法。但查金里河以下之四河頭。卡家
窪等處。窪泊相間。淺深不一。與上游之老君
泊等處相似。今上游既經停疏。若將下游挑
濬。將來淀水漲發。上游不能束流歸河。反有
漫流之患。況老君泊至金里河相距四十里。
不能連續通流。遙為宣洩。勢必仍由舊道而
下。難以歸河。且子牙河下口。本與獨流大坑
暨楊芬港。楊家河。大河相通。汎水發時。原可
直達西沽。滙歸三汊河入海。不致壅塞為害。
應將議挑之金里河等工。仍即停止。從之。○
議敘纂修

世宗憲皇帝實錄聖訓。官內閣學士德新等。加
級紀錄有差。○以翰林院侍講學士任啟運。
為都察院左僉都御史。○辛卯。
上御勤政殿聽政。○定永免直省關口米豆額
稅例。諭國家設關權稅。定其則例。詳其考核。

凡以崇本抑末載諸會典著為常經由來已久其米豆各項向因商人販賤鬻貴是以照則徵輸第思小民朝饔夕飧惟穀是賴非他貨物可比關口徵納米稅雖每石所收無幾商人藉口額課勢必高擡價值是取之商者仍出之民也朕御極以來直省關稅屢次加恩減免又恐權吏額外浮收刊立科條多方訓飭每遇地方歉收天津臨清許墅蕪湖等關口商販米船概給票放行免其上課皆以

為民食計也但係特恩間一舉行未能普遍夫以養民之物而權之稅轉以病民非朕已飢已溺之懷也今特降諭旨將直省各關口所有經過米豆應輸額稅悉行寬免永著為例俾米穀流通民食充裕懋遷有無者不得藉以居奇小民升斗之給不至有食貴之虞以示朕惠恤黎元之至意至各關口徵收則例不一有徵商稅者有徵船料者有商稅船料並徵者今既蠲免米稅其船料一項若不

分晰明確著為規條恐致混淆滋弊應如何辦理之處著交該部詳查妥議具奏尋議查徵收船料之關向不收納貨稅即空船過關亦計船身丈尺納料今若概將船料豁免恐船戶串通奸商將一船米糧分船裝載以致應納料之空船混淆偷漏應令該關監督將向例徵收空船料銀者遇有裝載米船過關其應納料銀自照空船料銀之數納料如本屬空船及按年抽單納課者仍照舊例徵收

但船隻料銀各關俱係收納何計石徵收之關獨不收納料稅或係料稅即在計石徵收之內則例未經開載查各關空船既係徵料是船料自應一體輸納應令該關監督詳議報部臣部再行議奏再查寬免米糧等稅原以充裕民食管關官員不得借免米稅之名將所徵貨稅銀兩侵蝕肥己如有徵多報少情弊即將該關員嚴加議處并令將免過米稅數目年滿報部查核從之○諭朕為八旗

兵丁生計。屢沛恩施。并諭該都統等。加意教養。乃該都統等。並未遵奉飭禁。於兵丁衣服器用。僭侈之處。僅以傳行曉諭塞責。又安能於生計有所裨益耶。旗人所得錢糧。視綠營兵丁較優。當差養家。未嘗不足。果能安分節儉。各務生理。何至艱窘。著交八旗都統等。將如何革除奢靡之習。有裨生計之處。悉心詳議。實力遵照辦理。○戶部議准。貴州總督兼管巡撫張廣泗奏稱。黃平一州。前因苗疆新設。多需兵糧。是以將額徵地銀。改收米石。今該州於每年額徵秋糧。除撥供支。尚有餘米六百六十餘石。請仍照每石七錢五分之數。改徵銀解庫。以省撥運。從之。○刑部議覆。原任山東巡撫朱定元奏。請將刃傷折傷及臨時拒捕等項。分晰指明。通行各省。畫一遵照。等語。查竊盜拒捕。刃傷事主。稱為折傷以上。擬絞監候。若拒毆官司。差捕惟實。係折一齒一指以上者。方與擬絞。若係刃傷而平復者。

則又止於加等徒三年。惟竊盜棄財逃走。尚知畏懼。若因追逐。仍敢持刃傷人。已非折人一齒一指之倫。祇以本罪加等滿徒。勢必肆行無忌。嗣後各項犯罪拒捕。仍照律例分別加等治罪外。其竊盜棄財之案。如有逞兇執持金刃。戳傷事主者。應照折傷以上。擬絞監候。從之。○刑部等部議覆。寧古塔將軍鄂彌達等奏稱。船廠等四城兵丁。均係種地為生。離城一二百里居住。賞給為奴之人逃走者。本主近覓不獲。再報知該管官追緝。耽延數日。免脫已遠。而追緝官員。又係別旗別佐領之人。弋獲無從。不免罰俸之累。應如所請。嗣後將所派追緝之員停止。如有逃者。令本主限期稟報。該管官派員帶領追緝。倘本主奉差外出。即令妻屬呈報。該管官速行派員躡捕。如不弋獲。例將承緝官員。年底彙題叅處從之。○直隸總督高斌覆奏。欽奉清理刑獄恩旨。請將事非兇惡。情有可原。各案犯。應軍

流枷號者俱杖責分別寬免。其各州縣戶婚田土細事。應杖者併寬免。以該處甘霖大沛之日為止。得旨。下部知之。旌表守正被戕之山西崞縣民李大德女李氏。壬辰。

上詣暢春園問

皇太后安。

上還宮。諭大學士等。今科殿試制策內羨餘一條。係時事中之切要者。讀卷官務須留心閱看。以覘士子平素之學問經濟。不得僅以

文理通暢字畫端楷。遂列前茅。如果能確有所見。愷切敷陳。可備採擇者。朕將見諸施行。即字畫不甚工緻。亦應拔取進呈。以備親覽。可傳諭讀卷諸臣知之。○又諭曰。護軍統領金住年老。著以原品休致。都統鼐格不能辦理旗務。著補授金住所遺護軍統領員缺。護軍統領除管轄護軍操演外。別無應辦事務。若仍復苟且從事。不加奮勉。定行加倍治罪。鼐格所遺鑲藍旗蒙古都統員缺。著西特庫

調補。福興亦不勝滿洲都統之任。西特庫所遺鑲白旗漢軍都統員缺。著福興調補。福興所遺正藍旗滿洲都統員缺。著盛安補授。盛安所遺

陵寢內務府總管員缺。著佛倫補授。納穆圖並不辦理該旗事務。領侍衛內大臣事務亦不可無坐辦之人。納穆圖著革去都統之任。令在領侍衛內大臣上辦事。鑲黃旗漢軍都統員缺。著馬爾泰補授。○內閣學士兼禮部侍郎李鳳翥老病休致。以詹事府詹事錢陳羣為內閣學士兼禮部侍郎。○癸巳。

上御養心殿閱殿試進呈卷。召讀卷官入。諭曰。今科殿試策耗羨一條。最關時務。卿等所擬十卷中。惟第六卷條對頗明暢。本欲置為第一。但策內有幾字錯落。可拔置第二。所擬第二卷。拔置第一。所擬第一卷。改置第三。命拆第一卷視之。是金姓浙江人。

上顧戶部侍郎梁詩正曰。金姓汝曾保舉過他。

梁詩正奏曰。金銜臣曾保過。現任七品小京官。命拆第二卷。楊述曾。江南人。拆第三卷。湯大紳。江南人。其餘諸卷。

上一鑒定。命大學士張廷玉填寫。○命大學士等詳閱刑部進呈本章。諭讞獄必依乎律。律必準乎情理之平。刑部為執法之官。辦理案件固當執法。而其中情節不一。又當參酌核擬。以期歸平允。人命至重。尤不可不慎也。朕每於刑部所奏重犯。其中稍有一綫可原者。或降旨從寬末減。或交九卿定議。皆於法外原情。以示矜恤。但日理萬幾。恐披覽之際。一時或有未周。照簽批發。雖論法不枉。而原情較疎矣。嗣後刑部進呈本章。及秋審各案。著大學士等詳閱。其中有應加覆核者。即擬寫雙簽。並將情節聲明進呈。待朕酌量。則周密慎重。益可副朕哀矜庶獄之至意。○訓戒吏部九卿秉公驗看月選官。諭今日引見月官內。如王華賁。王兆鰲。俱已年老。劉岐亦不

勝繁劇之任。朕已降旨分別改補。此皆經九卿驗看之員也。夫州縣為親民之官。若稍從姑息。必致貽誤地方。所關匪細。向例月選吏部過堂後。復令九卿驗看者。原屬慎重吏治之意。如其中行止不端等類。或一時不能辨別。而年老衰庸者。原可一望而知。乃吏部九卿從未舉出是非。不能知乃出於避嫌。知而不言耳。蓋視驗看為具文。故示寬容。俾得引見赴任即可了事。所謂銓衡人材者。何在。況庸員赴任之後。督撫即見其衰老不能辦事。亦須試看數月。始行題參。而於地方事務已貽誤不少矣。且該員甫經到任。旋被叅回籍。往返道途資斧拮据。於該員亦有何益。嗣後務須秉公詳加驗看。有庸老不勝任者。或應勒休。或應改補教職等官。即據實具奏。不得仍前因循。聊且塞責。大學士等議覆。直隸總督高斌奏稱。天津水師營牆垣內已無隙地。惟牆外向南地面閒曠。應添兵一千名。以

足舊額三千之數。又滄州為運道要區。現亦官多兵少。應添兵二百名。請勅交八旗滿洲蒙古都統等按數派撥。原議查看獨石口外張家口外八溝添駐兵丁。建造營房之處。均請停止。再現駐之兵。設有協領佐領等官。每佐領名下兵不過五六十名。今應將新兵即撥各佐領管轄。無庸另設多官。惟各省駐防兵額至三千者。例設副都統與將軍兼管。今天津亦應添設副都統一員。協同都統管理。以符體制。所有天津添設之副都統員缺。請於八溝副都統常久。獨石口副都統保善二員內補用一員。其餘一員遇缺請旨另補。獨石口副都統既經裁汰。其原有之防守尉應仍舊制復設。至張家口羅文峪二處裁汰防禦六員。添設驍騎校五員。今八溝獨石口既不駐兵。則應裁之防禦無缺。可補請仍留舊地駐防。無庸添設驍騎校。再獨石口外臺站向亦隸副都統保善兼理。現並無大臣稽查。

應令古北口提督就近管理得旨。常久著補授天津副都統。保善自補授副都統以來。並不勉力。且伊亦有降級調用之罪。即著補授獨石口防守尉。其應裁之防禦六員。著暫行停止。俟出缺時再行裁汰。驍騎校五員。仍著補放。餘依議。○戶部議准河南巡撫雅爾圖疏稱。永城鹿邑夏邑三縣。乾隆六年水災。請蠲丁地銀一萬七千四百二兩零。下剩應納錢糧。分別被災分數。分作兩年三年帶徵。其勘不成災者。緩至本年麥後徵收。得旨。依議。速行。○甲午。上御太和殿傳臚。賜一甲金銜。楊述曾湯大紳三人進士及第。二甲張進等九十人進士出身。三甲卓道異等二百三十人同進士出身。○上詣暢春園。問皇太后安。○幸圓明園。○以兩江總督那蘇圖閩浙總督宗室德沛對調。○乙未。

上奉

皇太后御長春仙館。諭辦理耗羨一事。乃當今之切務。朕夙夜思維。總無善策。是以昨日臨軒試士。以此發問。意諸生濟濟。或有愷切敷陳。可備採擇。見諸施行者。乃諸貢士所對。率皆敷衍成文。全無當於實事。想伊等草茅新進。未登仕籍。於事務不能曉徹。此亦無怪。其然。今將此條策問。發與九卿翰林科道。閱看。伊等服官有年。非來自田間者。可比。可悉心籌畫。各抒所見。具摺陳奏。候朕裁度。若無所見。亦不必勉強塞責。至外省督撫。寄重封疆。諒已籌算有素。並著各據所見。具摺奏聞。務期毋隱。毋諱。以副朕集思廣益之意。戶部議准。臣部尚書陳惠華奏。稱廬鳳潁泗四府州疊被災。侵飢民流離異地。需動項遣歸。安徽實存數目。尚未造報。約畧亦屬無多。請將兩淮今春撥存課銀內動用。即以在部捐監銀扣抵等語。查安徽上年秋撥冊報。尚有

備公銀三十餘萬兩。應令該撫確實查明。倘有必需。即於前項鹽課銀內動撥。一面奏聞。一面辦理。仍報部以便扣抵。又稱此數府州給賑甚多。倉穀動用無存。先經總督那蘇圖奏准動銀十萬兩。赴楚採買米穀。而湖北湖南尚俟江督知會。並未撥運等語。應如所奏。行令該督轉飭委員。並咨湖廣督撫。星速買運。并酌量於十萬石外。再為多撥。分貯廬鳳等屬備糶。又稱江督奏請以銀十萬兩約買米十萬石。價值不敷。應令核照時價採買等語。查安徽省應買米石。既經湖南巡撫奏照原價買運。自應飭照辦理。穀價隨時長落。亦當量為變通。應令查明買運十萬石外。仍有急需。而楚省現存不敷。撥運即咨商隣省。確訪時價。一面奏報。一面購買。得旨依議速行。又議覆欽差侍郎周學健調任兩江總督。那蘇圖江蘇巡撫。陳大受遵旨查奏被災州縣。徐屬銅山沛縣宿遷為最。淮屬清河桃源安

東次之此六縣極貧現屆麥秋尚遠應再加賑一個月其次貧未奉加賑較極貧無異應將銅沛宿三縣之次貧除前借口糧抵賑一個月應再賑一個月至清桃安三縣之次貧已酌借口糧者免其秋還未借者無庸補給再普賑一月海州沭陽二州縣六年被災最甚應將極次貧再普賑一個月徐屬之蕭縣邳州睢寧淮屬之山陽阜寧五州縣俱未奉加賑應將極次貧普賑一個月再各州縣內有逃荒回籍向未領過賑項及現在收養流民各賑兩個月淮安大河徐州三衛按坐落州縣照原分極次貧辦理等語應如所奏速行辦理至稱現請加賑之口糧皆屬急需將現在截留撥發徐海二屬平糶米糶漕米撥往缺米地方散給本色亦應如所奏得旨依議速行添建江南亳州營潁州汛改設守備衙署從調任總督那蘇圖請也○免甘肅寧夏乾隆二年分震災被焚茶課銀一千五

十兩有奇○丙申戶部議准調任閩浙總督兼理浙江巡撫兩浙鹽政宗室德沛疏報下砂場下砂二三場自建築備塘堵塞竇道淹涸不常產廢糧存難承原科重賦請照錢塘倉潮淹蕩地之例減徵額課銀七千一百三十三兩零從之○禮部等部議覆御史陳大玠奏稱文武互試原欲簡拔全才乃自定例以來累科獲雋者無幾而日久弊生不肖士子恃有互試之例文場則夾帶傳遞代做武場則換卷內簾但憑文取中外簾又稽察維艱徒滋科場之弊未收兼備之才應如該御史所奏嗣後將文武鄉會互試之處停止從之○丁酉

上奉

皇太后幸同樂園○諭大學士等據河南巡撫雅爾圖奏稱豫省今春雨澤及時二麥暢茂異常四月下旬即可刈穫收成十分豐稔等語朕覽之甚為欣慰因思直隸地方今春雨

澤未為普偏恐二麥未必豐收不能不資藉於隣省可傳諭高斌令其酌看本地情形須用接濟與否若須接濟或將豫省倉儲運借來直或直隸遣官齎銀往豫採買應於何時辦理緩急遲早之間著高斌與雅爾圖彼此熟商具摺回奏江南淮徐鳳潁等處被災之後米糧不敷若有須用二麥之處亦著江南督撫與雅爾圖妥商辦理尋據直隸總督高斌奏直屬天津河間正定順德廣平大名等處麥價騰貴請先動藩庫銀三萬兩委員往豫採買運至直屬之近河州縣交卸報聞又據河南巡撫雅爾圖奏江省被災之後自須二麥接濟擬動司庫銀十萬兩發可通江南水路各州縣乘時購備並咨江督如果需用即委員領運不致遲誤得旨知道了妥協為之 戊戌

上詣長春仙館問

皇太后安奉

皇太后還暢春園○戶部議覆雲南巡撫張允隨奏稱滇省向有青龍等銅廠緣開久硯深另於廠地前後左右開硯煎辦或收買米燥煎銅或地界極邊烟瘴甚盛或廠地同屬東川抽課給價不能與湯丹兩例自須量為調劑以裕廠民工本使多得銅觔方於鼓鑄有益應如所請將舊有之青龍惠隆太和馬龍等廠照初開例每銅百觔抽課二十觔餘銅以五兩一百觔收買金釵坡廠每銅百觔例給銀四兩外增價六錢初開之者囊大水碌碌虐枯等廠照湯丹普毛兩廠例每銅百觔抽課十觔餘銅以六兩一百觔給價從之○兵部等部議准調任江南總督那蘇圖疏報川沙營所屬之六團灣沔鎮陳水關橋三處水陸通衢梟販出沒請於每汛撥兵五名巡守並添建三汛營房從之 刑部議覆順天府府尹蔣炳奏稱京城失業游民棲宿火房原有稽察之例第恐開設覓利之徒容留匪

類請勅下五城御史及順天府轉飭大宛兩縣各司坊官遵照雍正十二年乾隆二年定例實力稽查倘仍留匪類如有犯強竊案件者分別有無知情分贓照竊盜同居之父兄人等例治罪保甲人等照所管內徇匿為盜之人例分別責處又五城地方遼濶每多盜竊案件若將刺責等犯概發大宛兩縣收管恐稽察難周請嗣後安插人犯除大宛兩縣仍照例稽查外如屬五城令司坊官一體稽

查點驗再宛平縣所屬西山門頭溝地方開窑人衆易於滋事且恐逃犯混雜其中應令該縣設立印簿給發窑戶將各項傭工人等按月一報巡檢查考并飭西路同知就近稽查如該窑戶不行開報照脫漏戶口律治罪若在開窑地方或聚衆逞兇致成人命將本犯按律治罪外該窑戶照總甲容留棍徒例治罪均應如所請從之命太常寺卿林令旭通政使司通政使彭啟豐各仍留直隸浙

江學政之任○己亥

上詣暢春園問

皇太后安○吏部遵旨議奏凡行取人員例以單月主事銓補查單月選用主事班次先儘降補捐納廢員各項坐補外統計七缺始用行取二人實屬壅滯惟查臣部現在銓選主事單月內有捐納班次又有降補及廢員人數無多遇輪班選用之時每致無人過班應請嗣後行取人員以主事陞用者除原班仍照例銓選外其單月主事遇各班輪用無人即行通融抵補如督撫有以同知題補者應令於所屬各員酌量人地相宜之缺具題陞補再前經臣部定議雖有降革留任叅處亦准保舉註冊原以保舉務在得人不拘常格但督撫大臣或拘泥成例以次等人員塞責請嗣後遇保題行取之年令該督撫務將有守有為聲名卓越者據實舉出倘係循分稱職之員雖任內並無叅罰之案亦不得濫保

從之。戶部議准署兩廣總督慶復奏稱粵西向未開爐鼓鑄。惟恃滇省解運。今西省廠銅照配試鑄。與滇錢無異。如開廠添配搭放兵餉各項。實於民用有濟。請將粵西礦銅留充鼓鑄。俟流通後再停解滇錢。以省運費。從之。○奉恩輔國公愛音圖故。以其子鎮國將軍兼頭等侍衛吉存襲職。○庚子諭據將軍鄂彌達奏稱吉林烏喇地方失火。燒燬衙署官兵房屋數百間等語。兵丁被火燒燬房屋。朕心軫念。其房屋被燒兵丁。著每人賞一月錢糧。此失火之事。雖不能豫加防範。使之必無。而救火諸器具。備辦妥協。萬一遇有火警。亦不難於撲滅。著行文鄂彌達等。將救火諸器具俱妥協備辦。又諭曰。鑲黃旗蒙古副都統員缺一缺。著烏勒德補授。一缺著常久署理。鑲白旗漢軍副都統員缺。著舒凌阿補授。正黃旗漢軍副都統員缺。著巴爾品補授。正紅旗蒙古副都統員缺。著蘇瑚濟補授。其

餘副都統員缺。著該部照例開列。應陞人員名單。進呈請旨。○又諭軍機大臣等。昨據寧古塔副都統常勝奏。將軍鄂彌達。因發遣人犯沈柱。係伊故友。瞻徇情面。資助衣服銀兩。擅令乘騎驛馬。又聽其謊言。令訪事體。遣往禁地貿易等語。鄂彌達素好交游。瞻徇情面。事所必有。伊係獲罪罷革之人。朕特加恩錄用。委以將軍之任。伊陛辭時。朕曾諄諄訓諭。伊當感激朕恩。屏除私意。諸事實心奮勉。乃伊到任以來。辦理一切事務。仍與為督撫時無異。夫風俗人情。各有不同。自應因地。以為治。豈可執一而論。即如沈柱。擅自配所潛逃。投奔鄂彌達。伊係統轄將軍大臣。並不拏究懲治。乃以故友。瞻徇庇護。將何以為眾之表率。耶。此案朕因伊係專閫大員。未便據該副都統奏。奏即行重治。其罪止交該部查議。嗣後伊如仍不悛改。瞻徇私情。決不姑宥。從重治罪。倘因此遂與常勝不睦。伊即係一無

恥之人矣。著寄字嚴行申飭。戶部議准雲南巡撫張允隨疏報祿豐霪益通海三州縣水衝石壓地畝請開除額徵銀九十兩零米一百九十石零并昆明嵩明二州縣從前誤報田畝應納銀糧一體豁除從之。吏部左侍郎暫管刑部侍郎事務蔣溥奏臣見近奉恩旨賞借八旗兵丁資生銀百餘萬兩在兵丁多係兌錢用度乃鋪戶乘機射利錢價騰貴每兩虧折二分有餘固已受其剝削而各項市販肩挑亦不無苦累請飭步軍統領及順天府尹五城御史曉諭查禁得旨著照所請速行免江蘇阜寧沛縣河租六合縣并衛乾隆六年水災額徵銀四千七百九十四兩有奇米一萬四百八十九石有奇免陝西提標鎮營原借未扣銀五千四百八十一兩有奇○辛丑諭地方偶遇大災若平日救火器具完備臨時又實力搶護原可早為撲滅不致延燒多家雍正六年欽奉

皇考世宗憲皇帝諭旨令各省督撫於省會及府城倣照京城之例置備水桶水銃鈎鎌麻搭之類分貯各門令文武官弁派定人役兵丁一遇火警迅速齊集搶救不使蔓延并將搶火惡棍查拏從重治罪如有司官有赴救不力具報不實者該上司嚴查叅劾加倍議處其救火器具動用何項銀兩製備不得派累里民哉

皇考為民禦患之諭旨至詳且悉朕御極以來又復再三訓飭矣今看各省情形似有視為具文之意且器具日久敝壞亦應隨時修整方有濟於實用著該部行文各省督撫將軍等務遵

皇考諭旨嚴飭所屬敬謹奉行倘有怠忽從事者經朕訪聞必於該管大臣是問○大學士等議覆湖南巡撫許容奏稱乾隆六年秋冬江蘇福建湖北委員赴湖南採買穀石嗣聞價貴撤回廣東委員奉諭不論時價高下務

必買回。竊計聞貴停買則徒費跋涉而雖貴亦買。又虛糜帑金。請預咨知會。以免臨時周章等語。應如所奏。行令湖廣江西督撫。以乾隆七年為始。於秋收之後。自七八月至十二月。將本地附近水次各屬穀價。咨報安徽江蘇閩浙兩廣。俾得審擇而行。若遇各省必須採買。而江廣等處又值價昂。亦准在存倉穀內撥運。秋成照數買補。還倉得旨。即依議行。

○戶部議准。甘肅巡撫黃廷桂疏請添建秦安縣倉廩三十間。從之。○欽差侍郎周學健調任兩江總督。那蘇圖安徽巡撫張楷奏請將原賑至本年三月止之宿州靈璧虹縣宿州衛四處被災十分至七八分之極次貧并原賑至二月止之宿州等四處被災六分之極貧。與鳳陽臨淮懷遠潁上霍邱泗州五河鳳陽衛鳳中衛長淮衛十處被災十分之七八分之極次貧。即以借給一個月口糧作為加賑。其原賑至本年正月止之鳳陽臨淮等

十處被災六分之極貧。與定遠亳州蒙城太和壽州鳳臺天長盱眙泗州衛九處被災之極貧。亦即以借給兩個月口糧作為加賑。此內有已借者。免令徵還。未借者。均照月數按戶散給。其逃荒回籍及收養流民。未經領賑者。補給至宿州等四處原無六分災次貧。其五分災貧民。與鳳陽等十九處六分災次貧。五分災貧民。俱係例不賑給。現亦酌借接濟。其平糶糧價。照下江每石減銀二錢之例。辦理得旨。如所請。行下部知之。○命工部尚書哈達哈署戶部左侍郎。三和戶部右侍郎。阿里衮左副都御史。德爾敏總理修造萬年吉地勝水峪工程事務。○壬寅。籌漢軍歸籍移居諭八旗漢軍。自從龍定鼎以來。國家休養生息。戶口日繁。其出仕當差者。原有俸祿錢糧足資養贍。第閑散人多。生計未免窘迫。又因限於成例。外任人員既不能置產另居。而閑散之人外省即有親友可依。及手藝工作

可以別出營生者皆為定例所拘不得前往以致袖手坐食困守一隅深堪軫念朕思漢軍其初本係漢人有從龍入關者有定鼎後投誠入旗者亦有緣罪入旗與夫三藩戶下歸入者內務府王公包衣撥出者以及召募之暇手過繼之異姓并隨母因親等類先後歸旗情節不一其中惟從龍人員子孫皆係舊有功勳歷世既久自無庸另議更張其餘各項人等或有廬墓產業在本籍者或有族黨姻屬在他省者朕意欲稍為變通以廣其謀生之路如有願改歸原籍者准其與該處民人一例編入保甲有不願改入原籍而外省可以居住者不拘道里遠近准其前往入籍居住此內如有世職仍許其帶往一體承襲其有原籍並無倚賴外省亦難寄居不願出旗仍舊當差者聽之所有願改歸民籍與願移居外省者無論京外官兵閑散俱限一年內具呈本管官查奏如此屏當原為漢軍

人等生齒日多籌久遠安全計出自特恩後不為例此朕格外施仁原情體恤之意並非逐伊等使之出旗為民亦非為國家糧餉有所不給可令八旗漢軍都統等詳悉曉諭仍詢問伊等有無情願之處具摺奏聞○大學士等遵旨議奏生息銀兩一項蒙

世宗憲皇帝軫念兵丁貧苦酌發帑金分定各該標營營運生息俾緩急有賴兼以利濟商民請嗣後每年所得息銀除賞給外餘剩存貯司庫不准復行作本生息其直隸山西湖廣三省之外屬協營未及偏賞及河南之外屬各營兵丁未曾賞給者查四省皆有以息作本之銀已經充裕應令該督撫提鎮等量為通融一體分給再各省滋生銀兩利息約以一分為準不得過一分五釐著為例如違例將息作本并私取重利者將該管官指叅從之○又會同刑部議覆刑部左侍郎張照奏稱例載私放錢債違禁取利者笞四十重

者坐贓論罪止杖一百雍正年間因佐領領催等有指扣兵餉放印子銀者

世宗憲皇帝特諭禁止定為枷號勒追利銀入官乃李禧條奏重利放債旗民一體治以重罪並許借債人自首免罪不償將放債人治罪仍追利銀入官此端一開提督八旗衙門首告者紛紛徒長刁詐應如該侍郎所奏嗣後止照律例館定例如有佐領驍騎校領催等盤剝該管兵丁放印子銀者枷責仍勒銀入官外其止條重利放債者應不論旗民仍依違禁取利本律治罪如借債人首告究訊明確按照律例定擬至李禧所奏各條查條律例館奏明刪除並條例內不載者均不得引用再律例館纂定新書內開凡有民人違禁向八旗官兵放轉子印子長短錢者亦照旗人例枷責治罪等語未經註明恐滋含混應請將此例添註交通領催兵丁扣取錢糧等字樣其治罪之處應照領催枷號七十五

日之例減等枷號四十日如旗人有舉放重債勒取兵糧並不在本佐領下者亦照民人減等枷責例從之○吏部議覆江西巡撫陳宏謀疏稱江省移駐同知三員驛丞四員巡檢十一員並添設糧道庫大使一員及肇陳口巡檢一員復設城子鎮巡檢一員添設復移駐太平橋巡檢一員等缺均屬因地制宜請仍舊設立應如所請從之○兵部等部議准江西巡撫陳宏謀等疏稱吉水縣富田地方移駐巡檢餘干縣瑞洪鎮移駐縣丞德化縣城子鎮復設巡檢請於各該縣前等鋪添設鋪兵十一名從之○刑部尚書劉吳龍以病重奏請回籍得旨著在任調理不必回籍太醫院派良醫一員前往診視○山西巡撫喀爾吉善疏報大同府屬豐川衛朔平府屬寧朔衛吉州并鄉寧縣乾隆五年分開墾早荒田畝一百五十五頃五十七畝有奇○癸卯戶部議准調任閩浙總督兼浙江巡撫宗

室德沛疏報浙省之仁和錢塘海寧嘉興秀水嘉善平湖石門長興安吉等州縣向按米數建仓現因易穀不敷存貯應添建廩座從之○禮部議准御史陳其凝奏請行令各省學政務於按臨時密察各生素行舉優黜劣從之○兵部議覆原任山東巡撫朱定元疏稱東省添防汛兵除分撥文登膠州即墨三營不便議裁外其濟南武定壽樂兵四百三十二名自應裁汰原撥千把二員并外委四員遇有事故開除俟各營缺出調補應如所請從之○免雲南景東府無徵海糧耗羨銀四百六十兩有奇○甲辰月食○賜準噶爾台吉噶爾丹策零勅諭曰爾奏中謂前此興戎釁非由爾又謂使臣傳臬前來事非得已追論舊事為此非分大言又謂奉大皇帝諭遣人巡視科卜多為守卡人攔阻遣使往藏熬茶留數月不遣半道空還定議至京貿易達道力疲不能前進嗣後須取道噶斯伏祈

睿鑒夫興戎起釁實由爾國前諭已明爾得尼招大捷之後方行遣使我大國有何不得已而出此耶瀆理前說意果何為豈又欲借端生事乎朕為天下共主業已降旨息兵豈肯食言爾欲起釁朕亦不禁也定議巡視科卜多有巡視卡倫以內之語乎爾人由布延圖直至喀勒占和碩卡倫朕始禁阻朕之人有過阿爾台至爾之卡倫內巡視者乎其事雖小然屢違定約豈合於和好之道朕允爾赴藏熬茶者亦鑒爾至誠故遣官護送預備牲畜爾人至東科爾數月惟圖貿易不思進藏竟自還部誰為阻止乎如欲阻止何如不允爾奏之為愈也且齊默特欲還朕降旨詢問或來時噶爾丹策零囑爾或出爾等之意倘出噶爾丹策零則彼亦一絕無信行之人嗣後豈容復請乎今即復欲進藏亦必懇朕降旨始可遵行如何遽作前去之計惟以道出噶斯為請況人數日期俱在未定豈有

令朕之大臣官弁虛糜廩餼先勞守候乎。以此問吹納木喀。據稱噶爾丹策零實不知始末如此。因不信。齊默特語始令我等前來問明。并輸誠意。乞大皇帝施恩。一切朕已明諭。吹納木喀至貿易之事。本與爾使哈柳定議。並未遵行一次。如何又欲更張。請取道噶斯乎。此次爾所陳奏不合事理。念爾亦未深知。將奏請之事暫行停止。令吹納木喀傳諭於爾。勅書亦令齎往。隨勅賞各色緞十端。磁器十件。大緞六端。○戶部議覆河東鹽政尚琳疏稱。河東產鹽。惟恃雨澤灌池。以資澆曬。近緣種地之後。土性日鬆。雨小則停注水畔。不能暢流。雨大則浮土下衝。反致河壅。滴水不充。產鹽自薄。當量為變通。應如所請。自乾隆七年為始。除池外地百八十六畝七分。仍聽耕種外。將池內地暫停耕種。俟數年後。如果池水充足。產鹽漸多。再行禁止。所有商人額租麥六十石七斗零。穀九十一石零。應一併

開除從之

大清高宗法天隆運至誠先覺體元立極敷文奮武孝慈神聖純皇帝實錄卷之一百六十四

大清高宗法天隆運至誠先覺體元立極敷文奮武孝慈神聖純皇帝實錄卷之一百六十五

監修總裁官經筵講官太子太傅文淵閣大學士文淵閣領閣事領銜內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總辦官經筵講官太子太傅文華殿大學士文淵閣領閣事務稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆七年壬戌四月乙巳

上御勤政殿聽政○詣暢春園問

皇太后安奉

皇太后御長春仙館○諭各省辦理耗羨一事

朕恐或有不便於民之處是以於廷對時入於策問之內乃諸生無所敷陳甚且有不知耗羨為何事者又降旨詢問九卿翰林科道並外省督撫等庶幾合衆論以求一是此朕集思廣益之意也諸臣如有所見即當就事敷奏待朕採擇如無所見亦不必勉強塞責

所降諭旨甚明乃近見諸臣奏對竟有於耗羨一事之外旁牽側引以狂瞽之見為無稽之言所答並非所問即說到耗羨亦究竟不知原委萬難見諸施行甚至潘乙震之請開捐路斯道之請鑄弊尤為荒謬之極方今天下承平海宇寧謐無擾攘之干戈無繁興之土木上而府庫充實下而滿漢安堵並非財用不足亟須籌畫之時此人所共知者在我君臣惟當制節謹度未雨綢繆為持盈保泰之計若侈言豫大豐亨而流於奢靡荒縱固非安不忘危之道但如諸臣所奏沾沾以國用為言竟似國用實有不足不得不從權計議者此風一開將見言利之徒接踵而起其為害甚大豈止有妨政體而已不但諸臣不當揣摩及此陳奏紛紜即專司錢糧之臣惟應通計出入平準制用亦不當託言國計徒以綜核為盡職也數日來無知妄奏之輩原當加以處分因係降旨詢問導之使言故雖

乖謬。特從寬宥。此番訓諭之後。如再有節外生枝。悖理傷道者。必從重治罪。以為妄言者之戒。○大學士等議。覆步軍統領舒赫德等奏。稱京城錢文一項。向設官牙經紀。領帖評價。嗣經御史陶正靖等條奏裁革。以致囤錢鋪戶。無人說合。轉致居奇。應如所奏。仍設經紀十二名。交該府尹行令太宛二縣。召募老成殷實者。領帖充當。如鋪戶擡價。責成官牙諭令平減。倘從中壟斷滋事。該管官立拏。並令五城御史一體稽察。再鋪戶囤錢。向有例禁。但須酌定數目。請以五十千文為率。即令赴市售賣。並立賞給查首規條。所議亦屬可行。應交該管衙門訪查辦理。毋使番役等借端滋擾。從之。○免直隸遵化州乾隆六年水災餘絕地畝租銀。并蔚州水衝民地額徵銀兩。○丙午。

孝端文皇后忌辰遣官祭

昭陵定

皇太后

皇后宮樂為中和韶樂。莊親王允祿等奏。伏查丹陛樂與中和韶樂音節不同。因丹陛樂有章而不歌。故字句舊未詳審。音律不相符合。現改正撰擬進呈。再查會典。惟

太皇太后宮用中和韶樂。

皇太后。

皇后宮均用丹陛樂。考諸掌儀司。則自來陞座還宮。並用中和韶樂。蓋昔年撰擬樂章之時。

以

皇太后。

皇后不敢同於

太皇太后。便以丹陛名之。且樂章一式無別。而考擊之法。則又全不循章協韻。今既查明。自應分別陞座還宮。為中和韶樂。行禮為丹陛樂。得旨是。○兵部議准。御史薛澂奏。稱直省額設長養驛夫半屬空缺。臨時雇覓。無事則官吏夫頭分肥。應請行令各省督撫嚴飭所

屬司驛各員按名召募毋令虛冒工食從之
刑部等部議准原任山東巡撫朱定元疏
請酌定查緝老瓜賊各款一各汛兵務於每
日黃昏迄天明自本汛上下至鄰汛適中之
地輪替巡查該州縣衛所按汛撥壯快一名
印給號單二紙載明更次持至兩汛適中處
所俟上下汛兵巡到即令自帶姓名小戳於
號單更次下印蓋如兵役偷安扶同濛混照
例責懲該管官弁或有徇縱均照徇縱老瓜
賊定例叅處一老瓜賊行蹤雖詭居家之時
斷難逃牌甲里鄰之查察應行令各省督撫
飭所屬地方官遍諭鄰佑地保人等不時稽
查如有蹤跡即密稟嚴拏不必指出首人姓
名俟起有屍賊將首報人分別首從犯按名
賞給其兵役平民有能偵知首報審實者亦
照例給賞一老瓜賊刦殺之案既無上盜情
形又無事主賊單懸空躡緝殊非易事但捕
役人等獨無議賞之條恐無以示鼓勵嗣後

有能緝獲鄰境及本境老瓜賊者不論首從
皆按名給賞一老瓜賊蹤跡無定非專員查
捕未易奏效請勅下直隸等北五省督撫及
此五省之接壤鄰封照例通飭州縣查拏外
再於所屬捕盜同知通判遴員帶役四散查
拏獲有老瓜賊照例議叙捕役賞賚誣良邀
賞叅處治罪從之一定邊左副將軍額駙策
凌等奏據烏里雅蘇台大臣報稱準噶爾厄
魯特阿爾咱來降奏入報聞○丁未

上詣長春仙館問

皇太后安○諭朕念甘省地瘠民貧前特降旨
將民欠借糧自雍正六年至十三年者一概
蠲免其乾隆元年以後借欠之項從壬戌年
為始分作六年帶徵至最寒苦之武威平番
永昌古浪西寧碾伯等六縣則將帶徵之項
一并豁免今思民欠借糧內從前有因倉糧
缺少以銀一兩作糧一石借為籽種口糧之
需者計自雍正十年至乾隆六年如武威平

番永昌古浪西寧碾伯等六縣欠銀八萬八百七十三兩有奇。又蘭鞏平慶寧夏五府屬之金縣河州靖遠隴西會寧通渭鹽茶廳平涼崇信靜寧固原涇州華原合水平羅花馬池等處欠銀四萬六千五百四十二兩有奇。此項借銀原係以銀作糧。即與借糧無異。其自雍正十三年以前者。既已加恩蠲免。其在乾隆元年以後者。又分作六年帶徵。至武威等六縣。又復全予蠲豁。此等抵借之銀。事同

一例。著照乾隆元年借欠糧石之例。從乾隆七年為始。分作六年帶徵。俾民力愈得寬紓。受國家休養之澤。著該部即傳諭該督撫知之。○吏部議准。大學士等奏稱陝甘寧夏及四川松潘等處。皆地界邊郵。較直隸山西更關緊要。必須分用滿員。以資彈壓。惟直隸山西沿邊補用滿員。定以五年俸滿。分發有題缺之省。遇缺題補。原因山西並無題缺。直隸題缺無多之故。查陝甘最多題缺。今若補放

滿員。仍照直隸山西之例。既補邊缺。又調內地。五年期滿。又送部分發。往返為煩。請陝甘二省。及四川松潘鎮各題缺。不論沿邊內地。以五分之一。補用滿員。遇副將叅遊等缺出。兵部按旗將應用人員。揀選請旨補授。後如果諸悉營務。遇推陞之處。准與綠旗人員一體較俸陞轉。再直隸山西期滿人員。仍分發陝甘題補。不無壅滯。自應停止。從之。○工部議覆。欽差侍郎周學健調任兩江總督。那蘇

圖江蘇巡撫陳大受奏稱。淮郡東西一帶。有從前未議興修之銅沛二縣境內石林黃村二口。為黃水衝刷成河。灌入下流。淹漫地畝。應於堅築土壩外堆砌亂石幫護。高與地平。仍與漫灘無異。實為地利河防。有益無礙等語。應仍令會同該總河詳加勘議。果無妨礙。作速估題興修。至所稱沛縣縷水隄。經田家隄漫開決口。直入沛境。亟應堵築。并自華山起至斜隄止。通加培厚。並疏通南路金陵鎮

一帶尾閘使分水歸湖。又碭山縣之小神湖為通邑積水蓄洩之所。復有大溝一道由紀家窪歸湖。湖之尾閘全藉馬家溝宣洩。今皆年久淤塞。亟宜疏濬。又邳州境內沂河舊有護隄。經梅家道口衝開六處。新城三面被淹。亟宜補築。又山陽縣西鄉一帶低田。每遇白馬湖漲。即遭淹沒。應於護城河東隄之尾。堅築橫隄。隄下建設涵洞。隨時啟閉。以洩靈潦。又阜寧縣境內之郭墅湖。南通射陽湖。為洩水要道。久經淤平。亟宜開通等語。應如所奏。將急應興舉各工。行令逐一確估。造具應修工段。應需銀兩清冊。送部查核。工竣另冊題銷。至海州境內之薔薇河。高橋河及薔薇河尾舊閘。先經該督那蘇圖奏准次第興挑。應令催趲完工。其阜寧桃源等十四州縣。現據各地方官及士民詳呈請行疏築等工。應令該督等將議疏議築處所有無干礙河道。利益民田。以及各府州縣被水村莊詳加相度。

分別緩急次第興舉。並核明官修民修妥協辦理得旨。依議速行。○戊申。

上奉

皇太后還暢春園。○大學士等議覆川陝總督尹繼善奏稱蔡把什湖地畝租與回民耕種酌定章程九條。一屯兵舊有堪用牛騾并徵回防所挑下馬匹應按數撥給其價分作五年帶徵。一各色籽種回民力難自備應於新收屯糧內給領。一所借籽種於秋收後扣還下剩糧石照安西之例官四民六分收。一回民既事耕作自須接濟口糧應照安西民屯之例酌借哈密存貯白麩秋收後交還小麥一蔡把什湖各處渠道向因兵丁屯糧修濬灌漑今易回民而兵獨任疏濬未免偏枯應令蔡把什湖守備仍督兵修防并飭回民協助交管糧文職稽查。一回民所借麥石原當按時扣還但於所得六分之一內併令交納恐力有不繼應於未分時先扣籽種既分後再

交口糧仍照一麥二穀例糜粟兼收一應還分數應於每年收穫時令哈密公移會糧員秉公辦理一前經提督李繩武奏明令各營於蔡把什湖塔爾納沁二處種有餘地各三千畝所收糧石即以增給哈密防兵及牲畜餵料等項今查塔爾納沁地寒土瘠收穫無幾應停耕種其蔡把什湖餘地三千畝既經墾種有效不便棄為曠土仍令駐防兵丁承種庶兵力不致多分於駐防仍可無誤均應

如所請行令該督會同永常等辦理從之○

戶部議准署雲南總督張允隨疏稱永北府金沙江金廠近來產金漸少若按數徵收固累淘戶如遽議豁免永禁私淘又恐農民失資生之計自應仍聽民淘每歲額徵金課自乾隆六年為始減半完納遇閏免徵從之工部議准直隸總督高斌疏報南運河緯道窄狹急需開拓天津靜海青縣滄州交城東光吳橋故城等八州縣民居危險願得價折

移應請動支興修從之○鑄給駐防哈密統領關防從川陝總督尹繼善請也○己酉上詣暢春園問

皇太后安○諭軍機大臣等朕前降旨將陳高翔補授江蘇按察使今伊來京請訓朕看其年已六十有餘恐精力不勝江蘇繁劇之任著德沛陳大受留心試看數月據實具奏○大學士等議覆御史李清芳奏稱地方被災有夏旱夏水遭風水雹各項部議謂遭風水雹及夏天被水均不動賑等語查夏災後不能補種秋禾即與秋災無異現在直隸江南福建等省夏災較重仍照例加賑並未著有概不准賑之條至水雹災多在夏月向例有貸無賑是以原議令查勘情形照夏災例辦理其風災一項原議令該督撫確勘如果民食艱難即於常平倉穀內酌借倘損傷大田必需賑濟者即具題請旨遵行是一切夏月水旱風雹各災俱應臨時酌籌賑卹使皆歸

實際嗣後各省賑務均照此議辦理從之。○
庚戌吏部議覆河南巡撫雅爾圖奏稱現當
麥收之時麥多價平奸徒乘機躡麴亟須委
員協同地方官嚴緝請予議敘以示鼓勵應
如所請嗣後奉委查麴之員有能拏獲別邑
開坊躡麴數至三百觔以上之案准紀錄一
次數多者以次遞加其失察之地方官仍照
例叅處從之。○工部議准直隸總督高斌疏
報保定縣迤西千里長堤前經修築完固惟
頂衝迎溜埽灣及堤外深坑處所宜再幫培
而玉帶河東束水之處雖屬險要究與黃河
大溜有別惟在隄工堅固即可捍禦現委員
勘自祁州城南唐砂磁三河下口匯入豬龍
河起至文安縣艾頭村東接營田圍埝止共
計二十一一段應將隄身加幫寬厚頂衝迎溜
者外加戩隄深坑積水者加添高厚請動項
興修從之。○授一甲一名進士金姓為翰林院修
撰一甲二名進士楊述曾一甲三名進士湯大紳

為翰林院編修。○辛亥免川省標鎮協營官
兵脫逃無徵銀兩諭雍正七年川省標鎮協
營派往西路駐防官兵內有脫逃兵丁支過
草料馬乾鹽菜銀一千六百九十餘兩此項
自應著追無可寬貸但川省兵丁非盡土著
其脫逃者類皆外來隻身無所顧戀之輩既
無產業又無親屬遠竄日久查訊無踪其當
日管領之弁員又多更換難以責其追償徒
滋營伍之擾著將此項銀兩開恩豁免以息
追呼該部即傳諭川省督撫及提臣等知之
○大學士等議准戶部尚書陳惠華奏稱近
聞民人踵至山海關者皆訕然而返或該關
地方官有意留難不行給票或管關官員故
為指勒請行令直隸總督飭地方官遵例查
係近關三百里內居民出關種地者即給印
票并行令該關副都統轉飭管口官驗明印
票立行放出從之。○添建直隸泰寧鎮屬續
添各園寢汎界弁兵衙署營房從總督高斌

請也。○壬子大學士等議覆給事中楊二酉奏舉子會試例由州縣起文轉府至藩司咨赴部有轉發州縣付本人者有親身赴司候領者各省原不畫一惟赴省候領需費耽延殊堪矜憫應如所請自甲子年為始於鄉試後藩司咨文限一月內發各州縣交本人自齎投部武舉均照此例從之。○以正紅旗叅領明圖為正黃旗蒙古副都統護軍叅領滿福為鑲藍旗蒙古副都統。○調正白旗蒙古副都統保德為正白旗滿洲副都統以正藍旗叅領策凌為正白旗蒙古副都統。○旌表守正被戕之正紅旗滿洲代敏圖佐領下閒散色爾衮母俄其訥。○癸丑諭山東上年有歉收之州縣直隸今春二麥亦未見豐稔恐二省將來有須用米糧接濟之事此時糧船經過山東著即速行文與漕運總督將尾幫漕糧截留十萬石酌量於臨清德州二處分貯備用該部即遵諭行。○工部議准調任

江南總督那蘇圖疏報臨淮縣乾隆六年夏間被水勘有魚要等塘亟須加築塘埂并建涵洞磚橋應請動項興修從之。○內閣翰林院帶領己未科散館修撰編修庶吉士引見得旨清書庶吉士徐文煜陳中龍王居正蔣麟昌王覺蓮詹肯構俱著授為編修廖鴻章程嚴陳士琰俱著授為檢討漢書修撰莊有恭編修秦勇均均已經授職其庶吉士表曰修金文淳沈德潛官獻瑤楊開鼎吳嗣富徐景熹張九鑑王錦葉酉蔡揚宗陸秩鞠遜行喻燁姚廷祐宋邦綏俱著授為編修傅隆阿陳世烈伊興阿蔣祖培孫景烈鄭志鯨羅愔趙德昌俱著授為檢討卜寧一楊培徐烜徐孝常馮成修諾敏廩格俱著分部學習以部屬用陶鏞管一清王化南交與直隸總督高斌以知縣用袁枚黃澍綸曾尚增王見川交與兩江總督德沛以知縣用唐炳孫拱極王宮王士瀚著歸進士原班銓選。○調安徽布政使包

括為山東布政使護理巡撫事務。山東布政使魏定國為安徽布政使。○刑部侍郎鍾保年老休致。以正藍旗滿洲都統盛安兼管刑部左侍郎事。○甲寅

上詣暢春園問

皇太后安。○諭軍機大臣等。浙江海塘改建石工一事。據德沛等奏稱。現在搶修柴塘。乃目前之急務。至改建石塘。係經久之圖。請將料物豫期備辦。俟水緩沙停。乘機興築。每年以三百丈為率。分年分限。實料實工。庶可與東西兩塘並垂永久等語。現交大學士九卿等議奏。朕思海塘捍禦潮汐。保護田廬。攸繫綦重。如果改建石工。可垂永久。即多費帑金。亦所不惜。但聞議請分年修築。次第興工者。原為試驗。並非切實之舉。蓋以沿海淤沙。雖云堅澀。究之是沙非土。難資鞏固。其改建石塘。有無利益。果否可垂久遠。并現今海塘實在情形。未能深悉。可寄信與那蘇圖。令其詳細

查明。據實奏聞。尋奏海寧老鹽倉迤西至仁和章家菴一帶柴塘四千二百餘丈。潮溜衝刷。坍塌靡常。每歲搶修糜費。但在工人員有稱應改石塘。有稱柴塘已足抵禦。既無一定之議。且柴塘自觀音堂迤東一帶。春間沙坍無存。今塘外已有漲沙數丈。及百丈不等。是情形隨時不同。應俟汛過後再加確勘。籌辦。惟柴塘險要處所。亟宜豫防。現在相機鑲築。大汛經臨。可期保固得旨。所奏俱悉。○戶部

議准河南巡撫雅爾圖疏報洧川鄆陵河內南陽新野臨潁襄城長葛新鄭郟縣寶豐等十一縣河塌積水沙壓等地共一百四十七頃二十四畝零。請將地糧銀五百九十四兩零照數豁除。從之。○免福建福清連江羅源霞浦福鼎福安寧德等七縣颶災地丁銀一千七十兩有奇。○乙卯。諭八旗為國家根本。凡有關教養之處。朕無時不繫於懷。著各旗都統副都統等悉心籌畫。或有益於生計。或

有益於風俗者各抒所見繕寫交與大學士彙齊之後著大學士會同各都統詳加斟酌擇其果有裨益者公同舉出抑或有益於目前而將來不無流弊抑或初行似屬未便而歷久可漸收其效者一并舉出彙奏候朕採擇施行○又諭大學士等朕聞山東運河水淺糧艘較往年濡滯沿途起剝甚覺周章看來抵通遲緩未能如期而至朕所聞如此白鍾山及巡漕御史俱未奏聞但稱漕運遄行無阻並非實在情形著傳旨詢問白鍾山及巡漕御史等令其明白回奏並將如何辦理之處籌畫辦理尋據河東河道總督白鍾山巡漕給事中吳元安先後奏覆南漕頭幫緣三月以前河水充足隨到隨行雖抵東為時稍晚比較上年實未遲逾惟現在南漕船隻尚多未入東境倘仍前間斷脫幫則臨清板閘不能逐日啟放汶水無由下注上源又不發水恐後來江廣重載未能遄行臣等會同

籌畫惟有蓄水輕船之法或下捱牌或用剝船或建束水草壩現飭廳汛各員豫備應用至尾幫一過濟寧南旺當將天井等閘緊閉不令水勢南下其南旺迤北遇閘即啟使汶水全行北流如此加意收束總可趲行出境得旨○所奏俱悉○又諭軍機大臣等近京一帶雨澤稀少現在二麥情形收成歉薄將炳奏請緩徵之處甚合朕意可將原摺寄與高斌閱看令其查明應緩徵之州縣速行具奏候朕頒發諭旨尋奏查順天保定永平正定河間天津順德廣平等府屬直隸易州冀州趙州深州定州等州屬未得透雨將來收成必減請緩徵新舊錢糧秋成後再行徵收得旨知道了有旨諭部工部議准直隸總督高斌疏請修理獨石口城垣並挑築河壩各工估需銀七萬七千四百九十餘兩從之○丙辰諭曰刑部尚書劉吳龍患病溘逝朕心深為軫惻著散秩大臣一員帶領侍衛十員

往奠茶酒伊平日居官廉謹家道清貧著發
內帑銀五百兩為喪事之用○丁巳

上御勤政殿聽政○諭軍機大臣等廣東巡撫
王安國奏開採銅礦那移倉穀虛懸帑項
一案部議係何員給發令該督核擬題覆又
圍基隄工輾轉遷就靡費帑金一案部議將
帑金作何著落賠補令該督妥議具題是承
辦之鄂彌達等俟覆到之日尚應查議著落
賠補乃王安國既經查明奏何難分別核

擬自去年至今歷時已久尚未覆到其中必
有情節或受人囑託或代鄂彌達等開脫抑
或因案情確鑿雖有意照拂不能為之周旋
礙難題覆故作延緩之計可寄信慶復令其
逐一詳查明確據實奏聞尋奏查銅礦一事
係前督臣鄂彌達馬爾泰題准動項墊給馬
爾泰任內接辦發銀因辦理不妥以致官商
視為畏途經王安國奏請停止臣以事因督
撫遷延所致請將各廠支過銀兩即於原給

發之督撫名下追賠又圍基工程一事先據
鄂彌達奏用條石層砌嗣因工鉅費繁減省
遷就改用石塊是以與原奏不符未經據實
陳奏咎實難辭自應分別查叅著落王安國
原奏時未分晰細查今委司道等官親勘往
覆定議稽延時日實未受人囑託代鄂彌達
等開脫得旨所奏俱悉○戶部議准調任閩
浙總督兼理浙江巡撫宗室德沛疏請添建
樂清縣倉廩從之○又議准署雲南總督張

允隨遵旨奏請嗣後民夷墾種田地如係山
頭地角坡側旱壩尚無砂石夾雜在三畝以
上者俟墾有成效照旱田例十年之後以下
則升科若係砂石硠确不成片段及瘠薄已
甚不能灌溉者俱長免升科至水濱河尾尚
可挑培成田在二畝以上者照水田例六年
之後以下則升科如零星地土低窪處所滄
涸不常難必有收者仍長免升科仍令該地
方官給照開挖以杜爭占從之○刑部等部

會題參革浙江巡撫盧焯等營私受賄各款一案。據調任閩浙總督宗室德沛欽差副都統汪扎爾疏稱。臣等逐一訊明。分別按擬除盧焯事後受財。求索借貸等。輕罪不議外。應如所題。盧焯楊景震俱依不枉法贓律擬絞。監候秋後處決。呂守曾亦應照律擬絞。已縊死。無庸議。但伊身任監司。婪贓逾貫。原係應擬死罪之犯。自不得援照身死勿徵之條寬免。仍著落嫡屬勒追入官。得旨。盧焯楊景震俱依擬應絞著監候。秋後處決。餘依議。○以刑部左侍郎張照為刑部尚書。起草任工部尚書趙宏恩為刑部侍郎。○旌表守正被戕之貴州普定縣民薛紀妻陳氏。戊午。

上詣暢春園問

皇太后安。○諭軍機大臣等。朕覽陳宏謀所奏米糧價值清單。乃係本年二月分者。今已四月矣。始奏。二月糧價太覺遲緩。可傳旨訓飭之。戶部議准。山西巡撫喀爾吉善疏請。

晉省之生俊人等捐納監生。按照應捐銀數。如有願捐米豆麥三色者。依春秋時估折中價值。合算收捐。願交穀者聽便。仍照乾隆三年題定捐數收。從之。○又議准。左都御史管廣東巡撫王安國疏請。將該省錫礦於原奏開採一二處外。再開一二處。並將廣韶肇三府。勘有產錫山場。即令採試。以備將來惠屬各縣錫山採徧之後。另移旺處開採。從之。○以正黃旗漢軍叅領王承宗為正紅旗漢軍副都統。○以故一等子三濟札布子策凌多爾濟襲爵。○免湖廣協勦城綏苗徭病故官兵豫借銀兩。○是月。署直隸馬蘭鎮總兵官副都統布蘭泰奏。陵寢東西兩面。薊州遵化州所屬之黃花山。桃木嶺。孟家園。恥轄古強。蠶椽三峪。及平山寨。鮎魚關等處。附近風水。現咨督臣轉飭地方官曉諭各村莊旗民。毋令犯禁。再黃崖關屬之低頭鞍。黃土梁。邊空二處。并黃花山營屬。

之歡喜嶺奔牛山前面均虞私越現亦於營汛防兵內各徹六名前往防守並以黃花山為風水要阨酌添額外外委一名往來遊巡得旨知道了因時制宜以為整飭之計則可所慮者汝多事耳調任兩江總督那蘇圖以奉諭訓飭奏陳身肩鉅任存喫咻之心於中而示鎮靜之意於外得旨此是也然屬員不知妄行揣度必以為有意諱災何所不至耶茲至閩省尤當戒之○又覆奏蘇松濱海

府屬向緣巨梟往來洋面為匪就縛後時患越獄是以設有蟒鏈刑具今漸次斂跡應悉行掣燬得旨知道了江南河道總督完顏偉奏洪澤湖水盛漲現拆寬蓄清壩口門十餘丈使豫由清口宣洩入海將來三石滾壩不致減水過多方與高寶一帶灘地無礙又鎮江京口東之新河口一處塌卸江崖非下埽所能保護已於上游徐家橋頭下游掘港處所堆築兩石壩大溜開行不致內汕俟

汛過有效再於京口迤西觀音菴前及掘港迤東甘露港地方築石壩兩座挑溜護崖奏入報聞江蘇巡撫陳大受以淮徐等屬被災辦理錯誤奉諭免譴奏謝得旨若因救過而過為姑息亦非得中之道也管理淮關事務郎中伊拉齊奏淮關向有籤量等費緣附近無籍之輩居停客商專攬代納客販利其便已相沿樂從今若淨盡革除胥役無以利已轉致籤量遲滯更啟偷運之端是以適中調劑於每石酌留三釐中以二釐充辦公之用實為便商安民起見現密札督撫仍留此項以為辦公用度得旨是告之督撫可也浙江巡撫常安奏下屬之賢否視上司之表率惟有身先砥礪以冀所屬共厲清操得旨廉固人臣之本然為封疆大吏則非僅廉之一字所能勝任而愉快也必也為國家計安全為民生謀衣食移易風俗興行教化其事正多也觀汝似有終身誦廉之意則非矣

○又奏撫臣到任後例應盤查倉穀若專委該管知府恐滋弊竇請另委別員協同監盤并於例限三月出結外再展三月節次辦理不致倉儲有名無實得旨所奏是知道了○湖廣總督孫嘉淦奏巡視苗疆經過岳州長沙一帶沿途操閱營兵弓箭較進於前而排鎗未能齊出環鎗亦少敏捷現諄飭訓練得旨所奏俱悉武備所宜留心但須行之以實而要之以久○又奏苗人經勦洗就撫之後

實錄卷一百六十五

三

不敢多種田畝而苗頭人等恃强多占苦樂不均現飭理徭同知會同城綏兩縣逐寨清查每卒一名授田十畝外餘為官田召佃起租給尙長工食並以充餉惟徭人時出為匪多因無恒產所致現亦飭查有無田廬編立保甲給種官田近山照苗寨之例設立頭人約束得旨所奏俱悉可實力妥協為之至於撫綏苗徭一摺言雖近是不能無易視之之弊也 湖北巡撫范琛奏武漢黃德一道經

管省城常平倉穀嗣以該道駐守黃州撥歸武昌知府就近管理惟本管府原有穀一十萬石勢難兼顧查省城現有驛道事務尚簡常駐會城應將道倉改令經管得旨如所議行○湖南巡撫許容奏請給還伊子原得一品廕生得旨汝在湖南並未見汝實心任事為百姓作福之處而先自乞恩何可得耶○河南巡撫雅爾圖奏閱侍郎周學健奏稱歸德府屬考城等縣有羣盜在黃河假為客舟

實錄卷一百六十五

三

遇晚登岸刦掠地方官捕治未獲等語查與臣所訪姚二鬍子假扮客商伺隙剽掠現在飭拏之處相仿前將查辦情形奏聞至臣到任以來前後兩載屢獲盜犯現尚委員察緝並無諱盜之實得旨汝到任之始原有緝盜之念既至二三年後遂以為行之有效而盜案少此其所以多盜也戒之慎之○又奏豫省多盜總由江南沛縣之姚窩劇盜蔓延重以鳳潁等屬災民流入並山東之桃源鎮自

設立同知後亦為聚匪之所現飭所屬無分疆界互相緝拏得旨汝等各省頗有此推諉之弊朕已降旨申飭矣看此奏仍不能免也○又奏請行令各督撫於科甲出身歷任州縣之知府內揀選才守出衆而有風力者照知縣行取之例送部引見以科道錄用與在內之編檢部郎相間推補得旨此奏候朕緩酌之○署山東巡撫布政使魏定國奏請行令直隸等省分別查明恩旨以前到配徒犯

實錄卷五十五

三九

放回原籍軍流三年無過請旨釋放得旨此奏待朕緩酌之汝甫護撫篆即屢欲以弛刑博寬大之名此意非矣○又奏閱侍郎周學健奏稱山東魚臺縣南陽鎮地方楊監生家白晝被盜刦掠并桃源集改設同知衙門捕役人等聯絡積匪以致多盜等語當經嚴訪據各覆並無是事得旨觀汝辦事一味姑息戒之慎之○署兩廣總督慶復奏廣肇惠潮嘉五屬已成旱象瓊屬積歉之餘雨亦未足

請暫停額徵銀米俟秋收後酌請按分寬免惟此六屬地處濱海極南均需米販運濟應將東省之韶關及西省之梧潯等處米船料稅豁免得旨所奏俱悉有治人無治法尤宜妥協為之○又奏報廣肇惠潮嘉五屬得雨得旨覽奏曷勝欣慰尤可喜者近京一帶正望膏澤於昨夜正得滂沛甘霖朕經春入夏憂懷倍增於此可以少釋矣卿其同朕喜也

實錄卷五十五

三

廣西巡撫楊錫紱奏粵西猺獞近來時有煽惑為匪多由不行保甲所致查苗猺聚處各村寨原有頭人等管束惟有以彼管束之例用我稽察之法現飭各州縣官於城廂內外及漢人村寨仍按成法編立其苗猺地方止就本地情形變通辦理得旨所見甚是所辦亦妥可嘉也○廣西左江總兵官丁士傑奏左江鎮屬二十餘州土司間有不法生事者一由該管官弁縱役騷擾一由怠弛長奸養癰貽患更有內地漢奸勾通釁事現飭界

連土司之各汛營弁毋致仍前滋擾諱飾並禁漢奸潛入得旨所見頗當勉力為之貴

州總督兼管巡撫張廣泗覆奏署督臣張允隨原奏威寧州屬銅川河銅廠可期旺發今開採一載總因礦砂淡薄報獲無多又原奏大定府屬樂貢里杓底地方產有水銀可期旺發今開採九月苗引全無廠民星散其遵義府屬抵水廠雖有礦砂亦甚微細數月不效惟婺川縣屬之大岩山試採有效現亦照

實錄卷一百五十五

三

引鑿取並修文縣屬紅白二廠較前產稍多均可望有旺機臣復查威寧州之兄姑地方出有水銀硃砂現在飭令試採至署督臣奏開恩州府屬之桑平鹽井坳二處並非鹽井并遵義府屬之鹽井溝鹽井坡二處鑿深五十餘丈嘗無鹹味似屬無益仍令不必停工冀可得鹽以濟民食得旨無益之事不可為有益之事不可止酌中為之若分彼此之見則非矣駐防哈密安西提督永常奏哈密

為西部最要惟當諸事慎密不敢疎懈得旨諸凡慎重為之不可忽視之亦不可過於疑慮致衆人無所適從也

實錄卷一百五十五

三

大清高宗法天隆運至誠先覺體元立極敷文奮武孝慈神聖純皇帝實錄卷之一百六十五

大清高宗法天隆運至誠先覺體元立極敷文奮武孝慈神聖純皇帝實錄卷之一百六十六

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文學殿大學士文淵閣領閣事情察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆七年壬戌五月己未朔日食○諭今年

春夏以來畿輔地方除宣化大名二府及古北口外熱河一帶雨澤霑足二麥可望豐收至順天保定永平正定河間天津順德廣平等府暨易州冀州趙州深州定州等州屬雨水均未霑足普徧麥收分數勢必減少此時農事正忙又值青黃不接之際若仍照例催科恐有妨於力作著將各府州屬新舊應完錢糧一概暫停徵比俟秋成之後再行徵收該部可即行文直隸總督通行曉諭知之○

庚申大學士等議覆建威將軍補熙奏稱綏遠城右衛歸化城察哈爾四處備兵五千名應將領隊大臣四員數目豫報額駙策凌以備徵調帶往並建威將軍之參贊亦應豫為指派又稱察哈爾兵二千名每翼派總管一員如遇徵調與臣等之兵會合時再派領隊二人管轄等語查此項派撥備兵原期平時豫將馬匹器械等項備辦設有調遣即可起程至領隊大臣非官兵可比即臨期指派自可不至貽誤再定例統兵將軍方派參贊此項備兵調往軍營尚聽將軍調發不必帶往時豫為另派至察哈爾兵丁原派總管二員由京復派大臣管轄前往其由何路進發之處難以懸定且五千兵行走必須分隊酌量牧場水草若令察哈爾兵會合伊隊即交領隊管轄諸有未便該將軍所奏均無庸議得旨依議又諭軍機大臣等據補熙奏請豫派備兵之領隊大臣一招是歸化城都統所辦

之事。伊皆欲管之矣。爾等議駁甚是。再前此伊與巡撫喀爾吉善爭奏管轄道廳之事。亦經爾等議駁。看補熙辦事情形。頗有越俎而代之意。本任之事。原應勤奮辦理。本任之外。各處事務。不宜多管。爾等將此寄諭補熙知之。○戶部議覆安徽巡撫張楷奏稱。蕪湖大關和州屬雍家鎮地方。設立裕溪一口。附近有泰寧橋雙橋港。兩汊河。凡進出船隻。皆可越關出港。因去本口下十里。另設裕工口。以防遶漏。並不收稅。又浮橋口岸之南北。實另有二關。以杜水陸盤漏。並不駐守浮橋。該兩處口岸。從前題報總名。止係一處。俱屬巡查要地。應照舊存留。再蕪湖縣百家甸地方。設立東河一口。從前題明。止係巡查口岸。嗣以該口距大關十五里。小販憚於遠涉納稅。經管關官員詳准貨物不及兩數之零星稅課。即在就近徵收。今應仍復舊制。以便商民。均應如所請。從之。○戶部等部議覆調任閩浙

總督兼理浙江巡撫宗室德沛疏稱。艮山門外之姚石陡門。錢塘門外之松木古蕩。餘杭縣之獨松關。千秋嶺。每年絲市。均需派役巡防偷漏。應如所請。照舊存留。止將大嶺一處裁革。從之。○工部議准。河東河道總督白鍾山疏報。儀封縣汛。黃河北岸楊家橋隄工。南灘日淤。黃河大溜。全勢北趨。灘岸塌卸。逼近隄身。實為危險。應於北岸幫築裏戩。南面增築壩臺。請動項趲辦。從之。○免安徽桐城。涇縣。太平。廬州府。舒城。廬江。六安。泗州。盱眙。天長。含山。廣德等十二府州縣。乾隆三年旱災。學田租銀。○辛酉。

孝誠仁皇后忌辰。遣官祭景陵。○兵部議准。步軍統領舒赫德奏稱。世家子弟一項。自雍正十年分發巡捕營。以千總補用。迄今尚多未補實。為壅滯。此等世家子弟。均係舊家大臣之裔。若不量為變通。似與矜恤故舊之意未協。查有門千總一項。例由

臣部於漢軍武舉及捐納人員銓補。今捐納二班。投供無人。請即以候補之世家子弟。以門千總改用。從之。○壬戌。

上詣暢春園。問

皇太后安。○奉

皇太后御長春仙館。○故刑部尚書劉吳龍遺疏內稱。在京部院衙門。皆有飯銀。而戶部銀庫養廉。尤為豐厚。惟內閣吏部禮部等衙門。未獲一體邀恩。請交部酌議。得旨。劉吳龍質

樸老成。操守廉謹。敬歷中外。宣力有年。前聞患病。特遣良醫調治。冀其痊可。今聞溘逝。朕心深為軫惻。已命散秩大臣。帶領侍衛。往奠茶酒。並賞帑金五百兩。為喪事之用。其應得卹典。著察例具奏。餘著議奏。該部知道。○戶部議覆禮部左侍郎張廷璐奏。稱客商販運米豆。皆須投託牙行。今既邀恩免輸額稅。商販流通。價值自當平減。第恐狡僮牙行。把持昂價。滋累商民。應如所奏。行令各督撫。飭屬

嚴切曉諭。倘行家仍有前項情弊。即查明究治。從之。○又議覆調任兩江總督那蘇圖。江蘇巡撫陳大受奏。稱淮徐海三府州屬。上年被災後。粟穀昂貴。報捐寥寥。請將捐監事例。減三收捐。於本年歲底為止。又奏請減三收捐。並照例粟穀兼收。他屬生俊。亦准捐納。外省人民。不准投捐。至來歲三月底為止等語。查與乾隆三年被災州縣減三收捐。并現在安徽布政使包括奏准之例相同。應行文該督撫。將上年被災較重之淮徐海三府州屬。捐監事例。准照原定之數。暫行減三收納。粟穀兼收。其本省未被災州縣之生俊。亦准照向例。赴淮徐海屬投捐。所有停止減捐日期。照安徽鳳潁泗三府州減三收捐之例。一體於本年歲底為止。至稱淮北民食。慣種二麥。菰蘆獨廣。應並准其大麥一石。抵穀一石。小麥一石。抵米一石收納。應如所請辦理。從之。○兵部等部議覆直隸總督高斌奏。稱夷漢

民人自外入口。帶有無鞍馬駝。成羣牛羊。如有口外地方官。或蒙古扎薩克章京等印票。及各汎千把蒙古捕盜官。驍騎校等圖記。與原買牙票。或別口稅票。或取就近保結。守口官弁驗明。即行放入。其餘馱載貨物。與乘騎馬駝。不論有無票結。止除違禁私參等項。仍聽進口。俱不得留難阻滯。倘該官弁混將並無票結之馬駝牛羊放入。照失察無票民人出口例議處。如借稽查名目。已有票結。仍擅抑阻者。照關津留難律議處。至遇有偷盜馬駝事發。若並非商客騎載。又無票結入口者。仍將該官弁照失察例處分。應如所請辦理。再貿易蒙古人等。趕馬駝牛羊。前來抵換需用貨物。若仍令至該管扎薩克處領取用印照票。不無繁苦。自應照現行蒙古進口。並山海關稽查旗人進口例。亦令該官弁查詢旗色姓名人數。檔記放行。從之。○工部等部議准。調任閩浙總督兼理浙江巡撫宗室德沛

疏報。仁和縣築塘取土。挑掘民地九十八畝三分零。竈地二十四畝五分零。請自乾隆六年為始。將額徵銀糧豁除。從之。○癸亥。上奉

皇太后還暢春園。○諭。新例補放副叅領。雖准驍騎校一體帶領引見。但品級較為懸殊。嗣後補放副叅領時。列名之驍騎校。著在外豫備。將擬正擬陪人員。帶領引見。倘應陞人員。不得其人。再行召入引見。著永為例。○甲子。上詣暢春園。問

皇太后安。○戶部議准。湖廣總督孫嘉淦疏稱。先是興寧縣民。需用鐵觔。須自粵東販運。跋涉維艱。近勘該縣屬夏里江口。東安流坡等處。產有鐵礦。請就近開採。以濟民用。從之。○工部議准。調任江南總督那蘇圖疏報。臨淮縣山水陡發。衝坍西關橋座。及兩旁石岸。決口三十餘丈。請動項興修。從之。○添建江南山陽縣新設縣丞主簿二員衙署。從巡撫陳

大受請也。○旌表守正捐軀之直隸廣宗縣民馮改名妻趙氏。安徽鳳臺縣民蕭恒妻田氏。○乙丑。諭據理藩院奏稱。貝勒僧衮扎布溘逝。僧衮扎布自幼隨侍。

皇祖

皇考在內廷行走多年。復於軍前著有勞績。是以授為理藩院額外侍郎。令其在理藩院學習辦事。茲聞溘逝。深為悼惜。著賞銀一千兩。遣散秩大臣馬斌帶領侍衛一員。往奠茶酒。所有一切喪葬事宜。俱加恩准照郡王之例辦理。伊子查拉豐阿。即令回伊遊牧。料理伊父喪事。○議政大臣裕親王廣祿等議覆。大學士查郎阿等奏。前往寧古塔一帶相度。可墾之地甚多。惟拉林阿勒楚喀去船廠甚近。平疇沃壤。五穀皆宜。請先移駐滿洲一千名。屯墾耕種。豫籌各事宜。一揀選派往查屯墾人丁。必須勤儉安分之人。方為妥協。應令八旗滿洲都統等。於各佐領下。不論兵丁閑散。

擇有妻室之單戶。令其攜眷前往。一定邊界。置莊屯。查該處週八百餘里。地方遼濶。今派往之人。不過千戶。非駐防官兵可比。若不聯絡相通。亦於耕種不便。請給每戶屋三間。地三頃。按旗分為八區。查丈應給地畝。立界報部。其住房即隨地畝分置建造。並設總統之副都統衙署於八旗適中之所。以資彈壓。一籌畫積貯。查該處向無存儲米石。自不便雇船廠等處民人代為開荒。應於閑散餘丁。及臺站壯丁內。酌量派往。給與開荒所需牛具籽種。將來滿洲移駐時。即以此項撥給。一設員管轄。查該處總統之副都統。已派出巴靈阿外。其村莊分置處所。尤需稽察之人。請每旗設立屯莊二處。每莊內選授一人為鄉長。給七品頂帶。令管理一莊。每旗內選授一人為虛銜驍騎校。給六品頂帶。令管理一旗二莊。其虛銜驍騎校缺出。由鄉長內挑補。鄉長缺出。由閑散內挑補。并添給伊等地畝。以示

優異。再該處有原隸將軍統轄之協領一員。佐領。驍騎校各八員。兵五百名。今應就近歸副都統管轄。仍屬將軍統轄。其派往之滿洲。即按旗分屬八佐領。作為各該佐領下人。惟該處原止設協領一員。不特查察難周。且於體制不符。應再添一員。分翼管轄。以上各款。統令副都統巴靈阿等。會同將軍鄂爾達詳籌辦理。從之。○吏部議覆。調任閩浙總督兼浙江巡撫宗室德沛疏稱。浙省添設之杭嘉湖道。金衢嚴道。海防兵備道。溫州玉環衛州硤口。西塘海防各同知。海防水利通判。錢仁兩縣主簿。玉環沈家壘全旺前所。松門衛大壘蒲門。塘棲鎮各巡檢等缺。均有彈壓稽查之責。應照舊設立。惟嘉興府王江涇同知一員。事務本簡。同府尚有通判一員。如今移駐管轄嘉興秀水嘉善桐鄉四縣捕務。堪資兼顧。該同知即可議裁。又東西兩塘。原設有同知。并草塘通判。辦理一切塘工。其東西協辦

兩同知。職司不過往來催儆。亦可議裁。又天台縣之平頭潭地方。雖界連三郡。市集每多分爭。但離縣不遠。原設巡檢。即應裁去。均應如所請。從之。○刑部等部議覆御史熊學鵬奏稱。五城雖有協緝之條。而三營尚無協拏之例。以致匪竊肆行。弋獲者甚少。應如所請。嗣後五城遇有竊案。令事主報明本城。并報營員。選兵躡緝外。仍移會各營協緝。如別營兵丁。能於十日內拏獲三案以上者。令本營員酌加獎勵。如不實力協拏。又明知故縱者。分別責革。如一年內。該營所轄地方竊賊稀少。及緝獲過半者。將專汛員弁記功。遇有題補拔補之處。均許保奏報部。如三營將員。能獲別處竊賊。至三案以上者。亦照本汛拏獲竊案例。量予記功。從之。○建江南寶山縣海神廟。從巡撫陳大受請也。○丙寅。吏部議覆。暫署閩浙總督福州將軍策楞疏稱。各省駐防。設立理事同知一官。職司審理旗民互控

案件。與州縣無異。非丞倅分司糧捕者可比。近有識見鄙陋之員。日事趨馳於督撫衙門。或希署印。或圖出差。旗營遇有案件。即委員更替承辦。未免呼應不靈。致多遲誤。應如所請。嗣後各督撫於理事同知。俾專理旗務。概不得另有差委。從之。○修建江南阜寧縣屬沙浦等五墩溝灣等十七汛營房。並添建蘇家嘴板湖二汛。及周門北沙等二十汛。瓦草營房。又北沙惠家溝。下川子三汛。每汛派防兵十名。并添建營房。從調任總督那蘇圖請也。○旌表守正捐軀之福建長樂縣民王平妻鄭氏。○丁卯。大學士等議覆欽差侍郎周學健奏稱淮徐海鳳潁泗六府州屬。現在沿河州縣各缺。俱以河員補授。於牧民之道。素未經歷。惟此數府州。連年災歉。目前之辦賑。日後之撫綏。均需賢員經理。應如所奏。行令督撫將六府州之現任沿河各州縣詳加甄別。如果克勝安撫之任者。題明仍留本任。若

僅係循分稱職之員。或酌調別地。或仍以河員補用。所遺之缺。即令該督等揀選屬員之賢聲素著者。題請調補。方與被災地方有益。又河東河道總督白鍾山奏稱河防關係重大。因州縣膜視河工。是以互為陞調。冀其助理。所以慎重河防。應如所請。嗣後河工同知通判缺出。將應陞之沿河州縣中果能平時留心河務者。許該督會同督撫保題署理。不必專於河員內選補。至南北河工同判缺出。先行委署試用。較之未經委署保舉。遇缺即行題補。更為鄭重。請仍照舊例行。得旨。依議。即行。○戶部議准。原任福建巡撫王恕遵旨疏請。將閩縣雍正七年。加徵無著學租銀五百三十二兩零。并乾隆三年至五年未完民欠銀六百二十兩零。一體豁除。從之。○又議准貴州總督兼管巡撫張廣泗奏稱黔省之格得八地。及銅川河等廠。均產銅觔。較購運滇銅實多節省。亟應上緊開挖。況銅川河廠

經原署督張允隨奏明山形厚大。可期發旺。不但足敷點局之用。應令該督轉飭廠員。加意調劑。務使旺盛。以供鼓鑄。從之。○調陝西按察使圖爾炳阿為山東按察使。山東按察使陳惠正為陝西按察使。○戊辰。吏部議覆河東河道總督白鍾山疏稱。河東新設之河北道。懷慶府黃河同知。開封府南北兩岸同知。儀曹儀考通判。祥符縣主簿。祥陳蘭陽巡檢。武陟縣沁河主簿。管泉通判。又豫省河營守備二員。千總把總各四員。東省河營守備千總把總各一員等缺。或專轄河工。或兼顧運務。均關緊要。應照舊設立。惟舊設之彰德府同知。所管安陽。湯陰。內黃。三縣漳。洹。諸河。非險要工程。必須專員修守者。可比同府尚有糧捕通判一員。如改令就近兼管。則漳河同知。可以議裁。又懷慶府沁河通判。所管沁河。止武陟。木樂店一帶。埽工無多。同府原設有黃河同知。糧捕通判二員。如將丹。沁。兩岸

隄工。及水利泉源。改令就近分管。則沁河通判。亦可議裁。又陽武縣縣丞。所管黃河南岸隄工。界聯鄭州。應併鄭州州判兼管。又滑縣縣丞。所管衛河。長不及十里。界聯濬縣。應併濬縣縣丞兼管。又恩縣主簿。所管運河。止長十餘里。界聯夏津。應併夏津縣縣丞兼管。又博平縣縣丞。所管運河。亦止長十餘里。界聯堂邑。應併堂邑縣主簿兼管。將陽武。滑縣。博平。各縣丞。恩縣主簿。一併裁汰。均應如所請。從之。○理藩院議覆巡查歸綏城員外郎那遜額爾和圖奏稱。歸化城商賈衆多。奸匪乘機為盜。並有逃入。應如所請。行令將軍。都統等飭所屬官兵。於各卡倫交界處所。不時嚴查。倘有賄縱情弊。將該員分別處分。其有捕獲命犯二三次者。官則紀錄一次。兵則以罰取牲畜給賞。仍移咨察哈爾。四子部落喀爾喀。烏喇特。鄂爾多斯等處。添兵設卡。一體巡查。惟蒙古官員。原無加級紀錄之例。嗣後果

有捕獲著績者。令該扎薩克等報部。亦以罰取牲畜給賞。如有徇縱者。分別議處。從之。○旌表守正捐軀之直隸威縣民段讓妻侯氏。○緩山東濟陽長清二縣。乾隆六年旱災額徵鹽課。○已已。

上詣暢春園。問

皇太后安。○諭。江。安。二省之鳳。潁。淮。徐。各屬。連歲被荒。閭閻積困。朕心軫念。頻加賑卹。又特遣大臣前往察看。於常例之外。大沛恩膏。不使一夫失所。至於應徵錢糧。有已經蠲免者。亦有例應帶徵者。朕思災後之後。即偶遇有年。一時難以驟致豐裕。若令完納。現年應輸之正供。又加以遞年帶徵之積欠。小民未免拮据。著將江省之清河。桃源。安東。銅山。沛縣。宿遷。蕭縣。邳州。睢寧。徐州。衛。海州。沐陽。安省之宿州。靈璧。虹縣。臨淮。懷遠。泗州。五河。十九州縣。衛被災各戶。所有乾隆五年以前未完帶徵銀兩。統行停緩。俟各處年歲屢豐。民間

元氣漸復之後。該督撫再行酌量定限。分年帶徵。具奏請旨。俾民力寬舒。漸登康阜。以慰朕勤恤災黎之至意。至各州縣內有未經被災各戶。仍照常例辦理。該部即行文該督撫知之。○大學士等會同戶部議覆御史孫灝奏稱。各屬常平分貯舊額。並議定增貯新額。務須各按地方大小。分別戶口繁簡。及水次遠近情形。通盤籌算。如舊額穀數。酌量可敷備貯者。即仍以舊額為額。如舊額之外。有必須議增捐穀者。即於原議捐穀內另行酌定。并入舊額內為額。統將實在應貯數目。造冊報部。永著為額。惟此項穀石。既經酌減釐定。自不便再行缺額。請令定額後。即將各府州縣衛所現存常平穀及報捐穀。一併計算。如現存尚不敷所定之額。若係賑糶之項。俱動存貯。應行買穀銀。採買貯倉。如本無應行買補穀數。其不敷在捐穀者。仍俟陸續報捐穀內抵補。至合計現存。已敷定額。仍有額外捐

貯。設遇賑卹。即行動用。無庸買補。再足額後。凡有按年平糶。及散賑動用。俱令報部。於應行買補時。查明該處續捐。儘數抵補。從之。○吏部議准。山西巡撫喀爾吉善疏。請酌定夷漢章程。以重邊圉各款。一。增設吏役。查口外地方遼濶。凡蒙古漢人交涉事件。統歸歸化城同知。七協理通判。成招定案。與州縣無異。原設吏攢二名。實不敷用。應再各添典吏二名。並准七協理衙門揀選繕寫滿洲蒙古文移人一名。同知衙門挑取土默特官學內繕寫滿洲蒙古字人二名。以便辦公。一。議給囚糧。查各協理等。俱設立監獄。惟歸化城一處。已經議有囚糧。其餘尚未議給。應於每處各設囚糧米二十四石。錢一十二千文。并給與柴炭等銀。以示矜恤。一。增設遞馬。查殺虎口至歸化城。雖設有蒙古臺站。止遞都統往來文移。至七協理筆帖式緊要事件。盡屬舖司傳送。不免遲誤。應照內地偏僻州縣例。於歸

化城和林格爾。各設遞馬六匹。夫三名。善岱托克托。各設遞馬四匹。夫二名。崑都崙薩拉齊。清水河。各設遞馬二匹。夫一名。一。分別會審。查歸化城地方。東則察哈爾。西則土默特。及鄂爾多斯。蒙古漢人錯處。常有交涉之事。各協理等。既屬滿洲蒙古官員。若以審理交涉案件。原非越俎。惟向例均報同知轉咨蒙古官員。赴協理衙門會審。由蒙古官員。回明都統完結。轉報經年。殊多拖累。今應交各協理等。自行審定。徑由同知查核。照例發落。無庸申請都統委員會審。再各協理等。與扎薩克會審交涉事件。向在適中之所。今各協理庶事殷繁。又有監獄。別無佐雜可委。若令出境。反多貽誤。請嗣後令各扎薩克官員。照原任歸化城巡察色楞奏准例。赴協理衙門會審。一。徑報協緝。查該協理等所管蒙古人搶劫案件。向係專報都統委員緝拏。除當場現獲盜犯外。概不准查緝。亦不准徑報。俱由理

事同知轉報。以致漏網甚多。請嗣後不論蒙古民人命盜案件。事主呈報之日。該協理一面差捕。一面錄供。徑報都統委員速拏。無庸同知轉報。從之。○庚午。諭鎮國公弘昉之妹格格。前曾指嫁喀喇沁貝勒僧衮扎布。今格格聞僧衮扎布病故。情愿守節。在

皇太后前哭泣奏請。格格尚未成婚。即執大義守節。矢志甚屬可嘉。著給和碩格格品級。准伊所請。令其守節。今僧衮扎布之媳。前往游牧處所持服。著交與內務府總管辦理。將格格送赴僧衮扎布家內。令同伊媳前往游牧處所。以盡其道。著派散秩大臣一員。護送格格前去。俟喪事畢。仍著格格來京。在僧衮扎布家內居住。其如何辦理。令其前往。及回京時如何安置之處。著內務府議奏。尋議。前往游牧處所時。一切衣服等項。改用純素。至回京時。應用物件。俱飭照例豫備。再格格既在京居住。則所需帳房等項。應行減去。從之。○

旌表守正捐軀之直隸盧龍縣民張珍妻。段氏。○辛未。遣官祭

關帝廟。○大學士等議准。河東河道總督白鍾山奏覆。御史胡定條奏摺內。請河工効力人員。不必取具身家殷實印結。并因公里誤之員。亦准投効。一款。查河工効力。惟因公里誤者。不准投効。蓋恐廢員得以藉工冒濫。至効力人員。必須身家殷實印結。原以河工差繁費重。設遇工程緊要。派委分辦。稍不如式。即干叅賠。若如該御史所奏。不須殷實印結。恐貧乏者到工。資斧不給。或啟需索遲誤等弊。所請斷不可行。惟查旗員効力定例。由本旗都統。咨部轉送河工。而各省人員。仍照舊例。在河臣衙門具呈。事屬互異。請嗣後各省如有願往河工人員。亦照旗員之例。取具本籍地方官身家殷實印結。赴部投遞註冊。俟河工缺額。請人。照數咨發到工。從之。○戶部議准。直隸總督高斌疏稱。滇省解京銅觔。向

來長運官抵通。交銅務監督。秤收轉運。即回
滇報銷。另有委官在通。守掣批迴。今既令長
運官管解進局。抵通時。又經坐糧廳點驗。派
經紀轉運。所有銅務監督。及雲南委官。應併
裁撤。從之。○禮部議准。閩浙總督策楞疏請
將故福建總督范承謨。於省城建祠入祀。并
將同事殉難諸臣。及臺匪案內死事人員。一
併附祀。從之。○免兩淮泰州屬廟灣場淮安
屬板徐。中莞。臨興。等場。乾隆六年分。水災額
徵銀三千六百六兩有奇。並帶徵竈欠銀。四
千三百四十五兩有奇。○免福建永定縣被
水衝陷地畝。無徵銀糧。○壬申。諭軍機大臣
等侍郎周學健奏請。徐州酌添兵丁一案。經
兵部以無庸議。覆朕已降旨詢問。兵部奏
稱。徐州原額兵丁。儘足彈壓。若如該侍郎所
奏。添設亦僅二百餘名。不足以壯聲威。且無
故添撥多兵。轉覺周章。部議固是。朕已降諭
旨。但周學健之意。以徐州地方緊要。累年荒

歉。近來盜賊頗多。是以有此條奏。可將周學
健陳奏之意。並兵部奏帖。寄與德沛。令其留
心辦理。○兵部議覆漕運總督顧琮奏稱。漕
標各營額兵四千六十名。節經雍正年間。新
添小關。竊港。二營兵各二百名。又廟灣營。佃
湖集。兵五十名。東海營。水兵九十二名。或分
防水陸。或常川巡洋。均關海防要務。應照舊
存留。惟中。左。右。城守。四營新兵一千名。應照
馬。二步。八戰守各半之例。裁中營兵二百四
十名。左右二營兵各一百三十名。城守營兵
一百名。俟有事缺出。酌減停募。再東海營新
添水兵。內有戰糧二十七分。除舵工頭目兩
船共兵十二名。仍食戰糧。其餘步戰水兵十
五名。改為守兵。均應如所請。從之。○御史胡
定參奏刑部侍郎趙宏恩。前因工部尚書任
內。勾通湖廣叅革道許登瀛。納賄敗露。經部
議褫職。近復用為侍郎。非所以儆官邪。彰國
紀也。請亟予罷斥。得旨。前刑部侍郎缺出。一

時未得其人。因趙宏恩才尚可用。其從前被
叅之案。乃收受舊屬餽遺。尚非婪贓可比。是
以將伊補授。今胡定奏稱納賄之人。不應復
用。趙宏恩雖非婪贓。究屬受賄。胡定指名叅
奏。亦屬可嘉。趙宏恩著不必用。其刑部侍郎
員缺。該部另行開列請旨。○兩淮鹽政準泰
奏。淮安屬莞瀆場竈民賑後乏食。請與海安
貧民一體加賑一月。得旨。如所請行。該部知
道。○內閣翰林院帶領新進士引見。得旨。一

甲進士金銓。楊述曾。湯大紳。均已經授職。其
二甲三甲進士張進。張泰。開鍾鳳翔。蔡雲從。
姚範。孫廷槐。朱佩蓮。丁居信。凌鎬。朱盛江。徐
璋。羅暹春。查庫蘭。蔡時田。經聞。王鋌。杜若拙。
鄭有則。惠元士。金洪。叢中芷。胡澤漢。廖芳蓮。
勞通。熊為霖。熊元龍。潘偉。邵齊壽。李清時。鄭
虎文。李應熙。朱履端。吳鵬南。閻循琦。王康佐。
李金臺。陳桂洲。王太岳。劉炳。竇光鼎。莊有信。
德保。盛格。顧汝修。戈岱。周世紫。覺羅奉寬。田

沅。蔣辰祥。周孔從。王世仕。何紹東。黃遇隆。劉
錫齡。俱著改為庶吉士。金廉。陳作梅。王成。陳
大復。元保。良卿。袁德達。著分部學習。以部屬
用。邵必昌。楊廷榕。繆臻。孟思誼。汪昌國。王道
暉。陳鵠。葉標。元。上官德興。徐士楹。黃岡竹。魯
鼎梅。崔鑰。呂東表。熊煌。馮爵尹。倪周於智。陳
新慈。俱著以知縣即用。馬綬。張彬。張述孔。發
與直隸總督高斌。張開士。芮永祺。劉瓚。鄭學
政。發與兩江總督德沛。王廷樞。萬世仁。王延

發。與閩浙總督那蘇圖。葛曙。汪鼎金。萬光謙。
發與兩廣總督慶復。李堂。侯於薊。馬元烈。發
與雲南署總督張允隨。俱以知縣即用。林孔
煥。高宏均。胡天培。段勵翼。以教職即用。向廷
柱。梅子援。劉其旋。鄧作弼。劉思忠。范承宣。張
基。對李棟。盧愷。以教職用。餘歸原班銓選。○
免江南沛縣昭陽湖。乾隆六年水沉田畝額
徵銀三千二百六十八兩有奇。米一千二百
一十八石有奇。麥三百三十六石有奇。○癸

酉定。

雩祭典禮大學士等會同禮部議覆御史徐以升奏稱本朝禮制具備惟雩祭尚未設有壇壝請於京城內擇地建立雩壇做古龍見而雩之禮每歲屆期致祭一次偶遇亢旱即於此望告嶽瀆山川諸神以祈求雨澤其有久雨求霽之處請照祭法雩宗祭水旱之例亦於雩壇致禱若僧道諷經致諸往制似可停止至直省府州縣亦應並設雩壇等語查唐時雩祀於南郊後行雩禮於園丘其制斟酌盡善請倣唐制嗣後孟夏龍見擇日行常雩禮祀昊天上帝於園丘以列祖配享四從壇從祀於下前期禮部奏請皇上親詣行禮或遣親王行事孟夏後旱則祈天神

地祇。

太歲壇次祈於

社稷壇次祈於

太廟皆七日一祈不雨或小雨不足還從各壇祈禱如初旱甚乃大雩祀

昊天上帝於

園丘先經祈禱

太廟既已虔告

列祖此次不設

配位仍設

四從壇於下雨足則報祀或已齋未祈而雨及所曾經祈禱者皆報祀齋期祭品俱如常儀再查會典開載以嶽鎮海瀆山川之神為地祇等語是地祇壇內已有四海不必同日另行望祭又考古大雩用舞童二佾衣元衣各執羽翳歌雲漢之詩今讀

皇上做雲漢詩體製雩祭樂章

聖念懇誠

宸章剴切。亘古未有。應請宣付史館。應用舞童十六人。衣元衣。為八列。各報羽翳。終獻樂止。贊者贊。舞童歌詩。舞童八列。按舞而歌。歌畢。乃望燎。舞童令掌儀司選聲音清亮者演習。應用羽翳。照周禮皇舞之式製辦。其舞衣舞羽。俱交內務府成造。餘儀與孟夏常雩同。再除上帝。

社稷。

宗廟。

太歲壇俱舊有樂章外。惟神祇壇向無樂章。應交律呂正義館撰擬。至久雨祈晴。前代皆無崇祭雩壇之禮。請倣春秋左傳伐鼓用牲於社。及文獻通考崇祭國門之禮。但伐鼓用少牢。崇祭於京師國門。仍雨不止。則伐鼓用牲祭於社。無庸於各壇祈禱。其僧道建壇誦經。實非古制。應如所奏。停

止設壇。仍令僧錄司僧官道錄司道官。遇齋戒致祭之日。分派僧道。於

顯佑宮等五廟。誦經祈禱。禮部分派司官查看。至各省州縣置耕耤田。其中皆設有壇。亦令孟夏擇日行常雩禮。或旱。每七日致祭。但不得用大雩禮。亦不必另設雩壇。若京師雨暘偶愆。

皇上於大內祈禱。其專承祈禱之官。

天神

地祇

社稷

太歲等壇。各遣王大臣一人。

太廟

上帝。遣親王一人。在京陪祀各官。一體齋戒行禮。

皇上如親詣

園丘。王以下皆陪祀得旨。是依議。

御製雩祭樂章。曰。瞻彼朱鳥。爰居實沈。協紀辨

律。羽蟲徵音。萬物芸生。有壬有林。有事南郊。
陟降維欽。瞻仰昊天。生物為心。章一維國有本。
匪民伊何。維民有天。匪食則那。螻蟴鳴矣。平
秩南訛。我祀敢後。我樂維和。鼉鼓淵淵。童舞
娑娑。章二自古在昔。春郊夏雩。曰惟龍見。田燭
朝趨。盛禮既陳。神留以愉。雷師闐闐。飛廉衙
衙。曰時雨暘。利我新畬。章三於穆穹宇。在郊之
南。對越嚴恭。上帝是臨。爾粟量幣。用將悃忱。
惴惴我躬。肅肅我心。六事自責。仰彼桑林。章四
權輿粒食。實維后稷。百王承之。永奠邦極。惟
予小子。臨民無德。敢懈祈年。潔衷翼翼。命彼
秩宗。古禮是式。章五古禮是式。值茲吉辰。玉磬
金鐘。大羹維醇。元衣八列。舞羽繽紛。既侑上
帝。亦右從神。尚鑒我衷。錫我康年。章六惟天可
感。曰惟誠恪。惟農可稔。曰維力作。恃天慢人。
弗刈弗穫。尚勤農哉。服田孔樂。咨爾保介。序
乃錢鏹。章七我禮既畢。我誠已將。風馬電車。旋
駕九閭。山川出雲。為霖澤滂。雨公及私。興鋤

利毗。億萬斯年。農夫之慶。章八○大學士等議
覆。川陝總督尹繼善奏稱。金沙江通川河道。
界接番夷。江流至險。非可冒昧倖成。不宜開
鑿等語。查慶復張允隨先後奏報。自湯丹小
江口至金沙廠。六百七十三里。為上游。自重
沙廠至新開灘。六百四十六里。為下游。下游
係運米舊路。畧加疏鑿。已可無阻。是辦理已
有頭緒。而尹繼善所見。又復互異。應令該署
督張允隨再行悉心籌畫。其上下游之蜈蚣
嶺。凹崖等處。如果石巨灘險。人力難施。應即
奏請停工。亦不得固執前議。至所稱滇省招
撫之木欺古夷人。議歸滇省管轄。其原隸四
川土司祿氏所屬之阿布魯。即阿布落並滇
省續往招撫之呢革波孤。摸苴羅孤等寨。均
應歸川管束。其滇省已經招撫之二十一寨。
應照川滇分界管理。應如所請。與雲南督撫
商議。轉飭地方官妥協辦理。得旨。此事著尹
繼善張允隨前往開工之處。和衷面商。毋得

各執已見。仍差新柱前往。一同相度機宜。妥酌具奏。該部知道。尋據尹繼善覆奏。金江河道。自滇入川。綿亘千餘里。今當夏秋水漲之際。江流浩濤。無從測探。某處可以開鑿。某處不能施工。須俟十月以後。水落江平。前往查勘。始得確實。得旨。此奏已悉。但新柱早已起程矣。卿即俟此旨到時。再起身前往。想亦必於八九月間。方得到工所。則亦過盛漲時矣。卿酌量為之。至如何查辦之處。汝三人面酌。

平定縣志卷之六

三

自當和衷公議。朕不能有所指示也。○又議覆川陝總督尹繼善奏。稱寧夏應修城工。統計二十四處。除寧夏滿漢兩城。靈州屬之靈沙堡。中衛縣屬之廣武營。寧朔縣屬之北鎮堡。俱經完竣。並將次告竣之中衛縣城所屬之棗園。石空鎮。羅三堡。寧朔縣之平羌堡。靈州屬之橫城。紅山。二堡。并平羅縣衙署角樓等未完工程無幾。又靈州州城及所屬之清水營。花馬池。興武營。平羅縣屬之洪廣營。均

邊塞重地。自應及時修理。惟寧朔縣屬之王泉營。靈州屬之毛卜喇。平羅屬之鎮朔。威鎮二堡。尚有城身屹立。足資捍禦。應停緩。其中衛縣屬之寧安堡。并無弁兵駐防。居民情愿自行粘補。又靈州屬之韋州堡。并無民人居住。已屬廢城。均可無庸修建。應如所奏辦理。從之。○吏部議覆。山西巡撫喀爾吉善疏。稱晉省添改復設之歸綏巡道。并理事同知。協理通判。及朔平。寧武。蒲州。澤州等府知府。同知。通判。經歷。並左雲。右玉。平魯。寧武。偏關。神池。五寨。陽高。天鎮。永濟。鳳臺等縣知縣。佐雜典史。倉庫大使。巡檢教職。平定。代州。解州。絳州。四州判。大同縣縣丞等缺。並無冗曠。應照舊設立。惟祁縣之盤陀驛。驛丞。管馬二十匹。驛務甚簡。應就近歸縣兼管。又高平縣之長平。喬村二驛丞。各管馬二十五匹。地非衝要。亦應歸縣兼管。又大同縣之聚樂城驛丞。經管馬匹。因驛困難支。仍歸大同縣經理。該驛

丞並不應付差使。及崞縣之原平驛驛丞。現亦不管馬匹。均屬冗員。至代州鴈門關外之廣武城。地居要隘。距州稍遠。印官兼顧甚難。應將向駐鴈門。專司解犯之巡檢。移駐稽查。遇有人犯。即令就近接遞。又五臺縣之臺懷鎮。離縣窵遠。僧民雜居。不可無專員稽察。應將該縣舊設之高洪口巡檢移駐。所有盤陀長平喬村聚樂原平各驛丞。高洪口巡檢等缺。一併議裁。均應如所請。從之。○刑部議覆

實錄卷一百六十六

三十五

江蘇巡撫陳大受覆奏。江省題咨案件。未經審解者。應以該督撫奉到恩旨之日為限。於結案時分別減免。再先經直督奏准。戶婚田土細事。告官應杖者。從寬免杖。於該處甘霖大沛之日為止。惟江省地方遼濶。祈晴祈雨之處不同。應以無庸祈禱之日為止。再查熱審之例。在京問刑衙門。與直隸總督衙門事同一體。未便一則減等發落。一則全行寬免。今應將直督所奏。行令在京問刑衙門犯杖

罪以下者。畫一辦理。俟甘霖大沛後。仍照熱審本例施行。從之。

實錄卷一百六十六

三十六

大清高宗法天隆運至誠先覺體元立極敦文奮武孝慈神聖純皇帝實錄卷之一百六十六

大清高宗法天隆運至誠先覺體元立極敷文奮武孝慈神聖純皇帝實錄卷之一百六十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書兼盛京滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆七年壬戌五月甲戌諭軍機大臣等前

因運河水淺糧艘較往年濡滯不能如期抵通特降旨詢問白鍾山等今據白鍾山奏稱時已五月南漕船隻未入山東境者尚多如及今銜尾而來閘河尚有湖水高於河水三四五尺不等足資灌輸可以催趲北上即衛河一帶臨清板閘逐日啟板放船亦可以船帶水以汶濟衛倘仍前間隔脫幫則臨清板閘不能逐日啟板汶水無由下注上源又不發水恐後來江廣重船不能遄行等語南

漕船隻何以阻滯若此可即速寄信與完顏

偉顧琮令其上緊料理據實回奏尋江南河

道總督完顏偉奏江南運道黃河以北邳宿

一帶恐運河來源不接雖有微山駱馬湖之

水所蓄無多通流不暢現於上游梁家山地

方開浚支河二道並將桃宿境內砂礮易淺

處所檣築束水草壩以利運行報聞漕運總

督顧琮奏今歲漕船先因首幫過淮逾限嗣

以山東運河水小首幫抵通稍遲其在後各

幫又因渡淮阻風并南河阻淺是以稽遲得

旨這回奏情節該部嚴察議奏○總理律呂

正義館莊親王允祿等奏查會典開載

天神從祀於

園丘

地祇從祀於

方澤今既各建一壇則

天神應仍從

園丘以黃鍾為宮

地祇應仍從

方澤以林鍾為宮得旨是。又諭神祇壇樂章著交三泰即速令太常寺演習。倘過夏至不雨便須應用。○吏部議覆甘肅巡撫黃廷桂疏稱甘省添設之安西兵備道分管嘉峪關以西屯糧諸務並駐劄九家窰之肅州州判駐劄毛目城之高臺縣縣丞駐劄柳林湖之涼州府通判經理各處屯田均關緊要應照舊設立惟莊浪同知所屬之寬溝驛係河西寧夏一帶大路但該驛隸皋蘭縣屬同縣原設有皋蘭縣縣丞一員分防寬溝應即令兼管驛務將驛丞議裁又鎮原縣屬駐劄平涼縣地方之白水驛驛丞供支差使殊多掣肘應改歸平涼縣管轄又高臺縣屬之鹽池驛地當孔道每虞匪類潛蹤雖設有驛丞例難經管民事如改設巡檢一員兼理驛務驛丞亦可議裁應如所請從之○戶部議覆河東鹽政尚琳奏稱河東渠堰原以防衛鹽池必須

勘核工程平險分別興修緩急查輪修年分祇擇應修處所量加濬葺是在輪修時已修之處自當按例保固以重責成其未修之處遇有水漲淤坍若以未屆輪修不即整理勢必日漸坍塌深為池害應如所請嗣後遇有輪修未屆實不可緩各工隨時借項興築從之○兵部奏查雙單月選用營守備班內俱有功加一項久無在部投供應選之員請嗣後在部投供武進士除雙月原班仍照例選用外其雙單月輪用功加班無人即以武進士抵補再武進士惟候選守備外別無進身之路查臣部有效力差官一項請嗣後遇有缺出將揀選一二等之武進士內情願充補者准與武舉一例揀選按缺輪補期滿與武舉按照日期先後均歸入勞班選用如武進士武舉同日期滿掣籤選用如武進士內亦有同日期滿者仍照從前揀選年分名次選用從之○乙亥

上詣暢春園問

皇太后安○還宮○諭刑部論海保之案。理應從重治罪。但將伊治罪。朕心有所不忍。海保之罪。著寬免釋放。○是日起

上以夏至祭

地於

方澤齋戒三日○丙子。漕運總督顧琮奏。本年糧艘過淮。因去冬回空。到次較遲。是以本年兌足開行。未能如限。又值黃河水淺。必須起

剥加緯。動輒需時。方能前進。聞濟寧以上俱有淺阻。現嚴督趲行。得旨顧琮歷任不肯實心任事。今為總漕。又不能速催南運。致有遲悞。且逾時始行奏聞。著該部察議具奏。○丁丑。準噶爾部人咱木巴喇克爾伯來降。命賞給安插如例。○戊寅。夏至祭

地於

方澤

上親詣行禮○詣暢春園問

皇太后安○辛圓明園○已卯。大學士等議覆

湖廣總督孫嘉淦奏。稱毛田。長安兩處親加相度。毛田四山陡立。無平疇。難以移駐大營。而長安土厚泉甘。實屬險要之區。駐兵最妥。惟聲援必須布置。運道亦須開通。查城綏兩縣止有九崗。應設遊擊一員守備二員。照例添設千把遊擊帶兵五百名。駐劄長安左營。守備帶兵二百名。駐城步之老寨。右營守備帶兵二百名。駐綏寧之鎮彝哨。俱離長安不遠。使三營互為犄角。統歸靖州協管轄等語。查與前貴州總督張廣泗原議。在長安五寨移駐城綏一協之處相符。其應於長安設兵已無疑義。再現今楚省尚有貼防兵二千一百餘名。應減去一千一百餘名。留一千名。分駐長安等處。俟新兵抽竣。漸次減撤。并設理。徭同知。亦駐劄長安。照例設把總一員。兵一百名。即召募本地民人。以資巡緝。再長安西北八十里。乃綏寧臨口。司地方。水路上通靖

州靖州之米船運直抵臨口。距長安陸路八十里。商賈通行。今長安既隸靖協管轄。即令靖州承辦兵糧。較城步運道實多省便。並令綏寧營守備移駐該口防護。再長安土性堅實。止須修築土堡。不必建磚城。工料尚屬易辦。如此則聲援既已不孤。糧運又復近便。自應悉如所議。妥協辦理。其抽撥兵丁減徹堡卒等事宜。應令該督籌辦題請從之。○又議覆湖廣總督孫嘉淦奏。苗徭秉性頑蠢。反覆不常。全在約束得宜。方可以潛消其釁。今苗疆文員怯懦。不敢深入。畝寨一切爭訟。刦殺等事。多屬武弁管理。因而汎兵營目。借端需索。以致激成事端。嗣後應請諭令該省督撫嚴飭苗地有司。凡刑名刦奪等案。務須親身經理。如屬怯懦無能。不得濫膺其任。武弁止許協力緝查。亦不得竟行刦斷。再苗人散居無統。各有頭人。為衆苗所服。今應於各寨中用其頭人為寨長。一畝中取頭人所信服者。

立為畝長。使約束寨長。而統於縣令。如有過犯。縣令易置之。每畝長一名。照鎮單土百戶之例減半。每年給工食銀十二兩。統計城步五畝。設正副長十名。綏寧四畝。設正副長八名。又於扶一扶二六甲六馬等處。添設五名。所需無多。應即於現清出各畝叛產租穀內給發。如此以苗治苗。兵端可息。均應如所奏酌量辦理。從之。○禮部等部會同內務府議覆禮部左侍郎張廷璐奏。稱京師舊設有會同館南北二處。為各國貢使居住之所。設如朝鮮琉球等國使臣。同時並集。臨期未免周章。若借住寺廟。兵丁看守。固屬不便。於規制亦覺非體。請令內務府將空閒官房。指定一二處。以備各國貢使屆期分住。應如所奏。從之。○庚辰。諭春夏以來。京師雨澤愆期。仰望殷切。十七日夜。荷蒙上天降賜甘霖。秋成可冀。朕心為萬姓稱慶。今年畿輔遠近地方。得雨多寡不等。有先後霑

足者。有未曾普徧者。是以二麥收成分數。豐歉不齊。日據高斌奏報。朕時刻留心體察。如磁州。永年。曲周。邯鄲。成安。肥鄉。廣平。雞澤等八州縣。麥收甚為歉薄。計此時去夏田收穫尚遠。貧乏之民。餬口維艱。恐致失所。應加恩於常格之外。著於六月內。將窮民給賑一個月。以資接濟。并令各該州縣。動銀購買高粱。穀豆。苽麥等項籽種。因地隨時。借給補種。以待有秋。再將現存倉穀。減價平糶。倘有不敷。即於隣近倉貯盈餘州縣。撥運濟用。仍俟赴豫採買麥糧到日。多撥平糶。著該部即速行文。該督高斌。轉飭有司實力奉行。○諭軍機大臣等。周學健條奏江南水利一案。經大學士九卿等議。令交與江南總督。會同該督撫詳加確勘。相度機宜。妥議具題等語。朕已降旨依議。但朕思從前許容。任蘇州巡撫時。曾言每年若費銀二三百萬兩。自然水患可免。蓋許容聽信地方人之言。欲以取悅於衆。而

伊之屬員。又造言以興動之。思借工程。以為開銷錢糧計。故有此論耳。及汪隆等在彼辦理二三年。亦惟地方人之言是聽。究未竣局。朕曾詢問高斌。伊所奏亦同。此番周學健奉差江南。伊既有專心辦理賑濟之事。時日匆忙。其於水道情形。亦不過採訪於地方官民而已。廷議令交德沛等詳查再定。但德沛素有奸行其惠之習。或有誤聽人言之處。亦未可知。爾等可將從前情節。密寄信與德沛。令其確勘實在情形。據實具奏。若果於地方實有有益。即多費帑金。朕亦不惜。若稍有濫冒虛糜。則不可耳。○戶部議覆大學士等奏。稱據中允孫人龍奏。滇省營汛不敷兵米。例於三站以內撥運協濟。不給腳價。係內地州縣為然。今迤西新聞之維西。中甸。添兵駐劄。邊境苦寒。非內地可比。所有撥運鶴慶。麗江。劍川。三府州米糧。自應官為雇運。若又扣除三站腳價。未免苦累。應如大學士等議。准免扣

之處。行令督撫遵照辦理。從之。○又議准。湖南巡撫許容遵旨覆奏。畸零瘠薄地土。或迴在山坡。地勢稍平。無虞雨水。及溪澗之旁。高灘阪隰。不至常淹。有宜禾稻者。一畝以上。照水田則例。以六年限升科。有宜雜糧者。二畝以上。照旱田則例。以十年限升科。若地極零星。不及一二畝。獲利既微。應長免升科。其餘峰嶺湖澤之隙。不成坵段者。聽民栽樹種蔬。並免升科。從之。○又議准。貴州總督兼管巡撫張廣泗疏稱。銅廠之旺衰。視民力之多寡。現據銅川河銅礦各戶。因工本不敷。停爐甚衆。請暫照格得八地二廠例。一九抽課。俟將來礦砂大旺。再照二八抽收。從之。○辛巳。

孝恭仁皇后忌辰。遣官祭。

景陵。○定加增甘省兵糧折色例。諭甘肅地方。遠在邊陲。土瘠兵貧。非內地可比。向來散給兵丁口糧。俱係四本八折。而倉貯不敷之處。又於四本之中。多給折色。是兵丁之得本色。

愈少矣。每當米價昂貴之時。所領折色。不敷糴米之用。度日未免艱難。朕心深為軫念。用加特恩。著將舊例每糧一石。折銀一兩者。增銀二錢。定為一兩二錢之數。料豆亦照此加增。從乾隆七年秋季為始。永著為例。俾邊遠寒苦兵丁。俯仰寬裕。他省亦不得援例以請。該部可即傳諭陝甘督撫知之。○大學士等會同工部議覆。欽差左都御史劉統勳調任閩浙總督宗室德沛。浙江巡撫常安奏稱。親勘仁寧一帶柴塘。自老鹽倉迤西。至觀音堂止。護沙灘盡無存。又自觀音堂迤西。漲沙僅存數丈。或數十丈。以至數百丈不等。較從前漲沙綿亘。塘隄平穩之時。已迥不相同。相機搶護。實為目前急務。又據杭州將軍傅森奏稱。觀音堂迤西等處。復經沙坍里許。水抵塘根各等語。應令該撫等。作速辦料搶修。至所稱改建石塘。乃係經久之圖。惟現在試樁艱澀。夫價必增。不免偷減。請豫備物料。俟水緩。

沙停。乘機興築。每年先以三百丈為率。查新任總督那蘇圖。將次到浙。再令確勘。如意見果同。即行改建。仍令該撫悉心籌畫。務期工歸實用。帑不虛糜。其開槽建石。即在柴塘後身。舊有柴工尚存。無須加築坦水。請添馬牙關石樁一道。以資鞏固。惟簽樁處所。較比魚鱗石塘原估之數。量為加增。亦應令該撫轉飭工員。據實估報。不得浮冒。再北岸之鹽。平仁。錢等縣及南岸之山。會蕭上等縣。江海塘工。既稱北坍南漲。形與昔殊。隨時補苴。足資捍禦。其有已估未修。及檄議未估之處。應令該撫詳慎分別辦理。至稱目今搶修。需柴正殷。請照時價。每百觔給銀九分。應如所奏。免致誤工。但不得著為成例。嗣後遇柴薪充裕之年。即嚴飭各員。減價購買。從之。○又議覆欽差侍郎周學健。調任兩江總督那蘇圖。安徽巡撫張楷奏稱。查洪澤一湖。居安。汴二河之下游。為淮水五湖之壑。藉以敵黃濟運。必

須中泓深廣。去路通暢。而後容洩得宜。不致泛溢。查湖之西北一帶。底漸淤高。且全湖之水。全藉清口上流張福裴家場三岔。三引河分洩。而河面只寬數丈。及一二十丈不等。是容洩之路皆隘也。倘遇夏秋。淮黃並漲。聚七十二山河之水。全勢奔注。萬一不能容納。下游一帶隄工。難保無衝漫之患。應行令江南總河會同該督撫。相度機宜。將上游之孟山。楊疇。土山。崔家陵子。五湖及安。汴二河淤墊處所。設法疏濬。使水分減。並將上流三引河。及湖內淺塞之處。及時開通寬廣。以資暢達。統令詳議題請辦理。再廬。鳳。潁等屬。應行挑濬河溝。前經總辦水利大臣汪漣等。勘定急工十二處。緩工六十二處內。已興修者。應令儘辦完竣。其尚未興修各工。仍令覆勘。倘有礙水道。修濬無益者。即行停止。如有關蓄洩。即及時興舉。並查明民修工程。實係連年被災地方。照興工代賑之例。酌量辦理。至宿州

靈璧二州縣。尚有未經勘議興修之處。亦應如所奏。行令飭屬查明。即行題請開濬。從之。
○戶部議准。署兩廣總督慶復等疏稱。粵西僻處邊徼。通省社穀無多。現有追貯應給墾戶工本銀一萬二千四百八十兩零。請於秋收後採買穀石。分貯各州縣社倉。以備民間貸借。從之。○旌表守正被戕之河南沈邱縣民武紹先女武氏。○壬午。
上御勤政殿聽政。○詣暢春園問

皇太后安。○以太僕寺卿熊暉吉為大理寺卿。
○以山東布政使黃叔琳為詹事府詹事兼翰林院侍讀學士。○添給陝西大荔縣羌北鎮新設縣丞蒲城縣永豐鎮新設巡檢二員俸工銀。從總督尹繼善請也。○癸未。諭粵西地處遙邊。漢土交錯。村寨最易藏奸。而文武官弁。稽察廢弛。相沿成習。以故逆首李梅自雍正八年。在廣東散劉事發。逃入粵西。十年有餘。復同李彩等往來北流播州容貴鬱博

等處。勾結匪徒。為地方之害。幸得發覺。次第就擒。然已蔓延多時。兵民勞頓。此皆平日各州縣文武。不能查察防範之所致也。似此怠忽養奸。不可無以示懲。著將李梅自某年月逃過粵西某年月住在何處。又某年月轉移何處。夥同李彩等往來各州縣。輾轉聯結起止日期。分別多寡。該督撫一一核明。分別題叅議處。以儆怠玩。至於李梅李彩兩案內文武官弁。出力獲賊。著有勞績者。亦著查明題請議敘。該部即遵諭行。○諭大學士等。陳宏謀保薦人員單內。有原任御史李元直。朕將李元直平日為人居官如何。詢問大學士等。令其各據所知回奏。乃大學士數人並未商議。僉稱李元直任巡察臺灣御史時。一路招搖浮躁生事。不可復用。彼此回奏之處。不約而同。似此躁妄之員。不知陳宏謀如何於廢員之中。力行保薦。且稱伊近年在家養親。讀書頗知變化氣質。陳宏謀與伊相隔路遠。何

以知其變化氣質。此等薦引。不能無私。可傳旨申飭之。○又諭大學士等。朕覽張楷所奏米糧價值清單。乃係本年二月分者。今已五月杪。始奏二月糧價。太覺遲緩。可傳旨訓飭之。○戶部議准。廣西巡撫楊錫紱疏報全州烏雅撲地畝。被水衝成沙石。墾不成田。請將額徵銀米。自乾隆七年為始。照數開除。從之。○工部議覆。署兩廣總督慶復疏。稱粵省貯備三年火藥。現據委員運回西硝。與陽山縣收買民硝。并新爐煎辦。業經足數。應將新爐停止。惟舊爐二十座。附近陳土。早經採盡。須赴鄰郡買運供煎。需費較繁。請每百觔增給價銀二錢。並陽山縣挑運硝泥脚價。亦一體加給。再增城縣舊爐。現亦採辦甚艱。應仍收買陽山縣民硝。以充營匠之用。均應如所請。從之。○甲申。盛京刑部侍郎兆惠奏。查科爾沁蒙古人等。前抵奉天。遇有命盜案件。向由將軍審明報部。經乾隆三年奉天將軍博第

奏准。移咨盛京刑部。即照蒙古條例定擬繕摺具奏。但臣部所有蒙古條例。皆係蒙古字樣。並未繕清。臣部雖有蒙古司員。不識蒙古文字。恐是非莫辨。關係匪輕。請令理藩院將蒙古條例繕清。以裨引用。得旨。如所請行。下部知之。○諭明史綱目。據該館奏稱。草本編纂將竣。著即陸續進呈。○乙酉。免甘肅各處屯民借欠銀糧。諭甘省涼州府屬之柳林湖。肅州所屬之三清灣。柔遠堡。毛目城。雙樹塹。九壩等處各屯民戶。舊借牛具口糧。共銀八萬一千八百七十餘兩。原請自乾隆二年起。分作五年帶徵。迄今年限已滿。除已完外。柳林湖未完銀二萬七千七百八十餘兩。三清灣柔遠堡未完銀八千六百一十餘兩。毛目城未完銀五千八百二十餘兩。雙樹塹九壩未完銀二百七十餘兩。粟米一十五石二斗零。白麩五千四百九十九觔。例應如數催徵完納者。又查口外之安西。柳溝。布隆吉。沙州

等處屯民。原借牛具口糧。共銀五萬七百八十餘兩。糧二萬一千四百四十餘石。除已完外。安西衛未完銀一千二百六十餘兩。柳溝布隆吉未完銀八十餘兩。糧二百七十餘石。沙州衛未完銀三萬五千五百四十餘兩。糧八千三百一十餘石。亦應如數催完者。朕思此等屯戶。原係招徠窮民。素無蓄積。自開墾以來。若遇年穀豐收。尚可完繳舊項。倘值收成歉薄。則力量維艱。應加體恤。況此借欠之項。乃屯民領借製備牛具口糧。以為公田之用。非小民自種地畝者可比。今歷年已久。帶徵為難。著加恩全行豁免。以息追呼之擾。該部即傳諭該督撫知之。○吏部議覆。通政使司奏稱。臣工章疏。上達闕廷。律以敬事之誠。自宜詳慎校對。乃各省本內字畫。錯訛不少。請嗣後各督撫提鎮將軍。都統副都統題奏本章內。如有奉旨飭行者。仍遵旨飭行。具奉特旨交部查議者。照在京各衙門錯誤本章

之例議處。從之。○兵部議奏。川陝總督尹繼善疏覆。四川提督鄭文煥奏。稱夔州一協。及所屬巫山。梁萬兩營。在重慶下游。毗連楚省。為巴渝鎖鑰。水陸要衝。向隸提督管轄。惟遠在川東。距提督駐劄地方。陸路一千八九百里。水路二千四五百里不等。中隔重慶一鎮。遇緊要機宜。文檄往返。動輒經旬。查重慶與夔州列戍相望。如將該一協二營。改歸重慶鎮統轄。設有緊要事件。令其就近請商。仍報提臣查核。應如所請。從之。○旌表守正捐軀之直隸平鄉縣民豆保住妻苗氏。○丙戌。諭大學士等高斌所奏。張家獨石二口外地方。定界一事。朕已批令軍機大臣等議奏。但高斌摺內。稱蒙古為夷人。甚為錯誤。向來稱準噶爾為夷人。至於內扎薩克。乃本朝之臣僕也。豈可以夷人稱之。從前孫嘉淦曾經錯誤。朕嚴加訓諭。今高斌此摺。雖據李質粹來文。然高斌具奏時。亦當改正。並告李質粹知之。

爾等可傳旨訓諭高斌。○又諭兩江總督德沛到寧。傳諭那蘇圖。此次辦理賑務。雖不甚妥協。但其心無他意。恐起百姓刁風之故。福建漳泉二府。向有刁民聚眾喧嘩之風。更非江南可比。令其留心斟酌。妥協辦理。浙江海塘。所關緊要。務須留心查辦。○丁亥。

上詣暢春園。問

皇太后安。○諭。據浙江提督裴弑奏稱。江南商民徐維華等五十三人。被風飄入琉球國葉壁山地方。彼處官員。撈救人貨。供給養贍。該國王遣都通事阮為標護送。福建交卸等語。中國商民。被風飄入外洋。該琉球國王加意照看。養贍資送。不令失所。甚屬可嘉。著該部行文傳旨嘉獎之。其遣來之都通事阮為標。著該督撫賞賚之。○戶部議覆漕運總督顧琮疏稱。漕船成造。各有定額。若額內減少。固慮裝運不敷。額外加增。徒致虛糜料價。查浙省之台前等三幫船隻。因減存年久。歷將應

兌漕糧。分灑通幫裝運。並無掛欠負重之虞。可議長減。又寧嚴衢三幫船隻。兌運額糧。原非負重。不應增船分運。至温州前幫增船四隻。杭州前衛後幫增船三隻。因各該幫每船裝米九百餘石。船身負重。現在均勻裝運。相安無異。且前項增減漕船。統計一千二百一十四隻。較之雍正四年原定額數。止少一隻。亦無多寡懸殊等語。應如所請。將台前等三幫減船八隻。並額外增設之寧波前幫九隻。嚴州所三隻。衢州所二隻。均令減歇。其溫杭二幫船七隻。原在通省定額內。即以現在應運漕白。共船一千二百一十四隻。作為定額。嗣後如有不肖官丁。任意增減。該督據實叅處治罪。從之。○又議准廣西巡撫楊錫紱疏。報懷集縣屬之荔枝山礦。礮殘沙竭。開採不效。請封閉。從之。○兵部議覆江蘇巡撫陳大受疏稱。撫標左右二營。僅馬步戰守兵五百四十五名。並無續添。蘇州營原額兵七百五

十四名。續於崑山、新陽二縣添設右營守備。又於閩、齊門外、虎邱山塘等處添設左營守備。並添撥弁兵一千二百十六名分駐防守。至馬步十不及二。更替差操。尚在不敷。查營制雖添兵伍。均係舊有抽撥。與額外新添者有間。應如所請。照舊存留。并無庸改馬為步。改步為守。從之。○是月。江蘇巡撫陳大受奏。莅任一載。節飭所屬文武員弁。上緊整理各事宜。得旨。不必欲速。不可偷安。因時制宜。實心行之。○又奏。各州縣收漕。現飭屬仍照乾隆五年以前小口斛式製造發用。報聞。○浙江巡撫常安奏。報徵收關稅盈溢銀兩。得旨。看汝頗有以錢糧為重之意。夫貪婪無恥者。固朕所不容。而為大臣者。亦不可僅僅以慎重錢糧為稱職也。若因朕此旨。而一切不問。即汝雖潔清。而或被屬員欺隱。亦不可耳。○湖廣總督孫嘉淦奏。近聞京城例禁鋪戶囤錢。恐終致價昂。公私均有未便。請弛禁以便

商民得旨。新定例亦不過救目前耳。非可久行也。所奏知道了。○湖南巡撫許容奏。五月初。江水漲發。常屬之武陵、龍陽、沅江三縣。隄垸間被漫決。現飭料理堵築。並分別借給籽種。惟各州縣平糶倉穀。已符額數。今令於常額外酌量增糶。以濟民食。得旨。所奏俱悉。至於平糶倉穀。已符額數之言。甚屬不經。是豈保赤之心哉。且國家設常平社倉。所為何事。汝為撫臣。尚不知此乎。○又奏。粵東告糶。請於附近粵省之永州、衡州、長沙等三府。及所屬長沙、善化、湘陰、湘潭、衡陽、衡山、零陵、祁陽等八縣。加貯穀內。酌撥八萬石。以供買運。如有不敷。再於稍遠之岳州、常德各倉。撥二萬石接濟。再湖南穀價。請酌定每石五錢。俟秋收買補還倉。通融辦理。得旨。所辦甚妥。○河南巡撫雅爾圖奏。豫省各府州分防兵丁。久未訓練。現於所屬每營挑選數名送省。親加考驗。留標學習。俟有造就。仍發回各營酌量

以千把外委拔補。即令教習兵丁。並動公項銀四千兩生息。分給各兵作衣裝之用。得旨。此不過一時權宜之計。則可。日久未必有益。三四年後。可不必矣。○川陝總督尹繼善奏。覆怡親王奏。據西寧辦事員外郎高亮所稱。西寧管轄多倫。鄂托克古察等族番。俱住木魯烏素地方。彼此互相欺壓。請派筆帖式前往管理等語。查彼處番民。界連青海。爭強欺壓。原所不免。但地方遼濶。並無城郭。如以筆帖式微員。令其駐防。既無威力。彈壓轉恐別生事端。惟各番地。先經奏定三年派章京守備各一員。前往會盟一次。甚有裨益。今應即令會盟官員。乘便稽查。如有前項情事。立行究治。其番民赴西寧貢交馬匹。及貿易生理。有冤抑者。許赴管理夷情衙門控訴。得旨。如所議行。○署廣東布政使託庸奏。司庫收支錢糧。出入公平。得旨。此等小節。任汝等為之。旬宣之責。不僅此也。若大處不是。則將來必

並小節亦問及矣。勉之慎之。○廣西巡撫楊錫紱奏。安南諒山一帶夷民。經韋逆之後。失業薦饑。竄入寧明。龍州。土江。土思等州內地乞食。現飭分別存卹。酌給口糧。遞送回籍。并移行諒山夷官。速行設法綏撫。得旨。辦理頗妥。知道了。○又奏。本年秋審案內。有斬犯饒鳴鎬。係奉旨著擬情實之犯。該犯身為知府。貪贓累累。固為法所難宥。但業於限內完贓。似與新定完贓查奏發往軍臺効力之例相合。奏明請旨。得旨。此奏甚屬不合。汝身為巡撫。試思此奏。為獎廉乎。為教貪乎。汝心不可問矣。朕將留心看汝矣。○署雲南總督張允隨奏報。金江上游。自小江口。幾龍灘。至金沙廠河口灘。計大小五十餘灘。內有最險次險小險各灘。現已開修工竣。今冬可運銅觔。其下游自利遠灘。至新開灘。一帶工程。六百四十六里。應開修者。共六十二灘。估需銀十餘萬兩。俟今冬水落興工。一律完整。得旨。已有

旨命汝等親往勘工。汝三人會面時。將此奏與尹繼善。新柱看。和衷再酌。奏聞可也。○又奏。普洱所屬猛遮界外之孟艮酋長召賀。罕橫行殘虐。經掌管地方之叭三猛等逐之。逃入緬境。現飭土千總防範各隘。得旨。惟在清理我疆。嚴謹關隘也。○署貴州按察使宋厚春。黎平府屬南江等十七寨。逆苗滋事。在已南地方。經鄉勇協同官兵截殺。斬獲多名。並有頓洞等數十寨。皆効命搜捕。已可無慮。蔓延。并就近於黎平。永從。二處。開倉賑濟各村堡難民。報聞。

實錄卷一百六十七

三十七

大清高宗法天隆運至誠先覺體元立極敷文奮武孝慈神聖純皇帝實錄卷之一百六十七

實錄卷一百六十七

三十八

大清高宗法天隆運至誠先覺體元立極敷文奮武孝慈神聖純皇帝實錄卷之一百六十八

監修總裁官經筵講官太子太傅大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆七年壬戌六月戊子朔大學士等議覆

實錄卷一百六十八

莊親王允祿等議奏樂部事宜各條。一和聲署衙門應歸內務府兼屬禮部管轄其總領大臣統候欽點至奉鑾等官另易嘉名於掌儀司人員內挑補仍請裁汰之官暫留一年俟新員熟習再令歸農。一和聲署樂工現不足額必出身清白通曉音律者充選今鑾儀衛既有鼓手頭目并借充之校尉六十餘名均係內務府人員自應移隸內務府挑選學習其鼓手樂工諸名色改正以歸雅馴。一和

聲署既以署名宜照大官署例裁去奉鑾等

官更名為滿漢署丞向有侍從等官仍照前

不定員額不拘滿漢其鼓手樂工以所司樂

器分別其名總名為署史凡供用官由此挑

補陞至丞正而以侍從待詔為加銜其內府

人員凡已挑選中式及署正等官陞員外者

俱准出缺另補漢員例應止於本署陞轉加

銜食俸不得陞出別衙門至所稱生員舉人

進士出身之外省漢員由通曉音律為本署

實錄卷一百六十八

官者陞至署正與光祿寺署正一體陞轉其

各員缺奏請補授及挑補註冊者皆如所議

行又稱漢署正署丞現有可用之人滿缺則

通曉音律者尚少應俟學習得人將額設再

行補實。一和聲署樂章沿襲明制仍用戲曲

殊屬非體應令該館撰擬凡大祀中祀各典

禮有導引之樂及春秋二季各小祀諸色筵

宴進吻祭門等項例應作樂者即令撰定樂

章惟城隍廟賢良祠等祀不便設懸登歌並

救護日月。祇伐鼓鳴金。不宜作樂。應如所奏。至鑾儀衛禮部堂官上任。封開印信。作樂之處。與各衙門既不畫一。應傳。春秋三九月。赴掌儀司演樂一次。著為例。其演樂時派出總領樂部大臣考驗。以上各款。統候交與該館次第辦理。從之。○兵部議覆。小東兗州鎮總兵段起賢疏稱。臨清所屬之禹城汛。在高唐迤東八十里外。該營副將都司稽查塘汛。必須跨越高唐。於營制未協。查高唐所轄恩縣汛。與臨清營相連。臨清所轄禹城汛。與高唐營相連。應將恩縣千總一員。調防禹城汛。歸高唐營管轄。禹城汛把總一員。調防恩縣汛。歸臨清營管轄。並將恩縣汛外委一員。調回。協防禹城恩縣兩汛。即著臨清營派撥外委一員。按季輪番協防。并抽撥恩縣汛守兵七名。交禹城汛防。禹城汛馬兵七名。交恩縣汛防。一轉移間。巡防稽察。呼應較靈。應如所請。從之。己丑。詔定舞譜。諭鄭世子樂書等

書。俱有舞譜。本朝舞制。並無紀載。應作何載。入書內之處。著傳諭莊親王。張照。知之。尋據莊親王等詳考各祭祀樂舞聲容儀節。纂成舞譜。奏准載於律呂正義後編。垂為定制。○諭軍機大臣等。據西寧總兵官許仕盛奏。稱查閱標協營路兵丁。雖無老弱。馬匹亦鮮疲瘦。惟騎步士卒。技藝類多生疎。弓力大半柔軟。開拉撒放。俱未合式。騎射則人馬未嫻。準頭則十無一中。臣現在次第整飭等語。許仕盛所奏。西寧兵丁技藝生疎之處。爾等可寄信與總督尹繼善。令其留心查察。其從前之將弁等。如何管理。若果似此廢弛。雖已經離任者。難以深問。其現在職任者。可嚴行申飭。務令速行悔改。倘仍復怠玩。即當題參。戶部議准。江蘇巡撫陳大受疏報。吳江震澤二縣。濱湖坍沒田蕩八十五頃六十四畝三分零。請豁除額徵錢糧。從之。○刑部等部議覆。江蘇巡撫陳大受奏。稱場大使一官。職守介

正佐之間。經管涉兩可之事。躁妄者思干預。疲軟者多推諉。嗣後凡催徵折價稽察火伏。埤場草蕩緝私等項。許就近准理完結。仍報明該上司查核。事稍重大。仍詳批結。如商竈赴運司分司各衙門。控鬪毆。打降私宰。私鑄及海洋商漁透漏米鹽。民竈互控之件。均聽地方官查辦。不得干預。如該上司將不應批發事件。徇情批發。以及場員擅理不應管之事。并該上司不行揭報者。將徇情批發之上司。照徇庇例。降三級調用。擅自准理之場員。照擅准詞狀例。降一級調用。不揭報之上司。照正印官不行查報例。罰俸一年。再場員應管事件。仍聽地方官稽察。倘有營私擾累情弊。立即揭叅治罪。倘地方官失於覺察。徇情不報者。照不揭報劣員例。分別議處。應如所請。從之。○旌表守正捐軀之直隸交河縣民傅文學妻高氏。○庚寅諭曰。叅將新德。係貝勒海善屬下之人。遵旨呈請將伊子查保。攜

往任所。經該旗代為具奏。查保既係養育兵著照所奏。准其帶往任所。夫補授外員。欲將子弟攜往。朕令該旗具奏。准其攜往。原係施恩之意。但王公等屬下之人。有在該門上當差者。若不詢問該王等。皆含糊具奏。准其攜往。則王等所用之人。漸至缺少。嗣後下五旗王公屬下之人。陞授外任。欲將子弟攜往任所者。如現在該王公門上當差。著該旗詢問王公。如無用處。照依所請。令其奏明緣由。准其攜往。如有用處。停其攜往。將此通諭下五旗遵照辦理。○吏部議覆直隸總督高斌疏。稱天津清河二道。雖兼河務。但天津道止管南運及子牙淀河等處。清河道止管淀河工程。修防尚易。與永定河工不同。而分巡事宜。又皆三項相兼。亦較通水道有間。應如所請。照霸昌大名二道之例。臣部照例註冊。嗣後缺出。由部請旨簡用。至滄州分司運判一缺。應照原奉諭旨。令該督會同鹽政。在外揀

選題補從之。○工部左侍郎張廷瑒奏在詹事府任內保舉宣化知府呂守曾堪勝道員。乃呂守曾於任杭嘉湖道時婪賄敗露。部議未及保舉之員。臣實不敢隱匿。請交部嚴議得旨。張廷瑒既自行檢舉。著免其交議。該部知道。○準噶爾部人阿爾咱來降。命賞給安插如例。○辛卯。

上詣暢春園。問

皇太后安。

上還宮。○諭。明日清晨無雨。照常御殿。如或遇雨。臣工難於行禮。即行停止。陞殿日期。鴻臚寺另行請旨。○兵部等衙門議准直隸提督塞楞額奏稱古北口外漢站。每站原設把總二員。馬七十匹。壯丁五十名。續經裁減調撥。酌留鞍匠屯站。馬四十五匹。紅旗營十八里台。坡賴村三站。馬各三十匹。王家營站。馬二十五匹。而把總壯丁。並無裁減。今王家營既裁把總一員。而鞍匠屯等四站。馬匹亦屬無

多。應照例各裁把總一員。並令該提督於應裁之把總。擇熟練驛務者。留為驛站把總。年老者勒令休致。嫻習弓馬者。以營把總補用。再鞍匠屯站。驛馬較多。應留壯丁三十名。王家營等站。應留二十名。其餘一百四十名。槩行裁汰。再蒙古七站。上下相去窩遠。應於適中之地。安設五處腰站。以均勞逸等語。應令該提督。即交管站員外郎。帶領臺站蒙古。親往驗取兩站之間。水草豐厚處所。咨報提督。

每站各撥人馬前往駐劄。從之。○壬辰。

上御太和殿視朝。文武陞轉各官謝恩。○辛圓。明園。○諭。莊親王允祿總理樂部事務大臣。內務府一缺。即派王管理。禮部一缺。著派署大學士尚書三泰。嗣後缺出。應補之時。該處即將應行開列之大臣具奏。不必由吏部請旨。尚書張照亦著一同管理。其和聲署滿署正。滿署丞。員缺。照所請以郎中阿克棟阿兼管署正。員外郎二達塞兼管署丞。其滿供用

官。於禮部掌儀司主事等員內。亦酌量派兼行走。○癸巳。諭昨日陞殿遇雨。謝恩大臣官員及御前侍衛。乾清門侍衛。大門侍衛。內務府官員等。冠服未免露溼。比命尚書來保等查奏。今據查得。行禮隨從大小臣工內。被雨露溼者。共三百三十五員。著即交該部各賞給正俸之半。○甲午。諭朕聞今年交倉漕糧。江南泗州。滁州。二處。米色不好。隨令查看。據內務府豐益倉所呈。泗州糧米。不但色已改變。兼多攪和沙土。即云該地方收成歉薄。米色不佳。亦不應壞爛至此。一倉如是。他倉亦未可定。著交戶部。派堂官一員。前往各倉查驗。將米色高下。并應如何分別辦理之處。該堂官詳議具奏。○大學士等議覆。直隸總督高斌奏稱。據宣化鎮總兵李質粹字開張家獨石。二口地方。商民時被蒙古搶奪。總緣地界分歧。責任不專。以致盜賊肆行。多有漢人勾通蒙古。交襍為害。應否俯如所請。命大臣

前往該口。會同各牧廠總管。及察哈爾五旗總管。并令張家獨石多倫諾爾。三同知。隨同勘明。分清疆址。酌定如何管轄緝拏。以免推諉。又據總兵李質粹奏稱。口外盜風愈熾。若候奏定章程。遷延時日。更不免滋累商民。現先至張家口地方。協同總管覺和托等。差緝各等語。所辦甚屬妥協。應行令該督速遵員弁。前往協拏。並知照察哈爾總管等。嚴行督緝。俟拏獲賊匪。再行請派大臣查勘界址。次第辦理。得旨。依議。此事著汪扎爾前往。如賊匪已獲。則已。如尚未獲。即著汪扎爾督催緝拏。其分查界址。酌立章程等事。亦著汪扎爾會同辦理。○吏部議覆。原任山東巡撫朱定元疏稱。東省之兗沂曹道。糧道庫大使。膠萊運判。官臺場大使。並泰安駐劄樓德莊之通判。武定駐劄牡礪嘴之同知。曹州駐劄劉桃源集之同知。及通判。沂州移駐向城之通判。向城移駐青駝寺之巡檢。兗州移駐滕縣臨城

驛之同知。又莒州石埠集巡檢。青州府同知。博山縣知縣。典史。訓導。鰲山。靈山。雄崖。浮山。各巡檢。海陽。榮城。二縣知縣。威海。靖海。各巡檢。福山縣教諭。魚臺縣訓導。又濟寧衛前左幫。臨清衛後幫之千總六員。隨幫三員。并歲運。薊糧千總二員等缺。或係復設。或係改設。添設。均關緊要。未便議裁。惟舊設之登州府鹽捕通判。並不管糧。且青菜二府。均未設有通判。應將捕務併該府同知兼管。又鉅野縣管糧縣丞。與知縣典史同城。別無專司事件。該縣漕糧。僅一千三百餘石。徵收兌運。無藉助理。又諸城縣原設南籠灣。信陽鎮。二巡檢。兩員衙署。相距止三十里。管理海口。亦止三十餘里。如將巡緝事務。專歸信陽鎮巡檢。堪資兼顧。又掖縣之海倉巡檢。所管民人稀少。且附近郡城。查察尚易。應歸縣兼管。又德州之安德。梁家莊。良店。武城縣之甲馬營。臨清州之清源兼渡口。清平縣之清陽。東昌府之

崇武。陽穀縣之荆門。汶上縣之開河。濟寧州之南城。魚臺縣之河橋。嶧縣之萬家。東平州之安山。等十四水驛。或與該州縣同城。或距城十數里。及數十里不等。均在該州縣境內。可以就近管理。該驛丞等止於河干往來迎送。並無地方之責。即屬冗設。又青州府之安東衛守備。專管理事徵糧。名為武弁。實同文職。究所徵錢糧。不過一千餘兩。管轄屯軍。錯處日照諸城。二縣境內。離衛寫遠。軍民完糧聽訟。均苦不便。且該衛並不僉丁運漕。應將該衛地畝庄屯。分歸諸城。日照。二縣經管。文武生員。亦分隸二縣。歲科兩試。編號取進。各半入學。文廟封扁。春秋丁祭。統歸日照縣儒學。耜田改作學田。並將城池交給安東營經管。倉糧歸日照縣經管。出納社倉積穀。各按屯庄。分屬二縣。責成倉正副照舊辦理。又德州衛四所管屯千總四員。與衛備駐劄同城。每所徵銀僅二三千兩。悉在德州衛境內。屯

民俱赴州城交納。應將錢糧等項裁歸收併左右二所。各按地方就近管理。所有登州府鹽捕通判鉅野縣縣丞南龍灣海倉巡檢二員驛丞十三員安東衛守備教授二員德州衛中右所千總二員悉行裁汰。應如所請。從之。○乙未。

上奉

皇太后御長春仙館。至丁酉皆如之。

上御勤政殿聽政。○兵部議准直隸總督高斌

疏稱宣化府屬之榆林土木雞鳴宣化萬全懷安雲州赤城長安鵬鶚等十驛地臨邊隘與內地不同。查各驛共馬七百四十五匹夫七百四十七名。以兩馬一夫計算。除額設獸醫鑄草等夫八十名。應照議准順永二府屬衝驛之例。仍留站供差。其餘浮多夫二百九十四名半概行裁撤。以節經費。從之。○工部等部議准甘肅巡撫黃廷桂疏報寧夏大清唐漢三渠及各大小支渠前因該處地震搖塌。各渠所有裂縫處甚

多。急需修築。埤岸橋閘。並老埂長堤各工。請動項興修。從之。○署兩廣總督慶復奏。右江鎮總兵張朝宣病故。請簡人地相宜之員補授。得旨。張朝宣患病溘逝。應得卹典。著察例具奏。已有旨了。餘著議奏。該部知道。○以內閣學士錢陳羣為刑部右侍郎。○予故刑部尚書劉吳龍祭葬如例。謚清愍。○丙申。諭軍機大臣等。直隸兇犯戮屍二案。乃倫常未有之異變。民間有此事。實吾君相平日教化不行。深當自愧。封疆大吏亦當引為己咎。查向來偶遇此等。皆從外結。該督撫具摺奏聞。不入題本之內。今此二案。爾等酌量辦理。可寄信與高斌知之。○又諭軍機大臣等。前據魏定國奏報。山東各府於五月初三。至二十一等日。得雨一二寸至四五寸不等。其被旱之歷城等十九州縣。現在借給籽種口糧。以資耕種等語。此半月以前。山東雨水之情形也。近今半月以來。乃農田緊要之時。雨澤果否

透足。魏定國未曾續奏。朕心深為廕念。可傳旨詢問之。若包括到任。魏定國卸事。即令傳諭包括。令其據實具奏。毋得疎忽。尋奏。自五月二十一二等日。至六月初四及初十等日。所在續得透雨。秋糧長發。其歷城等十九州縣被災貧民。現飭屬實心查辦。酌量借給。得旨。所奏俱悉。○吏部奏。行取知縣題陞同知。除應行題補之缺。原係陞調兼行。准將行取人員題陞外。其應行調補之缺。於對品人員內揀選調補。如實無可調補。將緣由聲明。再行取人員題陞。至有以應歸部選各缺。將行取知縣濫請陞補。臣部概駁不准。惟安徽陝西山西河南等省。通省同知。並無外題之缺。若概不准。以部選之缺題陞。是該省行取人員。獨受偏枯。應請此數省遇有部選缺出。亦准該督撫酌量題陞。至他省原有應題應調各缺。不得援以為例從之。○兵部等部議覆甘肅巡撫黃廷桂疏稱。陝省至蘭南路之

摩雲沙泥柳林窑店石井五所。各額設牛十五隻。夫十五名。北關甸子寧遠伏羌秦州清水六所。各設募夫三十名。鳳林定羌各設牛五隻。夫五名。和政所設牛四隻。夫四名。查所牛所夫。向因供支餉鞘而設。近來餉鞘並不經由南路。別項差使亦少。未便虛設耗帑。請將摩雲等五所牛隻並鳳林定羌和政三所牛夫均行裁汰。北關等六所應各裁募夫十名。并摩雲等五所所夫改為募夫留站供差。倘裁減之後。差務必須遞運者。應照各站雇車例。動項雇募應差。又涼州府屬之黑松沙井等十驛。同處河西地衝差繁。不減於各驛草豆騰踴。亦等於他站。現在乾銀不敷。請將河西各站日支銀八分五釐之馬一千六百一十三匹。每馬日減銀五釐。歲共減銀二千九百三兩四錢。沙井等十驛馬三百七十二匹。每馬日增銀三分。連額共支八分。歲共增銀四千十七兩六錢。即以所減河西乾銀并

裁減夫牛銀共五千三百四兩六錢。增給。仍餘銀一千二百八十七兩。解司充餉。又直隸階州成縣所屬之小川驛。額馬止十一匹。毋庸專員。應將夫馬歸併成縣管理。狄道州轄之沙泥驛。額馬二十匹。馬少差簡。應歸併該州管理。寧夏府屬之同心沙泉二驛。額設驛丞一員。分隸廳州。多有未便。且地僻馬少。應將同心驛夫馬歸併靈州。沙泉驛夫馬歸併西路廳分管。所有小川沙泥同心沙泉四驛

驛丞三缺。悉行裁汰。均應如所請。從之。○又奏請簡放廣西右江鎮總兵員缺。得旨。朕從前因右江總兵官員缺。地處邊瘴。風土惡劣。是以降旨令三年調換。今二年之內。連故二鎮。朕心深為軫惻。覽本內開列之員。恐亦未必熟習右江風土。或於附近總兵。副將內。將熟習風土者。揀選陞調一員。或將右江總兵改為副將。并酌量移駐。與現在駐劄地方。相離稍遠。以免瘴癘之處。該部詳議具奏。○御

史鄒一桂奏閱視刑部。南所中多已結之囚。北監內有未結之犯。詢之司獄等官。僉云現審案內人犯衆多。恐有串通。是以分寄北監。查南所中自有四所。又有板房灰棚。皆可分禁。何必寄放。至於已結之囚。又何以仍留南所。又云南北分禁旗民。而南所實多民犯。北監又不少旗人。似此混雜互收。不無滋弊。請勅刑部堂官。通飭各司。嗣後罪犯收禁之時。逐一畫歸南北。并於送都察院報單內。開明

已結未結字樣。以免混監之弊。得旨。如所請行。下部院知之。○丁酉。諭大學士等。兩廣總督移咨江浙緝拏逆犯李捷三等一案。此等事件。該省大員。於接到咨文之日。自應密行知會各該地方。設法捕緝。俾不致駭人觀聽。且不使逆犯聞風遠颺。乃聞浙江按察使徐琳。遍張告示。曉諭民人。以致愚民目為新聞。遠近傳說。江南狼山總兵陳倫炯亦曾出示諭衆。此等辦理。不但起人訛言。且令兇犯鬼

脫甚屬錯繆。可即傳諭江浙兩省督撫知之。
○大學士等議奏旗民不准交產。定例禁止。
遵行日久。查禁漸疎。請嗣後旗人認買官地。
該佐領於年終查明。有無私行典賣之處。呈
報都統察核。並令該保正甲長。查明民人有
無典賣旗地。由該州縣詳報直隸總督稽查。
倘私行典賣。將旗民分別按例治罪外。地畝
地價。均照例入官。該佐領州縣官。失於覺察。
一併交部議處。從之。○吏部議准署兩廣總
督慶復疏報。土田州知州岑應祺之弟岑應
偉故。請以其子岑潔。分管陽萬等一百九十
八村。給與州判職銜。從之。○戊戌。

上詣長春仙館。問

皇太后安。奉

皇太后還暢春園。○己亥。

上詣暢春園。問

皇太后安。○諭軍機大臣等。前據廣西提督譚
行義奏。稱交夷韋福瑄滋擾諒山一事。有廣

西崇善縣草生葉蓂。廣東人周老六。私出外
夷。誘教福瑄。幫助為逆。事敗潛逃。入境被獲。
朕已降旨。令該督撫酌量辦理。今又據巡撫
楊錫紱奏。稱安南飢民。流入寧明等州。每處
三四十人。除老弱病餓者。暫給口糧存卹。俟
其病愈。再行押送出關外。其尚能行走者。酌
給口糧路費。遞送回籍。并嚴禁內地民人。販
賣夷人子女。希圖獲利等語。楊錫紱辦理之
處。頗屬妥協。但滇粵界接安南。全在各處關
隘。嚴行盤詰。始不致彼此私行出入。以致滋
擾。并或釀成事端。今葉蓂等。私出作奸。而飢
夷復偷入內地。則是各處要隘。難免潛出竄
入之弊。殊非防範邊境之道。爾等可寄信該
督撫。令其悉心籌畫。嗣後應如何立法整飭
之處。會同詳酌妥辦。具摺奏聞。務使各關隘
盤查禁止。實在嚴密。以靖邊疆。○兵部議覆
署兩廣總督慶復疏。稱粵東各標鎮協營。原
額兵七萬七百六十名。嗣於左翼等各鎮協

標營添兵一千八百四十五名。原係通省額兵內。將馬改步。將步改守。與額外另募者不同。應如所請。照舊存留。至惠州協添兵一百四十一名。連陽營添兵一百名。均屬額外另募。自應裁汰。如惠連二處地方。實在緊要。必須添兵防衛。則該省原額及增募兵。共七萬二千六百五名。該督即可通融抽撥。其惠連新添兵。自不便一體存留糜費。從之。○工部議覆。江南河道總督完顏偉等疏稱。據巡漕

御史都隆額具奏。稱黃河北岸石林黃村二口。黃水減洩過多。近河之沛縣銅山等處。多被淹漫。今查勘該二口。原以減洩黃水異漲。歸微山湖。以資漕運。乾隆五年秋汛盛漲。二口漫灘之水。汕刷溝槽。以致洩水過多。經前河臣高斌堵塞堅實。加築土壩。鑲做防風。與地相平。是以乾隆六年伏汛盛漲。減水無多。嗣後惟於汛水未發之先。將原築土壩修補堅實平整。如遇盛漲漫灘。汕刷溝槽。即行隨

時填補。則減洩不致過多等語。該總河所議。與侍郎周學健等所奏。將二口堅築土壩。外堆砌亂石幫護。高與地平。仍與漫灘無異之處。意見相同。應如所題。行令該總河隨時辦理。再該總河等所稱銅沛等縣濱河窪地。雨水稍多。即不免於淹漫。是又不僅以二口洩水過多之故。應令該總河會同江南督撫。悉心籌畫。務期河道民生。兩有裨益。從之。○庚子。修

南北郊齋宮。諭署戶部侍郎三和

天壇

地壇舊制。建有齋戒宮。年久傾圯。未經繕修。朕意於大祀前期。至誠赴壇齋宿行禮。其應如何修建之處。爾即前往。敬謹相視。繪圖呈覽。至興修之時。著派內府熟悉工程之員。仍會同工部。太常寺派員。一同監看修理。所需錢糧。由工部行文。向戶部咨取應用。○吏部議覆。署陝西巡撫岱奇疏稱。陝省之同州府知

府通判經歷并大荔縣知縣縣丞典史教職又榆林府知府照磨知縣典史延安府捕盜同知商乾鄜鄜綏德等州直隸知州潼關縣知縣典史教職懷遠靖邊定邊三縣知縣典史及號川麻地溝永豐鎮各巡檢等缺自雍正三年之後節經裁改添設均有職守並非冗曠之員應如所請仍照舊設立無庸議裁從之○刑部議奏先經臣部議覆福建按察使張嗣昌條奏嗣後閩省應入秋審人犯分別州縣離省程途遠近於部覆未到者無庸槩行提解以免守候跋涉之累行令各該省畫一辦理等因今據各省督撫府尹等各仿照閩省之例酌定離省程途遠近分別日期應如各督撫等所議辦理并載入例冊永著為例從之○又議覆福建按察使王丕烈奏稱福建廣東二省向係彼此互流設粵民寓閩已久犯罪應流若依例解回原籍仍流閩省是猶以本省人流本省此等生事之徒或

致別生事端應如所奏嗣後如粵民寓閩犯流者統發回本籍按所犯道里改發廣西足數之地方安插仍通行直隸各省但遇有流寓之人於該省犯流者照例解回原籍若計應流之地即係該犯流寓之所未便發往者亦令各該督撫按所犯應流之地計本省及流寓省分之遠近臨時聲明分別改發統期足數從之○奉天府府尹霍備疏報承德蓋平永吉寧海錦縣義州等六州縣乾隆六年開墾荒地五千一百七畝有奇○壬寅諭軍機大臣等御史陳大玠條陳可發與那蘇圖閱看向來臺灣地方產米甚多是以漳泉等處資其接濟後因流寓人多米價漸貴乾隆六年彼地又復歉收特令禁米出港今陳大玠此奏未必即係該地方實在情形但年歲果屬豐稔而奸商等居奇囤積亦非便民之道該督撫等亦當通融辦理○又諭署戶部侍郎三和

天壇齋宮券殿。宮門內外河道圍廊。應拆應修。或另建殿宇齋宿。以及

地壇齋宮殿宇。亦經年久遠。應如何修整之處。爾即會同海望。再行詳細相度妥議。繪圖呈覽。○大學士等議覆。御史王綱振奏。稱續獲盜首。屢審未認。無憑質證。罪關斬決。仍應監候待質外。其有續獲盜犯。供招相符。並非盜首。又未傷人。只因年久賊耗。監候待質。此等人犯。供認既經確實。監禁實無可待。其已入秋審者。不拘年限。令九卿詹事。科道等會審時核明。照未傷人夥盜例。擬以遣罪請旨。行令地方官查明。有無妻室。分別發遣。如並無賊據。屢審不承。良盜尚屬未定。並於秋審時。九卿等酌擬保釋請旨。令地方官取具的保釋放。俟緝獲正兇。再行質審。至現在案內正犯。俱係情重難寬。祇因稍涉疑似。尚應待質。是以仍行監候。與強盜案內應分決遣者不同。應於秋審時。令九卿等酌其情罪。分別辦

理。其朝審冊內監候待質之犯。亦照秋審案件一體查辦。嗣後秋朝審時。俱依此例辦理。

從之。○工部議准。四川巡撫碩色等疏報。提標附郭馬廠。開墾水旱田地三十三頃三十一畝。請照撫標退出河鋪馬廠官地之例。免其升科。從之。○工部議准。河南巡撫雅爾圖疏稱。開封府照磨。兼管閘座河渠。其事不簡。於經歷兼管道庫大使。請於每年額支養廉銀一百兩外。照開封府經歷之例。增給八十兩以資辦公。從之。○以少詹事趙大鯨。充日講起居注官。

大清高宗法天隆運至誠先覺體元立極敷文奮武孝慈神聖純皇帝實錄卷之一百六十八

大清高宗法天隆運至誠先覺體元立極敷文奮武孝慈神聖純皇帝實錄卷之一百六十九

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部庫事務

世襲騎都尉軍功加十九級隨帶加二級又加二級臣董誥內大臣戶部尚書保蘇滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆七年壬戌六月甲辰

上詣暢春園問

皇太后安。○戶部議准甘肅巡撫黃廷桂疏稱寧州環縣合水安化四州縣接管之慶陽一衛地界甘省極東天氣視各府差暖民間種粟者多是以向徵粟米一色原為便民起見查該衛地畝多在高山坡坎之間可種粟者止十之一二餘僅堪樹藝麥豆屯民易米完賦不無虧折且甘屬河東河西各衛屯糧均係麥豆雜糧兼收今應照例將該衛額徵粟

米。自乾隆癸亥年為始。改為米麥豆三色兼收。從之。○旌表守正捐軀之河南陽武縣民李謙妻牛氏。廣東永安縣民廖文陞妻杜氏。○乙巳。大學士等議奏。大祀

圜丘壇。

祈穀壇。

方澤壇。向來陳設籩豆。在

聖駕未臨之先。惟進俎在獻玉帛之後。厨役始於壇下昇進。其香爐燈几。均由官員拱捧。倉

猝安設。未免進退不齊。非所以肅禮儀也。請

嗣後所進之俎。亦如籩豆。豫先陳設。至獻玉

帛後。典儀官唱進俎。贊引官恭導

皇上詣

神位前。拱舉進俎。無庸厨役昇進。并停止官員

拱捧香爐燈几。以肅壇壝。得旨。是依議。○又

議奏。嗣後大祀

圜丘壇。

祈穀壇。

方澤壇。如遇

皇上親詣行禮。應於別殿齋戒二日。齋宮一日。或遣官恭代。亦詣壇齋宿。其

朝日。

夕月。

先農等壇。均係中祀。致齋二日。如遇

皇上親詣行禮。亦祇於別殿齋戒。得旨。是依議。

○戶部議准。前署山東巡撫布政使魏定國疏報。東省濟泰東三府之歷城。章邱。鄒平。長

山。新城。齊東。濟陽。臨邑。長清。陵縣。德州。德平。

平原。肥城。東阿。平陰。博平。茌平。清平等十九

州縣。衛。麥禾被旱。請將新舊錢糧。緩至秋後

徵收。以紓民力。惟各州縣秋禾。雖已飭借籽

種。但距西成尚早。應於存倉穀內。酌量借給。

仍於秋後免息還倉。倘本處倉穀不敷。即於

隣近州縣撥運借給。得旨。依議。速行。○工部

議准。原任福建巡撫王恕疏報。永定縣東門

外大橋等橋。及興化司巡檢衙署。被水衝塌。

有礙行旅往來。並巡檢無所棲止。請動項興修。從之。○鑄給河南衛輝府河捕糧鹽水利通判關防。許州之印。許州儒學記峽石驛驛丞兼巡檢關防。從巡撫雅爾圖請也。○丙午。戶部尚書海望等繪呈

天

地壇齋宮。拆修改建地盤式樣。得旨。樣留覽。其

朝日壇。

夕月壇。舊有之具服殿。爾等亦前往敬謹相

視。應作如何修理之處。詳細妥議具奏。○戶部等部議准。原任福建巡撫王恕疏報閩縣侯官。惠安。順昌。連城。霞浦。福安。永春。等州縣。共缺額寺田五十六頃一十七畝六分零。無徵銀九百九十二兩七錢零。米四十一石二斗零。請自乾隆三年為始。照數豁除。從之。○戶部議准。御史陳大玠奏稱減價平糶。原以惠濟貧民。若使奸商蠹役彼此串通。假作貧民赴官包買。囤積居奇。閭閻仍不得均霑實

惠。請行令各該督撫轉飭地方官。務須實力稽查。如有前項情弊。即行嚴拏懲治。從之。○工部議准。調任江南總督那蘇圖疏報。和州之太陽河。缺下河。來安縣之龍尾壩。急應挑浚。請動項興工。其和州之牛屯河。含山縣之銅城閘河。既稱河流暢達。應停疏濬。從之。○丁未。

上詣暢春園。問

皇太后安。○諭軍機大臣等。孫嘉淦叅劾治大

雄貪縱不法一案。著將治大雄革職。交與該撫嚴審定擬。但孫嘉淦叅款內。有治大雄派買穀石。短發價值。及賤買雞鶩等項。朕思行軍之際。自以秋毫無犯為貴。然亦只能去其太甚耳。若購買米石食物。偶與市價不符。亦勢所不免。今若以此發審。必須與苗人對質。宣播於衆。萬一再有用兵之事。苗人借此居奇。轉致掣肘。頗有關係。況治大雄劣蹟已多。亦不在此一節。可刪截發抄。並寄信與孫嘉

淦知之。○又諭今年糧艘抵通。較往年為遲。若回空再復濡滯。則明春更不能如期北上矣。可傳諭倉場侍郎。再派御史二員。於收米之後。督令迅速南回。並行文沿途督撫催趲。毋令停攔。該部知道。○諭戶部尚書海望等。天壇齋宮。准照樣新建正殿五間。左右殿六間。其諸旗房。不必蓋造。

地壇大殿五間。准照樣拆蓋。兩邊配殿俱改建五間。隨牆圍廊俱拆去。其餘俱照樣准做。尋

海望等繪呈

朝日

夕月壇。地盤式樣得旨。

夕月壇。具服殿。准照樣如式修理。其

朝日壇。具服殿。舊制建於祭臺之南。臨祭時必徑過神路。始至殿所。似於誠敬之儀未協。著將具服殿。移建祭臺之西北角。其西北角現有道官衙署。移於具服殿地基蓋造。○戶部議覆甘肅巡撫黃廷桂疏。稱安西提標各

營地處口外。所有額餉。向係按季差弁兵赴蘭請領。往返數月。耗費曠操。實有未便。應如所請。自本年秋季為始。照例兩季兼發。豫領銀兩。交與安西道廳衛所貯庫。季首文武員弁。會同散給。並請嗣後安西各營。豫領冬夏二季餉銀時。如協餉不敷。准於司庫不拘何項銀內。借支給領。從之。○以

福陵左翼副總管桑格為

福陵總管。○戊申。

上御勤政殿聽政。○訓飭地方官實心經理平糶。諭各省地方。每遇歉收。米價昂貴。國家動發倉儲。減價平糶。乃養民之切務。然有司經理不善。即滋弊端。是以乾隆四年。張渠奏請減價糶穀。於成熟之年。每石照市價減五分。於米貴之年。每石照市價減一錢。蓋欲杜奸民賤糶貴糶。罔積網利之弊也。朕思尋常出陳易新之際。自應照此例行。若遇荒歉之歲。穀價高昂。非減價一錢。可以濟貧民之困者。

是以本年二月間特降諭旨。令該督撫等於地方歉收平糶之時。酌量情形。應減若干之處。豫行奏聞請旨。今朕再四思維。地方當饑饉之時。黎民乏食。朝廷百計區畫。方且開倉發粟。急圖救濟。一賑再賑以安全之。豈有於平糶一節。豫防奸民之賤糶貴糶。不為多減價值。而使嗷嗷待哺之窮民。仍復艱於餬口乎。況赴倉糶買官米。與赴店糶買市米。其難易判然。又可厯數銀色有高低之不等。戥頭有輕重之不同。道里有遠近之各殊。守候有久暫之莫定。此在平時且然。何況年荒乏米之日。若官價照市價畧為減少。則所差幾何。是國家徒有平糶之恩。而閭閻未受平糶之益也。朕痼瘕在抱。言念及此。再行明白宣諭。凡各省大小官員。皆朕設立以牧養斯民者。倘於此等要緊政事。視為具文。苟且塞責。則罪不可逭。嗣後務將該地方實在情形。必須減價若干。方於百姓有益之處。確切奏聞請

旨。至於奸民當歉收之年。圖利囤積。將官穀賤糶貴糶。則惟在州縣官嚴行查拏。倘或疎漏隱匿。該督撫即刻嚴叅。從重治罪。是亦並行而不悖也。○又諭朕已降旨舉行雩祭之禮。大學士禮部等定議。在於

圜丘。朕思明代既建有崇雩壇。國朝會典內亦載之。而書云今不舉。今既議舉行雩祭。乃舍此壇而在

圜丘。恐生後人議論。似應在專壇行禮。著大學

士會同禮部。酌古準今。再行詳察典禮具奏。

○命大學士陳世倌。工部右侍郎德齡教習

庶吉士。○以少詹事趙大鯨為太僕寺卿。○

鑄給直隸薊州中營巡檢司及遵化州半壁

山巡檢司印。從總督高斌請也。○旌表守正

捐軀之山西靈石縣民郝州妻王氏。○己酉

諭前據都統盛安奏稱。允禩之子弘旺在正

陽門外過宿等語。弘旺本係錮禁之人。朕因

篤念

皇祖將伊等釋放。加恩賞給紅帶子。置立產業。俾得生路。伊等自應守分安居。乃復如此妄為。實屬不知悔改。又聞現在侍衛上行走。及閑散近派宗室內。亦有品行卑鄙者。伊等皆係

皇祖之孫。無論當差閑居。均應仰體

皇祖顧惜顏面。今竟忘其本源。在侍衛上行走者。輒甘與大臣侍衛。平等相交。閑散者肆行妄為。伊等如此卑鄙。獨不念及朕躬乎。莊親

王履親王輩屬尊長。係朕之叔。凡似此者。即應教誨。焉有族中尊長。而不教其子姪之理。若置之不問。將欲令朕教之乎。朕日理萬幾。何暇及此。嗣後著莊親王。履親王。遇有不肖之徒。隨時管教。如不聽從。即行奏聞。其中材堪造就。守分安居之人。或有原分產業淡薄。生計維艱者。亦應奏聞。候朕酌量加恩。尋常臣僕。朕尚俾各得生理。享盈寧之福。況朕骨肉至親。有不顧恤者乎。果能引導訓誨。使我

近派宗室人人皆底於善。庶我

皇祖

皇考在天之靈。亦欣慰矣。○吏部議駁江蘇巡撫陳大受等奏請。揀選知縣佐雜。發蘇差遣。與例不符。應無庸議。得旨。江蘇現有賑濟事務。未免需員辦理。著照該撫等所請。揀選發往。後不為例。○又議覆山西巡撫喀爾吉善奏稱。外任旗員子弟。無論在內在外。准一體隨任。但必逐案題奏。未免案牘紛繁。應如所

請。嗣後外任旗員子弟。年至十八歲以上。請

留任所者。照例詳明各上司。該督撫核實情節。先行咨明部旗存案。仍俟年底。臣部彙齊具題。其在旗各員。初莅外任。呈請帶往任所者。仍遵原旨辦理。從之。○予故廣西右江鎮總兵張朝宣。祭葬如例。○庚戌。命廣州將軍阿爾賽來京。陛見。以副都統高文涵署理將軍印務。○遣官祭

火神廟。○辛亥。免追問甘省官員未清款項。

諭朕臨御天下。期於政簡刑清。近來內外各衙門。俱無久而未結之案。惟有甘肅一省。從前屢次軍需。前後約四十餘年。凡供億軍費。大端俱已核算奏銷完結。惟其中部駁清查核減各款。尚有未楚者。即如寧夏。則有康熙三十年至三十八年。供應進勦大兵。及駐劄滿漢官兵喇嘛等案。肅州一路。則有康熙五十四年。至雍正四年。辦過大軍需各案。又有康熙五十四年。至雍正十三年。供支出口人員馬駝鍋帳食物等案。西寧一路。則有康熙五十四年。至雍正六年。辦過軍需各案。又有康熙五十四年。至雍正十三年。供支出口人員馬駝鍋帳食物等案。又有雍正元年。勦撫青海。用過錢糧等案。陝甘二提涼寧肅三鎮。則有康熙五十四年。至雍正元年。拴養馬駝各案。以上諸件。事歷多年。官經數易。往返駁詰。不但案牘紛繁。地方滋擾。且使已故之員。累及子孫。現任之員。代人受罰。朕心有所不

忍。用是大沛恩膏。將康熙三十年。至雍正六年以前未清之項。悉予豁免。免其究問。著追至雍正六年以後之案。為時未遠。尚易清查。著總督尹繼善。巡撫黃廷桂。遴選賢員。於一年限內。秉公確查。將其中應免不應免者。一分別造具清冊。該督撫具本保題到日。朕再降諭旨。該部可即行文該督撫知之。○又諭各省常平倉穀。原以備民間緩急之需。舊例存七糶三者。乃出陳易新。以防霉變。指尋常無事時而言也。若遇地方米少價貴之時。則當多糶以濟民食。毋得拘泥成例。從前已屢經降旨。本年二月間。又復申諭。各督撫等矣。今許容奏稱。目今青黃不接。糧價增長。各州縣詳報市米稀少。平糶倉穀。已符額數等語。此言甚屬不經。是湖南有司。並未領會朕旨也。國家儲蓄倉糧。專為接濟百姓而設。若民間米穀充裕。即三七之數。亦可不需。如粟少價昂。則安得以存七糶三。目為額數。今許

容所轄一省。如此錯誤。或他省有似此者。亦未可定。可即通行傳諭知之。○旌表守正捐軀之河南商邱縣民尼清海妻張氏。○壬子。上詣暢春園問。

皇太后安。○諭曰。常明年老。現今患病不能辦事。其領侍衛內大臣事務著

泰陵總管內務府大臣佛倫署理。佛倫所遺陵寢總管內務府大臣員缺。著牧場總管覺和托補授。其牧場總管員缺。著內務府總管等

照例揀選應陞人員。帶領引見。覺和托所遺員缺。即著協理臺站事務總管白泰兼理臺站事務。俟牧場總管員缺補授人員時。應否令其兼理臺站事務之處。另降諭旨。再內務府總管等各有兼理之事。又有出差之人。既無專辦人員。著御前侍衛傅恒補授內務府總管。學習辦理。○工部議覆御史都隆額奏。稱東省之安山湖地。前因不能蓄水濟運。給民墾種以資養贍。乃有本處豪強。侵占七八

頃及數十頃不等。甚有衍聖公孔廣榮亦稱有伊原園地。行文認領。反使窮民不得均霑實惠。應如所請。行令河撫二臣。勘明實在貧戶。給與承墾。如有侵占情事。即據實叅處從之。○癸丑。諭軍機大臣等。常安自五月上旬具摺奏事。至今將及兩月矣。未見有再奏之摺。豈地方無事可奏耶。即如海塘情形。隨時變遷。據朕所聞。春間坍沙之地。近來已經漲沙數丈。及數十丈不等。水勢南趨。與前迥乎不同。常安身為巡撫。此等緊要事件。何以不行奏聞。可寄信詢問之。○定內廷丹陛樂章名。莊親王允祿等奏。內廷行禮用丹陛樂。會典不載。今擬章名進呈。得旨。用雖平。○大學士等遵旨議奏。謹攷禮記大雩帝。鄭康成註曰。雩祭。謂為壇南郊之旁。雩五精之帝。配以古帝也。杜佑通典曰。建巳月。雩五方上帝。其壇名曰雩祭。是自漢而下。以逮於隋。雩壇皆祀五方帝。而非祀。

昊天上帝也。唐書禮儀志。高祖武德初。定令每歲孟夏之月祀。

昊天上帝於圜丘。開元禮亦同。宋史禮志。凡孟春祈穀。孟夏大雩。皆於圜丘。至神宗元豐四年。更立雩壇於圜丘之旁。未幾而廢。明洪武以後。雩祀無常儀。至嘉靖十一年。始建崇雩壇於圜丘壇外。泰元門之東。亦一舉行而罷。今壇已久廢。僅存基址。查歷代雩壇規制。地基既狹。壇壝亦卑。其視

圜丘大約減三分之二。若祀

昊天上帝。則禮近於褻。且查

圜丘禮成。

上帝神牌。敬藏於

皇穹宇。今崇雩壇原無別殿。可以安奉

神牌。即欲更建。而外壇壝牆之內。亦限於地實難措置。嗣後舉行雩祭。似宜仍在

圜丘。不必更建雩壇。從之。○又會同兵部遵旨議奏。右江鎮一缺。駐劄百色。最為水土惡毒。

之鄉。若仍照例將附近之貴州安籠鎮廣東右翼鎮高州鎮及左江鎮總兵。開列請旨補授。誠如

聖諭。恐未必熟習風土。若遽議移駐。又恐邊疆要地。反無重鎮彈壓。亦屬非宜。請將該鎮改為題缺。行令該督於本省副將內。擇其人籍與瘴地相宜者。揀題補授。如不得其人。於廣東省副將內。一并揀選。如仍無可題之人。該督豫將緣由報部。臣部比照吏部補用廣東

瓊州府屬烟瘴各缺。用附近之雲貴等省人員例。將各省現任副將之籍隸兩廣湖南雲貴等省人員。開列題請簡用。俟俸滿報部。調回內地。臣部遇各省總兵缺出。具題補授。現出右江鎮缺。即照此辦理。從之。○刑部等衙門議准。山西巡撫喀爾吉善疏稱。口外和林格爾等處。添設協理通判。俱經設有監獄。今大朔理事通判。亦係駐劄口外。有管理旗民交涉事件。遇有重犯。羈禁內地。會審提解。諸

有未便。應添建監獄。並照各協理通判未設獄官之例。無庸添設獄官。從之。○甲寅。訓督撫董率州縣經畫地利。諭周禮太宰以九職任萬民。一曰三農生九穀。二曰園圃毓草木。三曰虞衡作山澤之材。四曰藪牧養蕃鳥獸。其為天下萬世籌贍足之計者。不獨以農事為先務。而兼修園圃虞衡藪牧之政。故因地之利。任圃以樹事。任牧以畜事。任衡以山事。任虞以澤事。使山林川澤邱陵之民。得享山

林川澤邱陵之利。夫制田里。教樹畜。岐周之善政。管敬仲亦云。積於不涸之倉者。務五穀也。藏於不竭之府者。養桑麻育六畜也。如果園圃虞衡藪牧之職。以次修舉。於民生日用。不無裨益。國家承平日久。生齒日繁。凡資生養贍之源。不可不為亟講。夫小民趨利如鶩。亦豈甘為惰窳。舉山林川澤。天地自然之利。委為棄壤哉。良以疏闢之初。豪強既羣起而爭。管業之後。奸民又多方戕賊。地方有司。每

視為贅產細故。不為申理。此所以寧荒其業耳。督撫大吏。身任地方。所當因地制宜。及時經理。其已經開墾成產者。加意保護。或荒墟榛壤。以及積水所滙。有可疏闢者。多方相度籌畫。俾地無遺利。民無餘力。以成經久優裕之良法。至於竭澤焚林。并山澤樹畜一切侵盜等事。應行禁飭申理之處。轉飭地方官實力奉行。該督撫不時稽察。務令從容辦理。以期實效。毋致絲毫滋擾。尤毋得日久因循。以

仰副朕惠養斯民之至意。○又諭軍機大臣等。從前陳宏謀薦人不能允協。朕已降旨訓諭。今覽伊條陳事件。又不合理。即如國家賞給各官封典。乃特沛之覃恩。若五年考滿。不過供職無過。即可濫邀。倘遇覃恩。又何以錫賚之。此皆識見卑淺之處。爾等可寄信申飭之。○戶部議准。原任福建巡撫王恕疏稱粵海關運貨到閩。經過銅山口。既經徵稅。其有不實不盡之貨。又於南山邊補稅。至船抵石

碼復令加補。不無重徵累商。請嗣後將南山邊一口。只留巡哨稽查。免其徵稅。至閩安。竹崎。崇安。浦城。杉關。上杭。稅課。七關等口岸。並無私添累商。應照舊設。從之。○定邊左副將軍額駙策凌奏報。將準噶爾逃出之厄魯特。昂噶恩柯穆爾送京報聞。○旌表守正被戕之山東濰縣民劉成祥妻吳氏。○乙卯。

上詣暢春園問

皇太后安。○

上還宮。○諭國家設兵。原以衛民。不可使之稍有累於民。朕聞得粵西地方。看守城門之兵丁。往往借盤詰為名。遇小民肩挑薪蔬米豆等物。入城貨賣者。必攫取些須。以資食用。民間嫁娶。經由城門出入者。則先期需索酒食。方無阻滯。又分防塘汛之兵丁。每驅使近村民人。薙草取水。並令輪值代送公文。或塘房破損。即令村民出錢。承攬代為粘補。以餘資入已。通省皆然。而偏僻之地為尤甚。又如賭

博一節。輒自恃身充營伍。差役不敢擅拏。而同類人多。風信便捷。即拏亦易於走脫。以致開設賭場。引人入夥。肆無忌憚。此種弊端。係朕得之風聞者。該省督撫提鎮。皆當加意訪察。共相整刷。以除積習。毋得視為具文。他省或有似此者。封疆大吏。亦應一體留心辦理。○吏部議覆吏部左侍郎蔣溥奏。稱向來會議事件。每於當日。主稿衙門。始將議稿持誦一過。恐未能洞悉利弊。請勅下九卿。凡會議

事件。主稿衙門。於定期之前兩日。即將議稿豫令各衙門傳抄。俾得先加詳核等語。自屬周詳慎重之法。惟各部院承辦事件。有可援引從前辦理成例。豫酌定稿者。亦有事關創始。向無成規。必需會商方定者。似未可一概而論。請嗣後九卿會議事件。除主稿衙門。可以照例先定稿者。應令於會議之前。傳令各衙門派員。豫赴主稿衙門抄錄查核。再行會議。其必須公商定稿者。即先齊集妥商。再行

具稿傳抄。定期會議。至刑部命盜案件。奉旨交九卿會議者。應如所請。仍照例無庸先行定稿。其餘不關人命之案。亦照各衙門畫一辦理。從之。○是日起。

上以孟秋享

太廟。齋戒三日。○丙辰。諭軍機大臣等。鄂彌達係獲罪罷革之人。朕特恩復行錄用。觀伊身任將軍以來。並不酌量風土。以求實效。認真辦事。仍如前在督撫任時。徒務虛文。懷挾私意。瞻徇情面。即如沈柱之案。原應照部議革職。朕因一時乏人。尚望其悔改。以觀後效。是以復加恩從寬留任。嗣後若復不知悔改。斷難逃朕之洞鑒。加倍治罪。決不寬貸。將此寄信鄂彌達知之。○又諭曰。廣福人不安靜。附會鄂彌達。辦事並不實心。今因沈柱之案。治罪革職。著仍留彼處。交將軍鄂彌達。令其効力行走。若不奮勉効力。以贖前愆。鄂彌達即行奏聞。從重治罪。鄂彌達倘仍如前瞻徇情

面。經朕聞知。將鄂彌達一併治罪。○議政王大臣議覆順天府府尹蔣炳奏稱。旗人藉地租當差。民人賴種地度日。每有業主被佃戶之勒捐。佃戶受業主之欺凌。以致爭控到官。該地方官於此等案件。故意玩延。竟成積習。應如所請。嗣後如有告發奸民捐勒者。州縣官不速為審理。該上司即行查叅議處。如旗人有欺虐情弊。令州縣官申送該上司訊究。總期平允。無致偏枯。再旗人以地畝事件。告假下鄉。非尅期所能猝辦。應交與八旗都統等寬給限期。俾從容料理。從之。○吏部議覆順天府府尹蔣炳奏稱。府尹衙門。有事繁書吏十缺。應俟五年役滿。毫無過犯者。該府尹出具考語送部。臣部照太常寺等衙門書吏之例。歸於雙月京捐之後。按伊等役滿日期。先後挨次選用。從之。○兵部議准。步軍統領舒赫德奏稱。查八旗捕盜步軍校。滿洲三員。蒙古。漢軍。各一員。遇有盜案。與本旗步軍副

尉等一體議處。但一旗滿洲蒙古漢軍地方遼濶街巷甚多。五人內只一人值月。即晝夜巡邏亦不能遍及。請嗣後將八旗滿洲旗分分為三段。所有捕盜步軍校三員。各管一段。蒙古漢軍旗分步軍校各一員。管轄本旗地方。遇有強竊案件。即責成專管之捕盜步軍校緝拏。逾限不獲。照例議處。從之。○調寧古塔副都統常勝為墨爾根城副都統。墨爾根城副都統宗室圖納為寧古塔副都統。○丁巳。戶部等部議准。署閩浙總督策楞疏請添建福寧府屬新設福鼎縣倉廩。從之。○又議覆河東鹽政尚琳疏稱。唐縣引鹽向係豫省運商公辦。今若照廣西之例。歸官辦理。則該縣距運城一千餘里。騾馱車載。稽察難周。若委官員。不特查驗費繁。更恐兵役作奸。查唐縣所開餘畦。均係商自出資澆曬。應如原奏。將唐縣引張責令該商收繳稽察。倘有遺誤。照例治罪。仍募殷商承充。其應用雜費。俟試

辦一年後。果屬妥協。在於歸公銀內支給。其稽察之法。亦應如所題。嗣後土販買鹽。務須遵照定例。每引一名。賣銀一百六十六兩。令土販出具賣商並無勒索甘結。投送運同加結。轉報該鹽政查核。其土販運鹽到唐。該縣不時稽察。仍將賣價按季出結。申呈巡撫鹽政查核。如該商向土販勒價。土販或昂價累民。即嚴拏究治。並將出結不實之員題參。從之。○是月。直隸宣化副將充總兵官李質粹奏。張家口外。盜風日熾。業令該管章京督率護軍前往躡緝。惟是地方遼濶。恐難周歷。隨咨察哈爾總管。派兵分巡。至壩內漢奸。或有通夷情事。又令理事同知留心緝捕。並移知防禦總管。盤詰進口之人。印對商民所失馬匹。得旨。好。可見汝留心地方。勉力為之。○兩江總督宗室德沛奏。江浦山陽阜寧清河安東桃源興化宿遷等縣。經上年成災之後。今又被水被雹。更宜竭力撫卹。得旨。是。此數處

疊遭災祲。不可以常例視之。宜加意撫綏者也。○安徽巡撫張楷奏。涇縣蒙城。太和。阜陽。潁上。滁州。全椒。來安。和州。含山。天長。宿州。靈璧。虹縣。懷遠。臨淮。鳳陽。盱眙。合肥。宿州。衛等二十處。被水。現經設法宣洩。可望秋成。惟宿靈。虹。三處低窪。積滯難消。秋禾尚多未種。得旨。安省災傷之餘。正宜竭力撫綏。以培元氣。朕甚為此廕念。必使小民毋致失所。然後差慰朕懷耳。○浙江巡撫常安奏。老鹽倉各塘工。正值伏汛期湧。未免汕刷。現飭工員分段積柴。隨時修補。得旨。所奏俱悉。此奏殊屬遲緩。更聞目今沙復漲。而水南旋。何不奏明以慰朕懷耶。浙省頗有造作浮言之風。即如去年盧焯一案。與夫李捷三一案。羣言沸騰。甚至有罷市者。此皆風俗不淳之故耳。宜亟力整頓之。○又奏請揀發知縣赴浙。得旨。近來陳大受亦如是奏請。朕因彼省現有辦賑之事。是以破例如其所請。浙省目下尚無甚需

人之處。不必破此例也。○湖南巡撫許容奏。將本標兩營兵。分班操演。別為上中下三等。一月三試。定賞罰以示勸懲。得旨。操練之法。亦不過如是而已。試實力行之。○山東布政使包括。以調任奏謝。得旨。但聞汝因罷巡撫而復原任。頗有快快不自得。凡事不肯實心擔當等語。如此則是自取罪戾矣。戒之慎之。○川陝總督尹繼善覆奏。哈密逼近賊巢。賊夷倘有窺伺。必先擾哈密。哈密駐有防兵。未必遽敢輕犯。或由噶斯一路。覬覦青海。不可不豫為籌備。現密致提臣。及青海副都統等。悉心計議。得旨。所奏俱悉。○甘肅巡撫黃廷桂奏。甘屬上下衙門。大半未設庫局。並無庫吏經管。祇將經徵銀錢。收放內署。以致任意侵挪。現檄各道府廳州縣。向未有銀庫者。即於大堂左右建設。將正雜銀兩。全數封貯。并照例選設庫書。責成看守。得旨。如此實心辦理。殊屬可嘉也。○甘肅提督李繩武奏。甘省

有買貯倉石麥五千四百二十餘石。每遇青黃不接之時。散給各兵。仍在各兵季餉內扣還原價。以備糴買接濟。但糧價低昂不定。扣法自應變通。請嗣後每歲時價較貴於原價。仍應照原價扣還。倘時價反低於原價。應即依時價減扣。以恤窮卒。得旨。即如是辦理可也。○又奏奉諭整飭營伍。並所屬涼肅兩寧雨水需足。田禾茂發各情形。得旨。欣悅覽之。趁此年歲有收。況甘省營伍。朕復新加特恩。則一應整飭之處。正宜亟力為之之時也。○廣西提督譚行義奏陳辦理耗羨事宜。得旨。汝武臣也。何必論及此。但謹守邊疆。和輯兵民。是汝之責耳。○署貴州布政使陳惠榮奏貴陽貴筑仁懷施秉普安安南開州鎮寧荔波餘慶等府州縣之各堡坪。皆可引水墾田。四五千畝不等。現親履查勘。給本興工。至栽桑育蠶。惟大定威寧地氣寒冷不宜。其餘各屬。均設官局試養。並於省會收繭雇匠織。

又黔山櫟樹。今年飼養春蠶。亦已結繭有效。似較樹桑為便。得旨。此事論之似迂。行之甚難。而若果妥協辦理。則實有益於農民者也。○又奏報貴陽獨山畢節等府州縣。以山水陡發。衝壞城垣民居。淹斃人口。現飭員確勘。分別撫卹。給本修整。得旨。如此據實入告。方稱朕意也。

大清高宗法天隆運至誠先覺體元立極敷文奮武孝慈神聖純皇帝實錄卷之一百六十九

大清高宗法天隆運至誠先覺體元立極敷文奮武孝慈神聖純皇帝實錄卷之一百七十

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣奏桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆七年壬戌秋七月戊午朔享

太廟

上親詣行禮○詣

大高殿行禮○詣暢春園問

皇太后安○幸圓明園○諭朕每臨

大祀必恭必親今因時享聆太常寺笙簫管籥

之奏至不能分別宮商而以之侑享

郊社

宗廟何以交神明而達誠敬朕既命莊親王三

泰張照為總領樂部大臣非祇轄和聲署也

太常寺樂尤宜加意整頓嗣後一應太常寺樂部事務俱著管理又聞向來太常寺樂員俱係道士承充此亦沿襲明代之舊夫二氏者異學不宜用之朝廷今縱不能使為二氏者盡歸南畝被服儒風何迺用道士掌官縣司燎瘞為

郊

廟大祀駿奔之選暇日則向民間祈禳誦經以餉其口成何典制豈不貽笑後世耶太常寺樂員嗣後毋得仍習道教有不願改業者削其籍聽為道士可也朕詢問三泰知額設多至五六百人得無冗濫著莊親王等詳查定議如果額數太多即奏請芟汰與其多而無用不如減少額數將錢糧歸併酌增精選實能任事之人令其承應○又諭太常寺朕因孟秋時享聞太常樂弦管迭凌聲字繚轂因思爾衙門三六九在凝禧殿演習何以至是朕令童子習中和韶樂丹陛樂甫二十餘日

頗有倫理。已不似爾太常樂部矣。今令兩部對作有耳共聞。孰優孰劣。然則所為三六九演習者。徒有其名而無其實也。即爾衙門。現在內廷學習新定樂章諸人。今甫五日。即已大不相同。可知但恐不學。斷無學而不成之理夫。

郊

廟大祀交於神明。豈容聽樂工任意吹彈。不求音諧節正。則我君臣肅雖誠敬之謂何。唐時樂工。伊涼俗樂奏之堂上。謂之坐部伎。其不堪為坐部伎者。退為立部伎。若立部伎又不堪。則退為雅樂部。供奉郊廟。為後世所譏笑。今俗樂之奏。猶有宮商而雅樂荒廢如此。朕甚懼焉。白居易云。工師愚賤安足云。太常三卿爾何人。朕為爾等誦之。除既往不咎外。嗣後務須督令勤習。朕不能再為爾等寬也。莊親王等三人總理樂部。著加意整頓。已未諭前因修理。

三陵工竣。勅諸王大臣定議。擬於乾隆四年秋間。前往恭謁。後因畿輔地方歉收。沿途豫備糧草等物。百姓不無滋擾。曾降旨俟豐收之年。再行前往。今奉

皇太后懿旨。欲謁

祖陵。意甚誠切。朕於明年秋恭奉

皇太后敬詣

祖陵行禮。所有一切應行事宜。著滿洲大學士等總理行在事務。王大臣等會同各該管處議奏備辦。○福州將軍署閩浙總督策楞疏報浙江定海縣地方。飄到日本國遭風難彙仲兵衙等二十人。照例給與米鹽衣服。遣歸本國。下部知之。○庚申。大學士明史綱目館總裁官鄂爾泰議覆侍郎明史綱目館副總裁周學健奏稱。明祖起兵濠梁。定鼎江東。頒定官制。設科取士。詳考律令。諸政皆在未即位以前。而續綱目所修元順帝紀。於明興諸事。不覈不白。今明紀綱目。既始自洪武元年。

若於分注之下。補敘前事。不特累幅難盡。且目之所載。與綱不符。於編年之體未協。若竟畧而不敘。則故明開國創垂之制缺然。而自洪武元年以後。一切治政事蹟。皆突出無根。亦大非春秋先事起例之義等語。應如所奏。當亟為議定。以便纂輯成書。但尚有未盡確當之處。按明太祖即位。在戊申歲正月乙亥。實元順帝至正二十八年也。是時順帝尚在大都。至閏七月丙寅。徐達師抵通州。順帝始奔沙漠。則戊申歲閏七月以前。仍宜大書至正二十八年。而明太祖元年。則斷自是年八月始。此一定不易之義也。周學健請以明太祖洪武元年。繼元至正二十七年之議。似不可從。又按宋元續綱目。成於成化十二年。其順帝紀。本為元而作。事關天下。不得專言一國。故於明祖開國次第。不過畧書一二大端。至稱明太祖為我太祖。以本朝之臣。紀本朝之君。書法自應爾。猶之春秋書魯君為公。朱

子綱目。亦書宋太祖為我太祖也。况續綱目一書。奉

聖祖仁皇帝御批。頒行宇內。敬謹共遵。何容擅改。又按三代以下。得國近正。首推漢高。次即明祖。周學健謂明祖同符漢高。語誠有當。但其事似同。實異。漢高當義帝立一年。即楚漢爭雄。綱目自應並著。若明祖始從郭子興。為鎮撫為總守。皆子興所命。直至至正二十七年。韓林兒卒。始稱吳元年。前此皆用林兒年號。何得分注於至正年號之下乎。臣等再三詳酌。明太祖元年以前事。不補敘。則非義。欲分注。則無名。謹按綱目之體。原倣春秋左傳。左氏有先經發傳之例。故於隱公之首。先敘惠公。又元儒金履祥。因周威烈王二十二年以前事。綱目未載。補作前編。有此二例。庶可引據。應請

皇上勅下史館。將元至正十五年。明祖起兵以後。迄至正二十八年。元順帝未奔沙漠以前。

另為前紀。仍以至正編年。至二十八年閏七月止。列於今所修綱目。明太祖洪武元年八月之前。其稱名。稱吳國公。稱吳王。悉倣朱子書漢高例。隨時遞書。則一代開基之事實。既詳。千古君臣之名義。亦正。似於傳世立教之意。更為慎重。奏入。報可。○戶部議准。廣西巡撫楊錫紱疏報。乾隆六年分。梧州。南寧。二府屬。直隸鬱林州屬。墾熟荒田。共稅二頃八十五畝。有奇。里民首報。免其治罪。並免追未納錢糧。從之。○以編修萬承蒼署日講起居注官。○辛酉。戶部議准。山西巡撫喀爾吉善疏報。繁峙縣雍正十年報墾地內。有被水衝沒地。二十頃二十七畝。有奇。所有額徵。請與豁除。其實在成熟地七十五畝。有奇。仍照例起科。從之。○壬戌。

上詣暢春園。問

皇太后安。○戶部議准。廣西巡撫楊錫紱疏報。武緣縣雍正九年報墾地內。有墾不成熟地。

一頃九十六畝。有奇。所有額徵。請與豁除。其實在成熟地一頃四十一畝。有奇。仍照例起科。從之。○禮部議准。江西巡撫陳宏謀疏稱。江省現有高若璠。刁光煥。楊大業。李繩係。滇黔等省。改土為流之土司。獲罪遷發來江安插。入籍為民。迄今十有餘年。俱各安分執業。誦詩讀書。有志向上。實與俊秀無殊。請准其與本籍生童一體應試。再改土為流之彭肇槐。已回江西本籍吉水縣。所有子弟。亦應一體考校。從之。○癸亥。諭軍機大臣等。廣東學政張灝來京復命。朕詢問該省雨水年成。據奏自正月起至四月初旬。數月未曾得雨。春收失望等語。粵東春間少雨。慶復。王安國。雖曾奏及。却未將春收情形奏聞。後據慶復。王安國。奏報。四月初六七。并十三四等日。甘霖大沛。俱已霑足。田禾已種者。俱可有收。未種者。俱可補種。與張灝所奏。不甚符合。爾等可寄信與慶復。王安國。令其將實在情形。及如

何料理之處。速行具奏。尋據奏覆前任學臣張灝於四月初二日自粵起程。爾時尚未得雨。夏收原屬失望。其所奏悉係實情。嗣後四月初五、六、七至十二、三、四等日。各屬連得大雨。四郊霑足。視半月以前氣象迥乎不同。為學臣張灝所未及見。臣等屢次奏報。字字據實。毫無粉飾。目下雨水均調。晚禾暢茂。民食無虞。得旨覽奏。稍慰朕懷。○甲子。大學士鄂爾泰等議奏。查繙譯鄉會試。於雍正元年議定。雍正二年鄉試。三年會試。後經禮部以會試人少具奏。奉

旨六十名會試在案。嗣因乾隆三年。因繙譯鄉試已閱六科。有百餘人。議准參議馬璘條奏。於乾隆四年開科會試。取中二十二人。因人數甚少。未經殿試。俱賜進士出身。今年八月。又屆會試之期。禮部遵例題請。奉旨。令臣等議奏。臣等公同酌議。除繙譯鄉試仍照舊例辦理外。其繙譯會試殿試。皆掄才大典。自當

按期舉行。上科因人數無多。未經殿試。今不拘定人數。亦不必另定場期。請嗣後繙譯會試。即於會試天下貢士時。於闈中另編字號。一同考試。分為兩場。頭場人衆。不必入試。於二場點進。試四書清文一篇。孝經性理論清文一篇。三場試繙譯一篇。恭請欽定題目。試卷照例。令各部院衙門筆帖式。謄錄彙集。封送。照迴避卷例。請旨另派大臣閱看。擬定進呈。恭候欽定中式。另出一榜。至殿試日。欽頒

繙譯題一道。一同殿試。即令滿讀卷官閱看進呈。分定甲第。二甲者附二甲後。三甲者附三甲後。填入金榜。帶領引見。恭候簡用。從之。○乙丑。諭。河防漕運。俱關係重大。從前中河原一分黃河之水。由竹絡壩灌入。一引駱馬湖之水。由董家溝灌入。以濟漕運。近年以來。因黃水灌注日久。中河淤沙墊積。河流湍悍。不異正河。復經高斌議將竹絡壩堵築截斷。黃流。然在中河得免衝潰。固可保固兩隄。但

黃流既不灌入而駱馬湖之水又開平淺不能引出其上流山東開河之水春月挑浚之後每每封閉蓄水以待糧船抵境啟版放行是中河上無來源河身既高河流微細勢所必然矣現今糧船雖已抵通然將來中河既不使黃水灌入駱馬湖之水或又不能引出濟運而河身中節之築壩束水亦非經久之計應將中河如何使河流深通每年不致阻滯糧船之處著完顏偉顧琮會商妥議具奏

○禮部尚書趙國麟以久病乞休得旨趙國麟原係獲罪降調之員朕加恩復用侍郎彼時伊意以官止亞卿照常供職使衆人見其無悻悻求去之意而憐之及至用為尚書即託病請罷朕屢次慰留而伊仍復執奏至再至三儼然以禮進義退之大臣自處夫進退大臣之禮朕豈不知如遇當以禮待之大臣而年力衰邁即卧理中書可也或優詔加恩歸田頤養亦無不可然必其人足以當之豈所論

於趙國麟乎伊試返而自思外任巡撫內任大學士尚書何所樹立何所建白而忽於末路託名進禮退義以自表其風節乎居心不可問矣進退大臣之柄操之人主豈臣下所得用意於其間朕恭覽

世祖章皇帝實錄當時有大臣屢次求退降旨革職者此本朝之大經大法至若前代人臣之陋習拜疏即行沽一己勇退之名而忘君臣上下之義此豈可為訓乎趙國麟著革職在咸安宮効力行走該部知道○又諭禮部尚書員缺仍著任蘭枝調補兵部尚書員缺著陳惠華調補戶部尚書事務著大學士徐本兼管○丙寅

上御勤政殿聽政○詣暢春園問

皇太后安○諭曰常明為人樸直供職勤謹自皇祖

皇考時在內廷行走効力多年奉事朕躬始終如一近因舊病復發即遣御醫診視繼而病

勢沈重。特命大阿哥前往看視。並降諭旨。若伊病果不起。著加太子太保。賞內庫銀一千兩。料理後事。仍令大阿哥往奠茶酒。然朕心實尚冀其痊可也。今聞溘逝。深為軫惻。應得卹典。該部察例具奏。○又諭常明所遺領侍衛內大臣員缺。著大學士鄂爾泰兼管。都統業初前曾奏伊年力就衰。請免辦理旗務。朕未准行。但念業初以年老不能辦理旗務。奏請辭懇切。業初著不必管理旗務。授為內大臣。仍在御前行走。阿斯海著調補業初所遺正白旗蒙古都統員缺。不必管理領侍衛內大臣事務。佛倫著授為散秩大臣。署理領侍衛內大臣事務。○諭軍機大臣等。本年六月十四日。陳大受奏稱。江蘇地方。夏月連陰。秧稻雖已徧插。因雨水未能長發。至阜寧。安東六合。邳州等處。被水被雹。又據淮安府屬之山陽。阜寧。清河。桃源。安東各縣稟報。五月間大雨連日。低窪處未刈之麥。俱被浸傷。其

所種秋禾。亦被水淹。黃萎。現委府縣查勘。酌量撫卹。並借給籽種。令其速行補種。蘇城烟戶衆多。米價漸覺昂貴。擬飭地方官商酌。設廠平糶。以濟窮民等語。安寧所奏亦大概相同。但朕聞淮南一帶。因多雨之後。水勢泛溢。恐不止山陽。阜寧。邳州。數州縣。況此等地方。皆係上年被水歉收者。小民疊次災傷。尤堪矜憫。不知近日德沛與陳大受如何料理。使閭閻不致失所。爾等可速寄信詢問之。○又諭朕聞河南南陽地方。雨水過多。有無傷損禾稼之處。雅爾圖未曾奏報。朕心廑念。可寄信詢問之。尋奏南陽府所屬多係依山傍水。一遇大雨時行。山澗並漲。每歲有之。今年六月內。新野。葉縣。舞陽。唐縣等處。雨水稍多。下游之湖。廣襄漢等水。同時長發。宣洩不及。沿河窪地。間段被水。但係積年受水之區。多種麥而不計秋。間有受傷之秋禾。零星無幾。補種甚易。各該縣俱隨時妥辦。居民安堵。該處

離省稍遠。臣責成該府查覆相同。復札致南陽鎮臣就近體察。委係被水甚輕。是以未瀆聖聰。得旨。所奏俱悉。○吏部議覆。山西巡撫喀爾吉善疏稱。晉省繁簡各缺。今昔互異。遵旨更正。再口外歸化。綏遠兩處同知。案件繁多。遇陞遷事故缺出。請於各協理筆帖式內。任滿三年。曾經保題引見。奉旨記名者。題請陞用。至歸化城和林格爾協理筆帖式二缺。俱定為兼三要缺。設人地不宜。請於協理筆帖式內酌量調補等語。應如所請。至該撫疏稱。冀寧道總理通省驛站錢糧。兼轄太原。潞安。汾州。澤州。四府。直隸。遼。沁。平。三州。事務紛繁。應請於道員知府內揀選題請調補陞補。與例不符。得旨。依議。冀寧道一缺。著照該撫所請題補。○辦理火藥局事務。戶部侍郎阿里袞遵旨奏覆。查明火藥工價情由。得旨。常明自辦理火藥事務以來。較部價亦曾節省。哈達哈現今製造既好。所有工價錢糧。又復節

省。皆據實具奏。因常明前不能如此辦理。又朦混具奏。經朕特派大臣查看伊所奏數目不符。其浮冒開銷之處。盡行敗露。此皆由常明疎忽。被伊屬員欺誑之所致也。理應照查奏治罪。著落賠補。但常明効力年久。憐憫施恩。今伊身已故。其治罪著落賠補之處。俱著寬免。至屬員治罪之處。著哈達哈照例查辦。再哈達哈近日製造火藥無多。易於稽察。是以屬員據實用數目開銷。嗣後製造益多。為日漸久。或怠於稽察。以致製造粗惡。甚有關係。亦非哈達哈所能勝任也。必須留心敬謹辦理。○步軍統領奏。修整京城臨街房屋。經臣等先後奏聞在案。其臨街小巷。情願借銀修理房基者。據各該業戶呈報。地基共一百零一段。可蓋房三百九十七間半。請照通衢大街之例。每間給銀三十兩。共銀一萬一千九百二十五兩。應行修理房屋四十一間半。每間酌借銀二十兩。共銀八百三十兩二項。

共銀一萬二千七百五十五兩。請交與各該旗叅佐領取具甘結。赴戶部支領。給發本人。作速蓋造。限明春完竣。至所借銀兩。亦照旗人購買官房之例。勒限五年。按季分月還項。得旨。應借三十兩者。著借給十五兩。應借二十兩者。著借給十兩。○以少詹事呂熾為內閣學士兼禮部侍郎。○以山東兗州鎮總兵官段起賢調補湖廣鎮草鎮總兵官。○丁卯。孝懿仁皇后忌辰。遣官祭。

景陵。○諭曰。張若震以母老多病。屢請歸養。情詞懇切。准其回籍養親。浙江布政使著王恕補授。○諭軍機大臣等。上年十一月內。安西提督永常奏李繩武濫報屯田。冒邀議敘一案。經該部議以事關邊防重務。必須準情酌理。詳慎妥辦。請行令尹繼善秉公確查實情。分晰具奏。經朕允行。此案歷時已久。何以尚未查覆。可寄信詢問之。再永常自抵哈密以來。與李繩武意見不合。諸事參差。其因何

起見。并孰是孰非之處。令其查明據實奏聞。尋奏臣查得甘肅提臣李繩武老成謹慎。熟諳邊情。安西提臣永常才具明幹。實心任事。均屬邊疆有用之才。永常自到哈密。未免急於見長。將舊日事件。畧有改易。李繩武以章程久定。不必更張。二人意見。每有不合。事雖出於為公。而不能平心靜氣。互相商榷。二人均有不是之處。至屯田一案。李繩武不得不因地制宜。並無營私情弊。乃永常未能細察。遽然參奏。此實永常之過當也。臣上年十月內。奏請將李繩武撤回甘州。其口外事務。專交永常。近日並無參差不和之處。但甘肅與安西營制雖分。氣脈總屬一體。仰懇

皇上密頒諭旨。切加訓戒。俾此後共知警惕。同寅協恭。於邊疆大有裨益。得旨。此公論也。知道了。○吏部議准。原署閩浙總督策楞疏稱。福鼎縣激城地方。原屬霞浦縣管轄。迨乾隆四年。添設縣治。始歸福鼎縣管理。所有楊家

溪巡檢。現駐湫城地方。應歸福鼎縣管轄。將福鼎之八都至十五都。責令該巡檢彈壓稽查。其原轄之六七兩都。地屬霞浦。應歸於霞浦縣典史巡查。并請將楊家溪銜名。改為湫城司。鑄給印信。從之。○戶部議准。四川巡撫碩色疏稱。署瀘寧同知。鹽源縣知縣王秉鑑招民一百戶。開墾田二頃六畝有奇。應於甲子年起科。開墾地六頃七十一畝有奇。應於戊辰年起科。均屬著有成效。應令現任瀘寧同知接收經管。徵收糧銀。從之。○兵部議准。陝西巡撫岱奇疏稱。黃甫木瓜二營堡。接連山西樓子營。並宣化。大同歸化城一帶。亦屬孔道。舊設站夫各二名。站驢各十頭。供支差徭。今查一切差使。俱從鎮羌孤山。由山西之保德州過河。所設夫驢。應請裁減。從之。○戊辰。

上詣暢春園。問

皇太后安。○吏部議覆。左侍郎蔣溥奏。稱各省

知府。同知。通判等缺。或有邊省應陞之員。去新任既遠。於推陞部文到日。赴部引見需時。設該員舊任內。或有承辦承解。及苗疆要務經手。一時未能離任。甚至有累年未到新任者。該督撫於陞員未至。雖暫行委署。無論地方緊要之處。必需專員。且委署之人。任非一地。必至顧此失彼。實於政務有關。近日邊省推陞人員。不能速赴新任者頗多。請嗣後邊省推陞人員。於部文到日。督撫查可以不日交代者。即限期給咨赴部引見。如有前項事件羈身者。當於推陞文到日。嚴催辦理。速行赴部。無使任意遲留怠緩等語。應如所請。勅交各該督撫於推陞文到日。飭令作速交代。催赴新任。如有借交代名色遲延。及中途逗遛。或遠道歸里。託故遲延等弊。該督撫查明題參。俱照赴任違限例。分別議處。如實有不得已情由。并中途患病者。取具該地方官印結送部充議。再查近省推陞人員。亦有遲至

一二年之久。始赴新任者。應通行各省一體稽查辦理。從之。○已已。諭江南淮徐等處連年遭值災傷。朕時深廛念。所以籌畫而安全之者。亦既殫竭心力矣。今據巡撫陳大受前後奏報。阜寧。安東。山陽。桃源。海州。沭陽。清河。邳州。銅山。蕭縣。沛縣。睢寧。興化。等州縣。於本年五六月間。大雨連綿。凡低窪之處。未刈之麥。俱被水傷。已種秋禾。亦多淹浸。現在委員確勘。酌量撫恤。并借給籽種。令其補種。以冀無誤秋收等語。朕覽奏深為惻然。因思淮徐等處荒歉為憂。已經累歲。

上天慈愛下民。萬無疊降災殃於一方之理。從來和氣致祥。乖氣致異。或本地大小官吏。政治不修。愆尤暗積。或民人心術險偽。風俗澆漓。均足以上干

天和。於雨暘旱潦之間。顯示警戒。倘仍不知恐懼修省。視為氣數之適然。或轉懷怨尤之心。口出憤懣之語。則是冥頑不靈。怙過不悛。無

怪乎

天譴累加。災祲頻告。此天人感應之道。捷於影響。斷無或爽者也。用是特頒此旨。諄諭地方有司。思過省愆。以各盡父母斯民之責。豈可因已身獲戾。而使困厄及於吾民。於心忍乎。並通行勸諭紳衿百姓等。各自悚惕。痛改前非。其有力之家。毋得幸災居奇。務敦任恤之道。且彼此誠勉。同歸於善。以此上承

天意。仰報

天恩。朕知災沴潛消。必獲屢豐之慶矣。至於撫綏惠濟之方。著總督德沛。巡撫陳大受。悉心商酌。妥協辦理。隨時奏聞。毋使一夫失所。○辛未。諭京城內外水道。甚有關係。近年以來。但值雨水少驟。街道便至積水。消洩遲緩。此水道淤墊之故也。向來城內原有泡子河等水櫃數處。以資容納。而城外各護城河道。原以疏達衆流。使不致停蓄。今日久未經修濬。皆多淤墊。而街道溝渠亦多阻塞。以致偶逢

霖雨。便不能暢流。此亦應及時籌畫者。著海望。哈達哈。韓光基。舒赫德。帶同欽天監官員。逐一相度。其應如何疏濬之處。詳議請旨辦理。○署福州將軍。兼管閩海關事。策楞奏。閩海關完稅則例。米穀向不收稅。惟豆麥二項。額載每百觔完稅一分五釐。今蒙恩將各關米豆稅銀。悉行寬免。已出示曉諭各口。至二麥一項。較之豆石。更為民食所關。應否一體免稅。部文並未指明。奏請訓示。得旨。自應一體免徵者。該部知道。○戶部議覆廣東巡撫王安國疏稱。粵省山側嶺畔。有地土稍平。尚堪種植稼穡。是為次等地畝。照難墾稅畝減則之例報升。其山梁岡陲。高下不一。收成難必者。是為下等地畝。概免升科。飭令履勘。分別辦理。從之。○壬申中元節。遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。

上詣

恩佑寺。

安佑宮行禮。○諭。湖南地方遼濶。且離京路遠。部選之員。一時難到。若州縣缺出。無人署理。

未免周章。著吏部於候補候選州縣人員內。揀選十員。發與巡撫許容。以備委署試用。遇有相當之缺。酌量題補。他省不得援以為例。○工部議准。廣西巡撫楊錫紱疏稱。右江鎮標添設中營遊擊守備千總。應建各衙署營房。經陞任撫臣楊超曾題明建造。前查百色鎮城內窄狹。無地建造。應於南城外添建月城一座。城內建中營守備衙署一所。千把總衙署各一所。兵房三百間。又分建田州。汎千總衙署。

一所。兵房七十間。又分建邏村汛把總衙署一所。兵房二十二間。尚有遊擊衙署一所。把總衙署二所。兵房一百間。仍於百色鎮城內取用隙地。通融建造。從之。

大清高宗法天隆運至誠先覺體元立極敷文奮武孝慈神聖純皇帝實錄卷之一百七十

實錄卷一百七十

七

大清高宗法天隆運至誠先覺體元立極敷文奮武孝慈神聖純皇帝實錄卷之一百七十一

纂修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次戶部理

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級尋常加二級軍功紀錄一次戶部理

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆七年壬戌七月癸酉。

上詣暢春園問

皇太后安。○諭據德沛奏揚州府通判劉永鑰等稟稱高郵邵伯一帶湖河水勢加長。已將芒稻閘董家溝開放。以資利導。乃有湖西鄉民數十人。赴邵伯工次求開奉旨永閉之昭關壩。以保田禾。永鑰等諭令散去。詎刁民於次日五鼓持械聚眾。擅敢將漕隄挖動。下河鄉民搶護。兩相爭執。各有數人受傷。現批令淮揚道嚴審治罪。以儆刁頑等語。查昭關壩

係歷來定例不開之處。非朕近日降旨永閉者。德沛謂刁民持械擅開奉旨永閉之壩。此語傳聞頗有關係。然湖西刁民但顧自己禾苗。不顧下流田廬之淹浸。希圖盜開。並將漕隄開挖。此則大干法紀。甚屬不法。著德沛嚴究確情。按律定擬。不可姑息。以縱刁頑。亦不可株連。以滋擾累。至淮徐鳳穎等處。連年既苦災荒。今夏又遭水患。該督撫加意撫綏。毋令失所。自不待言。然或有無賴窮民。藉口饑饉。煽惑匪類。別生事端。亦未可定。著該督撫密為留意。查察豫防之。○工部議准。尚書韓光基奏稱。一切修濬河工。先將做法及工段丈尺物料細數。估計造冊送部。工完核實報銷者。原以杜工程浮冒之端。今天津至通州一帶河道。向係流沙淤淺。靡定糧船隨到。酌量疏挑。較之他處河工。可以豫計者。原屬有間。所用銀兩亦非正項錢糧。是以向未豫估報部。但既經題銷。自應詳細查核。若不酌定

章程。誠恐藉端浮冒。不無滋弊。嗣後每歲春初。令坐糧廳詳查所屬境內閘座隄岸等工。應行修理。確估呈報。該侍郎派員查明。即准令興修。至各處挑淺。應用器具若干。添造若干。先期詳明置備。糧艘隨到。如遇水淺處所。一面呈報。一面募夫挑挖。從之。○補行乾隆四年分甘肅省大計。不謹官二員。年老官二員。才力不及官三員。浮躁官一員。分別處分如例。○甲戌諭軍機大臣等。朕聞張楷年老耳亦重聽。朕念其居官尚屬謹慎。但恐耳目未周。可寄信與彼。令其整頓精神。辦理地方政務。勿致貽誤廢弛。又聞徽州府歙縣知縣趙本劣蹟種種。民多怨言。此係張楷就近屬員。何以不行叅奏。可一併傳諭張楷。令其訪查。如果貪婪確實。即行題叅。毋得姑容。尋據奏覆。臣年七十有三。精力已衰。實有不能周遍之處。欽奉聖訓。敬凜恪遵。竭力整頓。不敢怠忽。其歙縣知縣趙本。屢詢該管道府。俱言

居官強幹。尚無敗檢。臣差人密訪。亦未得款據。是以未經叅奏。茲奉上諭。臣復遣親信之人。前往訪查。一有貪婪實據。即行叅審。不敢姑容劣員。得旨。徒為悔過之言。不知向前奮勉。亦無益也。○乙亥。戶部議准。湖北巡撫范璨疏。報武左。黃州。鍾祥。江陵。公安。枝江。宜都。東湖。荊州。荊左。荊右。均州。穀城。鄖縣。房縣。保康。竹山。竹谿。等十八州縣。衛。雍正十二年。報墾田塘湖。及歸并屯田內。有虛捏不實。五百三十頃五十一畝有奇。詳請開除。其實在田塘湖。及歸併屯田地。五百七十三頃八十八畝有奇。照例起科。從之。○丙子。戶部議准。御史王興。吾奏。稱收糧百弊叢生。乞敕下各督撫。嚴飭地方有司。務令糧戶豫備好米。開倉即收。其本係乾圓潔淨。而借查驗之名。故意勒指刁蹬。不即兌收。以索陋規。或將潮濕細碎。及攪和糠粃砂土。不堪之米。濫行收兌者。該管上司立即嚴行叅究。從之。○江西巡撫

陳宏謀。奏請截留滇銅。以供鼓鑄。並禁止私錢。得旨。滇省銅劬。運京鼓鑄。關係輩下錢法。甚為緊要。從無外省截留之例。但念江西錢文太少。錢價太昂。較他省為甚。只得為權宜之計。況目下戶工二部。現有餘銅。足供鼓鑄。著照陳宏謀所請。應解戶工二部滇銅。截留五十五萬五千觔。以濟該省之用。該省陸續赴滇採買。仍著解京補項。他省不得援以為例。餘著該部妥議具奏。尋議。據陳宏謀奏。江西久未開鑄。民間俱用小廣錢。又攪搭剪邊。鶩眼砂板等錢。奸徒貪利私鑄。到處囤販。惟有亟開鼓鑄。制錢日充。私錢可以禁止。擬先行出示曉諭。定以三月之限。令將一應私鑄錢。盡數繳官。給價收買。攪搭鼓鑄。至小廣錢。乃舊鑄之錢。銅質原好。行用已久。仍聽照常行使。而新錢廣行之後。止將小廣錢量為減價。不得與大制錢相等。則新舊大小。原可兼用。應如所請。從之。○定邊左副將軍額駙策

凌秦準噶爾逃出黑龍江馬甲拉齊賚並投降之厄魯特都噶爾照例賞給盤費衣服派藍翎侍衛佛保馳驛護送進京報聞。○江蘇巡撫陳大受疏報靖江縣乾隆五年丈勘新坍田一項二十一畝有奇新漲田三項四十六畝有奇。○丁丑。

上詣暢春園問

皇太后安。○戊寅諭江安二省之淮徐鳳穎各屬連年被水歉收朕心廑念屢頒諭旨蠲賑頻施不使小民失所昨又降旨將江省之清河桃源安東銅山沛縣宿遷蕭縣邳州睢寧徐州衛海州沭陽安省之宿州靈璧虹縣臨淮懷遠泗州五河十九州縣衛被災各戶所有乾隆五年以前未完帶徵銀兩統行停緩俟各處年歲屢豐之後該督撫再行酌量定限分年帶徵具奏請旨朕思上下兩江十九州縣衛被災既重所有乾隆五年以前未完帶徵銀兩既已降旨停緩其未完帶徵緩徵

漕項銀米事屬一例亦著一體停緩俾小民無追呼之擾再查乾隆六年山陽阜寧清河桃源安東銅山沛縣邳州睢寧蕭縣宿遷豐縣碭山海州沭陽並淮安大河徐州三衛應完乾隆六年漕項銀米經巡撫陳大受奏請緩至今冬帶納朕已俞允今聞淮屬山陽等處夏麥被水又復歉收即將來秋禾豐歉亦尚未定若將新舊漕項一歲並輸民間未免拮据著將山陽等十八州縣衛各災戶未完乾隆六年漕項銀米本年仍緩輸將俟乾隆癸亥年起分作五年帶徵以紓民力著該部遵諭速行。○貴州永寧州屬頂營司土官羅嵩病廢以其子羅經都襲職。○己卯大學士鄂爾泰等奏莊親王等議覆御史徐以升奏稱鄉飲酒禮所以敬老尊賢會典載儀注未及詩樂請撰擬樂章以追古制固屬應行但鄉飲酒禮應歌鹿鳴魚麗等本詩章句今若另行撰擬恐蹈宋淳化故轍如所謂鹿鳴呦

叨命侶與儔。關雎于飛。于渚之湄者。後人往往訾議。請交與律呂正義館。將儀禮所載鄉飲酒禮應歌之詩。照現定樂章字譜之式。纂輯等語。應如所請。交該館辦理。俟樂章書成。交順天府。令諸生演習。以襄大典。再查直省各學樂舞生。皆有定額。給與衣頂。不許雜項人等冒充。京師為首善之地。如果諸生中有嫻通雅樂。供應文廟聲容合節者。亦應如所請。令該管官咨送學臣。係附升增。係增升。廩

係廩升。貢至所稱成均。丁祭所用樂章。已經撰定字譜。請交國子監。令諸生演習。倘能者日多。可用監生承應等語。亦應如所請。俟學習果有成效。再議獎勵從之。○吏部帶領九卿保舉國子監助教學正人員。引見得旨。國子監助教員缺。著陳淦補授。學正員缺。著曹發先補授。此內左通政龔學海。所保之龔光海。係伊胞兄。龔學海人原平常。如何可比。祁奚。龔光海亦非祁午可比。何得假內舉不避

親之名。輒行保送。此風斷不可長。龔學海著交部察議。尋議照徇情例。降二級調用。從之。○旌表守正被戕之江西省寧州民廖會文妻溫氏。○庚辰。訓飭慎重計典。諭國家舉行大計。乃三載考績。黜陟幽明之要典。督撫大臣。職司其事。必當秉公去私。杜絕請託。精明鑑別。無黨無偏。舉一人而眾皆知勸。劾一人而眾皆知儆。則官方以肅。吏治以清。百職備舉。而民生共受其福矣。昔我

皇祖

皇考嚴降諭旨。訓飭再三。乃朕見近來各省計典。頗有視為具文。苟且塞責者。或賢員不行薦舉。或劣員不行糾參。或就目前之一端。而不察其居官之素。或任一己之愛憎。而不參乎輿論之同。又或庇護私人。瞻徇情面。而使貪墨不職之人。姑容在位。祇將教職及佐雜微員。草草填註。以充其數。所謂旌別淑慝者。安在乎。督撫受朕股肱心膂之寄。於此等切

要政務等諸泛常。朕將何所倚賴。今年乃大計之期。用是特頒諭旨。各督撫等務精白乃心。矢公矢慎。以肅鉅典。倘有仍蹈前轍者。經朕訪聞。或被科道糾叅。必當加以嚴譴。該部即通行曉諭知之。○又諭。修理京城內外河道溝洫。著原任副總河定柱。一同辦理。○又諭。軍機大臣等。據河南巡撫雅爾圖奏稱。六月初十等日。雨水較大。鄰河州縣內。如開封府屬之鄭州。中牟。鄆陵。歸德府屬之永城。鹿邑。夏邑。陳州府屬之淮寧。商水。西華。沈邱。項城等州縣。間有被水村莊。現在尅期查辦等語。近又有人奏稱。河南地方。多有積水未消。而考城一縣。甚至經冬不涸。於田疇尚無妨礙。朕思中州地勢平行。向來溝洫未通。以致雨水稍多。低窪處所。便至積潦難消。雖據稱無礙於田疇。但水道關係民生。務宜急早修舉。俾早潦有資。可寄信雅爾圖。令其留心相度。通盤籌畫。次第辦理。尋奏豫省地勢平行。

土性虛鬆。一切河道溝渠。旱乾則沙隨風起。每多壅塞之虞。霪雨則土隨水塌。又滋淤填之患。臣於乾隆四年蒞任。正值水災。後到處俱有積水。當即飭屬相度勸導士民。分別疏濬。如安陽縣修復萬金渠。灌田十六萬畝。濬縣修復西十里鋪環隄衛田三萬六千餘畝。河內縣修復利仁豐稔等河。灌田七萬餘畝。又開封府之中牟縣。南陽府之南陽等十三州縣。河南府之鞏縣。孟津。新安。三縣。汝寧府之汝陽縣。導水灌田。共改種水田一萬八千餘畝。此三年來辦理水道之情事也。第以開歸陳等屬。地當下游。其積水未消之處。多係鄰近黃河。緣大隄內外。修做工程。挖土成坑。雨水積聚。此種地土。豁免錢糧。於民生並無妨礙。再考城縣地勢低窪。每年黃水漫流。無路宣洩。現已開溝一道。由商邱縣楊家堂。歸入黃河。無經冬不涸之患。又夏邑縣環城亦有積水。緣地勢極低。四面高阜。不通河道。原

未占礙民田而土性苦鹹就令消涸亦難種植至此外水道可以備旱潦而資蓄洩者臣承聖訓周詳自當詳慎辦理得旨覽奏似覺所言頗是若實難宣洩亦止得聽之但汝應留心詳察酌量可為則為之朕不怪汝不留心地方若避此而為飾詞則不可耳 又諭禁旗人飲酒入園館者原欲革除不善謀生於無益之處妄行糜費習氣俾於生計有益耳。今聞各旗大臣派出人員於街道巡察有值班當差人等入鋪買飯者俱行捉拏且有嚇詐被獲之人索其飲食而釋放者夫兵丁值班離家遙遠買飯乃其常事以此為犯法俱行捉拏寧令兵丁枵腹值班乎此皆各旗大臣奉行不善過為已甚之所致也著交各旗大臣除將妄入園館飲酒者嚴加查拏外其委係當差值班人等入鋪買飯者不必查拏○辛巳準噶爾部人斡克斡克穆爾來降命賞給安插如例○兵部議准熱河副都統

達爾黨阿奏稱寬城驛漢站設把總二員外委二員伏思內地驛站事繁管站止驛丞一員今寬城一驛馬僅六十匹又無差務應裁把總外委各一員再漢站既設把總若不給與陞路老於臺站不無生弊請嗣後人材騎射可觀誠心辦事者咨送督提考驗補放千總以示獎勵把總員缺在臺站外委壯丁內挑補再寬城驛原設牛三十頭車三十輛查一年差使無多且牛車遲緩似屬無益請將車三十輛抽撥十輛給喜峯口驛留車十輛給寬城驛其原設牛裁去不必添馬即於各本站六十匹馬內挑選十匹應差從之○壬午

上詣暢春園問

皇太后安○諭太原著富昌前往考選河南著永興前往考選再河南巡撫雅爾圖奏稱今歲考選係軍政之年駐防河南滿洲官兵例應遣大臣考察請將臣標營兵丁及臣操演

過鎮標兵丁亦一併驗看等語著照所請將綠旗兵丁一併查驗○癸未

上御勤政殿聽政○諭大學士等江南下江之淮徐揚州等處上江之鳳潁泗州等處屢被水災民人困苦朕心深為廕念今春特遣侍郎周學健會同該督撫加意撫綏始不至於失所今聞上下兩江去年受災之所六七月間復被淹沒田禾似此饑饉迭告小民其何以堪朕已切諭該督撫等急為賑卹妥協辦理但思兩江要地水潦頻仍固因近年雨水過多亦由地勢低窪宣洩容納經理無方之所致再四思維高斌深諳河務且久任江南於地方事宜亦所熟悉著伊同周學健前往會同德沛完顏偉陳大受張楷將一應賑卹水利之事確查詳議具奏請旨務救目前之災荒永除將來之水患即從前周學健所奏水利各摺部議行令江南總河督撫查議想伊等亦未必即能籌畫妥協亦著高斌周學

健會同查勘定議議定之後高斌先行回任將應辦之事著周學健暫留江南會同督撫辦理俟大局已定周學健亦即回京此旨到日著高斌來京請訓直隸總督印務著史貽直前往署理○又諭今年糧船北上時適值河水淺涸各船盤剝加絀實多繁費運丁力量艱難只得借支庫銀以為歸途之用將來照例扣除還項查江西南昌等幫借銀四千四百兩江南興武等幫借銀一千七百零四兩揚州等幫借銀一千七百九十二兩朕念今歲運丁艱苦甚於往年著將所借銀兩悉行賞給免其扣還此係格外之恩後不為例該部即傳諭倉場侍郎漕運總督知之○兵部議覆西安將軍綽爾多奏稱副都統彭珠誤揭屬員應行降調得旨彭珠著來京候旨○又奏寧夏副都統佟山年老乞休得旨佟山著原品休致○甲申諭大學士等內地米穀偷載出洋例有嚴禁昔我

皇祖

皇考訓諭地方文武官弁至再至三。但恐日久法弛人心玩忽。上年冬月巡撫陳大受奏稱。崇明一縣坐落海邊。舊例准其採買鄰近地方之米及查考清冊。竟有指稱崇明多買並不裝運回崇發賣者。是其私販下海情弊顯然。用是再頒諭旨。著沿海地方之督撫提鎮等。轉飭文武官弁申明禁約。實力奉行。務絕偷越之弊。倘或視為具文。仍有疎漏。經朕訪聞。必於該督撫提鎮是問。○又諭前因西安將軍綽爾多副都統達色不相和睦。於交查之事多執己見。具奏朕曾降旨訓飭。近聞綽爾多達色等仍不相睦。辦理諸事掣肘。甚至不相往來。綽爾多等身居將軍副都統重任。一同辦事之人。理宜屏去私意。和衷共濟。今乃至不相往來。成何體統。伊等果能以公務為要。認真辦理。縱有私相不和之處。亦可渙然冰釋。若似此光景。非惟於人臣之道有乖。

其何以整飭地方。表率僚屬耶。朕雖降旨調取副都統達色彭珠俱著來京候旨。現在彼處之舊人及遣往新任之大臣等。仍係一處辦事。綽爾多等倘仍前不知悛改。不惟公事無益。亦大負朕委任封疆重寄之厚恩矣。將軍綽爾多等著寄諭嚴加申飭。嗣後務須屏除私意。諸事相商。和衷共濟。妥協辦理。若仍懷挾私意。經朕聞知。定將伊等從重治罪。決不輕宥。○九卿會議刑部奏稱。查律內監守及常人盜倉庫錢糧。通算併贓論罪。受枉法贓。各主者通算全科。受不枉法贓。各主者通算折半科罪。是凡言通算者。皆據現在發覺之贓。分別擬罪。此外並無將已經治罪之前案。因其累犯。通計前贓擬罪者。至竊盜本律更載明以一主為重等語。是一案內竊有數主之贓。並不通計。若因其三犯而將其初犯再犯。已經治罪之贓。仍行通計。實覺罪有重科。與律未協。查前雍正十一年九卿議覆原

署刑部尚書張照條奏三犯竊盜原題雖有通計二字並未指明通計前兩案之賊且律例館新定例內已不將通計二字載入蓋竊盜三犯原律擬絞今既改輕則通計三犯之賊以重其罪雖亦三細不宥之義但與他律論賊不符況查竊盜五十兩祇杖六十徒一年今三犯五十兩以上即擬以絞候已加原律八等五十兩以下至於但得財者自杖一百以下至杖六十今三犯則五十兩至三十兩即議以發遣三十兩以下至十兩即擬以充軍最輕如十兩以下至於纖毫亦皆擬以滿流已各加原律八等至十二等祇下死罪一等亦不為輕似不必通計前案所竊賊數而多納之於死等語應如刑部所奏嗣後竊盜三犯俱按第三犯所竊賊數多寡悉依律例館奏定原文分別軍流遣絞無庸通計前賊再刑部奏稱從前議覆各省三犯竊盜有似前項通計前賊絞候之案於秋審時酌其

情罪擬以矜減等語亦應如所奏俟秋審時臣等公同核議擬以矜減從之○以待讀學士張灝左春坊左庶子嵇璜充日講起居注官○乙酉

上詣暢春園問

皇太后安○諭大學士等福建士民素稱刁悍通省習氣相同而漳泉為尤甚向來罷考罷市喧鬧公堂種種不法所在多有近竟有漳浦民人持刀刺死縣令之事似此藐法逞兇為從來所罕見此固該犯之賦性暴橫然亦閩省官員溺職素餐既不能化導以感發其天良又不能董戒以開通其愚昧及見民俗囂陵干犯法紀則又為之蒙蔽掩藏希圖省事以致姑息養奸積成惡習遂大出乎人情國法之外矣著該督撫嚴飭有司力為整頓教之以親上敬長示之以改過遷善其不率教者即時寘之於法并令伊父兄族長嚴加管束去其躍冶之習如無父兄族長者令鄉

保多方查察勸導之。倘仍不知悛改。父兄族長鄉保。即時舉報。按律究懲。如或有意縱庇。及曲為容隱。查出一併治罪。夫不教而殺。謂之虐。閩省督撫。平時亦曾有意於教乎。有司管轄地方。原期除暴安良。化民成俗。以盡父母斯民之職。始不負國家之簡用。倘玩愒因循。苟且塞責。平時不能教導。有事又復姑容。該督撫即行糾參。從重議處。其他因地制宜。移風易俗之道。仍著該督撫悉心籌畫。妥酌施行。○又諭軍機大臣等。朕聞本年六月初旬。有漳浦縣民賴石。將該縣知縣朱以誠。持刀刺割咽喉斃命。該管上司。現將賴石嚴拏看守一事。部民殺死本管官。事關風化。該督等自必按律究擬。具題完結。但其起釁之由。未能深悉。或漳俗民情。自來兇悍。此事因詞訟起見。兇徒挾讐肆橫。係一人之私忿。或因聚眾抗糧不法等事。議出一人為首行兇。則係眾人之合謀。此事甚有關係。固不可縱惡。

養奸。以長刁風。亦不可株連擾眾。以滋事端。可寄信那蘇圖。令其善為辦理。再今歲春間。彗見於天。在閩疆分野。今適有漳浦縣民人殺死縣令之事。未必非其應驗。可令該督每事謹慎。毋致滋事。至此案起釁緣由。令其即速查明奏聞。尋據奏覆。漳浦縣地方。奸惡兵民。結有小刀。子龍二會。糾黨滋擾。該故令朱以誠。拏獲數人。正在審究。有會首蔡懷李珠等。恐一併被拏。同謀指使賴石。將朱以誠殺死。臣已拏獲兇犯。嚴審究擬。詔安縣又有奸民陳作。謠言聚眾。亦即擒獲訊辦。查閩省人情。既多狡詐。而積習驟難轉移。地方遇有大案。持之過急。既恐變生意外。操之稍緩。又慮墮其術中。惟在慎密以防維。周詳以應事。庶幾潛移默奪。地方無驚擾之虞。得旨。所見甚是。勉力為之。○戶部議覆。湖北巡撫范璨疏。報。漢陽府屬之漢川縣。安陸府屬之潛江。沔陽。天門。荊門。四州縣。并沔陽衛。德安府屬之

雲夢縣。荊州府屬之江陵監利二縣并荊州。荆左二衛。襄陽府屬之襄陽縣。於本年五月內。或因河水泛漲。或因雨水漫溢。低窪田地禾苗多被淹沒。廬舍人口亦有損傷。又襄陽府屬之襄陽棗陽穀城三縣并襄陽衛。於本年四月內。因風雨驟至。內帶冰雹。粟穀棉豆均有折傷。應請查明被災軍民。先動庫項并倉穀。分別撫卹。其應完地丁屯餉錢糧。暫停催徵。應如所請。從之。○監察御史納拉善奏。直省各關米豆額稅。永行蠲免。恐於國計有虧。請照舊徵收。得旨。各省米豆關稅。朕特沛恩施。全行免徵。納拉善乃欲屯膏。仍行照舊徵收。所見甚屬紕繆。豈稱言官封駁之職耶。著該部嚴察議奏。尋議。照溺職例革職。從之。○補行乾隆四年分甘肅省大計。卓異官四員。分別陞賞如例。○丙戌。戶部議准。江蘇巡撫陳大受疏報。江浦六合山陽阜寧清河桃源安東淮安大河興化銅山沛縣蕭縣邵

州宿遷睢寧海州沐陽共一十八州縣衛。雨雹水溢。傷損二麥秧苗。且各州縣衛除興化一縣外。皆係上年被水之後。補種秋禾。俱屬艱難。請於常平項下。借給籽種工本口糧。其山阜清桃安五縣被災更重。極貧之民。除飭先行撫卹一月外。應請再行加賑兩月。次貧之民。應請普賑一月。坍倒房屋。照例給銀修葺。淮太二衛被災飢軍。其舊欠錢糧。暫緩催徵。一體分別賑卹。從之。○是月。總督倉場侍郎宗室塞爾赫等奏。紹興前後兩幫沿途起剥。耗費過多。請照例每船借支銀八兩。以資回空。又江興等衛湖北二三兩幫。實因漕河水淺。運丁艱苦。其起欠米石。請將各丁應得餘米抵補。嗣後不得援以為例。得旨。著照所請。該部知道。○奉天府府尹霍備奏報。各屬被溺。撫卹情形。得旨。覽。賑卹之事。妥協為之。○直隸總督高斌奏報。永定河工。伏汎平穩。情形得旨。朕正在此廛念。覽奏稍慰。但所奏

似覺稍遲數日耳。○兩江總督宗室德沛安徽巡撫張楷奏報臨淮鳳陽懷遠靈璧虹縣五河宿州壽州鳳臺泗州盱眙天長蒙城太和霍邱潁上亳州等處田禾被淹已動撥司庫銀十六萬兩分解撫卹得旨所奏俱悉賑卹之事竭力查辦毋濫毋遺以救災黎可耳。○又奏長淮衛鳳陽衛霍邱五河等縣衛續報被水豫籌撫卹得旨知道了亟力撫綏之較之去年災傷究為如何據實奏來。○德沛

又奏親赴揚州督賑得旨卿既親來督賑亦好妥協為之至於河工重務則不可掣肘也。○又奏古溝湖水衝決高郵邵伯興化鹽城俱被水患現在設法宣洩加意撫卹得旨所奏俱悉與完顏偉和衷妥辦河工之事是其所悉也至江南通省水利已有旨命高斌前往查辦矣。○江蘇巡撫陳大受奏淮安府屬之鹽城縣被水勘明撫卹得旨務使災黎不致失所庶少慰朕南顧之憂耳。○又奏徐屬

連年災祲今夏二麥甫收因水減歉且自六月以來陰雨連綿收成有限其不能導涸者一望汪洋有田之民固覺艱窘無田者甫賴皇仁賑至四月得延殘喘又將噉噉待哺恐致流離失所臣已飭道府率同州縣細查擇極貧下戶給一月口糧其被水之區有願借領籽種工本者照給倒坍房屋分別給資修葺露處之戶令擇高阜處所搭棚棲託查准北民風麥收之後恒多外出若係被水人戶例當安插毋令流移亦經飭行地方官酌量料理得旨江南連歲水災民多失所我君臣不可不深自警惕若賑卹之事不能妥辦是益增罪戾矣朕既引為已過誠願汝等督撫大吏體朕如傷之心以救災黎耳。○又奏古溝東壩漫決水勢奔騰高郵邵伯上下塘俱漫溢田廬被淹下河之興化泰州鹽城悉罹水患銅山縣邳州續又被水臣已詢商河臣完顏偉督臣德沛逐一查辦得旨今年水勢

誠異漲也。非河臣之咎。亦非汝督撫之咎。皆朕不德。不能感召。

天和。以致地方百姓連年被災。但一切賑卹料理事宜。若不妥協。則汝等莫可辭其責矣。諭到。可令河臣督臣與欽差大臣共觀之。亦將朕意宣示百姓可也。○又奏親往高寶等處安撫災黎。動撥銀穀賑糶並行。得旨。所奏俱悉。一切賑卹事宜。竭力為之。以副朕飢溺之懷。○又奏上年監臨文闈失察。謝留任恩。得旨。覽若不知改過。以圓通為得計。則不可也。○漕運總督顧琮奏。江廣幫船抵通稍遲。現在節節催攢。起卸回空。得旨。若早能如此料理。今年漕船何得遲誤。此皆汝柔善沽譽之咎。今亦知悔否乎。若再不努力。朕恩不可屢邀也。戒之。○江南河道總督完顏偉奏報。洪澤湖水勢漸退。高郵邵伯湖水宣洩情形。得旨。朕正為此屢念。今覽奏稍慰朕懷。古溝東壩一閉。即速奏聞。以慰朕南顧之憂。○又奏

報黃河水勢漸消。洪澤湖水加長已定。各工搶護平穩情形。得旨。以手加額覽之。○兩淮鹽政準泰奏。淮北各鹽場蕩地鹽池盡被水淹。竈戶停掃。一面委員查勘安撫。一面令運司籌撥銀米。速飭分司等查明災竈。先行賑卹。其沿河廬舍多被水浸。現委人員分查失業各戶。量動閒款銀兩。酌加周卹。以免流離。得旨。所奏俱悉。一切情形。不時奏聞。○又奏揚郡米價驟貴。請以鹽義倉積穀撥發江都甘泉兩縣。於城外四廂設廠平糶。比照市價。每石減銀二錢。得旨。如此料理。甚慰朕懷也。○安徽巡撫張楷奏。鳳潁泗三屬被水。已動撥司庫銀十六萬兩。分解有災地方。動用給散。誠恐州縣辦理不當。或有粉飾隱匿。臣於九月開賑之初。即前往查察督率。務使飢民均霑實惠。得旨。所奏俱悉。救災如救焚拯溺。刻不可緩也。○江西巡撫陳宏謀奏。興國縣猝被水災。已飭動項賑卹。給銀葺屋。其聯界

之贛縣。寧都。瑞金。及吉安府屬之萬安。龍泉。南安府屬之大庾。俱因雨大水發。間有衝損。飛飭確勘。一體撫卹。得旨。覽被水災黎。加意撫卹。毋得視為偏災而忽之。○又奏。興國縣被水災民。俱已賑卹安頓。至萬安。贛縣。寧都。龍泉。西州縣。被災較次。亦經動項撫卹。其瑞金。大庾。泰和。雩都。廬陵。德化。湖口。等縣。被災更輕。悉已酌量撫卹。交秋以來。各屬水勢漸退。晚禾茂盛。米價亦不昂貴。得旨。覽奏稍慰朕懷。○浙江巡撫常安奏。覆潮勢浩瀚。無若春初秋末。臣因老鹽倉最險之處。漲沙無存。黃山以西。雖有漲沙。時長時消。寬窄莫測。亦且未過秋汛。不敢遽謂可恃。六月間。臣以伏汛緊要。現修石工。親身踏看。直至乍浦回省。是以多日未經奏事。所有奉旨詢問塘工情形。理合奏聞。得旨。欣悅。覽之。○又奏。浙江麥秋既熟。早禾復稔。晚禾亦屬有望。惟淳安縣分水縣。安吉州。等處。山水驟漫。不無衝淹。已

飭加意撫卹。至江塘海塘工程。現俱平穩。得旨。覽奏曷勝欣慰。○湖廣總督孫嘉淦奏。楚省江漢經流。湖澤渚匯。百姓多從水中築垸為田。一有漫溢。遂失生計。臣今春巡視苗疆。凡經過有隄之處。俱行相度。竊見大江兩岸。多有小山。土岸本高。而所築之隄。去水頗遠。故衝潰尚少。惟漢水自襄陽至漢陽。皆走平原。溢為潛沔。旁無岡阜。以為畛域。百姓生齒日繁。圩垸日多。凡蓄水之地。盡成田廬。只留一線江身。兩岸築土隄束之。當築隄時。不善相度。緊逼水涯。不留尺寸地。以予水。故水與隄日相切摩。而所築之隄。又未夯礮堅實。皆係浮土堆成。累年歲修。因艱於取土。虛應故事。甚至將隄身草皮剝去。以充新工。徒煩民力。無裨實用。是以荆襄安漢諸府。無年不有水患。臣查湖廣無專司水利之大員。道府等官。各有分界。不能通身相度。再湖廣隄工。凡歲修小工。皆用民力。若普興大工。必需用項

幫修。又天門、沔陽、潛江、監利等處。今夏被水處甚多。既有偏災。兼當以工代賑。似此既用民力。又動帑項。必須相度妥確。詳慎辦理。乃可無冒濫滋擾之弊。臣擬於秋分水涸後。親往荊襄等處。將江漢隄工。通身相度。通盤計算。所用民力幾何。需費國帑若干。若一年可以普修。則於今冬修築。若工程繁多。不能一時完竣。則酌分緩急辦理。得旨。卿所見甚是。而於水利情形實未悉。若以直隸治河之術。施之湖廣。則不可之大者。○湖南巡撫許容奏。攸縣、醴陵、茶陵、鄱縣、衡山、華容、益陽、沅江等八州縣被水。已飭會勘撫卹。給銀葺屋。得旨。所奏俱悉。被災難民。加意賑卹。毋使一夫失所也。○又奏。永順協應支兵米。雍正七年設營之初。每石折銀六錢。雍正八年。總督邁柱。以彼地產米稀少。兵丁不敷買食。奏請增給四錢。乾隆二年。巡撫高其倬。以永順地方常年米價。以銀一兩。不敷買米一石。奏請借

動公項銀二千四百兩。買貯米石給兵。但近倉之兵。支領甚易。遠汎之兵。曠日需費。今願買食雜糧。莫若全支折色。因時制宜。於兵丁實為便易。得旨。依議。○山東巡撫晏斯盛奏。查拏老瓜賊。從前撫臣奏請於大道通衢。令汎守兵目。徹夜遊巡。並令州縣派撥民壯。按更印取巡兵姓名。呈報該管文武。以稽勤惰。誠為立法嚴密。但老瓜賊狡獪。乘虛竊發。保無將其故智。移於僻路。以害途人。更或扮為僧道技流。以伏村落。臣請於偏區僻壤。查有墩汎者。亦照前例一體遊巡。如無墩汎之地。應令各該州縣派委佐雜。帶領民壯鄉保。分地巡查。似更整密。再緝盜之法。前撫臣於通省州縣內。選委八員。名曰分統。分拏盜賊。又委巡道三員。以為總統。考覈勤惰。復委知府數員。以為兼統。稽查捕役。又於捕盜同知通判內。遴選才能之員。分帶幹役。四散查拏。臣思府州縣官。均有地方之責。庶務紛繁。至於

詰奸禁暴。職分當為。所部內自不容其稍諉。若所部外併責之。實屬鞭長莫及。臣請將所委州縣分統之任。歸併委巡之同知通判。將知府兼統之任。歸併總統之道員。庶事權不致紛歧。而府縣等官。仍令專任巡緝。如知有匪徒潛匿別境。即差捕密拏。如委巡官役。生事擾民。立即揭叅。再察緝而外。尤莫重於保甲。應專責州縣嚴查。並知府督率。務使比戶有稽。逐保無隱。匪徒一入。即行舉首。一切宵小。可期盡絕。得旨。所奏頗妥。但須實力行之。○又奏。邪教惑民。最為世道人心之害。欲正人心。必先息邪說。而邪說之最易煽惑鄉愚者。莫如創立教會。佯修善事。此倡彼和。蔓延日廣。大為風教之害。臣抵任後。詳查各案。多屬鄉愚。誤被惑誘。若盡法深求。則株連延蔓。恐生事端。請將創教授徒。及為首斂錢之犯。嚴拏究擬。其被誘入教。僅止拜佛持齋者。量予責懲。令其歸正自新。自行出首者。照律免

究。仍令地方官不時查察。勤加化誨。得旨。自應如是辦理者。○又奏。東省雨澤頻仍。嶧縣。郟城。蘭山。霑化。武城。諸城。濰縣。昌邑。高密等。及德州。衛地。均有被水之鄉。分別先行撫卹。並給銀葺屋。得旨。其有成災之處。應賑卹者。妥協為之。○河東河道總督白鍾山奏。豫省南岸鄭州來童寨。虞城王家樓。皆係舊險。節年倍用帑料。修守無虞。今七月初五至初八。河水陡長。大溜全歸新挑引河。兩處俱現淤灘。多年大工。化險為平。來年可省料物千百萬觔。此實聖德懷柔。河神默佑所致。得旨。以手加額。欣悅覽之。○川陝總督尹繼善奏。準噶爾夷人回巢至肅。先欲將葡萄等物。硬行留下。為將來藉口之地。及見不肯留貨。許幫馬駝。令其駝回。遂計無可施。請願減價出售。雖反復無常。原係夷人故智。但遠來之貨。令其駝回。本非出於不得已。今既肯減價與商民交易。兩相情願。允其出售。亦屬一時權宜。臣

與撫臣黃廷桂商酌料理。任夷人詭計百出。凡事據理酌中。於寬厚之中。仍寓節制之道。得旨。所見甚是。夷使自來。亦有旨諭彼也。○署西安巡撫岱奇奏。秋禾茂盛。糧價平減。督臣尹繼善赴滇。查勘金沙江通川河道。地方一切事宜。臣益當盡心料理。不敢稍懈。得旨。所奏俱悉。督臣遠去。汝應奮勉辦事者。看來汝總以安靜姑息為得計。恐未必永久受此益也。戒之。○甘肅巡撫黃廷桂奏。甘省狄道州。寧遠縣。西固廳。中衛縣。被水衝漫。田禾被淹。房屋坍塌。已飭各屬分別賑卹。得旨。知道了。被水處所。雖係偏災。亦應加意撫卹。蓋甘省非他省可比也。○甘肅布政使徐杞奏報河東河西。被雹輕重情形。得旨。所奏俱悉。其被災之處。與撫臣商酌。加意賑卹之。○安西提督永常奏。準噶爾進貢夷使吹納木喀等。由沿邊寧夏一路回巢。經過哈密。其留牧馬駝。倒斃者。照數賞給。至病乏駝隻。餘剩馬匹。

及葡萄礪砂等物。飭與客商官兵等交易。起身回巢。得旨。所奏俱悉。但夷使馬駝之事。微覺失寬了。尹繼善所見甚正。可將此摺與彼觀之。○四川提督鄭文煥奏。建昌一鎮。所屬越雋。寧越。永定。靖遠。會鹽等營。隸有土司番部。當日輸誠歸化。認納夷糧。自二三百石至四五百石不等。緣地瘠山深。即令該營就近徵收。報充兵丁應支本色。必須斗斛公平。不得多增升合。乃訪聞各營。立有鼠耗斗口名色。兼以淋尖踢斛。每斗浮收至三四升。約計每年多徵至五六十石及百石以外者。據稱豫備荒歉。恐夷人遷徙抗欠。難以催徵。竊思邊遠番獮均屬朝廷赤子。何忍苛徵。雖豐年多獲。亦不應豫計歉收。先為盈取。所有一切濫收陋弊。應嚴行禁革。得旨。好。勉力為之。○廣東按察使潘思渠奏。雨水調勻。豐收豫兆。得旨。欣慰覽之。但不可因朕祈年念切。而有所文飾於其間也。○廣西巡撫楊錫綬奏。從

前粵西義寧苗徭不法。動兵擒勦。分石村龍勝。卑子堡三路。石村一路。官兵共五千一百員名。向例官兵百名。用隨營長夫四十名。每名日給銀八分。長夫見逆苗克橫。大半逃匿。時監紀右江道李錫泰。提臣譚行義。尅期進勦。苗民投順者衆。即令隨營輓運。酌給口糧。以故民夫多逃。而軍事無誤。今軍務告竣。計實節省銀一萬有奇。據李錫泰稟。若據實開除報銷。即成例案。萬一將來邊疆用兵。援以為例。則辦理勢必掣肘。請將此項存貯二千兩於司庫。以補本案軍需。額外用去不能開銷之項。其餘銀八千餘兩。請以四千發交新設龍勝通判。儘數買穀一萬石。建倉積貯。即為龍勝常平。以備平糶賑卹之用。其餘酌發積穀尚少之州縣。買穀貯倉。則錢糧仍歸實用。而輓運章程。亦不至輕有變易。得旨。照此奏辦理亦妥。李錫泰傳旨嘉獎之。○署雲南總督雲南巡撫張允隨奏。各營千把總外委

實錄卷五十一

十一

盛甲。什無一二。飭於存營公費。及馬價餘銀內。動支製造六百四十八頂副。存貯標營。作為交代之項。又藤牌粗重。滾跳不靈。不若粵中所製。堅緻輕便。亦令順製千餘面。補給得旨。知道了。應整頓者也。○又奏。起程前赴金江。會同川陝督臣尹繼善。欽差都統新柱。相度開修機宜。得旨。所奏俱悉。朕所以令汝等面議者。亦恐互相推諉。事終無成耳。今汝三人。覲面相商。和衷共議。必有一定之論。斷無兩可之謀。可將朕此旨共觀之。

實錄卷五十一

十一

大清高宗法天隆運至誠先覺體元立極敷文
奮武孝慈神聖純皇帝實錄卷之一百七十一

實錄卷一百七十一

三

大清高宗法天隆運至誠先覺體元立極敷文
奮武孝慈神聖純皇帝實錄卷之一百七十二

敕修

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉 一

乾隆七年壬戌八月丁亥朔祭

先師孔子遣和親王弘晝行禮○諭各省州
縣考試童生乃士子進身之始文武雖有殊
途各宜秉禮自愛以敦士風朕聞粵東俗尚
澆漓每遇生童齊集考試之時或赴攤鋪短
價強買什物或與市人扭結稟官稍不遂意
即恃衆囂喧挾制罷考地方有司視以為常
每多寬縱今聞得高州府石城縣本年五月
間考試文武生童有武童李之萊赴考被蒙
姓民人拾去馬箭一枝比時稟知縣令已諭

典史查追給還。而諸生以知縣不能立刻拘責洩忿。於本日上燈時。乘縣署月臺下失火。遂有武生林翰芝。武童林翰權及李芬源等擁進宅門。攫取衣服錢文而散。現據該地方官查究。尚未結案。又聞電白縣考試武童外場。因馬道擁擠。喝逐閒人。有武生扭役毆打之事。又右翼鎮親赴教場操演。有武生不衣不冠。雜入衆中。擁攬馬道。驅令遠立。遂毆打兵丁。肆行詈罵。似此身列宮牆。不遵禮教。轉恃青衿。以為抗法橫行之具。士習如此。風俗何由而淳。此皆地方大小官員。及學政教官。平時不能化導之所致。用是特頒諭旨。著該督撫學政等。董率有司教官。嚴切訓諭。務令士子等洗心滌慮。痛改前非。倘冥頑不靈。仍不率教。即按律懲治。不稍寬貸。如官員等有徇隱姑縱者。一經查出。定行分別處分。○諭軍機大臣等。白鍾山題請挑挖引河一本。其註語內有甚屬危險字樣。覽之。深厯朕懷。其

實乃係挑引河以防險。非現在即屬危險也。在伊不過據屬員詳語。寫入本章。細心辦事者。不當如是。爾等可寄信白鍾山。嗣後遇有題報河工修防事件。總當據實題報。不得稍存粉飾。亦不得張大其詞。尋據工部議准。河東河道總督白鍾山題為河勢坐灣太深。各工危險甚急。詳請挑引分勢事。緣河南南岸鄭州中年一帶。地居上游。在在險要。其下游中年九堡對岸沙灘。河頭河尾。形勢俱順。先經題請興挑。現已引溜成河。唯上游來童寨對岸沙灘。彼時尚未坐灣。故未議挑。今上灣姚五家莊河頭。有吸川之形。下灣侯七家莊。復有建瓴之勢。急應挑挖引河。俾河身直順。得旨。依議速行。○戶部議覆署理陝西巡撫岱奇疏稱。商州并所屬地方。有隙地三萬餘畝。除無業主者。官為招墾。其有主而情願自墾者。不必勒以年限。祇令勸諭開墾。如欲留作墳塋房屋之用。亦聽民便。至有主而先願

自墾後或力有不能亦准續行呈官出示招墾有願承墾者該鄉地同業主墾戶查驗地畝議定價值官為給照其地即給墾戶為業所議之價除有力者現交外其稍有力之家以二年或三年清還如期限已滿墾戶他去既不墾地又不清價亦許地主呈明移知原籍追照送銷如本人他去無憑著追即取原保之戶鄰甘結存案另為招墾仍聽地主議價交業日後不得仍執前照復爭應如所請

從之○緩兩淮泰州分司所屬廟灣場被水竈戶新舊額徵並分別賑恤○戊子祭

大社

大稷遣誠親王允祕恭代行禮

上詣暢春園問

皇太后安○奉

皇太后御長春仙館○諭今歲六七月間江南淮徐揚州一帶淮黃交漲水勢漫溢甚於往時朕已屢降諭旨令該督撫加意撫綏現又

命高斌周學健前往會同辦理茲據陳大受奏稱揚州目下河水日逐增長民間自中人家以及極貧下戶皆流離四散雖有平糶之官糧撫恤之公項亦不能奔走領糶似此情形實非尋常被災可比朕心深為軫惻該督撫等不得拘於常例務須多方設法竭力拯救使災黎稍可資生以俟水退倍加撫綏俾得安其故業毋致失所該部即遵諭速行○訓飭慎重軍政諭各省軍政五年一舉乃

黜陟將弁鼓勵戎行之要務為督撫提鎮者留意於平時而舉行於此日必公正無私甄別允當舉所當舉而衆人皆知奮興効所當効而衆人皆知儆戒將見人材輩出土氣益勵國家於以收干城腹心之效所關非淺鮮也昔我

皇祖

皇考加意武備訓諭諄諄其因舉効不公降旨申飭者至嚴且切今當軍政之期倘司其事

者或瞻徇情面庇護私人將居官貪劣及衰懦闇茸不能騎射之人姑容在職止將微末弁員數人填註充數而使技勇過人勞績素著或秉性質樸實心効力者遏抑隱藏無所表見則賞罰不明賢否倒置人心懈怠戎政廢弛重負朝廷委任之意其罪不可逭矣用是特頒此旨務各洗心滌慮將從前情弊陋習一一屏除以肅鉅典倘有仍蹈前轍者經朕訪聞或被科道糾參當加以嚴譴該部即通行曉諭知之○大學士鄂爾泰等議奏律設大法輕重期協於至公罪有殊科彼此不容以私貸是以梁吉琯乞代父命武帝雖行寬宥而未聞著於令甲漢陳元於尹次當死兄初請代議欲活次應劭駁之謂殺無罪之初活當死之次此謂求生非謂代死誠以按律議獄各從所犯斷決不得開代罪之端因私情而撓國憲也若夫一家共犯罪坐尊長蓋尊長有督率之責父兄之教不先則子弟

之率不謹是以定為罪首而卑幼免坐者法統於所尊罪不容以並論也今據刑部奏稱徐天爵與伊子七十兒同造賭具應照不論造意獨坐尊長之律坐以發遣為奴復據七十兒之呈情願代父受罪請將七十兒發遣徐天爵免罪等語查此案情節徐天爵之母年逾七十僅有一子聞其遣戍晝夜悲啼七十兒既不忍傷祖母之心復不忍伊父獨罹罪譴籲請身代伊父既得免於遠戍而祖母復得資其膳養情殊可原且徐天爵所犯並無侵損於人似可准行但查康熙五十一年鑲藍旗人烏爾袞因伊父固爾哈緣事革職照例枷責充發有祖母年九十歲別無侍養之人叩閭請代充發俟祖母身故再議發遣奉旨固爾哈免其枷責留養伊母俟母故後照例發遣欽遵在案是既准其留養以遂私情仍又發遣以昭國憲仰見

聖祖仁皇帝。仁至義盡。情法兼伸。今徐天爵此案。與烏爾袞情事相同。或將七十兒發遣。將徐天爵免罪。或將徐天爵暫停發遣。交與該旗。俟伊母故後。送部發遣。應候諭旨遵行。至該部所請。嗣後如有父子共犯罪。按律應坐其父。而子願代者。酌其情罪輕重。果無侵損於人。將代罪情由。奏明請旨。臣等伏思。一家同犯罪名。父兄按律科罪。子弟獨脫然法外。稍有人心。當必怵然難安。況既無侵損於人。

願以身代父兄。猶知孝弟之義。應如所請。如子弟身本無罪。及有罪而有侵損於人者。並不得援引為例。妄行瀆請。則孝弟之情義伸。而國家之憲章亦肅。得旨。這所議是依議。徐天爵著照固爾哈之例。暫停發遣。○又奏查上江撥補封貯銀。共八十餘萬兩。下江共七十餘萬兩。兩淮鹽庫續收銀約七八十萬兩。是上下兩江被水州縣。即有需用。已足敷動撥。所有戶部續撥漕項銀一十九萬餘兩。應

仍留解部。得旨。此項續撥漕項銀一十九萬餘兩。亦著存留該省。以備賑卹之用。○己丑。上詣長春仙館。問

皇太后安。○諭大學士等。據德沛陳大受奏稱。今歲淮黃交漲。七月初五日。完顏偉差員密諭通判劉永鑰。將昭關等壩。開放洩水。令其以異漲通報等語。在督撫之意。以為下河州縣被水。由於放壩。完顏偉將檄令開放。捏稱通判詳報異漲漫決。為河臣之咎。不知向來河工。水大放壩。河員往往報稱漫溢。或報稱衝決。此係相沿之習。今歲水漲異常。開壩固有傷下游田禾。若不開壩宣洩。則不獨高家堰隄工可慮。即彼地城郭人民。亦必受惠。此不得已之計。未嘗不為保全百姓起見。況完顏偉亦曾將飭令開壩之處。具摺奏聞。雖未將以上情節。明白奏出。而朕知其意實係如此。完顏偉之奏。督撫未之知也。然完顏偉本當將此處明白奏聞。或密行知照該督撫。亦

無不可。若以開壩一節咎之。則非矣。德沛現住揚州。會同陳大受辦理賑務。至於河工。乃完顏偉重責。令伊等和衷辦理。而不可有所掣肘也。可將朕旨傳諭知之。○大學士會同漕運總督顧琮議奏。截留漕船。定例扣追錢糧。旗丁不無拮据。應酌量加給。使丁力寬裕。除截留薊州易州。照抵通例。各項准全給外。其餘已兌開行者。其在次費用。議將山東河南二省。每船酌給銀五十兩。江南浙江二省。

每船酌給銀六十兩。江西湖廣二省幫船。程途皆遠於江浙。而江西船裝載正糧。較多於湖廣。應將湖廣幫。每船酌給七十兩。江西幫。每船酌給九十兩。以敷旗丁各項用度。其存剩行月等銀。并全數本色米石。江浙河東等省。仍照舊按程追給。至江廣二省。程途遙遠。經涉江湖。應將該二省幫船。在未經過江以前截留者。除在次酌給銀兩外。其餘剩銀兩。同本色米石。一體按程追給。其已過長江尚

未渡黃截留者。應給四分之三。至渡黃以北。至臨清德州等處截留者。已俱有提溜打閘盤淺雇剥之費。應將各項銀米全給。得旨。依議速行。○戶部議准。湖南巡撫許容疏報。攸縣醴陵茶陵酃縣華容益陽沅江衡山八州縣。乾州鳳凰永綏三廳被水被蟲。分別撫卹。得旨。依議速行。○旌表守正捐軀之正藍旗包衣馬甲積德妻王氏。○庚寅。

上奉

皇太后幸同樂園。自是日至壬辰。皆如之。○諭江南上下兩江。今年水漲逾常。該督撫陸續奏報者。不下數十州縣。朕每一覽奏。宵旰靡寧。已屢降諭旨。令該督撫加意撫綏。毋使失所。又特命直隸總督高斌。刑部侍郎周學健前往。會同該督撫等。拯救目前之災荒。永除將來之水患。但念此等被災之地。夏已無收。秋更失望。小民困苦。其何以堪。況此數十州縣。有今年被災特甚者。有今年稍輕。而連年

被災者。現又水漲未消。亟待賑卹。其流離顛連之狀。時在朕心目中。所有本年應納錢糧。朕欲加恩豁免。著該督撫查明被災各州縣。先行緩徵。次第將確數分別具奏請旨。該部即遵諭速行。○江蘇巡撫陳大受疏報靖江縣。乾隆六年分。丈勘新坍平田。七頃九十二畝。有奇。新漲折實平田。七頃八十五畝。有奇。又原坍民賦田內。有學田四頃三十九畝。有奇。分別蠲升。○辛卯。遣官祭

關帝廟。○遣官祭昭忠祠。○諭曰。直隸總督高斌。刑部侍郎周學健。差往江南。辦理賑卹水利事務。著給與欽差大臣關防。俱著馳驛前往。○又諭。嗣後挑選秀女。遇有

皇太后皇后之姊妹。親弟兄之女。親姊妹之女。記名者。著戶部奏聞。徹去記名。至妃嬪等姊妹親弟兄之女。親姊妹之女。有記名者。著內務府告知首領太監奏聞。著永為例。○定親蠶典禮。禮部議覆大學士鄂爾泰等奏稱古

制。天子親耕南郊。以供粢盛。后親蠶北郊。以供祭服。我

皇上親耕耤田。以示重農。至意。乾隆元年。准工部侍郎圖理琛議。改先蠶壇為先蠶祠。每歲季春。己日。遣太常寺堂上官。以少牢致祭。所以經理農桑之道。至為周備。今又命議親蠶典禮。伏思躬桑親蠶。歷代遵行。但北郊蠶壇。在安定門外。故明嘉靖時。以后妃出入道遠。親蒞未便。且其地水源不通。無浴蠶所。遺址久廢。考唐宋時。后妃親蠶。多在宮苑之中。明代亦改建於西苑。伏讀

聖祖仁皇帝御製耕織圖序。於豐澤園之北。治田數畦。環以溪水。隴畔樹桑。傍立蠶舍。是育蠶之事。

聖祖仁皇帝親加講求。今逢重熙累洽。禮明樂備之時。親蠶大典。關係農桑。自應舉行。以光典禮。其應行相度蠶地。建立蠶壇。桑壇。蠶宮。從室之處。請勅交內務府會同工部等衙門

辦理至親蠶典禮所應齋祀躬桑授蠶治繭等儀注及選擇蠶母蠶婦受桑布繅一切禮文事宜應交禮部詳議得旨奉

皇太后懿旨是依議臣等伏查唐開元享先蠶儀散齋三日致齋二日至永徽三年制以先蠶為中祀我朝於季春巳日祀先蠶祠亦列中祀則齋戒應照一切中祀致齋二日皇后親祀先蠶之禮周制后齋戒享先蠶躬桑以勸蠶事北周皇后以一少牢親祭先蠶西陵

氏之神因以躬桑隋制皇后以一太牢制幣祭先蠶於壇上祭訖躬桑明會典亦載有皇后親祀先蠶儀注是累代皇后原有親祀先蠶之禮我

皇上御極之元年特命建立先蠶祠每歲季春巳日致祭今舉行

皇后親蠶之禮臣等謹擬交欽天監於季春月擇躬桑吉日

皇后親祀先蠶應設

先蠶西陵氏神位於壇上太常寺先期奏聞致祭前二日

皇后於正殿致齋二日至期詣蠶壇以一太牢親祀

先蠶西陵氏之神行三獻禮

妃

嬪公主王妃以下文武三品大臣命婦以上致齋陪祀祀畢

皇后詣桑壇位採桑

妃

嬪二人王貝勒貝子公福晉夫人三人三品以上文武大臣命婦四人從蠶採桑蠶事畢蠶母率蠶婦擇繭之圓潔者貯筐獻

皇上獻

皇太后遂獻

皇后擇吉

皇后復詣蠶壇正殿親臨織室蠶母率蠶婦全獻繭之所登者

皇后行縵三盆手禮。遂布於蠶婦之吉者。使縵而朱綠元黃之。以供

郊

廟黼黻之用。至蠶母蠶婦。漢魏以前皆無其稱。惟晉蠶西郊。列侯妻六人。為蠶母以授桑。未載有蠶婦。北齊授桑蠶母。蠶母切之。授世婦。謹按祭義。卜世婦之吉者。使入蠶於蠶室。考古制。二十七世婦。蠶宮亦建二十七從室。則蠶婦應即為世婦。所云蠶母。蓋取老成諳蠶事。以為世婦統領。明嘉靖時。令順天府報蠶母。則取諸民間之嫗。未嘗拘定列侯之妻。即古制。卜世婦之吉者。二十七人。入蠶於蠶室。亦必平時曉習蠶事。方膺茲選。臣等酌議。應交內務府查明包衣。並行文八旗。遴選熟諳蠶事。並無事故者。開列具奏。欽點蠶母六人。使暫居繭館。以督蠶事。蠶婦二十七人。居蠶宮二十七從室。使治蠶事。抑更有請者。皇后親蠶肇祀。倣照古制。需女官一十二人。曰

尚儀。曰尚宮。曰典儀。曰掌贊。曰司賓。曰司言。曰司宮。曰典製。曰司贊。曰典贊。曰司祝。曰女史。行禮時執事。此次初行典禮。應於孟春月。內務府先行奏選。俾演習嫺熟。又祭先蠶樂章。臣等暫據會典內所載。填入儀注。應候欽定樂章演用。再查北齊蠶壇。以內監置蠶宮令丞各一人。經理蠶壇諸務。明會典亦載有蠶宮令。請倣其制。置令丞各一人。所有儀注。雖經倣照古制定議。但須因地制宜。應俟蠶壇規模相度已定。再行詳酌妥議具奏。從之。

○戶部議准。安徽巡撫張楷疏報鳳陽懷遠虹縣靈璧蒙城五河等六縣。被水并霉爛二麥。其新舊錢糧。暫緩催徵。無力貧民。酌借籽種。至二麥歉收各戶。借給口糧一月。從之。

○工部議准。江南總督宗室德沛奏稱蒙城縣潘家湖等九處湖溝。蓄洩攸關。俱應開浚。并加築土埂。查民隄民埝。原係民力自行修築。不動帑項。如遇災歉。後民力實不能辦者。照

以工代賑之例。動用公項。此次請即在撥存蕪湖關稅贏餘銀兩酌給。及時興修。以濟民食。得旨。依議速行。○豁除涪州場塌陷鹽垵三百三十九垵額稅。從署閩浙總督策楞請也。○壬辰諭朕愛養黎元。特沛殊恩。將關權米豆等稅。悉行蠲免。以為充裕民食之計。但船料一項。議論不一。現發九卿會議。尚未覆奏。朕思此事並無難辦之處。向徵船料者。應照例徵收。向不徵船料者。豈可因免米豆之

稅而轉加徵船料。著該部即速行文各關知之。○又諭曰。高斌。周學健。奏稱。此番賑務水利需費浩繁。請令情願急公人員。倣照樂善好施之例。出資効力。按其効力多寡。酌予議敘。分別錄用等語。近年上下兩江水患。頻仍朕心軫念。多方籌畫。如果有益於災黎。帑金原所不計。但照高斌等所奏此等人員。若准其効力。自必踴躍急公。輻輳而至。因此商賈流通。貨物充裕。於屢年饑饉之餘。可臻富庶

之象。地方民生似均有裨益。此一時權宜之計也。況京官自中行評博以下。外官自同知通判以下。於正途仕進之階。尚未有礙。事屬可行。但此舉因江南屢被災荒。非常年可比。他省亦不得援此。請然不定以年限。恐日積月累。從事者多。與現在因時制宜之意。轉有未合。其應如何酌定條例。並於何時停止之處。該部一并定議。速奏。尋議京職自中行評博以下。外職自同知通判以下。按吏部品

級考。及戶部舊有糧運事例。詳加參酌。分別敘用。但各省官生。陸續來江。尚需時日。應請於本年十月起。定限二年停止。所輸銀兩。令承辦官員。隨到隨收。毋許吏胥刁蹬需索。再查吏部銓選捐班。現係西安戶部阿爾台等九班。輪流選用。此次樂善好施人員。自應從優錄用。以示鼓勵。應俟各該員赴選。人文到部。其捐雙月者。按伊等品級。並投捐日期。入於西安等捐班之前選用。其加捐先用者。即

入於本班雙月內先用。其改捐單月者。准歸單月捐班即行選用。至加捐不論雙單月即用者。准其不論雙單月捐班遇缺即用。以上四項。俱仍積選班之缺。如此項議敘無人。再將西安等班。照例銓選。各官生必踴躍急公。俾災黎均沾惠澤。從之。○又諭前據漕運總督顧琮奏稱。江西南昌等幫。江南興武。揚州等幫運丁。力量艱難。共借銀七千八百餘兩。以為歸途之用。朕已加恩賞給。免其扣還。今

紹興前後兩幫船一百五十隻。亦經倉場侍郎塞爾赫等。每船借給銀八兩。共銀一千一百四十四兩。此項借銀。事同一體。亦著加恩免其扣還。○和碩莊親王允祿等奏會典所載耜田之樂有三。祭先農壇。一也。親耕時。歌三十六禾詞。二也。筵宴時。奏雨暘時若。五穀豐登。家給人足。三章。三也。先農壇樂章。係順治年間之文。臣等改定進呈。已蒙改正發館。至三十六禾詞。雨暘時若等章。係大學士蔣

廷錫所撰。臣等閱其文義古雅。向以為無可更定。是以置之不議。今因管理太常樂部。方知樂與禮不相符。有不得不改正者。除三十六禾詞。無庸議外。查雨暘時若等三章。原為筵宴進酒進饌而設。雍正二年。以其文不雅馴。令蔣廷錫擬。乃蔣廷錫照古樂府體為之。實不能施於燕樂。又自雍正二年起。每年耕耜。從未賜宴。此樂本可不奏。乃因齋宮陞座。諸臣慶賀。賜茶及還宮。本無樂章。誤將此

三章燕飲之詩。奏中和韶樂而歌之。臣等既經查出。理合奏明。請嗣後於齋宮陞座時。用中和韶樂。諸臣慶賀時。用丹陛大樂。還宮。復用中和韶樂。一如朝賀之制。至賜茶本無奏樂之理。應行停止。若有賜宴。則燕樂必須。即停止歲多。樂章不可不具。請將雨暘時若等章。照海宇昇平日之例另撰。字數止須四分之一。得旨是。○四川巡撫碩色奏雅州府屬大田土千戶馬濬。故後絕嗣。並無親支襲替。

大田密邇內地。非離省遠。弗可比。若再將大田之衆。交與松坪土千戶馬澤兼轄。弗情不服。請將大田土千戶員缺裁汰。其番民悉歸清溪縣管轄。從之。○癸巳。

上奉

皇太后還宮。○詣

大高殿行禮。○詣

皇太后宮問安。○諭。前因京倉漕糧。有一二處米色甚屬惡劣。且有攪和草根沙土者。是以

派委戶部堂官等。細加驗看。將該管官分別議處。此皆漕運總督及倉場侍郎辦理疎忽。沿途旗丁作弊之所致。與完糧之百姓毫無干涉。或辦糧之州縣。於收糧之時。因此過於吹求。而受兌之運弁旗丁。又借此刁難需索。則小民之受累不淺矣。該部即行文有漕督撫。令其留心稽查。倘有此等情弊。即行查叅。○兵部議覆。給事中富森奏稱。八旗都統副都統護軍統領。前鋒統領。步軍統領等。均有

辦理旗務管轄官兵之責。與各省駐防將軍副都統無異。遇軍政之年。令其一體自陳等語。應如所請。內外畫一再查各部院文職大臣。有兼都統等職者。既於文職內遇京察之年。自陳。遇軍政之年。無庸再行自陳。至王貝勒貝子公。及領侍衛內大臣兼文職者。遇京察之年。俱應自陳。其有兼都統等職者。亦應於軍政之年一體自陳。再文官京察各堂官於三月內繕本送通政司。陳奏武官軍政於十月內舉行。今既令於軍政之年自陳。請定於九月內繕本送通政司。陳奏從之。○以協領董達色為寧夏右翼副都統。協領祁爾旦為西安右翼副都統。叅領盧色力為西安右翼漢軍副都統。○甲午。以舉行仲秋經筵。遣官告祭

奉先殿

傳心殿。○諭。今日舉行經筵典禮。禮部據向例。以天雨奏請改期。朕思魏文侯將出獵而

雨。左右不欲行。文侯曰。吾已與虞人期矣。豈可無一期會哉。乃往。身自罷之。夫田獵之娛。尚不以遇雨失期。況經筵大典。業經祭告。自應舉行。但執事諸臣。例應在丹墀內排班行禮。未免霑濕。著穿雨衣排列。駕到。即入殿進講。講畢。即奏禮成。其階下行禮。殿內賜茶諸儀。俱著停止。嗣後凡遇雨。俱照此例行。○
上御文華殿。講官三泰陳惠華進講論語一日克己復禮。天下歸仁焉。講畢。

上宣御論曰。天地至廣也。民物至衆也。而一人一日之間。苟能克己復禮。天下歸仁焉。斯語也。聖人豈欺我哉。蓋天地民物。總不外我之一心。仁。人心也。惟不能存仁。其心已亡矣。是以視天地民物。自天地民物。而我自我。於歸仁乎。何有。然其本性之善。固在也。一日克己復禮。其仁即在是。而天下之歸仁亦在是。故顏子三月不違。斯三月之間。即是天下歸仁。而其餘之日月至。其至之時。天下之歸仁亦

猶顏子之三月不違而已矣。至於聖人位天地育萬物。何一非此心之流行於宇宙間。而天地自位。萬物自育乎。是非以仁為感通之具也。亦非舉為仁之效。而斬人之求仁也。人苟未能克己復禮。則必卜度仁之能感通天下。而以天下歸仁焉。為仁之效。是心也。即已也。持此己而冀天下之歸仁。是猶北轅而適越。吾知其無至之日必矣。講官雅爾呼達。梁詩正進講易經天地之道。恒久而不已也。講畢。

上宣御論曰。易經講義曰。元亨利貞。天道之常。是惟無恒。所以恒久而不已也。夫四時代謝。二氣遞嬗。何嘗久春而久夏乎。然惟其不恒。是以春恒去而夏恒來。運而不窮。豈非天地之以正而能久耶。所謂正者何。其不已之謂乎。故曰。惟天之命。於穆不已。是即久於其道也。而大生廣生。萬物芸芸。孰非易知簡能所悠久以無疆者乎。是故天地以正而恒。而天

地初不自見其可恒於正。使天地自見其可恒於正。是有恒矣。有恒斯無恒。必恒生而恒滅。恒屈而恒伸。無是理也。是故觀天地之恒久。不若觀天地之不已。惟其不已。是以恒久。穆穆文王。純亦不已。是誠希天之聖手。大學士張廷玉等奏曰。

皇上備天德之全。自周旋而中禮。體乾行之健。益悠久以無疆。闡妙蘊於孔顏。得真詮於文象臣等敬聆聖諭。實深欽服。禮成。賜講官及侍班官宴於協和門。○諭曰。戴永椿著吏部隨便帶領引見。○又諭。覽貴州提督韓勲奏。安龍鎮總兵官史載賢係伊兒女姻親。同官辦事。自不免嫌疑。史載賢著調補湖廣襄陽鎮總兵官。宋愛著調補貴州安龍鎮總兵官。○乙未。

太宗文皇帝忌辰。
上詣
奉先殿行禮。○遣官祭

昭陵。○諭大學士等。江南上下兩江。淮徐鳳潁等所屬州縣。疊被水災。今年水勢更大。朕心時切憂勞。多方籌畫。期登斯民於衽席。此等被災地方。州縣官最關緊要。必須忠誠惻怛。實有與民休戚相關之意。而其才具又能展布設施者。俾得久於其任。方於地方有益。若徒以才具見長。而無實心為民之念。雖致飾於外。而於撫卹之義。又何補乎。著該督撫留心察看。如現在各員。果能勝任。令其加意經

理。以觀成效。如有不能勝任者。或於通省屬員揀選補授。或於命往江南人員內揀選題補。苟得其人。即令久於其地。不必速陞。漢之賢能二千石。有賜級賜金而不屢遷者。其道猶可法也。如此。則瘡痍可起。元氣可復。庶慰朕痼痾在抱之至意。○吏部議覆。署理兩廣總督慶復疏稱。西省鹽法。從前官運官銷。由東省配兌。省河鹽包。運至梧州府總口。一切收發。委梧州府同知辦理。嗣於乾隆元年。經

前督臣鄂彌達奏准添設廣西運同一員駐劉梧州專管西省各埠餉稅催徵收解但查未設運同之前督催官係東西兩道經徵官係各州縣責任攸分不必再設催徵之員至令該員收餉專解又有不便於商者平樂等二十八埠商人俱住廣東省城其告拆鹽包原係先完餉而後折引伊等自赴運司庫或數百兩或一千兩就近繳納當即拆引最為便易今前赴梧州完納逆流寫遠其西稅一

項商埠咸隸西省而餘鹽羨利例係商人自赴西鹽道庫完納則西稅銀兩照羨餘納西鹽道庫均屬便易若令解運同衙門轉解未免多一周折又運同之下添設知事一員亦屬冗曠請將梧州鹽務運同并知事二缺俱裁所有收發鹽包給發水腳盤驗鹽船事宜仍委梧州府同知就近辦理等語應如所請從之○戶部等部議准安徽巡撫張楷條奏一。委員會審之宜詳核也承辦案件例由本

管州縣審解知府直隸州覆核詳司必係疑難之案方准委員會審乃江省不論罪之重輕事之難易動輒委令別州縣會審又屢駁覆審別邑之案審明本邑之案反致遲擱嗣後果係疑難重大之案本管州縣不能審明者遴員會審尋常案件不准濫委一。廉官之宜減調也各省武闈內廉同考官不過四員獨江南用至十二員又恐事故不到加倍調取至臨期掣係空簽方令回任臣上年主試武闈合式入三場者止一千五百餘卷每房分閱一百餘卷查從前各科卷數大畧相同實屬房多卷少請減去六員每員分閱二百餘卷不慮草率至文闈內外廉官共用四十五員雖無可減向例調取九十員先期聚集省城臨期照額點取方將餘剩之員退回計往返一月有餘且調取過多每有一府中印官全行赴省嗣後請令布政司酌量詳調每十員止餘調一二員仍將附近省城之員停

派以備臨時添補。則閭閻敷用。而州縣亦可各勤職守。再文闡供給各省。不過數員。獨江南用至四十九員。以致通省佐雜調取大半。並請嗣後供給官酌用二十五員。省去二十四員。雖比舊減半。而較之他省。已屬倍多。必無不敷之患。從之。○兵部議覆王大臣等會議順天府府尹蔣炳奏稱旗莊地畝。俱在近京五百里內。八旗官兵人等。各有當差執事。不得不資佃耕種。收取租息。佃戶亦得藉此

養贍身家。近年以來。旗人下鄉取租。點佃多方刁蹬支吾。旗人情急。將該佃送官究治。乃州縣中有以抑挫旗人為不畏強禦者。有以袒護民人為善於撫字者。遇此案件。大都置之不理。請嗣後旗人取租召佃贖地等事。如佃戶將租計刁難。及串通霸占。故意勒捐。告發到官。應令該地方官速為秉公審理。如任意遲延。有心偏袒。令該上司提訊。將奸民按律懲治。州縣查叅議處。如旗人欺虐佃戶。令

該州縣送臣衙門究治。再旗人以地畝事件。告假下鄉。原非十日半月。所能猝辦。應令該旗寬給限期。俾得從容辦理。庶不致為奸民措勒等語。均應如所請從之。○丙申。

上詣

皇太后宮問安。○戶部議准左都御史管廣東巡撫王安國疏稱。龍門協孤懸海島。不產米穀。請將廉州府倉并欽州合浦靈山三州縣倉內撥穀一萬石。運至龍門協建倉收貯。接

濟兵民。從之。○兵部等部會議署兩廣總督事務雲南總督慶復疏稱。南海縣橫基角地方。上至江浦汎八里。下至順德縣河澎汎十二里。鄉村錯雜。商民往來渡口險要。應添設一汎。并三板船一隻。撥兵駐防巡緝。從之。○丁酉。

太祖高皇帝忌辰。

上詣

奉先殿行禮。遣官祭。

福陵。○諭江南上下兩江有疊被水災之州縣。朕心深為軫念。已命大臣前往會同該督撫加意賑恤。以蘇民困。茲據安徽巡撫張楷奏報。連年水潦歉收。今年被災最重者。則有鳳陽。臨淮。宿州。靈璧。虹縣。懷遠。壽州。鳳臺。蒙城。泗州。五河。盱眙。天長。十三州縣。次重者。則有定遠。霍邱。太和。潁上。亳州。阜陽。六州縣。朕思此等地方。民人於積困之餘。又罹災患。非加恩於常格之外。不足以拯阨危。其最重者。著於定例應賑月分之外。加展三個月。其次者。著於定例應賑月分之外。加展兩個月。至於災止六分。次貧不賑者。亦俱賞賑一個月。其被災屯衛軍丁。著照坐落州縣一體加展月分。又無業貧民。乏食生監。各隨所居鄉村。准其照例領賑。其應於何時開賑。該撫即酌量情形舉行。務派賢能有司。官員殫竭天良。實力撫卹。其下江被災等處。即著欽差大臣會同該督撫。照此旨酌量辦理。務使災民均霑。

實惠。該部即遵諭速行。○大學士議准。署兩廣總督慶復。議覆廣東按察使潘思渠奏。稱瓊南四面環海。中有五指山。住居生熟黎人。性質愚蒙。不知讀書。應照雲貴湖南苗童之例。一體教導。於黎峒相近之區。崖陵昌感儋萬定等七州縣。設學一十三所。選擇品學兼優之貢生。生員。每年給與修脯。令實心教誨。果有識字成誦者。量賞紙筆。能通文應試者。另編黎字號。每州縣額取一名。一體鄉試。下部議行。○戶部議覆。兩淮鹽政準泰疏。稱。經管錢糧各官。例有交盤定限。兩淮鹽屬二十五場大使。徵解錢糧。止有奏銷分數考成。而新舊交代。並無報部定限。亦無冊報部科。若不立定章程。勒限催辦。則新舊各員。恃無交代處分。任意延緩。或至虧欠挪移。均未可定。應請嗣後。將兩淮鹽場大使。亦照州縣例。勒限兩個月交盤。造冊加結。咨報部科查核。倘逾限未清。查明新舊兩任。係何任遲延。分別

參處。若有侵挪虧空情弊。即行嚴參。應如所請。再查兩淮場員交盤。既經定有例限。則凡經管鹽課大使等官。事同一例。自應通行各省一體遵行。從之。○戊戌。

上詣

皇太后宮問安。○諭。朕御極以來。愛養黎元。於蠲免正賦之外。復將雍正十三年以前。各省積欠。陸續豁免。以息民間追呼之擾。今查雍正十三年正月。起至十二月。江蘇安徽福建

三省。未完民欠正項錢糧銀。共一十七萬七千六百七十四兩六錢零。甘肅福建江蘇等三省。共未完民欠正項米豆糧。共九萬五千二百六十九石零。甘肅省民欠未完正項草。一百七萬四千二十一束零。又直隸江蘇安徽甘肅廣東福建等六省。民欠未完雜項錢糧銀。二千九百二十四兩零。福建省民欠未完雜項租穀。四百四十八石零。此等拖欠各項。歷年已久。多係貧乏之戶。無力輸將。況江

蘇所欠獨多。目今彼地現被水災。待恩撫卹。豈可復徵逋負。著將以上各項。悉行豁免。若諭旨未到之先。或有續完之項。即咨部扣除。再查江浙二省。尚有雍正十三年未完漕項銀。七萬一千二百七十兩零。米二萬九百四十九石零。麥四千三十七石零。豆一百八十五石零。向來漕項。不在豁免之列。今既蠲除各項。著將漕項一體免徵。此旨到日。各該督撫。可即出示通行曉諭。並令各州縣官實力

奉行。務令閭閻均霑實惠。倘有不肖有司。朦混私收。或蠹役土棍。欺隱中飽等弊。該督撫即行嚴參密拏。從重治罪。著交該部速行。○又諭。今年上下兩江。被水州縣。賑濟之處甚多。俱需米穀應用。明歲春夏之交。米價諒必騰貴。雖然商賈流通。恐地方米糧。究不能充裕。朕意若將乾隆癸亥年運京漕糧內。酌留本省。自有裨益。上江應截留若干。下江應截留若干。著高斌周學健會同該督撫。察看情

形酌定數目具奏請旨○已亥

萬壽節

上詣

大高殿

壽皇殿行禮○遣官祭

太廟後殿○遣官祭

福陵

昭陵

昭西陵

實錄卷一百一十一

十一

孝陵

孝東陵

景陵

泰陵○遣官祭

顯佑宮

東嶽廟

城隍廟○詣

皇太后宮行禮○御太和殿王以下文武各官

進表行慶賀禮停止筵宴○諭大學士等向

來外省地方災荒有司官員辦理不善每將應賑人數有意裁減以致人多賑少國家雖沛恩膏而小民仍有不免飢餓者今年江南被水甚重且當連年災荒之後更非尋常可比凡屬應賑災民務須將大小口數據實造冊不得仍踵前弊致有遺漏可速傳諭欽差大臣及該督撫加意查察轉飭有司實力奉行○庚子

上御乾清門聽政 詣

實錄卷一百一十二

十二

皇太后宮問安○諭曰于文輝著解任其刻薄貪鄙等情交與德沛查審具奏贛州總兵官員缺著章隆補授○以江寧城守副將成元震補授山東兗州鎮總兵官○辛丑諭今年上下兩江水災甚重朕宵旰憂勞百端籌畫以拯吾民之困阨但思此等窮民在本地引領待賑者固多而挈家四出覓食於隣省隣郡者亦復不少著江南及河南山東江西湖廣等省督撫各嚴飭地方有司凡遇江南災

民所到之地。即隨地安頓留養。或借寺廟。或蓋蓬廩。使有棲止之所。動用該處常平倉穀計口授糧。據實報銷。並訓諭約束。不得借端生事。至於災民聚集衆多之處。則更委道府大員。專行督察。至冬月水消。及春初耕種之時。有願歸本鄉者。即資送回籍。知照本籍照例安插。並給以麥種。俾得及時趕種。其不願回籍者。亦不必強。悉遵前諭行。○戶部議准。總漕顧琮疏稱。起運白糧內。有白糯米一項。浙省向不產糯。雍正七年間。曾經糧道詳明原任浙督李衛酌辦。隨漕統徵糙粳。官為易糯。春辦兌運。官民稱便。請題明嗣後遵照辦理。從之。

大清高宗法天隆運至誠先覺體元立極敷文奮武孝慈神聖純皇帝實錄卷之一百七十二

大清高宗法天隆運至誠先覺體元立極敷文奮武孝慈神聖純皇帝實錄卷之一百七十三

監修總裁官經筵講官太子太傅大學士文淵閣領事內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士大淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆七年壬戌八月壬寅

上奉

皇太后駐蹕南苑○詣

皇太后行宮問安○

上行圍○諭上年山東歷城一十七州縣衛秋禾被災朕特降諭旨將應徵新舊錢糧並漕米黑豆一概緩至今歲及癸亥兩年帶徵於麥熟後起限嗣因今歲二麥不登復緩至秋成後完納現在秋收豐稔自應按款輸將但各州縣中有疊被災傷之歷城等十三

縣今歲雖獲有秋而民力未甦舊欠新徵令其一時並納未免拮据著將歷城章邱齊東濟陽長清陵縣鄒平臨邑平原肥城平陰茌平博平等縣並歷城章邱濟陽長清肥城等五縣收并之衛地除現年錢糧及帶徵六年之米豆照常徵收外其應徵四五兩年舊欠及帶徵六年之地丁並災案出借之口糧籽種概緩至乾隆癸亥年麥收後起徵仍照例分年完納以紓民力又聞齊河禹城清平高唐等四州縣並齊河縣收并之衛地今夏雖勘不成災究屬歉收且去歲被災亦重著與歷城等縣一例辦理使小民餬口有資輸將不致竭蹶該撫即遵諭行○是日駐蹕南苑至丁未皆如之○癸卯

上詣

皇太后行宮問安○吏部議准廣東巡撫王安國疏稱先因大埔坪吉河地方為花縣廣寧從化長寧陽山各縣接壤最易藏奸添設同

知一員專管花縣從化清遠英德廣寧長寧等六縣捕務。今查其地雖各縣接壤相隔實遠呼應不靈。況近來奸宄斂跡大埔坪城內有千總駐劄巡防。請將大埔坪同知所管各縣捕務仍歸各府同知通判照舊管轄。又大官田地方因有崑崙皂幕諸大山昔稱盜藪添設同知駐劄鶴山縣城管轄新寧新會開平恩平鶴山各縣捕務。今查其地均已平寧且現有知縣典史等官又有藥運雙橋二巡檢巡緝洵為周密亦應將大官田同知裁汰所管捕務仍歸各府同知通判管轄。至鶴山縣捕務請歸肇慶府通判兼管。又高廉運判一缺先因粵省鹽務未清請於合浦縣石康地方添設運判督收支放事宜。今查各場廠柵既有効力之員巡緝私梟亦已潛蹤運判實屬閒員應裁其發曬銀兩各項事宜仍歸高廉二府兼理。又三水縣西南驛清遠縣安遠驛曲江縣芙蓉驛英德縣正陽驛均無驛

馬僅司遞送本章與發管徒犯閒曠應裁各驛原管事宜悉歸各縣典史兼管。又陽江縣新設那龍司澄邁縣新設新安司先因地係通衢要衝商賈雲集酌議添設但各離縣甚近管轄地方無多實為可省應裁原撥分管地方仍歸各縣捕巡管理。又崖州陵水感恩昌化四州縣訓導缺出揀員調補但學額無多正諭各一員儘足訓課亦應將各訓導裁汰從之。○工部議准河南山東河道總督白鍾山疏稱豫省黃河南岸鄭州中年一帶地居上游隄工在在險要自乾隆五年秋汛後坐灣愈深各工危險今來童寨對岸沙灘亟應挑挖引河一道自姚五家莊至侯七家莊止以順河流以保險工從之。○甲辰

上詣

皇太后行宮問安。

上行圍。○遣官祭黑龍潭

昭靈沛澤龍王之神。○諭今年上下兩江被

水情形。非常年可比。朕宵旰焦勞。凡拯救撫卹之道。亦屢經籌畫矣。今又思周禮荒政。載有緩刑之條。是舉行矜卹之典。亦感召和氣之一端。現在江蘇安徽兩省秋審人犯中。或情有可原。當在矜疑之列者。或多年緩決。不至正法。久繫囹圄者。皆應減等完結。以示因災恤刑之意。著大學士會同刑部詳閱招冊。分別妥議具奏。○又諭曰。王泰姓倪之鰥熊會珍。鄧瀾王又樸著吏部行文調取來京引

見。○諭軍機大臣等。原任廣西學政張考告病回籍。可寄信詢問喀爾吉善看伊精力尚可服官。即著給咨赴部帶領引見。○禮部議准湖北巡撫范璨疏稱。宜昌府屬之鶴峯州。係新闢苗疆。請建社稷山川二壇從之。○兵部議准巡漕御史武柱奏稱。各省漕船由長江數千里之遠。運至天津。距通止三百餘里。復因三岔河口里許之險。而損傷船隻缺欠漕糧。真屬功虧一簣。伏查漕船每隻水手舵

工多不過十一二人。過關時在船撐篙掌舵者。必須三四人。僅餘八九名。上岸拉拽。人力不敷。易於磕損。請勅下天津鎮臣及天津河道每日撥兵二十名。派千總一員。前往輪班助力。俾重運安行。不致損壞。并嚴禁弁兵無得需索勒捐。俟糧船進口完日。仍將原委派弁兵撤回本汛差操從之。○賑卹江西興國縣水災饑民。並蠲免本年額賦。○乙巳上詣

皇太后行宮問安。奉

皇太后至晾鷹臺閱圍

上行圍。諭軍機大臣等。兩江總督德沛奏

稱。高郵寶應淮安等處被水地方。現在查賑。在城居民有力之家。例不在賑卹之列者。聚眾罷市。擡神鬧閭。公堂衙署。勒要散賑。而高郵則係劣生朱愷士指使寶應則係劉師恕族人指使淮安首事數人。亦不盡係百姓。現在查拏。即具疏題叅等語。夫地方遇有水

早災。視在官斯土者。固當加意撫卹。以盡父母斯民之責。而為士民者。則當各安本分。以受國家恩澤。乃敢玩視功令。開官罷市。似此等刁惡之舉。出於尋常百姓。猶可藉口鄉愚。飢餒迫身。以致無知犯法。至於紳衿之家。非有迫不及待之情。且附於讀書明理之列。而倡率棍徒。從中指使。將啟挾制官長之漸。尤為法所不容。此等惡習自我。

皇考整飭以來。已漸次改易。今豈可使之復萌。潛長。以為人心風俗之憂。從前湖南劣生戴名揚。在苗疆多事。朕曾降旨。將該省學政教官等。加以處分。今江南有如此劣生。學政教官所司何事。亦應議處。以為董率不嚴之戒。至劉師恕族人。肆行無忌。伊實難辭。不能約束之咎。著德沛一並查明。參奏。交部察議。德沛在浙閩總督任內。未免過於優容。此事務須秉公執法。嚴處。以儆其餘。不可稍存姑息之念。草率了事。著該部即傳諭知之。○又諭

曰。王喬林。吳穀著。吏部行文調取。來京引見。楊廷璋。俟服滿之日。該部帶領引見。工部議准。浙江巡撫常安疏稱。錢塘餘杭二縣交界之瓶窰鎮。溪河為諸水匯歸太湖之尾閘。水挾沙至。水去沙停。兼之窰戶堆積廢料。殘沙漸以淤阻。上游無從宣洩。遂致泛溢。塘隄亦多沖刷。亟宜先為挑濬疏通。以利杭嘉湖三郡民生。并轉飭該地方官曉諭附近窰戶。不許仍前堆積。致妨水道。從之。○定邊左副

將軍額駙策凌奏。厄魯特巴圖爾翰克吉勒

濟爾。三人來降。照例賞給口糧。由驛護送來

京報聞。○丙午。

上詣

皇太后行宮問安。

上行圍。○吏部議准。雲南巡撫張允隨疏稱。

新設之驛鹽道。經歷一員。先因井東鹽井。需員調劑。特設經歷。駐井煎辦。今章程久定。現有掌印同知。可就近管理。又威遠猛班巡

檢一員。因改流之初。猛班距威窩遠。設巡檢稽查。今夷民歸化日久。無需彈壓。又阿迷州傍甸鄉巡檢一員。向因夷性梗頑。設員巡緝。今已相安。無庸另駐專員。又昭通府司獄一員。前因府治初闢。特設經管監獄。今已添設恩安首邑人犯。可發縣監司獄。可裁。以上新設四缺。應裁。又查武定府撒甸同知。向因逆酋常應運初平。將同知移駐分防。今地方寧靜。夷民樂業。同知已屬閒員。又寧安府屬寧州甸苴關。離州城三十餘里。一應地方事務。均係知州管理。其原設巡檢。亦屬閒冗。又永昌府騰越州鎮彝關巡檢人戶無幾。兼多瘴癘。亦可議裁。又大理府雲龍州順益井大使。每月止管煎辦額鹽二萬餘觔。請歸該州兼管。以上舊有四缺。應一并裁汰。從之。○戶部議覆御史李清芳沈廷芳等奏。米糧過關數目。停止造冊一摺。查各關徵收米糧稅銀。送部稽考簿內。有將米糧字樣指出者。亦有籠

統開造。並無米數者。而各關年滿報部。例係將上年所收之數。比較核題。今若不將免過數目造報。恐管關之員。或借免稅之名。任意虧缺。無從查核。是以議令將免過數目。年滿造冊報部。原為稽考核題起見。且權關職司稽察。若云米船到關。任其所之。不必稽查。恐有藉稱米船。暗帶違禁等物。希圖影射偷越者。在商人或自愛資本。不必盡出於此。而舵工水手人等。奸良不一。惟利是圖。勢所必至。則過關查驗放行。正以便商。非以累商。而查驗時。即可將米糧數目彙冊報部。亦無累商之處。今該御史復請停止造冊。應俟一年造報後。各關免過米糧稅銀。已有成數。嗣後皆可約畧而知。再行停其造報。從之。○浙江巡撫常安疏報。乾隆六年分奉化鎮海象山太平平陽雲和烏程龍游八縣。墾復荒缺田地。山蕩一十九頃有奇。招回人五十一丁。○護理福建巡撫印務布政使張嗣昌疏報。閩省

漳州府屬詔安縣乾隆六年夏月被災應免銀五千五十六兩有奇。丁未。

上詣

皇太后行宮問安。兵部議准署雲南總督張允隨疏稱雲南孤懸天末內則百蠻環處外則三面臨邊形勢險要猝遇緩急難待鄰境聲援建威銷萌防兵綦重誠難議裁但國家經費有定兵餉糜費無窮自應酌籌通變使有減餉之實而無裁兵之形庶於國用兵防兩有裨益計滇省新設營制與續添兵丁之昭通鎮雄東川普洱新甯元江廣羅廣南尋甯等鎮協營均屬極邊衝要所轄夷獯種性不一倘裁減過多無以控制且續添兵半從舊營抽撥亦非盡係新添至於舊有營房兵額稍多之處業於議設新營時酌量移撥若再裁減過多汛防愈見單弱臣將通省新舊各營通盤核算按兵額之多寡均勻攤減請於督提兩標各裁馬二步八兵一百名撫標

裁馬一步九兵四十名臨元曲尋開化楚姚永順鶴麗永北昭通普洱等九鎮各裁馬一步九兵五十名廣羅騰越劍川雲南城守元江新甯武定尋甯廣南東川鎮雄景蒙維西奇兵大理城守等十五協營各裁馬一步九兵三十名順雲營裁馬一步九兵二十名以上通省共應裁馬步兵一千一百六十名遇事缺出漸次開除停其募補至原設員弁無庸議裁再滇省各營有裁去民壯存留工食招養餘丁四百四十八名現俱隨營操演但各營已有清出伙糧招養餘丁所有裁存民壯工食招養餘丁四百四十八名悉行裁汰從之。工部議准甘肅巡撫黃廷桂疏稱寧夏府屬之新寶二縣前因地震裁汰其可耕之地經前督臣鄂彌達奏准興修惠農渠口展長漢渠之尾引水灌溉耕作安插無業窮民并請將沿河一帶長隄增築捍禦查沿河長隄自寧夏縣之王泰堡高崖子加培起

至寶豐縣止。延長二百二十七里。又惠農渠口。自寧夏縣之葉昇堡起。至通潤橋止。延長二百二十餘里。並加築橫埂一道。動帑興修。從之。○戊申。

上奉

皇太后自南苑還宮。詣

皇太后宮問安。○諭軍機大臣等。據德沛條奏江南水利一摺。朕已降旨。交與大學士等議奏。朕覽摺內。稱天然壩高郵諸壩。當謹守不得輕開。如遇水漲。洪澤湖實難容納。河臣當測量出水尺寸。先將高郵三壩。逐漸開放。量入為出。及至異漲。天然壩不得不開。必將水大情形。開放日期。一面移咨督撫。一面飭行該道府。於數日前。將高郵三壩并芒稻各閘壩。即行通放。使高寶湖水宣洩。然後再開天然壩。則水得順性。其勢自緩等語。朕初覽所奏。頗覺近是。及細加審度。似亦屬難行。今年水勢異漲。迥非尋常可比。苟不至十分危急。

斷無輕開閘壩。縱其淹沒之理。且民情刁悍。只知為己。不知為人。即如今年古溝之決。使先諭高邵之民。高邵之民。必將以為護未急之淮揚。而先殃我現成之百姓。萬方阻止。何以辦理耶。況水性無定。若果於前數日。即能豫料。可以酌定尺寸。漸次開放。使水勢可緩。則是並無急暴之形。何至不可收束。大為民害。若斯之甚耶。此皆河臣之苦衷。為督撫者。宜諒之助之。乃屢據德沛陳大受摺奏。以為疏導失宜。意在歸咎河臣。不思今歲水災。乃上天垂象。以示儆。此朕之不德。與該省督撫有司職業不修。或地方人心澆薄。之所致。完顏偉莅事未久。力小任重。伊既職司河務。其恐懼慙惶。自無可推諉。倘竟以水災專罪河臣。朕不忍為此也。況此次開放閘壩。實因不能兼顧。為萬不得已之舉。即高斌久任河防。諳練諸務。若遇此等異漲。恐一時亦未有萬全之策也。朕看督撫與河臣。不能和衷。已露形

迹似此各持意見必有妨於公事河務重大關係匪輕可將朕意詳晰傳諭德沛完顏偉陳大受令其各矢忠誠屏除私意以副朕之委任並令高斌周學健與伊等同觀之再朕為洪湖日夜塵心而完顏偉半月有餘未曾具報水勢此則伊疎忽之處著彼速行奏聞尋據完顏偉奏覆臣跪讀諭旨感戴

天恩伏地涕零惟有凜遵聖訓以冀仰副

皇上委用期望之至意至臣前在古溝東壩半

月有餘未報水勢實屬疎忽得旨前諭已悉

○諭滿洲人等凡遇行走齊集處俱宜清語行在處清語尤屬緊要前經降旨訓諭近日在南苑侍衛官員兵丁俱說漢話殊屬非是侍衛官員乃兵丁之標準而伊等轉說漢話兵丁等何以效法嗣後凡遇行走齊集處大臣侍衛官員以及兵丁俱著清語將此通行曉諭知之○已酉

世宗憲皇帝忌辰

上詣

奉先殿

壽皇殿行禮○遣官祭

泰陵○庚戌

上奉

皇太后御暢春園○辛酉○幸圓明園○辛亥秋分夕

月於西郊遣誠親王允祕恭代行禮○

上詣暢春園問

皇太后安○諭軍機大臣等廣東廣肇圍基向

來原係民修相安無事後經鄂彌達奏請改為官修百姓遂以為無與已事一切委之於官歲歲多有衝突民既置之不問官豈能曲為隄防今辦理數年總未妥協仍不免疎虞將官員徒受叅處而百姓愈長刁頑為籌久遠終非長策可寄信與慶復令其詳審本地情形若可仍改民修即將所見具摺陳奏○戶部議覆安徽巡撫張楷奏稱上江之鳳陽潁泗三府州屬與下江之淮安徐州海州境

壤毗連風土大畧相同所有淮徐海三屬捐監糧色業經江蘇撫臣陳大受於本年四月間奏明酌議陳奏淮北民間食用俱以二麥為重請此次捐納本色准其以大麥一石抵穀一石小麥一石抵米一石經部議准獨上江之鳳潁泗因調任布政使包括原奏減三收捐內止請兼收粟穀並未議及二麥但三府州去秋歉收粟穀難得惟高地二麥尚有收成鄰近豫省產麥之區購買亦易況水淹地畝涸出時尤須二麥散借作種自應照依淮徐海之例一體收捐再減三之例奉行幾及四月尚無生俊報捐今並收二麥若仍照部議歲底停止恐所捐太少無益於事況三府州賑務須俟次年麥熟方竣而頻年被淹倉廩空虛亦急須添貯應請再為展限俟次年五月麥熟糧價平減之日停止應如所請從之○準噶爾部人三津根敦扎卜舒翁噶爾察克鄂爾謨泰薩里松布庫沙喇六人同來降命

賞給安插如例○壬子諭上下兩江現在辦理散賑事務至數十州縣之多恐現在諸員不敷更調即從前揀發之人亦未必人人足供差遣著九卿於候補知府以下知縣以上等官內各舉所知即交吏部帶領引見務期秉公慎選不得徇情濫舉○又諭京倉建蓋收貯蓆板房屋一案各倉奏請動用錢糧數目不一房間亦多寡不齊爾部可再行詳加查勘如必須建蓋酌量足敷收貯畫一辦理倘有不必要建蓋者即無庸建蓋○大學士鄂爾泰議覆兩江總督宗室德沛奏稱洪澤一湖上承河南安徽七十二河之水向由清口而出濟運敵黃來源甚巨屯蓄堪虞故於高堰迤西設三滾壩分洩又作天然二壩以防異漲後因湖水南瀉為下河之憂是以將天然并高郵諸壩封閉由是而湖力既可敵黃且下河之興鹽等處悉免水患蓋天然二壩一啟既恐湖弱不能敵黃且洪水直注高寶

諸湖上河受害則高郵三壩不容不開高郵三壩一開則下河州縣又遭淹沒是束水歸海宜亟講也查下河高寶興泰山鹽等州縣地勢本如釜底三壩之水泛濫而下若僅由鹽城之天妃等閘與阜寧之射陽湖而出則最低之興化已淹沒殆盡臣採訪舊議籌度情形惟有於高郵三壩之下左右築隄二道束水東循綠洋湖北經興化南界泰州北界直達串場河抵范公隄之草堰白駒等閘第

閘門洩水無多應於范隄通水處酌建滾水大壩使洩歸大海惟是三壩至海口地勢高下不一應用水平測量使河身隄面一律均平河身可無過深而新隄必較范隄增加數尺水聚流暢即海潮上湧內水高於外水足以相敵不致內灌其環繞支河擇其緊要築隄挑濬貫串入海則上下河均免泛溢其邵伯湖南之水舊由芒稻河董家溝沙壩閘入江者除已修建之芒稻河外應於董家溝沙

壩閘二處酌加滾水壩數十丈一遇異漲即時啟放迅流入江則揚城一帶可免浸漫至天然高郵諸壩仍當謹守不得輕開如遇水勢漲溢洪澤湖實難容納河臣當測量高家壩三壩將次過水先將高郵三壩逐漸開放量入為出及至異漲天然壩不得不開又必先將水大情形開放日期一面移咨督撫一面飭行該道府於數日前將高郵三壩并芒稻各閘壩即行通放使高寶湖水大肆宣洩

然後再開天然壩則水流順性其勢自緩等語除該督所請如遇異漲將天然等壩豫測尺寸先行咨明開放日期之處已經奉有諭旨欽遵行知外查淮泗諸水匯聚洪澤一湖湖水南瀉則下河汎濫湖水迴蓄則出清敵黃是以高家壩為運道民生一大屏障而天然二壩允宜封閉者不特恐湖水勢弱不能敵黃以致倒灌之害大且天然壩既開則高郵之三壩必啟興泰小鹽等州縣皆不免其

魚之嘆。所關甚鉅。該督謂不可輕開。自屬公論。至今年異漲。非比尋常。該督目擊情形。思善後之策。意在通順尾閘。使易赴壑。審高下之勢。酌通塞之宜。亦此時所當長計。遠慮者。夫治水之道。下流通疏。則上流自不漫溢。入江入海。其大目也。今欲令水東注。直達串場河。抵范公隄之草堰白駒等閘。并於通水處酌建滾水大壩。以時啟閉。瀉歸入海。其說近是。但謂於高郵三壩之下。左右築隄二道。以束水。如果隄成水束。不致泛濫。而道里綿亘。支河如織。勢難中截。恐隄防方立於目前。衝齧即繼於事後。勢不得不多建閘洞。以資通利。閘洞紛立於二隄之間。恐隄工仍難保固。且謂河身可無庸過深。而所築之隄必較范隄增高數尺。將來隄高而河身亦高。欲藉內水以敵海潮。而潰決之患。先已不免。俱不可不豫籌。至邵伯湖南之水。由芒稻河入江。自宜宣通修建。使得所歸。其董家溝沙壩閘二

處據稱應酌加滾水壩數十丈。一遇異漲。即時啟放。亦宣洩之一道。但其地皆窪下。最易漫溢。欲添壩座。均當相度得宜。河防關係重大。臣等未敢懸定。應請交與總河完顏偉會同欽差總督高斌。侍郎周學健及該督撫等詳查定議具奏得旨。依議速行。○理藩院奏喀喇沁固山額駙羅卜藏敦多布之妻固山格格未曾請旨。違例自行來京。應罰格格俸一年得旨。理藩院叅奏知道了。公主格格等未曾請旨。不准自行來京之處。想未傳知。是以格格不知。故因謝恩來京。亦未可定。著加恩免其罰俸。但此係定例所關。其歸途應給口糧。著停止。該衙門可再將此例遍行傳諭。公主格格等知之。○癸丑遣官祭賢良祠。諭定例省城駐防官員內降級調用之員。遇有應得之缺。列名於保題人員之次。帶領引見。倘因保題之人過多。以之補放。其降級人員不得補用。屢次送京引見。徒勞往返。嗣後

如有兩次引見不放者。第三次引見時著聲明緣由具奏。在京之八旗降級調用人員引見亦著一體於第三次聲明具奏。○閩浙總督那蘇圖福建巡撫劉於義奏據詔安營遊擊聞上達稟稱。詔安縣白葉村陳作溪東村許尾水湖河村何魁等謠言惑衆。隨即查拏據千總林三拏獲何魁起出藤牌紅頭布大刀牌刀。又獲許尾並同夥解縣收審。嗣據聞上達報稱。陳作住處與廣東饒平交界彼處奸匪四五百人欲來白葉村會齊。刦取詔安縣城。聚集離城十三里之考湖地方。當即帶兵勦捕。即有紳士耆民率領各鄉義民千餘人願隨進勦。及至考湖賊衆先已驚潰。先後拏獲賊犯並紅頭布紅衣褲連人解縣。林三在峯頭嶺會擒賊首陳作並續獲匪夥。又據陳作供出同謀詔安營兵丁關格等已革糧移縣審辦。現在民情寧謐。安堵如故。得旨知道了。此案甫經聚衆旋即擒獲。實汝等調度

有方也。已有旨交部議敘矣。諭部曰。據福建總督那蘇圖巡撫劉於義摺奏。漳州府詔安縣有匪類聚衆為盜。未經舉發。即偵探擒獲。不致漏網等語。匪類聚衆為盜。大干法紀。那蘇圖劉於義即時訪聞。按名拏獲。甚屬可嘉。著交部議敘。提督蘇明良總兵官龍有印亦著議敘。所有訪察緝捕用力之文武官弁著該督撫分別具奏。交部議敘。其先期出首及率領義民擒賊之衿士耆民著該督撫查明

嘉獎賞賚。○甲寅

上詣暢春園問

皇太后安。○諭閩省為濱海之區。百姓多藉魚鹽之利。以為生計。朕聞該省鹽課內頗有苦累。商民之處。蓋有司於應徵銀兩外。輒以雜費無出。借端加派。習以為常。如每鹽百觔加增錢二十文。至七八十文不等。名之曰長價。又各場肩魚客販買鹽。請領道印給票執照。或每單徵錢三文。或每石徵錢三文。名之曰

單錢。又正額。每鹽百觔收銀一錢五分。各場員實收錢一百五十文。該合銀一錢六分六釐。每百觔申銀一分六釐。亦令入官名之曰錢水。以上各項皆巧取陋規。不便於商民者。著該督撫一一確查。通行禁革。如有必不可少之雜費。即於項內存留若干。減去若干。不得仍前多索。永著為例。務期實力奉行。俾商民得以寬裕辦課。且使肩挑背負之民。均霑餘利。以餉其口。該部即遵諭行。○又諭據湖廣督撫奏報湖北之荊州。安陸。漢陽。襄陽。德安。湖南之長沙。衡州。岳州。常德。澧州。等府州所屬之州縣。及沔陽。武昌。襄陽。三衛。有夏月被水之處。淹沒田廬禾稼。民人困苦。現在動支帑平倉穀。按名賑濟。又據江西巡撫陳宏謀奏報贛州。吉安。南安。三府所屬州縣。有被水較重之處。現在災民俱已照例賑濟。安頓不至流移。朕覽湖廣。江西督撫等所奏。深為軫念。比即嚴切批諭。該督撫加意撫綏。悉心

籌畫。務登災民於衽席。今思江廣雖係偏災。而被水之民。未嘗有偏全之別。著該督撫於被水地方。將應徵錢糧。先行緩徵。然後查勘。照例題請蠲免。該部即傳諭知之。○工部議准甘肅巡撫黃廷桂疏稱。寧夏府屬之新寶二縣。前經奏准興修農渠口。并加修沿河長隄一道。加築橫埂一道。嗣經給事中朱鳳英奏稱。渠口可開。則渠身可濬。漸開漸復等語。又據御史李源奏稱。沙灘之地。復經殘毀。若欲修復舊規。徒勞罔濟等語。部臣及九卿議請交臣等確查。妥議。臣查惠農渠道地勢南高北下。自三堆子以上。地勢高坦。自應補築修濬。其三堆子以下。地窪沙鬆。誠難築隄。捍禦無庸。遽議修築。現從四堆子起至通潤橋以下。直抵西山脚。截築橫埂一道。將通義等二十三堡收入埂內。勘丈可耕地二千七百餘頃。安插窮民三千餘戶。俟試種一年後。勘明確數題報。其永惠等二十二堡地畝。截

置埂外聽民墾植免其入額從之○刑部奏查新例旗人造賣紙牌骰子為首者發極邊烟瘴充軍為從發邊遠充軍俱折責枷號發落民人為首者發邊遠充軍為從杖一百流二千里詳繹例意不曰製造而曰造賣是必造而已賣方與此例相符若造而未賣者雖屬故違禁令尚未貽害地方按其情罪原與造賣者有間但例內未經指明作何懲治伏查律例館新書內載造賣未成照造賣已成者減一等治罪一條現在纂輯例文亦不言製造未成而言造賣未成則造而未賣者原可引用擬斷亦無庸另立科條再查描畫紙牌亦未註明已賣未賣似應一體分別遞減得旨仍著一體治罪不必分晰○乙卯諭朕於九月十一日前往馬蘭峪恭謁祖陵所有應行事宜著各該衙門先期備辦○又諭朕此次恭謁祖陵著和親王怡親王大學士鄂爾泰張廷玉

在京總理諸務○諭大學士等朕思江南水災之後賑卹乃一時之補救而所以安養民生者全在明歲之農功自被水迄今已經兩月雖水漸減退不為大害而瀰漫之勢仍似從前若疏濬稍後機宜則今歲田地斷不能盡皆涸出小民春耕無望彼嗷嗷待哺者何以為生況此時搭棚棲止於長隄者亦豈可以久處亟宜講因地制宜之策其如何疏洩水道涸出田畝以安民業以奠民居著欽差大臣河道總督江南總督悉心妥議速為經理毋得稽遲該部遵諭速行○吏部議准四川巡撫碩色疏稱綿竹縣主簿捷為縣王村場大使劍州州判西充縣仙林場大使三台縣石板灘鹽大使樂至縣縣丞合州州同奉節縣縣丞富順縣主簿并斫縣鹽井灣鹽大使以上十員所管事務頗簡可以歸并該州縣兼管應請裁汰從之○以故雲南姚州土州同高崇亮之弟高崇禹襲職○丙辰諭軍

機大臣等。福建詔安縣奸民陳作等私結匪類。謀為不軌。幸先期敗露。拏獲首犯。不致為害。但思此等先犯。非尋常賊盜可比。既有此舉動。必有邀結憑藉之處。海洋相近。易於藏奸。今既拏獲多人。自不難窮究底裏。況那蘇圖等所奏。尚有別案。今辦理此事。固不可苟且了結。或致貽後患。亦不可張皇洩漏。以激成事端。爾等可密寄信與那蘇圖等。令其慎重詳密。務審度機宜。默運操縱。以靖邊圉。而安良懦。

○戶部議覆護理山東巡撫魏定國奏稱。登萊青三府倉穀過多。霉變堪虞。請分撥府屬各州縣收管得旨。依議。江南被水地方。需木甚多。登州府分撥蓬萊等州縣穀六萬石。若由海船運送。淮安甚為便捷。著山東巡撫知會江南督撫。妥協辦理。如登萊兩府濱海州縣之積穀。尚有可以運致江南者。著巡撫晏斯盛酌量定議。一面具奏。一面辦理。其所運穀石。俟秋成後。東省採買還項。兵

部議准。陝西巡撫岱奇奏稱。嗣後出征病故官員。除提鎮毋庸另議。賞卹外。副將應照三四品官之例。賞卹從之。○刑部議准。直隸總督高斌咨稱。嗣後除各省發遣寧古塔等處人犯。未經到部。及到部時。妻室病故者。即將該犯遞回原籍改發外。其已由臣部咨送兵部轉發者。以山海關為界。如解至山海關外。遇有妻室病故。應一面逕行發遣。一面申報臣部。如在關內。遇有妻室病故。應一面申報臣部。一面遞回原籍改發從之。○又議覆湖廣總督孫嘉淦湖北巡撫范璨奏。請設立賞格。以勵健役。一疏。查捕役倍給工食。捕獲盜賊。是其本分。至盜發即獲。或全夥皆獲。其應如何賞賚之處。祇在有司臨期酌辦。若定為經制。必致非賞不行。無此治體。且恐惡役貪賞。誣良。裁賊賊勢所不免。若一遇多盜。設賞懸購。盜息乃止。似亦可暫行。而未可施之久遠。今海宇乂安。崔符不起。然既有良民。即有莠

民。今乃獨於湖北一省添捕盜之賞格。豈湖北之外盡夜戶不閉乎。如果應行即應行之。天下即以江蘇言之。自准楊永斌條奏以後。不聞盜風減於平日。其無效已可概見。臣等愚見竊以為江蘇省已行之例亦應停止。果有劇盜巨魁與尋常不同者。該地方官呈報督撫并轉咨鄰省一體緝拏。如能擒獲按大小以為重輕賞重者不過一百兩。如獲盜之功有百兩不足以酬者。准將得功捕役拔補千把。其尋常強劫竊奪等案不必議立賞格。即有量賞之處仍照舊例聽地方官斟酌捐給從之。○理藩院奏黑龍江將軍博第報稱俄羅斯人越境所柴並無打牲游牧行蹤得旨與俄羅斯國分定邊界關係甚屬緊要博第等應派材能官員慎重其事著意巡察看來伊等平時但草率塞責並未實心任事若果慎重其實力巡察近日俄羅斯伯爾克之人何得越界行走此皆明係伊等怠玩所

致該將軍著行文飭行嗣後務須實力任事竭力巡察不得仍前怠玩塞責。○甘肅巡撫黃廷桂疏報口外柳溝衛所屬布隆吉等處開墾水地二十七頃二十八畝有奇。○是月吏部尚書署直隸總督史貽直奏直屬禾稼豐收糧價平減間有粘蟲旋長旋消實於田禾無損得旨覽奏曷勝欣慰但不可因朕祈年之念切而有所粉飾於其間也。○兩江總督宗室德沛奏報今歲江淮揚徐海五府州所屬之江浦六合山陽阜寧清河桃源安東興化銅山沛縣邳州宿遷睢寧蕭縣海州沐陽并淮安大河二衛計十八州縣衛又甘泉豐縣碭山鹽城高郵寶應徐州衛並江都泰州等處被水茲復以古溝東壩衝開揚州一帶水患尤重。臣與撫臣親往料理所有淮揚徐海四府州已派委道府督率地方官動支銀米自七月為始先撫卹兩月其冬春開賑事宜另行酌辦隨時奏聞得旨即如汝等另

摺奏。七月十七八尚有異漲。而此番奏摺。乃八月初二日。於目前情形。總無一語道及。如此不留心民瘼。不體貼朕心。何能慰朕懷耶。覽奏徒增朕憂耳。○又奏。下江五府州被水。現在分別給賑。災民受賑多有感泣者。間有閭閻之人。大率係不應賑之劣生地棍。臣已飭令查拏。總之災黎固應撫卹。頑民亦當懲儆。務使共知皇恩無不周遍。而帑項不容濫邀。法網不可輕蹈。得旨。所見甚是。但恐朕前

所言如此。而外則假恩以市名。仍歸過於上。此從來為臣之巧計。亦從來為臣之所以受害處也。恐汝看不到此戒之。○兩江總督宗室德沛。江蘇巡撫陳大受。奏報今歲湖河盛漲。疏導失宜。以致衝開古溝東壩。上河幾成巨浸。幸將高郵州之南關五里車邏三壩並昭關一壩開放。水注下河。故上河止災於廬舍田園。然數日以來。水落亦僅三尺。而下河之興化泰州一片汪洋。臣等飭令多方賑卹。

在下河人民。現已安置。自應俟上河之水平減如常。然後再開各壩為善。乃河臣完顏偉飭將各壩即行堵築。水無去路。倘遭風雨。患必更甚。臣等業經咨阻。至古溝東壩決口日寬。洩水日湧。若不即行堵禦。則洪澤一湖水力必弱。不能敵黃。不特上河之水不消。且恐黃水倒灌。臣等已飭速行搶築。至今觀望。蓋緣料物素無一備。故也。查江南水患。大率湖河為害。臣等不敢坐視。所有各壩應行啟閉情形。合先奏聞。得旨。河工一事。汝等斷不可如此掣肘。今歲異漲。勝常。實朕之不德。與爾等督撫不職。以致上天示警。若仍歸之河臣。此即汝等推諉之處。何以感召。

天和耶。將此奏與高斌周學健完顏偉同看。其果有疏導失宜之處。聽高斌周學健查奏。彼二人不似汝等各懷心意者也。○江南河道總督完顏偉奏報秋汛平穩。古溝東壩堵閉。

完竣情形得旨覽奏稍慰朕懷○安徽布政使魏定國奏上江賑卹事宜地方情形得旨所奏俱悉勉力為之汝在山東惟事姑息頗覺無能今當改過也○江西巡撫陳宏謀奏南昌饒州九江南康等府或沿大江或繞鄱湖七月以後川楚水大由長江而下江水異漲鄱湖之水不能歸江江水倒漾以致沿江之德化湖口彭澤沿湖之新建南昌進賢鄱陽餘干建昌都昌等縣俱被淹浸臣已委員

確勘分別輕重加意撫卹得旨所奏俱悉○閩浙總督那蘇圖福建巡撫劉於義奏閩省習澆民悍月餘來不法之事已經屢見現在分別輕重辦理但積習相沿臣等固不敢任情滋擾亦不敢姑息養奸惟有力為開導冀其感悟如事犯發覺嚴加究治庶懲一儆百民知畏罪奉法得旨所奏俱悉奸民敢於倡亂者良由平日之恩澤不逮及至有事威又不能伏其心而或者務為掩飾以期無事是

以民不知懼耳今後當以此為戒○又奏報連江羅源福清屏南福安寧德福鼎莆田等縣被水委勘撫卹得旨所奏俱悉被水處可加意賑卹之○浙江巡撫常安覆奏江塘海塘為浙省要務臣屢次親勘如逢大潮之期洶屬洶湧及細為詳察自尖山堵塞以來潮頭不能北向離塘根尚有數里勢雖大而無碍惟塘根對過蜀山之北積有漲沙潮頭直衝此沙以致迴溜激射此石塘加砌坦水柴

塘加鑲柴薪所不容已然潮頭實非直侵塘根塘根實非正當頂衝況石塘柴塘工料齊備因前撫臣盧焞意在改建石塘遂似刻不容歲修督臣德沛意在改建石塘遂似刻不容緩所見既殊措詞遂致過當至於塘根漲沙固可藉護一時而老鹽倉去年舊沙漸已塌陷今春竟刷去二千餘丈近雖云有嫩沙而又消長不時實未可恃臣因未經伏秋二汛未敢冒昧陳奏所有浙塘現在情形據實奏

聞得旨所奏俱悉○又奏玉環一營瑞安平陽二縣因陡起颶風沿海一帶被水已委員加意撫卹得旨所奏俱悉○福建巡撫劉於義奏詔安縣陳作聚衆為匪經遊擊聞上達千把總林三等擒獲首犯並續拏餘匪七十餘人臣恐此外尚有主持之人檄泉州府知府王廷諍署漳州府知府張廷球前往查勘今據該府等報稱細查此案起事根由陳作以本年三四月間詔安缺雨米貴即欲借此為名招集匪徒計圖搶奪縣城後因人心不齊又兼官兵搜捕甚急餘黨逃散其主謀之人訪係陳作之兒女親家生員官亦陽代造逆示希冀煽惑愚民以為搶縣之計現已獲審供認等語除飭漳泉二府究完餘黨解省鞠擬現在所調協防兵弁俱已撤回百姓樂業得旨所奏俱悉王廷諍人甚去得漳州宜調彼為安○又奏據臺灣道劉良璧報稱彰化縣有奸徒豎旗一面上寫順天二字又寫

十一人姓名內七人訊係良民諭令各回安業隨經拏獲為首之吳永泰林察兒二名並匪犯莊列等二十二名查臺地五方雜處遊手無賴之徒挾嫌圖陷常有豎旗之事居民不以為怪現在地方安堵如故等語臣已檄飭該道府將現獲各犯細訊究擬其未獲各犯設法查拏得旨知道了雖屬常有之事然不可聽其常有此等事也○湖廣總督孫嘉淦奏據襄陽府知府孟昭稟稱馬快張文德等在府城四牌樓地方拾有小紅封內裝偽示二張書寫總理七十二鎮都督大將軍李梅字樣又另單開寫頭等大將軍李勇次等小將軍陳龍等項名目語多悖逆明係無賴奸徒妄思煽惑借現在通緝之逆犯李梅為名造作妖言若行文查捕則傳布愈廣正墜奸人術中且單內開有張么白般等詭名確係楚人聲口奸匪必非外來當即嚴飭訪拏並密札撫臣提鎮留心查緝務須鎮之以靜

不得輕易聲張。得旨。所見頗是不聲張而密辦。以靖根株。則可。若忽視之。或致釀成事端。則不可。俟緝獲之後。即行奏聞。○湖南巡撫許容奏。近日米價增貴。因商販源源搬運。鄰封官買。亦有咨會。理無禁遏。竊計湖廣雖熟。在湖廣且難以言足也。得旨。所奏俱悉。各省採買。固非湖廣之所願。而各省嗷嗷待哺之民。尤幸有此也。若祇為湖廣而行遏糴之政。非朕一視同仁之心也。○山東巡撫晏斯盛

奏。江省被水流民。就食來東。待哺甚急。臣飭令查明。每日計口給米。總期寧濫無遺。再地方偶歉。流民轉徙。若照例入境。即資送回籍。未免徒滋道途僕僕之苦。且回籍亦難依棲。似可俱令照前一體留養。得旨。朕亦尋思到此。已降旨矣。此奏與朕意符合。嘉悅覽之。仍應辦理得宜。更為妙耳。○河東河道總督白鍾山奏。山東運河南北綿亘一千二百餘里。南自江南交界臺莊。至臨清之版閘。名為閘

河北自版閘至桑園鎮。直隸交界三百餘里。名為衛河。亦名下河。每年大小輪挑止係閘河內南旺臨清濟寧彭口等四處塘河。俟此四處挑竣。募夫散歸。額設長夫各回本汛挑浚河道。此成例也。臣因四處塘河夫有定數。工有定限。既難挑浚如式。而長夫必俟協挑塘河完竣。方回本汛疏淤挑淺。為日無多。乾隆二三年間。節次奏明酌增挑浚之限期。更定募夫之工價。塘河已如式深通。又將各廳

汛長夫通盤計算。或工多而夫尚少。或工少而夫尚多。酌盈劑虛。各處長河亦得一律深通矣。此在閘河以內行之數年。現有成效者也。至於衛河。緣河濶岸陡。河底又係流沙。不但不能建閘束水。亦不能如閘河以內築壩挑挖。且灣曲甚多。漳衛之水又挾沙帶泥。若遇天時久晴。水弱流緩。則隨處停淤。雖多費帑金。亦不能使泥沙去而不留。是以向來並不挑浚。下河通判所屬額設淺夫。亦俟協挑

臨清塘河工竣始回本汛挑切古淺灘嘴等處其餘流沙隨時遇淺刮浚此衛河成例也臣思衛河形勢雖與閘河不同但刮無定之流沙不能無待於臨時而欲除現存之停淤不可不豫籌於平日今若照閘河築壩戽水下鍤挖土勢必不能惟有用船撈浚之法寬其日期撈起泥沙駕舟遠送以免仍卸入河庶幾得寸則寸得尺則尺舊淤既除新淤亦自漸少查撈浚之法以船一隻抵募夫一名每船用夫四名持長柄杏葉杓下屬布兜入水撈沙傾入船內船滿則駕往河崖堆積候驗按方計工從前洳河彭口遇微湖水大之年河水不能放歸湖內難以築壩興挑嘗以此法逐段撈浚淺深一律相平漕舟並無滯滯今衛河淤沙亦應照此法撈浚今歲小挑所有下河通判所屬淺夫二百一十四名募夫九十四名免其赴臨協挑即在本汛撈挖先將河內淤沙探明厚薄估定應撈寬深丈

尺各船鴈列河中自上而下以次施工務令河泓浚深以利運行至臨清塘河近年挑浚已深夫工每有節省倘少此下河淺募人夫或有應募添補之處查有該汛去年節存工價銀四百五十兩可以酌量動用毋庸請帑其下河募夫額定三十六日限期若工多難以如期報竣臣當於各廳汛內通盤打算通融辦理亦毋庸動帑此於不能挑浚之處別求撈挖之法即以協挑閘河之夫工移為撈挖衛河之用雖畧為轉移而不增一夫不動一帑於舊例仍無更張自來未挑之衛河得以撈浚淤沙於漕運必有裨益得旨料理甚屬妥協知道了○河南巡撫雅爾圖奏豫省各屬秋禾茂盛預卜有秋惟開歸陳三府前次被水各縣不無損傷又汝寧許州所屬間被淹損不過偏隅現為撫綏務俾得所得旨如此據實陳奏方是雖云偏災彼被災之人為苦則一耳可不撫卹耶○又奏上下兩江

今年水災。多有窮民就食豫省。臣動支存公銀兩買米分設粥廠。每日計口散給。俟彼省水涸可耕。即分起資送回籍。得旨。所奏俱悉。○又奏緝獲沛縣姚窩巨盜姚二鬍子並夥盜姚小臘等四名。得旨。所獲盜犯何未見題到耶。此等惟宜速結。若久留之於獄。恐別生事端也。○甘肅巡撫黃廷桂奏。率蘭金縣隴西安定通渭平涼固原州鹽茶廳秦州徽縣秋禾被雹。現飭勘查。分別賑免。彙題。惟秦州通渭縣三處。衝倒房屋壓斃人口殊堪憫惻。亦經檄令賑給銀兩。得旨。所奏俱悉。○署兩廣總督慶復奏。覆交地荒歉。饑夷流入內地。良匪莫辨。已飭令查明。病餓者暫與存恤。強壯者酌給口糧。押送出關。並嚴禁民人不得收留販賣。至審訊與夷目韋福琯往來之民人葉蓁並未在夷境主謀多事。周老六亦無教習拳棒之事。俟并案審擬辦理。得旨。是知道了。○又奏兩粵雨水調勻。晚禾豐茂情形。

得旨。覽奏曷勝欣慰。卿在滇而滇豐。今在粵而粵稔。可謂一路福星矣。○又奏粵西思州邊境土司偶值雨澤愆期。地湧水泉灌溉千畝田禾。農田有賴。得旨。欣悅。覽之所悅者。非為嘉祥。乃為農田之利耳。○福建陸路提督蘇明良奏。兵丁關格等不法。失於覺察。乞嚴加議處。得旨。此事爾等調度有方。甚屬可嘉。何罪之有。至兵丁同謀。乃汝等向來不能約束之咎。但有此功。可贖前愆。今後慎之。其聞上達。林三待事定之後。交那蘇圖給咨送部引見。朕欲加恩也。○漳州鎮總兵龍有印奏。兵丁關格等不法。臣有統轄之責。乞勅部嚴議。得旨。汝等此番料理頗屬可嘉。已交部議敘矣。至於平時失於防範。汝不能辭其責。而甚至兵丁同謀為匪。汝豈得無過。俟審明後。功過亦不相掩也。○潮州鎮總兵武繩謨奏。詔安縣匪犯陳作聚眾不法。臣屬黃岡饒平界連閩省。當飭將備帶兵接應。拏獲夥匪九

名解縣審訊並堵緝餘黨情形得旨所奏俱悉至汝如此策應有方殊屬可嘉也

實錄卷一百七十三

四十五

大清高宗法天隆運至誠先覺體元立極敷文奮武孝慈神聖純皇帝實錄卷之一百七十三

大清高宗法天隆運至誠先覺體元立極敷文奮武孝慈神聖純皇帝實錄卷之一百七十四

監修總裁官經筵講官太子太傅文淵閣大學士文淵閣領事領銜內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 臣費桂

總裁官經筵講官太子太傅大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級 臣董誥內大臣戶部尚書保蘇滿洲都統軍功紀錄五次

尋常紀錄十四次 臣德瑛經筵講官太子少保工部尚書紀錄六次 臣曹振鏞等奉

敕修

乾隆七年壬戌九月丁巳朔諭大學士等江

南淮徐鳳穎等處今年被水甚重民人困苦

朕宵旰憂勞百端籌畫為養民裕食之計查

山東德州臨清兩處有截留漕米共十萬石

原以備山東直隸緩急之用者今兩省秋成

豐稔無需米糧接濟若以之撥發下江淮徐

等處則順流而下一水可通於地方正有裨

益著江南督撫知會山東巡撫將如何運送

公同妥議速行辦理毋得遲延至於江南賑

濟需米正多據德沛陳大受摺奏已將江南

各州縣倉穀撥運三十萬石並淮徐等處現存穀二十四萬石為平糶賑卹之用又借浙江倉糧十萬石又從前上下江巡撫奏稱發銀十萬兩前赴河南採買麥石運江應用等語朕又降旨令將江南明年漕糧應截留若干之處著該督撫定議具奏並降旨將山東登州貯穀六萬石由海運送江南今又添運山東截留漕米十萬石不知江南被水地方已足敷用否著德沛陳大受張楷等通盤計

算現存有米若干陸續運到若干如何接濟至明年春夏之交共須米糧若干始可敷用一一具摺速奏該部即遵諭行○又諭出場馬匹原定以不拘八九月惟看時令之燠寒再行解送今秋天氣尚熱值草秀之時正宜牧放馬匹俾得肥壯乃伊等即行解送殊屬過早嗣後出青之馬務令飽飫豐草俟實應解京之時詳報該部查核俟覆准到日再行解京並交察哈爾左翼總管於每年入場時

將天氣之燠寒霜降之早晚隨時報部以便查核○吏部議覆湖南巡撫許容疏稱湘潭縣遺缺聽部揀補查有揀發之于文駿汪度馮運棟李松等俱係候補人員應令該撫等即於命往人員內酌量委用題補毋庸再行揀選如揀發人員內實無可題補之員即聲明具題再行照例揀選嗣後各省應調補之缺如該督撫聲明無可調補題陞之人過該省現有揀發人員即照此例辦理如命往人

員尚未到省該督撫題請揀發臣部亦照此例辦理從之○左都御史管廣東巡撫王安國疏報乾隆六年分雷州府屬壆復遷移稅二頃二十三畝有奇廣惠潮肇瓊連六府州屬共報壆額外水田稅九十五頃六十畝有奇又廣潮惠三府屬共報壆沙灘稅一百五十三頃七十七畝有奇又廣州府屬番禺香山二縣歸併衛所屯田共壆復遷移稅二十畝有奇○戊午

上御勤政殿聽政。○戶部議准雲南巡撫張允隨疏稱。運銅船隻。若用頭號大船。儘量裝載。

未免轉掉不靈。十損二三。查有夾舳。禿尾中

船。較大船平穩。八分裝載。可以無虞。應令各

運官。會同地方官。雇募運官水手。不得夾帶

米石貨物。從之。○兵部議准直隸總督高斌

奏稱。天津滄州二處。應添駐滿兵一千二百

名。所需加築圍牆。建造衙署營房。約估工費

不下五六萬兩。原存該營生息銀。不敷動撥。

請於司庫地糧支用。於庫項內撥銀三萬兩。

交運使轉發商人營運。一分起息。以敷歲需。

恩賞弁備。新添滿兵開賞之用。再添建各工。

需帑數萬。工程重大。該地方官未能諳練。并

請簡命內務府或工部司員會同天津道估

計監造。得旨。依議。不必簡派司員。○工部議

准直隸總督高斌疏稱。宣化府西門裏面甕

城牆一段。同東南西北四面城牆。累年被雨

滲壞。邊關重地。應動帑修理從之。○以太僕

寺卿趙大鯨。為大理寺卿。○己未

上詣暢春園問

皇太后安。○諭大學士等。從來節烈之婦。祀於

其鄉。所以旌善。端化樹之風聲也。刑以弼教。

其致死本婦之犯。法無可貸。是以乾隆五年。

福建秋審蕭充一案。該撫擬以情實。九卿改

為緩決。朕曾降旨申飭。蓋以節婦之死。由於

該犯之調戲。若將該犯輕入緩決。非所以重

名教而端民俗也。今正值九卿秋審之時。其

在蕭充以前。定為緩決之案。俱係九卿集議

經朕覽閱降旨者。此番毋庸改為情實。其在

乾隆五年以後。此等案件。各省督撫多入於

情實之列。九卿執法。自不得輕縱。但強姦未

成本婦。因調戲而羞忿自盡者。其中情形不

一。朕辦理勾到之時。自有權衡。如果有一線

可原。仍當免勾。既經一次免勾。之後。下年即

可改為緩決。如係停止勾到之年。入情實者。

下年不得即改緩決。將此傳諭九卿知之。○

大學士鄂爾泰議奏。安徽巡撫張楷奏。覆鳳
潁泗三屬。從前雖常被災。歉然每次不過數
州縣。且水旱兼有。獨邇年合屬全被潦災。內
如阜陽縣等。未嘗不溝洫修治。支河通流。無
如淮水一漲。浮於平地數尺。即有溝洫支河。
無救淹浸。臣廣為訪詢。實因淮水下流。不能
迅趨入海。洪澤湖每年開放之天然壩。閉塞
不通。滾水閘又復加高。以致壅滯難消。汎濫
為害。此其積潦之由。不在安省而在下游。不

在支河而在二瀆。必使淮黃迅趨入海。洪湖
壩開宣洩如舊。無停滯漲溢之患。然後開濬
支河溝洫。以防雨水。庶民生得安等語。查治
河必先籌下游。以去路無阻。而來路可通。此
決川距海之說也。籌下游亦必先籌上游。以
來路有制。而後去路順流。此濬滄距川之義
也。就鳳潁泗而論。則以淮水為下游。就高寶
揚而論。又以淮水為上游。而由淮以注海。淮
水則為黃水之上游。分黃以入淮。淮水又為

黃水之下游。有分勢。有合勢。有相因之勢。有
相妨之勢。臣按安屬濱河州縣。屢被水患者。
由淮漲之故。淮漲之難消者。由洪澤湖底淤
墊之故。洪澤湖底之淤墊者。由從前朱家海
口決黃水橫流。直灌數月之故。湖底既高。則
容納數少。就下之水不能進而自返。返則停
滯。積漸潰溢。即溝洫支河。亦何能減洩。張楷
謂因淮水下流不能迅趨入海。以致壅滯。汎
濫。此言是也。至謂洪澤湖每年開放之天然

壩。閉塞不通。滾水閘又復加高。以為阜陽等
處積淹之由。此安省人之私言。不獨不為淮
揚計。亦並不為淮黃計。誠使淮黃病即以鄰
國為壑。終何利之有。臣按洪澤湖之天然壩。
並無每年開放之例。三滾水壩原以洩湖之
有餘。至滾水壩亦不及洩。然後不得已而開
天然壩。蓋下河既不能保。則不如保高家堰。
之為愈。緩急次第。固應如是。若謂開放湖壩。
上游即可無水患。則古溝壩決後。洪湖水已

大洩矣。上游之水似可無停滯矣。而淹浸之患至今未除者。抑又何故。總之淮欲其常盛。黃欲其可抵。高家堰長隄原以遏湖水之東注。使氣不旁洩。以全力抵黃。設開壩導之東注。則氣洩而力弱。不特下河州縣將歲被淹沒。而無以抵黃。黃水且倒行。既已倒行。能保其祇灌下游絕不至壅阻上游乎。常開天然壩之說。故知為安省人之私言。非通論也。據臣愚見。現在情形。惟以治淮為急。先但使湖水深通。黃流迅速。專黃之力以刷沙聚淮之力以驅黃。則上游赴淮之水皆以海為歸。而不至東潰。下游車邏等壩亦自不須開。凡入海入江之路。不過阻者通之。窄者寬之。便可不至停滯。何由漲溢。伏祈勅下河臣完顏偉與直督臣高斌令速堵古溝壩。速濬裴家場等河。并將淮黃之來路去路通盤計算。務治其本。毋徒治其標。或可補救得旨。依議速行。

○兵部議覆鑲紅旗漢軍都統和碩恒親王

等奏。八旗漢軍情願為民一案。除現任者均有額缺職守。其進士舉貢生監及捐納職銜未經出仕當差應俟一年限滿彙奏請旨至領過老圈地畝。并自置旗下及抵買公產地畝。如移居外省。不在近京五百里內居住。並不倚賴為生者。俱徹出入籍。在近京五百里之內。如情願轉售旗人者。聽不願轉賣者。仍聽耕種。其抵買公產地畝價銀。未經扣完。不願接扣者。給還價銀。徹出地畝。其有仍欲接扣者。仍令按季交銀。地畝令其管業。至各旗兵丁官房應行徹出。另給窮苦兵丁。若陪嫁公主人等。既經內務府撥出。已隸公主屬下。不便准其為民。應如所請。從之。○庚申諭朕車駕所至。鴻臚寺堂官有帶領地方官接駕之例。從前查斯海隨從時。在途騷擾。甚不安靜。有玷鴻臚之職。其人亦甚平常。著解退。以旗員用。此次著德山隨去。嗣後鴻臚寺官員派出隨駕者。務須謹慎。小心不得需索生事。

倘仍蹈前轍。經朕訪聞。必嚴加處分。諭軍機大臣等。朕聞今年湖河為患。皆由淮水下流不能迅趨入海。洪澤湖天然二壩。及高郵之南關。五里車邏等壩。永閉不開。水無宣洩之所。又毛城舖分減黃水十三口。雖束而為三。而各未斷流。洪澤湖不能容納。以致汎濫衝決。此次水災。雖係完顏偉承辦。實由鄂爾泰與高斌從前辦理未協。以致水潦頻仍。今復差高斌前往。恐伊回護前非。於事無益。京

師議論皆然。即江南士民。亦有俟高斌到彼呈控之語。朕思河務重大。若非諳練之人。即目覩情形。亦未能深悉。况僅得之傳聞乎。至於該處人民。居上游者則利於疏洩。居下游者則利於堵閉。均屬一偏之見。未悉河防全局。其說尤未足憑。况此次湖河異漲。非比尋常。未可執一而論。惟是水以海為歸。必順其就下之性。斯上游不致泛溢。亦事理之常在。高斌自必悉心籌畫。以拯救地方為重。不致

固執成見。朕既有所聞。可密寄信前去。或此番大水之後。湖河形勢不同。固當因時度勢。慎重區畫。抑或從前措置本屬未盡合宜。尤當及時變通。力為補救。斷不可回護前非。務須通盤計算。悉合機宜。俾湖水安瀾。黃流順軌。上游之鳳潁泗等屬。無湖水倒漾之虞。下游之高寶興鹽均免田廬淹沒之患。庶克紓朕南顧之憂。並令伊等將現在情形及應如何辦理之處。據實速行奏聞。尋高斌奏臣查

今年湖河為患之處。一係古溝漫工。一係石林水口。蓋古溝不漫。高郵之三滾壩原可不開。下河地方自不致受洪湖之水患。但古溝之漫。實由於洪湖之異漲。而洪湖之異漲。實由於淮河上游雨潦過多。暴雨驟至。迥與尋常盛漲不同。是以高堰水誌長至一丈五尺六寸。山盱三滾壩過水至七尺之多。其時清口大閘勢若建瓴。直注外河。山安海防暢行入海。若古溝不漫。再守旬日。漲水自消。並非

入海不能迅趨。與宣洩無所之。所致其毛城鋪減壩過水無多。較之洪湖異漲之水。不啻千百之一二。分洩適合機宜。並非該壩洩水過多。以致洪湖不能容納。至古溝漫工之為害。較於常年開放天然壩之害。實屬相等。天然壩之必應永閉不開。以免下河淹漫之患。毫無疑義。至若石林口之水患。則係今年八月內。河工疎於防範所致。原非平時經理未善。臣查下江被災州縣。計二十有九。皆係夏

秋雨潦為災。惟下河興鹽等處。復受古溝漫水之患。至上江鳳潁泗。被災之處。計十九州縣。亦因天雨過多。山水大發所致。當六七月水發之時。淮河上源諸水。俱匯注洪湖。以致洪湖異漲。泗州即在洪湖上口。水勢直注入湖。其最近之泗州。猶順流直下。並無倒漾之事。其不能逆流。遠至數百里之上。為害鳳潁尤顯然可見者也。伏惟聖明深悉河防機要。指授方畧。謂邵伯以下入江之路。宜多開幾

處。特命臣等留心詳勘辦理。臣等欽遵到揚州。同督撫面商。即遍尋通江河路。於灣頭之下。董家溝之上。查有石羊溝一處。原有舊河形。直達於江。此處可以挑河。修做滾壩四十丈。又芒稻閘之下。有董家油房。白塔河。孔家涵三處。亦有河三道。現俱通江。因防私鹽偷越。俱有土壩堵塞。今擬挑通河道。口門處。添建滾壩四十丈。以應石羊滾壩。並修理運鹽河路。鹽漕運行俱便。而淮水入江更可暢達。查古溝漫口。及高郵各壩堵閉之後。各處水落工平。田疇涸出。湖河形勢依然如舊。善後事宜。不過修補殘缺。俾一律整齊堅固。除淮水入江之路。必應欽遵聖訓辦理。此外實無另應區畫變通之處。其地方水利事宜。講求溝洫之通塞。亦並無有礙於河防之處。容臣欽遵諭旨。悉心籌畫。詳勘定議。奏聞得旨。覽奏稍慰朕懷。但知過能改。聖人所難。悠悠之論。固不足憑。而嘖嘖之言。亦殊可念。一切與

周學健等和衷悉心妥議為之至朕所指示。不過據朕一時所見。尤不可以為必是而從之。○又諭章隆前任廣東左翼總兵官。有人奏其辦事因循。不勝要地總兵之任。朕是以降旨。令其來京。因贛州尚屬內地。事務較廣東為簡。是以將伊補用。但伊年力就衰。才具平常。恐不能振作。廢弛營伍。其尚可辦理鎮臣事務與否。著德沛留心試用。據實陳奏。○鴻臚寺卿梅穀成奏。正一真人張遇隆恭祝萬壽。據禮部文稱。隨班行禮。應列左都御史下。侍郎前。臣思真人乃道家之流。祈禳驅邪。時有小驗。仍而不革可也。假以禮貌可也。乃竟入朝班。儼然與七卿並列。殊於觀瞻有礙。應請勅部定議。不必令入班行。得旨。此奏是。該部議奏。尋議應如所請。嗣後真人承襲謝恩。臣部帶領引見。並遵三年來朝之例。准其入覲。照例筵宴。宴畢還山。倘在京適值百官朝賀之期。免其列班行禮。從之。○賑卹湖北潛

江。沔陽天門監利棗陽宜城光化七州縣並沔陽武昌襄陽三衛續被水災。軍民並緩徵額賦。○辛酉。準噶爾部人都噶爾來降。命賞給安插如例。○兵部議覆兩江總督宗室德沛疏稱。水師營分馬步未為合宜。船隻間有冗設。請將太湖營馬兵內裁四十八名。各官隨丁馬糧。應於步餉內照應支銀數撥給。又額設唬快船八隻。分派巡防外。尚有沙船六隻。水汛所用。止須三隻。其馬山等三汛已有唬船駕巡。所設沙船各一隻。應裁。又蘇鎮四營。設立小哨船九隻。每營各存一隻。足資巡遣。應裁五隻。共裁船八隻。交廠變價報部。應如所請。從之。○調福建按察使王丕烈為河南按察使。河南按察使儲龍光為福建按察使。○調福建福寧鎮總兵雷澤遠為漳州鎮總兵。漳州鎮總兵龍有印為福寧鎮總兵。○蠲免廣東崖州感恩二州縣上年被風災民額賦。○壬戌。兵部議准直隸總督高斌疏稱。

直省所裁民壯九百六十八名。於各標鎮營分別派定。在兵丁子弟內。挑選精壯餘丁。隨營操演。每月每名給餉銀五錢。過營兵糧出。即於此內挑補。是餘丁之設。僅為兵丁子弟起見。但查額兵缺出。原係先儘兵丁子弟頂補。兵丁果有壯健子弟。不患進身無階。且現今所養餘丁。俱係幼小孱弱。除宣化餘丁一百六十名。已經另案改為守兵八十名。其餘臣標并提標馬蘭。正定。二鎮餘丁。應請悉行裁汰。循照裁兵之例。按月給與養贍銀兩。俟拔補事故缺出。停其募補。再查直隸督標前後兩營。并馬蘭鎮總兵官。河屯協水東村將弁。應得親丁名糧。從前恐占兵額。俱於司庫存公項下動支。後因司庫存公耗羨不敷。節經題明。動支建曠銀兩。查各省親丁名糧。俱於額兵數內開支。即直隸提標。正定。宣化。泰寧等鎮協營。俱於額兵內支給。自應一例辦理。毋庸另糜公帑。內除馬蘭鎮并水東村。據報係

陵寢重地。現在兵丁不敷派用。照舊辦理。應請將督標前後兩營。并河屯協官弁養廉。親丁名糧。俱於額兵內扣支。督標左右兩營。亦應畫一辦理。其從前議留之公費名糧一百四十四名。悉行裁去。從之。○工部議准。江南河道總督完顏偉疏稱。清河縣運口惠濟大閘。為淮揚運河門戶。漕艘往來。束湖水以運行。最關緊要。自雍正十年修造。每當大汛。衝動蟄裂。應請修砌。并將下鴈翅下口。添寬五丈。使溜出金門。暢入運河。應動帑興修。從之。○癸亥。諭曰。僧衲扎卜曾祖色楞原係鎮國公爵。因僧衲扎卜之父沙穆巴拉錫。甚屬誠恪。皇祖加恩。晉封貝子。後僧衲扎卜承襲伊父貝子之後。御前行走多年。甚屬謹慎。因往軍前。皇考加恩。晉封貝勒。是此貝勒。原非世襲罔替之爵。朕欲施恩。將此貝勒分襲與伊二子。瑚圖凌阿。著襲與扎薩克固山貝子。扎拉豐阿。著襲與輔國公。若日後瑚圖凌阿。果有効力。

之處。朕自加恩。晉封貝勒。○戶部議覆甘肅巡撫黃廷桂奏稱。奉發查議之刑部郎中樊天游條奏。一。寧夏府屬新渠寶豐二縣原係河灘。當日按戶授田。地之肥瘠。尚未分晰。即照撫臣原題。每畝升科六升。至開墾之後。地多起鹺沙壓。以及低窪不堪耕種者。小民授地已定。竭蹶輸將。臣思地有肥瘠。起科應分輕重。懇恩飭令該撫臣查勘。於原授地內。除肥田照舊升科外。其實在瘠薄之地。量減正賦。及有類此續行報墾者。並請減額起科。倘係沙壓起鹺。及水淹不可耕種之地。悉予開除等語。查新寶二縣新開地畝。乾隆三年正值勘定升科之期。適遭地震。新寶縣治議裁。歸併寧夏。平羅二縣管轄。復因田地荒蕪。經前督臣鄂彌達奏明。開修惠農渠口。展長漢渠之尾。引水灌溉。以安新寶無業窮民。試種另報升科。是新開地畝。應請俟渠工完畢。窮民按地安插後。將前項地畝。試種有效。再加

確勘視地之肥磽。定其等次。立科額賦。一。寧夏府屬各渠。每年挑濬時。紳衿免役。不下五六千戶。民勞紳逸。似屬不均。今新寶二縣所開惠農昌潤二渠。渠長戶少。挑濬非易。倘紳衿一概優免。小民獨任其勞。恐工力不敷。挑濬未能深廣。漸至於塞。臣愚以為別項差徭。紳衿仍准援免。外凡一切渠道歲修工作。無論紳衿庶民。按田均派。不致偏役。編氓等語。查挑濬渠工。原為防護村莊。

灌溉田畝。事關切已。非比別項差徭。凡有田之家。時值挑濬需用夫料。紳衿庶民自應共勦其事。應請自乾隆七年為始。凡寧夏寧朔靈州平羅中衛各屬之大清唐漢西河惠農秦漢七星美利以及一切官民等渠。若值需夫挑濬修築之時。無論紳衿庶民俱按田地之分數。一例出備夫料。共勦力作。不得借名優免。如有紳衿不便親執力作者。聽其出資雇募代役。違即詳革究擬。並請勒石。

以垂永久。均應如所議從之。○甲子。

上詣暢春園問

皇太后安。奉

皇太后幸山高水長。御長春仙館。○諭近日通本三法司命盜案件甚多。刑部進呈本章。每止七件。著交刑部作速辦理。勿使積累。○大學士議准。安徽巡撫張楷奏稱。鳳潁泗三府州所屬鳳陽等十九州縣。連年災歉。今歲復被潦災。民力更困。所有額徵漕米漕項。請照

地丁之例。分別蠲緩。其勘不成災區圖。又不被災之高阜。應完漕米。照例每石折徵銀一兩。俾災地多留米石。以裕民食。得旨。依議速行。○賑卹湖南湘陰長沙益陽巴陵華容武陵。龍陽沅江安鄉等九縣。續報被水災民。並緩徵本年額賦。○乙丑

上奉

皇太后幸同樂園。還暢春園。○諭大學士等。哈密赤靖等處防所。現有馬駝。皆係昔年陸續

騎馱。撥往軍營者。用力已久。勞傷過甚。連年以來。多有倒斃。亦非防所弁兵不盡心經理之故。今仍照常例。責令買補。弁兵未免苦累。著該督提變通辦理。將現今齒老有病之馬。駝查明。不拘價值。就近發賣。若一時無人購買。即分羣牧放。如有倒斃。委員驗看。准其開銷。其尚足備防所之用者。仍令弁兵加意牧放。如倒斃過額。照例著賠。又安西牧放之駝。隻前後倒斃一千有餘。定例每百隻內准其開銷四隻。其餘俱著弁兵賠補。但塞外弁兵多係寒苦。若令賠償。此項力有不支。查該管官弁報稱。歷年所養駝隻。產獲駝羔六百餘隻。不在交牧之額。朕思若以孳生之駝羔。即補倒斃之駝。數免其賠補。於弁兵甚為有益。著該督提查明。遵諭辦理。其餘駝隻。若有年久勞傷者。亦照哈密赤靖等處之例行。該部即行文該督提知之。○丙寅

上詣暢春園問

皇太后安。○還宮。○諭朕回鑾至湯山時。總辦事務王大臣。不必前往接駕。部旗文武大臣。亦不必前往。俟朕到圓明園之日。再接。若有應奏之事。朕在湯山駐蹕時。各大臣輪班往奏。○戶部議覆兩淮鹽政準泰奏。稱淮北綱鹽未完額引。請援照長蘆引鹽通融運銷等語。查長蘆引鹽係奉旨允行。他處未便援引。應令嗣後遇歉收之年。於奏銷後確查實在不能銷售引數。題明。暫准通融運銷。常年仍遵舊例。各銷各引。得旨著照所請行。○予故領侍衛內大臣。贈太子太保常明。祭葬如例。謚恪勤。○左都御史管廣東巡撫王安國疏報。乾隆六年分。南。雷。瓊。三府屬。共墾復額內荒地。一十二頃一十畝。有奇。廣。潮。肇。廉。羅。連。嘉。七府州屬。共報墾額外荒地。一十八頃四畝。有奇。潮州府屬揭陽縣歸併衛所墾復荒蕪屯稅。四十一畝。有奇。○丁卯。

上啟鑒。謁

東陵。○是日駐蹕烟郊。戊辰駐蹕邦均。○已駐蹕史家莊。○壬戌科武會試以兵部左侍郎汪由敦。知武舉工部左侍郎張廷瑑。為正考官。左副都御史仲永檀。為副考官。○庚午。

上謁

昭西陵

孝陵

孝東陵

景陵。俱未至碑亭。即降輿慟哭步入

隆恩門。詣

寶城前行禮。躬奠哀慟。王以下文武大臣官員。隨行禮。○諭大學士等。向例河南山東兩省。有每年供應

陵寢官兵米糧四萬石。明歲係河南應辦之年。朕思河南去江南甚近。著將此項米石。運往江南。以備賑濟之用。甚為妥便。現在直隸古北口一帶地方。收成豐稔。著提督塞楞額。兵

備道八十。委員採買四萬石。分運薊。遵豐。三州縣。以備

陵寢支放原額。俾移遠就近。兩得其便。該部即遵諭行。○又諭。今年直隸古北口地方。收成甚屬豐稔。朕已降旨。令將河南山東所有供應

陵寢官兵米石。運往江南接濟。令古北口提督塞楞額。熱河兵備道八十。於本地購買。以補原額。此外再著廣為收買。以備將來撥用。如

無撥用之處。即令存貯常平倉。以備緩急之需。再黑豆一項。今年亦屬豐收。亦著塞楞額等委員採買。以為明歲謁

陵餽養馬匹之用。此項黑豆。可存貯八溝適中之地。應運何處。臨時再行酌議。其採買之道。視收成豐稔之處。照依時價。不可勒派。亦不可急於多糴。使民間反致價昂。此不過恐穀賤傷農之意耳。○又諭。據白鍾山。晏斯盛。會奏江南銅山境內。黃河北岸之石林。黃村。二

口。減水濟運。原係舊制。今歲黃水甚大。減洩過多。由石林等處瀰漫而下。淹及東省滕嶧等州縣。查石。黃。二口。遠在江南。隔越東省地界。一百七十八里。至二百餘里。非會同南河總督。協力堵禦。莫能奏效。伏乞勅諭完顏偉。立速親至漫口。會同相度下埽。使得剋期斷流等語。朕覽此奏。白鍾山頗有推諉之意。今年江南異漲。衝決隄工甚多。今命高斌。周學健。前往查勘。在在須完顏偉經理。若因此一

處工程。又令其親赴會商。則顧此失彼。能無貽誤他處乎。且隔越東省。不過一二百里。何難往彼料理。若云隔屬呼應不靈。朕思公正大臣。以國事為己事。下吏斷無不聽從者。況同屬河官乎。若如此拘泥。甚非當日分設河臣之意矣。此相度漫口之事。著白鍾山親身前往。詳加確勘。速行堵禦。有應行商之完顏偉者。令其行文咨商。庶免歧視延緩之弊。該部即遵諭行。○又諭軍機大臣等。從前永常

叅奏李繩武濫報屯田冒邀議叙一案。經該部議令尹繼善確查實情具奏。隨據尹繼善覆稱。此案李繩武實係因地制宜通融辦理。並無營私入己情弊。部議將李繩武降級留任。朕降旨依議。案已完結矣。但邊方與內地不同。即以五鎮而論。三鎮耕種蔡巴什湖地畝。固當議叙。涼州一鎮在塔爾納沁耕種餘地。雖每年收穫無多。而地中所得加給屯兵口糧。其力作均屬一體。亦應體恤。西寧一鎮常在卡倫勞苦較屯田更甚。李繩武通融籌辦。亦屬鼓勵弁兵之意。未為不是。且如此辦理。始於樊廷。當時並未奏明。李繩武奏明以來。雖未詳悉具陳。亦曾將大畧奏聞。是猶愈於樊廷也。總之經理塞外軍務。原不可固拘成例。若不稍為通融。則屯田者得沐膏澤。而其餘出力之衆。概不得霑恩。窮兵豈能鼓舞。可寄信與永常。令其晰此意。以便妥協辦理。

○兩廣總督慶復叅奏廉州府知府繆繩祖。

行止卑鄙。罔利營私。得旨。這所叅繆繩祖著革職。其行止卑鄙。罔利營私情由。及本內有名人犯。該撫一併確訊。究擬具奏。朕聞粵東大小官員多有將各商鹽埠倚勢占踞。令親戚子姪家人出資漁利者。似此積習。該督撫務宜嚴行禁革。俾知共相儆惕。各守廉隅。毋得仍蹈前轍。致干罪譴。該部知道。○江蘇巡撫陳大受疏報。乾隆六年分福泉縣報墾轉料田一十畝有奇。上元縣省衛認墾地三十畝有奇。○是日駐蹕史家莊。○辛未諭大學士等。各省學政考試生童。為士子進身之始。甚有關係。為學臣者。固當各矢公慎。嚴密周防。而在外棍徒撞騙之弊。地方官尤宜嚴行訪查。以期肅清。近江西巡撫陳宏謀奏稱。江省積棍。每年尾隨學臣按試各郡。假冒學臣親戚內幕。哄誘士民。營求入學。講定謝儀若干。面同包封。仍存士民之手。俟案出有名。方來收銀。營求之人。見其不先取銀。以為有

益無損。遂將銀兩付伊。包封畫押。棍徒豫用錢文假作銀封。臨時同夥設計。掩飾調換。攜銀潛逃。名曰掉包。迨至案出無名。士民啟視銀封。方知墮計。而棍徒早已遠颺。在被騙者。既不敢鳴官以取累。又不肯告人以貽羞。遂致此風各處多有。不能杜絕。朕思一省若是。他省諒亦相同。著各督撫等。於學臣按試之前。將此等掉包串騙之弊。詳明曉諭。凡有指稱營求考取。將銀封貯出案收取者。無論真假。立即嚴拏究處。並許被騙之人。報官查拏。則應試生童。識破機關。自不致墮其術中。而棍徒知有法紀。亦不敢公行無忌。亦肅清學政之一端。該部即遵諭行。○分別蠲緩江南山陽。阜寧。清河。桃源。鹽城。甘泉。興化。泰州。高郵。寶應。銅山。豐縣。沛縣。蕭縣。碭山。邳州。宿遷。睢寧。海州。沐陽。贛榆等二十一州縣。被水災民。本年漕糧。○是日。駐蹕官莊。翌日亦如之。

大清高宗法天隆運至誠先覺體元立極敷文奮武孝慈神聖純皇帝實錄卷之一百七十四

大清高宗法天隆運至誠先覺體元立極敷文奮武孝慈神聖純皇帝實錄卷之一百七十五

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆七年壬戌九月壬申

駕幸盤山○遣官祭

歷代帝王廟○遣官祭

都城隍之神○諭今歲江南被水需費浩繁從前部臣查奏下江所有藩糧鹽三庫現存銀九十四萬兩米穀一百一十餘萬石上江藩庫存銀八十餘萬兩米穀一百二十萬石又將本年應徵鹽課存留以為賑卹之用今查實徵存庫銀一百三十萬兩又將本年運京漕糧令督撫酌量截留為數若干雖未奏到即

就兩省現在所存銀米計之已不下五百餘

萬矣但賑卹之務必須接濟至明年麥收以

前需用既多而經收錢糧陸續徵解尚需時

日尤當早為豫備期於充裕著於隣省撥銀

一百萬兩於歲內解往江南聽該督撫等量

地方情形需用緩急酌定數目分貯江蘇安

徽藩庫以備按期散給不致臨時缺乏其應

撥何省帑銀該部速議具奏○又諭軍機大

臣等據高斌等奏稱江蘇賑濟需費甚繁請

將隣省撥銀一百萬兩協濟其撥協之項統

俟樂善好施出資備賑案內收有成效歸補

還項等語從前高斌等奏請樂善好施予以

議叙朕降旨允行者以此例一開則富民家

有蓄積皆可出資以濟貧乏且地方被災之

後氣象未免蕭索一旦素封之人挾貲而往

則商賈亦必會集易凋敝為豐裕頗有裨益

並非為錢糧起見若以錢糧而論國家之正

供原出於閭閻今地方被災應行賑卹以取

之民者用之於民。是屬理之當然。雖多何所吝惜。高斌等尚未深悉朕意也。至於現在撥用之帑銀。以捐款補項。亦應如此辦理者。何必見之章奏。今高斌等奏摺內。諄諄以此為言。則所見甚小矣。爾等可寄信與高斌。周學健。德沛。陳大受。共知之。○癸酉。諭八旗都統等。各據所見陳奏原摺。朕俱詳加披覽。殊無良法偉畧。大學士等議駁甚是。朕以都統等均有教養旗人之責。伊等平日。自必籌之已熟。故特降諭旨問及。今覽伊等所奏。竟未曉朕原降諭旨內。令其陳奏永濟旗人生計。整飭風俗之意。內有數人奏稱。並無應行條奏事。亦有數人以斷難施行之事具奏者。此外大畧互相雷同。無關緊要。或惟欲施小惠。或言操練查禁之細事。並無慮及永濟旗人生計之處。朕御極以來。於八旗兵丁生計。無不曲為籌畫。恩施疊沛矣。現在各旗俱已設立官學義學。果能盡力教誨。即可造就人材。倘

沽虛名。各處增設官學。而不實心教誨。更有何益。至操演兵丁。惟在該管大臣官員等平日留心教導造就耳。若不實心奉行。雖另設立條款。又安望其作養旗人。整理風俗耶。所奏俱已留中。其如何調劑俾令有益之處。候朕從容熟思。再行辦理。著明白曉諭八旗都統等知之。○工部議准。川陝總督尹繼善疏稱。西寧總理夷情副都統。及辦事人員。應需居住房屋。今買民房三處。共九十間。并地基。估需銀兩。請於司庫動支。從之。○是日。駐蹕趙家埠。○甲戌。定邊左副將軍額駙策凌奏。今年臣等會議。令叅贊大臣都統塔爾瑪善於七月二十日。赴色勒壁口。閱副將軍公巴素部落二十一旗兵丁。扎薩克公扎木禪一旗。器械堅利。技勇熟練。為最。車臣汗達瑪琳郡王德木楚克。巴扎爾什第。貝勒旺扎爾。貝子彥楚卜多爾濟。公格勒克巴木丕勒。扎薩克台吉袞楚克扎卜。沙克都爾扎卜。旺楚克

達爾扎貝子旺扎爾公巴素策凌旺布薩木丕勒扎薩克台吉齊呼拉成衮扎布策黨敦多卜齊旺旺扎爾博洛勒十九旗次之扎薩克格勒克一旗又次之於八月初二日赴烏克圖爾濟爾哈朗閱副將軍成衮扎布部落十九旗兵丁扎薩克貝勒策卜登台吉朋楚克阿喇卜坦策卜登三旗器械堅利技勇熟練為最土謝圖汗敦丹多爾濟親王敦多卜多爾濟郡王成衮扎布桑寨多爾濟策凌拜多卜公蒙固巴木丕勒多爾巴海扎薩克台吉齊巴克扎卜策凌旺舒克達什丕勒琳丕勒多爾濟旺扎爾三都卜多爾濟十四旗次之扎薩克台吉遜多布旺布多爾濟二旗又次之令叅贊大臣副都統慶泰於七月二十日赴桑金托羅海閱署副將軍世子成衮扎布部落二十二旗兵丁將軍王額駙策凌貝子車木楚克扎布公丹巴多爾濟咱雅班第達呼土克圖四旗器械堅利技勇熟練為最

親王得親扎卜貝勒那木扎爾車蘇隆貝子多爾濟旺舒克公根丕勒扎木禪旺扎爾齊旺色內扎薩克台吉巴朗額林沁額默根春丕勒布達扎卜阿寶羅卜藏敦多卜特克什來冲扎卜額爾德尼班第達呼土克圖十八旗次之於七月二十五日赴哈里勒邁閱喀爾喀副將軍貝勒青添雜卜十五旗兵丁扎薩克伊達木扎卜一旗器械堅利技勇熟練為最貝勒策登扎卜公旺舒克策魯卜精珠木多爾濟多爾濟策登扎薩克台吉喇卜坦六旗次之扎薩克圖汗巴勒達爾公旺扎爾旺沁扎卜台吉密玉特多爾濟班第五木布濟羅卜藏喇卜坦貝勒青添雜卜又次之得旨諸部落軍容整頓者交部議賞具奏○是日駐蹕劉家店○乙亥上幸髻髻山○戶部議准兩江總督宗室德沛疏稱江寧省倉南豆一項各縣編載全書徵收黃豆而黃豆非馬料所宜且多不產黃豆

之處。應請因地制宜。改徵折色。當塗蕪湖二縣。每石徵銀一兩一錢。宣城涇縣貴池銅陵東流上元江寧句容溧水高淳等十縣。每石徵銀一兩二錢。溧陽縣。每石徵銀一兩一錢七分。徵價解司。每年於秋成時。委員齎價赴產豆地方。照數購買。運省收倉。一調劑間馬政倉儲。均有裨益。從之。○兵部以武會試中額請得旨。這考試。漢軍取中六名。直隸取中十四名。河南取中六名。山東取中五名。山西取中六名。陝西取中十五名。貴州取中二名。江南取中五名。浙江取中八名。江西取中五名。湖南取中四名。湖北取中五名。福建取中七名。廣東取中十名。廣西取中三名。雲南取中四名。四川取中五名。餘依議。○陝西巡撫岱奇奏。叅革總兵楊琰。現在患病。不能赴審。得旨。楊琰係勒索婪贓之犯。理應赴西安聽審。乃敢托病抗違。岱奇代為題達。明係徇庇。著將岱奇并該布按兩司。及出結官員。交與

該部嚴加議處。楊琰既稱患病。此案就近交與黃廷桂審擬。其抗不赴審情由。一併歸入案內。從重治罪。○廣西慶遠府屬南丹土知州莫我謙病廢。以其子莫遐昌襲職。○是日駐蹕于家新莊。○丙子駐蹕湯山。○丁丑諭尹繼善已丁母憂。川陝總督員缺。著馬爾泰前往署理。○戶部議准安徽巡撫張楷疏報鳳陽府屬之鳳陽臨淮懷遠宿州靈璧虹縣鳳臺壽州。定遠鳳陽衛鳳陽中衛宿州衛長淮衛。潁州府屬之阜陽潁上霍邱亳州蒙城太和泗州并所屬之五河盱眙天長泗州衛共二十四州縣衛。夏秋被水各屬。查明乏食貧民。先撥解銀二十萬兩。分別賑卹。新舊額賦。概行停徵。從之。○兵部議准雲南巡撫張允隨疏。稱黑鉛一項。原係製備鉛彈以供鎗礮之用。當嚴禁出口。而馬白界連交趾與都竜廠地。僅隔一河。該廠五方雜處。奸宄潛藏。現在交地未寧。若任黑鉛出口。不無滋釁。應

請仍照原議將馬白稅口黑鉛禁止販運出口。所抽稅銀請照乾隆三年抽收商販貨稅之數以一千一百九十六兩三錢四分三釐五毫作為定額。飭令經營之員據實抽收報解。如有侵隱查實嚴叅從之。○又議准給事中長柱奏稱薊州地方出有白土。薊運回空帶來轉賣糧船。舂細過篩攪和入米。一經發熱便使米土潤染。亟當嚴禁。應請行直督轉飭薊州文武官弁俟糧船抵薊即催回空。不

許在該地方剗取白土裝帶上船并出示曉諭沿河各市鎮鋪戶人等不許將白土賣與糧船。如嗣後經關口汛地查出偷買白土審實將該弁丁及知情賣土之鋪戶照例治罪并將不行查禁之文武員弁分別議處應如所請從之。○貴州總督兼管巡撫事務張廣泗疏報乾隆六年分貴陽府郎岱同知歸化遵義二通判開州鎮寧普安永豐黃平麻哈等六州貴筑青鎮安平安南甕安湄潭都勻

荔波施秉婺川龍泉遵義桐梓仁懷等十四縣冊報民苗開墾額內額外荒田四千六百三十九畝有奇。○戊寅

上詣

恩佑寺行禮○詣暢春園問

皇太后安○幸圓明園○庚辰諭今歲江南淮徐揚鳳潁泗等處水災甚重米價高昂此等營汛兵丁雖有月給糧餉恐食用尚有不敷著於司庫內各借給餉銀一季俟明年再作四季扣還

平本卷七十五

該部即遵諭行○又諭前孫嘉淦奏稱荆襄等處隄工必須臣親身前往相度通盤計算方為有益旋報於八月二十一日啟行前赴襄陽今聞孫嘉淦行至安陸地方即便回省朕再四思維不解其故近日襄陽府城有匿名逆示一事若孫嘉淦先知此事欲前往襄陽料理固屬不可今因查勘隄工而往地方適有此事孫嘉淦何以行至半途而返豈不起人疑議總督管轄兩省封疆一舉一動關係

觀瞻不應輕率若此致駭聽聞昔祖述擊楫中流慷慨滅賊今襄陽之無賴非若江北之衆也孫嘉淦何畏蒞至此豈不有玷封疆可寄信詢問令其明白回奏尋奏臣向赴襄陽勘工適有匿名逆示一事查係一二奸徒希圖煽惑並無聚衆謀逆情節是以一面奏聞一面札諭各衙門令其鎮靜不得聲張驚擾彼時因漢江隄塍至沙洋而已完襄陽舟行甚難且無可勘之工不便徒往且今年軍政大計皆在十月內舉行九月望後即須辦理是以決意返棹並非因有逆示之事畏懼而返得旨雖云如此但畏蒞之意已形心疑之辭頗支百口何能致辨一生學問皆虛○戶部議覆侍郎蔣溥條奏江省被災地方賑卹事宜一江省災黎或羣聚一處或流散四方饑寒所迫最易煽動該地方官應將前後所奉恩旨隨時隨地宣揚化導俾知朝廷德意無微弗逮再有司辦理荒政應兼留心防察

奸宄其流民所到之處業蒙諭旨使各該省隨地安插留養並令訓諭約束而未經流出之人又現奉諭旨令該督撫於常例外加意賑恤則災民自不致乏食中有游手好閒不安本分之徒藉被災為由煽惑愚氓肆行掠食搶奪者應令大吏董率文武留心稽查隨時化導不違約束即行查拏嚴懲首惡以儆其餘一賑卹重務該州縣不能分身兼顧非濫即遺是以委員協辦倘本地方牧令視為客官不能和衷共事則胥吏呼應不靈必妨賑務應令該督撫嚴行訓飭屏除積習一體辦公不可妄生畛域致委員掣肘貽誤一散賑地方或有本籍紳士及殷實之戶能出已資分任賑務實心効力者係本地人自能熟悉本地情形應令地方官核實詳報分派各村鎮辦賑如果有益災黎請照樂善好施之例酌量分別議叙一散賑分設各廠需用胥役甚多皆有額設工食而此輩往往乘機侵

蝕散米。則用小斗量出。或攪和糠粃。賑粥。則夾入硬灰。偽作稠穠。因而剋扣米石。在國帑已大為糜費。而窮民未得被恩膏。徒有賑濟之名。而無領賑之實。應令該督撫轉飭所屬辦賑之員。務須親身查察。倘有前項情弊。即於散賑處所。嚴懲示衆。一窮黎被水之後。露棲夜處。寒濕交侵。易致疾病。該牧令均有父母斯民之責。自當加意撫卹。應令地方官開設藥局。選擇良醫。推廣皇仁。加意全活。毋致

虛應故事。均應如所請從之。○以駐藏副都統紀山。為兵部右侍郎。○辛巳。戶部議覆兩淮鹽政準泰奏稱。淮屬場竈被水。鹽價騰貴。請於原定成本外。每引再酌給成本銀三錢等語。查運楚淮鹽價值。從前酌定。於賤價外定有貴價。原以備荒歉之歲。成本不敷。俾商人行運無誤。況於成本外酌給餘息。是該商獲利已多。無論豐歉。皆可辦理寬餘。何得又請增加。應將該鹽政所請毋庸議。得旨。今年

江南水災。非常時可比。著照該鹽政所請。以明年四月為限。後不可為例。○又議准雲南巡撫張允隨疏稱。安寧祿豐嵩明等三州縣。雍正十年分。報墾民屯田地。一十四頃四十八畝。有奇。實係從前捏報。題請開除。從之。○壬午。

上詣暢春園。問

皇太后安。○詣

大高殿行禮。○

上還宮。○寧古塔將軍鄂彌達奏。臣自接任後。聞寧古塔屬之綏芬烏蘇里以外。雅蘭西楞暨南海島嶼地方。偷挖人參。與刺字人犯。十數年間。已聚數千人。從前尚漁獵鹿魚。摘食榛子過冬。至春夏間。偷挖人參。潛至寧古塔。吉林等處發賣。今則與寧古塔。吉林。奸商結夥。每歲由寧古塔。琿春等處。運致米糧。協濟伊等。伊等亦漸次開墾地畝。將參抵換各物。漸立微產。查南海。并雅蘭西楞地方。與朝鮮

相近而南北俱係赫哲費雅喀鄂倫春等野地。不可不查明驅逐。此項匪衆。賴寧古塔琿春等處協濟米穀。今惟出派官兵於要隘斷其濟運。不久自然解散。若隱匿既久。立有產業。或該處產參稀少。必至於朝鮮等處滋事。辦理益難為力。臣初詢及寧古塔等處大員。據稱不過一二百人。續詢因公來省之琿春協領朱蘭太。亦稱只百餘人。臣即飭令訪查。嗣據稟稱訪有千餘人。因相隔較遠。不知確數。此事於地方大有關係。若差人前往。伊等必畏罪抗拒。因於本年四月內。出派舊滿洲那爾布溫德爾亨二人。於臣養廉內給與銀三百兩。置買布烟馬牛等貨。扮商販前往。將伊等棲止地方。人數路徑。逐一詳查。俟那爾布等稟覆時。再將如何逐散之處。另行奏聞。此案非僅派官兵數人即可拏獲完結。謹將臣現在辦理情形。奏請訓示得旨。此奏殊屬非是。將軍乃通省統率之員。如遇此等事件。

必須親往查辦。若以二人為可信。屬員反不足信。將何以服衆。汝當以防其滋事為念。切勿輕忽。○癸未。

孝慈高皇后忌辰遣官祭

福陵。○是日起。

上以孟冬享

太廟。齋戒三日。○甲申。諭前據晏斯盛。白鍾山

奏稱黃河由江南石林黃村二口浸溢。貫注

微山南陽等湖。所有滕縣魚臺嶧縣金鄉濟

寧臨清衛等六州縣衛村莊田畝廬舍。多有

淹浸。朕即降旨。令白鍾山前往堵築。又據高

斌完顏偉奏稱。八月二十七日。黃河汎水陡

長。石林口減水過多。沛縣城池被淹。現在竭

力運料集夫。無分晝夜。緊趕進埽。備築臣等

坐守該工。約計十月可以完竣。等語。但查上

年六月。巡漕御史都隆額即奏稱石林黃村

一帶黃河大勢北趨。二口洩水之處。俱被衝

刷深濶。竟與黃河平接。沛縣城郭形如釜底。

甚為可危。倘旁流漸熟。正流漸阻。始則為患民田。久必有妨漕運。經工部議令於本年汛水未至之先。將原築土壩。修補堅實平整。如遇盛漲。有汕刷溝漕。即行填補。本年三月。又經侍郎周學健奏稱。三口雖築有土壩。然河水洶湧。土壩單薄。倘桃汎再由此進水。則銅沛又被淹沒。民將何堪。是石林黃村二口之急宜堵禦。自都隆額陳奏以來。已經一載有餘。該總河等即應嚴飭廳汎各員。星夜相機修守。以為先事豫防之計。乃並不竭力董築。以致滕沛等縣。田畝廬墓被衝。小民流移遷徙。雖今年河水異漲。不比尋常。但果能先事綢繆。當不至如此之甚。完顏偉已具摺引咎。現交部察議。此時正值三冬水涸。務必上緊料理。倘不能如期堵築。將來或至奪溜阻運。定將完顏偉等從重治罪。該部即遵諭行。○戶部議准。山東巡撫晏斯盛奏稱。登萊等府。不通河道。洋面水勢最險。東省船隻。從無一

至彼者。若令江省放舟。逾越大洋。至萊載穀。復航海至蘇。輓運抵淮。不獨風濤洶湧。抑且輓運迢遙。且今歲萊屬被水。民食恐有不敷。未便以該處糧石。復行撥運。查東省臨清德州二處。現在存貯本年奉旨截留江西漕米十萬石。該地俱屬河濱。船隻甚便。若由運河順流而下。十餘日間。即可抵淮。運費復省。其利便之處。較外洋不啻百倍。從之。○雲南巡撫張允隨疏。報乾隆六年分。昆明晉寧河西

元謀恩安魯甸鎮沅七府廳州縣。共開墾水旱田地。二百五十五頃二十八畝有奇。○乙酉。孝敬憲皇后忌辰。遣官祭泰陵。○諭據高斌德沛等奏稱。江南被水地方。已漸消退。其高阜之地。現諭農民趕種秋麥。但低窪處所。尚有積水等語。朕思積水未退之處。秋麥播種。已不及期。若不及早辦理。並不及種春麥。小民其何以為計。著高斌周學健會同該督撫等。多方籌畫。務令水潦速消。

不悞明年春種。庶收穫有望。該部可即行文督撫等知之。○戶部議覆甘肅巡撫黃廷桂疏稱甘省地處邊徼。從前土曠人稀。我

朝定鼎以來。流亡漸集。然開墾之始。小民畏懼差徭。必藉紳衿出名。報墾承種。自居佃戶。比歲交租。又恐地畝開熟。日後無憑。一朝見奪。復立永遠承耕。不許奪佃。團約為據。迨相傳數世。忘其所自。或租糧偶欠。或口角微嫌。業主子孫既以奪田換佃。告官驅逐。而原佃之

家。又以團約炳據。忿爭越控。臣查各省業主之田。出貲財而認買。招力作以承耕。佃戶之去留。憑於業主。非若甘省佃戶。其祖父則芟刈草萊。闢治荒蕪。築土建莊。辛勤百倍。而子孫求為佃戶而不可得。實於情理未協。應請將當日墾荒之原佃子孫止令業主收租。果有拖欠。告官押追。不許奪佃。倘立意抗欠。糧租至三年者。方許呈明地方官。訊實驅逐。田歸業主。若業主貧乏。將田另售。契內註明佃

戶係原墾人之子孫。照舊承種。不許易佃。若業主子孫有欲自種者。准將肥瘠地畝各分一半。立明合同。報官存案。不得以業主另租與人。長佃戶告訐之風。又甘省山多地少。昔年流寓所至。穴土而居。擇山而種。管業一方。名曰腳占。嗣因歲歉年荒。轉移他徙。所存地畝。多成曠廢。歸入本甲解賦。或里長甲首另招他戶。認墾承種。名曰招頂。里長甲首及戶族頭人完納正課。覓占收租。名曰占耕。此項

地畝。雖非老荒。而招頂之人。積苦翻犁。占耕之戶。納課有年。原為生安死葬之久計。延至今日。丁口愈盛。食指愈繁。田地貴少。寸土為金。奸民覬覦。借端爭控。嘵嘵不已。請嗣後甘省拋荒地土。本戶子孫既已日久不歸。而招頂之家。占耕之戶。辨賦應差。亦有年所。即永為業主。毋許旁人妄控。倘原業之子孫回籍。執有老契為憑。而地隣族衆俱可考証。計其拋荒年分。量為酌給。如在一二年以內者。將

當年所獲籽粒全給頂種之戶。承辦糧差。次年地畝仍歸原業主。其頂種已過三年。至十年以內者。分給一半。二十年以內者。十分之四。三十年以內者。十分之二。所分地土肥瘠各半。不得過分紛爭。至三十年以外者。是否原業之子孫。無從考究。概無分給。不得混爭。至頂種之中。亦有奸頑之戶。向因所頂地畝。原無本主。而招頂之里甲。每年更換。人非一姓。數世之後。物故者多。種地之子孫。賴為祖業。不認老戶差糧。捏稱另有里甲。以致原糧無著。里甲賠累。應將頂種之老戶。一概開除。責令現耕業主。將實在姓名。造冊承種。倘敢藉名詭寄。希圖隱漏者。查出照例治罪。均應如所請。從之。○禮部議准。河南巡撫雅爾圖疏稱。許州舊額。取進文童十五名。近來應試者三倍於前。人多額少。應請照府學例。取進二十名。從之。○閩浙總督那蘇圖奏。臣考驗各營。大抵嫻於水務。騎射非其所長。故弓馬

超羣者。十不一二。且大小營員。半係本省土著之人。官兵氣類聯結。袒庇黨羽。欺蒙上官。不但地方有司公事掣肘。即道府大員亦漸為其脅制。查水師將弁。俱能諳習水性。未便更易。至陸路營員。操防則各省相同。應請將漳泉一帶陸路之副參遊守等官。凡福建籍貫者。酌量與浙江省互調。並懇將候補副參遊守內。不係原籍福建之人。揀發數員來閩補用。則官非土著。可無瞻顧之私。兵丁奪其所恃。亦俯首而聽約束。從前營伍習氣。漸次可除。得旨。覽此見甚好。但目下不宜驟行之。亦不宜令營員知之。但存此意。行所無事。於三五年中。亦可調換全盡矣。其發往之武弁。有旨諭部。諭現在候補副將。參將遊擊守備內。著兵部揀選才技優長。精明幹練者數員。帶領引見候旨。尋揀選引見得旨。譚五格。茹銳。張凌霞。哈國龍。史譽。寶寧。杜鵬。穆騰額。陳守清。俱著發往福建。交與總督那蘇圖。酌量

題補。哈攀龍亦著發往福建以副將題補。旋據步軍統領奏請署譚五格。茹欽遺缺得旨。發往閩浙以副將題補。有茹欽。哈攀龍二員。譚五格不必發往。著仍留中營叅將之任。其茹欽所遺北營叅將員缺。著中營遊擊李芸署理。○是月。盛京禮部等部奏。岫巖城楞子溝地方。有朝鮮遭風商船一隻。查明林第興等十一人。照例給與衣糧。遣回本國。奏入。報聞。○吏部尚書署直隸總督史貽直奏。直省秋禾收成豐稔。間有被水被雹者。俱屬一隅偏災。且有並不成災。田禾無損者。查明借給籽種。緩徵錢糧。分別料理得旨。朕一路延覽。見比戶皆有蓄積。與與翼翼之盛。實足以慰宵旰之憂。而於此益戴

上天之恩。而凜乾惕之心也。○直隸總督高斌。江南河道總督完顏偉奏。徐州黃河北岸之石林口。減洩黃水。入微山湖過多。隨飭星夜堵築。近日汎水漸退。石林口漫水河灘。現出

口門。水面現寬九十餘丈。臣等坐守該工。集料募夫。進埽儻築。約計十月半後可竣。得旨。所奏俱悉。九十餘丈。何遲至十月半方完。速行堵築為是。○直隸總督高斌覆奏。臣接到江蘇布政使安寧寄字。奉上諭淮揚一帶。今歲水患。完顏偉開壩宣洩。未曾先行曉諭。以致居民不及防避。俱被淹浸。百姓俱怨。爾至江南。可查明情由。據實奏來。再傳諭高斌。亦令其查明據實回奏。欽此。臣查河工。凡遇開壩。俱係臨時酌量。相機辦理。況高郵三壩。與邵伯。昭關等壩。一經開放。則下河州縣全被水患。更不可不慎重。苟未至萬不得已。必不敢輕易議開。至古溝一漫。則勢不可緩。若不放壩。則高郵一帶城社人民。關係更大。而臨時急迫。勢有緩不及待。必不能有豫先徧行曉諭之情形。但民遭水患。田廬淹浸。艱苦萬狀。嗟怨之聲。歸咎河臣。此情理所必有。得旨。公論也。知道了。○又奏石林口減洩過多。湖

水漫溢。沛縣城池被淹。漫水北流。山東之魚臺。滕嶧等處。亦被水淹。石林水口。急應速堵。斷流。現在上緊趲辦。亦須一月工程。臣俟工竣。隨即到揚。與周學健一同商辦水利。不敢遲誤。得旨。覽奏稍慰朕懷。正為此屢念也。石林口。何以不速行早堵。查明具奏。兩河臣有互相推諉之處否。○直隸總督高斌。刑部侍郎周學健奏。臣等於八月二十五日至清口。見完顏偉詢知古溝東壩堵築將竣。即與商酌石林一口。亦關緊要。完顏偉隨差叅將朱永凡。前往趲築。二十八日辰時。古溝漫口。已經合龍。其高郵以南。開放各壩。不日即可堵竣。上下河水漸次消退。臣等會同督撫。現飭借給籽種。勸諭趕種秋麥。經過各地方。民情安貼。靜待賑卹。皆由我

皇上沛從來未有之恩膏。是以被災雖重。習俗雖刁。而億萬蒼生。感深肌髓。自不覺潛移默化。臣等會商賑務畢。即詳勘水利。並沿途宣

示恩德。查察賑務。以仰副

聖主不使一夫失所之至意。得旨。覽奏稍慰朕懷。所云趕種秋麥。恐積水不能盡消。不知可種者幾何耶。○兩江總督宗室德沛奏。上下江賑務。臣會同高斌等妥議。另摺具奏。又派撥官兵遊巡一事。容臣酌量將來情形。或抽減。或全撤。另行從容辦理。得旨。所奏俱悉。朕如彼嚴批。而此奏輕輕提過。全無愧悔之心。並無認過之語。豈朕親手批諭。旋即忘之。看汝故智復萌矣。江南咫尺。不似閩省之遠。朕知之尚遲也。○江南河道總督完顏偉奏。秋汛已過。湖河水勢消退。高郵邵伯各壩堵閉完竣。石林口過水之處。漸次收小。止五十餘丈。約十月初十日前後。可以合龍。再沛縣塌卸之護城隄。已經堵築完固。漫水漸退。城垣可保無虞。得旨。覽奏朕心稍慰。該部知道。○又奏湖河水勢平緩如常。所開各壩俱經堵閉堅實。臣到揚州。會同高斌商酌水利。及河

工善後事宜。先往徐州。親赴石林口。查看趨築得旨。覽奏稍慰朕懷。今年水勢異漲。朕總不歸過於汝。然汝應知自愧。勉力向前。而不可存恃恩之心也。○河東河道總督白鍾山奏。秋汛已過。豫東兩省黃河工程平穩情形。得旨。覽奏稍慰朕懷。今年河水。至九月猶漲。此實未之前聞也。一應善後事宜。尤宜留心。○漕運總督顧琮奏。上下兩江。災侵頻仍。將來公私賑糶。需米甚迫。價必踴貴。竊計二省地丁。約五百餘萬兩。請頒諭旨。將來歲額徵悉輸本色。每米一石。準銀一兩一錢。除被災州縣外。尚可得米四百餘萬石。以半留之本。地以半分貯被災地方。各於青黃不接時。官為平糶。其價解京。則國帑無虧。而災黎普濟。且江南民俗。貧者每因納銀而賤糶。富者常恃國積以居奇。今全輸本色。在貧者初非責其所無。而富者亦不能私其所有。既無隣近採買之稽遲。更異生監收捐之難必。囤積之

弊。不禁自除。官米既多。市價必減。目前豫籌江省救災之良法。似無過於此者。得旨。此奏固有所見。但從來無如此之功令。且恐江南亦安得有許多米穀也。若果有許多米穀。則不為災矣。然既有是言。待朕再為籌量。○江蘇布政使安寧奏。本年淮揚等屬猝被水災。人心未免惶惶。迨後恩膏大沛。咸沐更生。察看情形。現皆安心待賑。極為寧謐。至需用銀兩。動支庫項。請撥部餉。計已二百九十餘萬兩。應用米穀。撥協採買。截留撥發。計得米二百二十餘萬石。合計米銀。已及五百萬之數。此番辦災。實從古未有之殊恩。有冒濫無遺漏也。目下要務。首在宣洩積水。俾得趕種二麥。又嚴冬歲暮時。尤宜安輯彈壓。至江省積儲動用之後。空虛已極。作何補苴。以備緩急。容俟臣徹底籌畫。稟商督撫辦理。再查蘇常鎮一帶。米價少減。江以南地方。收成俱極豐稔。得旨。知道了。欣慰覽之。○又奏。督臣德沛

欲將高郵之三壩開放。於三壩之下築長隄。二道收束水勢。使直趨於海。而欽差高斌。以為斷不可行。三壩仍應永閉。二人意見參差。以致抵牾。現在高斌因石林口潰決。趨赴彼處督撫諸臣。亦各暫回省署。其河防善後事宜。至今尚不能定議。理合據實密奏。得旨。朕已料及此矣。周學健又以為何如。○安徽巡撫張楷奏。鳳陽泗州二屬。自七月撫卹起。已報完竣。潁州府屬。自八月中旬撫卹起。將次完竣。臣委員查察。不許一名遺漏。實在應賑貧民。大小口共二百二十餘萬。至賑濟月分。仰蒙皇恩。將最重之鳳陽等十三州縣。於部例月分之外。加展三月。次重之定遠等六州縣。加展兩月。臣即會同督臣德沛。通飭曉示。將正賑加賑。共七個月者。自九月賑起。六個月者。自十月賑起。五月四月者。於十一十二月賑起。統賑至來年三月止。其例不應賑之六分次貧賞賑一月者。於年底給散。此次災

口。雖倍多於上年。但撫卹期早。又多加月分。賑期舒長。貧民感戴隆恩。自古未有。人人安分守法。靜領賑糧。地方極為寧謐。得旨。若果如所奏。實足稍慰矣。○江西巡撫陳宏謀奏。江西素稱產米之鄉。近來積穀未裕。而採買又不能多。收捐監穀一項。原定穀價太賤。需穀太多。生俊遠赴捐銀。不肯納穀。無裨積貯。是以臣於本年六月內。奏請將江西捐監穀石。酌中定價五錢。並請戶部停收江西之捐。令其俱就本省捐監。可以陸續補倉。以省買補之擾。累經部議。以每石五錢。與原題不符。均毋庸議。惟是江西常平倉穀。乾隆六年平糶增撥。及借給賑濟而外。所存穀僅六十二萬餘石。本年通省收成。止七八分。加以楚粵江南等省米糧缺少。販運者多。目下米穀登場。而米價仍然昂貴。各屬應買之穀。若照原存糶價採買。則不敷甚多。若照時價給買。不但難於報銷。實於國帑有損。若靜聽其緩至

豐收價平之年陸續買補而此時常平之穀比前已少過半目下尚須賑濟轉盼明春又須平糶來年豐歉未知如何思患豫防不可不計臣再四思維惟有酌增穀價令士民就近納穀捐監庶可為陸續補倉之計伏乞

皇上俯念民食所關倉儲為重准將江西省捐監穀價原定四錢者今酌增每石五錢俾本省之人稍為踴躍就近納穀捐監各處之捐監者多則倉穀自可充裕即如本年自正月

起至八月止江西之在戶部陝西捐監者幾二千人若移捐於本省不及一年便可得穀四十餘萬石以本地之穀即於本地捐監貯於本地之倉可以隨時平糶隨時歸補名雖輸穀於官猶是藏富於民以民養民之義也至於在部捐銀在外捐穀原屬並行不悖何必移彼就此第此時穀價已在五六七錢不等臣不敢竟請悉照市價收捐不得已定為五錢酌中之價若仍許本省生俊赴部納銀

捐監即穀價增至五錢尚不如戶部捐銀之便宜必仍赴部納銀不肯於本省納穀仍於積貯無益故必須戶部各省暫停收江西之捐然後本省可以多捐也戶部俊秀捐監一名收銀一百零八兩江西本省捐監一名即以五錢而論可收穀二百十六石今以一百零八兩之銀買二百十六石之穀何等艱難累官派民勢所不免且尚有必不能買之處況近又欽奉恩旨平糶多減價值又不拘糶三之數將來糶存之價止有不足難以有餘應買之穀亦必漸多惟有招徠收捐之法庶可漸次還倉窮民永感減價平糶之皇恩官司無賠累之虞富民無派買之累市價不致昂貴窮民實受其益所存糶三穀價不須買補即可充餉於國帑實有盈無虧得旨著照所請行該部知道○閩浙總督那蘇圖奏臣擬於十月初旬自福州起程由溫台紹等府閱看沿海形勢水陸營汛俟到杭日會同撫

臣常安。將柴塘改建石工。有無利益。確勘具奏得旨。所奏俱悉。常安頗有見解。不似德沛違道干譽之流。卿到浙與彼和衷詳酌。為之亦不可存惜費省事之心也。○浙江巡撫常安奏內米私販下海。所關非細。臣留心查禁。密行緝拏。務期一無遺漏。致資洋匪。再聞閩省有匪徒糾眾為非。恐黨類蔓延。勾通浙民。嚴飭文武官弁。藉此巡查洋米。密察奸徒。加意防範。得旨。如是留心。實不愧封疆之寄也。

○河南巡撫雅爾圖奏。今年上下兩江被水。不特民虞艱食。倉貯多屬空虛。請將豫省倉儲酌撥二十萬石。並將倉穀碾米。委員運往。以濟江省急需。得旨。所辦甚妥。嘉悅覽之。○山東巡撫晏斯盛奏。黃河水長。由江南之銅山。沛縣溢入東省湖河。以致嶧縣魚臺均被水淹。得旨。今年實屬異漲。一切善後事宜。與河臣妥協和衷為之。○又奏萊州府屬被水歉收。糧價日昂。且地處海濱。不通江廣。若任

商販米出海。必至民食維艱。更恐將來匱乏。自應暫時停止。留濟本地。俟來歲豐收。仍聽販運。得旨。此不過屬員為一邑一郡之說。汝等為封疆大吏。不可存此遏糴之心也。若果無米可販。彼百姓自不販運矣。何待汝等之禁乎。汝前奏大公之謂何。○山西巡撫喀爾吉善奏。報秋收豐稔。糧價平減。口外歸綏一帶。麥禾尤屬豐收。糧價比內地更賤。得旨。欣慰覽之。汝已去數年。況目下秋成無事。可於

冬至後起程來京陛見。○甘肅巡撫黃廷桂奏。甘省所需糧石。比他省實增數倍。倉儲之蓄。尤不可不充。採買之法。更不可不講。今歲收成豐稔。糧價平減。通查各屬。應共採買糧五十二萬一千餘石。查從前採買之弊。縣異而州不同。有弊在於官者。有弊在於吏者。有弊在於鄉保富戶者。法應通變。其幅頓寬。大產糧甚多之州縣。委佐雜一員。於市集上。俟百姓交易完畢。所餘糧石。現價收買。倘市值

稍昂。即行暫停。其地方褊小。市集糧少之州縣。不論富戶貧民。石斛升斗。情願赴倉求值者。即刻兌發銀兩。數給錢文。不令守候。既無庸按戶分派。自不必差檄追呼。凡一切書役鄉保豪強之輩。皆不經其手。亦無從作弊。復令司道府州。不時嚴查。如有剋扣浮收。及抑勒強買。或令守候誤時等弊。官則糾叅。役則重處。一月來民情踴躍。糶賣稱便。得旨。是積貯為民命所關。應如是料理者也。○又奏。甘

省倉儲不足者。固以積貯為要。而有餘者。又當通融酌辦。庶免紅朽之虞。查河西之西寧。甘肅等處。每歲需糧甚多。全資採辦。今秋成大熟。糧價平減。應請將秦州等處。共存平糶糧價銀三萬五千六百四十餘兩。酌量分發於西寧等屬。添補採買。以此之有餘。濟彼之不足。方為衆多益寡之計。得旨。好。應如是者。○又奏。甘省沿邊一帶。東西綿亘千餘里。漢番雜處。彼此接壤。向來各有疆界。嗣因無知

小民。將番人畜牧處所。日侵月占。以致各番紛紛控告。爭訟不休。地方官既懷偏袒之意。復少審斷之才。將來勢必釀成邊釁。關係匪輕。臣查地方遼濶。從前界址。未經立石。終不足以息爭端而消後患。但各邊之地。有文員管轄者。有武職管理者。必得和衷協辦。方能一勞永逸。臣已咨明各提鎮。將沿邊一帶地方。各委就近文武員弁。詳加勘定。隨即多立界石。使彼此疆界判若列眉。庶百姓無從侵占番地。有司易於審斷。不特目前之積案一空。而將來之釁端。亦可從此消釋。得旨。所見甚是。知道了。○又奏。甘省地處邊陲。降霜畧早。皋蘭靈臺平涼等縣。秋禾被霜。均有損傷。雖輕重不等。但地極苦寒。小民別無生計。偶遇偏災。艱於度日。臣已飭將錢糧暫行緩徵。并委員確勘。先行賑卹一月口糧。其應免錢糧。及加賑月分。俟查實題請。得旨。是。妥協為之。○四川巡撫碩色奏報。通省收成約有九

分以上得旨以手加額覽之年歲既屬有收積貯不可不留心若得多糴官穀既可以備別省之需復免本省穀賤之患汝酌量情形速行奏來○福建漳州鎮總兵龍有印奏漳浦縣知縣朱以誠被民人賴石刺割殞命臣具摺奏聞奉硃批知道了將起釁緣由密訪再奏欽此臣訪得漳浦縣監生蔡懷素行不端被該縣屢次誡飭並加辱詈於是忿恨商之先被該縣枷責之陳士亮遂與往尋李珠商謀李珠現為該縣買辦衙役侵用銀兩恐其追究於是一同誘雇在縣衙內居住之民人賴石許銀一百兩賴石係游手無賴見財亡身遂於六月初三日伺朱以誠坐堂審事即潛身椅後持刀刺其咽喉殞命拏獲各犯訊究尚未定案謹將起釁緣由奏覆得旨以朕所聞事因小刀會且內有汝所管兵丁此皆諱而不言殊屬欺罔

大清高宗法天隆運至誠先覺體元立極敷文奮武孝慈神聖純皇帝實錄卷之一百七十五

大清高宗法天隆運至誠先覺體元立極敷文
奮武孝慈神聖純皇帝實錄卷之一百七十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次慶桂

總裁官經筵講官太子太傅文華殿大學士文淵閣領閣事稽察欽奉 上諭事務處管理刑部戶部三庫事務

世襲騎都尉軍功加十九級隨帶加二級又加二級 臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆七年壬戌冬十月丙戌朔享

實錄卷一百七十六

太廟

上親詣行禮○詣

大高殿行禮○遣官祭

永陵

福陵

昭陵

昭西陵

孝陵

孝東陵

景陵

泰陵○

上詣暢春園問

皇太后安○幸圓明園○頒乾隆八年時憲書

○順天府行鄉飲酒禮○丁亥戶部議准工

部尚書韓光基奏稱查賑有司每寄耳目於

紳衿紳衿因得遂其徇私偏袒或多報花名

或散給不均致災民不得普霑實惠應令督

撫會同欽差大臣嚴飭辦賑官一切實力奉

實錄卷一百七十六

二

行無濫無遺倘不肖紳衿阻撓賑務立即叅

究再辦賑人員既奉差委理應親身查察釐

剔弊端倘有玩視民瘼不詳慎稽查致飽家

人吏胥之索者即飛章叅奏分別議處如或

瞻徇別經發覺亦照例察議從之○又議覆

署直隸總督史貽直奏稱各屬現存穀一百

七十一萬九千三百餘石其糶借各案並均

貯案內共應買補三十六萬七千餘石現飭

採買還倉前奉諭旨購米運往江南濟賑查

各屬雖有現存米石。但分頭派撥。時日有稽。應令山東河南各撥來年運通漕米五萬石。運江。仍於直隸司庫動項。赴古北口外。照數採買運通。以補東豫漕額。應如所請。撥運濟賑。並動項買補。如市穀仍前充裕。價值無昂。再酌量多買。以裕積貯。得旨。依議速行。○又議准廣西巡撫楊錫紱奏。稱前准部咨。以桂平梧潯柳鬱等六府州所屬。均係內地。非沿邊可比。令將民壯裁汰。但查該處就粵西而

實錄卷二百七十六

三

論。不過烟瘴稍減。謂之內地。其實均有獍獠。密菁崇山。甚為險要。現存民壯。並非冗役。應照舊存留。從之。○旌表守正捐軀之廣東省茂名縣民曾清。徒妻黃氏。○準噶爾部人巴圖爾。翰克來降。命賞給安插如例。○戊子。諭據總督高斌奏。石林水口。現在進埽。上緊堵築。約計十月半前。可以合龍等語。覽之稍慰。朕懷從前高寶等處低窪積水之地。朕已降旨。令該督撫等多方籌畫。務使水潦速消。不

誤播種春麥。茲沛縣及山東滕嶧等州縣。皆係廣種春麥之地。地方官尤宜速為料理。俾水落田出。可以藝麥。庶春收可望。接濟有資。毋得遲緩。有妨小民生計。該部可即傳諭該督撫知之。○戶部議准浙江巡撫常安奏。稱漕白二幫運丁。向有抽調之例。但抽漕運白無論白丁。從前之代還舊欠。賠累堪憫。且原運各丁。無衛可歸。勢必遷移紛擾。應請照舊長運。毋庸更張。從之。○又議准福建巡撫劉

實錄卷二百七十六

四

於義奏。稱福安縣乾隆六年蠲剩應徵錢糧。其被災十分者。請分作三年帶徵。五六七分者。分作二年帶徵。從之。○又議准湖南巡撫許容奏。稱常平倉穀氣頭。厥底應量予開報。以免賠補。請將地氣潮溼之湘陰等三十二府州縣衛廳。貯穀三年以上。未經出糶者。每萬石。准開氣頭四十石。厥底十石。地方尤溼之龍陽等四縣。貯穀三年以上。未經出糶者。每萬石。准開氣頭六十石。厥底十二石。其氣

頭殿底穀遇盤查開報時。委員驗明成色。減價發糶。秋成買補。如價平減。即將原價買還。倘不敷。即於盈餘穀價內。通融辦理。如無盈餘。動支公項湊買足數。從之。○奉國將軍查燕故。以其叔父佐領額爾起。照例襲封奉恩將軍。○已丑。

上詣暢春園問

皇太后安○

上幸西廡子行圍。○諭秋審為民命所關。凡輕

實錄卷一百七十六

五

重出入。必須詳慎。以歸平允。乃今歲山東秋審冊內。其緩決之案。經九卿改為可矜者不少。可矜之案。經九卿改為緩決者。亦多至十餘起。朕細閱案情。九卿所改。俱屬允協。該署撫魏定國。並不留心鞠勘。辦理著該部傳諭申飭之。○工部議准。署直隸總督史貽直奏。稱鷓鴣堡城西關外。有山河一道。係赤城龍門。二縣衆山之水。匯流而下。近因土淤沙積。每遇山水陡發。侵入堡門為害。應請挑挖河

身。鑿開山脚。在司庫地糧銀內支修。從之。○免山東歷城。章邱。鄒平。長山。新城。齊東。濟陽。臨邑。長清。陵縣。德州。德平。平原。肥城。東阿。平陰。博平。茌平。清平等十九州縣旱災地糧銀二萬五千一百七十兩有奇。○以江安糧道翁藻為直隸按察使。○庚寅。

上御勤政殿聽政。○王大臣等議覆兩廣總督公慶復奏。稱廣東地窄民稠。雍正五年。援閩省之例。開赴南洋。閱久相安。茲以噶喇吧番

實錄卷一百七十六

六

目戕害漢人。署閩督策楞。恐番性貪殘。並有擾及商船。請禁南洋貿易。固為防微杜漸。但聞番目此舉。伊地賀蘭國王。責其太過。欲將鎮守噶喇吧番目更換。再三安慰商船。照舊生理。則該番並無擾及客商之意。請毋庸禁止南洋貿易等語。復據閩浙總督那蘇圖奏。稱商船出洋者十之七八。其中有至暹羅。柔佛等國者。宜加分別。請將噶喇吧暫禁。其暹羅。柔佛等國。仍准往來等語。復據兩江總督

宗室德沛奏稱外番肆橫固當禁止以俟革心而議禁南洋不能不弛禁諸國且該番因禁止通商必致窮乏是以商船回棹加意撫慰周旋是番性雖殘亦知畏懼況其所害者原係彼地土生實與番人無異南洋商販仍聽經營為便等語查各督撫所議或請毋庸禁止南洋或請暫禁噶喇吧往來雖所議不同其意皆以仰體

皇上懷柔至意令海外遠夷悔過自新均霑德

字彙卷一百七十六

七

澤應請將南洋一帶諸番仍准照舊通商其洋船進口帶米一節既據江廣閩浙督撫等查明或經奏准聽從商便或食米餘剩糶賣多寡不一或向無買米裝回應令各該督撫等遵照原議辦理再據閩浙總督那蘇圖奏稱外洋貿易或至壓冬又遇颶風難以逆料然亦不過三年內定可回棹查海疆立法自宜嚴密但內地外洋情形各別今內地貿易定以二年為限其重洋風信難定期限太促

恐有未便應如所請商船往販諸番者以三年為限如逾期始歸即將舵水人等不許再行出洋其外洋汎地如有停泊洋船查驗船照已閱多年者將該船勒令入口交地方官查訊詳報從之○又議覆前任川陝總督尹繼善奏稱四川三齊寨土司瓦寺不能奉法恤番以致畏懼離心應將該番民改歸茂州管轄查該番久隸瓦寺統馭未便偶因細故即令改隸但瓦寺與番民連年具控甚至自相殘害亦當善為籌畫請勅下新任總督馬爾泰將臣等所議情節熟籌妥辦使知不准改隸則該番絕倖望之念日久必獲相安土司無失業之虞邊境亦不致滋事從之○戶部議覆原任御史納拉善奏稱漕米運進京倉每年二百餘萬石係交額設經紀由五閘駕船載送其船一百隻每隻雇船頭一名運抵大通橋該監督照例抽掣如有一袋短少即在經紀名下追賠節年以來掣欠每至數

字彙卷一百七十六

八

石之多。察其情弊。皆緣船頭偷挖之故。請嚴頒禁例。應如所請。嗣後如有偷挖之船頭。按律治罪。從之。○又議覆欽差直隸總督高斌奏稱。臣等察看江南所需賑糶撥補之米。應將下江癸亥年起運漕糧。截留八十萬石。並截東省漕運粟米二十萬石。共足一百萬石之數。以二十萬石存貯淮揚徐海等屬。留備明春減價平糶。以六十萬石。湊同各案米穀。為災地冬春賑濟。下剩二十萬石。一米二穀。補還前借蘇松等處四十萬石倉穀。即將原借各州縣徵收漕糧。照數截存歸款。再上江通額正耗漕米。僅二十五萬餘石。除被災州縣應行蠲緩外。其餘請全數截留。撥運災屬等語。應如所請行。至該督復稱。截漕撥賑。猶恐不敷。懇在鄰省倉儲內撥濟。亦應如所請。將豫省附近鳳潁之州縣。共撥粟米二十萬石。運交鳳潁二屬。以備冬賑。如有餘貯。備來春平糶。其豫省倉儲。如何歸補之處。令河撫

雅爾圖酌議辦理。得旨。依議速行。○工部議覆江南河道總督完顏偉奏稱。河工歲修搶修。例支河庫銀應用。今自乾隆二年至七年。兩江報災停徵州縣。共欠解河銀二十七萬餘兩。河庫支用不敷。現在黃湖各處殘缺隄工。急應修理。暨清河之蓄清壩。亦應接築。束水濟運。無項可動。懇在近省酌撥銀四十萬兩。應如所請。在河南秋撥冊報實存銀內。撥給二十萬兩。兩浙鹽課秋撥冊報實存銀內。撥給二十萬兩。各該撫文到日。速即解交。得旨。依議速行。○以通政使司左通政李世倬為太僕寺卿。辛卯諭。此次施恩借給八旗兵丁庫項。有因兵丁內曾指錢糧認買公產地畝。其每月所餘錢糧。不敷坐扣。不准借給庫銀者。若因認買公產地畝。不得支借。於伊等生計無益。此等認買地畝之人。應扣錢糧著展其限期。一年作為二年扣除。其每月少扣所餘錢糧分內。亦著補行借給。至於官員

有認買公產地畝者。伊等應扣之俸銀。亦照兵丁一體展限扣除。再定例。官員紀錄一次。抵罰俸半年。若遇罰俸一個月。至五個月者。因不至銷去一次紀錄。遂不准抵銷。照常罰俸。又有因兩三案並發。所罰之俸。雖至銷去一次紀錄。亦不准抵銷。但官員等因公事。勉議叙紀錄。乃因所罰俸少。不至銷去紀錄。遂不准抵銷。照常罰俸。於伊等生計。亦屬無益。嗣後旗員應罰之俸。不至銷去一次紀錄者。著照王等紀錄之例。暫行註冊。俟再遇罰俸案件。合算抵銷。以示朕體恤八旗官兵。俾生計饒裕。得以一體霑惠之至意。江南河道總督完顏偉疏報。秋汛過後。湖河水勢漸消。并高郵邵伯各壩工程完竣。得旨覽奏。朕心稍慰。該部知道。閩浙總督那蘇圖奏。浙江提督裴鈺等。扣剋侵欺。狡詐營私。應請革職嚴審。得旨。這所參裴鈺。李士宏。卓林。俱著革職。其扣剋侵欺。狡詐營私各款。及本內有

名各犯。著侍郎彭維新前往會同巡撫常安。一并嚴審追擬具奏。該部知道。壬辰上幸靜明園行圍。加賑江南山陽阜寧。安東。清河。桃源。銅山。沛縣。蕭縣。邳州。宿遷。睢寧。海州。沐陽。甘泉。泰州。興化。高郵。寶應。鹽城。六合。江都。江浦。豐縣。碭山。贛榆。淮安。大河。徐州等二十八州縣。衛水災飢民。癸巳上御洞明堂。勾到雲南貴州。四川廣西情實罪犯。停決雲南斬犯一人。四川斬犯三人。絞犯三人。廣西斬犯三人。餘九十人。予勾。戶部議覆御史胡定奏稱。江南被水各屬。涸出地畝。請勅地方官。即勸民種植。其無力者。收成後。田園仍歸原主。隨涸隨種。查被災田地。業主旋歸。若即令歸還原主。未免有虧工本。難保必無告訐。應令督撫等轉飭該州縣官。酌量情形。妥協辦理。從之。欽差刑部侍郎周學健。直隸總督高斌。奏江南銅山。沛縣。邳州。宿遷。桃源。清河。安東。海州。沐陽等九州縣。因

九月湖河並漲。續被水災。請將次貧增賞十月一個月口糧。與極貧一體賑恤。得旨。普汲黥非查災之使臣。尚可便宜行事。况親承朕命查災賑之大臣乎。著照所請行。該部知道。

○河東河道總督白鍾山疏報。今歲黃沁兩河水勢甚大。一經設法防護。胥慶安瀾。自七月初八日立秋起。至九月二十五日霜降止。秋汛已過。黃河上自孟縣榮澤下至虞城單縣。陸續長水一丈二寸。至一丈一尺不等。沁河陸續長水一丈一寸。凡豫東二省南北兩岸一千二百里內。一切埽壩工程。俱已修築完固。得旨。據奏秋汛水勢已過。黃沁兩河工程俱各平穩。知道了。該部知道。○旌表守正被戕之安徽省阜陽縣民于孟甫女于氏。○甲午。

上詣暢春園。問

皇太后安。○

上御洞明堂。勾到廣東福建情實罪犯。停決廣

東斬犯三人。絞犯一人。福建斬犯二人。餘七十三人。予勾。○命重釐滯獄。諭曰。乾隆四年。朕曾降旨。將秋審。朝審。緩決五次以上之人。犯酌其情罪稍輕。尚可貸以生路者。比照凶盜免死減等之例。充發邊遠烟瘴地方。較之可矜減等之例為重。而較之永遠監禁之犯為輕。其情罪可惡者。雖經多次緩決。亦不在減免之列。今已隔數年。監禁之犯。倍多於前。久繫囹圄。亦屬可憫。著大學士九卿。做照乾隆四年之例。悉心辦理。分別請旨。再情實未勾人犯內。或有情罪稍輕。可以照此辦理者。亦著大學士會同刑部。分別具奏。○又諭法敏富德在軍前効力多年。著來京。原任按察使劉柏著前往軍營。辦理糧餉事務。○命服闋翰林院侍讀學士張若靄。仍在南書房行走。○乙未。諭今年江南淮徐鳳潁等府。被水之後。籌畫民食。需米甚多。因山東與江南接壤。輓運較易。彼地今歲收成尚好。是以降旨。

將登州穀石及德州臨清兩處所截漕米運往江南以資接濟。續據該撫晏斯盛奏稱登萊等處現需米穀難以撥運江省。朕降旨停止。今查東省沿河之濟寧臨清二處貯有倉穀一十八萬餘石。若以八萬石留存本地以十萬石碾米載運江南一水可通甚為有益。所有運費悉照前運截漕之例一體報銷。著該部即傳諭山東巡撫江南督撫速行妥辦。毋得稽遲。○戶部議准。湖南巡撫許容奏稱。

前被災各屬內茶陵州已賑給一月口糧。在乾隆七年地丁銀內動支。其益陽沅江二縣均應於冬夏之交擇極貧者賑恤三個月。所有借給沅江縣貧民社穀三十石並請免還。即作賑糧。再勘不成災之乾州鳳凰永綏三廳倉儲就近各屬應酌量通融撥增平糶得旨依議速行。○兵部議准四川巡撫碩色奏稱瓦述長坦長官司側冷早故無子承襲故該處番民二百二十二戶每年認納之馬牛

俱係鄰境之德爾格式宣慰司朋蘇克丹巴經管輸納。伊久經兼攝番民樂附應即將瓦述長坦地方改歸管理。其每年貢賦責令徵收彙解從之。○丙申。

上御洞明堂勾到湖廣陝西情實罪犯停決湖廣斬犯五人絞犯二人陝西斬犯二人絞犯二人餘六十七人予勾。○諭湖廣廣西秋審情實內饒鳴鎬周鍾瑄許登瀛俱係貪官原應置之重辟。但朕按其款蹟與枉法婪贓者尚稍有間。特從寬典。將三人免死發往軍臺効力贖罪。若實係枉法舞弊穢蹟昭著之員則斷不寬宥。將此曉諭中外知之。○刑部奏御史王綱振條奏秋審事宜奉旨命臣等會議具奏。今會同九卿詹事科道逐案研審除各盜有情罪重大賊蹟未明仍應監候緩決者均附入各省緩決本內聲明具題外其盜犯內有因盜首久逃不獲或已經正法監斃實證無人淹禁多年者屢經恩赦未得援免

情有可憫。應將此等人犯。或擬保候。或擬減遣。恭候命下。行令各該督撫。遵照辦理。其發遣之犯。仍照例查明有無妻室。分別發遣。從之。○丁酉。

上詣暢春園。問

皇太后安。○

上御洞明堂。勾到奉天。江西。浙江。情實罪犯。停決。奉天斬犯三人。絞犯一人。江西斬犯二人。浙江斬犯二人。絞犯二人。餘五十五人。予勾。

○大學士等議覆。中允于振奏稱。闕里志樂章內。稱惟王神明。猶襲唐人稱王之舊。恭請釐正。查國子監所歌六曲。皆已稱師稱聖。無可改易。至曲阜及各省學宮。未能盡一。應令該館另行撰擬。交部頒發。一體遵照。得旨。文廟樂章。著張照撰擬進呈。頒發曲阜及各省學宮。○兵部議覆盛京兵部奏稱。沙河等十三驛。差務殷繁。每年供應勘牌二百七十餘道。較前數倍有餘。請酌定差使馬數。查近

年差使。雖覺稍多。其中亦可酌量變通。如盛京五部本章。既可彙送。其將軍府君衙門。亦可與五部彙送。又如東三省恭進表箋。寧古塔為黑龍江要路。而盛京又為寧古塔要路。每年俱應先期豫備。黑龍江送至寧古塔。寧古塔送至盛京。彙齊齎送。驛站自不致竭蹶。從之。○頒給湖南辰州府分防浦市通判。沅陵縣分駐荔溪縣丞。湘潭縣分駐朱亭縣丞。湘鄉縣分駐永豐縣丞。零陵縣分駐周堂寺縣丞。各關防。從巡撫許容請也。○以江南狼山鎮總兵官陳倫炯。為浙江提督。調浙江黃巖鎮總兵官林祖成。為狼山鎮總兵官。溫州鎮總兵官蔣麟經。為黃巖鎮總兵官。以湖州協副將陳訓。為溫州鎮總兵官。○戊戌。上御洞明堂。勾到安徽。江蘇情實罪犯。停決。安徽絞犯二人。江蘇斬犯四人。絞犯三人。餘五十五人。予勾。○旌表守正捐軀之安徽省旌德縣民呂積揆妻汪氏。○己亥。

上御洞明堂。勾到河南情實罪犯。停決斬犯一人。絞犯六人。餘六十七人。予勾。○吏部議准。山西巡撫喀爾吉善奏稱。祁縣向設有龍舟峪巡檢。駐劄北關。查該處並非隘口。又無市集。惟縣屬子洪鎮。在縣南適中之地。人烟湊集。路當豫楚。孔道。崇山疊嶂。宵小易於竊發。應將北關巡檢移駐該鎮。至該巡檢原有舊頒印信。今移駐既同屬祁縣所轄。毋庸另行鑄給。原設之弓兵二十名。即令供差遣。其衙署以北關衙署木料移建從之。○戶部議准。雲南巡撫張允隨奏稱。滇省解運京銅。威寧永寧二處銅店。各設收發官一員。應請每員月給養廉銀一百兩。至正運官。每員月給養廉雜費銀八十兩。協運官。每員月給養廉雜費銀四十五兩。從之。○旌表守正捐軀之直隸省唐縣民康燦妻楊氏。○庚子。

上詣

安佑宮行禮。○戶部議覆廣西巡撫楊錫紱條

奏鼓鑄事宜。○每年鑄錢。約用銅二十三萬餘觔。現在開採之回頭山。將軍山響水廠三處。約可抽買十二萬觔。其不敷。應收買客銅。每百觔給銀十三兩八錢。但客銅多寡。難以懸定。今臨桂永福恭城等處。報有銅礦。俟試採有效。即題報抽課。停買客銅。其黑鉛。惟淶泓等廠頗高。計每年抽課四萬餘千觔。應請自乾隆七年起。每年撥一萬五千觔。運省供鑄。餘仍運至南寧。作各標鎮協營彈鉛。如有餘。仍變解充餉。至現開各廠。並無白鉛。應於百色等處。收買運省。又賀縣南丹二處。雖有錫礦。但錫質低潮。課亦無多。應請採買點錫。查該省收買廠銅。每百觔。原給價銀六兩八錢。及八兩三錢不等。今收買客銅。給價銀十三兩八錢。殊屬浮多。其係由何處販買。實需工本脚價若干。並令查明酌減報部。餘應如所請行。○回頭山所出銅礦。除揭煉課餘銅外。有地脚爐渣。猶可鎔煉出銅。向來每百觔

官給銀八兩三錢。商人因不敷工費。棄置不煉。今確估工本銀十三兩。再加運省脚價銀四錢。應仍令其鎔煉。其將軍山響水廠。如有爐渣。一并查辦。查八兩三錢之價。先經題定。已敷各廠工本。今爐渣煉出銅觔。自應照例抽課。並照定價畫一辦理。銅鉛錫一百觔。共鑄錢十三千三百文。除爐頭匠工錢及炭價外。淨得錢十一千二百九十文。計每錢一千。工本不出九錢以外。應請酌撥七年地丁銀四萬五千兩。以為工本。於將來盈餘錢內歸還。查炭價即在工料之內。未便重開。應令將所鑄錢文。暨給發工料錢文。查明據實造報。一錢局房屋。須近水次。及寬敞地方。今擇於省城文昌門外臨河地面。酌蓋錢局一座。取名廣源局。計頭門三間。二門三間。大堂三間。銅庫四間。鉛錫庫三間。錢庫四間。炭庫十間。東西爐房各五十間。砌爐二十二座。鐵匠房三間。官房三間。書辦房二間。巡攔房二間。

爐神廟三間。土地廟一間。應如所請建造。一。需用器具什物。爐頭匠作。力難自備。請先於工本銀內墊給。於伊等火工錢內扣還。至鼓鑄事關重大。須委令按察使總理。亦應如所請。從之。○加賑江南鳳陽臨淮。宿州。靈璧。虹縣。懷遠。壽州。鳳臺。定遠。蒙城。霍邱。太和。潁上。亳州。阜陽。泗州。五河。盱眙。天長。等十九州縣。暨鳳陽鳳中。長淮。宿州。泗州。等五衛。水災飢民。○旌表守正被戕之河南省商邱縣民趙生聘妻楊氏。

大清高宗法天隆運至誠先覺體元立極敷文
奮武孝慈神聖純皇帝實錄卷之一百七十六

實錄卷一百七十六

二十三

大清高宗法天隆運至誠先覺體元立極敷文
奮武孝慈神聖純皇帝實錄卷之一百七十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級 臣董誥內大臣戶部尚書鎮藍旗滿洲都統軍功紀錄五次

尋常紀錄十四次 臣德瑛經筵講官太子少保工部尚書紀錄六次 臣曹振鏞等奉

敕修

乾隆七年壬戌十月辛丑月食○

實錄卷一百七十七

一

上詣暢春園問

皇太后安○

上御洞明堂勾到山東山西情實罪犯停決山
東斬犯二人絞犯二人山西絞犯二人餘九
十七人予勾○壬寅

上御洞明堂勾到直隸情實罪犯停決斬犯二
人絞犯七人餘一百二十二人予勾○大學
士等議覆河南巡撫雅爾圖奏稱嗣後賑濟
動用倉穀應令該督撫於收成後察核各屬

糧價與向日不甚相懸。即將應行買補緣由價值數目豫行題明。一面發帑採買。買竣責成該督撫。出具印結保題。准予開銷等語。查米糧價值不時消長。未必盡如題明之數。臣等酌議嗣後各省。於本境採買賑穀。令該督撫將買補緣由。及應動銀款總數。先期題明。收成後酌量採買。不必復將價值臨時題明立案。仍轉飭各該上司不時查察。買竣之日。俱令各屬造具按日採買價值清冊。該督撫取具承辦官及各該上司印結。核實加結保題。以憑部核。倘有浮多。該督撫未經查出。仍駁令核實。另換冊結保題。至准銷糧價各屬員內有以侵冒事發者。該督撫與司道府各上司一併叅處從之。○以吏部右侍郎田懋補原官。○癸卯。

上詣

恩佑寺行禮。○奉

皇太后還宮。詣

壽康宮問

皇太后安。○甲辰諭。今年秋審冊內。創墳之案。奉天。江南。江西。陝西。山西。湖廣。福建。雲南。諸省皆有之。而山東。河南較多。直隸為尤甚。此等人犯。按其情節。法所難寬。查雍正年間。凡為第一次者。俱行正法。近年以來。朕辦理稍寬。實出一時不忍。不意掘墳之案。數倍於前。是此等凶惡之徒。不可以德感。或且因寬而啟玩法之心也。夫愚民即為飢寒所迫。不免作奸犯科。何遂以貪取財物。而殘及枯骨。慘毒至於此極。此雖人心之無良。或亦由平素未知國法。視發掘為行竊之常。以至於犯嚴條。斷無可貸。著奉天府尹及各該省督撫。通飭地方有司。留心開導。諄切勸戒。以感動其天良。並將律文於各處明白曉示。俾知創墳之情罪。如此其重。一犯此律。即不免於死。則奸徒畏法。故習不敢復萌。而薄俗可因而止息。該部即傳諭各該督撫知之。大學士等

遵旨議奏黑龍江將軍博第呼倫貝爾副都統瑪爾拜等奏請將呼倫貝爾地方之喀爾喀巴爾虎官兵仍留駐劄查前因軍務調撥東三省兵額缺俱已挑補由打牲處索倫達呼爾內挑一千名添駐博爾德挑三千名添駐呼倫貝爾至喀爾喀貝子彥楚卜多爾濟屬下逃往俄羅斯之巴爾虎等該台吉出銀贖回編為佐領挑取二千四百名亦移駐呼倫貝爾此項兵皆非額設特為訓練以備軍

平定縣志卷之七

四

營更調數年來軍務告竣大兵俱已撤回若仍留駐劄與舊索倫達呼爾兵一體當差礙難裁減錢糧且巴爾虎等性多狡滑難保必無猜忌臣愚以為駐台用官兵六百餘名為數較多請將防邊兵核減足用除呼倫貝爾舊索倫達呼爾一千餘名外仍需新巴爾虎兵若干之處交博第瑪爾拜等公同核議酌定額缺其額外新巴爾虎兵仍給食錢糧照撤回打牲處之舊索倫達呼爾例缺出陸續

裁汰庶額外兵漸次核減錢糧不致虛糜巴爾虎等亦無所猜忌將來設立馬廠需用蒙古即由此項人等內分別移駐亦屬妥便從之戶部議准江西巡撫陳宏謀奏稱倉穀空虛買補甚難請將本省捐監穀價每石加增一錢并請本省納穀不許赴部納銀從之禮部奏朝鮮國王李昫咨稱該國民人金時宗西撤達伊年鄭世弼等三案越境犯法屢荷寬典感戴

平定縣志卷之七

五

天恩咨請轉奏得旨所奏知道了朝鮮國民人越境犯法屢荷寬典乃朕格外柔遠之恩若無知之人見朕屢次從寬而漸流於縱肆則犯法者轉多非朕保全外藩民人之本意矣該國王當嚴加約束不時稽查俾各安分不致再罹法紀該部即行文該國王知之○兵部議覆陵寢總管貝勒允祐奏稱喜峯口羅文峪冷口等處附近

陵寢恐有不肖官兵行竊為匪等事。請將該三處駐防官兵勤惰。令副都統富和一人查辦。庶責成專而防護愈密等語。查該三處駐防官兵。於雍正十年議定。交與該大臣總管。巡察管轄。業經十有餘年。原因此三處邊口俱附近

陵寢地方。關係風水。今若因該三處官兵已改歸山海關管轄。凡一應防護風水。稽察勤惰。該大臣總管俱置不問。設有事端。殊

實錄卷一百一十七

六

非慎重防範之道。酌議嗣後該三處官兵。凡遇軍政之年。一切考察賢否。填註考語。分別去留。俱交副都統辦理具題。毋庸會同該總管。至事關防護風水。稽查勤惰之處。俱令該大臣總管就近辦理從之。○左都御史劉統勲等奏。考試拔貢。公同校閱。分別進呈。其山西毛清奇。誤認題指。應不准拔貢。得旨。山西毛清奇。不准拔貢。發回本學肄業。該學政交部嚴加議處。餘依議。

此番進呈各省拔貢試卷。朕看取在一等者。文理即屬平常。則其餘更可知矣。至毛清奇。將論語本文。竟爾錯記。尤為荒謬。夫拔貢乃造就人才之典。今各省所取淺陋如此。何以振起文風。司衡鑒者不得辭其責。嗣後務須矢公矢慎。遴選出眾之材。以鼓勵多士。毋得苟且塞責。自干嚴譴。○以直隸提督塞楞額。為陝西巡撫。調廣東提督保祝。為直隸提督。以廣東瓊州鎮總兵武進陞。為廣東提督。○以湖南按察使王玠。為四川布政使。山東糧道明德。為湖南按察使。○乙巳。諭廣東水師戰船舵工。准給隨糧一案。係

實錄卷一百一十七

七

皇考格外之恩。乃當時各員。辦理未協。於未經定例之先。即行支給。實屬錯誤。理應扣追還項。但事隔八九年。現在充役之人。多非昔日領糧之人。若於各官名下。責令代賠。伊等又

甚艱窘。可為憫惻。用是加恩。將粵省應追舵工隨糧銀一千三百九十七兩零。米四百三十二石零。悉行豁免。以示優卹。該部可即行文該督撫提鎮知之。○又諭提督永常。任內應得之項。僅足供伊日用之費。若所給夷使緞匹茶布等物。皆出已資。未免拮据。著照北路軍營之例。准其動用公項。○禮部奏本年十一月二十五日。

皇太后聖壽節。次日適屆冬至。

皇上先期躬詣齋宮。所有慶賀典禮。請於十一月二十二日豫行從之。○工部議准。江蘇巡撫陳大受奏稱。華亭縣金山嘴一帶。外護土塘。前經督臣楊超曾奏請於土塘灣突之處。接築玲瓏石壩六十一丈。加椿工四十二丈。再幫築土餞三十丈。部議令查明果否有益。再行奏報。今查玲瓏石壩。外釘密椿。中填石塊。無虞潮水衝入。久則沙泥壅塞。益得堅固。洵可保護塘基。應即照此修築。從之。○命署

戶部左侍郎三和實授。○丙午策試天下中式武舉等一百十人於太和殿前。諭聞得八旗閱兵。該管大臣等俱支搭涼棚閱看。若不親臨隊內操演。則進退之節。不得諳習。嗣後閱兵。該管大臣等著輪班入隊。親身督率操演。○大學士等議覆甘肅巡撫黃廷桂奏稱。前買支河西滿洲糧草。係照部價每糧料一石。估銀一兩。每草一束。估銀一分。但各屬時價不一。計自乾隆二年冬季起。至六年底止。共不敷銀十一萬七千五百七十七兩零。內官墊銀三萬二千七百四十二兩零。民墊銀八萬四千八百三十五兩零。屢請找給。俱經部駁。百姓大半畏縮。承辦不前。懇將不敷之數。概行補給。嗣後採買永著為例。等語。應如所請。著照甘涼西肅各鎮協營之例。每糧料一石。折銀一兩者。加增二錢。其從前採買之項。俱照此補給。得旨。依議速行。○兵部議覆寧古塔將軍鄂彌達等奏稱。嗣後三姓。八

姓地方二十佐領下前鋒領催缺出請照船廠寧古塔之例將各佐領下舊滿洲披甲一體挑取如驍騎校缺出亦將三姓八姓琿春等處之舊滿洲領催前鋒一并揀選豫行保舉引見記名補用至補用驍騎校之後遇各處防禦缺出亦准一體揀選陞用等語查挑補舊滿洲過多恐有礙本處兵丁陞轉之路今酌議三姓八姓二十佐領下之舊滿洲挑補驍騎校不得過四員琿春三佐領下之舊滿洲准補驍騎校一員如揀選不得其人仍於三姓八姓琿春各本處兵丁內揀選陞用從之以福建提督蘇明良新授廣東提督武進陞對調丁未

上詣

皇太后宮問安○御紫光閣閱中式武舉騎步射○駐蹕瀛臺○戊申

上御紫光閣閱中式武舉技勇○駐蹕瀛臺○戶部議准江西巡撫陳宏謀奏稱通省孤貧

口糧額數請量為增減計南昌新建高安廬陵吉水安福永新臨川南城貴溪贛縣等十一縣原額一千八百八十七名共應裁一百七名所裁口糧解司歸入起運奉新宜春萬載峽江龍泉宜黃廣昌瀘溪玉山廣豐都昌彭澤上猶崇義雩都信豐龍南瑞金石城長寧等二十縣原額二百六十七名共應加一百七名所加口糧以癸亥年為始即於各該縣地丁銀內動支造入該年地糧奏銷冊內具題查核從之○己酉

上御紫光閣覆閱中式武舉射○詣

皇太后宮問安○還宮○賑河南永城鹿邑夏邑柘城上蔡新蔡西華商水鄆城鄭州新鄭淮寧沈邱等十三州縣水災飢民其不成災之新野汝陽西平遂平項城扶溝等六縣俱緩徵錢糧○旌表守正捐軀之直隸省定州民張文臣妻王氏○庚戌

上御太和殿傳臚賜中式武舉一甲賈廷詔等

三人武進士及第。二甲周廷鳳等十人武進士出身。三甲張珍等九十七人同武進士出身。○辛亥。

上視

順懿密太妃病。○壬子。定滿洲外用。先行考試例。諭曰。朕覽給事中楊二酉條奏。內稱滿洲用為外任。恐伊等於子民之道。多未講習。一日驅為民牧。有失閑檢。頓罹叅處。殊為可惜等語。夫天之生才。原不因地而異。從前滿洲之未用府縣者。因人數不多。僅足敷京員之用。今教養已及百年。人才數倍於前。登用之途。因而壅滯。夫內任外任。莫非王事。除授守令。正可使通民情。習吏治也。豈在京刑名錢穀之屬。無一不辦。而獨不可辦郡縣之事乎。且在外督撫司道。皆可勝任。而獨至郡縣。乃不可乎。今之狡黠者。又謂朕之此舉。為滿洲生計起見。而滿洲中之卑陋者。亦安於此。而不以為恥。此實不喻朕意之至矣。今楊二

酉稱。以為滿洲未諳子民之道。獨不思漢人中。或係膏粱紈袴。徒事輕肥。或學究單寒。專心時藝。如農夫之菑畬耕穫。商賈之懋遷有無。以及催科弭盜。聽訟察奸。講律令。防書吏諸務。頭緒紛繁。情偽百出。豈能一一通曉。亦不過延請幕賓。隨時學習而已。朕每當月選引見進士舉貢等官。其中衰老遲鈍者甚多。朕不過擇其龍鍾頽憊。全不省事者二三人。或令休致。或改教職。此外各員。因其需次多年。未有過失。不忍概令廢棄。姑且試用。此等人豈能熟練政治。勝民社之寄。稱循良之選。今所用之滿洲。比之此等勝甚。況居官者。果能隨地留心。即仕為學識。見自日增長。未有學養子而後嫁。此非聖人之明訓哉。且滿員之例。其用為道府者。先由堂官保舉。用為州縣者。皆係科甲出身。而考試履歷時。朕必閱其文理。帶領引見時。朕又看其人材。再三詳審。可用者用之。不可用者。仍復留京。豈至銓

選非人。為地方之累耶。楊二酉又稱喀爾吉善。叅奏齊拉渾寶平一案。雖營弁非親民之官。然地方治體。殊無二致。欲培植之。不可不求所以成全之。又稱督撫身任地方。固不可滿漢歧視。稍示姑容。而於此等初任滿員。必加意訓勉。俾知鼓勵。倘怙終不悛。當仍登白簡。以儆官邪等語。楊二酉一人之奏。前後自相矛盾。蓋彼胸中先有歧視滿漢之見。故持論不得其平。若此。如謂督撫護庇滿洲。則喀爾吉善滿洲也。而叅劾滿屬員。其不敢護庇亦已顯然。如因滿洲有齊拉渾寶平之劣員。而遂謂滿洲不可外任。則累年以來漢人之以劣蹟被叅者。不知凡幾。亦將謂漢人不可用乎。朕君臨天下。一本大公。滿漢臣工。視為一體。栽培傾覆。悉視乎人之自取。初無所容心於其間。即現任之督撫。亦未必有庇護滿洲者。但歲月久長。賢愚不等。倘用出之滿洲。有沾沾以生計為念。而簞簞不飭者。朕必重

治其罪。該督撫若稍有瞻顧徇情之意。即非公忠體國之大臣。朕一有見聞。必加以嚴譴。並將滿洲外用之例停止。為督撫者。諒不肯以已身之功名。而博他人感悅。並阻將來滿洲仕進之階。是非愛之。實以害之也。楊二酉既有此奏。或將來應用府州縣之員。其中有不諳文義。恐被幕友所欺者。亦未可知。著吏部於伊等未用之先。每年考試一次。朕派大臣檢閱。分別優劣。進呈御覽。記名候缺。其文理不通者。不准外用。如此。庶於吏治人材。均有裨益矣。朕恐內外臣工。不識朕意。特行宣諭。俾共知之。楊二酉原奏并發。宗人府奏宗室副理官弘暹。天性乖張。事多悖謬。應嚴加處分。得旨。這所叅奏。甚是。著依議。不但宗人府之宗室官員。凡宗室之內。該衙門俱應不時稽察。如實不孝不弟之人。即照此嚴行叅奏。以為宗室等戒。教訓宗室。雖係朕躬之事。但朕日理萬幾。又安得有此暇耶。且宗人

府即有族長之職。嗣後務體朕教養宗室之至意。時加稽察。嚴行管束。斷不可怠忽。○兵部奏。壬戌科武進士補授侍衛。得旨。一甲一名賈廷詔。授為頭等侍衛。二名李世祿。三名白鍾驥。授為二等侍衛。二甲周廷鳳等十名。授為三等侍衛。三甲張珍等十七名。授為藍翎侍衛。○免江南山陽。阜寧。清河。桃源。安東。淮安。大河等七縣衛水災地糧銀三萬二千七百四十四兩有奇。○賑直隸薊州。雞澤。西寧。三州縣水災飢民。○賑山東鄒縣。續被水災飢民。○旌表守正捐軀之廣東省增城縣民盧永振妻單氏。○癸丑。定南漕耗贈長免停支例。諭前據漕運總督顧琮具奏。江南漕米耗贈宜免停支一案。朕交大學士會同該部議奏。旋據議稱。停支之例。相沿有年。應仍照浙省之例辦理。今顧琮摺奏。浙江與江南情事種種不同。江省此案。始以軍興而議裁。繼以欠糧而請復。自復給之後。已三十餘年。

現在全支。尚多拮据。若行裁減。則丁力既絀。轉運維艱。等語。旗丁挽運辦公。朕所軫念。此漕耗一項。既有歷年支領之成規。著照舊給領。永免停支。俾兵力寬紓。轉漕無誤。他省亦不得援以為例。該部即傳諭漕運總督等知之。○又諭。巡視南漕都隆額著即速前往淮安。一應查看事宜。協同顧琮辦理。○又諭。保祝未到任之前。直隸提督印務著宣化總兵官李質粹前往署理。○戶部議准。閩浙總督那蘇圖奏稱。近年臺灣米貴。又遇偏災。從前題定。每年撥運金廈。漳泉米一十六萬餘石。遞年壓欠。積二十餘萬石。業經奏准。分三年運足。實緣內地需米孔殷。撥協必不可少。今給事中楊二酉奏。先實臺倉。俟臺倉既盈。再買運內地。將兵精民食。無從措辦。應仍照前撥運。毋庸更改。從之。○禮部奏。十一月二十五日恭遇皇太后聖壽節。應行慶賀典禮筵宴。得旨。奉

皇太后懿旨。今年停止行禮筵宴。餘依議。○以通政使司右通政劉綸為左通政。以翰林院侍講學士勵宗萬為右通政。○以鑲紅旗滿洲協領清保為熊岳左翼副都統。○賞卹廣西遭風溺斃兵丁。○甲寅。

上詣

皇太后宮問安。○工部議准。湖廣總督孫嘉淦奏稱。湖北連年水災。現在親行各郡查勘。自武昌一帶民隄。多踞高而遠水。故工程穩固。偶有殘缺。俱令照例承修。其自安陸至武昌隄。皆臨水。自潛江以下至沔陽漢川交界。二百里內。處處卑薄。必倍加培築。今百姓現被水災。力有不勝。若欲酌給口糧。以工代賑。不惟目前所需浩繁。且恐百姓之心。易生覬覦。將來應修工程。轉致觀望遲延。應令地方官分別確查。其未經被水與被水稍輕。以及田少隄多之處。俱令照舊派夫加築堅固。其田多隄少。而又被水稍重者。量其夫工數目。即

動支雍正七八等年漢商公項餘銀二萬二千兩。借給修理。於明秋徵追還項。從之。○又議准。湖廣總督孫嘉淦奏稱。湖北荊門州之關廟。鄭家潭等處。沙洋大隄二十餘里。為荊州安陸二郡各州縣保障。於本年六月潰決。臣親往查勘。該處隄工。多有大溜頂衝之所。即將新潰之口。加意堵塞。以一線之隄。與大溜抗衡。終非萬全。迤南一二里外。尚有古隄一道。長二十里。其上十里。當關廟之後。隄身尚皆高厚。可以緩修。下十里。適當鄭家潭潰口之後。本身淺薄。況大隄新潰。更宜保護。必大加修築。一律高厚。現今各處民隄。既奏請借支商捐餘銀二萬二千兩幫修。計此項借給外。尚有餘剩。即修理此隄。如再不敷。現有武昌關口岸銀。每年亦有餘剩。可以動給。從之。命革職福建巡撫王士任。往軍臺効力。旌表守正捐軀之安徽省和州民蔣成科妻左氏。乙卯。

上詣

壽皇殿行禮○詣

皇太后宮問安。○是月都察院左都御史杭奕祿理藩院左侍郎勒爾森署直隸總督史貽直會奏奉命查徹莊頭典賣地畝共計一千二百餘案年歲久遠其中情事不一如有應行變通之處當商酌妥辦務使旗民兩得其平得旨所見甚是和衷詳酌為之○署直隸總督史貽直奏今歲直隸豐收恐民間不知撙節別圖厚利私開燒鍋現飭各屬徧加曉諭得旨欣悅覽之重穀禁耗教撙節惜物力皆為政之最要者與各屬實力行之至今年直隸雖屬有收而南方水災特甚朕不敢不敬承

天戒而遽以此小稔為侈耶○直隸提督新授陝西巡撫塞楞額奏採辦

陵糈米石與其運至薊州莫若運至遵化可省運價銀四千餘兩且自遵化運至

陵寢較薊州亦捷辦理尤便得旨覽妥當之極

咨史貽直照所議辦理○欽差刑部侍郎周學健直隸總督高斌江南河道總督完顏偉會奏查勘下江被水地方俱陸續涸出可令補種得旨覽奏稍慰朕懷所幸今歲節令稍遲可以補種秋麥然籽種為要可與督撫等竭力妥辦○欽差直隸總督高斌江南河道總督完顏偉河東河道總督白鍾山奏石林口漫水現由微山湖導入運河俱係清水不致淤運並開通竹絡壩分流入黃宣洩甚暢駱馬湖水亦漸消退得旨所奏俱悉其運河挑淺事宜白鍾山宜回東速辦況石林口將次堵築可以無庸在工所矣○又奏石林口已緊趕進埽因口門收窄逼水洶湧復汕刷四十餘丈臣等急將刷通處趨築堅固不使刷寬仍從東壩進埽約十一月方能告竣得旨汝三人同在彼而尚致有此失朕為汝等羞焉○兩江總督宗室德沛奏接讀河臣完

顏偉恭錄諭旨。以臣等屢次摺奏。有歸咎河臣之意。恐未能和衷共濟。致妨公事。臣與河臣完顏偉。並無意見不合。且完顏偉到揚。臣尚語以上殿相爭。下殿不失和氣。始為事君交友之道。完顏偉亦以為然。緣臣初任兩江。受事後。即值水患。未知河工向來辦理之法。此實臣之無知處。若必歸咎河臣。臣身任地方。又安能辭其責。得旨。覽。必如韓富之忠誠有識。然後可語此。豈人人所可假者也。若不勤理政務。實力拯救災黎。而空談道學。實屬無益也。○兩江總督宗室德沛。安徽巡撫張楷奏。前奉諭旨。甄別所屬知府。今會同察核。分別更調降改。及應留原任。據實奏聞。得旨。知道了。若謂奉行一次上諭故事。則非朕澄清吏治之懷矣。豈此後之知府。有不稱職者。汝等即可不留心乎。○江蘇巡撫陳大受奏。淮揚徐海等屬。現辦正賑。東省撥協漕米十萬石。已運赴災邑。趨給。所需賑銀。請先動庫

項。撥解淮徐兩府備用。俟江西浙江撥項歸款。得旨。所奏俱悉。○又奏。淮揚上下河。積水已退。酌借籽種。并令廣種雜糧野菜。以佐艱食。得旨。如此留心辦理。甚慰朕飢溺之懷。○又奏。嚴緝藉災販私之梟徒。暨密察積梟窩藏處所。豫為處置解散。至各處流民。有過江赴豐稔地方趨食者。飭各屬聽其自便。隨地安插稽查。得旨。所奏俱悉。○漕運總督顧琮奏。籌辦漕運事宜。○飭州縣親收漕糧。以免胥役藉端累民。○杜賣富發貧。包丁代運之弊。○受兌未經開行之幫船。速催開行。○糧船過淮之後。分員催趨。以速漕運。○河道舊有橫淺。豫為疏濬。以免阻滯。○嚴催疲玩丁舵逗遛。○汎地綿長之處。酌添浮汎。○各閘俱照漕規。隨時啟閉。○江廣漕船。攜帶竹木限地解卸。○回空三升八合餘米。速給副丁。以濟回時食用。得旨。如此留心。方是仍須妥酌實力為之。○江南蘇松鎮總兵張天駿奏。

海外汎兵。非同內地有保甲之稽。關津之詰。全藉巡哨船隻防範。不可概行撤回。得旨。所奏俱悉。實力稽查可也。○江南狼山鎮總兵陳倫炯奏。江省查賑事宜。已通飭被水各營。協助有司料理。勤加巡邏。臣俟水勢平定。地方稍寧。即赴淮揚一帶巡閱。得旨。諸凡俱屬妥協。已授汝為浙江提督矣。汝其勉之。至一應料理之事。告之新任林祖成。令其照此加意實力為之。○江西布政使彭家屏奏。通省

平糶米石

三十七

平糶。及撥運米石。本年應行買補。共三十七萬六千五百七石零。惟時價日昂。若聽州縣官畏難不買。則倉穀空虛。若必令照先年定價。則實屬不足。累官必至累民。惟飭令斟酌時價。據實從公。與民間交易。務期官民兩全。儲貯充實。得旨。所見甚是。妥協為之。○又奏查賑南昌一帶情形。得旨。所奏俱悉。此等奏報。惟應以實。不可稍有粉飾也。○浙江巡撫常安奏。傳奉諭旨。以臣辦理諸事。不能振作。

聞命慚悚。竊思補過。得旨。勉力為之。非章奏所可了事。亦非一番振作。應承夫旨故事。所能勝任。而愉快者也。○又奏。提標中軍叅將楊世元。經原任提臣裴鈺題叅。兵丁爭送米糧。積至四十餘石。象山協副將李士宏。於案內附叅。鋪戶亦欲為之罷市。臣已飭地方官速查確實。嚴行審擬。得旨。所見甚是。此風皆德沛釀之。不可不革。○又奏。緝獲私販內米七十八石。赴洋之奸民。得旨。是。應如是留心

實錄卷之七十七

三十五

稽查者。○福建布政使張嗣昌奏。福興泉漳四府。上年暨本年平糶。未經買補各穀。約共四十六萬五千九百餘石。現在設法買補。尚缺二十萬石有奇。然明春青黃不接之時。尚可稍資接濟。得旨。所奏俱悉。地方有司。視積穀為畏途。若汝等再不留心。則倉穀無足額之日矣。○福建海壇鎮總兵黃錫中奏。閱視官兵情形。得旨。所奏俱悉。然閩省武備。甚屬廢弛。兵丁不守法紀。汝應加意整飭可也。○

又奏督巡期滿海疆寧謐得旨所奏俱悉平日亦應留心不可以滿巡期而有懈也○湖北巡撫范璨奏黃梅廣濟一帶毘連江省為流民入境之所原應照例賑濟但楚省本境亦被偏災倉糧不敷撥賑應將制錢照銀折給俾在本處買食統俟事竣動支公項報銷其有願回本籍者照例資送不願回籍者賑至來歲三月終隨地安插庶流民不致失所而本境辦理畫一亦無人眾滋事之虞得旨所辦雖妥然須查察屬員使無冒濫方可○湖北巡撫許容奏及時督修被水隄塍情形得旨辦理甚妥知道了○河南巡撫雅爾圖奏接准部咨令撥粟米二十萬石運赴江南備賑臣思若專在各屬派撥恐存貯無幾明歲借糶無資有妨本地民食謹按各屬積貯多寡撥穀碾米共足前數以十五萬石運貯潁州各屬五萬石撥給鳳陽各屬至豫省運過倉糧應俟明春麥收後酌動正項買麥收

貯易穀還倉如一時未能買齊亦於秋成後買還得旨所辦甚妥知道了○山東巡撫晏斯盛奏兗州府屬被水災民今雖得賑僅資目前餬口必須先期採買麥種俟播時借給至兗沂等屬本境內現有被水災黎而時屆隆冬江省饑民復紛紛來集不惟一邑倉廩有限且恐滋事應將被水最重之魚臺滕縣各留養二百名以次之金鄉濟寧嶧縣各留養三百名其餘州縣俱留養五百名如留養已足即令該州縣給以口糧移送接壤之鄰邑鄰邑數盈再移送未盈之鄰邑統俟春融資送回籍得旨所見甚妥難為你甚應實力辦理○又奏臨清關所徵之銅補商補二項係於正補外加增並非原額則例所有亦無題准增收之案請長遠革除以甦商困得旨俟汝至京時與部臣面議○河東河道總督白鍾山奏報趙堵石林口情形得旨知道了今年挑淺不比往年石林之水恐礙運道可

寄信與顧琮等。一切應留心。以慰朕憂。○又奏。沁河廳屬之運河緯道。現在水渰。瀰漫應設法修墊。其微山湖。臨湖土石工程。水退後難免殘塌。應酌量修補。黃河南岸胡家屯。黑堽二處。溜近隄根。應加幫裏戩。北岸荆隆楊家橋等處。最險要。應多貯料物。以備修防。得旨。所奏俱悉。○又奏。濟寧以北運河。今歲原應照例。於十一月初一日熬壩小挑。但淮徐等屬。現撥運賑米。酌緩十日。定期於十一月

實錄卷一百七十七

二十一

十一日熬壩。猶恐米船來遲。至期未能全數過濟。已嚴飭各員趲運。至今歲雖係小挑之年。因伏秋汶河各山水漲發。淤澱頗多。必須一律深浚。俾重運遄行無誤。得旨。知道了。應如是辦理者。○山西巡撫喀爾吉善奏。晉省舟楫不通。今值豐收。應廣為儲備。現共添買加買穀一十七萬石。於節年耗羨項下動給得旨。所奏俱悉。應如是留心者。○護理西安巡撫署布政使帥念祖奏。延安府豐收糧賤。

應及時採買。其餘各府州所屬。收成八分以上者。如有舊欠倉糧。及應採買糧石。即催買完備。其收成五六分者。均請暫緩。俟來歲麥熟後。酌量催徵採買。得旨。所奏俱悉。○陝西涼州鎮總兵王廷極奏。與撫臣黃廷桂會商事宜。一邊儲為河西第一要務。必當先事綢繆。一番夷界址。宜急為清理。一邊地民情。當於撫綏中寓以理法。一邊隘險要。不可擅議開通。得旨。所奏俱悉。○甘肅巡撫黃廷桂奏。

實錄卷一百七十七

二十一

甘省市集穀多。已將原派採買數目買足。伏思積貯最要。今既穀多價賤。自當不拘原數廣買。俟價昂。即停止。得旨。所見甚是。嘉慰覽之。○又奏。口外地方。多藉牧養為生。查安西所屬。自沙州。赤金。迤南山等處。距鎮遠城。遠者二百餘里。近或百里。數十里。水草甚多。北則各衛所地方。廣有湖灘。俱可牧放。今安西兵糧需用浩繁。供支不易。已動項採買羊一萬隻。發五衛所牧養。俟三五年後。孳生蕃息。

擇口齒老者酌量按季搭放兵糧便可扣存糧石以資儲備得旨甚善之舉妥協為之○駐防哈密安西提督永常奏夷使吹納木喀等自哈密起程赴京所帶貨物懇恩准其在肅交易並派文武大臣照料得旨軍機處已議准矣汝查辦可也於伊回去時將朕恩曉諭之○四川巡撫碩色奏口外乍了所屬地方番民共一百八十六戶所種青稞俱被雪霜打壞雖不能同內地編氓一體優賑然久經向化輸誠亦應就近酌動軍需銀兩分別賞恤得旨口外難夷隨時酌賞亦無不可但郭羅克近經搶奪行旅而汝等不能討思威並用之謂何與松潘總兵等共留心料理以靖地方毋姑息以釀害毋欲速以債事慎之○廣西巡撫楊錫紱奏民間晚稻登場得價即行糶賣不知多留有餘而有力之家又藉此屯積至來歲青黃不接時圖重利賣與客商已檄飭各屬勸民珍重蓋藏亦不得屯積

實錄卷百七十七

三十

居奇再種稻之外並不知兼種雜糧每多曠土亦責成各地方官勸種其缺乏籽種者酌量借給得旨穀乃民天應如是留心者○又奏緝獲桂平縣奸民施廣盛等煽惑愚民斂銀給劄已加嚴訊務獲餘黨得旨是此等惡風所宜嚴禁○署雲南總督印務巡撫張允隨奏會勘金沙江通川河道實可開修得旨既可開通可詳酌妥協為之以成此善舉○又奏滇省豐收勸民各崇節儉以裕蓋藏得旨覽奏曷勝欣慰至節奢禁耗尤為有年之要務也○貴州總督兼管巡撫張廣泗奏酌籌採買屯苗餘糧事宜○各屯軍收獲餘米請照時價官為收買每戶一石約計年可得米八九千石○各屯百戶總旗小旗等年給米石折給銀兩將米石存支兵米年可得米四千餘石○各屯戶每年上納屯糧亦官為收買湊支兵食年又可得米一千餘石○新疆各苗人數年來每種粳米雜糧可就近收

實錄卷百七十七

三十一

買。且苗疆兵丁。亦有能食糯米者。亦可酌買。搭支兵食。年又可得米數千石。如此多方籌畫。每年共可獲米二萬餘石。再現議新疆共裁減兵一千六百餘名。俟一二年內。裁減足額。又可節省月糧五千七百餘石。嗣後楚粵二省。每年祇須運米一萬餘石。即敷供支。現在動項試買。俟買獲若干石。即飛咨楚粵二省。於來年額運四萬石內。照數減運。如此遞年採買。祇視上年買獲若干。以定下年減運之數。帑項既可節省。於苗疆鄰省。兩有裨益。俟再行之數年。苗疆日益奠定。兵食尚可酌減。且屯戶生齒日繁。種植益廣。則產米漸多。收買自易。苗疆兵糧。即就苗疆籌濟。庶楚粵二省。稍可息肩。得旨。所見甚屬妥協。然行之苗疆。尤應酌其輕重。而不可徒為節省之見。則善矣。

大清高宗法天隆運至誠先覺體元立極敷文奮武孝慈神聖純皇帝實錄卷之一百七十七

大清高宗法天隆運至誠先覺體元立極敷文奮武孝慈神聖純皇帝實錄卷之一百七十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆七年壬戌十一月丙辰朔諭戴臨從前

中集卷三十三

一

一

因其懶惰朕曾降旨永行停俸。今著賞給原俸。嗣後若仍然懶惰不思黽勉供職不但停俸必將伊從重治罪。○大學士等奏陸續恭進明史綱目稿本謹先纂輯明史前紀自元至正十五年起迄二十八年閏七月止凡二卷恭呈睿覽臣等愚見以前紀之作雖為明祖追敘以著王業所由實亦與續綱目並行以補元紀之缺事可叅觀義須互見茲於分書事蹟一一詳覈行文用追敘體總稱明祖

若其始為大元帥及自立為吳國公大書皆從僭號之例以其時元李玉步未改天王正朔有歸明雖興王何逃名分蓋既別為一書則體例無嫌小變而不恕其僭號則褒辭彌見大公伏候

聖明裁定再自洪武元年以後綱目正文事關勝國遺蹤盛朝殷鑒凡主德之隆替國是之善敗物力之衰旺民風士習之淳漓紀載並務詳明褒貶尤宜矜重查現在各分修官稿本次第就緒臣等遞加點勘陸續進呈茲先具洪武元年八月迄十月止擬定綱目凡三卷並呈睿覽嗣後每次進呈擬以十年或二十年為率緣臣等雖裁取衆長虛心櫟括而體追筆削自信良難惟我

實錄卷一百七十八

二

皇上遠紹經心夙精史鑑增損予奪隨宜訓示俾得以次酌改統歸至當用成完書垂示無極又史氏之疎不惟挂漏或冗或複所在有之故有一事當分見數條者有數事當併入

一條者。有後事當豫為立案者。有前事當從後追叙者。是必統觀全書。乃可施以別擇。臣等於陸續進呈稿本之外。倘有所見。另摺奏聞。得旨。朕材謝知古。學未通經。當此史筆之公。實恐目光之眩。至明祖前紀體例。諸卿所見。與朕意同。蓋大君臣子。名分不可逃於天地間。僭號興王。予奪嚴乎辭語內。敢曰繼春秋之翼道。於此昭來茲之鑒觀。我君臣其共勉之。○又奏。土默特蒙古。生計艱難。多有典

平定縣志卷之二十八

一

出地畝。應酌籌久遠資生之計。從前喀爾吉善請令民人納糧。分給蒙古。并將未墾之地。招民耕種。經臣等議令該撫會同該將軍都統。妥議具奏。今該都統吉當阿等會議。以量徵官銀。為數無多。不敷散給。轉啟民人久遠侵占之弊。惟當定以年限徹還。使民人不致虧本。而蒙古得復原業。應如所議。按原價定限退還。均勻分給蒙古。自後不許復行典賣。違者按例治罪。再土默特地土。本係恩賞遊

牧。從前既未均派。任有力者多墾。則侵占既多。無力之人。不得一體立業。今吉當阿等議以地多之人。酌量撥出。分給窮苦之家。據稱官兵喇嘛等。俱各悅服。亦應如所議。令地多者量撥五千頃。將家口衆而地畝少。及無地之蒙古等。按口分給。立業耕種。將來年滿。撤回再行均分。至未墾草地。原恐其荒棄。是以招民墾闢。今既稱土默特兩旗蒙古。并各喇嘛沙弼那爾等。牧廠不甚寬裕。且各扎薩克

平定縣志卷之二十八

四

遊牧處之民人。蒙古及喀爾喀貿易之馬駝牲畜。皆賴此牧放。若將草地陸續招墾。必致侵占牧所。於蒙古未便。仍當禁其耕種。亦應如所請。從之。○兵部議准。署直隸總督史貽直奏稱。天津鎮標中軍遊擊。兼管左營。并轄汛務。實屬紛繁。其兵馬錢糧。軍火器械。應將左營夏口守備。撤回管理。所遺夏口河務漕務。令右營派出外委把總一員。并酌留夏口汛馬兵五名。駐劄催趲。就近歸併右營管轄。

其餘夏口汛馬守兵三十三名。撤回天津差遣。至左營所屬鹽山。南皮。薛馮等汛。撥歸右營遊擊管轄。其右營原管之馬廠青縣。興濟三汛。撥歸左營四黨口守備。就近管轄。仍將各汛改歸管轄事宜。造報備核。從之。○停徵山東濟寧滕縣嶧縣金鄉魚臺鄒縣臨清等七州縣衛水災舊欠錢糧。其本年漕糧。及改徵黑豆。俱緩徵。○加賑湖北漢川。沔陽。天門。荊門。雲夢。江陵。監利。襄陽。棗陽。穀城。宜城。光化。等十二州縣水災飢民。並酌借籽種。○丁巳。戶部議准。河南巡撫雅爾圖奏。稱本年起運明歲薊糧。輪值山東。豫省若必拘泥向例。令東省運往。恐誤江南民食。已檄飭糧道。在豫省運通漕糧項下。照應運薊糧額數。運江并咨東省。將應運薊糧。改運通倉。甲子年薊糧。令東省補運。至薊糧定額。每年四萬七千二十餘石。今運江四萬石。尚存七千二十餘石。若另運赴薊。則款數畸零。且需專員押運。

伏思江南賑濟。需糧孔多。而古北口一帶豐收。添買甚易。謹照原額。於運通糧石內。撥出四萬七千二十餘石。運江。所有不敷陵糈七千二十餘石。懇交古北口提臣買補得旨。依議速行。○兵部議奏。先經前任漕運總督常安奏。稱應禁運丁收養軍犯。以免累丁誤運。並請勅下外省督撫。各就本省情形。將發配軍犯。作何收管養贍之處。奏明請旨等語。臣部移咨有漕之江南。山東。河南。江西。浙。江。湖北。湖南等省督撫。令各將本省情形。奏報。今據陸續覆到。查各省立法。互有同異。均未斟酌盡善。惟乾隆二年七月內。九卿議覆。原任福建巡撫盧焯條奏內。稱。嗣後收到軍流等犯。不分新舊。均派各州縣安插。如年逾六十。不能食力。撥入養濟院。按名給孤貧口糧。或年未六十。成篤疾者。一體撥給。其挾有微資。習有手藝者。聽各自謀生。交地保收管查點。若少壯軍犯。實係貧窮。又無手藝者。初

到配所。各地方官就近酌量安插管束。按該犯本身及妻子女。每名每日照孤貧例給口糧。以一年為止。於各州縣倉穀項下支銷。一年後該犯於風土人情漸熟。不難自食其力。再此輩年力強壯。儘可使用。各州縣有驛遞之處。一切應用人夫。酌撥少壯。並無資財手藝者充當。給應得工食。交夫頭管束。該管官仍行查點。無驛地之州縣。公用夫役。均令一體充當。日給工價。毋許胥役剋扣。如此。則安置得所。就近亦易稽查等語。覆准在案。是軍流各犯。若何管束養贍之處。閩省例極周詳。現在直隸省。已照此辦理。而山東。河南。湖廣。江西。江南。浙江。各督撫所議。俱有請照閩省之例之說。應即令倣照畫一辦理。其所需酌給米糧。有存貯倉穀者。在倉穀項下開銷。無存貯倉穀者。在存公項下支給。並於每月朔日該管官查點一次。則軍犯既無失所。運丁亦不致派累。俟命下。移咨各省遵行。從之。○

實錄卷一百二十八

十

戊午。御史熊學鵬奏。兵部常有大學士等封寄各省督撫書字。隨到隨發。僅該司員一登草簿。並不彙數稽查。日久恐滋弊端。請勅下該部。將每月寄書字若干件。某日某件。封發某處。或照常飛遞。或晝夜兼行。逐月繕摺進呈。得旨。如所請行。下部知之。○停徵奉天承德。遼陽。海城。錦縣。廣寧等五州縣水災額賦。○停徵湖北沔陽。均州。嘉魚。漢陽。漢川。黃陂。孝感。黃梅。廣濟。武昌。武左。蘄州等十二州縣衛水災額賦。○賑浙江瑞安。平陽。二縣。及溫台。玉環。沿海地方。雙穗場蕩地。水災飢民。並借給籽種。其瑞安。平陽。雙穗場蕩地。田禾損傷。停徵本年地丁場課。及南米本折錢糧。○加賑湖南湘陰。長沙。益陽。巴陵。華容。武陵。龍陽。沅江。安鄉等九縣水災飢民。○己未。

上詣

皇太后宮問安。○以廣東按察使潘思渠為浙江布政使。江蘇糧道李學裕為廣東按察使。

○庚申諭國家設兵所以衛民而將弁則又管轄兵丁者也各宜整飭營伍操練騎射修葺器械精熟技藝且時時訓誡俾之有勇知方凜遵法度一切地方事務不得越俎干預斯為能稱厥職乃閩省向來武備廢弛兵丁久染惡習而武弁又復袒護姑容遂至肆無忌憚即如漳浦縣殺死知縣一案子龍小刀會內即有兵丁連結此則干犯法紀之尤甚者朕又聞得彼地積習如會盟結黨逞兇聚

甲寅九月二十八

一

毆並造作匿名揭帖等事或有兵丁串通或係兵丁誣捏凡屬百姓之作奸犯科者多有兵丁在內至叅遊都守等官並不將如何訓練禁約兵丁之處稟報該上司惟將地方瑣屑之件朦混具稟以為挾制有司之具無怪乎兵氣日驕目無國憲重為官民之害也著該督撫提鎮等嚴飭各將弁自今以後務令約束兵丁申明條教俾洗心滌慮痛改前非倘再有百姓不法之案營兵在內指使牽連

者發覺之日將該管弁員即行糾叅從重議處決不寬貸該部即行文閩省使衆知之○太常寺奏向例大祀

圜丘壇於祭期日出前九刻請駕今十一月二十六日冬至大祀前期一日駕詣齋宮祭日由齋宮詣

壇或於日出前三刻四刻請駕之處請旨遵行並擬於請駕前一刻恭請

神位

甲寅九月二十八

一

皇上由齋宮乘輦不入更衣幄次至鋪設機薦處降輦升

壇祭畢出昭亨門乘輦得旨南郊之日著於日出前五刻請駕即於是刻恭請

神位朕於齋宮仍入更衣幄次候安奉畢詣壇行禮餘依議○辛酉和碩莊親王允祿等奏太和殿

皇上陞座所設中和韶樂祇有笙四簫二笛二殿廷高敞惟聞鐘鼓之聲查明會典所載樂

器笙十六。簫十二。笛十二。較多數倍。雖損益隨宜。不必舉前代為例。但金革二音。獨出衆樂之上。餘並不揚。應請笙用八。簫用四。笛用四。庶幾克諧。歌工二名。亦似太少。請增為四名。並請宮內應用中和韶樂之處。一體添設。其樂器或交與造辦處。或交與工部成造。即發與律呂正義館。校正音律。現今尚未成造之前。內外互相借用。添足。得旨依議。樂器著律呂正義館成造。○王大臣等議奏。前議撥

滿洲兵一千名。往拉林。阿勒楚喀耕種。所有辦理起程。建造房屋。倉廩墾荒。積穀設立虛職驍騎校。鄉長。管轄。已酌定六款。交欽派之侍郎三和副都統巴靈阿等前往辦理。今三和巴靈阿會同該將軍鄂彌達。酌議應辦事件。二年內可結。所有移駐之滿洲等。俟九年秋季。令其起程。並臚列七條具奏。○請將此一千滿洲。分為左右十六村。就各莊分給地畝。每村鑿井四眼。再共建官署二十一間。副

都統住房三十六間。地十二頃。協領住房十八間。地八頃。滿兵住房五千間。即撥白都訥三姓二處兵三百名營造。派協領一員。章京九員監修。其匠役工食銀。照伊屯地方兵房之例。每間銀三兩三錢。○建造之木料。即令派出之白都訥三姓兵丁等。於本年十月間。在拉林河源處砍伐。明年河水融化。即順流運致。茅草亦於拉林河口附近處割取。至伐木及建造各員弁。每人月給鹽菜銀二兩。兵

丁等日給鹽菜銀三分。○給與滿洲地畝。前經王大臣議遣吉林閒散餘丁。與驛站壯丁等開墾。吉林等處餘丁。多年幼不能耕種。驛站壯丁。各有差使。請派吉林烏拉兵八百名。阿勒楚喀兵二百名。驛站夫五百名。開墾日給口糧鹽菜銀四分。並擇熟悉耕作之吉林官五員。領催三十名。官員月給鹽菜銀二兩。領催日給鹽菜銀三分。○墾地兵丁站夫等一千五百名。應採買耕牛一千五百頭。額外

採買一百頭。疲病補給。請自本年十二月初一日買起。至明年正月三十日止。照例每頭價銀七兩。日飼草二捆。料一升。用時加料三升。俱照時價採買。每牛三頭為一具。共計五百具。初年可開田一千二百頃。次年仍耕成熟地畝。每具止用牛二頭。計剩牛六百頭。再派六百人加墾。約得五百頃。俟移駐之滿洲到時。每人按所墾地畝勻給。並與耕牛。其餘地畝。隨力開墾。○移駐之滿洲。既歸入阿勒楚喀八旗。每旗補委虛職驍騎校一員。每莊補放七品鄉長一員。請給虛職驍騎校地各五頃。鄉長地各四頃。過三年後。遇有本旗驍騎校缺出。將虛職驍騎校與本處領催等一體補放。虛職驍騎校缺出。於七品鄉長內揀放。鄉長缺出。於移駐之滿洲內揀放。此一千人內。如有情願當差者。亦過三年後。俟各佐領下披甲人缺出。與彼處閒散幼丁一體挑取。○養牛五百具。初年可得穀四五萬石。下

年耕種熟田。又可得穀八九萬石。再六百人加墾。約可得穀二萬石。請照吉林烏拉永寧倉例。建倉一百二十六間。○移駐之滿洲。如遇紅白事。未免拮据。請動吉林庫銀一萬兩。交殷實才能官員。每月生息一分五釐。俟移駐滿洲到時。本利并交副都統生息。照吉林等處例賞給。其賞餘銀。遇年穀豐登。一時不能糶賣。即照時價糶穀貯倉。以備荒歉。均應如所請。從之。○壬戌諭。今年畿輔地方。秋成豐稔。米糧饒裕。正當撙節愛養。以備將來之用。朕聞私開燒鍋者頗多。蓋愚民無知。止貪目前小利。而不計日後之匱乏。著署督史貽直。嚴飭所屬。實力禁止。毋得視為具文。其他省豐收地方。該督撫應一體遵行。○加賑山東膠州。平度。蘭山。郯城。安化。諸城。昌邑。濰縣。高密。德州。衛等十州縣。衛水災飢民。並借給籽種。緩徵舊欠錢糧。其本年應徵錢糧。各按被災分數。分年帶徵。○旌表守正捐軀之山

西省陽曲縣民宋發富妻劉氏。○癸亥。賑甘肅狄道州。皋蘭縣西寧縣。雹災飢民。並賑狄道州。通渭縣。水災飢民。○準噶爾部人特霍通。寨音察克。來降。命賞給安插如例。○甲子。上詣

皇太后宮問安。○遣官祭

先醫之神。○命鄰省敦拯恤。以佐轉輸。諭天時有雨暘。地土有高下。而年歲之豐歉。因之以天下之大。疆域之殊。歎於此者。或豐於彼。

實錄卷一百一十八

十一

全賴有無相通。緩急共濟。在朝廷之採買撥協。固自有變通之權宜。斷無有於米穀短少之處。而強人以糶賣者。若有收之地。商賈輻輳。聚集既多。價值自減。則窮黎易於得食。此鄰省之相周。與國家賑卹之典。相濟為用者也。我

皇考與朕。俱曾屢頒遏糴之禁。惟是地方官民。識見未廣。偏私未化。雖不敢顯行遏糴之事。靡不隱圖自便之私。羣相禁約。有司又從而

偏袒之。遂視鄰省為秦越矣。用是再頒諭旨。

著各省督撫。各行勸導所屬官民。毋執畛域之見。務敦拯卹之情。俾商販流通。裒多益寡。以救一時之困厄。將來本地或值歉收。又何嘗不於鄰省是賴。並將此曉諭官民共知之。○吏部議准。山東巡撫晏斯盛奏稱。諸城縣南龍灣巡檢。已奉文裁併信陽鎮巡檢兼管。應請換給南信司海口巡檢司印信。從之。○準噶爾部人三都布。卓特巴。託克託木。達賚來降。命賞給安插如例。○乙丑。大學士等遵旨議奏。和碩莊親王允祿等奏稱。仰蒙

實錄卷一百一十八

十一

聖鑒。以丹陛大樂。本朝雖有樂章。而音節未經考定。全不相符。特命臣等酌量更改。欽定樂章。與音節相比。定期於今歲冬至日舉行。但查向來廷臣三跪九叩頭時。並於贊叩之後。廷臣首俛而下。則丹陛樂作。九叩畢。則樂止。為時太迫。樂難終闋。伏思禮行樂奏。自必趨進趨退。協其珎璜之節。申其肅敬之心。庶禮

與樂相比附。樂與禮相終始。向例惟於叩頭時用樂。實屬無義可尋。請於贊禮排班聲止之後。樂作。贊退之後。廷臣趨至仗末之時。樂止。樂凡五節。以一節為趨進。三節為三跪九叩頭。一節為趨退。如有進表宣表禮儀。則於第一節樂闕。廷臣已跪之後。進表宣表畢。樂再作。如此。則行禮遲速。易於與樂相應。應如所請。豫令樂部演習。即於今歲冬至舉行。並行文在京各衙門遵照。從之。○大學士等議奏。辦理耗羨一事。曾奉諭旨。命九卿翰林科道。及外省各督撫等。直抒所見陳奏。今據陸續覆到。查諸臣所奏。俱稱耗羨歸公。法制盡善。不可復行更張。衆議僉同。其間有一二異議者。皆係不揣事勢。不量出入。但執偏見。斷難施行之論。伏思耗羨一項。由來已久。弊竇漸生。

世宗憲皇帝俯允臣工所請。定火耗歸公之例。將州縣一切陋習。皆為革除。惟將各該省舊

存火耗。提解司庫。為各官養廉。及地方公事之用。從此上官無勒索之弊。州縣無科派之端。而小民乃無重耗之累。蓋以天下之財。為天下之用。於國家毫無所私。誠為法良意美。可以久遠遵行。應勿庸輕改舊章。至總督高斌。孫嘉淦等。俱請耗羨通貯藩庫。令督撫察核。仍復年終報部之例。查各省動用存公銀款項繁多。若未悉情形。概行飭駁。勢必掣肘。若竟聽其任意費用。則侵濫之弊。無從剔除。惟送部查核。庶諸弊可釐。應如所請行。得旨。錢糧之有耗羨。蓋經國理民。事勢之必不能已者。未歸公以前。耗羨無定制。有司之賢者。兢兢守法。不敢踰閑。不肖者。視為應得之項。盡入私囊。一遇公事。或強民輸納。或按畝派捐。濫取橫徵。無所底止。且州縣以上官員。養廉無出。於是收受屬員之規禮節禮。以資日用。而上官下屬之間。時有交際。州縣有所藉口。恣其貪婪。上官瞻徇。而不敢過問。甚至以

餽遺之多寡。為黜陟之等差。吏治民生。均受其弊。我

皇考俯允臣工之請。定耗羨歸公之法。就該省舊收火耗之數。歸於藩司。酌給大小官員養廉。有餘則為地方公事之用。小民止各循其舊有之常。有輕減無加益也。而辦公有資。捐派不行。有司之賢者。固無所用其矯廉。而不肖者亦不能肆其貪取。此愛養黎元。整飭官方之至意。並非為國用計。為此舉也。且以本

地之出產。供本地之用度。國家並無所利於其間。然通天下計之。耗羨數用之處。不過二三省。其餘不足之處。仍撥正供以補之。此則臣民未必盡知者。此十數年中。辦理耗羨之梗概也。朕御極以來。頗有言其不便者。朕思古人云。琴瑟不調甚者。則解而更張之。此事若宜變通。何可固執。是以留心體察。並於今年廷試。以此策問諸生。乃諸生奏對。不過敷衍成文。全無當於實事。旋降旨詢問九卿翰

林科道。並各省督撫等。今據諸臣回奏。大抵皆以為章程一定。官民久已相安。不宜復議更易。衆論僉同。其中偶有條陳一二事者。不過旁枝末節。無關於耗羨歸公之本務也。朕再四思維。耗羨在下。則州縣所入既豐。可以任意揮霍。上司養廉無出。可以收納餽遺。至於假公以濟私。上行而下倣。又不待言矣。則向日朕所聞者。未必不出於願耗羨之在下。以濟其私者之口。傳曰。作法於涼。其弊猶貪。作法於貪。弊將若之何。朕日以廉潔訓勉臣工。今若輕更現行之例。不且導之使貪。重負我

皇考惠民課吏之盛心乎。此事當從衆議。仍由舊章。特頒諭旨。俾中外臣民知之。餘著照大學士等所議行。○吏部尚書公訥親奏。前據兩淮鹽政準泰。所稱兩淮鹽務道一缺。係於雍正十一年添設。乾隆六年復裁。但添設既已數年。章程已定。旋經裁缺。一切委辦諸務。

未免稍費周章。雖分隸常鎮淮揚徐三道兼轄。而常鎮道遙隔江南。淮揚徐二道兼司河工。伊等既各有專司。鹽務並非職掌。呼應不靈。現在淮揚海一帶地方場竈。俱係淮揚道所屬。其通州地方場竈。亦與該道所屬毗連。請將鹽務道所有統轄各屬緝私火伏。及鹽義倉鹽場河道各事宜。俱責成淮揚道管理。青山頭專營守備。三江營陸路守備。及各營弁兵。并原設巡役二百名。俱聽鈐束。并於該道勅書內。添設管理鹽務事宜。從之。○戶部議准漕運總督顧琮奏稱。各省漕白糧到淮。臣即親往督同叅遊大員。逐船籤量。及嚴查受賄勒索諸弊。嗣緣糧艘盛行之際。叅遊不敷委用。每年春初。檄調附近衛備數員來淮。協同籤盤。節年循行無誤。今給事中陸尹耀奏言。嗣後應檄調附近衛備。兼委同城文員。協同漕標營將。秉公籤驗。互相糾舉。分別議處。議叙。立法未為不善。第文員與武職。既同

住淮城。今若於辦漕時。互相糾舉。其平居和好者。不無徇私。其意見不合者。難免挾嫌詆誣。似未便定以議處議叙之條。應請嗣後責令淮安府糧捕通判。並叅遊都守。及檄調之衛備。分頭查驗籤盤。倘米數稍未得實。即另委臣標中軍副將覆籤。臣再加核實。如有弊即行指叅。從之。○工部議准。江西巡撫陳宏謀奏稱。南昌新建二縣。地勢低窪。本年七月被水。圩堤衝溢。田禾被淹。亟宜修築。豫為春耕之計。除些須殘缺。工程無多。及工程稍大。而原處尚未被災者。督令民力修築外。其工程浩大。災民難以修築者。請動充公銀。照以工代賑之例。加以夯礮。一律興修。或須補築。或須建壩。或須改築石工。務於農隙修完。得旨。依議速行。○豁免福建崇安縣荒地未完加徵銀一千七百一十七兩有奇。未完加徵米一百九十三石有奇。準噶爾部人銓澤圖倫來降。命賞給安插如例。○丙寅。

上御乾清門聽政。○諭軍機大臣等。廣州將軍阿爾賽現在來京。副都統高文涵又現丁憂。只有副都統安化一人。著寄諭慶復。於一切事務。留心協同辦理。○丁卯。戶部議覆御史明德奏稱。訪有殷實奸商。希圖重利。在錦州等處私囤糧石。藉邊外教漢奈曼土默特等處蒙古人等。進關販賣米糧之便。攬載進關。運至臨榆縣屬沿海有船地方。潛載他處。應令奉天將軍府。嗣後嚴飭西錦州副都統所屬之錦州。義州等城。并錦州知府所屬之錦縣等處。如有此等奸商。即查拏從重治罪。米糧入官變價。如果邊外蒙古人等。米糧進關糶賣者。應進何邊。令該邊門章京聲明呈報西錦州副都統。該副都統詳查果確。給與印文為憑。行文沿途各卡官兵。并山海關副都統。查驗放行。如無西錦州副都統印文。即屬私販。米糧一體入官。將車戶蒙古人等。交該管治罪。其直隸等處。如果遇歉收。奏明應

平定八十二

三

需若干。移咨撥給。應如所請行。至囤積一事。奉天與各省。本屬一例。雖不必概行禁革。而如遇歉收。或發賣官米。或平糶倉糧。該地方官原可隨時禁止。應飭奉天將軍府尹。轉飭遵照辦理。從之。○工部議准浙江巡撫常安奏稱。玉環山城垣。於乾隆六年七月。遭颶風坍壞。城身垛口。城樓。該地孤懸海外。非同內地。城垣最關緊要。亟宜修整。以資捍衛。請動支玉環經費銀興修。從之。○以翰林院侍講學士張映辰。充日講起居注官。○考察在京八旗軍政。卓異官九十五員。不謹官三員。罷軟官十七員。年老官十員。有疾官二十五員。才力不及官八員。分別陞賞處分。如例。○戊辰。聖祖仁皇帝忌辰。遣官祭景陵。○

平定八十二

三

皇太后宮問安。○吏部議奏嗣後滿員除應用知縣之科甲出身并應用道府之正途出身人員俱無庸考試外其由別途出身應用道府者臣部於未用之先彙齊人數定期考試奏請欽點大臣於午門內給卷試以時務策一道試題由欽點大臣擇關於吏治民生之事擬出試卷交該大臣等秉公校閱分別優劣進呈御覽仍將該員等交臣部帶領引見其奉旨記名以道府用者臣部註冊仍照定例挨俸陞遷未經記名者俟下次考取記名再行照例陞用得旨正途之人亦著考試餘依議○戶部議准閩浙總督那蘇圖巡撫劉於義奏稱閩省接濟鼓鑄應收買商銅三萬二千四百餘觔計價銀五千六百七十三兩零至配鑄尚需白鉛二萬六千九百餘觔應照前次委員赴楚採買計價銀及水腳銀一千六百一十二兩零均請在乾隆六年地丁銀內動給從之○又議准山西巡撫喀爾吉

善疏稱長治縣民互首欺隱地二共丈出十四畝零照例入官變價招種承糧應於乾隆七年起科入額徵解仍於該年地丁冊內造報查核從之○工部議准兩江總督宗室德沛奏稱鎮江府添設之船政通判應建衙署查有入官房屋五十五間披廈七間原估價銀三百一十五兩應請撥改從之○予故一等子署散秩大臣孟可祭葬如例○賞卹福建臺灣遭風溺斃兵丁○庚午大學士等議覆大學士陳世倌奏稱上下兩江被水州縣應令及時疏濬倘今冬水勢不消入春水發冰融不特春麥失望即秋田亦不能種國家發帑賑濟已至八百餘萬將來賑恤正未有艾何以支給伏查高寶興鹽之下河等處各有入海故道暨石林口決下之水亦有由灌口板浦等入海之路其有無淤淺俱應勘估興修再宿靈等十數州縣連年積水之區若徒以洪澤湖為會歸之地則水勢過大今

黃河大溜。現注微山湖。正流不過十分二三。似可趁此河淺時。於祥符閘口附近處。將黃河挑濬。與隄內相平。再培補卑薄隄岸。以防衝潰。並修復歸仁隄閘座。以時啟閉。使睢河諸水。盡引入黃等語。復據刑部尚書張照奏稱。陳世倌所奏。第以水不得涸。來歲猶煩賑恤為慮。而未籌及目前經理之法。查賑飢以分散為上。即以工代賑。亦必各處興工為上。應擇有收地方。派幹員分管飢民若干戶口。

平糶奏三十二

三

就近興工。其工價比常例多給。俾足養贍妻孥。倘地方有樂施之人。計工價之多寡。照捐例題請議叙。再從來治河之要法。曰毋與水爭。曰棄地與水。請將被水州縣。擇其地勢最低下處。轉加挑濬。潴而為澤。其舊有之支河。轉加深濶。引高原之水入之。則下者既下。高者自然涸出。既減在內之水勢。則外河通海之處。自必漸平。目前雖有傷田賦原額。異日民間。必收陂澤之利。有此工作。百姓又可就

本地以工代賑。統入賑項奏銷等語。查今歲水災非常。工程難於兼顧。必當籌其緩急。其陳世倌所稱入海故道。可否仍循舊制疏修之處。難以臆斷。應將此奏。交與欽差大臣江蘇山東督撫總河會同詳議具奏。至張照所稱。飢民以分散為上。應於各處興工代賑。並相度地勢。擇加挑濬。原屬地方應行之事。惟在措置得宜。亦應將此奏交欽差大臣。及該督撫總河一并查議具奏。得旨依議速行。○

平糶奏三十二

三

予故二等伯散秩大臣馬哈達。祭葬如例。

大清高宗法天隆運至誠先覺體元立極敷文
奮武孝慈神聖純皇帝實錄卷之一百七十八

實錄卷一百七十八

二十元

大清高宗法天隆運至誠先覺體元立極敷文
奮武孝慈神聖純皇帝實錄卷之一百七十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加一級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆七年壬戌十一月辛未。

臣等謹將

上御懋勤殿勾到朝審情實罪犯停決斬犯九
人絞犯六人餘十八人予勾。○壬申。

上詣

皇太后宮問安。○大學士等奏。

南郊大典

皇上前期詣齋宮請御涼步輦得旨是著該部
議奏尋議奏臣等伏思禮莫重於

郊祀儀莫盛於車旗今蒙

皇上特允大學士等所請冬至前一日御涼步

輦詣齋宮次日饗祀

南郊動合古禮肅將明禋誠千載一時盛典也謹遵旨酌定儀節恭呈睿覽本月二十五日鑾儀衛使督所屬將鹵簿大駕全行依次陳設於午門外奉輦官校進涼步輦至太和門階下祇候不陪祀王以下各官俱朝服於午門外跪送本日巳刻太常寺堂官恭請

皇上乘禮輿出太和門降輿陞輦鑾儀使奏請發鑾駕警蹕午門鳴鐘十大臣前引而出駕發之後侍衛隨從諸臣照例於應乘馬處乘馬左右翊護近輦隨行隨至

南郊由西天門入至昭亨門外降輦入黃幄次少憩前引十大臣對引官恭導

皇上由昭亨左門入至內壇遂引至

圜丘視壇位原派出之分獻大臣分詣神庫視籩豆神厨視牲畢十大臣對引官仍導引由御路出至陞輦處陞輦詣齋宮從祀各官蟒袍補服分翼排列於齋宮門外迎接候

皇上降輦陞禮輿入齋宮是夜嚴更宿衛警蹕環巡交兵部會同各該衙門辦理次日

大祀從祀太常寺堂官遵奉諭旨於日出前五刻請駕乘禮輿出齋宮門外陞輦至鋪設檯薦處降輦前引十大臣贊引官對引官恭導皇上入更衣幄次俟安奉神位畢禮部太常寺堂官奏請

皇上具禮服出幄次前引十大臣贊引官對引官導引由櫺星左門入詣壇位前行禮祀禮既畢出昭亨左門外陞輦侍衛隨從夾引擁護悉如來儀其不陪祀王以下各官俱朝服於午門外排班跪迎午門鳴鐘駕至太和門鑾儀使奏請降輦陞禮輿入太和門還宮臣等管見酌定儀節是否有當伏候欽定施行得旨是依議○賞卹江南佃湖營遭風溺斃兵丁○旌表守正捐軀之湖北公安縣民劉克侯妻李氏○癸酉諭朕御極以來廣開言路凡臣工條奏有當於事理者無不見諸施

行。其在可行可止之間者。則發交部議。外廷皆共知之。至於陳奏錯誤乖舛。必不可行者。往往姑容。留中未發。又或所言近是。而尚須緩酌者。或有陳奏之件。出於淺識曲見。朕明知其無益。即勅交該部。亦必不議行者。或有勦襲規勉之陳言。而不達事情。無補政治者。如此等類。俱在留中之內。此朕畧陳奏之是非。寓隱揚之深意。正以導之使言。惟恐伊等有所顧忌。而甘於緘默也。乃近日御史中。有

實錄卷一百七十九

四

謂一切條奏。皆不應留中者。一人所奏如此。衆人未必不存此見。竟似朕不樂聞諫。將應施行之事。故為中寢。此則不知朕意之甚者矣。特頒此旨。曉諭言路諸臣知之。○又諭近年以來。外省保送年滿十總。似覺過多。伊等一時不能得缺。未免轉致壅滯。嗣後著各省督撫提鎮。於保送時。留心揀擇。如果才技優長。及有軍功勞績者。方可咨部引見。毋得濫行保送。○戶部議准。四川巡撫碩色奏稱。德

陽等一十三縣。額鹽俱不敷食。而蓬溪等處水陸鹽引。共有二千二百五十一張。商本消耗。無力承辦。又苦滯引難銷。應請就近改撥。倘蒙俞允。即將某處商人認銷某處各若干。造冊送部。照數行銷。從之。○刑部議准。甘肅巡撫黃廷桂奏稱。瓜州五堡。安插土魯番回民。本屬外夷。與內地民人不同。凡所犯軍流徒罪。若照內地民人之例。一體僉配。在回民於擺站充徒。既無實用。而遷徙他所。言語不通。飲食各異。恐難存活。殊非仰體

實錄卷一百七十九

五

聖朝矜恤外夷之意。請嗣後照苗疆辦理之例。准折責枷號完結。仍抄招送部查核。從之。○停徵直隸滄州九女河等村莊水災竈課銀一百八十八兩有奇。并未完帶徵銀五十七兩有奇。又停徵嚴鎮場胡家莊等村莊水災竈課銀六十二兩有奇。○命署陝西布政使帥念祖署廣東布政使。託庸署廣西布政使。唐綏祖署安徽按察使。蘇昌署廣西按察使。

李錫秦俱實授。甲戌。湖南巡撫許容叅奏糧道謝濟世踰閑蕩檢負恩溺職各款蹟得旨謝濟世係獲重罪之人蒙

皇考格外寬宥。朕復加恩。從成所召還。仍授監察御史。伊旋以母老。請改就近州縣。便於迎養。朕復用為湖南督糧道。凡稍有人心者。皆應感激奮勉。倍加淬勵。況謝濟世平日託名理學。自附正類者乎。今巡撫許容以踰閑蕩檢。負恩溺職題叅。朕覽全本。見貪縱淫酗。劣

蹟種種。謝濟世若果如此。則玷名教而敗官常。莫此為甚。而不可留於天地間矣。謝濟世著革職。其本內各款。及有名犯証。著孫嘉淦前往湖南。會同許容嚴審定擬具奏。該部知道。○大學士等議准。湖廣總督孫嘉淦奏稱提標鎮守永州。龍陽辰州。沅州。澧州。臨武。宜章。桂陽。九谿。常德。永定。常水師。十四標營。俱支折色。每米一石。折銀六錢。在當日米賤時。原可敷用。今兩湖生齒日繁。兼以各處採買。

糧價日昂。折銀六錢。不能買米一石。兵丁日食維艱。不可不為籌畫。但向徵折色之處。若改徵本色。則邊氓苦累。若增給兵米折價。則標營繁多。經費有定。臣酌量變通。應將停運黔米。分派給兵。並將兵米折價銀。豫給買米搭放。至湖北本折兼支之督撫。穀城等十九標營。并全支折色之撫標技勇兵丁。及施南。遠安。二營。每石折銀七錢。較湖南雖稍寬裕。但時價仍有不敷。北省又無閒款米石。可以通融。應將全支折色之營。每年豫給二季折銀。本折兼支之營。每年豫給一季折銀。令各該營弁。於秋成時購買。不必另建倉廩。即因放於將弁公廨。次年米貴時。按月支放。並扣還豫支銀。俟通省米價平減。即停止。從之。○考察在京八旗軍政。年老官四十員。分別留任。休致。及賞給全俸半俸有差。○工部議准。浙江巡撫常安奏稱。山陰。會稽。二縣交界之宋家淩土塘。地處兜江。潮汐衝刷。以致護沙。

坍塌。土塘卑薄危險。急須修築護塘埽工。一百四十丈。以衛正塘。從之。○又議准甘肅巡撫黃廷桂奏稱。寧夏惠農渠之西。原有西河一道。自寧夏縣屬河西寨起。至平羅縣屬硯瓦池。計長二百五里。又硯瓦池迤北。至石嘴子。計長一十六里七分。應挑挖河身。建造橋關飛槽。從之。○乙亥。命持法寬嚴。務歸平允。諭明罰勅法。貴乎持平。過於寬則失之縱。過於嚴則失之刻。俱非明允之道。今年朝審。秋審情實案件。因兩年停刑。是以勾決者較往時為多。此皆九卿公同議定之成讞。朕於刑部進招冊之後。逐加詳閱。及勾到時。又與大學士。刑部堂官等再三推究。凡有一線可生者。姑且從緩。必求其生而不得。然後寘之於法。在朕心。惟期至當至平。並非有意從嚴。而如此辦理也。但恐外省督撫。揣摩觀望之習。不能盡除。見今年勾決之人稍多。遂妄臆朕意在嚴。凡承辦刑獄之事。相率而趨於刻覈。

則大違朕之本懷。若見此諭。或又以朕意在寬。而流於姑息。則更非明允之道。於明刑弼教之訓。大相逕庭矣。今日給事中倪國璉所奏。與朕意相合。特頒此旨。諭各省督撫等知之。倪國璉摺併發。○又諭。今歲江南疊被水災。河防水利。甚關緊要。深為懸念。大學士陳世倌。屢次陳奏。朕見其有中肯綮者。必有以成底績之功也。著即馳驛前往。會同高斌等查勘辦理。○戶部議准。盛京戶部侍郎雙喜奏稱。明歲秋間。

皇上恭奉

皇太后。往謁

祖陵。所有隨從人員。經過地方。應需口糧馬駝草料。宜豫為備辦。但現在各城倉。雖有存貯粟米。並無草豆。應請將寧遠等城。乾隆七年地畝。暫停徵收米石。改徵黑豆備用。從之。○又議准江西巡撫陳宏謀奏稱。瀘溪縣應輸漕米。乾隆二年。改徵折色。交官代辦。實緣地

處深山。舟楫不通。輓運維艱之故。第所定價。值每石止銀八錢。實屬不敷。數年來俱令通省四十九州縣分認一半。瀘溪縣獨認一半。原屬暫時通融。未可經久。請嗣後於每年八月開徵時。糧道就近將省城米價確查。按照米數。借動藩庫存公銀。於省會水次購買。即將時價確數。應徵銀兩。發示諭民。照數完納還庫。從之。旌表守正被戕之安徽省太和縣民石應厚女石氏。丙子。

上御乾清門聽政。和碩誠親王允祕等遵旨議奏。正藍旗滿洲革職貝勒弘昧屬下佐領一缺。作為公中。入旗當差。本佐領下閒散柱兒。年甫十四。現有孀居之祖母伯母及母。又有伊舅母。因無子嗣。亦相依同居。四孀一孤。並無養贍。而柱兒又懦弱不能披甲。該旗奏請照旗人例。給養育兵錢糧二兩。查包衣佐領下。原未設有養育兵錢糧。惟上三旗包衣佐領下。有給與無子孀婦。每月一兩錢糧米。

石之例。今柱兒雖係包衣。既已暫入旗下。即照此例。給與一兩錢糧米石。俟長成披甲。或分給王等時。停給。嗣後下五旗公中包衣佐領下。無養贍之孤寡人等。如有似此家口重者。均給一兩錢糧米石。家口少者。祇給餉銀。不必給糧。俱俟長成披甲。或分給王等時。停給。從之。大學士等議准。大學士陳世倌奏。稱臣奉命往兩江查勘水災。請先至高寶諸州縣。會同督撫諸臣共商疏引入海之法。使積水早消。民得耕種。而來歲四五月後。不致再煩賑恤。至石林口。現經高斌等竭力堵築。自可即日合龍。但漫溢之水。尚未消涸。誠恐春汛洊至。水勢瀾漫。則漕艘北上。亦虞艱阻。現在劉家澗滾下之水。入海之口。果否通暢。亦應會勘商酌。以便漕艘往來。毋誤。再徐鳳一帶。積水已至七八年不消。今秋因古溝漫決。諸湖之水。盡從洪澤湖溢入高寶諸湖。以致高寶等州縣被淹。第洪澤湖果否堪容諸

水或別有疏消之策。應并會勘。使徐鳳諸湖之水。皆有歸宿。不致泛溢為患。請將善於測量之人二員。帶備儀器。給與驛馬。前往查看從之。○歸化城右翼副都統拉薩立。以才短奏請降調。命原品休致。○旌表守正捐軀直隸獲鹿縣民許管存妻杜氏。○丁丑

上以二十五日。初詣

南郊齋宮齋宿。豫行慶賀。

皇太后聖壽節。詣

壽康宮行禮。王大臣於

慈寧門。衆官於午門。行禮。○奉

皇太后幸重華宮侍宴。○戶部議准。兩廣總督

慶復奏稱。先因粵東春末少雨。早禾被旱。豫

籌於江西撥穀八萬四百石。今粵東雨水勻

調。晚禾豐收。江西米穀即可停運。而江南淮

揚等府賑務孔殷。江西與淮揚一水可通。請

將江西撥運粵東倉穀八萬四百石。運往淮

揚。以備春賑從之。○又議准貴州總督兼管

巡撫張廣泗奏稱。施秉縣屬軍戶屯田。與楚省地界攙越不清。雍正七年奉旨清查時。止將攙入麻陽縣一屯丁糧劃歸麻邑。其插入芷江縣一屯丁糧。未經查清歸撥。計成熟有徵田二百六十七畝零。徵米四十石零。丁銀八錢。請撥歸芷江縣。就近管轄徵收。所有黔省應裁糧額。丁銀。並楚省應增田糧。丁差銀米。均造冊送部查銷從之。○戊寅。諭從前朕曾降旨。欲親奉皇太后前詣盛京恭謁。

三陵。彼時因口內經過地方。田禾歉收。是以降旨暫停。俟收穫之年。再行前往。二年以來。直隸所屬地方。屢獲豐稔。故朕欲明歲前往。勅令遣人赴盛京察看道路。乃此際有人奏稱。盛京所屬地方。又經被水。祈暫停前往。時值水災。朕心深為廕念。但恭謁

祖陵之事。每以不能前往。遷延時日。不惟於敬謹之道不合。而心內亦實不自安。如前往時。一切需用之項。雖俱係官辦。而隨從人員甚

衆地方出產無多。甚慮在下人等或至匱乏。今將軍額爾圖等來京。細問彼處情形。據稱盛京所屬。雖數處稍濶。今水俱涸。明年可以耕種。一切應行備辦。及應行官備之項。現俱辦理。即隨從在下人等所用之物。亦不致購買有誤。尚易辦理。地方亦無繁難之處等語。額爾圖係該地方將軍。如稍有疑慮之處。伊必奏請停往。今既奏稱儘可前往。即定於明歲秋季起程。由嚮導處所看之和爾素一路前往。所有一切應行料理。應行備辦之項。豫為料理備辦。著原派出之王大臣會同將軍額爾圖等。公同商酌定議具奏。○是日起上以冬至祀

天於

圜丘齋戒三日。○己卯。諭禮部奏稱冬至前一日視祝版。常例御補服。今恭遇

皇太后聖誕。係穿吉服日期。視祝版詣齋宮。俱應御龍袍衮服等語。朕思乘輦前往齋宮。鹵

簿全設大禮所。關自應御龍袍衮服。嗣後若遇豫日應詣齋宮齋宿之祭。其視祝版詣齋宮。俱應御龍袍衮服。隨從人等。俱穿吉服。永著為例。○庚辰

皇太后聖壽節遣官祭

太廟後殿○

上詣

南郊齋宮齋宿。○諭朕明日祭

天壇。由齋宮乘禮轎。正外門乘輦。回宮時。祭祀已畢。於昭亨門外豫備禮轎。將此永著為例。

○辛巳冬至祀

天於

圜丘

上親詣行禮。○遣官祭

永陵

福陵

昭陵

昭西陵

孝陵

孝東陵

景陵

泰陵○詣

皇太后宮問安○諭昨出齋宮齋宿及今日祭畢回宮一切備辦俱屬整齊樂奏亦頗盡善所有執事巡察值班大臣官員及鑾儀衛章京校尉看守堆撥兵丁并樂舞生等俱著查明議奏加恩賞賚尋議執事大臣等五十二員各賞大緞一疋侍衛章京三百七十三員各賞官緞一疋

護軍校千總把總五十二員各賞銀五兩前鋒護軍兵四百三十九名巡捕三營兵二百三名步甲一百六十八名校尉四百四十八名樂舞生三百二十九名各賞一月錢糧從之○壬午上以冬至節詣

壽康宮行慶賀

皇太后禮王大臣於

慈寧門衆官於午門行禮○御太和殿受賀○以四川重慶鎮總兵邵銓松潘鎮總兵杜凱

對調○癸未吏部議准閩浙總督那蘇圖奏稱漳州府通判一員應移駐石碼鎮其民間戶婚田土罪止杖笞枷號者歸該通判就近審理如人命盜案及事關重大罪該徒流等案仍歸地方正印官審辦該通判原有部頒關防毋庸另行鑄給原設之書吏衙役即移駐供役至原駐石碼鎮之柳營江巡檢應裁官役俸工銀存司充餉其現任巡檢趙為梓給咨赴部另補應建衙署俟確估另行造報從之○兵部議覆江西巡撫陳宏謀奏稱江西省民汎兵丁應照直隸等省例准攜家口以一年為期隨宜抽換該管弁員遇大操屆期調集操演按次拔補懶者詳革至或不肖兵丁勾連匪類生事擾害者實力稽查即行申報上司革糧究擬如該管官稽查不實及知情徇庇上司訪聞分別叅處應如所請飭令各該鎮協營一體遵行從之○甲申戶部議准倉場侍郎宗室塞爾赫等奏稱新河稅

口迤西五里有水南地方。從前因商貨不由新河正道行走。俱由水南遠道避稅。以致課額有虧。前任廳員派人役在水南稽查。不致偷漏。其稅課仍係新河報納。由來已久。似應循舊稽查。如有官役巡攔人等。借端需索。及違例苛徵等弊。即查叅究治。再晏公廟一處。專為糧稅而設。今雜稅糧課。既奉恩旨。永行寬免。此稅自應裁汰。所有免過銀數。應即令就近口岸人役稽查從之。兵部議覆。御史

平定縣志卷之二十九

二十九

薛澂條奏武闈事宜。一外場考官應行關防也。凡武鄉會試。首重外場。乃向來惟內闈考官嚴行關防。而外闈考官謝恩後各回私家。次日始行赴闈。兼有衙門畫題事件。不惟酬應紛繁。於考校之事。未能從容。且恐啓夤緣請託之弊。應請嗣後一切稿案。暫停畫題。一外闈考官冊。宜同兵部俱送貢院。以便查對也。凡定例考試騎射技勇考試官及兵部堂官監試御史。各持冊一本記注。考試畢。公同

密定雙單好字後。三冊封固。兵部同御史冊。各攜入貢院。查對編號。而考試官冊。例各自攜回私家。不惟慮防範偶疎。或啓家人漏洩撞騙之弊。且貢院編號之時。偶有互異。礙難辦理。應一并封交兵部堂官。帶赴貢院。庶三冊互對。於編列字號。益為詳審。一號舍院牆。宜增高加棘也。凡士子入場。首嚴代倩。特是號舍院牆低矮。易於超越。恐滋弊竇。請將鄰號院牆增高數尺。並照外圍牆一體加之。荆

平定縣志卷之二十九

二十九

棘則鎖院深嚴。局試益密。一角樓宜設員瞭望也。向來貢院四角。各建一樓。蓋恐士子越牆出舍。曾設員役巡查。法最嚴密。比年來停其設官。祇存空樓。請嗣後考試時。每樓仍派委佐貳首領官一員。帶役數名。瞭望稽察。如該員役有徇縱等弊。知貢舉監試官叅究處治。均應如所請從之。乙酉

上詣

皇太后宮問安。吏部議准。署直隸總督史貽

直奏稱保定府清河同知涿州州同獲鹿縣縣丞霸州清河吏目定興縣河陽司巡檢獻縣韓村巡檢正定府司獄各缺或昔繁今簡或本屬閒冗均應裁其保定府清河同知原管一切河務應歸保定府鹽捕同知兼管另頒給保定府河鹽捕同知關防缺出揀選題補正定府司獄既裁所有解審人犯即歸正定縣監收禁囚糧亦令該縣支給至裁汰各員均給咨赴部另補其所裁之官俸役食等

實錄卷一百七十九

二十

銀即在名該州縣地糧存留項下扣除解庫造入春秋撥冊候文撥用各員養廉等銀照數扣除造入存公冊內咨部查核從之戶部議准兵科給事中鍾衡奏稱漕白糧一項近例俱隨漕統徵每石准加三完納官為代春俾民無零星守候之苦其法固善但一經統徵而漕白應完各數無從分晰糧書易於作奸遂有借端多科并私收折色者應請勅諭該省督撫嚴飭州縣嗣後隔歲冬底刊刻

由單逐項分晰開明該戶田地若干每畝科則若干應完地丁漕截各若干漕白米各若干其地丁加耗若干白糧加春耗若干漕截有無火耗一并總註於統徵之中仍自分晰不混民間一見了然自可照單完納奸胥無從舞弊從之○豁除廣西鬱林州屬墾不成熟田十畝有奇○是月署直隸總督史貽直奏涿州境內旗民違禁私開燒鍋已緝獲嚴懲得旨所奏俱悉燒鍋亦不能禁之使絕亦惟去其太甚者耳涿州之謂也○又奏報通省得雪日期得旨昨晚京師復得雪一寸有餘誠

實錄卷一百七十九

二十一

天恩浩蕩朕益深欽承之敬矣○又奏弭盜之方隆冬尤要臣遵委候補守備五員分為五路帶兵巡緝東至山海關為一路北至居庸關為一路西至固關為一路南至景州山東界為一路西南至磁州河南界為一路梭巡勿輟其連省交界素稱盜藪之地即令設法

躡訪報聞 直隸正定鎮總兵范毓綺奏報
懲勸兵丁情形得旨知道了直隸數鎮之中
惟汝處欠整頓勉之 欽差刑部侍郎周學
健奏由石林口歷勘上下兩江水利俱應分
道宣洩其下江各屬支河水溝及隄壩開座
亦應興修至高堰全隄保障洪湖尤為兩江
水利關鍵其原建天然壩之處正當淮水頂
溜應將南北兩壩改建滾壩二座以洩有餘
之水并將高堰大隄內之二隄加培高厚此
勘定各工之大凡也今擇其工程甚鉅關係
全局大勢者且俟會商再定其有關地方水
患急應修築工程又不甚鉅之處先為興工
以免春漲復淹再前奏請遷移臨淮縣城并
泗州州治經部議行今勘有周梁橋地方高
敞平坦堪建臨淮縣城并勘定雙溝地方環
山帶水堪建泗州州治得旨是復命大學士
陳世倌前往統俟汝等和衷悉心詳議到日
發議若洩水之事又關係明春耕務所宜速

乾隆七年十一月下

一

辦若遲緩之則無及矣陳世倌云能於今冬
使積水全消彼必有奇謀碩畫也 又奏經
過災屬察勘賑務俱妥地畝亦多涸出其未
涸處俟石林口斷流定可計日全消得旨覽
奏稍慰朕懷 欽差直隸總督高斌江南河
道總督完顏偉奏石林水口汕刷四十餘丈
堵築將次完工因口門收窄水深流急復衝
刷十餘丈隨倍力加工趕築於十一月初十
日合龍斷流河溜全歸故道臣等正恭繕摺
奏於十二日復刷寬十餘丈查水雖平淺無
溜但搶築又需旬餘方竣得旨朕日夜懸望
奏章覽此更切憂思矣然此尚屬目前之慮
至明歲冰融土解之時何以先事豫防爾等
亦料及否耶必於春汛未發之前多方設法
保固庶無徙薪之憂耳至新刷之口堵築合
龍即行奏聞以慰朕念 兩江總督宗室德
沛奏海州龍溝口地方緝獲搶奪鹽船匪徒
餘黨仍飭嚴緝得旨此等鹽梟斷不可使漏

乾隆七年十一月下

一

網也。以速獲為是。又奏。江西南昌新建二縣。秋間被水。田畝多淹。現分別成災者。照例賑恤。不成災者。亦量加撫綏。得旨。所奏俱悉。○江蘇巡撫陳大受奏。淮揚徐海等屬。積水已涸未涸。及佈種借種情形。得旨。所奏俱悉。大學士陳世倌。現為疏濬積水而去。若能涸出一分。即可趕種一分。總在汝等留心民瘼耳。○又奏。冬月辦賑情形。得旨。所奏俱悉。仍須查察屬員實力奉行。○又奏。耕牛一項。應官為借給草價。秋成照數繳還。於借給籽種案內一例冊報。其力能喂養者。不得冒領。濫給。得旨。如此留心民瘼。可以稍慰朕懷矣。○漕運總督顧琮奏。漕標營制。惟三才。方營二陣可用。餘皆虛華具文。臣刪繁就簡。倣照宋將岳飛。明將戚繼光。制為背嵬。鴛鴦二陣。時加訓練。務期嫻熟。得旨。覽惟在實力整飭營伍。陣名非所論也。又奏。緝獲海州搶鹽匪徒。得旨。竭力緝匪。以安良善。○安徽巡撫張

楷奏。宿州。懷遠。虹縣。靈璧。鳳臺。阜陽。潁上。亳。州。蒙城。太和。泗州。五河。天長等十三州縣。雖勘不成災。但未淹地畝無幾。收穫甚微。所有新舊錢糧。應概行停徵。統俟來歲麥熟後。啓徵。其軍衛地畝。附屬各州縣境內者。一例辦理。得旨。是。應如是以蘇災黎。復元氣也。○又奏。留養災黎。倉穀不敷。動支公用銀折給得旨。所奏俱悉。○鳳陽關監督普福奏。酌籌稅務。共應核減經費銀九千四百四十餘兩。其現用各款。仍於盈餘項下動支。倘不敷。再動正項。謹據實陳奏。可否照此辦理。抑或稅務減少。無煩專差監督。仍照舊例。交與該撫派地方官就近經理之處。均候欽定。得旨。照所奏。汝且辦一二年看。○安徽布政使魏定國奏。鳳潁泗所屬被災地方。九十一等月正賑俱畢。又經撥運各屬碾米二十一萬餘石。並各處買獲十六萬餘石。通計臘春以及青黃不接之際。均足敷賑。其上江各屬。積水漸

次涸出已借給籽種勸諭廣播至先經流移在外百姓俱安插撫綏得旨所奏俱悉督率屬員竭力妥協為之○又奏申嚴保甲情形得旨此法固善但災傷之後復元氣為要此猶可緩者也○江西巡撫陳宏謀奏南昌新建兩縣圩隄皆濱江湖其安樂圩富倉圩年年修理均被贛水倒漾今相度形勢應由羅絲港改築石壩一道使贛水順流而北不致倒漾圩內圩外可保護良田三萬餘畝以上

各工皆須今冬趕辦方可完竣前經題奏現下部議若待部覆方修轉瞬春雨水發勢必無及應即於此時興工報聞○又奏南昌新建災民現在以工代賑擬再加賑粥一月俾得接濟春融屆期再看江南流民多寡隨地安插得所不必強送回籍其本地災民春月工竣亦可資生得旨覽奏俱悉諸凡妥協為之○又奏分巡道周人龍陳浩李根雲朱陵四員巡查各屬皆輕騎減從自備供應並不

絲毫擾及地方得旨仍須實力督率不然則此分巡亦徒為具文而已何益之有○閩浙總督那蘇圖奏浙江近海寧塘岸者為北大鹽近上虞塘岸者為南大鹽南北兩山之間為中小鹽形勢橫截江海實為浙省之關閘若將中小鹽乘勢開通使江海暢流汕刷愈深則受水益廣所費多不過數萬金北岸之水可以漸掣而南海寧一帶自無漫溢之虞即使不建石塘民生自共登衽席但須從容相機開濬臣是以先將柴塘添建石簍為目前濟險之急務以中鹽引河開道為將來經久之要圖得旨所奏俱悉○浙江巡撫常安奏遂昌縣之小洞源天台縣之天封山青田縣之朱山等處俱有鐵礦砂坑或瀕臨海濱或僻在深山俱易滋匪且有定海縣羊山地方孤懸海中密邇大洋亦產鐵砂若一經開採則偷販出洋貽患匪細應一併嚴行禁止得旨好甚是○又奏太湖周遭八百餘里中

多漁船出入奸良莫辨向來屢有盜劫之事惟將此等船隻一例編甲印烙並於蓬上大書船戶姓名俾兩省之船一至湖中彼此皆可識別已移咨江蘇撫臣陳大受一體辦理再浙地通舟要口俱設立水柵晨開暮閉凡湖面出入之船已無不屢經查驗至河內通達溪港客商經由去處亦飭弁兵在該管地方駕船偵緝與上下汛守會哨庶外湖內河稽察俱為周密得旨嘉是之外無可批諭惟

應永守此志耳福建巡撫劉於義奏臺灣

彰化縣突有奸民二十餘人聚眾豎旗散創為匪誘脅愚民而劄內又載有功封官字樣情罪重大已經先後拏獲嚴行審辦得旨所奏俱悉此等風氣閩省往往有之汝等最宜留心又不可掩飾以圖無事也署福州將軍兼管閩海關事策楞奏前左翼副都統沈之仁疏請撥恩賞餘息銀一千五百兩借給協叅防校等員以為進京路費奉旨交策楞

聽其查奏臣思餘息銀本係賞恤兵丁餘項今以惠兵之餘借助官員之不足事屬可行但不先定程式恐日久弊生請嗣後進京各員除家道殷實者不准借給其果係匱乏之員該管協叅領查明酌定四十兩至一百兩之數出具保結請領如係協叅領請借者即令協叅領互具保結統於各員俸餉內勻作兩年扣還設有陞遷事故於該員原存馬價內扣抵倘再不敷即著落原保結之員催還

庶可久遠遵行得旨即照所議行可也又

奏福州四旗廢弛日久竟將官署私典今俱勒限贖回並將查辦過緣由會同副都統立為檔案嗣後凡有陞遷事故離任令接任官查明房屋間數出結呈報查核并每歲委員查驗一次報聞福建汀州鎮總兵黃貴奏會哨各營凡交界毗連一切遠近鄰汛無分畛甸惟按里數概令多訂日期分派將弁各帶目兵梭巡會哨每一會必交旗為據每一

旬。即飭通報查考。得旨。整飭地方。是汝之責也。更宜實力行之。○湖南巡撫許容奏。及時督修各屬隄塍。業已就緒。雖遇雨雪連陰。亦斷不至有誤春耕。得旨。好。應如是料理者。○河南巡撫雅爾圖奏。江南麥地。值此積歉之後。恐未能坐待秋成。今豫省收穫後。已徧播麥種。如冬春間雨雪調勻。麥禾自茂。擬將應補運江倉糧三十八萬餘石。不拘定原撥州縣。明年麥收時。動支庫項。悉發附近江南水次各屬。買麥存貯備撥。若江省不須接濟。則於秋後易穀。以實倉項。得旨。所見甚屬周詳。妥協為之。○又奏。今值隆冬。正江省災傷之後。豫省東南一帶。密邇其地。外來流民。難保盡皆安分。本境奸匪。亦恐乘隙生心。現遴員前往開歸汝光等府州。與江省交界處。遍閱巡查。將各屬流民。是否收養得所。避情是否約束維嚴。區別功過。以昭激勵。得旨。如此留心。方副朕意。然須行之以實也。○又奏。今屆

辦運癸亥年漕糧之期。查永城等州縣。本年應辦黑豆三萬七千一百四十餘石。即於前項購備黑豆內。撥抵兌運。將扣存漕折銀。仍令彰衛二府。買豆存貯。而本年河北豆價。合之折徵米價。可節省銀五千八百餘兩。足購餘豆九千餘石。連前共得儲備黑豆。將及六萬石。似此盈餘之數。歲有加增。不出數年。可得十餘萬石。俟積之愈多。易穀收貯。遇米少價昂時。減價平糶。即水旱不齊。亦可通融接濟。再此項餘豆。總視每年豆價之低昂為盈餘之多寡。該地方官。固不敢侵隱絲毫。亦並無抑勒派擾。累及閭閻之處。得旨。若果無抑勒誠善舉也。○河東河道總督白鍾山奏。濟寧以北。水已消落。歸槽。臣恐糧艘或有淺阻。隨將臨清以下沿途各閘。嚴閉。蓄水灌塘。次第啟放。以利運行。已於十一月初四日。全數過濟。從此順流而南。不日可抵淮徐。以資賑恤。伏思賑糧既過。即可熬壩挑河。乘此晴和

趕辦。不敢仍拘奏明十一日之原限。得旨。欣慰覽之。但石林所洩之水。未必不入運河。此亟應留心之事也。○又奏。濟寧以南。滕。嶧。二縣汛內。水勢汪洋不消。現屆挑河。原應將彭口堵閉。開放呂壩。導水入河。方可施工。但今年湖水高於運河。閉彭開呂。非惟不能洩水。且恐有引湖倒灌之虞。未敢草率從事。設或冬末春初。水尚未退。勢難熬壩興挑。則淤淺處。惟有用船撈濬之一法。至糧艘北上。全賴

平定奏卷一百七十九

三十九

緯挽。今緯道多被水淹。自當設法鑲墊平整。其原係洩水處所。不便全堵者。即搭架浮橋。總不使緯夫涉水遲延。則糧船挽拽。仍可通行。無滯得旨。諸凡俱見留心。妥協為之。又奏。衛河一帶河道工程。向係德州州同武城縣縣丞夏津縣主簿夾馬營巡檢德州衛南河千總。北河千總等六員分管。今用船撈濬。已奏定章程。一切察夫計工。按法撈運。必須專責各該汛員。就近查辦。惟各員所管汛地。

彼此間雜里數亦多。寡懸殊。遠近失宜。現將地界逐一清釐。按其遠近。歸併分劃。庶濬河趨運。修守事宜。均得就近辦理。得旨。如所請行。○又奏。黃河形勢。倏忽變遷。工程平險。原屬無定。今當水落之後。必須詳察形勢。逐一妥辦。惟是修防以料物為要。應多為貯備。現於庫貯河銀內。酌動二三千兩。乘此新料登場。易購之時。迅速採辦。以備緩急。得旨。所奏俱悉。○山西布政使嚴瑞龍奏。通省常平社

平定奏卷一百七十九

三十九

倉。實存穀米。收麥一百七十六萬六百餘石。合計似有餘。分貯實不足。今歲收成。統計九分有餘。應廣為採買。以實倉儲。倘市集價昂。即停止。再晉省地方官。向來有徵糧重耗。及收受陋規。并買取貨物。賒欠短價。種種情弊。自上年五月內。蒙特旨。誥誡寬其既往。嚴禁將來。現在留心密訪。如有違犯。立即題叅。得旨。所奏俱悉。勉力為之。署川陝總督馬爾泰奏。歲暮民多拮据。核計咸長。二縣常平倉

糧來春共應平糶三萬九千九百餘石。應豫為酌糶以平市價。俟來歲麥收後再行買貯。還倉糧價亦不致有絀。再延安府并直隸綏德州沿邊一帶豐收。前後發銀五千兩採買榆林府所屬除葭州榆林縣間被雹傷外。俱各豐收。酌量如果糧多價賤。即動項買貯。其餘各府州屬。俟查明豐歉另籌。得旨因地制宜。辦理甚妥。○又奏潼關至西安一路。目下糧價頗昂。緣該處俱與晉省接壤。一水可通。

實錄卷二百七十九

三十四

共販運過各色糧三十九萬餘石。聞所販多係富商大戶。藉以囤積生財。又為驪駒之用。若聽其源源搬運。必致陝西糧價驟不能平。殊於民食有關。當稍示禁遏。得旨所奏俱悉。○陝西河州鎮總兵周儀奏。整飭營伍頗有成效。其一切軍裝器械。必須酌量改造。方收實用。所需改費銀。現在各營公費不敷。請於司庫酌借。再分季扣還。得旨覽。次第辦理。亦不必欲速也。○四川巡撫碩色提督鄭文煥

奏郭羅克番民恃居險遠。屢於口外搶奪夷商。自多方化誨以來。各番住牧較前頗似安靜。但現在復有劫案。或係該番陽奉陰違。怙惡不悛。亦未可定。今乘有官兵在彼駐劄。可以嚴查勒獻。不致朦混欺飾。俟劫案查勘後。原駐官兵。應否撤回。臣等與新任督臣另行會議奏聞。得旨此事汝所奏頗遲。已有旨令汝前往料理。汝其勉之。毋債事。毋畏事。於以示國威。而安行旅可也。○左都御史管廣東

實錄卷二百七十九

三十五

巡撫事王安國奏。前奉諭旨。外省督撫。於各屬員中有深知灼見。可備繩糾之任者。俱准列名封奏。臣數月以來。細加察訪。實難其選。未敢輕薦。嗣後仍當留心體察。遇有其人。即行奏聞。得旨吐哺握髮之風。邈乎遠矣。○又奏廣西柳慶二府。因儲備古州軍需。禁運出境。穀船來東者較少。本年雖幸豐收。米價漸平。然終不如往年。臣惟有以儉樸先民。教以撙節。並勸導有餘之家。不拘多寡。捐輸社倉。

酌予鼓勵。為貧民通有無之計。至各府州縣平糶穀石。應買補還倉者。現飭酌量收買。明年青黃不接時。尚敷糶借。得旨覽奏稍慰。至米價踴貴。實各省之隱憂。汝等當留心也。○廣西巡撫楊錫紱奏。粵西運東穀石。所交價值。係照從前之例。每石四錢。核之今歲情形。實不敷採買。現飭各府州縣酌量。如在五錢五六分以內可購者。即行買補。如價值因此轉昂。即停買。俟年底確查。實有若干不能買

實錄卷一百七十九

三六

補者。再據實咨部。以俟下年得旨。如此辦理。恐倉項無足額之日矣。○又奏。粵西目下米價較往年固昂。然當晚稻收成之後。又加以此兩月內。收麥黃豆等項。頗獲豐收。以此時情形而論。尚可毋庸概禁商販。俟來春酌量情形。如應行禁止。當一面辦理。一面奏聞。得旨所奏俱悉。民以食為天。風化所由係也。此而不留心。孰當留心者。以後慎為之。○又奏。安南數年以來。地方不靖。匪徒每每竊發。茲

在保樂滋事之兵者。臘與在洋面行劫之兆曉等。一近雲南之廣南開化。一近廣東之欽州。雖與粵西交界尚遠。然沿邊關隘。總宜嚴謹。已飭地方文武實力稽查防守。毋許一人出入。以肅邊防。得旨知道了。謹守邊疆。以安地方。慎之。○廣西按察使李錫秦奏。化導獠猺陋習。以端風化一摺。得旨與督撫酌議試行看。且不必定以功令也。○貴州總督兼管巡撫張廣泗奏。黔省本年平糶倉糧。應行買補。但現在糧價未甚平減。除存倉米少。及米價稍平之處。飭令趁此豐收及時買補外。其餘或酌令買補一半。或飭令緩徵。俟平減時再全數買補。倘終不平減。即暫停。統俟下年秋成後買還。得旨明年青黃不接之時。更宜先事豫辦。

實錄卷一百七十九

三七

大清高宗法天隆運至誠先覺體元立極敷文
奮武孝慈神聖純皇帝實錄卷之一百七十九

實錄卷一百七十九

三十八

大清高宗法天隆運至誠先覺體元立極敷文
奮武孝慈神聖純皇帝實錄卷之一百八十

是日經官議定議官太子太傅文華殿大學士劉世明副都統內大臣等奏奉 上諭事件處管理

吏部理番處事務並據滿洲都統世襲特等副都統加七級運當加二級軍功紀錄二入從佳

紀等官經是議官太子太傅文華殿大學士劉世明副都統內大臣等奏奉 上諭事件處管理刑部三司事務

世襲騎都尉軍功加十九級隨帶加二級又加二級並重誥內大臣戶部尚書鑲藍旗滿洲都統軍功紀錄五入

平常紀錄十四次臣德瑛經是議官太子少保工部內書紀六次臣曹振鏞等奉

致修

乾隆七年壬戌十二月丙戌朔吏部議覆雲

平復二二八

南巡撫張允隨奏稱滇省解運京銅咸寧永
寧二處銅店委員收發其長運各官自滇至
永計程二十三站酌定運官自滇起程限二
十三日到永如沿途逗遛逾限即行咨參其
處分統聽部議等語應如所請將各運官照
在京衙門行查事件之例違限一日至十日
者罰俸一個月十日以上者三個月二十日
以上者六個月三十日以上者一年如果中
途患病及阻滯等情俱令該員呈明該地方

官出具印結。於叅案內聲明。以憑免議。從之。
○免江西南昌、新建、進賢、德化等四縣水災。
地糧銀九百一十四兩有奇。並停徵被水鄉
村錢糧。其勘不成災之湖口、彭澤、建昌、都昌、
鄱陽餘干等六縣。俱停徵。○加賑山東濟寧、
滕縣、嶧縣、金鄉、魚臺、鄒縣、臨清、衛等七州縣。
衡水災饑民。○丁亥。諭。科道為朝廷耳目之
官。關係最要。朕前降旨。令大學士九卿督撫。
各舉所知。以備選用。乃公聽並觀。博採衆論。

實錄卷一百八

二

之意。今諸臣俱已奏到。特將原摺發交吏部。
內侍郎周學健所保三人。皆係江西人。夫三
人之多。別省豈無一二人選者。而均係伊本
鄉。此風不可開。周學健著飭行。所保三人不
准考試。引見外。科道職司言路。必通達古今。
明曉政體。方能隨事敷陳。有所裨益。所謂明
試以功。必先敷奏以言也。其在京各員。著吏
部傳齊。擇日請旨考試。再候旨帶領引見。其
在籍人員。行文調取來京考試。引見外任各

員。俟伊有公事到京。吏部奏聞。考試引見。至
於或宜內用。或宜外用。總於引見時量材器
使。若所舉之人。既用之後。有行止不端。貪贓
犯法者。將原保大臣嚴加議處。○命左副都
御史仲永檀。馳驛前往江南。會同侍郎周學
健。辦理查賑。○予故雲南楚姚鎮總兵柳時
昌。贈署都督僉事。○旌表守正被戕之河南
省延津縣民張六妻靜氏。○戊子。

實錄卷一百八

一

皇太后宮問安。○幸瀛臺。○諭。朕令翰林科道
輪進經史講解。原以闡發經義。考訂史學也。
而年來諸臣所進。往往借經史以牽引時事。
或進獻詩賦。與經史本題無涉。甚失朕降旨
之本意。即如今日翰林周長發。進呈禮記講
章。內稱皇上先詣齋宮齋宿。審定郊祀樂章。
禮明樂備。千載一時。宜其誠敬感格。未郊之
先。瑞雪屢降。齋祀之際。風日晴和。大禮既成。
宜宣付史館等語。夫

郊

廟禮樂乃

皇祖

皇考久定之成規朕不過畧加參定並非創為制作也至於

郊祀之時風日晴和亦適逢其會耳況江南淮徐現被水災朕方憂勞儆惕宵旰不遑豈肯聽受諛詞而遂以為瑞應乎周長發著嚴飭行並將此旨傳諭翰林科道等知之○戶部

字錄卷一百八十

議覆倉場侍郎宗室塞爾赫奏稱本年因截漕緩徵運通漕少石壩坐米無多除白糧經紀協運外不過一百六十餘萬石僅得運價銀四萬三千六百餘兩較往年減少而一切辦公仍照全漕現在尚有買補掣欠等費所有六年勻扣排造船價銀四千九百七十餘兩實無項可扣應照雍正九年之例暫停扣一年次年照常扣還等語查本年運米雖少但究有應得腳價未便全行停扣臣等酌議

應於本年腳價銀內扣留一半其一半於次年補扣從之○禮部奏乾隆八年元旦應行慶賀禮得旨是照例行禮奉

皇太后懿旨停止筵宴餘依議○兵部議覆山西布政使嚴瑞龍奏稱商人挾貨貿易原准雇覓驛丁護送乃有不法驛丁擅敢藉端擾累虛張聲勢捏稱皇餉殊干例禁請嚴行禁止應如所請通飭各省地方官出示張挂關津渡口城鄉市鎮倘有驛丁在外滋擾不法情事嚴拏重究從之○已丑禮兵二部議准御史黃元鐸奏稱嗣後文職自督撫以下道府以上武職自將軍都統副都統提鎮以下協領副將以上現任來京凡值祭祀耕耤之期在附近地方潔齋居宿屆期各按品級排班行禮從之○又議准御史黃元鐸奏稱嗣後文職自督撫以下道府以上武職自將軍都統副都統提鎮以下協領副將以上或入覲來都或奉調在京者如遇

皇上陞殿之日。一體排班行禮。總督加尚書銜者。列六部尚書之末。巡撫加侍郎銜者。列侍郎之末。巡撫加右副都御史銜者。列副都御史之末。布按二司列小九卿之末。道府等官。列部郎之末。將軍都統提督。列在京都統之末。副都統總兵官。列在京副都統之末。協領副將等官。列在京參領之末。從之。○豁免福建雍正十一二年民欠未完穀一千九百三十五石有奇。○旌表守正捐軀之貴州省威

寧州民李粹妻張氏。○庚寅

上幸瀛臺。賜準噶爾使臣吹納木喀筵宴。○戶部議覆正黃旗蒙古都統瑚琳等奏稱。察哈爾官兵之妻寡婦。應否支給半俸半餉。須議定章程。應如所請。照八旗官兵寡婦之例。支給週年一半俸餉。即行文察哈爾總管遵照辦理。從之。○旌表守正捐軀之廣東省普寧縣民陳孟秀妻沈氏。○辛卯

孝惠章皇后忌辰遣官祭

孝東陵。○吏部議准。河東河道總督白鍾山奏稱。河南下北河同知原管儀封縣汛隄工。今已歸曹儀通判所屬。其下北河同知應鑄給分管開封府祥陳蘭下北岸同知關防。新設曹儀通判應鑄給分管曹儀河務通判關防。從之。○戶部議覆。奉天將軍額爾圖等奏稱。每年放票刈參。俱派員嚴查。並設卡座勢。難偷越私採。從前侍郎留保所稱。奉天設行店權稅。以防透漏。雖似可行。但領票人夫多屬奉天船廠寧古塔三處土著旗民所得。參或在寧古塔賣充盤費。或隨護牌至奉天售賣。若奉天設行店權稅。不無土豪奸商紛擾。滋弊。應請別籌納稅之法。查偷採參觔。自應嚴密稽察。以清山禁。倘有私帶米糧接濟者。查出。一并治罪。至官商資本參觔。並人夫餘剩。參觔既不便於奉天設行店權稅。又不便令土著人夫一并入關納稅。其收納稅銀。必有一定之所。始免透漏。今官參餘參。俱於寧古

塔地方會核應即令該副都統照山海關權稅之例查明收納令該商解繳監督仍知照奉天將軍奏聞并知會戶部及山海關監督查覈其官商及人夫進關貿易參劾俱鈐印票封交本人收執移交山海關監督已稅之參免其再稅如影射夾帶較原報之數多出者將參入官照例治罪并將查驗不實之員叅處從之○豁除江西興國廬陵萬安等三縣被水坍沒田二頃四十七畝有奇○準噶

爾部人特古斯達巴齊巴雅爾克楚克庫格勒貝達胡蒙格勒克等來降命賞給安插如例○以故樸族百長余仲魏色爾子拉甲補四川革齋土百戶江科子四朗林欽襲職○以患病解職之貴州黃道谿長官司土官黃卷子黃之鉞襲職○壬辰

上御乾清門聽政○詣

皇太后宮問安奉

皇太后幸瀛臺○諭據理藩院奏稱青海原任

親王岱青和碩齊察漢丹津從前實心効力於羅卜藏丹津悖逆毫無沾染是以

皇考格外加恩優待後岱青和碩齊察漢丹津病勢危篤奏請伊妻那木札爾能辦理游牧之事曾經允行自伊辦理游牧事務以來教訓伊子親王旺舒克并約束屬下辦理妥協今忽病歿著特加恩賞銀五百兩派侍衛一員攜茶酒前往祭奠○王大臣等議奏前據寧古塔將軍鄂彌達奏稱吉林等處設義倉

撥兵耕種以來毫無裨益兵丁反有苦累且現存之穀大半霉變經臣等以設倉貯穀原備緩急之需若輒行停止歉收無由接濟今黑龍江等處既有兵丁耕種公田交納穀石之例應令照此例將未墾蕩田酌量墾種等因議准在案今據該將軍鄂彌達查奏吉林各屬義倉向係就近分設並非設於一處若照黑龍江之例歸於一處使數百里外之人移來墾種多有未便且吉林城二百里外始

有蕩田可耕。收穫穀石。運送至倉。亦屬艱難。請於吉林八旗四十八佐領下。每佐領各置牛一具。水手牛六具。烏拉九臺津渡水手牛十具。四邊邊門各牛五具。金州。鄂佛囉等十七臺。牛十具。每具三人。各於本處墾田耕種。每人徵倉斛穀十六石。交納本處之倉收貯。倘遇籽粒不獲。或值歉收。散給貧苦兵丁。秋收照數歸還。每石加收五升。其置買牛隻農器。請於庫貯盈餘銀內動支等語。應如所請。

每年收穫穀石。令三分糶二存一。至該將軍復稱三姓。寧古塔。阿勒楚喀。琿春各等處之義倉。一體辦理。但各處現在應如何耕種。倉內有無存貯穀石。何處應牛若干具。置買牛隻農器動支何項銀兩之處。均未聲明。應令該將軍核議具奏從之。○盛京禮部侍郎那爾泰奏從前凡遇

陵寢大小祭祀齊集時。其應齊集大臣內。如有患病事故者。或咨行印文呈報臣部。或遣人呈報。未歸畫一。實難查核。伏思祭祀齊集。鉅典攸關。請嗣後凡應行齊集大臣內。如有事故。先期咨行印文。到臣部註檔備核。如無事故。又不咨行印文呈報者。即將職名查叅。得旨。如所請行。○以工部石侍郎德齡充經筵講官。○以正紅旗漢軍叅領于宗文為鑲藍旗漢軍副都統。○癸巳河南巡撫雅爾圖奏稱。前准部咨。撥運江南倉糧二十萬石。已全數運完。不日可抵江省。惟運費一項。在奉部文以前。已照豫省舊例。每石每百里給銀二分。蓋緣上江需米孔殷。刻難延緩。且需用船隻甚多。俱從遠處雇募。尤難較量。錙銖致誤公事。故照舊例給發。此時既不便向船戶追還。又難令承辦各員賠補。懇將此次運腳在豫省境內者。仍准照舊例銷算。將來另有撥運。再照部議查辦。得旨。如所請行。該部知道。○甲午戶部議准。安徽巡撫張楷奏稱。宿州。虹縣。臨淮。靈璧等州縣。連年被水。錢糧停

徵所需驛站銀俱於司庫借給。今鳳陽等府靈璧等州縣七年夏又被水。夫馬工料無支。應仍在司庫借給。至各屬現被秋災。俱經委員確勘。一切民衛錢糧。遵例停徵。驛站夫馬難以噉待。應自本年夏季為始。所需工料銀糧。在司庫匣費內暫行借支。統於次年麥熟後。啓徵歸款。從之。○又議准四川副都統永寧奏稱。成都八旗官兵口糧。俱動項交地方官。於每年秋收時買米收貯。至米價昂貴時。照原價分給兵丁。甚屬有濟。但收貯微少。現於覺和托名下。追出銀一千四百七十九兩零。皆係向兵丁勒索之項。請仍交地方官買貯分給。從之。○禮部議准湖南學政阮學浩奏稱。寶慶府屬之城步縣。乾隆三年改歸靖州管轄。其文武生童亦改附靖州考試。嗣於六年經貴督張廣泗題准。城步縣仍改歸寶慶府管轄。其歲科兩試。自應仍循向例。從本屆歲考為始。城步生童改為寶慶府考試。一

切報部冊案。統入寶慶府屬。文武新生俱照舊例。撥取府學名數。從之。○欽差侍郎周學健直隸總督高斌。兩江總督宗室德沛。安徽巡撫張楷。奏上江連年撥賑。平糶倉貯空虛。應及時買補。接濟來春。但本年江北大荒。而湖廣江西又有失收之處。時價在一兩二錢上下。較昂於各屬原糶一兩内外之價。實難責其賠墊。懇將今年採買。准以一兩二錢為率。設價再昂。即停止。後不為例。得旨。如所請。行。該部知道。○乙未諭。江南山陽阜寧安東清河桃源淮安大河等七縣衛。疊被水浸。黎民困苦。今年賑濟夏災時。每米一斗。照例折銀一錢。嗣因地方米價昂貴。一錢之價不能買米一斗。朕加恩增至一錢二分。今部中將秋災案內米價。准其折給一錢二分。而夏災案內。仍照一錢之數。此遵定例辦理者。但山陽等七縣衛。被水較他處更重。自應格外施恩。著將夏災所賑米價。准與秋災一例報銷。

每米一斗准折銀一錢二分該部可即傳諭江南督撫等知之○大學士等議准四川巡撫碩色奏稱川省連年豐稔統計常平捐監社倉現共貯穀二百六十餘萬石而未經敷額之監糧又現在陸續收捐是川省之倉儲漸充足備緩急近因江楚等省糧貴販運者多又兩淮湖北赴川採買者十四萬餘石自無穀賤傷農之患若再加本地採買恐糧價騰貴轉於本地民食有礙今兩江災傷甚重楚省亦被偏災何敢歧視查自成都至重慶一路近江易運州縣共有二十餘處係產米之區又臨河易買生俊樂捐故所貯獨多約計現存穀六十餘萬石倘江楚需糧孔亟可先酌動二十萬石今楚省就近撥運遞相接濟俟該省平糶完時將價銀解繳川省酌發於糧少倉虛之州縣照時價從容買貯從之

丙申

上詣

皇太后宮問安○諭我朝文臣無封公侯伯之例大學士張廷玉伯爵係格外加恩彼時伊奏請與伊子張若霽承襲之處不合令着帶於本身伊子張若霽不必承襲○又諭仲永檀密奏留中之摺鄂容安如何問及仲永檀如何告知臣工密奏之事豈容如此宣洩仲永檀鄂容安俱革職拏交慎刑司着莊親王履親王和親王平郡王大學士張廷玉徐本尚書訥親來保哈達哈審明具奏○戶部議准甘肅巡撫黃廷桂奏稱乾隆六年第一次編審隴西各州縣共新增民丁六千四百八十二丁應均攤徵補暫豁屯戶丁銀三千二十兩零請自癸亥年起入額徵收尚該未補暫豁屯戶丁銀六千四十六兩零俟下屆編審再分二次抵補至抵足之年仍遵舊例永不加賦從之 予故署陝西巡撫戶部左侍郎降一級留任岱奇致祭如例 豁免福建尤溪永安崇安福安等四縣荒田溢額銀九

百三十七兩有奇米一百四十二石有奇。○丁酉御史吳煒奏前奉諭旨令內外大臣保舉如陽城馬周者以備耳目之司今蒙將保舉單發出查所保人員內有畢宗高朱文瀨二員名實未副外論沸騰又原任道員劉永鏞從前叅款累蒙亦應查明有無公私罪犯方准與選至此外或有可議之人恐復尚多請勅下吏部於所保起廢人員內查明原任有無過犯方准考試得旨這所奏是朕立賢無方廣開言路故令諸

平定人

臣秉公保舉而諸臣多不以實即如周學健所保皆係同鄉已行申飭矣今茲吳煒所奏之三泰滿色二格以朕視之其所保之畢宗高朱文瀨劉永鏞奚特不稱周城之選即其人之素行亦不足齒於士大夫之列三泰等著即飭行其所保之人不准帶領引見再韓光基所保之劉之璋李懋德聞其人亦俱平常韓光基亦著飭行所保之人不許帶領引見餘著該部議奏○戊戌大學士等奏準噶爾來使進藏應行備辦

事宜得旨依議烏赫圖著賞銀一千兩玉寶著賞銀二千五百兩以為沿途費用○工部議准江西巡撫陳宏謀奏稱宜春縣之太平關萍鄉縣之案山關插嶺關石灰營關玉山縣之屏風關貴溪縣之昂山關各應分別修建並建造城樓營房添設兵丁從之○又議准河南河北鎮總兵丁山奏稱鎮標左右彰德陝州四營之房概係坍塌過半累任俱未修葺各兵已自行搭蓋或典買僦居無庸復

平定人

建糜帑應請嗣後將現存營房查明間數並居住兵丁姓名造冊呈送撫提總兵衙門存查專責各該營將備留心經管些小損漏即令現住兵丁自行黏補若年久朽壞非窮兵力所能修者該管將備查驗確估通報若公費有餘則用公費如不敷酌撥開款公項修葺倘兵丁再有任意作踐及私拆等弊查實重處仍追賠修補該將備於每年底將房間兵名造冊通報如有陞遷事故仍將經營營

房間數照大路墩臺營房之例一并造入交代冊內報查從之○予故原任吏部尚書楊超曾祭葬謚文敏○福建漳州鎮總兵龍有印以軍政自陳解職命降二級調用○豁除山東德州衛墾不成熟地八十六畝有奇○

己亥諭安徽巡撫張楷年逾七十該省現有辦賑之事恐其精力不能周到著來京候旨安徽巡撫員缺著喀爾吉善調補即速赴任○又諭王蓼年逾七十精力衰憊著免其坐

平錄文二十八

臺准回原籍○戶部議准江蘇巡撫陳大受奏稱江省災邑賑濟平糶米穀從本邑運往鄉村水陸腳價俱應動項開銷至賑濟缺額動款買補及將倉糧協撥鄰境所需運費均應於耗羨存公項內動支倘不敷再奏明動用正項從之○又議准漕運總督顧琮奏稱浙江省賠造新船從前給過三修銀接准部咨著追但查賠補止照原船接算初不因其賠造另立十年之限且從未奉有賠造船隻

平錄文二十九

七

不給修艖之文今浙省給過三修銀實緣閱年久遠旗丁僉換不一委係無從著追應援照江蘇省准免之例題請免追并請嗣後賠造船隻概停支給三修銀從之○又議准漕運總督顧琮奏稱山東省帶運糧石例給負重銀伊等有雇船灑帶盤剝之費殊難遲滯請照動支各丁行月錢糧之例及時支給其江浙等省帶運負重仍照舊支給從之○旌表守正被戕之直隸省天津縣民邢文貴妻殷氏懷來縣民郭登宵繼女王氏○庚子上御太和殿視朝文武陞轉各官謝恩○諭廣東潮州府屬新設豐順一縣在於黃岡潮陽二協營抽撥兵丁二百名前赴豐順駐防查黃岡至豐順計程二百七十里潮陽至豐順計程三百一十里兵丁搬移家眷未免盤費艱難其黃岡移駐者每兵一名酌賞銀四錢眷口大口每名賞給銀三錢十五歲以下小口按名減半其潮陽移駐者每

兵一名。賞銀五錢。眷口大口每名賞給銀四錢。小口按名減半。即於該營收存公費內支給。該部可傳諭該省督撫等知之。○戶部議覆。四川巡撫碩色奏稱。滇省運銅。應通飭運官在重慶府地方。協同該管官雇募堅固船隻。裝載祇以八分為率。不許過重。如人役附搭客貨者。嚴拏究處。若運官圖利私裝。即揭叅。設遇風信不順。江水暴漲。令暫停候。不得貪程冒險。均應如所請。並將停候日期。報部

實錄卷一百八十

三

查核。倘借端逗遛。即據實查叅。并轉飭地方文武官弁。凡遇滇銅到境。務撥幹練兵役。督同水手人等。防護趲運。如有疎虞。即將失防職名查叅。并將無籍遊民。冒充船戶攬載銅觔之徒。嚴行禁止。從之。○工部議准。安徽巡撫張楷奏稱。滁州城垣。於估修後復多坍塌。應請動項速修。從之。○考察鑾儀衛等衙門及各直省軍政卓異官十八員。不謹官三員。罷軟官二員。年老官十一員。有疾官二員。才

力不及官七員。分別陞賞處分如例。○免江南泰州屬廟灣場。被水災民。乾隆六年折價銀二千一百五十二兩有奇。其緩徵銀一千四百三十四兩有奇。分作三年帶徵。至帶徵乾隆二年五年折價銀。遞至癸亥甲子年帶徵。

實錄卷一百八十

三

大清高宗法天隆運至誠先覺體元立極敷文奮武孝慈神聖純皇帝實錄卷之一百八十

大清高宗法天隆運至誠先覺體元立極敷文奮武孝慈神聖純皇帝實錄卷之一百八十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆七年壬戌十二月辛丑。

實錄卷一百八十一

上詣

皇太后宮問安。諭大學士等朕細閱鄂容安

仲永檀供詞伊等往來親密於未奏以前先行商謀既奏以後復行照會二人俱已供出

明係結黨營私糾參不睦之人爾等祇擬以

洩漏機密事務之律不合著會同三法司另

行嚴審定擬具奏。補行乾隆元年四年湖

北省大計不謹官五員年老官三員有疾官

三員才力不及官三員湖南省大計不謹官

四員罷軟官一員年老官五員有疾官五員

才力不及官一員浮躁官四員分別處分如

例。予故原任直隸巡撫郭世隆涿州知州

洵陞湖廣總督李成龍河南舞陽縣知縣贈

奉議大夫按察使僉事潘宏盧氏縣知縣白

楹劉瀾濟源縣典史李應選入祀各該省名

宦祠直隸明大學士李標原任內閣學士兼

禮部侍郎張榕端河南歲貢張星明諸生李

光壁舞陽縣明殉節諸生陳預抱陳預養陳

預懷魯山縣明殉節諸生陳維明入祀各該

省鄉賢祠其殉節諸生陳預抱之子默通陳

預養之子默惇默言襄九等亦附其側。開

墾福建羅源永安南澳澎湖龍巖等五縣民

屯田地七十六頃二十五畝有奇。壬寅加

賞外藩蒙古王等癸亥年俸。兵部議

准閩浙總督那蘇圖奏稱太湖營遊擊管

轄湖面四百餘里地方極其遼濶與提督

駐劄之寧波府相距有五百餘里中隔

錢塘曹娥。兩江風濤朝夕無定。不能計日而至。設遇緊急事務。呼應甚難。其湖協副將駐劄湖州。與太湖營相隔僅數十里。兩營汛防界址毗連。請將太湖營改隸附近之湖。協副將專管。仍歸提督統轄。從之。○又議准。閩浙總督那蘇圖奏稱。浙江磐石營。向設水師參將一員。雍正六年。移駐玉環。該處另設陸路都司。查磐石面南一帶。盡屬大洋。沿海悉係沙塗。船隻往來。俱由磐石隨潮而進。六

實錄卷三百全

三

十里直連郡城。該營止設小艇二隻。僅可內港巡查。不能外洋歷險。請以磐石地方添設之水師參將。玉環左營陸路守備。改為水師。兼轄陸路。所需巡船。於玉環右營撥用。右營水師守備。移駐磐石。各海口悉歸管轄。其巡查內地營汛。仍歸陸路都司。磐石城內舊有守備衙署。止須修葺。添蓋營房三百餘間。從之。○命江西按察使凌燾。回籍終養。從巡撫陳宏謀據情代請也。○調四川按察使李如

蘭為江西按察使。以福建延建邵道姜順龍為四川按察使。○癸卯。諭曰。王大臣等審訊仲永檀。鄂容安一案。今日奏請刑訊。仲永檀。鄂容安。並將大學士鄂爾泰革職拏問。此奏又屬錯誤。此奏前經王大臣會審時。仲永檀。鄂容安。已將平日往來親密。並將具奏事件。前後商量情節。一一供出。夫以仲永檀如此不端之人。而鄂爾泰於朕前屢奏其端正直率。則其黨庇之處。已屬顯然。久在朕洞悉之中。若欲將伊革職拏問。則已於前日降旨。何待爾等今日之奏請。蓋以鄂爾泰乃

實錄卷三百全

四

皇考遺留之大臣。於政務尚為諳練。朕不忍以此事深究。若以此事深究。不但罪名重大。鄂爾泰承受不起。而國家少一能辦事之大臣。為可惜耳。但其不能擇門生之賢否。而奏薦不實。不能訓伊子以謹飭。而葛藤未斷之處。朕亦不能為之屢寬也。鄂爾泰著交部議處。以示薄罰。朕辦理此事。

皇考在天之靈。自能洞鑒。鄂爾泰嗣後當洗心滌慮。痛改前愆。以副朕恩。倘仍前不檢。鄂爾泰自思之。朕從前能用汝。今日能寬汝。將來獨不能重治汝之罪乎。至爾等奏請將仲永檀鄂容畧加以刑訊。伊等俱曾為三品大臣。又豈可似盜賊罪犯。重加三木。則不過套夾一訊。為汝等斷案張本。又何必多此一番奏請乎。況此事情跡已明。無庸刑訊。仲永檀受朕深恩。由御史特授副都御史。乃依附師門。

實錄卷一百全

五

將密奏密叅之事。無不豫先商酌。暗結黨援。排擠不睦之人。情罪甚屬重大。鄂容安在內。廷行走。且係大學士之子。理應小心供職。閉戶讀書。乃向言官商量密奏之事。情罪亦無可逭。但較之仲永檀尚應末減。爾等可定擬具奏。○戶部議准署直隸總督史貽直奏稱。直屬乾隆六年各營親丁公費。借動銀一萬餘兩。實無存公餘銀。可以歸還。請照乾隆二三四五年之例。於該年建曠銀內開銷。從之。

實錄卷一百全

下

○工部議覆江蘇巡撫陳大受奏稱。長洲縣之南塘路四工。與常熟縣之北塘路三工。均係濱河。兩面皆水。風濤衝擊。常有坍塌。地方官勢難修葺。請於保固限滿後。按年動項修築。應如所請行。其餘各工。仍令地方官隨時修理。若遇河水衝決。仍准確估興修。從之。○又議准江蘇巡撫陳大受奏稱。寶山縣北門外舊城水關廟後岸土被潮衝刷。水至塘腳。應請下築坦水石壩一百二十丈。又月浦塘原築坦水壩一百二十丈。單路石壩一百七十丈。南北兩頭無坦水之處。潮浪衝擊。侵削塘身。應接築坦水壩一百丈。單路石壩六十丈。現因情形危險。急須搶護。已在司庫存公匣費內動給趨辦。候部覆撥還歸款。從之。○考察奉天及各直省駐防旗員軍政卓異官五十員。不謹官二員。罷軟官五員。浮躁官三員。年老官二十八員。有疾官三員。才力不及官十員。分別陞賞處分如例。○革詹事黃叔

琳任以向任山東布政使揭叅舛錯故也○

甲辰

上御乾清門聽政○詣

皇太后宮問安○諭據駐防哈密安西提督永常奏稱乾隆三年十一月十八日接軍機大臣議定防所倒斃馬駝每年分款按額准銷之處迄今俱遵照辦理惟有自乾隆二年八月十五日之後至三年十一月十八日接奉定例之前此年餘之間哈密赤金廠內共倒

字錄卷百全

馬八百二十六匹因俱在未定額數之前屢經提臣援照寬免之例送部請銷部覆按例准銷五百九十七匹其餘二百二十九匹乃逾額之項非奏明之項可比應令著賠臣查經管弁兵久已換班回營其中不無陞遷事故若逐一行催勢必累及妻子可否邀恩准銷等語此項例前逾額之馬雖無准銷之例然邊地弁兵力量艱難朕所軫念著格外加恩准其一體報銷以示優卹該部可即行文

該督撫等知之○又諭從前

皇考因額魯特王色布騰旺布和託輝原任貝勒博貝之屬下烏梁海等本管王貝勒科派過重恐生計匱乏特降諭旨令議定烏梁海等於每年各進獻貂皮五張內減去二張仍照數加恩賞給伊等所屬游牧母羊以為久遠滋息生計今聞得王色布騰旺布貝勒成衮扎布等仍於烏梁海等收取貂皮五張本宜即行議處但姑念伊等從前効力勞績又係蒙古之人愚昧妄行止此次著加恩寬免嗣後務遵定例收取倘仍有違例私行增加擾害烏梁海等者經朕聞知定行治罪斷不寬恕著該衙門嚴加飭行○戶部議准前陝督尹繼善奏稱哈密管糧官二員經收糧務兼理民情均需衙役請照內地府佐例設快手八名皂隸十二名每名月給工食銀五錢隨餉估計在司領銷並照斗級例每名日給口食銀四分在哈密公費內支給口糧粟米

八合三勺。在哈密糧內支銷。至糧員除養廉外。應添公費銀三百六十兩。於司庫公用銀內動支。雇用書辦四名。日支口糧。亦於哈密糧內支給。命案件作。於甘肅輪撥一名。隨帶屍格。三年一換。除本地工役照舊支領外。其在哈密口食口糧。照斗級例支給。又赤金所改赤金衛。設守備一員。應歲給俸薪銀七十四兩零。養廉銀六百兩。公費銀三百六十兩。典吏六名。牢役四名。門子。傘夫。馬夫。各一名。禁卒四名。民壯三十名。除典吏例無工食外。餘皆月給工食銀五錢。其安西。柳溝。沙州。赤金。靖逆。五衛。新添千總五員。每員歲給俸薪銀六十六兩零。養廉銀四百兩。牢役二名。門子。馬夫。各一名。衙役四名。每名月給工食銀五錢。以上新添各官役俸工養廉公費銀。自乾隆七年。官以到任日。役按承充日起支。至糧員雖係輪班更換。已屬經久衙門。應鑄給管理哈密糧餉關防。其赤金所。改設衛守備。

安西提屬新設靖逆協副將。塔爾灣新設專城守備。安西提標城守都司。中軍叅將。均應鑄給各關防。靖逆協副將。請頒勅書。從之。○禮部議覆。總理樂部大臣和碩莊親王允祿等奏。太常寺樂舞執事諸生。與各省

文廟樂舞生。常服帽頂。應稍加分別。查太常寺樂舞執事諸生。同係供應

郊祀之員。毋庸另為分別。除章服仍舊帶用外。其常服帽頂。應一概准戴金盤光銀頂。至各

省

文廟樂舞生。較之太常寺樂舞生。似應再加區別。請嗣後除祭丁仍用襴衫雀頂外。其常服帽頂。俱用銀盤起花銀頂。從之。○以護軍叅領白吉。為歸化城右翼副都統。福州水師營鑲白旗漢軍協領安致中。為廣州左翼漢軍副都統。○以故三等男關保子法保。朱成額子朱陵。襲職。○乙巳。禮部議覆。給事中赫慶等奏。稱十一月二十五日。臣等恭送

聖駕詣齋宮。見隨從諸臣甫過。有各官奴僕。亦皆於午門前乘馬奔馳而出。殊於定例有違。請勅部定議。再申嚴禁例等語。查

郊祀為大典所關。而闕廷尤當嚴肅。除近侍官員。以翊護

聖駕。得於午門前乘馬外。其餘諸臣。罔或踰越。何容僕從人等。雜沓馳驟。法紀攸關。自當嚴禁。請嗣後凡遇

皇上躬祀大典。其翊從大臣官員。例應於午門

平定縣志卷之二

前乘騎者。仍照定例。領侍衛內大臣等派撥親軍。於午門前伺候牽馬。毋得臨期遲誤。馬匹并交與後管王大臣及御史等官。嚴行管束。務期肅靜。毋許喧嘩。其僕從人等。照例嚴禁。不許混入闕廷。肆行馳驟。違者該管官即嚴拏治罪。並將伊主查叅議處。從之。○工部議准。閩浙總督那蘇圖奏。稱臣等會同查勘海塘。華家街迤東。至浦兒兜石塘交界。柴塘一千八百餘丈。本年伏秋二汛。潮水臨塘。俱

經加鑲堅固。而老鹽倉汛。至東石塘界四五百丈。尤為險要。若照原議。每年興築石工三百丈。無論沙性堅澀。簽椿難下。其塘底之沙。潮水浸潤。仍屬虛鬆。即使成工。亦難經久。應於柴塘外面臨水之處。間段用竹篾盛貯碎石。層層排築。形同坦水。既可外捍潮汐。又可內護塘基。候石篾根脚堅實。水去沙停。漸漲淤灘。再照原議。建築石塘。從之。○免直隸薊州。雞澤。西寧等三州縣。水災地糧三十五石有奇。○旌表守正捐軀之河南省桐柏縣民王茂林妻黎氏。○丙午。諭我朝崇尚本務。原以弓馬清文為重。而宗室誼屬天潢。尤為切近。向來宗室子弟。俱講究清文。精熟騎射。誠恐學習漢文。不免流於漢人浮靡之習。是以順治十一年六月內。欽奉

世祖章皇帝諭。宗人府。朕思習漢書。入漢俗漸忘我滿洲舊制。前准宗人府禮部所請。設立宗學。令宗室子弟讀書其內。因派員教習清

書其願習漢書者。各聽其便。今思既習清書。即可將繙譯各樣漢書觀玩。著永免其習漢字諸書。專習清書。爾衙門傳示。所以敦本實而黜浮華也。近因雅爾哈善條奏。設立宗學。以漢文教習宗室子弟。迄今已經數年。昨經考試。並無佳卷。即繙譯卷亦屬平常。朕非過求文字出色。其實在明通者。實難其選。即所取二三人。不過於其內就短取長。文理稍順而已。尚恐未必盡出心裁。或不免彼此商榷。湊集成文之事。其於造就人才之方。究無裨益也。但既經考試。著宗人府將所取之人。照例帶領引見。嗣後宗室子弟。或有不能學習漢文者。應聽其專精武藝。其在宗學肄業者。考試之時。更應益加嚴肅。至宗室進身之階。原有襲封世職。又可揀選侍衛。及護軍叅領等缺。與其徒務章句虛文。轉致荒廢本務。不如嫻習武藝。崇實黜浮。儲為國家有用之器也。可傳諭宗人府將此旨明白曉諭宗室人

等知之。○又諭從前賞給各都統養廉時。將副都統銜管臺總管白泰。一併賞給。嗣總裁管兼副都統銜之養廉。併將白泰養廉裁去。白泰稽察軍臺來往行走。差使甚多。每年應得行糧銀兩。原不敷用。恐因此或有勒索臺員。擾累蒙古等事。嗣後賞各都統養廉時。著仍將白泰開列奏賞。○又諭廣東提督員缺。著金門鎮總兵官林君陞補授。金門鎮總兵官員缺。著澎湖副將孟伍進補授。令總督那蘇圖試看。如或不稱此任。可於本省總兵內揀選一員。奏請調補。所遺員缺。即將孟伍進補授。○又諭據四川提督鄭文煥奏。總兵杜愷。性氣剛戾。行事過急。地方大小公務。未免任性矜張。辦理頗多失宜。更於夷情不諳等語。杜愷性氣剛急。朕所素知。前降旨將伊調補重慶總兵官。今鄭文煥既有此奏。杜愷著來京候旨。其所遺重慶總兵官員缺。著三格補授。○以通政使彭啟豐為左副都御史。祭

酒數客為詹事。○以山東兗沂曹道萬國宣為浙江按察使。○以浙江温州鎮總兵陳訓廣東高廉鎮總兵楊恩對調。○丁未上詣

皇太后宮問安。○幸瀛臺。○戊申諭盛京工部侍郎偉璉人甚糊塗。不勝侍郎之任。著以原品休致。○戶部議准寧古塔將軍鄂彌達等奏稱。今歲黑龍江齊齊哈爾地方。歉收糧貴。吉林烏喇地方。各糧俱豐。收價賤。其癸亥年應行發賣之倉糧一萬一千石。毋庸發賣。並於義倉現貯糧二萬一百石內。發出九千石。移咨黑龍江將軍。俟明年冰融。派該處官兵由水路運至齊齊哈爾等處。照時值減價賣給兵丁。將銀解還臣署。除應賣倉糧毋庸補足外。其義倉之九千石。在吉林烏喇。照數購買。從之。○己酉。和親王弘晝等議准鑲紅旗蒙古副都統前任察哈爾總管那蘭保奏稱。嗣後察哈爾游牧世襲佐領官員。俱照京城

世襲佐領官員之例。承襲有分者。列入家譜。承襲無分者。無庸列入。從之。○戶部議准湖北巡撫范燦奏稱。被災各州縣衛。散賑不敷穀一十餘萬石。自應動項折賑。第乾隆七年地丁銀。除被災各屬。照例蠲緩外。其餘各州縣衛。尚未徵全。不敷酌動。應請在封貯銀內。借給十萬兩。照每石五錢之例。分給折賑。俟乾隆八年地丁銀解部。照數歸還。得旨依議速行。○兵部議准寧古塔將軍鄂彌達等奏稱。前奏准動支庫銀生息。俟移駐滿洲到時。遇紅白事賞給。今查船廠地方。開設大鋪商人甚多。臣選派殷實之協領。佐領。騎都尉等五員。將庫貯銀動支一萬兩。酌借商人收取利息。俟移駐滿洲到日。將本利銀一并交與該副都統生息。遇有紅事賞銀四兩。白事賞銀十兩。俟五年後。滿洲等習於耕作。立有產業時。停其賞給。每年餘剩利銀。遇豐收之年。將滿洲等所獲餘糧。給時價採買存倉。積至

萬石。將陳穀內每年撥出三千石。運至黑龍江所屬呼蘭等處糶賣。所得利銀。於拉林副都統衙門庫內存貯。俟豐裕時。仍將本銀先行繳還。從之。○庚戌

孝莊文皇后忌辰。遣官祭

昭西陵。○

上詣

皇太后宮問安。○戶部議准。奉天副都統哲庫納奏稱。奉天遼陽牛莊。廣寧。寧遠等處。秋間

字彙卷三十一

一

一

被水。所有未獲收穫之旗人。應請於明歲耕種時。酌量在附近旗民倉米內。照時價減等認買。得旨依議速行。○加賑奉天承德。遼陽海城。錦縣。廣寧等五州縣水災饑民。○免山東膠州。平度。蘭山。郟城。安化。諸城。昌邑。濰縣。高密。德州衛等十州縣衛水災地糧銀七千七百六十兩有奇。豁免高密縣。衝沒社穀一百五十五石有奇。○辛亥。諭臺灣地隔重洋。一方孤寄。實為數省藩籬。最為緊要。雖素稱

產米之區。邇來生齒倍繁。土不加闢。偶因雨澤愆期。米價即便昂貴。蓋緣撥運四府及各營兵餉之外。內地採買既多。並商船所帶。每年不下四五十萬。又南北各港來臺小船。巧借失風名色。私裝米穀。透越內地。彼處概給失風船照。奸民恃為護符。運載遂無底止。且遊手之徒。乘機偷渡來臺。莫可究詰。聞此項人等俱從廈門所轄之曾厝垵。白石頭。土擔。南山邊。劉武店。及金門所轄之料羅。金龜尾。安海。東石等處小口下船。一徑放洋。不由鹿耳門入口。任風所之。但得片土。即將人口登岸。其船遠棹而去。愚民多受其害。況臺灣惟藉鹿耳為門戶。稽查出入。今任遊匪潛行往來。海道便熟。將鹿耳一門。亦難恃其險要。殊非慎重海疆之意。朕所聞如此。著該督撫提鎮嚴飭所屬文武官弁。將以上各弊。一一留心清查。并於汎口防範周密。不使稍有疎縱。庶民番不致缺食。港路亦可肅清。該部可即

傳諭知之。○又諭江南河道總督職任最為重大。必得熟悉情形。經練幹濟之人。方為裨益。今年河湖異漲。原非尋常可比。而議者皆以不能先事豫防。及時捍禦。歸咎於河臣。甚非情理之平。即條奏之人。亦並未身歷其地。輒以臆度之論。紛紛陳說。及加考查。皆必不可行之事。其為害於河工甚大。若因議論紛起。即將河臣加以處分。則後之膺此任者。愈難辦理矣。但完顏偉由按察使陞任河道總督。素未諳練河務。且到任未久。驟遇如此水災。未免措置張皇。此實有之。朕思河東河務。較江南尚易料理。完顏偉著調補河東河道總督。白鍾山歷任南河。頗稱練習。著調補江南河道總督。○是日起

上以歲暮裕祭

太廟。齋戒三日。○壬子。大學士等議奏。雲南金沙江通川工程。據欽差都統新柱疏稱。滇南僻處極邊。不通舟楫。民無蓋藏。米價騰貴。蒙

諭旨命開通川河道。以期有備無患。臣等親往江干相度。其金沙江下游地方。自烏蒙改流設鎮。滇省每年赴川採買兵糧。均由江路沿流運送。其黃草坪至金沙廠六十里河道。為商賈販運米鹽舊路。內有大漢槽等灘。水勢險急。冬春之際。商賈雖有行走。而起載多艱。今應細加勘估。將可以施工之處。酌量修理。以利舟楫。其上游自金沙廠至濫田壩。一十二灘。現在陸續開修。但雙佛灘等處。石巨工艱。縱加疏鑿。下水仍屬堪虞。是以改修陸路兩站。以避一十五灘之險。今張允隨擬冬春之際。先修上游未竣各工。俟來秋再專修下游等語。復據署督張允隨。繪進金沙江全圖。並疏稱。上游除濫田壩等八灘已完工外。尚有已修未竣之小溜筒。濯雲二灘。及未修之對平等七灘。俱應今冬疏鑿。約計明春水長以前可竣。至臣先議發銅二十四萬。飭試運之處。應於小江口。雙龍潭。至石州灘。一百

七十里內。安設舢舨十五隻。每船約可運銅萬觔。即於十二月起。先行裝載。陸續運赴石州灘。其改為陸運之地。俱應建店房。銅房馬棚。共十五間。金沙廠河口。應建銅房十五間。已估計建蓋。並雇募馱脚。以資接運等語。查金沙江上下游。既可次第開修。應即興工。並先行試運銅觔。以定將來每年應運之實數。所需工費。統令工竣覈實報銷。從之。○癸丑。以歲暮裕祭。遣官祭。

實錄卷一百八十一

太廟中殿

後殿。○甲寅。裕祭。

太廟

上親詣行禮。○遣官祭。

永陵

福陵

昭陵

昭西陵

孝陵

孝東陵

景陵

泰陵。○遣官祭。

太歲之神。○詣。

皇太后宮問安。○諭朕明歲前往盛京。所有喀喇沁等處之蒙古扎薩克等。因朕經過伊等

地方。必豫備行圍。隨行効力。但喀喇沁地方。除數處圍場外。沿途並無堪行大圍之處。若經過之扎薩克等。俱派人隨行。人數衆多。並

實錄卷一百八十一

無用處。且致屬下窮苦蒙古。多費盤纏。勞乏馬匹。著現辦此事之王大臣。會同該部。計經過地方之遠近。有無堪行大圍。各應派幾人隨行。至伊等邊界。即令回伊遊牧之處。豫行妥議。再在朕前行走之喀喇沁哈瑪爾三十名。著隨朕前往盛京。如再有似此者。亦令隨行之處。一併妥議。○又諭江南水災之後。幸冬間地畝涸出者多。明春耕種。刻不容緩。然非耕牛。則農功不能。

興舉小民於荒歉之時餵飼艱難往往賤價鬻賣甚至私宰者有之從前巡撫陳大受早見及此曾將籌畫辦理之處奏聞今正當春融播種之際著該督撫轉飭有司勸諭災民愛護牛隻或照陳大受所奏借給草值以資餵養倘有圖一時之利輕鬻耕牛者即行懲治毋得以為民間細事淡漠置之○乙卯

上詣

實錄卷百全一

三

皇太后行宮問安○御保和殿筵宴朝正外藩左翼科爾沁和碩土謝圖親王阿拉布坦和碩達爾漢親王和碩額駙羅布藏袞布多羅郡王伊什班第固山貝子固山額駙拉什固山貝子多羅額駙瑚圖凌阿鎮國公喇嘛扎布多羅額駙多爾濟色旺諾爾布固山額駙多爾濟虎固穆公主之孫頭等台吉扎什那木扎爾和濟格爾得格爾什奇勒洛克什巴特馬垂扎布色旺多爾濟袞布匝雅噶爾畢朋蘇克公主之孫二

等台吉忒古斯額爾和圖公主之孫四等台吉袞楚克拉什畢里袞達賴武喇木拉蘇得勒格拉什敏珠爾多爾濟固穆扎布瑪什諾爾布拉什布楞太拉旺多爾濟格色爾色布騰阿穆瑚朗巴爾當色楞扎布策巴克扎布色楞賽音布顏伊達木扎布丹巴阿拉布坦頭等台吉薩哈達禮阿穆瑚朗二等台吉吉勒圖堪猛克三等台吉松兒四等台吉托諾拉什阿敏達禮達蘭太滿沁保甘珠爾尼遜鄂勒哲依賽音巴雅斯瑚朗色楞巴爾珠爾伯第固魯扎布色布騰喇嘛扎布袞楚克扎布阿爾吉瑪蘇班扎布薩拉布布爾布羅布藏古魯扎布諾穆都瓦雅塔喇木濟根敦那木扎爾色布騰色楞袞布色布騰得勒克阿必達達爾瑪索諾木拉什班第達都松兒巴圖孟克阿薩拉虎五巴什莽安阿里袞五巴什匝雅噶爾畢賽科岳圖達爾扎木素達爾雅朋蘇克扎木素阿雅里巴祿根敦拉什巴

實錄卷百全一

三四

圖孟克阿拉布坦班第拉付恩奇吉虎巴克
拉虎阿巴噶多羅卓里克圖郡王查木巴爾
扎布喀爾喀世子成衮扎布多羅達爾漢貝
勒拉旺多爾濟鎮國公貢格拉布堪格木丕
爾扎薩克頭等台吉阿保賴冲扎布垂木丕
爾桑寨林沁阿魯科爾沁多羅貝勒達克旦
翁牛特多羅達爾漢岱青貝勒朋蘇克輔國
公拉什色旺鄂爾多斯固山貝子齊旺班珠
爾那木扎爾色楞烏喇特鎮國公達爾瑪紀

實錄卷百全

五

里第蘇尼特輔國公羅累頭等台吉達付敖
漢和碩額駙多爾濟拉什多羅額駙德木楚
克齊旺多爾濟公主之孫頭等台吉垂吉拉
什公主之孫三等台吉垂濟扎爾奈曼固山
額駙敦多布巴林公主之孫頭等台吉臨扎
爾茂明安四等台吉德木楚克拉旺扎魯特
四等台吉朋蘇克右翼喀爾喀土謝圖汗敦
丹多爾濟和碩超勇親王固倫額駙策凌多
羅貝勒噶爾桑旺扎爾固山貝子阿拉布坦

實錄卷百八

三

齊木楚克扎布鎮國公扎木禪旺扎爾輔國
公旺青扎布公銜台吉三達克多爾濟和碩
額駙根扎布多爾濟扎薩克頭等台吉拉布
坦羅布藏敦多布額默根達什丕爾根敦塔
爾濟色布騰圖巴扎布四等台吉錫拉布科
爾沁多羅郡王和碩額駙齊默特多爾濟鎮
國公和碩額駙達爾瑪達都輔國公嘛哈木
玉爾公主之孫頭等台吉拉什索諾木旺扎
爾公主之孫四等台吉畢里衮達賴頭等台
吉阿玉爾布尼二等台吉五爾衮四等台吉
五古里克齊敦漢多羅郡王鄂勒哲依圖固
山貝子固山額駙羅布藏和碩額駙朋蘇克
阿拉什公主之孫頭等台吉布顏圖朋蘇克阿
里爾虎公主之孫二等台吉桑圖扎什公主
之孫三等台吉巴特瑪五格公主之孫四等
台吉布顏圖和塔拉阿齊圖羅布藏錫拉布
拉什拉布坦朋蘇克敦多布達爾扎畢里克
圖那木扎布貢格托布沁阿密爾里胡阿拉

布坦旺舒克五巴什素布第章散賽音扎布
雲丹拉什僧保多爾濟拉什多爾濟薩瑪第
旺舒克拉布坦阿爾畢特瑚那木扎爾巴雅
爾圖多爾濟那木扎爾額魯特多羅郡王和
碩額駙色布騰旺布固山貝子薩木都布扎
魯特多羅達爾漢貝勒阿第沙二等台吉得
爾格楞貴巴林固山貝子諾們額爾和圖多
羅額駙吉勒第公主之孫二等台吉諾穆爾
公主之孫三等台吉額爾赫圖噶爾瑪里錫
拉沁五巴付公主之孫四等台吉羅布藏那
遜額爾赫圖五哲斯古楞達賴五勒木吉諾
爾布扎木素達爾漢古魯格索諾木五十八
四等台吉畢機牙翁牛特固山額駙策布登
頭等台吉鄂齊爾二等台吉薩木魯布阿巴
噶二等台吉達什拉布坦烏喇特二等台吉
阿爾塔茂明安二等台吉朋蘇克奈曼二等
台吉拉什扎賚特三等台吉達什鄂爾多斯
二等台吉根敦沙克扎扎木素那木扎布三

等台吉朋蘇克拉什四等台吉玉木多爾濟
浩齊特二等台吉達馬林四等台吉策木楚
克烏珠穆沁三等台吉敦多布色楞那蘇圖
阿巴哈納爾三等台吉莽奇釵四等台吉敦
多克郭爾羅斯三等台吉那木扎爾四等台
吉五爾瑚滿蘇尼特四等台吉策凌巴爾杜
爾伯特四等台吉卓特巴烏喇特四等台吉
扎木散四子部落四等台吉索諾木克什克
騰四等台吉貢格多岳特歸化城土默特四
等台吉恩克巴雅爾圖喀喇沁頭等塔布囊
阿齊圖二等塔布囊旺扎爾四等塔布囊博
木伯齊爾諾們桑土默特四等塔布囊垂扎
布等及內大臣大學士等宴召左翼科爾沁
和碩土謝圖親王阿拉布坦和碩達爾漢親
王和碩額駙羅布藏衮布多羅郡王伊什班
第阿巴噶多羅卓里克圖郡王查木巴爾扎
布固山貝子固山額駙拉什喀爾喀世子成
衮扎布翁牛特多羅達爾漢岱青貝勒朋蘇

克右翼喀爾喀土謝圖汗敦丹多爾濟和碩超勇親王固倫額駙策凌額魯特多羅郡王和碩額駙色布騰旺布教漢多羅郡王鄂勒哲依圖固山貝子固山額駙羅布藏科爾沁多羅郡王和碩額駙齊默特多爾濟鎮國公和碩額駙達爾瑪達都至

御座前賜酒成禮。是月署直隸總督史貽直奏請赴闕慶賀元旦令節並恭請

聖訓。指示永定河工一切機宜得旨。卿病體方

實錄卷一百一

三

愈。正宜攝養。不必嚴冬之際。僕僕道路為也。至永定河一事實關緊要。前日高斌為此具摺。已發交卿矣。卿其於明春協同方觀承詳酌為之。此人想宜於河務為其不穿鑿而亦有條理也。欽差大學士陳世倌侍郎周學健直隸總督高斌奏。公同查勘河道水利情形。其低窪遲涸之地。明年二三月可接種秋田。得旨。所奏俱悉。朕將謂大學士陳世倌別有奇謀。碩畫。且臨去時。曾奏於歲內可使積

水全消。覽奏仍俟明年二三月間。且所辦理。不過就高斌周學健所辦之規模而潤色之。又何必勞此一番往返乎。然此尚可耳。若固執已見。顛倒河防是非。則將來咎有攸歸矣。欽差侍郎周學健奏。蒙恩賞給每月舟車薪水之費。感激難名。現在陳世倌高斌與臣同辦一事。惟臣獨蒙賞給。雖

聖心自有權衡。而臣於同事諸臣中。獨虛糜公帑。臣心更踧踖難安。得旨。高斌有伊總督養

實錄卷一百一

三

廉。汝亦不必辭。將此奏與大學士陳世倌看。欽差直隸總督高斌江南河道總督完顏偉奏報。石林水口。於十二月初二日合龍工竣。仍豫防明春冰融土解。設法保固。得旨。以手加額覽之。兩江總督宗室德沛奏。江南甫經災傷。務須播種如期。庶於民食有濟。其如古溝漫決之後。諸水盡歸下河之興。泰鹽城等處。疏導之法。惟有引之入海。乃海口范隄高於內地。既無束水長隄。使之遙行。計惟

開挖隄岸。以資宣洩。但開挖過低。則海水倒灌堪虞。若留蔽海潮。則積水依然停滯。是洩之無路可通。洩之為期尚遠。目前既不能種植。即明春補種。亦屬懸擬。被水黎庶。於明年三四月賑畢後。室既無糧。地復無產。一旦飢驅。豈能安分。除接賑外。再無他法。懇將不能涸出補種處所。再於加賑後。酌定月分接賑得旨。似此一切。惟朕恩是賴。國帑是需。汝司封疆。任經綸者何事。○江蘇巡撫陳大受奏

實錄卷一百八十一

本年古溝漫決以後。上下河隄。在在殘缺。沿海之范公隄。多有開挖。其黃河以南。淮屬山陽。阜寧等處。河道多淤。倘不及時補築修濬。一交春汛。水勢長發。力不能施。臣思通籌全局。修治河湖。自應俟高斌勘議妥商。計出萬全。方可舉行。若一州一縣之河道。似可先為興修。俾水道有所滂洩。於春種不無萬一之補。且可寓賑於工。至范公隄。應為補築之處。俟積水一消。明春即確查趨辦。得旨是。應如

是辦理者。○又奏。崇明鎮四面環海。產米鮮少。本年曾經提臣吳進義奏准。將餘存息銀

購米存貯。借給該鎮兵丁。查此項原係營中積貯。若照該地商民之例。令赴上江等處採買。往返需時。有誤差操。若聽在附近採買。誠恐奸商賄通弁兵人等。夾帶多買。致滋透漏。今酌議該鎮採買兵米。每年不過一二次。如遇應買。即在長元。吳常。昭等縣倉糧內。照數撥運。船到。立即兌裝開行。不許逗遛。其價值

實錄卷一百八十一

照該處市價扣收。印官買補還倉。得旨好。知道。○又奏。嚴禁州縣漕總記書人等苛勒花戶。得旨。所奏俱悉。惟應行之以實耳。○漕運總督顧琮奏。臺莊南北一帶。緯道俱經。咨會東河南河上緊修補。以待新漕。至石林口業已合龍。目下微山湖水尚大。運河之水亦大。明春足以濟運。但來源已斷。自必漸次消落。再宿桃一帶。運河內古城溜。五花橋等處。舊淺。恐春夏之交。水勢漸減。應先事圖維。臣

當與巡漕及河臣斟酌妥辦。務期新漕通行迅速。得旨所奏俱悉。○又奏鹽河一帶暫添浮汎。防範鹽梟。得旨好。應如是留心辦理者。○巡視南漕御史金溶奏。勘得石林口已於十二月初二日合龍。運道民生均屬有濟。然臣之鯁鯁過慮者。尤在此既經堵築之後也。蓋來歲伏秋汎漲。黃河大溜已成。故道輕車熟路。水勢必仍北趨。其可慮者一也。此時堵塞。乃值冰凍土凝之時。屆春勢必融解。其可慮者二也。黃水側注於北岸。則河內南岸日淤。北岸日下。水勢奔騰灌注。石林堵塞。雖極堅固。他如黃村口等處。亦在在堪虞。其可慮者三也。石林口既開之後。黃河水勢趨石林者十之六七。趨正河者十之三四。以致徐州一帶之正流。平緩淤高。今石林雖塞。而正河下流未必深暢。其可慮者四也。乞勅下辦理河務諸大臣。深思而熟計之。得旨所奏俱悉。○江寧布政使安寧奏。前因江南被災。欽差

大臣與督撫會勘商辦。今觀諸臣意見多有不合。將來集議。設使彼此抵牾。固足債事。即或彼此遷就。亦足誤公。伏思現在督撫中。惟尹繼善深愜人望。且素諳河務。今雖在憂制之中。諒百日之期已滿。可否勅令馳驛來南商辦。得旨朕早有此意。豈待汝奏。然汝見到此好。但尹繼善尚未到京。是以遲遲耳。○浙江按察使徐琳奏。浙省向來上納漕米。無一定之耗羨。亦宜如條編鹽課。定以章程。再兩浙為富庶之鄉。向例河南山東犯流罪之人。與直隸等省犯軍罪之人。俱按道里遠近。發配浙江。夫遷徙罪人。應去豐美而處瘠苦。今以北人遷浙。是去瘠苦而就豐美。且北人性剛膽猛。犯人尤屬兇狠之輩。現在各省發浙軍流人犯。共一百六十九起。將來人數漸多。誠恐滋擾生事。似宜畧為更定。得旨所奏俱悉。條陳二事。待朕緩酌之。○閩浙總督那蘇圖奏。閩省漳泉民俗。雖强悍成風。屢有關鬪

之事。然尋源究本。並非積染難移。實係教懲失當。臣蒞任以來。嚴飭各屬員親歷巡查。諄切化導。使其感發懲創。如有怙惡不悛者。勘明情罪。置之重典。庶火烈難犯。一懲百儆。以冀刁風漸改。得旨所奏俱悉。此亦非可欲速之事。惟在實心實力。久道化成可也。河南巡撫雅爾圖奏。開歸陳許等屬被水村莊。凡應蠲應緩。俱已毋濫毋遺。但本境內有原未被水。例不應賑之貧民。值此歉收。未免米糧湧貴。謀食維艱。雖不得與災民一體邀恩。亦當因時調劑。若委係窮苦無告。老病無依者。仍煮粥散給。其所需米糧薪水。或係州縣捐資。或由紳士襄助。或撥充公之閒款酌支。皆就各該處情形。熟籌妥辦。得旨所奏俱悉。○山東巡撫晏斯盛奏。安插江南流民。俱各妥協。但時已歲底。將屆春耕。現留養者。尚應送回。無如方來者。猶紛紛不絕。未必非江省已賑之民。又思冒濫隣省之養。若不定以限制。

非惟糜濫賑資。抑且有誤東作。請以來歲正月為始。到境者悉資送還鄉。交原籍地方官查明。已未領賑。並借給種糧。俾勤力作。其現在留養者。以二月底為止。盡資送回籍。其不願回者。聽自行謀食。並咨明江省一體查辦。得旨所見甚是。知道了。○河東河道總督白鍾山。巡視南漕。御史金溶奏。撈浚德州一帶運河。業經按次施工。自可依限一律挑完。以待新運。斷不至稍有遲滯。得旨辦理甚妥。知道了。○護理山西巡撫布政使嚴瑞龍奏。接護撫篆。經理政務情形。得旨喀爾吉善調用。安徽汝應多署數月。一切政務。實心經理。屬員賢否。更宜留意。勉之莫怠。○甘肅巡撫黃廷桂奏。甘涼西肅等處渠工。應照寧夏之例。無論紳衿士庶。按田畝之分數。一例備料勦辦。其紳衿不便力作者。許雇募代役。倘敢抗違。即行詳革。掌渠鄉甲有徇庇受賄等弊。按律懲治。并枷號渠所示衆。仍勒石以垂久遠。

得旨甚是知道了。○署川陝總督馬爾泰奏前甘肅巡撫黃廷桂奏請豫防郭羅克賊番肆奪奉旨交鄭文煥前往松潘相度機宜與該督撫商辦。臣思該賊番屢次刼奪肆無忌憚似應少加懲創追賠贓物勒獻頭人使之畏威守法已咨商提臣鄭文煥妥協辦理至噶爾丹策凌夷使現請進藏熬茶亦應豫為防範俾得安然就道不致疎虞得旨是此事似難過為姑息矣。○兩廣總督公慶復奏分

實錄卷一百一

三十七

委場柵人員督竈收鹽以杜私販頗有成效惟現在各場收貯鹽觔日積日多聞淮揚竈地被水之後產鹽稀少江廣一路可否令淮商將粵鹽撥濟疏銷臣現在訪查另籌得旨嘉悅覽之事若可行殊屬有益卿與準泰商之。○廣西提督譚行義奏緝獲散劉惑眾匪犯二名嚴審根究得旨知道了此等事恐不止此總應時刻稽察以靖地方。○貴州總督兼管巡撫張廣泗奏黔省生齒日繁臣等廣

勸耕織本年共報墾水田七千五百五十五畝零旱田九千六百三十八畝零並於省城設立機局紡織紬匹惟是蠶桑之利難期近功臣當董率各屬毋令始勤終怠得旨勸課農桑臨民者第一要務實力行之。○是年旌表孝子直隸等省劉遠等三十三名孝婦江蘇等省殷氏等六口守節合例八旗滿洲雅爾瑚達妻曹氏等一百六十口蒙古常住兒妻克楚特氏等十八口漢軍楊煌妻余氏等

實錄卷一百一

三十八

三十口奉天等省駐防舒堂阿妻高氏等一百二十四口奉天等省張玉利妻符氏等二千一百七十四口未婚守志八旗滿洲名水阿聘妻薩克達氏等二口漢軍王者棟聘妻扈氏等二口江蘇等省沈芳辰聘妻陸氏等三十一口夫亡殉節直隸等省朱鉅妻徐氏等三十七口百歲壽民山東楊夢桂一名百歲壽婦奉天那拉氏一口江蘇等省熊氏等十一口義民福建徐萬安一名義民婦河南

田氏一口。各給銀建坊如例。○一產三男。蒙古碧齊韓口等一十五家。○會計天下民穀數。各省通共大小男婦一萬五千九百八十八萬一千五百五十一名口。各省通共存倉米穀麥二千九百六十二萬六百五十二石二斗四升七合零。

實錄卷之十一

三九

大清高宗法天隆運至誠先覺體元立極敷文奮武孝慈神聖純皇帝實錄卷之一百八十一

大清高宗法天隆運至誠先覺體元立極敷文奮武孝慈神聖純皇帝實錄卷之一百八十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉
敕修

乾隆八年癸亥春正月丙辰朔

奉 錄 卷 之 十 一

上詣

奉先殿行禮 詣

堂子行禮 率王以下文武大臣詣

壽康宮慶賀

皇太后禮成御太和殿受朝作樂宣表如儀 詣

大高殿

壽皇殿行禮 遣官祭

太廟後殿 丁巳

上詣

皇太后宮問安。諭上年江南淮徐鳳潁等府遭值水災。朕宵旰焦勞。無一時釋於懷抱。特遣大臣會同督撫。百計經理。不惜千萬帑金。期登斯民於衽席。頃據陸續奏報。被水之地漸次涸出。冬間可以種麥。石林決口亦已堵築。水勢減落。朕心稍慰。但念兩江受水之地甚廣。其現在已經涸出者。民間努力耕種。自不待言。其沮洳將涸者。開春布種春麥。大麥及雜糧之屬。亦可冀望有收。惟是最窪之地。積水較深。有非人力所能計。日宣洩者。倘春月不能趕種春麥。雜糧而停賑之期已屆。窮民何以為生。朕思慮及此。深為憫惻。用是特頒諭旨。著欽差大臣及該督撫。將實在不能涸出補種之地。一一確查。所有饑口若干。按其情形酌定月分接續賑恤。毋使失所。此朕格外之恩。該大臣等應共仰體。妥協辦理。以副朕保惠黎元之至意。又諭仲永檀漏

洩密奏一案。由於仲永檀趨附鄂容安。而鄂容安因向伊詢問原屬多事。理應懲治。但鄂容安從前在阿哥書房行走尚好。且伊父大學士鄂爾泰年老有疾。鄂容安從寬免發臺站。仍在阿哥書房行走。嗣後當閉戶讀書。不預外事。倘因現經革職。在書房行走。不似從前盡心。朕必重治其罪。大學士鄂爾泰當嚴切教訓之。命湖廣總督孫嘉淦來京候旨。以廣州將軍阿爾賽為湖廣總督。調福州將軍策楞為廣州將軍。兼管粵海關事務。以鑲白旗滿洲都統新桂為福州將軍。兼管閩海關事務。戊午是日起。

上以祈穀於

上帝。齋戒三日。已未。諭軍機大臣。聞直隸現在緝拏老瓜賊。遍處張掛奉旨查拏老瓜賊字樣。辦理殊屬未善。從來查拏盜賊。全在實力稽查。密行躡緝。使奸徒不致漏網。今懸牌挨緝。彰明較著。毋論盜賊得以聞風遠颺。且

恐百姓無知以為老爪賊衆轉致驚惶搖惑殊非緝盜安良之意爾等可寄信與史貽直令其轉飭各屬善為辦理又諭從前慶復調署兩廣總督時曾奏請來京陛見朕批示此次署任不過二三年俟回任時先來陛見再赴滇省今馬爾泰已署川陝總督不能赴粵是慶復回滇尚未有期伊在外日久朕心深為眷念俟新任將軍策楞到任後令其將總督印務及一應事件交與策楞暫行管理伊即起身來京陛見爾等可寄信與慶復知之

定邊左副將軍額駙策凌奏準噶爾投誠人等其攜眷來者例發察哈爾安插嗣因人衆改發內地其婦女嬰孩多未出痘於內地不宜請改發東三省涼爽之地下軍機大臣議尋議盛京諸處現清查無業游民不便令準噶爾人混處黑龍江所屬接壤俄羅斯又近北路亦不便應發寧古塔安插從之 庚申享

太廟遣裕親王廣祿恭代行禮遣官祭太歲之神

上詣

南郊齋宮齋宿 辛酉祈穀於

上帝

上親詣行禮 詣

皇太后宮問安 壬戌

世祖章皇帝忌辰遣官祭

孝陵

上詣

奉先殿行禮 癸亥詣

皇太后宮問安奉

皇太后幸重華宮侍宴 甲子欽差大學士陳世

倌總督高斌侍郎周學健會同兩江總督宗室

德沛調任江南河道總督完顏偉江蘇巡撫

陳大受前任安徽巡撫張楷等奏上下兩江

連年被淹之故有因河湖泛漲淹及下流者

有因下淤上壅泛濫田野者有因隄防攔格

水路無消者有因雨水驟至淹及田畝者相

其致患之由以為弭患之策則分洩水勢隄

防漫溢。疎通積潦。使田間之水。由溝洫以達支河。由支河以達大川。由大川以通二瀆。經流。由二瀆經流以歸江海。近年雨潦過多。山水驟發。鳳。淮。徐。揚。海。所屬州縣。多地勢中窪。四面高仰。積潦停蓄。其分洩之河道水溝。日久漸淤。下流不暢。兩岸舊隄堰。亦多殘缺。不能收束。地畝田廬。多被淹浸。故分洩下游水勢。及隄防上游漫溢。為目前救患之急務。臣等公同酌議。應將洪湖現塌之石隄。高堰。

山盱全隄。大隄內舊隄卑薄處所。及黃河北岸石林口新築壩內月隄。沛縣之縷水隄。各增補培築。以遏黃水內注。順河集北岸迎溜處。開挖引河一道。沛縣護城隄工。亦應修築完固。此目前應隄防者也。至黃河宣洩之宜。應於天然閘對河北岸。挑引河一道。使大溜中趨。其迎溜河頭。改為倒勾。以避直衝。閘底填高。稍減水勢。引河兩旁民堰。加高培厚。河內淤淺處所。挑挖寬深。毛城鋪壩口門水底。

量為填高。以防進水漸多。峯山四閘。劉老澗壩。王營減壩。馬家港口。四處減水甚少。應將四處開壩口門。必俟非常之水。始令開放。尋常不必分洩。陸家壩。毛家集。三處。崗阜中斷。地窪易浸。應接築土壩。一抵高家灣。越隄一抵歸仁大隄。與崗地相屬。再於隄內各建涵洞一。以洩積水。此豫為隄防之大端也。至運河下游。應於南岸山盱滾壩之南。天然南北二壩處。添建滾水石壩二。較舊壩高一尺。即盛漲亦易消。不至為高寶諸湖之患。高寶諸湖之水。歸運河。由運河入海。路遠地高。不如入江之便。應於邵伯以南。金灣滾壩之下。東西灣地。添建滾水壩二。壩下挑濬引河。分引湖水入鹽河。鹽河對岸董家溝之上。加挑石羊溝引河一道。河頭建滾壩。以應東西灣二壩。鳳凰橋下引河。壁虎橋下流之廖家溝。俱挑濬深濶。歸石羊河。以達於江。董家溝原歸芒稻河。應將河尾接挑加長。自為一河入江。

芒稻閘以下仙女廟以上之泰州河挑越河一道接入金灣河內。金灣閘之上添設寬大石閘一。並修緯道俾鹽船經由利便。泰州河內舊有秦塘港白塔河百汊港三路旁趨入江。因防私鹽築壩堵塞。今應將土壩改建閘門。並挑通河路。既可防範私販。復可多洩漲水。此運河下游分洩入江之路也。再黃河南岸應於高郵三壩上下添建石閘四。昭關壩之上添石閘三。閘下河渠挑濬深通。挑河之

土接築兩岸子堰。束水入艾陵淥洋沙母羊馬諸湖蕩。以下趨於海。此黃河南岸分洩水勢之大畧也。又黃河北岸應將板浦以下河身速為挑濬。俾上游直注六塘。河南北二股及六里車軸等河之淺窄者速為濬治。六塘河兩岸之民堰殘缺者加築高厚。以束泛水。並伍丈義澤六里河頭各建石閘一。以時減洩場河之水。中河通入鹽河。草壩口門水底用石填高。以減進水。薛家莊之老隄頭等處

開濬深通。以資分洩。兩岸子堰加幫寬厚。以資收束。此黃河北岸分洩水勢之大畧也。至南岸應將潼河下游之林子河謝家溝沱河並宿州靈璧鳳陽等處道旁官溝節節疏濬。其土培築大道酌添橋梁。以通積水。使宿境之水導入濬河。靈鳳等處之水導入淮河。不使仍入沱河泛溢為患。此南岸各屬之大川應興修者也。又北岸應將沐沂兩河殘缺民堰堵築完固。淤塞河身開濬深通。清河桃源

道旁官溝疏濬培築。導入包家河。以洩兩旁積潦。此北岸各屬之大川應興修者也。大川既已疏導。則田間積水與支河溝洫乃可宣洩入川。今議上游可堵。則設隄防以堵之下游可洩。則通溝渠以洩之。總期水各有歸。不使泛溢。淮徐揚海潁鳳泗七府州約計開挑水溝疏濬河渠共一百四十餘處。此支河溝洫應興修之水利也。至議修各工其河道隄堰急應濬築者於正月內派員分辦。伏汎前

完竣。其次要尚未詳估者。於冬底興工。以一年為限。應建閘座滾壩橋梁。勢難剋期告竣。於正月內趕辦。其議挑東西灣等處滾壩下引河。與石羊溝董家溝。廖家溝等河。及高郵等處閘座下之河渠民堰等工。統於五月前挑挖修築。如伏秋汛不至過大。則山盱邵伯鳳凰橋壁虎橋灣頭閘。皂稻閘。董家溝等處滾壩。儘足宣洩。倘水勢過盛。現在議建閘壩之下。河路開通。臨時相機開旋。不致有誤。於工程亦為緩急有序。至工程料物。河工由河臣題估。地方水利。由督撫題估。俱以該管道員為總辦。工程最多處。另委道府一員協辦。該管知府直隸州知州承辦。屬河工者。河臣總理。屬地方者。督撫總理。倘不能時時巡閱。另委道員專理。如總辦協辦承辦各員。有奉行不善者。指叅緊要各工。均彙入現辦工程摺內開列。可緩者。槩停。前周學健以泗州地窪。奏請裁五河縣。改為州治。查五河為眾流

匯聚入湖之地。改為州治。終非一勞永逸。今勘州境雙溝地方。環山俯淮。以建州城。可期便民弭患。臨淮縣城逼近淮水。請移建於該縣之周梁橋地方。其請豁泗州五河水占地畝額賦。并泗州攤派丁糧。另查定議。至各屬積水地畝。可疏消者。已隨宜消洩。其有地勢最窪。不能宣洩者。為數無多。應飭地方官確勘。如係有程地畝。詳題豁免。淮揚二屬瀕海地方。有范隄一道。綿亘六百餘里。捍禦海潮。年久殘缺。今擬重加修築。此外尚有應否修治之處。均容勘明。另奏得旨。原議之大臣等。詳議速奏。尋議下江淮徐揚海上江鳳潁泗等處河道水利各工。據陳世倌等會同詳悉。勘明俱係應修之項。自應悉如所奏辦理。所修隄堰閘壩橋梁。亦應如所奏。分別緩急。確估興工。剋期完竣。議挑滾壩下引河等工。應令該督等及時修築。如式辦理。所派官員。應如所奏。分工委用。仍造清冊。咨部。河工水利

工程令該總河等確估興修作速造冊具題其關係緊要各工應如所奏彙入現辦工程併題估銷如可緩築行停止五河改為州治應准建於勘定之雙溝地方臨淮縣城應准建於勘定之周梁橋地方其應辦事宜及各州縣應豁水占地畝額賦并攤派丁糧即速報部核辦再查泗州業經遷建其五河應否裁撤未據聲明應令查明題覆疏消積水地畝應令將地方工段酌動銀兩先行造冊送部其最窪無庸挑濬之處應令查明畝數分別官地民地照例具題范隄一道先於乾隆五年經大理寺卿汪潑等查辦修築今稱年久未修應令詳勘明確分晰具題此外有無應修之處亦即勘明一併具奏奏入得旨依議速行乙丑立春順天府進土牛春山寶座丙寅準噶爾部人額勒伯克率子諾海博羅特第庫勒沁來降命賞給安插如例○丁卯

上詣

大高殿

恩佑寺行禮○奉

皇太后居長春仙館○詣

安佑宮行禮○幸圓明園 戊辰

上奉

皇太后幸同樂園侍早晚膳至甲申皆如之○
奉

皇太后幸山高水長 諭前據浙閩總督那蘇圖等奏稱閩省需用米穀懇請截留江浙漕

米二十萬石運閩備用部議未曾准行在部臣持籌全局立議固屬允當但閩省產米無多轉輸不易那蘇圖為豫籌積貯起見恐一時豐歉不齊臨期難於部署復申前請著照所奏將浙江尾幫漕米截留十萬石運至閩省以裨益緩急計漕臣奉到此旨之日正浙省尾幫抵蘇之時查乾隆三年撥江廣之米運往閩省總兵陳倫炯曾將米石由長江換

海舶出口海運。直抵閩省。此番亦應就近由海運閩。更為便捷。該部即速行文漕運總督。及江南督撫。并崇明總兵張天駿知之。○已。

上御奉三無私殿。賜宗室王公等宴。大學士鄂爾泰等議覆陳世倌等奏稱。此次奏辦河工。上江需銀四十餘萬兩。統於安徽藩庫地丁款內。陸續支給。下江疏洩急工。需銀一百五十萬兩。無項可支。請勅部撥解備用。其緩工需銀

實錄卷一百八十三

市

六十八萬餘兩。應於乾隆八年藩庫秋撥案內酌支。再上年水勢異漲。應辦隄壩搶修急工。經河臣完顏偉籌撥動用。加以應解河銀之州縣多被災緩徵。河庫已無歲修搶修之項。并請撥銀二十萬兩。解貯河庫。應如所請。於部庫及河南山東留協銀。上下江存貯備公。並樂善好施。收捐各項內。撥給急工需用之數。至籌撥歲修搶修之項。計兩江未經被災州縣。與各鹽關應解河銀。有盈無絀。無庸

另議撥協。得旨。依議速行。○庚午。

上詣

安佑宮行禮。○奉

皇太后幸山高水長。○御正大光明殿。賜朝正外藩。及大學士內大臣等宴。召科爾沁和碩土謝圖親王阿拉卜坦。親王額駙羅卜藏衮布。喀爾喀親王策凌。喀爾喀汗敦丹多爾濟貝勒噶勒桑。阿魯貝勒達克丹。巴林貝子諾們額爾和圖。喀爾喀貝子阿拉卜坦。烏喇特鎮國公達爾馬吉哩第。喀爾喀鎮國公恭格拉卜坦。和碩額駙根扎卜多爾濟。喀爾喀鎮國公旺扎勒。喀爾喀鎮國公扎木禪。蘇尼特輔國公羅壘。至御座前。賜酒成禮。順天府行鄉飲酒禮。

實錄卷一百八十四

十五

大清高宗法天隆運至誠先覺體元立極敷文
奮武孝慈神聖純皇帝實錄卷之一百八十二

實錄卷一百八十二

十一

大清高宗法天隆運至誠先覺體元立極敷文
奮武孝慈神聖純皇帝實錄卷之一百八十三

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文學殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆八年癸亥正月辛未

上奉

皇太后幸山高水長。○御正大光明殿賜大學士尚

書侍郎等宴。○壬申諭大學士等朕詣盛京謁

陵沿途安臺事務係盛京兵部侍郎阿山應行

辦理者阿山亦不能辦理著侍郎兆惠會同

阿山辦理。○諭曰御前行走之蒙古王額駙

等時常來京隨侍朕躬額駙策凌在軍營辦

事達爾漢親王羅卜藏袞布等本年又隨朕

前往盛京額駙策凌達爾漢親王羅卜藏袞

布著加恩各賞銀三千兩。額駙齊默特多爾濟、教漢貝子羅卜藏喀喇沁貝子瑚圖靈阿著各賞銀二千兩。世子成袞扎布王色布騰旺布公達拉瑪達都著各賞銀一千兩。俱由內庫賞給。癸酉總理行營事務莊親王允祿等議奏本年自木蘭由克爾素前往盛京路由喀喇沁三旗、翁牛特二旗、教漢柰曼阿祿科爾沁扎魯特等旗、從彼經過科爾沁王羅布藏袞布齊默特多爾吉伊什班第等旗地方、今科爾沁王羅布藏袞布教漢貝子羅布藏及年班來京科爾沁喀喇沁教漢柰曼翁牛特王台吉等籲請准其接至木蘭請安。扈從行圍前往盛京並於伊一盟各旗內共豫備捕戶五六百名至各盟邊界除喀喇沁圍場之外其教漢一旗於巴雅海地方豫備一圍、將近克爾素口科爾沁一旗於踐子村和爾本淖爾地方豫備二圍、需用捕戶一千餘名即在圍場豫備衆蒙古王台吉等既各

踴躍抒忱應如所請行。惟各盟地方出派捕戶五六百名似覺過多應酌減令每盟出派三百名即於各盟邊界豫備圍場地地方伺候。至教漢科爾沁既各備圍場其捕戶不必前赴木蘭應令於喀喇沁翁牛特旗內公同豫備捕戶一千名。喀喇沁哨鹿人鎗手六名。扈從鎗手十名。哈瑪爾行走人三十名。打鹿鳥鎗手四十名。索倫墨爾根三十名。喀喇沁土默特翁牛特旗內派嚮導一百名長鎗手一百六十名。馱車二百餘輛。其管轄圍底應派塔布囊敏珠爾拉布坦管旗章京拉布坦薩木坦管轄左翼圍肩應派貝勒朋素克塔布囊噶瑪爾畢滿都呼其左翼圍梢應派塔布囊旺扎爾羅布藏管轄右翼圍肩應派公丹津塔布囊羅布藏敦多布阿齊圖其右翼圍梢應派塔布囊諾們朵根敦扎布此次至木蘭行圍四次即往盛京不必如前年巡幸木蘭之例多派行圍墨爾根應飭察哈爾總管等

祇派墨爾根敦珠克滿達達都等數名前往
木蘭再管轄索倫巴爾虎之墨爾根等應即
交內地墨爾根頭目兼管至喀喇沁翁牛特
地方行圍畢其捕戶即令撤回祇令哈瑪爾
行走人隨往盛京其索倫巴爾虎之墨爾根
暨御前乾清門行走王台吉等亦令隨至盛
京過翁牛特路皆平坦其長槍鳥鎗手管轄
圍底圍梢圍肩之塔布囊等即令撤回再喀
爾喀台吉等除軍營該班外應令額駙策凌
選派十數人赴木蘭隨圍圍畢各還本處得
旨依議 甲戌奉

皇太后幸山高水長 乙亥以盛京刑部侍郎
覺羅吳拜為倉場侍郎調倉場侍郎宗室塞
爾赫為內閣學士兼禮部侍郎 丁丑諭令
日永謙奏請隨往奉天謁

陵大典文武臣工孰不願隨行若聽自行奏請
豈能概准前往自應候朕派出遵行為是著
傳諭滿漢文武臣工知之 己卯軍機大臣

鄂爾泰等奏本年恭詣盛京謁

陵臣等派何人隨往何人留京得旨知道了大
學士鄂爾泰張廷玉著留京大學士徐本嵩
書班第那彥恭著隨往 庚辰吏部議覆閩
浙總督那蘇圖疏稱建寧府現設同知通判
二員該府事簡通判所司巡查私鹽盜逃事
務同知儘堪兼辦共通判缺應裁古田縣水
口驛向設驛丞一員係水陸會集之處驛丞
不能兼理民事請移古田縣縣丞駐其地兼
管驛務驛丞缺裁邵武縣驛口驛向設驛丞
一員係江右往來通衢距縣寫遠驛丞不足
以資彈壓請移邵武縣縣丞駐其地兼管驛
務驛丞缺裁甌寧縣葉坊驛向設驛丞一員
距縣僅四十里縣兼驛務事不加繁請以驛
歸縣管驛丞缺裁均應如所請至裁缺各員
請留本省補用與例不符應令該督給咨赴
部另補從之 辛巳諭曰北路軍營叅贊大
臣著副都統拉布敦前往更換阿岱烏爾登

給與副都統銜。前往更換塔爾瑪善。吏部議覆左都御史管廣東巡撫王安國疏稱潮州府地處沿邊。瓊州府孤懸海外。俱屬三項相兼。例應請旨簡用之缺。但恐初任不宜。請留在外調補等語。查潮州。瓊州二府缺既係三項相兼。仍應請旨簡用。不便援邊遠之例。在外題補。至向歸部選之分巡雷瓊道。係二項相兼中缺。今稱為繁難要缺。與例不符。應仍改為中缺。歸部銓選。其原定難簡缺之廣州府理事同知。請在本省揀選題補。亦與例不符。應由部揀選。引見補授。至該同知從前兼管東莞增城龍門三縣捕務。今稱理事同知無管理地方之責。請將東莞縣捕務歸廣糧通判管轄。增城龍門二縣捕務歸佛山同知管轄。俾該同知得以專心辦理旗務。應如所請從之。壬午。以內閣學士德新為盛京工部侍郎。癸未。吏部議覆廣西巡撫楊錫紱疏稱桂林府屬陽朔縣之伏荔市巡檢距

縣城僅止十里。既非寫遠。又非要缺。應議裁汰其所管地方。歸該縣典史管理。梧州府各屬糧務原係責成知府。所有捕務可以歸併清軍同知管理。該府糧捕通判實係閒冗。可裁。蒼梧縣羅粒司巡檢僅轄須羅平樂三鄉。須羅鄉事務可歸毗連之長行鄉管理。平羅鄉與該縣典史所轄之吉陽平政相連。其事務可歸該縣典史管理。羅粒司巡檢亦屬可裁。均應如所請。其裁缺各員應照遠省准請揀發之例。令該撫留於粵西題補從之。甲申。上御勤政殿聽政。大學士鄂爾泰等議覆署兩廣總督慶復奏稱廣州肇慶二府沿江圍基向來遇有衝決。係民修築。乾隆元年督臣鄂彌達奏請動用鹽羨生息修理。改用條石鑲嵌。乾隆六年撫臣王安國等奏圍基坍塌。部覆令承修各員賠修保固。其土工仍令地方官於農隙時督民培修。至地方情形可否

仍改民修之處。並奉有查奏之旨。今查已建石工尚屬堅固。賠修工程亦可保護田廬。將來賠修工竣。請將已修石工與民修土工一併交地方官督率圍民防護。遇有衝噬缺損。俱令圍民自行修補。永著為例。倘有衝損過多。民力不支。即於生息項下奏請撥用。其民修需費。按田勻派。生息銀兩酌定修補成數。餘充別用。俱應如所奏。從之。吏部議准。江蘇巡撫陳大受疏稱。銅山縣北岸主簿僦居民房。請建設衙署。從之。戶部議准。江蘇巡撫陳大受疏稱。漕河兩標及泰州營兵糧向於揚州府屬額米撥濟。今泰州江都皆以水災停緩。其應撥兵米共五千三百一十石有奇。請於泰州乾隆六年截留漕米。並上海縣常平倉穀碾米內撥給如數。從之。禮部題。朝鮮國王李昫遣使表賀。萬壽。冬至元旦。三大節。及進歲貢方物。賞賚筵宴如例。又表謝國人韓地興等於盛。

京遭風。護送回國恩。下部知之。以右通政勵宗萬為通政使。以少詹事葉一棟為詹事。以正黃旗滿洲副都統旺扎爾為鑲白旗滿洲都統。是月。欽差大學士陳世倌總督高斌侍郎周學健奏。江南積潦未消。轉盼立春。其支河港汊可以疏通者。應先乘時辦理。如鹽城興化之蝦鬚溝。東西塘河。射陽湖之當箭港。草堰閘之三里灣。楊新窪。丁溪閘之川港口。何垛場之車兒埠河。沛縣之荆山口。洩入彭家河。以達六塘河之水。海州之義澤六里白蜆丁家溝。小伊河。航道河。王官口河。沐陽縣之前山河。邳州宿遷桃源清河安東之六塘河。南北股河。黃墩湖。萬家圩。老湖。蕩鮑營河。民便河。俱各委員承辦。俟冰凍一解。六塘河口堵築後。即動項興工。務於正月內消涸。以便及時播種。又石林口漫溢之水。現查運河水深無淤。上游之水漸消。下游消水更速。劉老澗入六塘河歸海之路。亦甚通。

暢間有殘缺。緯道已上。緊修理鑲墊。無誤漕運。得旨。所奏俱悉。欽差總督高斌。侍郎周學健。調任江南河道總督。完顏偉。江蘇巡撫。陳大受。覆奏。上年九月。先後奉到大學士等抄寄。並部咨議覆條奏。河工水利事宜五道。一大學士等議覆。兩江總督德沛條奏。淮水盛漲。應於高郵三壩之下。築隄二道。束水。通水之處。酌建滾水大壩。舊有河道。及串場等河。酌立閘座。下河環繞支河。或築隄。或挑濬。總期貫串入海。邵伯湖之南。酌加滾水壩。遇漲。啟放入江。天然壩。並高郵三壩。以時啟閉。均令詳查定議。一大學士等議覆。大學士陳世倌條奏。黃河之底。高於內地。蕭楊等處。何以使河底復深。高堰隄背。雖有坦坡。與築於迎面者。是否相同。大通口。果否深通。均應酌議。行令查勘籌辦。一大學士等議覆。署福州將軍策楞條奏。駱馬湖水平淺。不能容納。山東容水天然壩。與淮揚一帶減水閘壩不開。

漲水不洩。行令會同妥議。一大學士鄂爾泰議覆。前任安徽巡撫張楷條奏。積滯之由。一在下游。一在二潰。必使淮黃迅趨入海。洪湖閘壩宣洩如舊。然後開濬支河溝洫。行令通盤籌畫。一工部議覆。大學士陳世倌條奏。石林口決下之水。另有鮑家營鹽河等處入海之路。應速勘興修。宿靈睢虹等州縣積水。應於祥符閘近處。將黃河挑濬引河。直接清口。蕩滌淤沙。培補隄岸。並修歸化閘。令一并速議。又刑部尚書張照條奏。江南城河支河。在於淺松江三泖。有化為萊田之勢。應撥饑民做工代賑。並將被水最低處挑濬為澤。現有支河引水田自涸出。行令一并議奏。臣等詳加籌畫。凡河工水利事宜。俱經公議會奏。以上各條。均無庸議。得旨。知道了。漕運總督顧琮奏。陳催僨漕運事宜。一運河一帶緯道。已委員查有殘缺。速為接修。一黃河至臺莊。及臨清以北。與直隸交界處所。除添設浮

汎外復派臣標千把外委分頭催償遇汎員缺少之處即令暫駐接催。一糧船抵通起卸挂欠多由旗丁沿途盜賣現飭員弁嚴查其有查出者即照例獎賞。一江廣糧船多於長江逗遛年內已檄各營汎催償令復移咨督臣德沛委員查催。一各省僉報副丁每多需索僉貧現飭各糧道遇有事故副丁令正丁於戶內選擇保送備弁驗看出結不令備弁自行僉派。一淮安向有漕蠹積棍需索各幫冊費上年酌定冊式刊發渡江各幫令其倣造於抵盤糧廳時自行呈投今年仍照上例並密訪積棍詐索以除積弊得旨好尤在實力為之。一兩淮鹽政準泰奏揚州附郭貧民不符災賑之例寒冬餬口維艱上年九月間奏明動用運庫銀兩量加矜恤應照折賑之例每大口月給折銀一錢八分小口減半賑恤兩箇月今已將上年十二月及本年正月賑銀委員一并散給得旨知道了安徽巡

撫喀爾吉善奏臣奉命調撫安徽入境查詢江南賑務節經欽差大臣及本省督撫酌定章程妥協辦理臣於路過賑廠見饑民感激歡呼均稱得所被水地畝俱經涸出種植其宿州靈璧虹縣天長四屬間有最窪之處春融尚可布種晚大麥沿途秋麥亦已滋長並得臘雪之益得旨覽奏稍慰朕懷前任湖廣總督孫嘉淦奏湖北荆襄一帶塘汎營房早狹急應興修者計四十六處應倣豫省規模動項修理餘令地方官照例修葺湖南塘汎與撫臣許容商酌亦擬先將衝途各汎次第興修得旨交與新任督臣聽其酌辦。一湖北巡撫范璨奏前大學士等以湖北米價未平議撥川省貯穀二十萬石惟穀石過多勢難猝辦且須汎水未漲之時運過川峽方可坦行因思川穀碾米撥運較為利便應令川省待撥各屬一面代碾豫備一面雇就船隻以便委員速運依期回楚並分派總運協運

人員各攜制斛往兌。如楚省價平不必全用川米平糶。即將餘米補倉。或酌濟下游鄰封之用。得旨。所辦甚妥。知道了。○又奏。閩省委員赴楚買米二萬石。尚少米九千七十七石。有奇。將武昌府倉貯買回川米照數撥給。得旨。好。知道了。○河南巡撫雅爾圖奏。去歲上下兩江被水歉收。豫省密邇江南。收養流民約已三千餘口。復恐秋末冬初。難禦嚴寒。各州縣皆捐備棉衣散給。時屆春融。有願還鄉耕作者。即給口糧資送。如因青黃不接。仍有續來就食者。一體安插收養。得旨。好。知道了。○山東巡撫晏斯盛奏。東省收養江南饑民甚衆。今資送回籍。應豫定章程。現飭屬分起資送。仍委員稽查。俾無滋事。或本境正當資送。又值隣邑送到災口。及衝衢數起。同到者。亦酌量先後而行。其停待境內者。照留養之例。日給口糧。至資送路費。照例給發。年老者。疾者。酌給脚力銀三分。水程減半。俱令州縣

動支庫貯事竣報銷。至無產游民。在東傭作。令雇主具保。其自行營業者。令地方牌甲等留心查察。得旨。所奏俱悉。仍當實力稽察。毋使屬員欺朦也。○調任河東河道總督白鍾山以調任南河。奏請陞見。得旨。目下陳世倌等在彼正講究河務。卿應先到任。和衷共議。此事何必來京。況朕素未諳習河務。亦不能有所指授也。但孟子云。禹之行水也。行其所無事也。朕為卿誦之。若能細玩此句。而不用智穿鑿於河務。不無小補。又卿在河東任內。未免有節省帑項之意。夫漫無查察。聽屬員冒銷。固不可。而一味節省。亦非正道。況茲南河更宜留心。卿其記朕此諭。速赴新任可也。○護理山西巡撫印務布政使嚴瑞龍奏。汾州府屬地多沙灘山阜。種高粱者。十居五六。高粱性易生蟲。難於久貯。燒鍋一事。似難概禁。今惟飭屬宣揚諭旨。遍為刊示。令燒鍋之家量為燒造。不許販運他省。各具結備案。並

令地方官選差巡查。又救火器具。前奉諭旨。隨時修整。當經詳明。前撫臣飭屬整理。并酌派兵役。專其責成。得旨。所奏俱悉。甘肅巡撫黃廷桂奏。甘省吏治。闡葺已久。現將祀典。農桑庫藏倉儲等。凡有關民生日用。政治切要者。造成冊式。授以成規。令各道自開印。為始。逐縣親查其實心整理者。報明為薦舉之據。空文支飾者。亦據實報明。分別懲儆。其到任未久。不能諳練者。即令就近指示。仍飭各道。不許絲毫滋擾。違者叅處。得旨。好如此振作。有為方是。但須行之有領要。而持之以終久可也。廣東布政使託庸奏。粵東產米無多。向藉隣省商米接濟。上年商販較少。廣肇惠潮嘉五府州。市價稍昂。各該處應補平糶倉穀。已詳明督撫。暫停採買。民情皆安靜。樂業得旨。知道了。然倉穀亦不便聽其久虛也。

實錄卷一百八十三

五

大清高宗法天隆運至誠先覺體元立極敷文奮武孝慈神聖純皇帝實錄卷之一百八十三

實錄卷一百八十三

五

大清高宗法天隆運至誠先覺體元立極敷文奮武孝慈神聖純皇帝實錄卷之一百八十四

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官總纂官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛總纂官太子太保工部尚書紀錄六次臣曹振鏞等奉

敕修

乾隆八年癸亥二月乙酉朔

上詣長春仙館問

皇太后安奉

皇太后居暢春園○

上還宮 吏部議准前任湖廣總督孫嘉淦等

疏稱湖南永綏協所屬之花園汛地處苗穴

建有倉貯移隆團巡檢駐其地兼理苗務永

綏協存城額兵不敷徹河口汛兵三十名增

之隆團汛守備帶兵一百同巡檢並駐花園

從之○戶部議准河南巡撫雅爾圖疏稱祥

符陳留杞縣中牟鹿邑睢州柘城七屬因開

濬惠濟河道挖廢民衛地共五十六頃九十

五畝有奇請豁額賦從之○是日起

上以祭

社稷壇齋戒三日○丙戌大學士鄂爾泰等遵

旨議奏本年恭逢

聖駕祇謁

祖陵隨從王公官員等蒙恩以道途遙遠飭議

賞項查前年巡幸木蘭扈從人等各賞賚

此次路遠費多應加倍議給其侍衛章京等

請各賞銀六十兩雜項差使官員等請各賞

銀三十兩護軍拜唐阿披甲匠役人等請各

賞六個月錢糧綠營千把總亦請照隨往木

蘭粘竿拜唐阿之例每月賞銀二兩所有兵

丁人等賞銀若即支給恐其耗盡應請於四

月置辦行裝之時再行頒發至扈從之滿漢

文官本衙門各有津貼應較侍衛章京之例

減半各賞銀三十兩筆帖式博士天文生各

賞銀二十兩文武官員。如有願借俸銀者。各賞借一年正俸。作為二年扣還。其別有扣項者。酌量展限坐扣。至扈從之滿漢文武大臣。向無賞賚之例。今蒙恩旨。併議請各賞借二年正俸。作為四年扣還。王貝勒貝子等。如有願借俸銀者。請各賞借一年正俸。銀作為二年扣還。得旨依議。以武備院卿傅拉那為鑾儀使。丁亥祭。

先師孔子遣和親王弘晝行禮。諭軍機大

臣等。據管理淮關事務伊拉齊奏稱。淮安關之分口。地名常山。坐落在宿遷縣境內。該口岸有裹頭閘一座。相去里許。人烟稠集。貨船不便赴該口裝卸。向來分役在於裹頭閘稽查。仍赴常山口報納錢糧。屢奉行查有案。並非近年新設。今有地棍季子聖等。阻撓惑眾。出言私設口岸。不令商船完稅。凡值大小官員經過。動輒聚黨數十人。具控關員滋擾累民。殊乖政體。從前眾興集倪之光等。阻撓抽

收糧稅。經前任監督唐英奏明。奉旨令督撫飭令地方各官照看。勿任奸民阻撓。滋擾在案。今季子聖等藐視功令。把持關務。實非關員所能彈壓等語。夫民俗刁詐。藐法妄行。如此地方官自有整飭之責。爾等可寄信與德沛。令其會同伊拉齊辦理。戊子祭。

大社

大稷

上親詣行禮。諭理藩院。今年朕往盛京恭謁

祖陵。給與隨從官兵半路更換馬匹。據議將內扎薩克五處蒙古等收養軍需所用馬駝。送至諾諾格地方備用。其更換馬駝。照常交與伊等帶往游牧地方看守牧養等語。扎薩克蒙古等世受國恩。王台吉以下至所屬人等。無不竭誠効力。自軍興以來。覓買馬駝。凡一切遞送差役。俱無遲誤。勞績懋著。所餘馬匹。交與伊等收管牧養。亦屬小心。此次更替馬匹。若仍交伊等照前收養。所屬蒙古人等。不

無額外賠補之累。今已取用。著加恩將此項更替馬畜。及游牧地方餘剩駝隻牝馬。即賞與伊等。以為生業。俟伊等充足。遇有需用馬匹牲畜之時。動用錢糧採買。即伊等感恩助用。亦無不可。○己丑工部議准前任湖廣總督孫嘉淦疏稱。荊門州鄭家潭隄。以該牧張鎮原築草率。乾隆七年秋汛衝決。經叅勒賠查潰口緊要。應先動項修築。事竣勒還從之。○以廣東虎頭門水師副將劉大勲為廣東碣石鎮總兵。○庚寅以舉行仲春經筵。遣官告祭奉先殿。

傳心殿

上御文華殿。講官暨侍班之大學士九卿詹事等。行二跪六叩禮。分班入殿內序立。直講官四人出就講案前。行一跪三叩禮。復位。直講官三泰。任蘭枝。進講論語子曰性相近也。習相遠也。一節講畢。上宣御論曰。子貢之贊孔子曰。夫子之文章。可得而聞也。夫子之言性與天道。不可得而聞也。若是乎。夫子之言性誠不可得而聞乎哉。乃夫子之言性。

則曰。性相近也。習相遠也。以性對習。而近之與遠。亦不過百步五十步之分耳。何其視性之卑耶。蓋嘗讀中庸而知其說矣。天命之謂性。性相近也。率性之謂道。修道之謂教。習相遠也。此猶未指夫知誘物化之私而言。而其視性之近乎天命。為已遠矣。故易曰。成性存存。道義之門。此即率性修道之謂也。詩曰。穆穆文王。純亦不已。此即性即天命之謂也。而程子動箴亦曰。習與性成。聖賢同歸。誠能遏人心。即所以存道心。不遠復。毋祇悔。又何遠近之殊耶。講官暨侍班官跪聆畢。興直講官索柱蔣溥進講。易經天地養萬物。聖人養賢以及萬民二句講畢。

上宣御論曰。天地養萬物。而不能不藉后之裁成輔相。聖人養萬民。而不能不賴賢之時亮天工。是以周公躬吐握之勞。故有圖空之隆。齊桓設庭燎之禮。故有匡合之功。寡區至廣也。生民至衆也。以一人之心志耳目御之。其散精勞神而乞無成功。亦不待燭照數計而窺卜矣。自古聖王勞於求賢。逸

於得人。然得人始逸。而求賢則勞。毋論求之不以道。得之不以實。所得非其人。所求非其賢。而天下之萬民。不可以一日而不養。為君難。蓋誠乎其難矣。講官暨侍班官跪聆畢。大學士張廷玉等奏曰。

皇上盡性達天。任人圖治。挾精微之蘊。而允執厥中。極教養之方。而兆民允賴。

聖訓所示。天德王道。一以貫之。臣等不勝欽服。奏畢。諸臣出。就拜位。行二跪六叩禮。禮成。

成。

上還宮。賜講官及侍班官等宴於協和門。○

辛卯。

上詣暢春園問

皇太后安。○幸圓明園。○壬辰。予內閣學士兼禮部侍郎李紱。以病致仕歸里。尋陞辭。

上問有所欲陳否。紱以慎終如始對。賜詩嘉之。○癸巳。諭大學士等。昨因考選御史。試以時務策。杭世駿策稱。意見不可先設。畛域不可

太分。滿洲才賢雖多。較之漢人。僅什之三四。

天下巡撫。尚滿漢參半。總督則漢人無一焉。

何內滿而外漢也。三江兩浙。天下人才淵藪。

邊隅之士。間出者無幾。今則果於用邊省之

人。不計其才。不計其操履。不計其資俸。而十

年不調者。皆江浙之人。豈非有意見畛域等

語。國家選舉人才。量能器使。隨時制宜。自古

立賢無方。乃帝王用人之要道。滿漢遠邇。皆

朕臣工。聯為一體。朕從無歧視。若如杭世駿

之論。必分別滿洲漢人。又於漢人之中。分別

江浙邊省。此乃設意見分畛域之甚者。何所

見之悖謬至此。況以現在而論。漢大學士三

缺。江南居其一。浙江居其二。漢尚書六缺。江

南居其三。侍郎內之江浙人。則無部無之。此

又豈朕存畛域之見。偏用江浙之人乎。至於

用人之際。南人多而間用北人。北人多而又

間用南人。督撫之中。有時滿多於漢。或有時

漢又多於滿。惟其才。不惟其地。亦因其地。復

量其才。此中裁成進退權衡皆出自朕心。即左右大臣亦不得參預。况微末無知。之小臣乎。且國家教養百年。滿洲人才輩出。何事不及漢人。杭世駿獨非本朝臣子乎。而懷挾私心。敢於輕視。若此。若稍知忠愛之義者。必不肯出此也。杭世駿著交部嚴察議奏。尋議。杭世駿懷私妄奏。依溺職例革職。從之。戶部議覆兩江總督宗室德沛疏稱海州贛榆三屬漕糧前任督臣慶復以地係濱海土性不

宜米穀小民苦於購納。題請折徵解部。經部議仍令民折官辦。請嗣後於海州糟糧粳米每石徵銀一兩二錢。贛榆粟米每石徵銀一兩。遇時價過昂。另題請旨。或年豐價賤。徵有贏餘核抵下年徵額。耗米一項亦應照數徵收等語。所奏紛繁恐官吏捏報滋弊。應照議定江西瀘溪縣糟糧之例。各依時價採買。先動藩庫銀。及時購辦兌運。隨示諭里民如數歸款從之。命御史祿謙在阿哥書房教習。

清書行走。引見中書胡寶瑔等十三員。得旨。胡寶瑔。涂逢震。葛德潤。愛必達。六十七。吳達善。丁廷讓。永世高。誠。吳日燦。俱著記名。歸於現在記名人員內。以御史用。沈澗著發往江南交與該督撫酌量題補。甲午遣官祭先醫之神。諭今年秋間朕恭謁

祖陵。所有內外本章。按日呈覽。部院臣工摺奏。隨本進呈一切辦理事宜。與朕在京無異。惟是外省督撫提鎮等奏摺。向來俱係差人齎奏。此等齎摺之人。道途遙遠。萬一馬驟疲乏。風雨阻行。未免稽遲時日。著自起鑒之日為始。凡有外省奏摺。俱齎赴在京總理事務王大臣處加封。交內閣隨本呈送。行在候朕批示。隨本發回。仍於總理處交付齎摺之人。祇領該部。即傳諭該督撫提鎮等知之。吏部議處大學士鄂爾泰。將行止不端之己革副都御史仲永檀濫行奏薦於伊子己革詹事鄂容安不能嚴加管束。致向仲永檀商量密

奏之事應照例降調得旨。鄂爾泰所有加級紀錄俱著銷去。抵降二級。從寬留任。戶部議准。兩江總督宗室德沛奏稱。江西吉南贛三府距淮揚道路寫遠。灘險難行。兼之乾隆七年歉收。民食維艱。所有上年奉撥運濟淮揚倉穀八萬石。請停撥運。即留為本地之需。得旨。依議。速行。禮部議覆。浙江學政彭啓豐條陳。浙省考試事宜。一。浙省歲科考試生童舊例。摘錄所習本經。令作講義。即與四書題一場。並試復於本經外之四經。摘取發問。令生童依義條對。另試一場。其未能明晰者。生員不取優等。童生不拔前列。惟生童講義大都就題敷衍。少有闡發。不若條對諸說。各有成義。於經學淺深。尤灼然易覩。况條對講義兼試。亦屬繁複。應如所請。嗣後仍試條對。停其考試講義。一。商童應試。專以商結為憑。恐招致冒籍。假充子姪冒考。致生頂替代倩諸弊。應如所請。遇有濫保甲商。依不應律嚴

治一考試。歲貢向係通省同題。易滋宿構。應如所請。嗣後將所試經書判語隨時酌定。一。鄉試對讀五等生員。多有不敷。應如所請。將四等武生兼用。即免其錄遺。准入武場鄉試。至請武童按數定額。商童應試。令該縣取結。申鹽道錄送。與生員卷面禁寫廩增附之處。均毋庸議。從之。以前任安徽巡撫張楷為內閣學士兼禮部侍郎。調福建巡撫。劉於義為山西巡撫。命前任湖廣總督孫嘉淦署福建巡撫。仍俟審題。謝濟世一案完竣。再赴閩省。予故廣西鎮安府屬小鎮安土舍岑池鳳之孫岑金佩襲職兼巡檢銜。乙未。孝康章皇后忌辰。遣官祭。孝陵。都察院奏。湖南巡撫許容題。叅糧道謝濟世一案。先經署湖南糧道倉德申詳漕運總督顧琮文內。稱陞任四川藩司王玠赴任。過岳。攜帶湖南藩司張琛書函。並長沙府詳冊。囑令改換文移等語。今據顧琮咨院。應據

實奏聞得旨。這所奏情節。著交與孫嘉淦。秉公據實。一併審理具奏。原札詳冊併發。○予故貴州古州鎮總兵王友詢祭葬如例。○丙申。

上御勤政殿聽政。諭大學士等。據奉天府府尹霍備奏稱。奉天一省。山海交錯。幅員遼濶。止有一府十三州縣。牧令之外。並無佐貳協辦。一切應查辦之項。事屬紛繁。非本任所能兼顧。又無閒員可以差委。請於候補候選知

州知縣人員內。揀選四員來奉委用。俟著有勞績酌量題補等語。著照該府尹所請。交吏部於候補候選州縣人員內。揀選帶領引見。

奉天府府尹霍備奏。奉天宗學向歸府尹稽察。恐府尹事繁少暇。於宗學無裨。奉天府府丞專司學政。頗有餘閒。以之稽察宗學。必能實心考覈。請即以現任府丞臣陳治滋為始。著為例。得旨。允行。下部知之。以編修觀保充日講起居注官。賞卹南河下埽飄殁。

之山安營兵丁傅綸。孫美如例。○丁酉。上詣暢春園。問。

皇太后安。○戊戌。蠲緩陝西葭州上年分雹災。廣東潮陽饒平兩縣上年分旱災。額賦有差。並分別借貸。○己亥。

上詣暢春園。問。

皇太后安。遣官祭。

闕帝廟。遣官祭昭忠祠。○命舉堪任河工人員。諭大學士等。江南河防水利。現在興工。

關係緊要。國家不惜數百萬帑金。期為地方久遠之計。倘錢糧不無虛冒。工程不能堅固。則真安民生之舉。適以飽官吏之私橐。向來河員樂於興工。希圖濫銷。前車可鑒。現今督撫止派道員數人督率辦理。但該道府兼有地方之責。未免查核不周。以致專謬工員。多滋弊竇。於巨工無益。著九卿於候補候選道府內。各將所知家道殷實。才可辦事之員。照例舉出。交與吏部帶領引見。發往江南。令督

臣河臣分別派委與現派之道員一同辦理
工務如果實心任事該督等酌量題補倘有
侵剋貪劣等情除按律治罪外仍將保舉之
人照例處分 戶部議准山東巡撫晏斯盛
疏稱青州府新設滿營添兵二千餘名大小
男婦不下萬餘口歲需米一萬七千六十石
有奇原於府貯穀內按月碾米支給扣價存
庫秋收買還惟是青州僻處偏隅產米無多
買補未便請於附近青州之有漕州縣內改

卷一百八十四

五

徵運京黑豆一項量撥一萬七千餘石仍徵
粟米運為青州兵糈青州為產豆之鄉即將
青州穀價於本境買豆補數依限隨漕起運
從之 又議准廣西巡撫楊錫紱疏請粵西
四十九土司夏秋二收分數與流州縣一體
入疏題報從之 禮部議覆署理廣西按察
使李錫泰奏稱粵西苗瑤易惑其處僧道祈
禳鑄有木銅錫諸印往往結黨營私為害地
方應如所請勅下撫臣除有部劄僧道外其

餘鈐記概行飭禁違者重懲從之 寧古塔
將軍鄂彌達疏報永吉州白都納三處民人
首出餘地八萬五千四百畝有奇 準噶爾
部人阿必達鄂勒哲依各率屬來降賞給安
插如例

卷一百八十四

五

大清高宗法天隆運至誠先覺體元立極敷文
奮武孝慈神聖純皇帝實錄卷之一百八十四

大清高宗法天隆運至誠先覺體元立極敷文奮武孝慈神聖純皇帝實錄卷之一百八十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲副都統世襲騎都尉軍功加七級隨帶加一級尋常加二級軍功紀錄一次世襲柱

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級世襲話內大臣戶部尚書鑲藍旗滿洲副都統軍功紀錄五次

尋常紀錄十四次世襲瑤瑤經筵講官太子少保工部尚書紀錄六次臣曹振鏞等奉

教修

乾隆八年癸亥二月庚子諭江南地方緊要

且現在賑卹河防尚多未竟之緒更須加意經畫德沛未能勝任著來京候旨兩江總督員缺著尹繼善前往署理並協同河道總督白鍾山料理河務即馳驛赴任會同大學士陳世倌總督高斌侍郎周學健將現在定議辦理之處悉心講論再加商酌定局後陳世倌高斌周學健俱各回任又諭曰御史胡定參奏湖南巡撫許容一摺朕細細覽閱若許容懷挾私心誣參屬員款蹟皆虛則許容

有玷封疆之任自有應得之處分倘胡定因謝濟世曾為御史有心袒庇或係彼此交結暗通信息亦未可定若止係風聞則謝濟世被參未久京師傳聞不能如此迅速亦不能如此詳盡何以胡定摺奏竟若目覩者然此案關係封疆言路必須徹底審明辨白是非以示懲儆著侍郎阿里衮馳驛前往會同孫嘉淦秉公察審具奏胡定著帶往看審○又諭軍機大臣等湖南岳常道倉德揭報私書一案係由顧琮咨送都察院轉奏者夫據詳轉咨固屬成例而顧琮身為大臣於此等事件自應摺奏即轉咨之後亦應奏聞乃伊並未奏及若非畏懼許容即係瞻徇謝濟世矣可寄信中飭之和碩莊親王允祿等議奏查武舞之干戚干上有字其字祇五種而分八佾必不齊一又多互異考之太常皆不能對必係原有八樣年久遺失以訛傳訛今請訓定奉硃筆改定雨暘時若四海永清倉箱

大有。八方救寧。奉三永奠。得一為貞。百神受職。萬國來庭。○大學士鄂爾泰等議。覆署直隸總督史貽直奏稱。永定河擁挾沙泥。所至輒成淤墊。下壅上決。勢常相因。向於南北兩岸。分建滾水草壩。俾汎漲一至。即能減洩。疏消。既免潰漫之虞。兼可勻減泥沙。於河身下口。均有裨益。應於上年添建之雙營等壩外。南岸之清涼寺。張仙務二處。添建三合土滾壩二。北岸之五道口。添建草壩一。於汎前竣工。使伏秋之汎漲多洩一分。則下注之泥沙亦即勻減一分。河身惟行正溜。餘水悉令旁溢。即係從前故道任其散漫。不加迫束之意。而壩外皆有自然之引河。重繞之隄障。於民田廬舍。全無損礙。應如所請。從之。○辛丑。停青海番民馬貢。諭大學士等。據管理青海夷情副都統宗室莽古賚奏。玉樹族百戶楚瑚魯台吉之子達什策令。稟稱所屬番人米拉等二十五戶。被郭羅克賊番搶奪馬牛牲畜。餬口

無資。所有應納馬貢。求暫免二三年。俟元氣稍復。照例輸納等語。番民寒苦。深可憫惻。所有每年應納馬貢。著寬免五年。○戶部議准。山東巡撫晏斯盛疏稱。濟寧州修築蜀山馬場。二湖隄身。圍占有糧地三十頃二十五畝。有奇。請自乾隆七年為始。豁其額賦。並動項酌給地價。從之。○又議准廣西巡撫楊錫紱疏稱。雍正九年。象州報墾下則荒旱地塘十頃四十六畝零。勘係磽瘠。請照桑麻地稅升輸。從之。○緩江蘇續報上年水災之鹽城高郵泰州甘泉興化寶應贛榆揚州八州縣衛乾隆五六年以前舊欠漕項銀米。○旌表守正被戕之江蘇桃源縣民黃自珍妻顏氏。○壬寅。上詣暢春園。問皇太后安。○舉行乾隆七年分大計。奉天有疾官二員。不謹官一員。年老官四員。江南河員年老官二員。有疾官一員。浮躁官一員。河南不謹

官一員。年老官二員。有疾官一員。河南河員。浮躁官一員。山東河員。才力不及官一員。山西不謹官三員。年老官一員。有疾官一員。才力不及官三員。浮躁官二員。廣東不謹官四員。罷軟官二員。年老官四員。有疾官一員。才力不及官三員。浮躁官四員。廣西不謹官二員。罷軟官一員。浮躁官一員。才力不及官四員。年老官二員。有疾官一員。雲南不謹官三員。年老官七員。有疾官二員。才力不及官二員。浮躁官一員。貪酷官一員。貴州不謹官二員。年老官一員。有疾官一員。才力不及官三員。分別處分如例。○調正黃旗漢軍副都統巴爾品。為正黃旗滿洲副都統。以鑲藍旗漢軍叅領王廷臣。為正黃旗漢軍副都統。正紅旗滿洲副都統拉布敦。赴軍營。以護軍叅領雅圖。為正紅旗滿洲副都統。○癸卯。命舉宣諭化導使。諭大學士等。朕君臨天下。愛養黎元。拯災卹困。夙夜孜孜。惟思去其顛危。登之

衽席。並望風俗茂美。人心淳樸。各葆天良。以召和氣。夫然而朕責始盡。朕心始慰。上年上下江夏秋被水。朕恫瘝念切。蠲賑頻施。特命大臣前往。會同該督撫等。加意撫綏。又令興修水利。整理河防。救目前之災荒。弭將來之水患。所費帑金。以千百萬計。而倉廩漕儲。遠近接濟。凡有關於民食者。莫不移緩就急。養欲給求。所以體

上天仁愛之心。盡父母斯民之道。亦既殫宵旰之經營矣。為士庶者。當知國家恩卹。已逾常格。務各安其本業。共勸勉為馴良。始無負朝廷勤恤民隱之至意。乃聞各屬災民。其實知感恩。靜待給賑者固多。而無知愚氓。有以查賑稍遲。聚眾強求者。且有並未遲緩。已得賑糧。仍隨眾扳號。希心分外者。更有狡猾之徒。本籍賑過。即攜眷逃荒。復赴隣境留養。及至下月。又奔回本籍領賑者。甚而本非無業貧民。串通胥吏。混入賑冊。或依藉聲勢。冒濫與

賑種種情弊。層出不窮。且沿途呼索。男女混雜。喧譁悍潑。罔顧廉恥。而各屬生監。藉有貧生一體賑卹之例。即家非貧窶。亦冀邀恩。所求不遂。即從中生事。煽惑阻撓。身列衣冠。恬不知檢。士習民風。澆漓若此。其有關於人心風俗。實非淺鮮。夫蠲除賑貸。原屬國家之恩澤。各屬災民。平時不知為未雨綢繆之計。及遇荒歉。復不思刻苦營生。竟若仰食公家。可忘儉歲。甚且不以荒歉為可憂。而以荒歉為可幸。恃特沛之恩膏。啟無窮之希冀。本計不敦。驕風日熾。勢將何所底止。習俗之漓。莫此為甚。朕思德惟善政。政在養民。而厚生猶宜正德。安集之後。化導為先。其地方有司。雖有教民之責。而刑名錢穀。政務殷繁。難以遍及。即學政教職。衡文課士。亦不能兼理民事。必特設專員。巡行整飭。實心化導。方有裨益。著大學士等於翰林科道內。揀選品行端謹。通曉民事者四員。授為宣諭化導使。馳驛前往

江南。以二員整理下江之淮。徐。揚。海。四府州。以二員整理上江之鳳。潁。泗。三府州。令其親歷各屬鄉城。計其道理。巡行一遍。週而復始。所至之地。傳齊紳衿士庶。宣講

聖諭廣訓。反復開導。使知驕詐之習。不難懲之以法。念此無知之輩。皆屬赤子。朕心有所不忍。務在感發其天良。鼓動其廉恥。俾明於大義。務本安分。則草其頑情。而薄俗可以還淳。倘如此開導。而猶有怙過不悛者。即加以以罪。夫復何辭。奉差官員。毋得視為具文。虛應故事。其儀制文移。悉照各省學政之例。給與欽差官員關防。道府以下。凡有關於宣諭化導者。聽其節制。其餘一切地方事務。不得干預。以專責成。倘地方有司。恃有宣諭化導使。遂自怠其教民之職。准宣諭化導使會同該督撫題參。○以翰林院侍講鄧時敏。刑科給事中倪國璉。為上江鳳。潁。泗。三府州宣諭化導使。以編修涂逢震。山東道監察御史徐以

升為下江淮。徐揚海四府州宣諭化導使。予故雲南楚雄鎮總兵柳時昌祭葬如例。豁湖北襄陽宜城棗陽穀城四縣衝坍民屯地共三十七頃一十二畝有奇。額賦除雲南省嵩明霑益平彝路南江川思茅永平姚州順寧景東蒙化麗江蒙自等府州縣捏報開墾及衝壓民屯地共三百七十四頃六十五畝有奇。並改蒙自縣誤報上中二則開墾民田一十三頃六十畝零為下則額賦。○甲辰諭曰鑒儀衛衙門到處扈從為朕切近隨行之員。向無養廉。其鑒儀使二人著將伊本衙門滋生銀每年賞給二百兩。○吏部議處江蘇學政內閣學士劉藻於高郵州劣生朱愷古寶應縣劣生劉炯等聚眾冒賑一案。平時不能化導。應照例降三級調用。因病回籍原任內閣學士劉師恕不能約束族弟劉炯致於委員查災之時挾制冒賑。應照例革職從之。○戶部議准調任福建巡撫劉於義疏

稱前撫臣王恕遵旨查革私添口岸有館頭等一十八處小口。部議再行確查。今查閩海一關延袤二千餘里。港汊繁多。皆可灣泊偷越其館頭等口原係專司稽查於商民無累。請照舊存留從之。○乙巳遣官祭賢良祠。○諭向來山西巡撫兼管提督事務劉於義辦理政務為有餘而整飭營伍非其所長著歸化城將軍補熙暫行兼管。○大學士鄂爾泰等議覆高斌周學健會奏朱子所輯小學一書始自蒙養為立教之本繼以明倫為行道之實終以敬身為自修之要於世教民心甚有裨補請將內廷所藏小學善本頒行直省刊布并於宣講聖諭廣訓之後切諭紳衿耆老廣為傳告俾生其慕善畏惡之心革其頑惰刁詐之習於災屬民人尤為有益至童生府縣試即請將小學與孝經一體命題試論一道院考覆試亦試小學孝經論一篇等語查學院覆試用孝

經小學論原係現行之例但近來學臣或有
不以小學命題者或有視為具文者嗣後應
令學政於覆試論務用小學命題凡府縣試
亦令於覆試時用小學命題作論一篇必通
曉明順者方許錄送學臣考試飭部令各直
省通行再查小學刊布甚廣所請內廷刊頒
之處毋庸議從之 前護理山西巡撫印務
布政使嚴瑞龍疏報平陽府屬之吉州大同
府屬之豐州衛鎮寧所朔平府屬之寧朔衛

懷遠所乾隆六年分共開墾民田荒旱地四
十一頃一十五畝有奇○以副都御史彭啟
豐為內閣學士兼禮部侍郎○副都御史劉
永澄以病請解任允之○以宗人府府丞彭
樹葵大理寺卿趙大鯨俱為副都御史○命
國子監祭酒開泰提督江蘇學政○浙江衢
州鎮總兵康華齡以年老不勝任命來京候
旨○命陝西固原提督永常回安西駐劄以
陝西肅州總兵豆斌為固原提督調西寧總

兵許仕成為肅州總兵以永昌協副將張世
偉為西寧總兵 蠲湖北襄陽棗陽宜城武
昌襄陽衛五州縣衛上年水災應徵額賦分
別借貸撫卹如例並緩漢川沔陽天門三州
縣未完乾隆六年分帶徵舊欠銀兩 緩山
東金鄉魚臺濟寧鄒縣滕縣嶧縣六屬上年
水災應徵漕米黑豆有差 蠲山東西由場
上年水災竈地應徵額賦有差 丙午
皇后千秋令節奉

皇太后懿旨停止行禮筵宴 諭據閩浙總督
那蘇圖奏稱閩省幅員遼濶戶口殷繁積貯
最為緊要從前議定各府廳州縣收捐監穀
共一百六萬四千石每石價銀六錢及五錢
四分監生一名捐穀二百石及一百八十石
不等與戶部收銀一百八兩之例相符計開
捐已逾三載而報捐之穀僅三十九萬石零
蓋因穀價昂貴與原定銀數大相懸殊是以
從事者甚少查康熙五十二年閩省捐監每

名止收穀一百二十石。未及三年。捐穀至百餘萬石。至今尚受其益。合無懇請將閩省捐監一名。收穀一百二十石。每石定價九錢。以符戶部一百八兩之數。其餘廩增附生捐監者。均一例分別辦理。所有福建生俊在戶部各省報捐之例。停止一年。俟捐有成數。再行酌議等語。閩省地方。山海交錯。產穀無多。轉運不易。不得不於平時豫籌儲蓄之道。著照該督那蘇圖所請。捐監一名。收穀一百二十石。每石定價九錢。其廩增附生。照此分別辦理。所有該省生俊在戶部各省報捐之例。著停止一年。俟捐有成數。該督撫奏聞請旨。○大學士鄂爾泰等議覆甘肅巡撫黃廷桂奏準噶爾夷使進藏熬茶事宜。一夷使進藏熬茶。各官兵沿途護送。請照上次之例。酌運四個月本色口糧。八個月鹽菜銀兩。逮到藏駐劄。請令川撫飭駐藏管糧員弁。會同該副都統及郡王等。照進藏數目。辦給四個月口糧。

如事竣不至東科爾貿易。即由卡回巢。有不敷口糧鹽菜。聽領兵之將軍侍郎等。酌議加增在藏辦給。一選派西寧鎮綠旗兵丁。前往哈濟爾邊卡。等候夷使。日期難以懸定。請令裹帶六箇月口糧。俾往返充足。一侍郎玉保帶領章京官員。自京前往西寧。候夷使護送進藏。事畢護送回巢。然後還京。請照例按品級支給衣服銀兩。至駐劄東科爾等候。即請照駐寧之例支給。一進藏滿洲官兵俸賞。應量加寬裕。請於官員賞給一年俸銀外。加借一年兵丁各賞銀三十兩外。再各借半年餉銀。回營後陸續扣還。一西寧鎮標派往哈濟爾等候夷使之馬兵三百名。路途遙遠。往返需時。請每名賞銀四兩。以整行裝。一夷使如不至東科爾貿易。其照管留藏之夷使官兵。必俟熬茶事竣撤回。所需口糧鹽菜及夷使留人應給口食等項。請照噶斯案內供支坐臺放卡之例。動支腳價。運送備供。一夷使如

不至東科爾。其應賞賚各項請將口糧米麵順便運送哈濟爾。並就近購買牛羊先賞一次。如賞過仍至東科爾。再於起程時賞一次。俟熬茶回日。又於青海附近處所賞一次。俱應如所請。查侍郎玉保。已蒙恩賞銀二千五百兩。無庸再給。如玉保等自西寧至噶斯。等候夷使回東科爾地方。亦應照例料理得旨。依議速行。○丁未。諭大學士等。福建南澳地方。甚屬緊要。現任總兵官李琨。於外海事務不甚諳練。臺灣鎮總兵官何勉。現已年滿。應回內地。即著補授南澳鎮總兵官。李琨著調補衢州鎮總兵官。其臺灣鎮總兵官員缺。著總督那蘇圖。於所屬總兵內。揀選一員。請旨調補。○戶部議准。前任湖廣總督孫嘉淦疏稱。郴州。桂陽州。礦廠。銅鉛夾雜。地非苗徭。尚可開燒。抽得稅額。併收買商銅。於鼓鑄國幣。均有裨益。從之。○順天學政林令旭。因病解任。命副都御史趙大鯨。提督順天學政。○蠲

湖北漢川潛江沔陽天門荊門江陵監利光化八州縣上年水災田地塘額銀七萬七千七十兩有奇。米九千三百八十一石有奇。沔陽荊州荊左三衛上年水災額銀二千三百三十兩有奇。并緩徵蠲餘及勘不成災額賦有差。○戊申。

上詣暢春園問

皇太后安。○戶部議覆甘肅巡撫黃廷桂疏稱。甘省茶政。未能疏通。請准民間以糧易茶。責成州判縣丞典史等員經理。各司庫貯茶封。令司茶各員按年分銷。如各司多寡不均。准其彼此通融銷售。均應如所請。其請設立印票。令商民領運之處。恐滋私茶夾帶之弊。應毋庸議。至乾隆七年以後新茶。應令黃廷桂核價另題從之。○準噶爾部人巴圖爾之妻鄂勒哲依來降。命賞給如例。發江寧隨夫安插。○己酉。戶部議准湖南巡撫許容疏稱。上年夏被水勘不成災各屬。應備次年平糶。請

於沅陵瀘溪二縣撥穀三千石。備永綏廳用。辰州府倉撥穀三千石。備乾州廳用。麻陽黔陽淑浦三縣撥穀四千石。備鳳凰廳用。俱暫存各該倉內。如次年米價平減。倉穀數糶。毋庸撥運。價昂則運赴發糶。其價仍還撥穀府縣秋成買補還倉。運腳於糶買贏餘銀內支銷。從之。○又議准調任山西巡撫喀爾吉善疏稱。文水縣三門九則人丁。於乾隆元年查造丁歸地糧之時。定以下下則輸課。其土著新編人丁。自應一體辦理。乃止將三門九則之丁。作為下下則。一切徭銀均攤入地糧。而土著新編等丁。復丁徭並列。並未明示開除。奸胥舞弊。日久相沿。請與三門九則之丁一體止留實存丁數。不另徵徭。從之。○命淮徐揚海及鳳潁泗之宣諭化導使。於麥熟後起身前往。○調湖南鎮筵鎮總兵段起賢為陝西涼州鎮總兵。陝西涼州鎮總兵王廷極為湖南鎮筵鎮總兵。○庚戌春分朝。

日於東郊。遣寧郡王弘皎行禮。○孝昭仁皇后忌辰。遣官祭。

景陵。○暫停江南牛稅。諭大學士等。上下兩江上年被水地方。已經漸次涸出。此時東作方興。正有資於牛力。查雜稅款內。有牛稅一項。雖為數無多。然以農民被災之餘。即減省雜費分毫。亦未嘗無益。著該督撫即飭被災地方官。將牛稅暫免一年。凡民間買賣牛隻者。但聽其自相論價交易。不許牙行從中需索。有司亦不得視為細事。一任胥吏侵蝕中飽。該部即速行文傳諭知之。○又諭軍機大臣等。朕覽劉於義等查奏德沛閩浙總督任內提用藩庫鹽道庫並罰捐銀兩。其開列應行追繳與不應追繳之處。未為允協。可寄信伊等。令其按照清摺內粘籤處。分別辦理。除不應追繳外。其餘照例行令繳還歸款可也。○戶部議准。黑龍江將軍博第等疏稱。呼蘭溫得亨山。並都爾圖一帶。地廣土饒。水草佳美。

請安設官莊五座并乾隆六年十二月內添設五座俱於額丁內挑領催一名管理錢糧一體給發從之○工部議准署直隸總督史貽直疏稱青縣李家鎮運河東岸因上游淤嘴突出挑溜西射回衝東岸河崖漸坍應將東岸淤嘴裁切順流西岸添建挑水草壩接修雁翅以為保護從之○調廣東降調知府屠用中廣西提標草職叅將劉寬赴部引見○辛亥吏部議准廣西巡撫楊錫紱疏請改

議裁之陽朔縣伏荔市巡檢設遷江縣平陽墟為理猛巡檢置攢典兵役如額從之○戶部議准前任安徽巡撫張楷疏稱乾隆六年由和州撥運靈璧縣濟糶米船於大江遭風漂沒今准部咨確查於儀徵地方遭風屬實請將漂沒米六百七十石照例豁免從之○又議覆貴州總督兼管巡撫張廣泗疏奏黔省辦解京局鉛觔事宜一應解寶泉寶源兩局黑白鉛觔請分上下兩運依限解交於當

年十月起解者於次年三月到部於當年四月起解者於九月到部解員逾限照例題叅應如所請一蓮花砂硃等廠礦砂既薄食物俱昂鑪民無利可圖人散鑪停出鉛日少請將每觔一分有零原價定為一分五釐一面收買一面發運應暫如所請如遇產旺鉛多即據實酌減一黔省加運鉛觔由威寧發運者二十餘萬運腳維艱請照滇省題請運銅百觔每站給運腳一錢二分有零之數一例

給發查滇撫張允隨所題經部咨行令確查尚未題覆今應令張廣泗一併會議具題再議一蓮花砂硃二廠鉛觔均由威寧一路雇運因滇銅擁擠必須陸續起解額設人役不敷稽查每有腳戶偷竊等弊今請於威寧所屬之威家灣並畢節永寧二屬共設書役十三名逐站註單遞交其工食於水腳節省項下動支應如所請一黔省起運俱於重慶雇覓大船載至漢口更換每有壞船之患請照

運銅之例。製備蔴繩浮槓。以備沈溺標記。應如所請。其繩槓價銀若干。如沿途無用。將來作何報銷之處。均未詳晰聲明。仍令查明報部。○黔省辦運京鉛。係沿途雇募船隻。每多勒捐耽延等弊。請令各地方官協同雇給。責成行戶具結承保。應如所請。至請將他省黑白鉛觔。題請分解。查廣西產鉛。已題定留供本省鼓鑄。湖南鉛礦。開採多寡。尚難豫定。所有京局需鉛。應仍令張廣泗照數採辦。依限解部。從之。○禮部奏。本年三月初九日。屆行耕藉之期。禮節周詳。儀文繁複。行禮時更衣數次。今歲閏逢孟夏。節候既遲。餘寒稍重。請照乾隆五年之例。暫停親耕。遣官致祭。先農壇耕藉。令順天府照各直省督撫之例辦理。從之。○草職禮部尚書咸安宮効力行。走趙國麟。年老有病。加恩准其回籍。○壬子。戶部議准。浙江巡撫常安題覆。紹興府屬之錢清場。西興各園。乾隆六年被潮衝沒入海。

各則田地蕩畝。共三百七十五頃九十七畝。有奇。請自乾隆六年為始。均予豁免。從之。○兵部議准。署直隸總督史貽直疏稱。馬蘭鎮為

陵寢重地。差務殷繁。額兵無多。所有餘丁二百名。請仍留防護。未便如提臣塞楞額原奏議裁。從之。○癸丑。諭大學士等。向來

先農壇親祭。始用中和韶樂。遣官則同小祀之例。不用中和韶樂。查

朝日

夕月等中祀。雖遣官仍用中和韶樂。但不飲福受胙而已。朕思國之大事在農。

先農宜在中祀之列。此次遣和親王恭代。即著照

朝日

夕月等壇之例。用中和韶樂。永著為例。○戶部議准。浙江巡撫常安疏稱。江山縣額徵南米一千九百二十三石零。坐撥楓嶺營及衢

州鎮標兵糈。嗣因關支路遠。前督臣郝玉麟題請每石折銀一兩。至今分款輸將。民以為病。請自乾隆八年為始。將南米折徵銀。併入地糧徵收。其楓嶺等營。仍照例給發兵糧從之。○又議准貴州總督兼管巡撫張廣泗疏稱。省城官發水銀價值。上年陸續加至四十兩。其時較市價尚平。商販樂於爭買。今市價既減。商販漸少。請仍減銀四兩。以符原值從之。○禮部議准。山西按察使張元咎奏稱。監生因事斥革。往往易名重捐。久之故態復萌。無所不至。請將從前有易名重捐者。俱令自首繳銷。免其治罪。如有隱匿。以違制論從之。○甲寅

上詣暢春園。問

皇太后安。○前鋒統領奏報點閱本營軍器。並無缺少。得旨。知道了。嗣後再遇點閱前鋒營軍器之時。著會同領侍衛內大臣等。一同閱看。○緩山東西由場。上年分水災竈地蠲餘

額賦。分年帶徵有差。○予安徽和州大江淹斃湖北幫漕船水手黃耀宗卹銀如例。是月欽差大學士陳世倌總督高斌侍郎周學健會同河道總督白鍾山覆奏御史金溶條奏。石林口合龍之後。來歲伏秋汎漲。黃河大溜。必仍北趨。可慮者一。查石林迤下北岸灣曲迎溜之處。業已開挑引河。溜歸中泓。以刷河身。大溜已遠埽工。不致北趨為慮。又稱石林口堵塞。時係冰凍土凝。春融土解。可慮者二。查上年董築之時。橫卧大埽。直入河底。以上層層加築。今屆春仲。並無疎虞。又稱黃水側注北岸。河內南岸日淤。如黃村口等處。在堪虞。可慮者三。查黃村四壩。上年並未過水。將來石林埽工。日漸淤墊。溜趨南岸。黃村等處。並無可虞。惟韓家塘被黃水汕刷。漸成河形。應加意防護。又稱石林口既開之後。黃河趨石林者十之六七。趨正河者十之三四。徐州一帶正流。平緩淤高。正河下流。未必深

暢可慮者四。查石林口合龍後，黃河已歸正流。徐州一帶水深一丈八尺不等。正河已屬深通，均無可慮。得旨：覽奏，稍慰朕懷。陳世倌、高斌等奏：江南賑務，淮安、揚州、徐州、海州各屬汰過重冒共一十五萬餘口。鳳陽府屬之宿州、靈璧、潁州府屬之阜陽、蒙城、汰過重冒共二萬五千餘口。其遺賑及聞賑來歸者，亦節次添補。現在猶有增刪。臣等飭屬妥辦，俾無濫無遺，並不使借名滋擾。得旨：所奏俱悉。陳世倌、高斌等奏黃河北岸自石林口至蘇家山數十里，向無隄岸。蓋因黃河自入徐州府境，南北兩岸山勢緊束，河面既窄，加以汎漲水盛，恐至下游受險。而徐州府治正當衝溜，尤為可虞。是以向來於北岸李家樓以下數十里，聽其漫灘過水。於南岸毛城鋪設壩，下疏引河，分洩盛漲，以殺河勢。俾徐郡城池得保無虞。現在石林漫口堵築完竣，埽工堅固，毛城鋪設壩引河隨時啓閉，宣洩合

宜，無再應施工之處。得旨：所奏俱悉。陳世倌奏：臣沿河查勘至徐州府石林口埽外之水，高於內水七尺有餘。又秫稻之埽，每丈約蟄陷五尺，恐難禦風浪。又觀音堂、陳家樓樓子集等處溝槽甚多，恐汎漲漫入。現雖已築月隄，離壩稍遠，仍擬緊貼埽壩添築土餞一道，以為內護。溝槽悉行填堵，並於對岸王家莊挑引河，勿使逼溜北趨。又石林迤東韓家塘漸成河形，應加埽防護，其對岸沙家塘淤沙挺出河心，急應挑切。臣隨至上江逐勘。上江之宿州靈璧、虹縣、五河等處地勢低窪，一遇大水之年，黃河異漲，從毛城鋪、王家山等處減壩放下，猶慮不足宣洩。今議將天然二壩改為深水石壩，放水入江。工竣之後，如果宣洩寬暢，下游地方無礙，則宿靈等州縣之水當再設法疏導，使水消地涸。至臨淮縣城擬遷縣西二十里為鳳陽府附郭首邑，下江串場河各港口距海俱有一二百里，口門錯

雜交互中有間段淤阻之處此係高寶等七州邑諸水分流歸海要道臣即往高寶一帶查勘至雲梯關海口由海州沐陽勘至鄒滕將上下情形勘畢之後即行回京得旨卿可俟尹繼善到清江浦會議定後再來已有旨了前任兩江總督宗室德沛奏淮揚兩屬下河田地村落俱有圩岸向係民修因年久殘缺復遭衝坍民間貧富不一彼牽此制不能全復其舊必須官為督率勸諭奉行今地方官賑務殷忙又恐顧此失彼應另派丞倅率領佐雜諭令各鄉保公同妥議就村落田畝形勢分認於農隙時興築其實有民力不敷者依築官河官隄例官給一半工價一體興作仍令按年加修俾圩外之水束之歸槽圩內之水岸之使出得旨知道了江蘇巡撫陳大受奏江南未涸地畝其積水寸餘者現飭督賑各道員諭令趕種最早之稻即於賑項內買給籽種至各處飢民間有竊取之

事亦必分別懲治得旨是諸凡留心妥酌為之又奏淮安泰州通州分司所屬鹽場米價昂貴窮竈艱食臣於淮揚賑糧內劃撥三萬石以備各場平糶得旨所奏俱悉江南河道總督白鍾山巡視南漕御史金溶奏南旺大壩向例俟南漕已抵臺莊始行開放舟楫通行今臨清板閘外有河南撥運江南賑米船一百八十餘隻繼有東省碾運臨濟二處倉穀十萬石截留漕米五萬石均須運往江南充賑臣等將開壩日期畧為變通俾免擁擠阻滯即南漕入境亦得遄行得旨所辦甚妥知道了白鍾山又奏籌辦工程物料事宜一料物宜嚴查杜弊酌於南北兩岸設循環號簿填註收用物料飭該管文武盤驗外復委幹員於料船必經口岸驗量核對遇修工段更查其丈尺以杜混冒一土方宜多為挑積除隄工卑矮之處例築子堰復飭屬酌定應挑方數多為堆積其險要埽壩處所

仍於應積額土外。廣積土方。以備要需。湖
水宜豫籌宣洩。高寶諸湖。上承洪湖之水。臨
湖隄岸。俱設有出水港口。現在諸湖充盈。當
飭屬於各港口。疏濬深通。將湖水酌量開放。
一遇洪湖減水。自可容納。以免下游地方驟
漲。葦柴宜酌量派運。徐屬地方屢歉。例用
秫稻。勢難採買如數。當飭屬將葦蕩右營額
柴一百五萬束。分派徐屬運用。可以少辦秫
稻。並可留為民間炊爨之需。得旨。所辦俱妥。

知道了。漕運總督顧琮。巡視南漕御史宗
室都隆額。奏。上年兩江被災。截漕濟賑。被災
軍丁。均沾賑卹。冬春雪澤過大。柴薪昂貴。今
減歇船丁。全賴一半月糧。臣酌令糧道。於被
災衛分內。查明應給之丁。先行給發。其未被
災丁船。俟題後再給。得旨。是應如此辦理者。
○兩淮鹽政準泰。奏。今春當雨雪積寒之後。
鹽花不起。近今甫得煎曬。而糧草又復價昂。
竈戶乏力。當飭分司場員。查明不在災賑之

貧竈。設法借給口糧。勸諭上緊煎曬。並將舊
存場鹽。儘數出場。以濟民食。得旨。好。汝能辦
此也。○安徽巡撫喀爾吉善。奏。安省留養災
民。現宜咨送回籍。當被水逃避時。房屋多被
衝圯。應先期開會各原籍。查明給銀修葺。並
各給一月口糧。俾得資生。得旨。好。知道了。
護理河南巡撫印務布政使趙城。奏。豫省糧
價稍昂。無力農民。艱於播種。當飭示鄉民。每
畝許向地方官借銀五分。以為籽種資本。其
銀即在平糶項內動支。秋成以穀交倉。免其
加息。得旨。所奏俱悉。妥協為之。○陝西巡撫
塞楞額。奏。陝省上年收成。在七分上下。民間
益藏甚少。入春未免拮据。今酌議於去秋收
成較好者。准借倉糧十分之一。稍次者。准借
十分之二。減薄者。准借十分之三。至糶賣價
值。收成在七分以上者。准每石減時價五分。
收成六分以下者。准每石減時價一錢。委員
稽查糶借。得旨。所奏俱悉。甚屬妥協也。署

川陝總督馬爾泰奏郭羅克賊番肆劫四川提督鄭文煥遵旨前往松潘妥辦應派出口駐營示威官兵八百名土兵一千餘名駝馬礮位一併檄調口糧照例備辦得旨所奏俱悉○又奏準噶爾夷使由噶斯一路至東科爾貿易進藏熬茶其經過地方應嚴加防範沙州外境防卡之推莫爾圖地方為所過緊要之處請將彼處應徹防冬官兵俟夷使過後再行撤回口糧如例支給得旨知道了

○又奏夷使熬茶如徑由邊卡進藏則長途跋涉馬駝必致疲乏應將東科爾豫備之馬駝令護送夷使之侍郎玉保即帶赴邊卡以備更換如不由邊卡進藏仍至東科爾貿易則東科爾仍應豫備馬駝查滿洲官兵甫經出口馬駝尚屬肥壯止須於就近各鎮內照撥往邊卡之數摘撥一半以備易換得旨所辦甚妥知道了○四川巡撫碩色奏湖北巡撫范琛奏准買運川穀二十萬石嗣准咨令

在川碾米以利運載並為豫雇船隻茲復准江南督臣德沛等咨撥川穀二十萬石臣以江省濟賑孔亟亦照運楚之穀一例辦理得旨所辦俱妥嘉悅覽之○又奏報社倉糧石充裕共實貯糧一十三萬八千二百餘石得旨社倉之穀多多益善但不可強民耳○四川提督鄭文煥奏臣奉命赴松潘籌辦郭羅克肆劫一案該番通達各處隘口今一面知會管理青海夷情副都統莽古資並行威茂

泰寧兩協嚴飭防範一面檄調郭羅克正副各土目齊集黃勝關外親往宣諭查問如俯首知罪當取具永遠遵守番結并郭羅克隣近土目互結請旨分別究治否則即斟酌臨巢勦捕一切調兵籌餉事宜已次第咨商撫臣料理得旨慎重妥協為之○廣州將軍兼管粵海關事務策楞奏臣奉命以將軍兼管關務駐劄將軍衙門凡該關題報奏銷並吏書文卷一切查驗收支章程統請照閩省之

例歸將軍衙門辦理。其不敷員役亦請照閩關之例兼用旗營官弁得旨。是知道了。○署雲南總督印務雲南巡撫張允隨奏。安南境內匪賊節次情形。上年十一月十九日。據廣南營叅將胡大勇報。安南猛發賊首兵者列糾洪水賊余襄。攻劫安邊。牡丹土官翁卿約者良土官。將地方歸順交江。又結猛發銅廠匪賊郎袍。桂皮山野賊農廷結。楊元福。陸玉明。陸保等。至牡丹合為一處。計四五千人在者良造木城數座。聯絡駐劄。謀攻念臺。念臺土官翁貫。求救於保樂州。以保樂兵一千擊郎袍。敗還。三岐督鎮官策應。為洪水沙賊阻不能前。據開化鎮遊擊丁世功等報。交趾土目翁欽。翁貴。黃滾。壽等。擊敗安邊沙賊。劄營於賭呪河隔岸。土目鄭分聲言。南謎老嚴。猺人等寨。原係安南地方。今來勦賊。臣聞報飭屬曉諭。土目翁欽。懾服。燬營而去。本年正月。據廣南營叅將胡大勇報。牡丹者良叛目阮

兼澤翁卿。結賊郎袍。周文顯。聚眾數千。劄營於吉安湖。保樂土官翁督。及念臺土官翁貫。各帶夷兵共四千名。劄營於勾麻。為者良賊戰敗。賊復分兵破果箴。弄高。二寨。郎袍復過保樂營。截其運道。保樂兵却走。黎京差督陣官調高平。牧馬先鋒官閉士儀等。合兵八千討賊。督陣官旋陣亡。念臺破。交江王矣揚。劄念臺。招安原管地。復往安邊與翁貴戰。翁貴襲安北府。原據安北之黎忠君。退屯漫停。外此有八寶。東弓。漫布。泰番。鼎確。大同。猛薩。各賊首兵二三千人。清化邵郡公。扶童德世子。黎維祿。帶兵三千餘。抵山南府。安南國內。惟山西。山南。山北海。洋四郡。服黎京轄。其清化。廣化。二郡。為舊世子黎維祿所據。安廣。易安。二郡。為阮氏子孫所據。諒山。太原。二郡。為茹姓所據。興化。宣光。二郡。為交江所據。地分土荒。督令官調集鄉兵。俱以乏食逃亡。臣令文武等。於通交要隘。嚴加防範。得旨。所奏俱悉。

時時探信以聞。然惟慎我邊防為要耳。又奏。省會八營弁兵。應教習硬弓。自五六力以至十二力。就其材質強弱。分給教演。以半年為限。並飭各鎮協營一體增加責成。該管鎮將董率練習。復遴大員考驗賞罰。得旨。是實力行之可也。○貴州總督兼管巡撫張廣泗奏報。上年米價未甚平減。春間復恐加昂。當飭屬減價平糶。其糶價與買價懸殊者。並停買補。至冬雪春膏。均屬沾足。得旨。覽奏稍慰朕懷。但米價昂貴。為近來各省通病。不可不留心也。

奏案卷五十五

五十五

大清高宗法天隆運至誠先覺體元立極敷文奮武孝慈神聖純皇帝實錄卷之一百八十五

實錄卷一百八十五

三六

大清高宗法天隆運至誠先覺體元立極敷文奮武孝慈神聖純皇帝實錄卷之一百八十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級尋常加二級軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆八年癸亥三月乙卯朔

書奉 上諭

上

一

上御勤政殿聽政。○兵部議准署兩廣總督慶復疏稱番禺縣分防墩頭南岡頭二汛千把總向無公廨請各建衙署從之。○以國子監祭酒開泰為內閣學士兼禮部侍郎。○以翰林院侍讀學士嵇璜為右通政。○以廣西慶遠協副將畢映為右江鎮總兵。○丙辰遣官祭黑龍潭

昭靈沛澤龍王之神。○宗人府議奏應封宗室職銜王等庶福晉所生之子應如何給封

請旨得旨從前定例王貝勒貝子公等嫡福晉嫡妻所生之子方始按級與封至庶福晉所生之子間有封者其庶妾所生之子並無加封之例去年因定王貝勒貝子公等庶福晉側妻之數錫與封典故伊等所生之子亦准邀封觀此較之嫡妻之子雖降二等揆之不應得封之例實屬加優今覽宗人府所奏似乎加恩之典反若從其降者甚屬錯謬嗣後王貝勒貝子公等庶福晉側妻所生之子俱著降二等與封。○先是宗人府議請合試左右兩翼宗學生拔取佳卷准作進士至是欽命大臣考取一二等佳卷進呈宗人府帶領引見得旨考取之宗室玉鼎柱達麟圖福喜俱准作進士與乙丑科會試中式之人一體殿試引見或選入翰林或以部屬等官補用候朕臨時降旨嗣後俱照此例行。○兵部議准閩浙總督那蘇圖疏稱先准部咨查減續添兵丁查太湖營續添馬兵五十名請改

為步戰。並裁餘丁七百一十二名。裁馬留備倒斃。此外各鎮協營及撫標巡鹽額兵。均難議減。從之。正黃旗滿洲副都統觀音保。以老病乞休。命以原品致仕。○以故喀爾喀輔國公色內之叔恭格襲職。○丁巳。遣官祭先蠶之神。禮部議准。河南道監察御史李惲奏稱。

壇

廟陪祀。朝期坐班。多託故不到。請勅下各堂官。

嚴飭遵例齊集。違者將本人及該堂官。並下部議。從之。兵部奏。旗員子弟隨任事宜。各處城守尉。防守尉。總管。協領等官。有由京補放者。其子弟可呈請隨任。至在任久居。即可在彼披甲當差。與撥派駐防人員無異。請嗣後於此等員弁子弟。有願來京當差者。聽其來京。有願留彼披甲。或協理家務者。亦均照駐防之例。聽其隨任。無庸照例詳請咨部。至各省將軍。都統。副都統。子弟。年已及歲。向無

奏請隨任定例。但將軍。都統。副都統。有統轄地方大小員弁之責。與文職大員相同。其子弟未便留彼披甲當差。請嗣後於年已及歲之子弟。有實須懇請隨任者。先咨該旗存案。該旗於年底彙奏。其由京新授者。如將年已及歲子弟帶往任所。報明該旗奏請。從之。○工部議准。調任江南河道總督完顏偉疏稱。清口兩岸束水大壩。因乾隆七年。伏秋汎漲。危險。將東壩盡拆。俾河水東注。今水勢日消。又恐黃強淮弱。有礙運道。急應重建原壩。收蓄濟運。得旨。依議速行。○戊午。遣官祭歷代帝王廟。○戶部議准。署直隸總督史貽直疏稱。直屬各州縣驛站缺額工料。乾隆八年春夏二季。應需九折銀一萬四千六百兩零。若照例俟乾隆八年開徵後給發。司驛各官。無力墊辦。請將春季工料。於司庫乾隆七年地糧銀內動支。夏季工料。於乾隆八年地糧裁站銀內動支。涿州。良鄉。通州。三河。安肅。

五屬。每歲地畝。圖退無定。徵糧未有確數。請照各州縣攤丁額數題撥。榆林。土木。雞鳴。宣化。懷安。萬全。長安。鵬鶚。雲州。赤城。十驛。曾於乾隆七年奉裁浮夫。請除裁夫數目題撥。從之。○又議覆山東巡撫晏斯盛疏稱。上年被水地畝。惟鄒縣地已全涸。堪種春麥。其滕縣。魚臺。濟寧。金鄉。嶧縣。臨清。六縣衛。泥淖難耕。別無補種地畝。請於例賑外。自本年三月為始。極貧加賑三箇月。次貧加賑兩箇月。應如所請。於本處倉糧動給。不敷。於鄰屬協撥。從之。○又議覆前護理山西巡撫印務布政使嚴瑞龍疏稱。朔平府左雲縣額徵糧石。應運交糧廳常豐倉。該縣止收耗糧。不收腳費。派附近糧戶。親身赴交。較之徵費官運。小民苦累更重。請仍照例計程核算。每石徵腳價銀七分零。耗糧四升。糧少者照此遞減。就近在縣完納。官為雇運。應如所請。從之。○河南巡撫雅爾圖疏報。封邱。濟源。永寧。三縣。乾隆六

年分。共開墾民田旱地五頃七十一畝有奇。○己未。吏部侍郎田懋奏。外省告病官員。向俱留於該省調理。病痊復用。但既經解任。復留該省。未免食用艱難。情亦可憫。查例載。告病人員。俱准回籍調理。病痊日。以原缺補用。現有告病江西安仁縣令高鈺。可否即照此辦理。恭候欽定。得旨。外省官員告病。准督撫題請解任。留於該省調理。病痊復用者。乃國家愛惜人才之意。且以杜借名規避之弊也。今田懋所奏。該員既以患病解任。又復留於該省調理。食用艱難。情亦可憫等語。似亦實情。況原有病痊補用原缺之例。亦不慮其借端規避。朕思同知以下官員。亦無甚規避情節。其告病者。俱准其回籍調理。病痊照例銓補。不必留於該省。若道府等員。該督撫具題請旨。其有無規避情節。臨時自難逃朕之洞鑒。著定為例。高鈺准其回旗。○戶部議准。前護理河南巡撫印務布政使趙城奏。稱豫省

額辦鉛觔。例派祥符等三十九州縣。該處鄰近楚省。易於購辦。其派買數目。請按大中小三等勻派。不致偏累。俟奉部覆。再將派數造報從之。○庚申。

上詣暢春園。問

皇太后安。○戶部議准。黑龍江將軍博第奏稱。寧古塔將軍鄂彌達。先以齊齊哈爾地方。上年歉收。奏請將吉林等處官莊。並八旗義倉糧石。撥運糶濟。經部議准。今齊齊哈爾兵丁

口糧。已於公倉糧石撥給。本年春作。不敷籽種。並有儲存糧石可支。毋須轉粟平糶。請停撥運從之。○江南河道總督白鍾山奏。前因採辦料物。庫貯無多。於正項公項內。酌動銀十萬兩。今需費尚繁。請於江南近地撥銀二十萬兩。解貯河庫。除歸還借項。仍留為辦料之用。得旨允行。下部知之。○廣西巡撫楊錫紱疏報桂林。南寧。鬱林等府州屬。乾隆六年分。共開墾舊荒水旱田一十頃二十二畝。有

奇。予故解任。養病陝西固原。提督周開捷致祭如例。○辛酉。諭軍機大臣等。二氏之教。由來已久。其遵守戒律。閉戶焚修者。固於民無害。即尋常僧道。或因無力營生。藉此以免飢寒。亦難盡行沙汰。但遊手之徒。借名出家。耗民財而妨民俗。自不可聽其引而日盛。不為清釐。是以從前屢降諭旨。令該部頒發度牒。本身但准招受生徒一人。原欲其易於核查。俾將來可以漸減。後因該部所給度牒甚多。而繳到者尚少。是以復令直省於歲底將核減實數。具摺奏聞。兩年以來。據奏僧道數目。皆有核減矣。而緇黃之流。並未見其減少。此何以故。究之各省督撫。曾將此事辦理耶。抑名辦而實則否耶。如但虛應故事。則因循一二年。與因循至數十年。何以異。甚非朕禁止游惰。勸民自食其力之本意。可傳諭各省督撫。務必實心經畫。善為奉行。固不可強迫以滋擾。亦不得掩飾以務名。當使漸自

裁減數與冊符。毋循故轍。以致毫無成效。若辦理有費周章。或致游手游食者。反不得藉以養贍。毋寧仍舊。不必亟亟以減冊上之虛名為奉職也。又各省啟建寺院廟宇甚多。久之椽榱傾頽。不蔽風雨。何如使靈宇寶相。永保其舊。以昭誠敬。朕從前降旨。惟許將舊有者重為修葺。其欲特創寺觀神祠者。必呈明督撫具題奉旨。方准營建。乃近見京師近地寺廟舊者傾圮如故。而新建者仍復有之。畿

內如此。他省亦必皆然。可見朕之前旨。各督撫等亦未實力奉行。著一并傳諭知之。○戶部議覆雲南巡撫張允隨疏稱。歷年辦運京銅。核餘剩銀一百六萬一千五十九兩零。除抵乾隆八年工本銀八十四萬兩外。餘銀無幾。不敷甲子年辦解之用。請照例撥給等語。該省辦銅工本。每年祇需銀八十四萬兩。應照實用之數補撥。未便仍舊撥銀一百萬兩。其甲子年工本。即照此例行。從之。○又議

准張允隨疏稱。寧洱縣駐兵一千三百五十名。連閏歲需米五千二百六十五石。思茅縣駐兵六百名。連閏歲需米二千三百四十石。核該二處倉儲。按照支放二年定額。不敷米二千七百八十二石有奇。請動項採買運供。從之。○補行雲南省乾隆七年分軍政。酷而有款官一員。年老官一員。分別處分如例。○癸亥祭

先農之神。遣和親王弘晝行禮。○補行福建

省乾隆七年分軍政。年老官二員。處分如例。長蘆鹽政三保疏報。豐財場乾隆七年分開墾灘地八十畝有奇。○甲子。戶部議准閩浙總督那蘇圖疏稱。閩省鹽課有徵收長價水單名。目前奉旨禁革。其雜費於項內酌留。不得多索。永著為例。今查長價等項。原為各場館並在省雜費之用。應請照舊存留。惟歷年冊報徵收銀內。除支給外。均有餘剩銀一二萬兩不等。歸入贏餘。奏報今請遵旨。將福清

莆田。潯美。涵洲。惠安。涪洲。漳浦。詔安。各場。並
福清。海壇。莆田縣。石碼館。各長價。及莆田。晉
江。漁販額銀。均分別減徵。從之。刑部題。已
革山西布政使薩哈諒。先以婪收加平革職。
其不枉法贓銀。於限內全完。應照例減等發
落。得旨。依議。薩哈諒著發往軍臺効力。工
部遵旨議奏。調任河東河道總督白鍾山疏
稱。封邱汎荆隆埽工。因全河水勢趨注。直射
中鑾城西灣。大溜搜刷甚急。上游既險。迤下
各工埽壩俱有掀揭之虞。應於中鑾城對岸。
自李五寨至蔣家莊。挑引河一千六百九十
丈。相機開放。以順河流。從之。予故多羅貝
勒海山。致祭建碑如例。○以故廣西太平府
屬佶倫土知州馮朝憲之子馮時昌襲職。○
乙丑清明節。遣官祭

永陵。

福陵。

昭陵。

昭西陵

孝陵

孝東陵

景陵

泰陵。戶部議覆。前任兩江總督宗室德沛疏。
陳撥江西省倉穀四十萬石碾米二十萬石。
運送揚州濟賑事宜。一派員押運。應如所議。
委總運二員協運五員。一由江西省城運送
揚州水程。共一十五站。每石每站請給運費

五釐零。查撥運脚費。先經咨令各督撫。按地
方情形。分晰酌定。報部查核。嗣據江撫陳宏
謀。開報浮多。復令確核。應俟該撫酌定之日。
畫一造報。一江船水手。須豫為雇募。其開運
之前。應如所議。按名日給食米一升。照時價
折給。一運員隨從僕役。由開運以至交卸。應
如所議。每名日給工食銀六分。回時給搭船
費一兩五錢。一礮夫工食。請每米一石。給銀
二分。各府州縣短運。滙總處所脚費。請不拘

何項先為墊用。俱應如所議。至短運脚費。每石每百里給銀一分。與挑米上船。每石每里給銀三釐。各屬水次遠近。加減扣算。俱應令江撫陳宏謀分晰酌定。造報核銷。一各府州縣短運匯總處所。遇灘淺盤剝。請照湖南運閩穀例。每石每百里給銀一分。若湖中阻淺。惟平坦淤沙。且多漁舟帶剝。每石每站給銀三釐。應俟議准該省報部脚費之案。查造核銷。一船隻應納關料。如民間裝運貨物。每於水脚內包算另封。客為收掌。臨關給船戶上納。今運米係論石給銀。並無水脚在內。固不能責船戶自為上納。仍應於司庫內為之豫備。在關在司同屬公帑。應請免徵。如不可免。其各船樑頭丈尺。應納若干。及抽單整料之分。均難豫為估帶。賑務緊急。并不便在關守候。請令各關於船到之日。即丈量放行。隨再關咨藩司。候部議辦。理查乾隆七年十一月內據江西布政使彭家屏奏運揚米船情形。

臣部覆令江撫會同管關監督詳查覆奏。此次酌辦關料之處。應俟彼案奏到再議。從之。又議覆淮關監督伊拉齊疏稱。酒麴絹粉等稅。應照前監督唐英所奏免徵。自乾隆元年。至七年未徵額銀。並請豁免等語。查酒麴等稅。係例內應徵。未便議裁。其唐英歷年私免額銀。應著落賠補。得旨。依議。其從前私自免徵銀兩。著從寬免其賠補。兵部議准。閩浙總督那蘇圖奏稱。詔安營之紅花嶺地方。遼濶奸宄潛藏。額設把總汛兵。難於策應。請添設守備一員。並於白茅村添設把總一員。合溪潭頭坪路村三處。各設一塘。俱歸紅花嶺守備轄。共添設兵一百一十名。從之。丙寅裁武員親丁名冊。諭。國家體恤臣工。文武俱屬一體。文員則額給養廉。武職則給親丁名糧。以資養贍。自康熙四十二年。部議由提鎮以及千總。核定數目之後。復於雍正六年內特奉。

皇考上諭令武員去任之時將名糧停扣募補。即留與接任之員所以體恤之者更為周至。是以武員親丁雖年年造冊究係虛名開載實無其人名實不副衆所共知朕思既為武員養廉即應改為養廉名糧若干將親丁姓名裁去無庸虛造冊籍其各省武員親丁名糧向來如何分別多寡今如何定例之處著該部查議具奏。工部議准江蘇巡撫陳大受疏稱丹徒丹陽運河為漕艘商船往來要道自乾隆三年擇段挑挖嗣後每歲撈淺久未通長大挑今請酌定六年為限長挑一次責成鎮江府水利通判及丹徒丹陽二縣縣丞臨時相度辦理道府不時稽查從之。正黃旗漢軍都統伊里布鑲藍旗漢軍都統佛表俱以年老休致調鑲黃旗漢軍都統納穆圖為正黃旗漢軍都統以正紅旗滿洲副都統弘暄為鑲藍旗漢軍都統以兵部侍郎紀山為鑲黃旗漢軍都統仍兼兵部侍郎。盛

京兵部侍郎阿山以老病乞休命以原品致仕。予山西按察使張无咎以原品致仕命原任直隸按察使多綸署山西按察使。丁卯吏部議准調任山西巡撫喀爾吉善疏稱絳州屬之垣曲縣舊設巡檢一員駐橫嶺背官為垣曲所轄地係絳縣所屬稽查彈壓徒有其名請將該巡檢照所管地方分隸垣絳二縣轄事屬垣曲者解垣事屬絳縣者解絳如疎防失事均於該巡檢責成從之。調正紅旗蒙古副都統蘇呼濟為正黃旗滿洲副都統以鑲藍旗滿洲印務叅領卓巴為正紅旗蒙古副都統。戊辰。

上御勤政殿聽政。諭軍機大臣等聞得前年準噶爾遣使赴藏熬茶時將軍烏赫圖照料所辦所言俱未甚當不合機宜來使殊有譏誚之意。王保奉使二次深悉準噶爾情形此次護送來使應遵奉將軍烏赫圖之處仍著照常遵奉外其餘諸事王保務須悉心妥協

辦理毋以烏赫圖為將軍。而存觀望之意也。著詳悉札寄王保知之。○又諭。所以命大臣駐藏辦事者。原為照看達賴喇嘛。鎮撫土伯特人衆。遇有應行辦理。及王頗羅鼐請示事件。自應按理裁處。副都統索拜。人雖勤慎。辦事姑息。恐無決斷。微露不能主持事務之形。以致頗羅鼐輕視。轉非遣往駐藏。辦事之本意。甚有關繫。且從前紀山等辦理章程具在。著札寄索拜。於一切事務。照從前辦理情形。

酌量妥協。即行辦理。勿得猶豫觀望。兵部

議准。前任湖廣總督孫嘉淦疏稱。湖南長安營廳。應設新兵一千名。除廳標兵一百。長安右營兵二百。業經題報募撥。其長安老寨。尚需兵七百名。請酌抽鎮筵鎮原裁兵三百四十名。按馬一戰二守七之例派撥。改提標馬戰兵為守兵。改永綏協馬兵為步戰。其餘餉扣撥新營。足募馬步守兵三百。並於永州鎮抽撥六十名。以足七百之數。至長安兵米。歲

需三千六百石。請動道庫米折銀。令靖州採運供支。城步武岡綏寧會同。四川縣屯秋糧。請徵收折色。以便兵民。苗疆入官田畝。招人租佃。其撥兵眷口搬移養贍之需。及沈江渡應募舖司工食。均如例支給。從之。○起北路軍營。効力總兵銜李如柏。為江西南昌鎮總兵。予故襲封衍聖公孔廣森祭葬如例。○豁除廣西平南縣墾不成熟田二百三十四頃八十畝有奇。○己巳。

上詣暢春園問

皇太后安。戶部議准。貴州總督兼管巡撫張廣泗疏稱。古州輓送寨蒿營米。向須水陸盤運。自寨蒿陸運朗洞米石。亦險遠難行。今勘古州至寨蒿有盤揀干列二灘。開修舟運。較為便利。自寨蒿至朗洞。有開出高表一帶捷徑。亦近至三十餘里。嗣後二處運脚俱可酌減。給發從之。兵部議覆。署川陝總督馬爾泰疏。稱陝省各督鎮採買營馬。向無報部候

示之例請嗣後如於本省近邊購買各提鎮等給票差往即報督提備案應如所請至遠涉口外購馬不拘何處祇令先期報明督提即查給照票等語恐地無一定仍有私往駐兵蒙古地方者應令該督先行報部備案仍於年終彙報以憑查核如違例私往加以重懲從之○又議准貴州總督兼管巡撫張廣泗疏稱上江協左營額兵內應議裁一百二十五名請移拉攬汎外委駐三脚汎裁兵九名移打畧汎守備駐上江城裁兵四十名原防柳疊汎外委已改隸都勻協請裁兵一十四名上江城額兵酌裁六十二名右營額兵內應議裁一百一十五名請移八開汎千總駐定旦汎裁兵三十九名原防定旦汎遊擊一員把總三員外委千把總四員請徹把總三員裁兵八十八名除符應裁兵數餘兵二名徹歸上江城從之○調江南宗明鎮總兵張天駿為福建臺灣鎮總兵○旌表守正捐

實錄卷百六

五

軀之陝西三原縣已故訓導馬建德妻秦氏旌表守正被戕之雲南羅平州夷婦亞受

實錄卷百六

五

大清高宗法天隆運至誠先覺體元立極敷文奮武孝慈神聖純皇帝實錄卷之一百八十六

大清高宗法天隆運至誠先覺體元立極敷文奮武孝慈神聖純皇帝實錄卷之一百八十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣謹

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣謹將內大臣戶部尚書鑲藍旗滿洲都統軍功紀錄五次

尋常紀錄十四次臣謹將經筵講官太子少保工部尚書紀錄六次臣等謹編等奉

教修

乾隆八年癸亥三月庚午浙江道監察御史

薛澂奏

十

京職與外任不同道府州縣等官刑

名錢穀責成一身兼以沿河沿海苗疆烟瘴

等缺有不得不遴選題補之勢京職各衙門

事務皆所夥辦更有明於心者未必盡利於

口呈稿回堂之時捷給者銜口如流樸誠者

啟口多滯堂官每以應對喋喋遂以為才具

敏練或有巧於鑽營者交結請託其弊更多

迨遇缺題陞樸誠者翻以遲鈍見遺鑽營者

多以才能薦舉請停京員題陞之例出缺盡

歸吏部論俸推陞如員缺緊要必須題補者

亦不必指定正陪二人令該堂官將所屬應

陞人員通行帶領引見候簡得旨御史薛澂

請停京員題陞之例以抑奔競一摺朕思各

部司分有繁簡之不同司員才具有長短之

不一定例之准堂官揀選保題者乃不得不

然之勢若如薛澂所奏外官應准上司遴選

題補而京官則不當准豈在外之督撫皆可

信而在京之滿漢尚書等皆不可信乎至薛

澂摺內所舉情事雖未必盡然亦不能斷其

必無即如以言取人失之宰予以貌取人失

之子羽以孔子至聖尚有此語况其下焉者

乎為大臣者見此等議論當留心體驗有則

改之無則加勉務使保舉毫無偏徇其為所

舉者可以不愧而未舉者亦足以服其心不

致隳頹志氣方足以副朝廷黜陟之大典薛

澂原摺併發調安徽巡撫喀爾吉善為山

東巡撫山東巡撫晏斯盛為湖北巡撫湖北

巡撫范臻為安徽巡撫。辛未議政大臣和碩裕親王廣祿等議覆。寧古塔將軍鄂彌達奏稱烏蘇里等處。出產人參。查有偷採之人。多於山內搭蓋窩鋪。過冬至夏間。或留人種地。或入山私採。地方遼濶。恐積久愈多。辦理愈難。請於寧古塔揀派幹員。帶兵三百名。於四月初旬。在烏蘇里等處。擇要隘設卡。遇有齎糧入山接濟者。即行查拏。六七月間進山。遇有私採匪徒。一一拘拏。雪落後撤回。應如所奏辦理。並請勅該將軍嚴飭所派官兵。奮勉出力。務盡根株。或有借端滋事。及私放隱匿等弊。嚴治其罪。官兵撤回時。將所獲人數參數。報部辦理。又稱近年採參之人。多誑領官票。不行回繳等語。并請勅該將軍等。遇放票之年。須選才幹員升。上緊查拏。並飭總商必擇十分可信者予票。務絕誑領之弊。從之。

（戶部議覆閩浙總督那蘇圖疏。覆部咨行查閩省鹺政情形。一。臺灣鹽課餉銀。及雲湧

認課菜銀。向俱不隨額引徵收。原因彼處或遠隔重洋。或孤懸海島。從前商人完課。均不行引。應如所題。仍舊辦理。一。閩省西東南三路行銷鹽餉。除西路引目。照舊頒給。其東南路并各縣湧引張鹽餉。請參酌核減。查閩省奏定按引計餉。按餉合擔。未便驟更。應令該督分別官運商辦。並鹽課細數。另造清冊。報部查核。一。辦理奏銷。應如所題。將正課入正額具題。其餘引及額外餘引。令各路通融辦理。不必註定州縣。餘引繳部查銷。徵銀入贏餘冊內彙報。至不敷行運之處。仍令另題請增。一。閩鹽收曬收貯。發售接濟。及枰掣驗查各事宜。舊制周密。應如所題。照舊辦理。至何處查驗。何處截角。應造冊報部。一。閩省有不入引額之坵折銀。請照例留撥本省兵餉。查此項先經該督奏明解部。未便更張。應仍令按年搭解。一。永春德化大田三屬滯銷餘引。已撥惠安光澤二縣分銷。即依西路課則徵

銀查閩省向無餘引。今始頒發。應令另報。臺灣所貯乾隆二三年未銷鹽十四萬擔。曾於乾隆五年撥運內地銷售。業於是年冊報。查造報數目。先後不符。應仍令分晰另題從之。刑部題。已革浙江巡撫盧焯先以營私受賄革職。其不枉法贓銀於限內全完。應照例減等發落。得旨。依議。盧焯著發往軍臺効力。前任湖廣總督孫嘉淦題。已革湖南糧道謝濟世。訊有強勒舖民購米。浮收價銀劣蹟。應依枉法贓律議。不准折贖。得旨。此案俟阿里衮孫嘉淦會審具題到日。再降諭旨。該部知道。調任山東巡撫晏斯盛疏報金鄉濟寧蘭山蒙陰聊城茌平莘縣臨清高唐樂安臨朐掖縣平度昌邑膠州高密福山萊陽二十八州縣。乾隆六年分開墾旱田共五十頃有奇。 壬申。

上詣

恩佑寺行禮 詣暢春園問

皇太后安。諭軍機大臣等。聞喀爾喀副將軍和托輝特貝勒青滾扎卜。凡事怠惰。並不在軍營効力。去年查閱伊屬下兵丁器械。指稱有病不前。又將伊本身開入軍營行走之列。希圖雙俸。經額駙策凌查出除名。嚴行訓誡。喀爾喀副將軍有承辦全部落之責。係衆蒙古表率。豈可稍有怠玩。苟且青滾扎卜。世受國恩。並不實心報効。殊屬不合。著額駙策凌查明具奏。尋策凌遵旨傳詢。懾服待罪。奏入。得旨。青滾扎卜。既自知其罪。姑行寬貸。嗣後當加意奮勉。効力贖罪。著將此旨諭令知之。戶部議覆調任安徽巡撫喀爾吉善奏稱。鳳潁泗三屬各州縣衛。因被災蠲餘應徵銀米例。係分年帶徵之款。應如所奏。請旨豁免。至節年舊欠。係從前未完之項。未便如該撫所請一併免徵。得旨。乾隆七年。上江鳳潁泗三府州屬被災田地。除照例應免分數外。尚有蠲刺應徵地漕銀米。例係分年帶徵者。朕

念該處積歉之後又被水災民力拮据俱著
加恩寬免餘依議 又議准江西巡撫陳宏
謀疏稱瑞州臨江建昌廣信饒州南康九江
撫州八府及星子德化新建清江新淦五縣
均有上年加貯穀石請添建倉廩共七十九
間從之 歸化城將軍兼管山西提督補熙
丁母憂命百日內以歸化城副都統準提保
管理將軍事務副都統吉當阿署山西提督
癸酉吏部議准前任湖廣總督孫嘉淦疏
稱靖州州判事簡請移駐綏寧縣臨口地方
管理該處倉貯兵糧臨口司巡檢請移駐附
近之雙江地方管理苗徭事務聽寶慶府同
知轄其同知係乾隆六年移駐長安額支養
廉不敷請增給銀三百兩前議設之江頭司
巡檢請照苗疆缺例歲給養廉銀一百兩移
駐長安之橫嶺巡檢請增民壯八名城步綏
寧二縣典史及綏寧所屬青坡司巡檢俱請
以苗疆註冊從之 都察院奏湖南岳常道

倉德密揭湖南布政使張璣囑將承審衡陽
縣收漕一案改換詳文總督孫嘉淦諭令婉
曲善處事屬兩難懇請轉達得旨都察院摺
奏岳常道倉德通揭上司抑勒換詳一事曾
申詳總督孫嘉淦孫嘉淦批令該道婉曲善
處且云審時不問此款等語孫嘉淦身為總
督又承旨審辦此案接到倉德揭帖時即應
奏聞將揭內情節審理乃故寢其事不行陳
奏而審案內並無一語及倉德所揭情由扶
同許容草率完結甚屬徇庇有失封疆之體
俟此案結後著該部嚴察議奏其都察院原
摺交與阿里衮將此案前後情節逐一查審
具奏 鑒儀衛奏本年謁
陵大典應備帶拆合轎馬上鑾駕蒙古畫角細
樂或俱隨營帶往或將拆合轎馬上鑾駕先
送至盛京豫備祇將蒙古畫角細樂隨帶得
旨蒙古畫角細樂隨營帶往其拆合轎鑾駕
由京送至盛京盛京亦著留鑾駕一分以備

將來之用。此一分俟回鑾之日。即留彼處。著交盛京禮部。應於何地收貯之處。該將軍一併會商辦理。此一分所留之鑾駕轎。回京城另行新造。○以右通政定柱為大理寺卿。○旌表守正捐軀之河南鄭州民楊考妻徐氏。○甲戌諭。上年淮徐一帶水災。米價騰貴。朕念漕標河標兵丁食用艱難。准借一季餉銀。於今年分作四季扣還。今朕聞得彼地被災之餘。糧價不能平減。兵丁額支糧餉折色為多。若再按季扣除。則食用愈覺難支。可為惻惻。著將上年借支之項。目下暫緩。俟本年秋成之後。米糧價平。再行扣除還項。該部即遵諭行。以故奉恩將軍揆良之子德祿襲職。旌表守正捐軀之山東單縣民孫洪吉女孫氏。乙亥戶部奏八旗官兵馬駝需用料豆。於每年九月回廠起。如例放給。至次年四月出廠後停止。今歲恭逢謁陵。各旗馬駝已奏准留養。其料豆若紛紛購買。

市價必昂。且恐缺乏。未便停給。查倉貯豆甚多。請將八旗留京馬駝。於閏四月起酌量放給。其價照例坐扣。得旨。所奏甚是。依議。○又議覆吏部左侍郎蔣溥條奏。內地之米向例不容私販外洋。而外洋往往倍價私糶。奸民趨利。仍有裝載貨船出口之弊。出洋者多。則內地見少價貴。妨民勢所必至。請勅沿海督撫嚴飭防海文武。查凡出口商船。無論貨船漁船。除食米外。不許稍有夾帶。亦不得借端勒索。違者本人如律究治。文武各官立即叅處。應如所奏。嚴飭實力查辦。遇有犯者。並將該督撫等交部併議。從之。又議撥河東鹽課銀二十萬兩。解往甘肅為準噶爾夷使進藏熬茶等項之用。從甘肅巡撫黃廷桂請也。刑部議覆廣西巡撫楊錫紱疏。稱來賓縣逆匪李彩等結黨挖窖。圖刦城池。請分別正法治罪。如律應如所題從之。以太僕寺卿李世倬為太常寺卿。丙子諭。據青州將軍

欽拜奏稱從前指借俸銀六年。至今尚未扣完。懇恩補借俸銀二千五百兩。將每年應領半俸扣除。分作十年完項等語。著照所請。准其借給。又諭軍機大臣等。欽拜因補借俸銀。具摺陳奏。備述家務窘狀。其詞繁冗瑣屑。甚失大臣之體。且云若不據實奏聞。苟或檢身不及。遂至貽羞。此言尤屬悖理。伊摺朕不便批發。爾等可寄信申飭之。其所借俸銀二千五百兩。著照所請行。○戶部議准。署理雲南總督張允隨奏稱。東川鼓鑄錢文。甚多餘剩。請將昭通一鎮。東川鎮雄。尋雷。三營官兵俸餉。以銀七錢三搭放。從之。○禮部奏。八旗義學教習。今當奏請考取。據滿洲文進士德音。繙譯進士雙圖等。呈請一體考試。查向無此例。可否。請旨。得旨。准其考試。○丁丑。諭曰。公弘普自幼蒙

皇祖

皇考。養育宮禁。讀書內廷。原欲造就成材。其人

亦聰慧謹慎。可備任使。今患病溘逝。朕心深為軫惻。意欲親臨其喪。經大臣等再三勸阻。已降旨著大阿哥前往奠酒。但念莊親王當中年以後。忽遭喪子之戚。朕欲親往慰唁。著即豫備。弘普著賞給世子品級。應得卹典。該部察例具奏。○命賞莊親王允祿銀一萬兩。料理公弘普喪事。○旌表守正捐軀之河南上蔡縣民宋喜妻張氏。○蠲淮安分司所屬板浦。徐瀆。中正。莞瀆。臨洪。興莊。泰州分司所屬屬富安。安豐。東臺。何垛。梁垛。丁溪。草堰。小海。劉莊。伍祐。新興等場。上年分水災。竈戶應徵額賦有差。並緩帶徵。歷年未完銀兩。○戊寅。上詣暢春園。問

皇太后安。○調正黃旗滿洲副都統蘇呼濟為

正紅旗滿洲副都統。以正紅旗滿洲護軍叅領永林為正黃旗滿洲副都統。○庚辰。

上詣暢春園。問皇太后安。○詣瑞景軒。視

壽祺皇貴太妃病。諭軍機大臣等。前巡撫晏斯盛奏稱臨清關有銅補商補一項。係雍正六年已經革除。因免徵米糧石頭。委管關員照舊徵收。奏請豁免。而戶部以銅補商補二料。乃雍正六年以前。向有徵收歸額起解。即六年以後亦名草實存。並非今日始徵之項。議以毋庸請免。彼此駁詰。至於再三。朕復命大學士會同該部議奏。亦復申前議。朕因部中查係應徵之項。而晏斯盛平日又不免沽名之習。是以允照部議。但朕之蠲免米稅。原以加惠商民。此項究竟應徵應免。必有確實情形。可密傳諭喀爾吉善令其虛公悉心詳查議奏。辛巳戶部議准。江蘇巡撫陳大受疏稱。撫提各標營兵糧不敷。查蘇松糧道所屬有減存給丁贈米三萬七千九百三十石。零請留抵支給。從之。又議准廣西巡撫楊錫紱疏請開採恭城縣大有朋山鉛礦。從之。工部議准江西巡撫陳宏謀奏請興

修豐城進賢萬載金谿宜黃南豐廣昌玉山廣豐鄱陽餘干建昌湖口彭澤大庾贛縣十六屬已坍城工。以代賑上年災民。從之。○以內閣學士春山為盛京兵部侍郎。通政使伍齡安為內閣學士。兼禮部侍郎。○贈故福建陸路提督總兵官都督僉事蘇明良為署都督同知。○旌表守正捐軀之河南商水縣民高黑妻吳氏。壬午大學士鄂爾泰等覆奏鎮海將軍王鈇等會議副都統張正畋奏請巡緝江海一摺。據稱各省駐防大員。從無出巡之例。且水師江汛遙遠。若自中流到岸。挨查一日。不過數汛。張正文既已奏請。可即於本年停操空閒前往。次年副都統朱廷桂亦照例巡查一次。至所奏每年一次。臣不敢以為永遠之定例等語。查沿江要地。大員親閱。方不廢弛。本年次年既可按汛巡查。何以又難永遠定例。但每年一次未免糜費軍需。應令兩年出巡一次。兩翼副都統輪往。得旨。依

議王鈇不察事理。但尚客氣。著嚴飭行。○戶部議撥山西省春撥冊報存銀七萬二千九百一十七兩零。解往甘肅。為涼莊駐防滿兵糧草增價。從甘肅巡撫黃廷桂請也。○兵部奏藍翎侍衛擬補都守。一途。例補單月缺。一年止用五員。查自乾隆二年丁巳科起。及世職廕生提鎮子弟。補授藍翎侍衛。而未選都守者。已積至六七十員之多。若照例選用。不獨壅滯為患。且該員等守候多年。亦漸致衰邁。查雙單月應用守備者。各班常有應用之人。惟雙月都司缺出。例用投供候補人員。而在部候補都司者甚少。即應行抵選之營衛守備。亦屬無幾。且現已陞至乾隆五六兩年到任之員。請嗣後於藍翎侍衛。除例用單月都守外。如雙月都司缺出。無投供應補。及卓異應陞者。即借補藍翎侍衛一缺。一年亦不得過五。俟藍翎侍衛疏通。仍復舊例。從之。○又奏。候選武進士。有情願隨營學習者。應做

照武舉効力之例。如在部投供者。由本部考驗。分發有題缺之省分。學習試用。如在籍者。令其在督撫衙門具呈考驗。分發有題缺之鄰省學習試用。該督撫收標後。照分發武舉之例。給額內馬糧一分。隨報部註冊。仍令督撫提鎮留心試看。以五年為率。如果弓馬嫻熟。諳練營務。遇人地相宜之題缺。即行題補。如年分已深。學習尚未滿五年。輪應銓選者。仍照伊等原班與現在投供人員。較揀選年分等第名次補用。如弓馬次等。人材尚可驅使。該督撫提鎮出具切實考語。造冊送部。亦照揀選年月等第名次。歸本班選用。倘弓馬庸劣。怠惰廢弛。令回本籍。報部註冊。無庸銓選。再查漢軍包衣武進士。向無分發之例。但既與漢進士一體銓用。亦當令其學習營務。應將揀選一二等之漢軍武進士內。有情願隨標學習者。亦照漢軍武舉之例。分發巡捕營。直隸馬蘭鎮。秦寧鎮。隨營學習。其給糧及

錄用之處。與漢武進士一例辦理。從之。○倉場侍郎覺羅吳拜奏。通州雜稅。有曾經革除者。多係部冊開載之款。且從前未經題奏。應奏明請旨。得旨。既已寬免多年。即著永免。該部知道。○江西巡撫陳宏謀疏報新建。豐城。寧州。萍鄉。萬載。新喻。廬陵。泰和。萬安。餘干。萬年。皇子建昌。長寧。等十四州縣。乾隆六年分開墾老荒。續荒。及額外新生田地塘。共一十頃六十八畝有奇。又廣昌縣開墾建昌所老荒屯田二十六畝有奇。○癸未。以御前侍衛散秩大臣張謙為鑾儀使。○是月。欽差大學士陳世倌等續奏。刪汰上江冒賑情形。鳳陽府屬。汰大口二萬三千九百餘口。小口一萬三千三百餘口。潁州府屬。汰大口六千四百餘口。小口四千三百餘口。泗州併所屬。汰大口一千九百餘口。小口四百餘口。得旨。知道了。○欽差總督高斌侍郎周學健奏。兩江賑務。有應至四月止者。現查水占地畝。麥收失

望。其極貧窮黎。當飭屬加賑。閏四月一月。今大工並舉。貧民原可傭工餬口。其老弱殘病者。或飭屬送養濟院收養。或動項安插撫卹。俱期安全得所。所有涸出低窪地畝。業經佈種。興鹽等處積水。亦消十分之九。各屬冬麥已茂。春麥亦漸次發生。至河工工程。所辦分數。已及十之五六。伏汛以前。定可完竣。今石林口新壩完固。大溜中趨。壩外新淤漸高。壩後月隄將竣。河流順軌。各工俱穩。南北運河無滯。清口水勢甚平。糧艘俱已全數過淮。得旨。覽奏稍慰朕懷。○前任兩江總督宗室德沛奏報。江西潁州府城。於二月三十日。猝被狂風雹雨交作。時值學臣按試寧都石城兩邑童生打傷七十餘人。壓斃四十餘人。經南贛道動關稅盈餘銀。將壓斃者每名給棺殮銀四兩。打傷者每名給醫藥銀二兩。得旨。覽。○江蘇巡撫陳大受奏。向來辦理水利工程。淮郡有積慣已攬者。名曰淮夫。查黃運兩河。

如捲埽釘樁。必須准夫指點者。准量為收用。至挑河築埂之工。概用農民。以工代賑。並飭屬平糶。俾免米貴之處。柴草為民間必需。其裝柴船隻。多恐派差不前。因嚴飭工員。發價另雇。不用柴船。至發帑做工等事。並派道員周流巡查。務期修築如式。得旨。所奏俱悉。安酌為之。又奏蘇郡米價。至三四月間。恐致高昂。已飭司道。於上年留漕米內。多為截留平糶。至禁米出洋。嚴查全在近海各口。飭文武員弁。赴口查驗。其洋販食米。准計口按日。分別驗放。不使溢額。並飭屬於崇明等處。查以印票購買者。均不得多買滋弊。惟貧民一遇價昂。多以禁價遏糶二事為請。復恐禁價。則商販不前。遏糶。則緩急莫濟。均屬難行。不便徇民所請。得旨。是應如是。權宜輕重而為之。○又奏淮揚徐海成災州縣。交春以後。商販流通。糶糧尚易。若於賑給米穀內。酌折銀兩。於民頗便。其勻存米石。並可稍資儲備。得

旨。所奏俱悉。通融料理。原係汝等職分。豈有止賴官帑官穀。而均勻散給。即為了事耶。○江南河道總督白鍾山。漕運總督顧琮。奏。中河運道。一分黃河之水。由竹絡壩灌入。一引駱馬湖之水。由董家溝灌入。以濟漕運。所謂十字河是也。但黃河常久流通。並無節制。而每年運河之水。大小不等。前河臣高斌。奏明。如遇湖水過弱。暫時開壩。引黃水以濟漕運。如湖黃水勢相平之際。將竹絡壩支河相機堵閉。不令長久通流。在案。上年春雨不勻。上源來水本微。駱馬湖又蓄水無多。是以設法於河淺處築壩。束水濟運。惟是運河本無來源。駱馬湖蓄水有限。嗣後應請隨時酌量。如遇中河水弱。黃河水大之時。仍照高斌原奏。將十字河壩。暫時開放。於水勢相平之際。即行堵閉。於運道工程。兩有裨益。得旨。所奏俱悉。白鍾山又奏石林工程。係大溜頂衝。而新築埽壩。形勢兜灣。尤為險要。且埽工不甚

寬厚。埭內又刷成極大深塘。埭外河水高於埭內塘水八尺有餘。一遇伏秋大汛。深為可慮。必得澆築裡餞。以為埭壩內靠。庶可著實堅固。臣已面諭道廳。速行辦理。得旨。朕正為此厯念。所見甚是。○兩淮鹽政準泰奏。准泰兩屬場竈。去秋被水。今春又雨雪連綿。不能煎曬。上年成災者。窮丁給賑已畢。即不成災者。亦資本耗盡。雖官倉平糶。無以糴食。請照乾隆三年場竈借給麥價之例。查明實在貧

竈窮丁。於存備運庫商人捐賑銀內。先撥一萬六千四百兩。酌量借給。以資接濟。俟秋成扣收鹽價歸款。得旨。知道了。○江西學政金德瑛奏。臣歲試按臨贛州。於二月三十日。合考寧都石城二縣文童。猝被風災。吹倒考棚二十餘間。非旬日可以修竣。贛郡十二縣文武童生。共一萬七千餘人。孤寒貧乏。守候已久。勢難令其散回。查知府官廨尚屬寬敞。因酌量劃分署西一所。並讓出大堂二堂。以為

考試閱文之所。臣即權移府署辦理。得旨。是應如此者。○閩浙總督那蘇圖調任福建巡撫。劉於義奏。三月初四日。據古田縣訪獲奸匪黃天瑞。黃元貴。陳文。鄭簡。羅惠能等。各有綾符戳印。語涉悖逆。現在臣等審明具奏。將為首者。當眾予誅。俾咸知警惕。其被惑自首者。照例減等發落。得旨。覽。應如是辦理。被惑自首者。固應寬。而亦不可失於縱。此等惟應盡法處之。不可姑息。庶可懲一警百耳。○那

蘇圖又奏。查禁臺地偷運偷渡。不專在臺地之對岸。尤在臺地之各口。臣飭屬防範。惟自臺返棹船隻。查非捏報。遭風量給食米。並寄莊佃租。運回漳泉者。均報官給照。准其出口。其餘商賈販運。及捏報遭風各船。一概禁止。各口小船。編號約束。止令照舊往來支海。以抵郡為率。如有偷越大洋。將守汛員弁重懲。仍嚴飭文武協力查禁。得旨。知道了。應時刻留心者。○浙江巡撫常安奏報。海塘之華岳

廟至馬牧港一帶。漲有新沙東西計長四千二百八十丈。南北約寬九百餘丈。足為石塘保護士民。無不歡忭。得旨。欣慰覽之。摺內又稱臣慶幸之中。益用小心。仍諭在事各員。倍常防範。得旨。朕所喜者此耳。若謂漲沙可恃。則二年三年間。不曾漲沙乎。○調任湖北巡撫范琛奏。上年九月。具奏襄陽郡城。有不法奸徒捏造李梅等姓名。妄寫悖逆偽示。當即飭屬嚴緝。今聞鄖陽府屬房縣地方。有一道士。招集多人。襄陽人亦有入其黨者。且上年襄城檢獲偽示之時。該犯亦在襄郡。臣查奸徒誘惑羽黨必多。現飭該地文武嚴密訪查。并差臣標弁兵協力辦理。俟訪明獲犯。當再據實奏聞。得旨。此等事斷不宜存姑息了事之見也。○又奏。上年安荊一帶水災。各屬買糴過多。糧價未平。其有倉貯可濟者。毋庸酌撥至倉貯無多。與雖有貯積。而地屬災祲之後。必須多為籌備。當將自川買回米石酌量

分撥。俾敷春糴之用。正月後積雪經旬。窮民無可備趁。令地方有司。將社倉穀麥。分別借給。其社倉不敷之所。則酌借常平倉穀。至漢陽之漢口。與荊州之沙市。二巨鎮。本境外來之人。聚集甚衆。經兩淮商會及本地紳士。好善樂輸。並令地方官。代為經理。均各得所。得旨。所奏俱悉。○四川副都統永寧奏。兵丁甲面舊壞應修。惟川省向無繡匠。甲面多用素色。不足壯觀。請於八旗官兵內。選派幹練官一員。領催馬甲八名。赴江寧採辦繡花甲面。一律修整。其需費即於滋生項內息銀。並牧場地糧糴價內動用。得旨。著照所請辦理。此滋生銀兩。允令兵丁補還。○四川巡撫碩色提督鄭文煥奏報。黎雅營之富林汛。為清溪縣地。於本年二月十二日。有夷人三百餘名。各持器械蜂擁而來。經該營遊擊李繼經帶兵趕退。據被獲賊蠻供。係大渡河南曲曲烏夷人過河刦殺官兵追及。旋即聞風奔散。居

民俱各安堵。臣等復恐潛來滋擾。並有無河北夷人串通勾結。現飭該管文武調集各蠻頭目。逐加研訊。並相度該處形勢。應作何添兵設汛。稽查彈壓之處。俟查覆另奏。得旨。知道了。此等事。不可以姑息處之。亦不可濫及無辜。須料理妥協。方免貽日後之患也。○廣西巡撫楊錫紱奏。各屬米穀。間有價貴之處。然雜糧可望豐收。民間亦多自設鄉禁。不令米穀出外。臣飭屬於梧州江口。查有零星小販。聽其流通多者。酌行抽買。以實倉儲。西省既有搏節。而東省仍藉流通。得旨。雖云如此。然汝但顧本省。而東省之受累。已不小矣。可再酌量情形。弛禁為是。又奏。各營兵丁。連年借項。現在陸續坐扣。頗覺艱難。而不通水次。各營每米一石。向例折銀八錢。偶值價貴。亦購買不敷。今已札商署督臣慶復。於青黃不接之時。令通省各營。均借支一月糧米。秋成後分月扣還。得旨。覽。○又奏。安南進貢陪臣

阮翹等。行經潯州。聞管理稅廠之知府劉暉。潭於例看隨從船隻之外。並看陪臣船隻。辦理甚屬固執。俟查確後。酌辦奏聞。得旨。此豈失於固執。並失柔遠之道。可參處。以為後來戒。○又奏。粵楚滇黔地處邊荒。苗獠土獍。種類錯處。自雍正八年。廣東逆匪李梅逃匿西省之後。每有挖窖取銀之說。造說愈妄。結夥愈多。即湖南滇黔。在在有之。應請密勅粵楚滇黔數省文武大吏。嚴飭地方官員。將挖窖妖言一事。留心嚴察。共相整飭。久之或可望此風漸息。得旨。所奏是。知道了。○又奏。報泗城府屬之西林縣。訪有王姓岑姓二人。與李梅案內之李捷。廖士美。年貌相似。由西林而過滇省之土富州。隨飭屬前往追緝。旋據西隆州報。貴州永豐州。拏獲妖言惑眾之黃三。岑顯亮等。犯供有西隆州夥黨。旋於西隆獲王文甲。王文魁。二犯。訊與李梅案合。或李捷三等。易名藏匿。正可從此跟究。當即飭屬

赴西隆地方上緊辦理查拏。俟緝獲後再行奏聞。得旨上緊妥辦。不可使奸匪漏網。並不可有并案完結之意。審有確實。即速行奏聞。

貴州總督兼管巡撫張廣泗。貴州提督韓勲。奏黎平府屬之清水河烏孟江徭箐內。並該府沖隘地方。緝獲粵西歸隨寨逆苗姚奉明龍老元二犯。訊有窩藏黔省逆苗石金元情事。現飭司審擬另題。至此外黔省各苗。俱極安靜守法。仍飭屬加意防範。務期奸匪絕

實錄卷一百一十七

事

跡。民苗安堵。得旨此等妖言惑眾之事。難保其必無。但能有則發覺。發覺則緝獲。斯邊隅保無事矣。若存無事之念。一切置之不理。將來釀害可勝言哉。○貴州安籠鎮總兵宋愛奏。永豐州地方。緝獲李梅案內逆匪黃三。韋阿三。羅阿韋。羅龍四名。搜出悖逆符紙。並續獲之王祖先等。即訊供咨報。督提二臣查核。復將供出未獲各犯。於本省上緊嚴緝。其在滇粵各省者。亦即飛咨各督撫提鎮。轉飭查

拏。得旨所奏俱悉。斷不可存此疆彼界之心。一切查拏。惟應上緊。以靖根株。

實錄卷一百一十七

奏

大清高宗法天隆運至誠先覺體元立極敷文奮武孝慈神聖純皇帝實錄卷之一百八十七

大清高宗法天隆運至誠先覺體元立極敷文奮武孝慈神聖純皇帝實錄卷之一百八十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加二級尋常加二級軍功紀錄一次慶隆

總領官經筵講官太子太傅文學殿大學士文淵閣領閣事稽察欽奉 上諭事件處管理刑部戶部三庫事務

世宗憲御射軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德齡經筵講官太子少保工部尚書紀錄六次臣曹振 上

敕修

乾隆八年癸亥夏四月甲申朔享

太廟遣誠親王允祕恭代行禮○

上詣暢春園問

皇太后安○諭王大臣等

太皇太妃溘然薨逝

太妃將朕自幼撫養前亦曾顧復

皇考今因薨逝朕心不勝悲傷但

太妃係皇貴妃國家典禮不便加上謚號朕

躬意欲持服以稍展哀敬之心其應行與否

著現在此處之王大臣等即行議奏莊親王

允祿等議

太皇太妃薨逝奉

特旨輟朝十日又命相度地方另建園寢皆有

加於皇貴妃定制已足以昭

皇上追慕之誠而妥

太皇太妃之靈矣祈免持服得旨王大臣所

奏已悉朕欲盡心之處仍當請旨於

皇太后○訓飭九卿勤事諭國家政務俱資九

卿辦理朕之誥誡訓勉亦不啻再三乃就近

日觀之雖未顯有廢弛之實蹟而諸臣情形

寬緩因循之意多而恪共振作之意少此則

速宜省改者凡人之心習勤甚難而習怠甚

易今日所辦之事減少於昨日則明日之事

又將減少於今日狃於便安耽於逸樂久之

習為固然精神不能復振矣此等習氣朕亦

無督課之法即位之初曾令其輪班奏事而

諸臣所奏不過撫拾細故苟且塞責無裨益

於政治仍蹈襲乎虛文朕無所取惟在諸臣

各矢盡誠。視國事如家事。毋涉因循。毋稍瞻顧。殫心竭慮。以効贊襄。副朕之期望。古人所謂夙夜匪懈者。蓋志氣奮興。表裏一致。無一息之或惰。不僅奔走趨承之謂也。朕願九卿共勉之。○訓飭督撫各官奏事。諭近來各省督撫奏事。較前甚少。而此三日。以竟無一奏摺。實數年以來之所未有。豈地方果無可陳奏之事耶。抑督撫漸趨於寬緩之習。有事而不奏耶。夫政簡刑清。自古以為上理。然必治行廉平。風移俗美。而後可收政簡刑清之實效。若徒驚乎其名。則不過習於苟安。身自暇逸。久之而事皆廢弛。百弊叢生。其害非淺鮮矣。即如督撫摺奏屬員賢否一事。原欲其常為留心。隨時訪察。陳奏朕前。以備簡用。乃督撫等多有於奉旨之後。陳奏一次。虛應故事。後遂置之不辦者。夫一省之中。二三年之久。屬員更換者不少。豈不當秉公甄別。將才守可稱者。舉以奏聞耶。嗣後各省督撫奏舉屬

員。著定以三年一次舉行。又見督撫所奏。皆係藩臬道府等官。此等大員。朕皆知之。或較該督撫更為明晰。若即以此塞責。豈朕造就人材之意。況今日之道府。即將來之藩臬。今日之州縣。即將來之道府。若督撫不將州縣等官治蹟。據實上聞。朕何由知悉。而量材器使耶。即武職總兵副參等官。亦所以儲干城之選。各督撫均應留心。至於藩臬。在雍正年間。原不時奏事。而比來亦覺寥寥。學政亦有奏事之責。今竟有蒞任三年。未奏一事者。夫有意搜尋。以滋紛擾。固非政體。而應奏不奏。緘默因循。朕何以收明目達聰之益。可傳諭各省督撫等。其各振作惕勵。悉朕意焉。○涼州總兵王廷極奏。安西新添兵一千三百名。又補實親丁公費名糧七百五十六名。兵部原議。今於現在駐防甘涼肅。兵內酌留。其不足之數。就近派撥。安西所添之兵。即於肅州撥往。靖逆等處所添之兵。即於甘州撥往。甘

肅兩處撥出之缺。就近於涼州未裁新兵內。如數撥補等語。查涼屬未裁新兵內。現在遵撥甘州馬步兵四百九十七名。肅州馬兵一百九十三名。尚有不敷撥甘肅馬步兵一千一百四十八名。各就近募補。下部知之。○以兵部侍郎紀山為鑲藍旗滿洲都統。裕親王廣祿管理鑲黃旗漢軍都統事務。免安徽壽州宿州鳳陽臨淮懷遠定遠虹縣靈璧鳳臺阜陽潁上霍邱亳州蒙城太和泗州盱眙

天長五河懷寧桐城宿松望江貴池東流六安滁州來安等二十八州縣。鳳陽鳳中長淮宿州泗州安豐六衛。本年水災額賦有差。○乙酉。

上詣暢春園問

皇太后安。○詣

壽祺皇貴太妃金棺前奠酒。○丙戌。

上詣暢春園問

皇太后安。○丁亥。大學士等議准前任兩江總

督宗室德沛調任安徽巡撫。喀爾吉善江蘇巡撫陳大受疏陳兩江水利河工。河旁民田房屋挑廢者。酌給價值籽種工本。並豁除糧額各條款。○河道挑壓地內。應輸錢糧。令該處辦公之員丈估。有糧之地。將業戶姓名丈尺畝數。并田地之上下。編號記冊。工竣日地方官覆加勘丈。開明糧則題豁。○淮揚徐海鳳潁泗等府州屬。興修水利。民間房舍。如有折毀。工員就近確勘。准給修費。豁除糧額。○

江省積歉之區。應將未種菜麥之地。借過籽種者。祇須豁糧。不給工本。已種者按畝免償。如係業戶自辦籽種。查明照例給領工本銀兩。每畝酌給八分。○河防如遇民間墳墓。不得挖廢。至無糧官地。或有欺隱偷種者。雖有麥苗。亦不給籽種。並不得混冒豁除。得旨。依議速行。○閩浙總督那蘇圖福建巡撫劉於義奏。臺屬常年買穀。每石四錢。從前穀賤。足敷購買。近年穀價運費。約需五六錢不等。請

酌增價。奉部駁與定例不符。但穀價委係增長。仍請在泉漳等府盈餘項下。每石加銀五分。歲豐不以為例。得旨。著照所請行。該部知道。又諭著戶部存記。俟二三年後請旨。○賑江南鳳陽淮安潁泗徐海六府州屬。乾隆七年水災飢民。○戊子。大學士等議奏督撫身任地方。向來笞杖等輕罪減省之處。原可自行酌辦。請嗣後凡遇地方雨少時。應清理庶獄者。除徒流等罪外。其各案內牽連待質。及

笞杖內情有可原者。一面量減。一面奏聞。得旨。依議速行。○己丑。諭江南淮徐揚鳳潁泗等處。上年水災甚重。米價高昂。朕念各處營汛兵丁。食用艱難。准在司庫內借支一季餉銀。於今年分作四季扣還。今朕聞得各處被災之餘。春間糧價漸增無減。目下又值青黃不接之際。兵丁不無窘乏。若再扣還借項。則食用更苦不支。朕心深為軫念。著將前借一季餉銀。緩至本年秋成後。於散給冬餉時扣

起。勻作四季扣除還項。以紓兵力。該部即遵諭行。○大學士等議准。左都御史杭奕祿理藩院侍郎覺羅勒爾森署直隸總督史貽直等奏。查徹直屬各州縣莊頭。私行典賣當差官地事宜。一分別應追全價。酌給半價之處。照雍正十三年查徹園頭牲丁地畝之例辦理。一白契典賣官地。准自雍正十三年分別前後。酌給半價。其應徹地內。已種秋麥者。毋庸議給工本。俟秋收後。退交莊頭管業。一莊

頭名下。應追全價半價。不能當時交還。將其養家餘地。及自置田地。或將徹回地畝內。酌量撥出。議定租數。令民人承種。限年以租抵償。至應追全價。著落用印官。及莊頭各半之處。已屬有著。應准恩免。一清查後。倘有故智復萌者。事發照盜買盜賣之例治罪。地方官徇隱。及漫無覺察者。議處。從之。○兵部議准。原任江南總督宗室德沛疏稱。泰興縣境內添建營署。撥兵防守。將凌家橋汛外委一員。

移駐包家橋汎。其黃橋汎再添兵二十四名。并委把總一員。駐劄防守。季家市。乃如皋靖汙交界。添設大汎。派兵十名。並建營署九十六間。從之。○以原任內閣學士劉藻為宗人府府丞。○以詹事敷文。充日講起居注官。○命內閣學士開泰。仍提督江蘇學政。○起革任詹事鄂容安。為國子監祭酒。○以浙江瑞安營副將胡貴。為江南蘇松鎮總兵。○庚寅。總理行營事務和碩莊親王允祿等議准。奉

天將軍額爾圖奏稱。

皇上恭謁

陵寢。由口外進克爾素邊門。道經圍場邊界。自營河以至長山嶺。應修道路橋梁。皆不用民夫。除臣等自率所屬旗下官員兵丁平墊搭造外。所需薪炭。併令兵丁於有木之處伐取。仍令盛京工部帶領屯丁燒造運至尖宿頓次備用。如經過地方乏水。必須掘井備汲。在圍場則專派兵丁。在邊界則旗民共役。自英

莪邊門至盛京。應用薪炭。令盛京工部屯丁專辦。自盛京至山海關之紅牆。應用薪炭。則令地方官率領旗民共辦。自長山嶺下至英莪邊門橋道。令該處兵丁及臺夫修搭。自英莪邊門至

永陵。自

永陵至撫順迤東之二道房橋道。令盛京工部就近率領旗丁修搭。至邊內無木可伐。應動項採買備用。照例報銷。自撫順迤西至山海

關之紅牆橋道。令旗員會同地方官。率領旗民修搭。所需木料。除選用舊料外。不足者亦動項採買。又原任府尹吳應枚奏准。廣寧所屬胡家窩棚起至奉天城止。所有道路橋梁。業經委員估修妥備。毋庸另動帑項。其巨流等河。所需浮橋船并渡船。共四十隻。應派員估用。州縣錢糧興修。其應備米石草料等項。均令盛京戶部籌辦。按站豫備。並通諭沿途商民。均立街市貨賣。不致有誤。得旨依議。但

旗民等修路豫備朕心深為軫念應如何施恩之處屆期具奏。大學士等議覆兩廣總督慶復奏稱安南夷匪交江王占奪保樂拈臺地方其牧馬地方又與粵西之平而水口兩關切近現在嚴飭地方員弁加謹防守至內地客民難以存濟應作何分別放行之處必須明立科條現在知會撫臣兩司妥議辦理查內地民人客居外域值彼處地方多事若果係有業良民親屬可據者該關查驗放回否或托名竄入必致轉滋事端應如該督所請俟會議到日斟酌妥辦至欽州一帶雖稱賊匪退避不敢滋事但邊疆要地防守攸關應令該督轉飭地方文武加謹巡緝探報不時奏聞從之。監察御史陳大玠奏督撫藩臬宜久任以收察吏安民之效無庸屢行調換得旨陳大玠此奏亦是久道化成朕豈不知但人之材具有短長之不齊而省分之大小亦繁簡之互異若其人之宜其地則未

有不久任以徐觀其治者若張廣泗之於黔雅爾圖之於豫何嘗不久而張允隨則撫滇十數年矣是屢行調換豈朕所願此亦用人之苦衷耳工部議准署直隸總督史貽直奏查勘河道事宜。新河下口又光至二光河槽淺隘應開濬。新河南岸并鳳河以東隄埝殘缺應培補。三河頭迤東大清河北岸一帶地勢甚低北風稍大渾水南駛不免攔入清河應於河頭村西起至青光西止築埝一道約長八百餘丈令成坦坡形俾渾水不至下注。半截河隄以下自新莊至東蕭家莊北埝以外為固安永清武清東安各縣醜水匯歸之地舊有引河導積水入鳳河消納近經淹塞應將穆家口以下二十餘里重挑一律通順直達鳳河并將挑河之土就近培築北埝。啞叭河龍河二道舊有涵洞嗣因河由鄭家樓北趨葛漁城旁近涵洞堵閉今河路改由义光以東相距已十餘里應照

舊建設。曹家務舊有草壩出水之地。距永清縣治較近。壩外宜有攔束。應修小埝一道。得旨。依議速行。○免湖北江夏嘉魚漢陽漢川黃陂孝感黃梅廣濟沔陽等九州縣。武昌武存蘄州三衛。乾隆七年被水災額賦有差。○辛卯。大學士覆奏御史徐以升所進經史摺內。請行區田之法。查區田一畝。約費工本銀三兩。雖不能如古六十石三十石之數。大約每畝必可得十餘石。收穫之廣。無逾此者。再查區田之法。本以備旱。北地尤宜。應令北省督撫。飭地方官暫租地畝。按法施行。得旨。此摺不必交與督撫。著交與奉宸苑。令其依法試種。○壬辰。兵部議奏。欽奉諭旨。將親丁虛名裁去。無庸開造。應令各該省將軍督撫提鎮。改為養廉名糧造報。再查武職標營。尚有公費名糧一項。亦係開造虛名。應停從之。○又奏。各處駐防協領。業經引見。其輪班送部之處暫停。以新放到任之日起。三年期

滿。再行送部引見。定例遵行。從之。○予故賞給世子銜弘普祭葬如例。○癸巳。戶部議准。前護理山西巡撫印務布政使嚴瑞龍奏稱。奇嵐。太平。汾西。壺關。臨縣。石樓。應州。大同。懷仁。山陰。靈邱。廣靈。陽高。天鎮。朔州。右玉。馬邑。左雲。平魯。寧武。神池。五寨。臨晉。萬泉。榮河。榆社。和順。平樂。平陸。芮城。吉州。鄉寧。大寧。蒲縣。永和等三十五州縣。土瘠民貧。急需社穀接濟。存倉多者數百石。少者數十石。每遇青黃不接時。缺乏糧種。查司庫存有長餘民欠一萬五千七百八十二兩零。原充公用。請以買穀分貯社倉。照通省條規。按時斂散。從之。○刑部奏。原任刑部右侍郎郝玉麟在閩浙總督任內。犯監守自盜。不枉法贓五千九百九十七兩零。應請革職。歸於叅革。延建邵道鄂善業內辦理。得旨。郝玉麟犯贓獲罪。本應按律定擬。但緣鄂善逢迎賄賂。與起意抑勒求索者有間。況伊年老癯病。久已休廢。且曾為

皇考時封疆大臣。朕心有所不忍。郝玉麟著革職。從寬免其治罪。餘著按律定擬。○兵部議覆浙江巡撫常安奏稱。軍流人犯。僉妻同遣。在立法之初。原令被罪之人。尚獲夫妻之聚。但本犯孽由自作。妻妾究屬無辜。請將不願離者。令從夫而行。其願留者。不必概繩以法。應如所奏。如果本夫情願攜帶妻妾。或其夫不願。而妻妾願從者。或本夫情願攜帶。而妻妾背義不從者。俱行僉發。不得託故規避。如無以上情節。概令免僉。從之。○免湖北襄陽棗陽宜城三縣。并武昌襄陽二衛。乾隆七年水災額賦有差。○甲午。

上詣暢春園問

皇太后安。○諭。今年初舉雩祭之典。朕已降旨親詣行禮。今春偶患小瘳。朕以典禮初行。必欲親祭。以昭誠敬。特命太醫上緊醫治。日來漸次平復。朕約計屆期。已可躬親行禮。縱使尚不能行禮。仍擬親詣壇所。以展肅將祀事。

之意。而太醫等奏稱。患處初愈。皮膚未蒼。正宜靜養。不宜行走勞動。左右大臣等又奏稱。四月雩祭。係每年常行之典。不必今歲一定親行。皇上誠敬之心。至肫至切。實足以昭格穹蒼。與親行無異。此時微疴初愈。正當節勞保重。不但不可行禮過勞。即親詣壇所。未免步履牽動。亦甚非所宜。再三勸阻。朕勉從所請。著遣弘明恭代行禮。○吏部奏。威遠堡等六關口章京。請照盛京五部年滿調京人員之例。以到任日起。扣限二年。將滿時令管理六關口事務衙門。一面會同揀選應補人員。送部引見補放。一面將該員年滿日期。豫報臣部。俟在京有應調缺出。按年滿日期。與現任盛京五部司員。比較先後。指缺擬補。再盛京五路驛站正副監督。三年期滿。亦照此例辦理。從之。○乙未。

上御勤政殿聽政。○刑部議准。閩浙總督那蘇圖奏稱。私鑄制錢。已有定例。私造鉛錢。律無

正條請照國初私鑄銅錢原律為首及匠人擬絞監候。為從及知情買使者各減一等。里長知而不首者杖一百。不知者不坐。得旨依議即行。○以左通政使劉綸為太僕寺卿。○以翰林院侍講學士張映辰為右通政使。○以正藍旗漢軍都統伊勒慎兼管火器營。○丙申吏部議准安徽巡撫張楷等疏請將舊日冗設並無專管之涇縣主簿蕪湖縣櫓港驛宿州睢陽驛定遠縣驛各驛丞一併裁汰。

實錄卷一百八十八

十七

其事務歸各州縣兼理。至貴池縣李陽河巡檢移駐該縣之殷家滙地方。仍令巡緝從之。○禮科給事中鄒一桂奏月選官員有因親老地偏不能迎養者於引見時奏明原准就近補用。但陽為孝養之名陰行規避之計者有之。合於咨部候選時即將親年註明得旨鄒一桂奏內情節固不能保其必無但彼既以孝道陳請而先以不孝疑之是逆詐億不信矣。朕無取焉。○纂修醫宗金鑑書成總修

以下官議叙有差。○免甘肅會寧縣乾隆七年旱災額賦并加賑如例。○旌表守正捐軀之直隸定州民唐春賢妻潘氏沙河縣民張四子妻侯氏安徽桐城縣儒童施應賦妻周氏。○戊戌月食。○旌表守正捐軀之河南泌陽縣民劉洪瑞妻王氏。

實錄卷一百八十八

十八

大清高宗法天隆運至誠先覺體元立極敷文奮武孝慈神聖純皇帝實錄卷之一百八十八

大清高宗法天隆運至誠先覺體元立極敷文奮武孝慈神聖純皇帝實錄卷之一百八十九

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正藍旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆八年癸亥四月己亥。

上詣暢春園問

皇太后安。○諭編修檢討中有能勝知府之任者著大學士等揀選數員交與吏部帶領引見○籌平米價以裕民食諭朕惟萬民以食為天八政以農為本朕御極以來重農貴粟薄賦輕徭諸如籌積貯蠲米稅凡所以為民食計者既周且悉直省地方宜乎糗梁充裕價值平減閭閻無艱食之慮矣乃體察各處情形米價非惟不減且日漸昂貴不獨歉收

之省為然即年穀順成并素稱產米之地亦無不倍增於前以為生齒日繁耶則十數年之間豈遂衆多至此若以為年歲不登則康熙雍正年間何嘗無歉收之歲細求其故實係各省添補倉儲爭先糴買之所致從前議於各省額設常平二千八百餘萬石之外令各省舉行納粟入監之例增定穀數三千二百餘萬石原期實倉庾以備緩急乃諸臣奉行不善經數年之久所收捐穀僅六百餘萬石而米價無處不昂是未收積儲備用之益而先貽穀貴病民之擾豈朝廷立法之本意哉蓋買穀貯倉原恐民有餘粟不知撙節以致糜費是以令官廣為收買以為儲蓄之計若民間需用之際而急於購買商賈悉皆裹足此贏彼絀其理顯然况一省所出應足供一省之用今因一省產米獨多而各省羣趨而糴之則多米之省亦必至缺乏而後已再捐監之人即係本地百姓納捐之穀並非運

自外省。在田間所收。止有此數。積穀之家。既已納之於官。無穀之戶。又必買之於市。將不能蓋藏於家。又不能流通於外。穀愈少而價愈昂。亦何怪其然也。朕思天下米價頻增。乃民食不足之漸。大有關係。當令各省督撫。從長妥計。其常平原額。固不可缺。至於隣省採買。及捐監收米之例。俱應一概暫停。俟豐稔之後。米價如常。再徐徐辦理。其如何酌定之處。著大學士會同九卿詳議。速奏。尋議。隣省採買。及捐監收米之例。暫停。則常平原額。自不可缺。如該處現存穀石。原額之外。仍有捐貯穀石。遇賑恤及常平平糶之用。於原額無需動用者。止將糶價解司庫。無庸買補。若常平原額雖敷。而捐貯無多。適遇賑恤平糶。勢不得不動用原貯穀石。其糶價仍存司庫。令各督撫從長妥計。因時籌畫。如有前項額穀未買。適當本地年歲豐稔。即以糶價陸續買補。至捐監收米之處。亦令酌量地方情形。若

遇豐歲捐米無害於民。照原定應納數目收捐。至御史李清芳奏。各省捐監。俱照福建。江西例。每名以二百兩捐收。則倉貯自多。現在此二省業已通行。不可中罷等語。查各省監生戶部原議。每名捐銀一百八兩。其應納穀石。係照依本省米石價值低昂。分別其江西福建二省。准其酌減捐穀之數者。亦係該督撫酌量辦理。若各省俱照此例。勢必多所更張。再各省捐例。俱已暫停。未便於此二省不行。停止得旨。江西福建仍於一年限滿。該督撫具奏。請旨。餘依議。○庚子孝端文皇后忌辰。遣官祭昭陵。○吏部議准。原任江南總督宗室德沛奏。請將添設之海防道。裁撤為淮徐海巡道。駐劄徐州府地方。塘工事務。歸併蘇松巡道兼管。其揚州一府。就近歸常鎮道管理。原設之淮陽淮徐二道。令其專管河工事務。至分設之福泉縣知縣典史二員。地狹事簡。均應裁

汰從之。戶部議准。貴州總督兼管巡撫事務張廣泗疏稱。新設鴨池河稅計一年收銀一千二百四十八兩零。飭令清鎮縣每年照此數徵解從之。○辛丑

上定孟夏霽祭禮。遣恒親王弘旺恭代行禮。○諭各省定例。督撫盤司庫司盤道庫道府盤州縣庫所以杜虧空防那移也。從前各省上司或借端需索。貽屬員之累。或虛應故事。無查察之實。且或肆筵設席。以相娛樂。納賄受禮。以相交結。種

種弊端。甚非立法之意。二十餘年以來。諸弊皆已肅清矣。但奉行日久。上下司賢愚不一。雖復蹈前轍者尚無所見聞。而或漸露端倪。故相容隱則亦未可定。此各督撫所當留心者。司道之庫原不過照例盤查。至道府之於州縣。一年亦止可盤查一次。不得屢行滋擾。而盤查之時。必須詳核。不得徒存其名。並當各嚴其守。不獨已之一身。不可絲毫濡染。即家人吏役亦不可稍有縱容。如有犯此等弊習者。該督撫等即行叅處。庶盤查

皆有實際。常行不致滋擾。若督撫等漠不關心。倘別經發覺。朕惟督撫是問。可傳諭各督撫等共知之。○諭軍機大臣等。京師正在望雨。近畿之地想亦同然。現在各處情形如何。史貽直亦應奏聞。當此青黃不接之時。或應平糶亦當酌辦。豈以謝事在即。而不加之意耶。爾等可寄信詢問之。○又諭京師正在望雨。河南麥收之期。早於畿輔。望雨更切。現在地方情形如何。雅爾圖何以並未奏聞。或應

有豫為料理之處。可寄信詢問之。○又諭禮部主事畢宗高。發往直隸。交與總督高斌。以州府佐貳酌量題補。留心試看。○又諭戶部員外郎覺和托。禮部員外郎寧福著該部帶領引見。授奉國將軍尚建寶嫡子格圖肯為奉恩將軍。原任奉國將軍拉善嫡子雙貴奉國將軍蘊著嫡子舒明為奉國將軍。未入八分輔國公奇通阿嫡子豐盛額降一等為三等輔國將軍。原任鎮國將軍伊克塔哈嫡

子平麟降一等為頭等奉國將軍。奉國將軍查庫齊嫡子貝和諾奉國將軍西林嫡子富察為奉恩將軍。和碩淳親王允祐庶子弘泰降三等為三等奉國將軍。和碩康親王巴爾圖繼福晉所生之子謨雲降三等為鎮國將軍。○壬寅。兵部奏。武職官員一時患病。該督撫提鎮題請解任者。遊擊以下官員。照文職同知以下之例。准其回籍調治。副將叅將等官。照文職道府之例。於題請解任調理本內。將應否令其回籍之處。聲明請旨。從之。○癸卯。諭軍機大臣等。布蘭泰因伊母年三十守節多年。懇請特恩旌表。在伊固出於孝思。但於國家成例不合。布蘭泰身為大員。因得奏請。其何以處夫官職卑小。以至齊民。不能陳請者。伊摺朕不便批發。可傳諭知之。○戶部議准漕運總督顧琮疏稱。江南徐州衛河南前後兩幫。例支行糧。向在兩處分支。今統歸豫省支給。以昭畫一。從之。○又議准調任福

建巡撫劉於義奏稱。捐監之例。本省捐穀。均按該處折中定價。合足一百八兩之數。今酌定臺灣一府。每石以四錢收捐計算。俊秀應捐二百七十石。廩生一百五十石。三斗。增生二百石。七斗。附生二百二十五石。武生二百五十石。二斗。青衣生三百七十五石。三斗。俱准作監生。與在部收捐銀數相符。從之。○甲辰。大學士等議。覆廣西巡撫楊錫紱奏稱。安南連年多事。奸徒乘機煽惑。內地民人潛入彼處。借端滋擾。其為首之莫武康。李三聰等。俱由內地流入夷境。偽充先鋒等官。應如所奏。令附近之江廣閩粵等省查拏。併令該國盡力擒捕。不必顧忌。至稱安南自韋福琯造逆諒山。該國王調高平。牧馬兩府夷官勦捕。因招致內地民人協力攻打。及韋逆攻破。該民衆不飽所欲。因肆行剽掠。是夷人借匪徒之力。而適以引奸。此風不可不戢。應行文該國王宣示。

天朝柔遠之德。嗣後凡係內地民人在安南滋事者。立即送出。至一應隘口。務須飭令文武員弁。實力防守。得旨依議。速行。○戶部議覆雲南巡撫張允隨疏稱。滇省辦運京銅。自乾隆五年以後。八運并作四運。正運官只府佐州縣一員。不能兼顧。請將正協運官合為一運。委府佐或州縣一員為正運。雜職一員為協運。應如所請。至加運銅觔。亦應照額銅之例。將四運并為二運。每運亦委二員領運。從之。

○免浙江烏程縣民欠未完行糧米折銀一十三萬六錢。○準噶爾部人已圖博羅特夫婦來降。命賞給安插如例。○乙巳。

上詣暢春園問

皇太后安。大學士等奏。今秋

皇上奉

皇太后恭謁盛京

祖陵。係初次舉行大典。應於駐蹕日恭往

祖陵行謁見禮。次日於

隆恩殿照四時大祭禮。讀祝致祭。其行禮節次。臣等酌議。

永陵請自穆奇村至五谷村駐蹕之日。先行謁見禮。回至五谷村駐蹕。次日行大祭禮。亦如之。

福陵請自福錫至宴臺村駐蹕之日。先行謁見禮。回至宴臺村駐蹕。次日行大祭禮。查

福陵與

昭陵相去不遠。請於是日往

昭陵行謁見禮。回至瓦子窪駐蹕。次日行大祭禮。禮畢。即日駕幸盛京。報可。○吏部等部議。准監察御史吳文煥奏。請五城司坊緝盜一事。定為考成。或論案之多寡。或論年之久近。勒限緝拏。三營亦照此例從之。○兵部等部議。准署川陝總督馬爾泰奏。準噶爾夷使復請進藏熬茶。由郭羅克附近地方行走。應行防範。酌派熟練守備一員。帶馬兵一百二十名。各部番兵五十名。於四月內前往駐防郭

羅克之包利軍營。會同該駐防守備。將夷使往回。必由賊番平昔出沒之道。查明切緊隘口。相度情形。先行屯駐。禁阻頑番。不許出外。俟夷使有信。即帶領番兵。嚴密巡邏。並咨明管理青海夷情副都統莽古賚。轉飭彼處蒙古番兵。協力查堵。再泰寧協屬革齋土司。與郭羅克比鄰。亦密通蒙古地方。并檄令阜和營。再派把總一員。馬步兵三十名。并飭明正土司。揀派頭目勞丁。隨往革齋。督率附近土司。派土兵三十名。於相通徑路。加謹巡查。不得袒縱頑番出口。均俟夷使熬茶事竣。撤回。其行裝銀兩。馱載馬匹。口糧鹽菜等項。照例支給。從之。○兵部議准。漕運總督顧琮疏稱。海州一帶。營地遼濶。請於龍溝汛添兵二十名。板浦大伊山。新安鎮三汛。各添兵六名。再龍溝口。係通湖蕩要地。為鹽梟出沒之所。應添遊巡小船二隻。其大伊山等三鎮。各添遊巡船一隻。從之。○免廣東潮陽。饒平。二縣本

年旱災額賦。○丙午。諭。朕從前降旨。將江省清河等十二州縣衛。所有乾隆五年以前未完帶徵銀兩。統行停緩。俟各處年歲屢豐。民間元氣漸復之後。該督撫再行酌量定限。分年帶徵。所以紓民力。恤困乏也。茲又念山陽。阜寧。鹽城。甘泉。興化。泰州。高郵。寶應。淮安。大河。揚州。等十一州縣衛。上年被災亦重。豐縣。碭山。贛榆。三縣。災雖稍輕。而均係連年被水之地。民力甚屬拮据。所有十四州縣衛。乾隆五年以前未完地丁漕項銀米。著照清河等十二州縣衛。一體停緩。并將清河等十二州縣衛。及山陽等十四州縣衛。乾隆六年帶徵地丁漕項銀兩。同五年以前未完之項。一體停緩。俟年歲屢豐之後。該督撫再行酌量奏聞。分年帶徵。又淮安分司所屬板浦。徐瀆。中正。荒瀆。臨洪。興莊。等六鹽場。所有乾隆二三四等年。未完帶徵折價銀一萬六千三百六十餘兩。該督撫等因係鹽場名目。未曾歸入

停緩之內。朕思海濱竈戶。輸納折價錢糧。與民人無異。屢遭水患之餘。元氣未復。今屆麥熟。啟徵。若令新舊錢糧。一時并納。未免艱難。著與民戶一例停緩。以示朕優恤民竈之至意。○江蘇巡撫陳大受奏。起運賑糶米穀。官給腳價。原未包算船料在內。若令船戶輸納。未免賠累。請免徵收。得旨。允行。○丁未。諭上冬今春。仰蒙

上天屢賜瑞雪。二月間又曾得雨。方冀二麥有

收。以裕民食。不意一月有餘。時雨未降。麥苗微旱。待澤孔殷。若再遲遲不雨。二麥將有損傷。朕心甚為憂慮。已在宮中虔誠默禱。著傳諭禮部。即行擇日祈雨。遵照典禮敬謹舉行。○諭曰。孫嘉淦現在候旨。福建巡撫員缺。著周學健前往署理。周學健接到諭旨。即速赴任。不必來京請訓。○大學士等議奏。臣等遵旨詢問岳鍾璜。據稱郭羅克住居之地。長亘一溝。部番千有餘戶。其強健上馬執鳥鎗者。

約千餘人。雖野性難馴。亦因地皆不毛。惟藉打牲度日。生計日窘。遇有行旅。屢行搶劫。現在鄭文煥帶兵出口。相機進剿。雖易於平定。但賊番無以為業。懲創之後。必予以謀生之路。方可永遠寧帖。查有郭羅克相近之柏木橋地方。可以屯種。將來事定之後。安插此處。令其務農力作。庶可資生等語。應請交該省督撫提督等。會同妥酌。於平定之日。將如何安插。可否耕種之處。於善後事宜內詳議。請

旨從之。○兵部議准。兩廣總督慶復疏稱。連陽營新添之把總一員。兵一百名。以額外募設。悉行裁去。將三江協左右二營額設兵內。每營抽五十名。於該協經制千總輪撥一員。帶領駐防。惠州協左營新添兵一百四十名。汛防緊要。應量裁七十名。其應撥補裁去之兵。於左營融撥二十名。提標各營額兵內撥五十名。按年更換防守。從之。○工部議准。貴州總督兼管巡撫事務張廣泗疏稱。上江之

定具八開平字都江王嶺八匡下江丙叔等
汎應建土城城門礮臺礮樓石梯遊擊守備
千總衙署營房外委住房并吏目縣丞衙署
倉廩從之○戊申諭河南開歸陳汝所屬之
鄭州等十三州縣舊有乾隆五六七三年民
借未完之常漕義社等穀共一十一萬八千
石有零例應今年一并催徵完項但此十三
州縣上年收成歉薄若於本年麥熟之後既
徵應納之新糧又完累年之舊欠則民力艱
難可為軫念著將乾隆五六七三年動借各
項倉穀於乾隆甲子年起分作三年帶徵以
紓民力該部即傳諭河南巡撫知之○八旗
漢軍都統等奏

皇上以八旗漢軍生齒日繁改歸民籍查現在
情願為民者一千三百九十六人內除盛京
工部郎中施廷龍等十七員原係漢缺既改
籍為民即與漢人無異應令照舊供職其整
儀尉韓國鉞等三員俱係旗缺既未便因改

歸民籍遽行黜退又不便仍占旗缺應照本
身職銜給與頂帶如願在各該處營伍當差
准其呈明効力如果人才弓馬可觀酌量題
補丁憂郎中施廷敬等三員世職准其帶往
俟服滿歸入班次補用其進士舉人貢監生
及候補候選降調官員並捐納職銜共一百
十七名應照本身職銜與漢人一體考試錄
用其現食錢糧馬步兵拜唐阿並告休叅革
官員以及閒散共一千二百五十六名應照

呈准入各該地方民籍一體編入保甲所出
馬步兵各缺各該旗另行挑補得旨朕前因
八旗漢軍戶口日繁生計未免窘迫又限於
成例不能出外營生特降諭旨除從龍人員
子孫無庸更張外其餘各項入旗人等有願
改歸民籍與願移居外省者准其具呈本管
官查奏原指未經出仕及徵未之員而言至
於服官既久世受國恩之人在伊等本身及
伊等子弟自不應呈請改籍而朕亦不忍令

其出旗。此奏內文職自同知等官以上。武職自守備等官以上。俱不必改歸民籍。餘依議。○旌表守正捐軀之河南陝州民賈見亮妻李氏。○已酉。

上詣暢春園問

皇太后安。○諭前因淮徐一帶上年被災。目下米價不能平減。特降諭旨。將漕標河標兵丁應扣所借一季餉銀。此時暫緩。俟本年秋成之後。米糧價平。再行扣除。今查河標之外。尚

有河葦二營。上年亦經借餉。此時正當照例扣還之際。念伊等修防河工。頗屬勞苦。且同居被災之地。食用亦必艱難。其上年所借一季餉銀。亦著緩扣。與標兵一例。俟秋成穀賤。再扣還項。○諭軍機大臣等。蘇州地方有田之家。多貯米穀。待價昂貴。然後出糶。謂之棧囤。又有嗜利之徒。賄囑關胥。將內地之米。出洋販賣。以圖重價。二者皆為地方之蠹。朕從前屢降諭旨。嚴加申禁。而督撫等奉行不力。

聞此弊尚未能盡絕。可傳旨與尹繼善陳大受。令其留心勸諭。密加查察。務使囤積偷漏之習。悉改前轍。庶幾米價可平民食充裕。○工部議准署直隸總督史貽直疏稱。正定府滹沱河五壩以下。迤東一帶。地處甚窪。大溜衝激。埽灣共七八十丈。埽灣以東。河身漸窄。溜逼隄根。水發時衝刷堪虞。應添建魚鱗挑水壩三座。並於夾空之中。下埽加鑲。俾崖岸得以保護。從之。○庚戌。

上御勤政殿聽政。○諭軍機大臣等。據三保奏稱。山東濟陽臨邑二縣票地一案。據運使李梅賓詳稱。東省票地。有力則充。無力則退。濟陽現商周震臨邑現商李六龍。現在遵例輸穀。胡兆椿認充之處。毋庸議。具詳前來。但該商周震等。既不肯認還丁皂保一項。而伊等本年所輸之穀。亦甫近一半。請即將票地交胡兆椿承業等語。朕已批示。俟喀爾吉善到任後。會同定議摺奏矣。但思此案。在運使既

議以無庸更易。而三保與丁皂保同屬內務府人員。或稍有瞻徇之意。亦未可定。可將此情節寄信喀爾吉善。令伊將此案前後情由。詳細確查。應如何辦理之處。會同摺奏。或此中另有情節。即著伊秉公據實具摺奏聞。以結此案。○大學士等議覆貴州總督張廣泗提督韓勳奏稱。乾隆六年。粵西遷江案內。拏獲叛犯李梅。供出李開花一犯。至今未獲。經粵西督撫提臣通咨查拏。現獲黃三等。并盤獲王文甲。王阿耳等。搜出符紙。刻造木印。陽省勾結。陰謀不軌等情。查該犯捏造妖言。惑愚民。按其供詞。皆出自李開花。覃玉真等。若詳推細鞫。真情無不敗露。李開花等。可以窮搜立致。應令該督等將現獲之犯。逐一確訊。以絕根株。其未獲奸匪。仍遍飭文武員弁緝拏。仍會同各該督撫提督等。加緊巡緝。俾奸徒淨盡。以戢邊隅。得旨。依議速行。○以詹事敷文。為通政使。○辛亥。諭古者創冊府於

西崑。闢芸臺於東壁。是以木天儲彥。石渠掄材。由來尚矣。乾隆二年。朕曾親試翰詹諸臣。因文以考其行。所取者如陳大受等。頗不愧此選也。越今數載。頗聞翰詹諸臣。率從事於詩酒博奕。而四庫五車。鮮有能究心者。將何以華館閣而垂來葉哉。其依往例。自少詹講讀學士以下。編修檢討以上各員。著於本月三十日。赴圓明園。候朕出題親試。其託詞不至者。列名具奏。大學士等即承旨行。○予故科爾沁多羅郡王諾們額爾赫圖祭葬如例。○予故巴林固山貝子諾們額爾赫圖祭葬如例。○壬子。太常寺奏。

天壇神樂觀

顯佑殿從前俱奉祀

玄天上帝。仍舊供奉外。至所供天師文昌等神。應行徹去。其神樂觀廟額。請改為神樂所。得旨。改為神樂所。○癸丑。

上詣暢春園問

皇太后安。諭上下江去年被災之州縣。今麥秋在即。縱使豐收。閭閻亦僅可餬口。若即令輸賦。民力未免艱難。本年應徵錢糧。著緩至十月後開徵。該部即行文該督撫遵行。又諭上下江驛站馬匹。現行之例。芻豆每日給銀六分。在豐稔之年。自足敷用。今歲歉價昂。州縣不無賠累。昨歲被災州縣。其驛馬每日准銷八分。俟秋收豐稔停止。其有收地方。不得援以為例。戶部議准。護理山西巡撫布

政使嚴瑞龍奏稱。右衛駐防八旗官兵馬匹。所需豆石。自乾隆八年起。每年不敷供支。豆四千三百四十餘石。請將常豐倉現存豆五千七百五十八石零供支。以後不敷之處。令應州渾源大同陽高天鎮五州縣。於甲子年為始。改徵本色豆四千三百四十九石解運供支。從之。工部議准。甘肅巡撫黃廷桂疏稱。寧夏府城舊制。門外原建南北關廟。自乾隆三年地震倒塌後。修築郡城。未經一併估

建。又護城濠一道。亦因地震搖平。未估疏濬。請復舊制修理。從之。以江南總督宗室德沛署吏部右侍郎。是月。江南河道總督白鍾山奏。查勘河務事宜。徐屬南岸之毛城鋪石壩。分洩黃水異漲。保護徐郡一帶。此係黃河一大關鍵。從前照舊制。隨時啟閉。宣洩合宜。但近來南岸日漸淤高。北岸漸低。未免側注北岸石林等處。前之毛城鋪。慮其洩水過多。目下又慮其太少。此毛城鋪宣洩機宜。

當隨時籌酌也。一山盱之天然滾水等壩。原以分洩洪湖異漲。保護淮揚一帶。此淮水一大關鍵。前議將天然壩改建二滾水石壩。異漲既可分減。平常之水。又可存蓄。以助清敵。黃惟是舊有之天然二壩。原係土壩。視水勢大小。酌量開放。操縱由人。且土性膠粘。無慮開後隨水衝刷。若改建石壩。則一定不移。此又宜籌酌者也。一高寶諸湖。上承洪澤湖。歸入運河。其勢甚盛。向由高郵之南關五里車

遷及昭關各壩以洩之。流分則勢殺。去漸則力微。此實湖河洩水之尾閘。前議將高郵三壩永閉。另於三壩上下添建石閘四座。復於昭關壩上添建石閘三座。各閘金門止各寬一丈二尺。較舊各壩口門濶至六七十丈者。大相懸殊。未免來水多而去水少。且高郵邵伯一帶。形如釜底。又當諸湖所匯。水勢驟漲。減洩不及。所關匪細。此又不得不再為籌酌者。以上三條。容臣悉心籌畫。務求盡善盡美之處。再奏請旨。得旨。是。須求盡善盡美。以期永有裨益也。○又奏。石林以下。無隄之黃村。韓家塘。各工修守事宜。得旨。如此。先事豫防。庶稍慰朕懷也。福建陸路提督武進陞奏。報古田縣民黃天瑞。首告黃元貴等分散白綾偽劄。誑言惑衆。現已拏獲。各犯得旨。知道了。此等刁風所宜亟為嚴查者也。湖廣總督阿爾賽奏。湖廣倉儲原貯六十五萬餘石。不能廣為平糶。以致米價騰貴。經前撫臣張

楷請添貯四十二萬餘石。原題每石價銀以四錢為率。但米價貴賤。難以逆料。伏思秋稼登場。即在四錢以外。若得如數採買。於來歲青黃不接之時。糶濟民食。在原價則有盈無絀。在窮黎得減價平買。於地方大有裨益。得旨。是。應如是留心辦理者。○又奏。楚省江湖水面扒艚匪賊。糾夥肆行。向來所稱兇旗巡哨者。皆虛應故事。現在嚴飭辦理各事宜。得旨。楚省吏治。不意竟廢弛至此。汝其實力整飭。不可復似前人之空言無補也。至湖北撫臣晏斯盛。其人乃一假道學者流。而其中不能無他。卿其不可為彼所欺。不過藉其材具。令辦事可耳。○署山東巡撫布政使包括奏。東省各屬缺雨。糧價漸增。似宜暫為變通。酌定減價糶賣。以便窮民。如價在八錢以上者。以七錢糶賣。七錢以上者。減去一錢。七錢以下者。減去五分。在年穀順成之秋。仍可照價買補。設稍不敷。准照例通融撥補。至亢旱價

貴地方如止存七糶三。恐不敷接濟。應請不拘糶三成例。就各屬倉儲多寡。戶口繁簡。酌定多糶。以惠閭閻。價平之處。仍照例糶三。得旨。此亟應辦理之事。知道了。○廣西巡撫楊錫紱奏。安南保樂匪徒王輝妙等滋擾未靖。現飭沿邊文武添撥兵役。嚴守關隘。毋許一人出入。得旨。是。諸凡留心。輯寧地方可也。○又奏。內地民人在交。如因匪徒滋擾復回者。交地方保甲約束。其非內地人民。一概攔阻。不許放入。得旨。好。應如是也。○提督廣西總兵官譚行義奏。黔省匪犯黃三。王祖先等。散符挖窖。供出粵民王文甲等謀逆。併拏獲王文甲等解黔。質審各情形。得旨。此等事斷不可分此疆彼界。當思總係國家之事。上緊辦理。而不推諉。則得矣。○貴州總督兼管巡撫張廣泗提督韓勲奏。威寧夷奴者厦等。聚黨潛居。不服家主役使。並將歸主各奴家口。錮禁不放。經官兵搜獲夷奴。並將被禁家口。全

行救出。現在嚴緝首犯。得旨。所奏俱悉。弁兵等相機成事。殊為可嘉。至未獲之首犯。尤宜上緊緝捕也。○張廣泗又奏。黔省各屬。平糶買補出入數目。各據詳報。米價稍平之思南。黎平。石阡。思州。四府。定番。平遠。黔西。普安。正安。五州。修文。仁懷。桐梓。甕安。施秉。天柱。清平。婺川。開泰。龍泉。銅仁。十一縣。并永豐州分駐之冊亨州同。平糶米穀。已全數買補過米三萬四千三百餘石。穀五千一百餘石。又南籠平越二府。開州。威寧。永豐三州。龍里。安南。畢節。普安。平越。餘慶。清溪七縣。平糶過米三萬五千二百三十餘石。穀二千三百八十餘石。收麥二千二百二十餘石。買補過米一萬八千七百一十餘石。穀一千一百九十餘石。收麥一千一百一十餘石。其貴陽。安順。大定。銅仁。四府。廣順。黃平。二縣。貴筑。貴定。清鎮。普定。安平。遵義。鎮遠。安化。印江。玉屏。十縣。平糶過米七萬四百四十餘石。穀四千六百九十餘

石。各該處秋成時。米價昂貴。難以買補。請俟本年秋收後。再為買貯。查未經買補之各州縣。現存倉穀。尚堪接濟。應緩至本年秋成後。買補還倉。得旨。雖然如是。然倉貯足數。自是屬員畏難之事。亦不可聽其日攘之說也。

實錄卷一百九十九

三

大清高宗法天隆運至誠先覺體元立極敷文奮武孝慈神聖純皇帝實錄卷之一百八十九

大清高宗法天隆運至誠先覺體元立極敷文奮武孝慈神聖純皇帝實錄卷之一百九十

監修總裁官經筵講官太子太傅文淵閣大學士文淵閣領閣事領侍衛內大臣稽察欽

吏部理藩院事務正黃旗滿洲都統世襲騎都尉軍功加七級隨帶加一級奉常加二級軍功紀錄一次臣陸

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

奉常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆八年癸亥閏四月甲寅朔諭軍機大臣

等閱準噶爾噶爾丹策零所與提督永常書詞甚屬和順且復饋送永常馬匹永常自應報以禮物但恐伊以噶爾丹策零係外藩不肯酬答著寄信永常俟準噶爾人回去之便亦以禮物酬答噶爾丹策零如其人業經起程則俟來使吹納木喀等事竣回時再行附去○兵部議准署兩廣總督慶復疏稱右翼鎮所轄南雄韶州連江一帶另設葉船三十二隻經年停泊徒糜公帑應裁擇舊料堅固

者改三板船四隻。以為遞送公文差務之用。從之。○乙卯諭據侍郎阿里衮摺奏承審許容叅劾謝濟世一案。與從前孫嘉淦會同許容審理之處。情節多有不符。朕思湖南上下各官。瞻徇成風。固結難解。許容張燦係現任撫藩。通省畏懼。誰敢吐露實供。難成信讞。許容張燦俱著解任。知府張琳。知縣樊德貽。李澎俱革職。交與阿里衮審明定擬具奏。再撫藩一時解任。不便令按察司一人兼行護理。湖南巡撫印務。著蔣溥速行前往署理。蔣溥未到任之前。著阿里衮暫管。其布政司印務。著按察司照例署理。孫嘉淦既革率扶同於前。此時不便會同審理。該部即速行文前去。○戶部議准。漕運總督顧琮疏稱。截留各丁支領錢糧。在先定例扣追在後。若於現運應得錢糧扣還。旗丁未免拮据。請一概免追。從之。○大計河南山西廣東廣西雲南貴州江南河員河東河員暨奉天等處卓異官四十

七員。分別陞賞如例。○旌表守正捐軀之河南新鄉縣民劉治國妻田氏。○丙辰諭陝西寧夏滿兵。乾隆六七兩年。應需糧草。前因寧郡地震。新渠寶豐等縣倉貯空虛。不敷估撥。在於平羅縣估撥糧一千七百二十五石。草一萬八千三百餘束。中衛縣估撥糧一萬六千六百餘石。所需腳價。因從前無給予之例。是以部議未准。但寧夏當震災之後。物價昂貴。不能概估折色。使兵自買。故於改支折價之外。於附近之中平二縣。搭估供支。以濟兵食。其運價一項。勢不能免。況彼時已經照數運交滿兵支用。今若不准找給。小民力難賠補。用是特頒諭旨。將乾隆六七兩年輓運糧草腳價。准其找給。其乾隆八年滿餉。已經循照舊例辦理。亦不至遂為成例。該部即遵諭行。○總理行營事務和碩莊親王允祿等奏。皇上往謁祖陵。沿路安設臺站。請將山海關內附近各站

馬內撥五百匹送赴關外。令盛京刑部侍郎兆惠會同兵部侍郎阿山派員酌量各站需用數目。通融安設應付。其關外各驛調去之馬。交直隸總督會同古北口提督於附近各鎮協營騎操馬內按數暫撥補額不敷。即會同奉天將軍將別項馬調用得旨。依議速行轉通政司右通政張映辰為左通政。以侍讀學士張若靄為右通政。琉球國王尚敬遣使表貢方物。賞賚筵宴如例。丁巳諭。昨於正大光明殿考試翰林詹事等官。朕親加詳閱。按其文字優劣。分為四等。一等王會汾李清植。表曰修等三員。二等觀保萬承蒼于振。張若靄周長發。陳兆崙沈德潛。秦蕙田周玉章等九員。三等夏之蓉朱奎宋楠周煌董邦達。雙慶齊召南。金文淳沈昌宇張鵬翀。周禮秦勇均。世臣程恂于敏中夏廷芝于辰等十七員。四等孫人龍吳紱阮學濬張九鑑葉酉張灝。聞崇張映斗邵鐸周正思馮元欽朱

良表潘乙震萬年茂歐堪善蔡新官獻瑤李文銳張為儀吳嗣富何其睿宋邦綏徐文煜楊開鼎田志勤陸秩興泰金相劉慥沈景瀾唐進賢白瀛傅隆阿姚廷祐陸嘉穎德保肇敏陳世烈黃明懿鍾音朱桓吳泰朱璵林蒲封雙頂路斯道朱若炳馮秉仁喻煒倪師孟龔渤孫景烈楊黼時鄭志鯨陳中龍蔣允焄蔣祖培趙德昌李質穎鞠遜行王錦甄鐸伊興阿丁一燾鄂倫王居正常保住羅愔周連登陸儀吳兆震等七十一員。內編修王會汾著陞授侍讀學士。庶子李清植著陞授少詹事。編修表曰修陞授侍讀學士。編修觀保陞授侍講。編修萬承蒼陞授侍講學士。中允于振陞授左庶子。編修沈德潛陞授左中允。編修秦蕙田陞授侍講。其二等未經陞用之張若靄周長發陳兆崙周玉章四人。於伊等應陞之處具名提奏。中允孫人龍著降補編修。侍讀學士張灝降補編修。少詹事朱良表降

補右庶子。侍講學士潘乙震降補編修。侍讀學士金相降補編修。侍講肇敏降補編修。侍講馮秉仁降補編修。庶子龔渤降補右中允。檢討朱若炳編修倪師孟楊黼時檢討鄭志鯨蔣允焄蔣祖培周連登俱著以知縣用。檢討趙德昌著以主事用。編修甄鐸著以同知用。檢討伊興阿編修鄂倫俱著以七品筆帖式用。編修吳紱阮學濬聞崇何其睿陸嘉穎朱桓檢討吳泰編修路斯道喻煒檢討孫景烈編修陳中龍李質穎鞠遜行王錦丁一燾王居正常保住檢討羅愔陸儀編修吳兆震俱著休致。其四等未經降調休致者均罰俸一年。以示彰瘡。戶部議准。倉場侍郎覺羅吳拜疏稱。制斛口大邊濶。易於滋弊。改用小口。一攬即平。且斛式雖改。而斛內所盛米數。原與部斛毫無虧缺。應移咨工部。照式鑄造。從之。○又議准。倉場侍郎覺羅吳拜疏稱。大通橋排造剝船價銀。准部議將贏餘酌減。查

剝船二十八隻。每隻原定價一百八十六兩。今酌減去五十六兩。實給價銀一百三十兩。共給銀三千六百四十兩。仍於該車戶應領腳價內分作六年扣還。從之。○免雲南寧雲二州無徵公件銀三百八兩零。○戊午上詣暢春園問

皇太后安。○諭昨考試翰林時。由部屬等官。用入翰詹衙門者。皆不與。朕思伊等已陞用翰詹。讀書作文。乃其職分事。既不似侍衛之足供差遣。又不似部曹之日辦簿書。若徒虛糜俸祿。豈不貽素餐之譏。且伊等雖不由庶吉士陞轉。實俱科甲出身。縱使不能詩賦。如作論繙譯。亦豈得謝曰不能。著傳於初七日。齊集圓明園。候朕出題考試。嗣後考試翰林時。即將此等由別衙門改授者。一併傳集。另題考試。永著為例。○己未。諭李清植著為三禮館副總裁。聞休致之編修吳紱通曉三禮。著仍留編修任。在館纂修。照四等例罰俸一年。

○吏部等部議准。四川巡撫碩色等疏稱。綿州所屬之魏城驛。地處衝繁。且統轄五縣。應添設驛丞一員。專司驛務。至該州屬綿竹縣主簿一員。向管茶鹽。今擬歸知縣兼管。其主簿員缺可裁。即以移駐魏城。專管驛務。原設典史一名。歸綿竹縣供役。仍照原著役日期接算。滿後一體考職。原設巡役四名。亦歸該縣。工食照舊扣支。其衙署估計變價。至驛丞衙門。原設攢典一名。仍令著役。舊有驛記。毋庸另頒關防。其俸銀。照劍州劍門驛之例。歲支三十一兩零。添設皂役二名。歲支工食六兩。於綿州地丁銀內扣支。該驛衙署僅存基址。照雜職之例估建。從之。○庚申。諭天津副都統常久。著即赴任所。協同都統阿揚阿辦事。○辛酉。諭昨因考試休致之翰林十九人。著於初十日。齊集圓明園。候朕覆試。○又諭山西提督印務。前命歸化城將軍補熙暫行兼管。朕思山西提督印務。向係巡撫兼理。並

未另設標營。一切提督衙門承應。即用撫標兵弁。今將軍駐劄之地。去晉省路遠。如欲調太原將備兵丁。赴彼承應。殊屬未便。且營員調考。亦未免跋涉之苦。其提督印務。即著太原鎮總兵官馮吉品暫行署理。補熙服滿後。不必交代。○又諭直隸山西沿邊地方。滿洲補放綠旗官員。原議如果弓馬嫻熟。諳練營伍者。不拘年限。以應陞之缺題補。其餘未得題補之員。五年為滿。該督提出具考語。咨部帶領引見。發往有題缺之省分。遇缺題補。如不能熟悉營伍。不宜外任者。咨回各該旗。仍在原處當差。近見五年俸滿。保題發往各省。題補之滿員漸多。不惟伊等一時不能得缺。致有拮据之虞。於綠旗人員陞用之途。亦恐有碍。著交兵部再加詳酌議奏。○又諭初七日考試滿洲。由別衙門陞用翰詹諸臣。既閱其文理。又驗其人才。分別等次。一等。石介赫瞻共二員。二等。世貴文保朱蘭泰德保共四

員三等。法亮、阿琳、吳爾泰、官保、僧格、勒共五員。四等。孔泰、春臺、色臣、蘇岱、桐保共五員。內庶子文保侍讀赫瞻俱著陞授侍讀學士。侍讀世貴陞授庶子。其侍讀學士孔泰、春臺俱著降補贊善。贊善桐保著以旗員對品用。侍讀學士石介遇伊應陞之缺具名提奏。此係初次考試。朕是以從寬辦理。伊等既為翰詹學問乃其本業。若不加勉勵仍復荒疎下次考試時不能屢邀寬典也。○免河南鄭州新鄭永城鹿邑夏邑柘城上蔡新蔡淮寧西華商水沈邱郟城十三州縣本年水災額賦有差。○壬戌。

上詣暢春園問

皇太后安。○諭湖廣吏治廢弛已極前謝濟世一案許容寬誣鍛煉孫嘉淦瞻徇扶同朕已降旨將許容解任孫嘉淦不准會審今又聞楚省盜案甚多營伍更屬廢弛水路無巡江

船隻陸路無會哨官兵所謂遊巡皆虛應故事以致盜賊肆行全無畏懼其水師營汛竟有哨船久泊江岸無人駕用致有船多於兵之謠是孫嘉淦許容身任封疆惟事敷衍虛文並無一毫實際因而文武效尤上下頹廢其罪已至不可問矣。謝濟世一案情節現已顯著孫嘉淦許容亦無可再問著即來京候旨若有應行質審之處著阿里衮奏明留彼俟事竣帶回。○戶部議准江蘇巡撫陳大受疏稱江蘇省額賦之外雜辦項下有牧馬場租等款共銀三萬一千三百六十兩零閏月銀二百一十四兩零均係有款可徵應請按則徵收從之。○又議准湖廣總督阿爾賽疏稱湖北長樂縣與湖南石門縣疆界毗連中有蘆黃山一座請以山脊分水為界山南均屬石門山北悉歸長樂所有山北一帶田糧向隸石門者應飭造冊移撥長樂縣徵收從之。○癸亥鴻臚寺卿梅穀成奏近奉聖諭停

止採買收捐。以足民食。而常平倉貯額不可缺。請於每年起運漕糧。暫行酌截十分之一。以補緊要倉貯。又查各省州縣。離水次太遠。將漕糧改徵折色者。令其仍徵本色。即存貯本州縣。作常平之穀。俟倉額已足。仍徵折色。得旨。奏內所稱將起運漕糧。每年酌截十分之一。以補各省倉貯。殊不可行。且有漕之省分。得以接濟。無漕省分。又將如之何。其所云離水次太遠。改徵折色之州縣。仍徵本色之處。或屬可行。著大學士會同該部議奏。尋議查徵漕之地。不過江浙數省。其西北各省。大半俱不產米。豈能悉轉東南。額運之歲。漕用充各省常平之儲蓄。誠如聖諭。殊不可行。至所奏各省州縣漕糧。改徵折色者。令其仍徵本色存貯。查漕運議單開載。山東河南江南湖廣等省。折米石數。大概非地不產米。即離水寫遠。因而改徵折色。自明至今。數百年來。納戶相安已久。一旦議令仍徵本色。非

特輸納維艱。且恐地不產米。及產米無多之州縣。往他處採買。必至穀貴傷民。殊非軫念民食之意。况折漕價值。每石自五錢至八錢不等。現在各省米價昂貴。民間豈能以五錢至八錢之價。採辦本色一石之漕米。是欲充倉貯。而民已先受其累。應將該寺卿所請。毋庸議。從之。○駐防哈密提督永常奏。噶爾丹策零令巴布等至境。報稱進藏熬茶。仍遣吹納木喀等。於四月初旬。起程前來。巴布等帶有馬羊求貨。臣諭以今非貿易之年。與定例不符。該夷甚為悔懼。哀懇再三。求將疲乏不能驅回者變賣。臣查馬雖疲乏。尚可行走。羊則擦掌之弱者甚多。實難驅回。除將馬匹仍留卡外。准其將羊二千餘隻與兵民交易。仍諭以嗣後非貿易之年。羊亦不許攜帶。巴布等欣喜叩謝。即日起身回巢。奏入報聞。○旌表守正捐軀之安徽阜陽縣民王成妻胡氏。○甲子。諭前次考試休致之翰林。朕於本月

初十日。復行考試。其阮學濬。何其睿。陸嘉穎。王居正。路斯道。王錦。俱著仍留原任。照四等例。罰俸一年。○乙丑。諭軍機大臣等。聞山東查拏老瓜賊。遍張告示於外。如此辦理。甚屬錯誤。凡一應盜賊。皆應捕緝。今專指出老瓜賊。豈他盜皆可不問乎。況捕盜。惟在嚴密。踴緝。如一見告示。則匪類等非。聞風遠颺。即防避愈巧。將漏網者更多矣。可密寄信與喀爾吉善。包括知之。○丙寅。

上詣暢春園問

皇太后安。○諭朕聞山東今年春夏雨澤愆期。二麥有歉收之處。查歷城。章邱。齊東。濟陽。長清。陵縣。鄒平。臨邑。平原。肥城。平陰。茌平。博平等十三縣。並歷城。章邱。濟陽。長清。肥城等五縣。收并之衛地。有未完四五年等舊欠錢糧。並六年災案出借之口糧籽種。因六年秋禾被災。七年夏麥不登。經朕降旨。緩至乾隆八年麥收後起徵。今屆開徵之期。而麥收又

復歉薄。朕心軫念。著寬至本年秋收後起徵。仍照例分別緩帶。以紓民力。該部即遵諭行。○諭軍機大臣等。聞四川風俗。信尚邪教。名目種種不一。其間或勾結匪類。或誑騙錢財。其為地方之蠹。為大吏者。時當留心查拏。嚴行禁止。不可徒張告示。敷衍虛文。至於無知鄉人。迎神賽會。如古人儺蜡之類。亦不必概行查禁。以致滋擾。可密寄信碩色知之。○衍聖公孔廣榮故。以其嫡長子孔昭煥襲爵。○

予故福建陸路提督蘇明良。祭葬如例。○丁卯。

上御勤政殿聽政。○訓地方官整飭風俗。諭國家子惠黎元。教養由來並重。朕君臨天下。宵旰維勤。重農桑。輕徭賦。所以養民者。惟恐不周。至於正人心。厚風俗。皆國之大務。尤所時厯於懷者。凡中外臣工。莫不諄切誠諭。務使民間習尚馴良。訟獄衰息。以漸臻風移俗易之效。乃數年以來。民風仍未還醇。習俗每輕

犯法。豈小民之不可牖迪歟。抑牧令之教化不浹。而德意未孚也。古者朝廷之政。象魏懸書。閭里之教。月吉讀法。三物六行。匪徒具文我

聖祖仁皇帝聖諭十六條。飭紀敦倫。型方正俗。精義超越前古。

世宗憲皇帝萬言廣訓。益加詳明。剴切開導。所以牖民覺世者至矣。使地方有司。竭誠宣布。雖甚愚頑。誰無天性。亦必洗心滌慮。革薄從

忠。駸駸於上理。無如實力奉行。者甚少。即朔望宣講。不過在城一隅。附近居民。聚集觀聽者。僅數十百人。而各鄉鎮間。有講學之所。亦多日久廢弛。全無實際。至所奉諭旨。有關於教民者。亦惟張掛告示。視為通行之常例。焉能使之悅耳革心。翻然悔悟。是以尚氣輕生。狃於性成。作奸犯科。常為俗染。及其怙終不悛。而刑罰隨其後。朕甚憫之。夫守令者。民之父母。古所稱忠信之長。慈惠之師。惟本至誠。

惻怛之意。以感動愚民。使之各自警省。又能隨時隨事。委曲勸誘。諒無有不可化誨之人。亦無往而非敷教之地。即聽訟一端。兩造具在。鄰佑親族。齊集公庭。正百姓耳目所屬。推誠曉諭。最易提撕。不徒現犯者各自愧悔。并使旁觀者亦因此傳播。交相勸勉。若公事稍暇。或講讀編審。或勸課農桑。即可單車簡從。親歷鄉村。遇父老子弟。獎其善良。懲其不率。申之以勸誡。示之以榮辱。循謹者益加鼓舞。即强悍者亦知戒懲。漸摩日久。性情和順。貪利好勝之心不作。而一道同風之盛可幾矣。惟是百姓以守令之行事為觀感。守令以督撫之意旨為從違。為督撫者。果能董率所屬。留心化導。實力奉行。日計不足。月計有餘。斷未有為其事而無其功者。若徒視為虛文。接到諭旨。轉行牌示。遂以為已經遵奉。則亦何益之有。各省督撫等。受朕深恩。畀以封疆重寄。尚其儆惕。黽勉以無負朕諄諄誥誡之至。

意○諭軍機大臣等。直隸一省外連邊徼。內拱神京。畿南一帶。又屬各省官民往來要道。於設營分汛之外。州縣更有捕役巡緝。而報竊之案。仍然絡繹。其最甚之區。莫過大名。正定。順德。廣平。以及開。磁等處。有司研訊現獲之犯。頗有革捕受賄。通同情弊。小竊不戒。劫盜將生。兼之大名。開。磁各處。或通豫省。或隣晉地。數處奸匪。舉足即非所管地方。凡遇失事。緝捕匪易。欲戢此風。必須該地文武。塞源拔本。共為覺察。極力防範。閭閻始得安枕。再河間一協。雖非大名可比。然水陸俱與東省相接。被竊時聞。就獲亦少。朕所聞如此。爾等可寄信與總督高斌。及提鎮等。令其時刻留心。督率所屬官弁。實力稽查。務使宵小斂跡。地方寧謐。○正黃旗滿洲都統福彭。帶領應襲三等男爵人員引見。得旨。此男爵已襲過數次。今明泰絕嗣。不應再襲。仍加恩著增福承襲。與明泰繼嗣承祀。○以輔國公弘曠為

清實錄

十八

宗人府右宗正。○戊辰。鑲黃旗漢軍都統裕親王廣祿等奏。臣等會議杭州將軍富森等。咨送該處與另戶一體任用之養子。業經開檔人等。與八旗另記檔案者無異。請一體另記檔案。查八旗另記檔案人等。其開檔過繼緣由。於雍正八年。令伊等據實檢舉。有現任前鋒護軍者。仍著加恩。准登仕籍。其子孫。并與另戶一體辦理。止將伊等出身緣由。另記在案。今杭州照另戶一體任用人等。係由部查出另記。非自行檢舉。准與另戶一體陞用者可比。若因其効力軍前。本身既與另戶一體任用。子孫亦得另記檔案。殊屬不合。但此內曾經出兵打仗。著有勞績。及弓馬嫻熟之人。亦宜酌量鼓舞。請將開檔人丁內祖父本身。得有軍功者。交部另記。嫡派子孫。作為另戶一體任用。擇才具優長。堪任職官者。照例帶領引見。若出兵並無勞績。及未曾出兵之人。止將本身作為另戶一體任用。其伯叔兄

清實錄

十九

弟之子孫。概不許入得旨。這所議好。依議。○工部議准漕運總督顧琮等疏稱。徒陽運河。自乾隆三年大挑後。應至甲子年六年大挑。上年冬底。該縣曾經撈淺。今春仍然淺阻。莫若即在今年大挑。嗣後仍以六年為期。將兩岸陡高。無礙民居之處。照走馬式。剷削坦坡。不致泥土坍塌。從之。

實錄卷一百九十

子

大清高宗法天隆運至誠先覺體元立極敷文奮武孝慈神聖純皇帝實錄卷之一百九十

大清高宗法天隆運至誠先覺體元立極敷文奮武孝慈神聖純皇帝實錄卷之一百九十一

修明官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級奉賞加二級軍功紀錄一次臣廣桂

總裁官經筵講官太子太傅太學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書領藍旗滿洲都統軍功紀錄五次

學憲紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆八年癸亥閏四月己巳諭天津巡漕御

史濟安布現在患病著回京調理稽察天津

漕務不必另行派員即著稽察通州漕務之

御史李敏第兼管○辛未

上詣暢春園問

皇太后安戶部議准署山西巡撫布政使嚴

瑞龍奏稱武員親丁名糧與文員養廉事同

一例查文職大小官員如因公革職留任除

俸銀例應扣解外仍支給養廉以為贍家辦

公之用嗣後武職亦照此例支給名糧從之

兵部奏巡捕三營。並直隸山西沿邊等處馬蘭泰寧二鎮額設千總。均按各該處所出員缺三分之一補用。前鋒護軍缺出。第一缺補用前鋒護軍。第二第三缺。補用綠旗。再有缺出。照此輪用。其前鋒護軍補用千總二年俸滿之處。應停。均照陝甘等省之例。六年俸滿引見。如技藝出眾。諳練營伍。不拘年限。准指缺題補。其行走怠惰。不宜營缺者。回原處當差。至滿洲千總俸滿時。除不宜營缺駁回外。其保送之千總。引見欽定。或發原省。或發鄰省。以守備題補。或交巡捕營當差。其人材勞績不稱。題補者。停其隨營候推。亦留旗在原處當差。仍給千總頂戴。遇揀選陞用之處。與應陞之人一體揀用。照滿洲千總俸滿之例。從之。○又議奏。直隸山西沿邊并直隸調補內地各缺。補用滿員。均毋庸定以年限。令該督據試看。如弓馬嫺熟。諳練營伍。遇應陞之缺。與綠旗人員一體揀選題補。如有不能

熟悉營伍。不宜外任者。不拘年限。隨時咨部。仍照定例發回。各該旗在原處當差。俟原官應陞缺出。先儘該員陞補。所遺沿邊營缺。仍由在京旗員揀補。其餘未得題補之員。均與綠旗人員一體較俸陞轉。所有五年俸滿保送之例。應停。從之。○工部議覆。直隸總督史貽直疏稱。河道工程鑲墊土方。應用葦二土一。及葦土各半之處。業據查明。造具平險清冊。應將所開險工處所。准用葦二土一辦理。至冊內清河永定通永大名四道。需用遠土。俱照江南之例開造。獨天津道開農忙農隙之月。每十丈遞加運價。殊未畫一。應照江南之例。准給從之。準噶爾部人阿喇布札札木蘇等。各率屬來降。命賞給安插如例。○壬申諭軍機大臣等。聞江西私鹽充斥。官引至於難銷。此皆地方官玩忽疎縱之所致。可寄信與巡撫陳宏謀。嚴飭所屬。實力查拏。務使私販杜絕。官引通行。以肅鹽政。○刑部奏。旗人

認買官房。將俸祿錢糧。坐扣抵償。除未滿年限。私行拆賣者。仍照例治罪外。其已完帑項。作為本人產業者。或有因頽敗無力修葺。或萬不得已。拆賣濟急等情。城內報步軍校。城外報司坊官。批呈存案。准其拆賣。至於兵民自置產業。無論院內臨街。如有以上情節。均聽自便。從之。○工部議准。原任兩江總督宗室德沛疏稱。江省各屬水陸大路。緊要塘汛。共二百七十三塘。必須修造完整。所有現壞需修者。以工竣日起限。保固六年。每年營房每間。哨船每隻。各給歲修銀二錢。六年后。每間每隻。各給歲修銀三錢。墩臺牌坊木樓等項。不計年分。每項每年各給歲修銀五分。其現修堅好。無庸估費者。照例撥項歲修。從之。○以鑲黃旗滿洲印務叅領赫本額。為鑲黃旗蒙古副都統。○癸酉。諭曰。長蘆鹽政三保。現在患病。一時難以痊愈。著解任回京調理。其員缺著江寧織造伊拉齊補授。伊拉齊未

到任之前。著傅清暫行兼管。江寧織造事務。著西寧管理。西寧所管荊州關稅。著照例交與該撫兼管。○理藩院奏。和碩額駙固山貝子色布騰多爾濟故。其母福晉將誥命繳還。并呈稱現在看養幼孫索諾穆色楞。懇代轉奏。查誥命並無世襲罔替字樣。所請應毋庸議。得旨。色布騰多爾濟之貝子。經該院議定。不合承襲等語。朕思伊父阿爾布坦。原係王爵。施恩令色布騰多爾濟承襲固山貝子。今伊病故。應不准襲替。但念伊係孀婦孤子。並無倚靠。實屬可憫。著加恩令色布騰多爾濟之子索諾穆色楞承襲鎮國公。餘依議。○兵部議准。山海關副都統富和奏稱。酌量形勢。變通事宜。一協領二員。應分左右二翼。照駐防例。再設左右二司。即用兩翼協領關防。仍於八旗佐領官內。選幹練者二員協辦。所有兵丁八百名屬焉。一每佐領下。設立領催五名。前鋒各五名。除原有領催二十名外。再挑

二十名。所添前鋒。即於八百兵內挑派。其管轄前鋒官員。即於本處防禦驍騎校內酌派。一每佐領下。設立烏鎗兵二十五名。除原有之烏鎗一百桿外。再添一百桿。合隊操練。一每旗各安礮一座。一兵丁所需什物。採買可得。毋庸挑取匠役。一請置副都統畫纛各一桿。其佐領防禦。每員置驍騎營纛幟一桿。領催等每人設小旗一桿。俱按旗色。其前鋒四十名。設前鋒營小旗八桿。一兼轄喜峯口。冷口。羅文峪三處。除羅文峪原未設烏鎗。毋庸添設外。其喜峯口。冷口各添五十桿。四品協領一員。防禦二員。應與羅文峪之防禦一員。各按旗置纛一桿。再此三處。除原有之領催外。再添喜峯口八名。冷口十名。羅文峪六名。從之。○甲戌。

上詣暢春園。問

皇太后安。○豁除江蘇吳江震澤二縣坍沒田蕩八十五頃六十四畝有奇。其新漲田蕩四

百三十四頃四十七畝有奇。照例升科。○乙亥。大學士等議奏。甘肅河州一鎮。控青海之門戶。扼黃河之險塞。界連川省。控制番夷。其間二十四關。在在扼要。從前關民屢被擾害。雖撥兵巡防。每關不過數名。不足捍禦。因而團練鄉勇。自為防衛。於本關農戶中。選強壯子弟輪流看守。一歲不過數次。餘仍力田之日。即係寓兵於農之意。查二十四關。舊設鄉勇。合計九千六百五十餘名。分守各關。並非聚集一處。團練以來。已十餘載。未聞稍有不靖。且此項鄉勇。並非無業鑽充。以謀衣食。散之甚易。第十餘年。堪資保衛。一旦不令團練。恐啟番回之心。所有河州二十四關鄉勇。應仍留團練。再各關原設有總領二名。人數少者總領一名。每五十名。設隊長二名。向係河州知州委用。應仍循舊例。不必另選民把總董率。至各關器械。年久損壞者。即於存營舊器內撥給。不必另製。其西寧鎮屬歸德一所。

力有限軍器無出請在西寧鎮存營之鳥鎗
予予中量為撥發分交民兵操演并令同城
都司指示該道府順便查驗所充之民千總
把總頭領等由西寧道給發委牌從之○以
刑科給事中長柱為湖南布政使○丁丑
上詣暢春園問

皇太后安○詣

大高殿行禮○還宮諭嗣後閏月常朝所用
樂章視時憲書所載交節之前用上月宮調

交節之後用下月宮調永著為例○戶部議
准寧古塔將軍鄂彌達疏報寧古塔伯都訥
阿勒楚喀三姓琿春等處開墾事宜應按照
各該處佐領若干員每一佐領編立農器一
具每農器一具派三人墾種查寧古塔義倉
現存糧五千五百四十六石零銀七百二兩零
伯都訥義倉現存糧六千一百一石零銀三百
五十三兩零阿勒楚喀義倉現存糧二十八
百四十二石零銀一百八十七兩零三姓義

倉現存糧四千四百四十四石零銀一千二
百八十兩零琿春義倉現存糧一千六百三
十二石銀三百一十二兩零寧古塔佐領十
阿勒楚喀佐領八三姓佐領二十琿春佐領
三每佐領編立農器一具伯都訥佐領滿洲
十各編一具蒙古二共編一具每具派出三
人墾種需牛共四十八隻其置立犁鏵等件
於賣糧銀內動用從之○戊寅

上御太和殿視朝文武陞轉各官謝恩○諭甘

寧錄卷百七

九

省地方山土磽瘠風氣苦寒民力艱難甚於
他省一遇歉收所有應徵錢糧往往不能按
期完納如蘭州府屬之皋蘭狄道金縣靖遠
平涼府屬之平涼涇州靈臺固原鹽茶廳鎮
原靜寧華亭慶陽府屬之安化寧夏府屬之
中衛花馬池甘州府屬之張掖等處既有本
年正額銀糧及本年借貸籽種口糧又有從
前借欠籽種口糧分作六年帶徵之項統應
完納加以積年舊欠地丁銀糧為數繁多一

時交集小民力難兼營深可軫念朕思本年額賦係惟正之供例應輸納本年所借籽種口糧春貸秋償亦應如數交還至於從前借欠之籽種口糧已分作六年帶徵無庸再緩惟有舊欠地丁銀糧自乾隆元年起至二三四五六七等年積算其數較之一歲正額幾至加倍若責令一時輸將民力實為竭蹶著將皋蘭等十六廳州縣節年舊欠地丁銀糧分作四年帶徵以示朕優恤邊民之至意該部即遵諭行○己卯

上御乾清門聽政○以內閣侍讀學士德通為詹事府詹事○庚辰諭軍機大臣等京師及畿輔地方時雨霑足山東亦得透雨已曾奏到惟是豫省從前望雨最切近日曾否得雨現在情形如何雅爾圖何以並未奏聞爾等可傳旨詢問令其速行具奏○調江南淮揚道陳景瀛來京引見○是日起

上以夏至祭地於

方澤齋戒三日○壬午上詣

北郊齋宮齋宿○訓飭文武官約束刁民諭國家愛養斯民惟恐一夫失所為百姓者正當奉公守法以受國家惠濟之恩乃看近來情形地方偶爾歉收米糧不足價值稍昂督撫未嘗不籌畫辦理而刁頑之民遂乘機肆惡招呼匪類公行搶奪目無法紀如果係窮民乏食自當赴州縣衙門告糴若官員辦理不善亦當赴上司衙門申訴豈有借穀少之名遂擾害良善挾制官長逞其兇鋒行同光棍此則鄉邑之大蠹不可不重加懲治以儆頑風者乃無識之督撫間遇聚眾搶奪等事欲自諱其平時化導之不力與臨時禁約之無方止將州縣官叅劾一二員以卸己責而於搶奪之案朦混歸結無怪乎刁風日長而無有底止也至於有司或營私作弊激成事端或玩視民饑困苦莫卹該督撫自應據實嚴叅未有百姓罷市哄堂恃強凌弱而可

以姑息養奸者。又如國家設立營制。原以彈壓地方。乃近日汎弁兵丁。遇有搶奪之事。類皆觀望。淡漠視之。豈設兵衛民之本意。著督撫提鎮嚴飭所屬弁兵。協同文員實力查拏。若有推諉不前者。亦即嚴叅。交部議處。○是月。黑龍江將軍博第等奏。本屬食俸官員。例入軍政。其不食俸之打牲索倫達呼爾等處官員。亦已奏明。與食俸者同入軍政。惟駐劄呼倫貝爾之厄魯特巴爾呼等官。乾隆二年

實錄卷百九十一

十二

軍政之期。前任將軍未經奏入。請嗣後凡遇軍政之年。將此項官員一體入於軍政。得旨。好。直隸按察使翁藻奏。勤宣德意。在親民之牧令。常與民接。如於公事稍暇。親詣鄉村。遇耆老則優禮以待之。遇幼孤則施恩以撫之。又於父老相見之時。詢其子弟之賢否。孝友者面加贊揚。乖違者切加訓飭。則雖有强悍不馴者。當不敢犯尊陵長。而性情和順者。益知祇父恭兄。四境之中。周流數次。官民相

親。初無扞格矣。得旨。所見好。實力行之。○直隸提督保祝奏。嗣後募補兵丁。除餘丁土著民人之外。必須察明來歷。方許入伍。並陳率屬各加訓練等情。得旨。知道了。諸凡實力為之。○天津鎮總兵官傅清奏。鹽臣三保向患痰症。三月內。見其言語澁滯。心神恍惚。今閱兩月。復往看視。家人仍以病辭。未見。竊以鹽臣卧病日久。一切稅務。委之家人胥役。恐朦混滋弊。得旨。已有旨命汝查辦。非謂如是而已。須清查胥役家人。乘機滋弊。重處以示警。三保若有應行叅處者。不妨叅奏。豈有如此糊塗具奏之理。又奏。謝署理鹽政。得旨。雖署理數日。不可不盡心。慎之。署兩江總督協辦河務尹繼善奏。暫停宣諭化導之欵。差恐愚民無知。羣聚呼號。緩急輕重之間。難以措置。得旨。多一宣諭化導。愚民自然加一番提撕警省。況教化者。國家之大務。卿讀書人。不可緩視之。○蘇松鎮總兵官張天駿奏。謝

實錄卷百九十一

十三

調補福建臺灣鎮總兵恩得旨。汝前在廣東頗不滿朕意。茲復用汝重任。汝當勉力。海疆重地。不可用小聰明也。安徽巡撫范璨奏請將鳳潁泗滁和等處災民。乾隆六年七分借給麥種。准於甲子乙丑等年分年帶徵。以紓民力得旨。好。應如是者。閩浙總督那蘇圖奏。拏獲海洋盜首余士大等一十二人得旨。未必止此數人。總宜時刻留心。福州將軍新柱奏。各省駐防驍騎校缺出。請於領催中擇其熟諳旗務。長於管轄者題補。毋庸拘定挨次記名成例。得旨。應如是者。福建陸路提督武進陞奏報。南平縣奸民。抑勒官府開倉平糶。聚眾罷市。現在嚴緝各犯。得旨。所奏俱悉。其為首奸民。必不可使漏網也。又奏報福州延平建寧汀州邵武福寧等府雨水過多。收成歉薄。得旨。所奏俱悉。人情安帖否。湖廣總督阿爾賽奏。湖南布政使張燦於平糶米價。並不悉心調劑。巡撫許容近

日諸事恍惚。恐有貽誤。得旨。早有旨了。待汝奏耶。汝亦慎之。湖南按察使明德奏。嗣後遇聚眾搶刦等事。不許混叅有司。以卸已責。務須實力查拏辦理。得旨。前日阿爾賽欲叅縣令朕批示。不可不謂汝見到此。好勉之。河南巡撫雅爾圖奏報。欽差御史張漢密辦查賑事宜。乃竟私致布政使趙城手書。宣露關通書內種種危言。事悉無憑等情。得旨。張漢幾事不密。自有應得之咎。若所察果實。是汝玩視民瘼於前。又文過飾非於後矣。署山東巡撫布政使包括奏。東省雨澤愆期。除報齊勘實循例借貸外。有收成六分。於例不應成災。而計其所獲。與成災之五分同者。請動常平等穀出借。並予免息還倉。得旨。著照所請行。巡視河東鹽政吉慶奏。晉省民情徧急。易起忿爭。責成地方州縣。宣講聖諭外。仍諄切化導。於准理詞訟時。聚集多人。尤宜就事開示。以感動其心。庶人知自懲。得

旨所奏俱悉。汝見到此。固屬可嘉也。署川陝總督馬爾泰奏。駐防哈密兵丁設卡。原以偵探聲息。保護回民。本非戰兵可比。宜令撤回。查現在駐防兵共四千五百名。內二千五百名。於乾隆五年更換到防。上年已屆撤換之期。應即撤回。其六年到防之二千名。雖未滿二年。為日較淺。然現據準噶爾夷使進藏熬茶。於二月內起身。約計閏四月內。可抵哈濟兒地方。將來即由東科爾貿易赴藏。亦不過再遲兩三月之事。俟夷使過後。再行撤回。至赤靖橋灣布隆吉等處防兵。原議令於新兵到後。即行撤回。而防所馬匹。亦令撥給安西新兵騎操之用。軍器鳥鎗。并令給交。以資操演。應即遵照通行撤回。再各標鎮營備戰馬駝。安西一鎮。為首先禦侮之所。尤須挑撥健壯者充用。如不足額。於內地各鎮標營孳生內撥補。如仍不敷用。即動帑買足。其肅鎮備戰兵丁。與安西相去不遠。馬駝亦屬緊要。

應將此二鎮馬駝豫備壯健。現飭內地各提鎮營分別辦理。得旨。所奏俱悉。甘肅巡撫黃廷桂奏。甘涼西肅一帶。有青衣僧黃衣僧孳僧各名色。托跡緇黃。並非閉戶焚修。請勒令還俗歸業。得旨。徐徐辦理。不必如是急遽為之。又奏。河西甘涼肅一帶。尚未得有透雨。得旨。覽一得透雨。即便奏聞。定邊左副將軍額駙策凌等奏。厄魯特之達什車林來降。報聞。又奏。本年三月。前赴軍營。據叅贊大臣詳稱。准烏里雅蘇台叅贊大臣咨稱。來見貝勒之烏梁海護衛十二名。可否令其進卡請示。查此等烏梁海。經歷任將軍。並不禁其來往。仍准其入卡等語。應如所覆。照前例行。惟嚴查原進人數。不可多少得旨。是。應如此辦理者。又奏。北路軍營叅贊大臣。前奉旨。以副都統拉布敦更換阿岱。以副都統銜烏爾登更換塔爾瑪善。今已於四月二十七日。俱到軍營。塔爾瑪善。即於是日起程赴京。

至阿岱應令前往烏里雅蘇台更換慶泰。但彼處離大營千有餘里。驛傳往來不免滋擾。請令阿岱仍暫住大營。俟閏四月間令拉布敦往代慶泰得旨。慶泰頗欲多事。一切當加意經理。如有不妥處。即行奏聞。四川提督鄭文煥奏四月二十日帶領官兵行抵出皂駐營。臣未出口之先。檄調郭羅克正副土目齊集黃勝關外聽候宣諭。該酋等聞風知畏。隨有正土目丹增副土目索布六戈噶杜他

清實錄

十八

折旺蚌等來松稟訴所屬部番恣為夾壩。黑人多白人少。我等力弱。不聽約束。情願請兵仗威將搶刦西寧各案賊賊指名擒獻。以分黑白。不致再壞朝廷地方。經臣反復究詰。俱各俯首知罪。矢口輸心。請以子姪為質。願圖自効。乃諭以朝廷寬大。姑緩鋤勦。准與發兵臨巢。俾其効力贖死。隨派員帶領漢土官兵一千五百餘員名。先後齊赴郭羅克地方。督率該土目等自相舉報。擒賊獻贓。其為質子

姪即令就近送交阿壩土千戶墨丹仲收管

照應。釋其疑畏。得旨。看此光景。似易辦。但不
可易視之。仍應慎重妥算。為是。而尤以令其
革面革心。永保無事為要也。廣州將軍署
兩廣總督策楞奏桂林米價。每石已至二兩
以上。恐本地存倉米不敷接濟。將東省運回
楚穀就近截留一萬石。仍於梧倉買備平糶
項內撥還東省。再於柳州府倉內撥穀五千
石運省平糶。其運脚等在糶價盈餘內開銷。
至撥運之後。尚有不敷。亦即在柳州就近酌
撥得旨。好。應如是詳酌妥辦也。○又奏西省
貼近安南。值該國盜匪竊發之時。邊防尤關
緊要。飭令文武大員督率漢土官兵。在於各
關隘口防範稽查。以杜漢奸夷匪潛出竄入。
得旨。是。應如是嚴我邊防也。○又奏報廣東
潮陽縣貴峙地方奸民李阿科等聚眾為匪。
現已查拏到案。總在嚴懲首惡之罪。稍寬脅
從之條。得旨。好。○又奏謝恩請訓。得旨。內外

清實錄

十九

如一。始終不貳。此外更何訓汝之有。○廣西巡撫楊錫紱奏。安南諒山地方匪徒王輝妙等滋擾。現已大敗。據太平府屬之閘門隘員弁稱有避難民人求入內地者。查此等民人不避難於王輝妙攻破諒山之時。而避難於潰敗之後。安知不有附和匪徒。藉此逃竄。應令查訊。方准遞回原籍安插。至於夷地子女。則一概攔阻。不令一名入內。得旨。所見甚妥。嘉悅覽之。○廣西右江鎮總兵官畢勝奏。陳地方營伍情形。得旨。汝當嚴疆要鎮。一切整飭營伍。和輯兵民。須勉力為之。又奏報。拏獲書符挖窖之黃三。王祖先等犯。俱供出李開花同案。現在上緊追究。得旨。李開花至今未獲。汝等均應留心也。○署雲南總督張允隨奏。安寧州境內無水田地一萬三千五百餘畝。若於高處築壩蓄水開渠。每年可多收倉斗穀二萬五千六百餘石。請於官莊變價項下供給各業戶。乘時興工。得旨。所奏俱悉。

○又奏滇省開化。廣南。臨安。元江。普洱。五府地方均與安南接壤。除臨安。元江。普洱。三府地方仍照常防守外。其廣南府屬通交路。逕有蔑那郎海二處。先經安設塘卡。每卡撥兵練二十六名。今再添兵四名。土練十名。每卡共兵練四十名。又板江河董昂美湯那黑董布里妥董布街一帶。與開化之蝴蝶普元。牛羊等處相連。先經安設七卡。每卡安兵五名。土練十五名。撥千總一員。駐劄董布。今再於附近開化之草鮓黑打咸竜那撒四處。各添一卡。又鬼馬石碕地方。距董布甚遠。稽察難周。應再於適中之芭皓地方。設立一汛。安設九卡。仍令該管員弁會哨巡查。至開化一府。東西南三面均與安南接壤。水陸共六汛。其水路最要者。壩灑一汛。烟瘴惡毒。遠選服習水土之千總一員。帶兵協同土練更替稽查。陸路最要者。牛羊一汛。除原設把總一員外。另撥外委千總一員。帶兵五十名。同彼地土

練駐劄防守再查馬白隘口商稅歷係開化府同知經收徵解應責成該同知設立腰牌鈐烙火印凡遇客商出口貿易查無違禁貨物填給腰牌於進口時繳驗查銷至交趾難民如有流入內地者該地方官查明給與口糧路費押送出口得旨有治人無治法以此意善行之可耳又奏安南自變亂以來村寨十室九空賊兵欲掠無所其勢不能久居但都竜一廠聚集民夷不下十餘萬內游手

實錄卷一百九十五

三十三

無業之徒若乘機從賊則廠地難保無虞不可不嚴加防範除開化鎮已調撥存城兵四百五十名前往馬白汛賭呪河境上駐劄彈壓揚威外又檄調廣羅協官兵三百員名星赴開化聽候該鎮臨機調遣以壯軍勢並令出示於都竜廠張掛曉諭客民人等竭力堵禦保固廠地毋得驚竄失業得旨應如此辦理者又奏報開通金江上游各灘工程垂竣試運京銅並無險阻得旨所奏俱悉若能

常行無阻誠善舉也

大清高宗法天隆運至誠先覺體元立極敷文奮武孝慈神聖純皇帝實錄卷之一百九十一

大清高宗法天隆運至誠先覺體元立極敷文
奮武孝慈神聖純皇帝實錄卷之一百九十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部巡理院事務五品頂戴滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文學殿大學士文淵閣領閣事稽察欽奉 上諭事件處管理刑部戶部三庫事務

世襲副都尉軍功加十九級隨帶加二級又加二級臣董誥內大臣戶部尚書領侍衛內大臣滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆八年癸亥五月癸未朔夏至祭

地於

方澤

上親詣行禮。詣暢春園問

皇太后安。幸圓明園。諭凡遇鑾輿巡幸。令

管轄道路之護軍等。加意約束不得踐踏田

禾。如有不遵。定將該護軍懲責。護軍統領章

京等一併處分。又諭朕奉

皇太后前往奉天恭謁

祖陵。擇於七月初八日啟行。一切應行事宜。著

各該衙門先期備辦。○甲申。諭大學士等。江
南淮徐等處。從前疊被水災。淮安分司所屬
板浦。徐濱。中正。完。濱。臨。洪。興。莊。等六鹽場。所
有乾隆二三四等年未完帶徵折價銀兩。朕
已降旨。令與民戶一例停緩。俟屢豐之後。再
行分年帶徵。今聞泰州分司所屬鹽場。亦皆
坐落阜寧鹽城。興化。泰州。等處。所有廟灣。富
安。安豐。東臺。何垛。梁垛。丁溪。草堰。劉莊。伍祐。
新興。等十一場。上年被災亦重。竈戶力量艱
難。其未完乾隆二三五等年帶徵折價銀
通計一萬六千六百七十二兩零。應與淮安
分司所屬板浦等場。一例停緩。以示優恤。其
淮安分司所屬板浦等六鹽場。尚有乾隆六
年被災帶徵未完銀四千一百一十餘兩。彼
地民戶未完六年分丁地漕項。朕既已降旨
停緩。此項未完折價錢糧。亦准照民戶一例
停緩。該部即遵諭行。○諭軍機大臣等。原任
福建巡撫王士任。居官劣跡種種。朕從寬令

其在工程上効力贖罪。乃伊不知感激朕恩。狡詐百出。並不實心承辦。今發往臺站。仍不知力圖報効。殊屬可惡。可寄信喀爾吉善將伊原籍所有資產。密行查勘。據實奏聞。但王士任詐偽多端。不無豫行寄頓。隱匿務須留心訪查。○總理行營事務和碩莊親王允祿等奏。查凡遇鑾輿行幸。扈從大臣官員人等。安營各有定處。宗室王公。應在管聲音堆撥外就近之地。大臣等。應隨領侍衛內大臣所指之地。未入班之滿漢官員及侍衛拜唐阿等。各隨其班次。章京護軍等。各隨本旗之纛。鑲黃正紅。鑲白。三旗在營後。正黃。鑲紅。鑲藍三旗在營西。正白。正藍。二旗在營東。近年來漸不遵依。今酌定章程。分為左右翼。宗室王公大臣。滿漢官員。及侍衛。拜唐阿。章京。護軍。八旗等。仍遵向例安置。其拴馬支杆。應設於正門左。鑾儀衛巡更處。皇上起行。應設於管聲音堆撥內。

皇太后起行。應設於正門左穿堂帳房次層帳房之間。再各部院總管衙門所屬官員。內務府護軍及太監等。亦令分別安置。其別項人等。恐無約束。應特派章京四員。并護軍校護軍等。分別指示。其蒙古人等。仍交理藩院。令於大營十數里外安設。前後牧馬人等。隨時起行。不准黃夜出入哨內。得旨。好。依議。○大學士等議覆。署兩江總督尹繼善。江南河道總督白鍾山等奏。河務請復舊制。一毛城鋪設立減水壩。下疏引河。原以分洩黃流。保固北岸。使減出之水。由五湖達洪澤。經數百里澄清入湖。藉以助淮敵黃。前議毛城鋪壩宜於宣洩。復恐進水漸多。請將壩門水底。用亂石填高。以慎蓄洩。今該署督等奏。請仍照舊制。并將倒勾河道開通順直。其從前所築壩堰。有礙宣洩者。量為平徹。所有議填亂石之處。無庸施工。查黃河至徐州。地勢緊束。不能暢流。若不分洩南岸。則北岸必至受險。此毛

城鋪之減水壩固宜量為疏通以保北岸新工。但分洩過多則黃水日進五湖等處不免日漸淤墊。即豫省永城地方及上江近河處所亦須保其無患。且河流既分水勢太緩河身又必至日高該署督等既議將倒勾河道開通順直壩門不用亂石填高其將來不致進水漸多河身漸高之處尚應詳籌一洪澤一湖原賴以蓄水敵黃有高家堰以來全湖之水為漕運之藩籬淮揚之保障過洩則黃強淮弱倒灌可虞。所有天然南北二壩前議以洪湖之水宜蓄而不宜洩恐天然壩徹底開放必致湖水受虧。惟虞出格之水湖不能容請將天然壩改建滾水石壩復照山盱三滾壩之式量高一尺不使過水太多。今該署督等奏稱若改為石壩將一定不移無可增減。惟土壩堅平如石平常之水不使涓滴外洩倘遇異漲可視水勢大小酌量尺寸開放不必更改石工等語。查淮水全注洪湖藉以

敵黃勿令南瀉此向來之定論。其天然南北二壩設立之初僅以防非常異漲在平時斷不可稍洩。前議改建滾水石壩正恐過水太多酌定尺寸水大則不待開放自能漫過水小則宜於貯蓄無庸開放。是石壩有自然之節制與土壩之操縱由人並無兩意。若謂土壩不限尺寸可以隨人開放又與該署督等所稱平常之水不得涓滴外洩之意有妨。必須斟酌盡善。一高寶諸湖受水甚多關係淮揚一帶州縣乃設立南關五里車邏及昭關各壩分注下河歸海。前議南關等壩一經開放則下河必致難受。仍行永閉另於三壩上下添建石閘四座復於昭關壩之上添建石壩三座抽板開放節制由人。今該署督等奏稱仍循舊制以時啟閉使湖河之水不致泛溢。所議石閘七座無庸添建。查上游分洩之水全歸高寶高寶為衆流所匯不能容納不得不開高郵三壩注於下河雖興鹽等處有

湖蕩瀦水。有大海出水。其實衆水所歸。將以爲壑。該署督等。但謂間或被水。究屬有限。又謂雖釜底之水。不能全消。而有餘之水。可以導之入海。儻必待其既淹。而後入海。卽已不免其魚之嘆。此又不可不熟慮也。且鹽興等州縣。該署督等既稱尚候委員查勘。則注江注海。果能疏濬深通。可免漲漫之處。亦未可以懸定。以上三款。皆上下河關係緊要之處。最宜詳慎。其毛城舖等工。氣脈聯貫。雖分三處。實止一事。不可彼此有妨。若果事出萬全。卽成議甫定。亦當立爲變更。如審其利而忘其害。恐一處未協。動關全局。卽屬員建議。大抵輟轉隨人。輿論難憑。不免彼此互異。毛城舖之宜分也。北岸之患息。而永城一帶人抱深憂。天然壩之宜堵也。黃強淮弱之患息。而宿靈虹泗浮議又起。若南關等壩閉。則高寶之民怨咨。開則鹽興之民騰謗。種種搖惑。必通盤籌畫。實有確見。始可保其處處奠安。臣

等公同酌議。上年異漲已過。現在各工平穩。不妨從容詳慎。歸於至當。該署督等所請。仍復舊制之處。俱俟伏秋汛過。相其機宜。再爲定議。得旨。此議是。依議。○又議奏滋生銀兩。原以惠濟兵丁。必兵民兩便。方可垂之永久。查此項本銀。有從內庫頒發者。亦有從部庫藩庫頒發者。節年以來。惟天津京口青州河南廣州成都六處駐防。已將原本全數交庫。其餘或未經繳足。或全未歸還。自應陸續歸還。以清帑項。至贏餘利息。非原領本銀可比。若貯司庫。轉非流通。滋息存濟兵丁之意。但查各省駐防。及綠旗兵丁。既有應領糧餉。足資家口養贍。遇吉凶等事。又得賞卹。此項贏餘利息。似毋庸再爲賞給。請將此項息銀。除陸續歸還原本外。如有贏餘。卽歸入現在營本內。一體營運。再於一分及一分五釐息銀內。酌量減輕從之。吏部議覆。江蘇巡撫陳大受奏稱。州同州判兩項。補用壅滯緣通省

州同六缺。州判四缺。除河員題補八缺外。所餘州同祇二缺。州判則無缺可補。差委數年。不得補實。或不得已借補小缺。雖聲明仍照原銜陞轉。然計俸無期。又無輟轉借補之例。是州同州判借補主簿以下等官。反不如縣丞之銜缺相當者。得邀陞用。請嗣後如有州同州判銜缺相當。應歸月分缺出。即將揀發人員。委署補用。倘一時無相當之缺。亦祇借補經歷縣丞等缺。其主簿以下銜缺太殊者。應行停止。查經歷縣丞主簿等官。從前俱准一體借補者。蓋因試用人員。職銜不一。佐貳之缺。多寡難齊。是以稍為寬裕。今若將主簿以下等官。停止借補。恐發往各省州同州判。委署官員。本銜應得缺少。一時難以補用。殊屬無益。至大銜借補小缺。既經借補。實授之後。臣部向來辦理。因係照原銜陞轉之人。無輟轉更調之例。是以州同州判等項人員。既經借補主簿等官。不准復以經歷縣丞等缺

借補。但思州同州判借補主簿等官。固屬降格補用。其經歷縣丞等項。亦俱在該員原銜之下。若因其既補主簿等官。隨將經歷縣丞等缺。概不准借補。用途未免稍隘。請嗣後將大銜借補小缺人員。除原銜係候補候選。捐納即用者。仍照原銜陞轉外。其有應行調補之處。在該員原銜以下各缺。俱准該督撫等酌量咨部調補。從之。○江蘇學政開泰奏。准揚徐海三府一州。上年因被水災。展限於今年夏秋。挨次歲試。但積歉未紓。今舉行歲試。不過數月內。又屆科試。在生童兩番跋涉。資斧莫繼。請准令歲科聯考。住候旬餘。便可併應科試。免致周章。得旨。著照所請行。該部知道。○乙酉。

孝誠仁皇后忌辰。遣官祭

景陵。○諭。本日御史沈懋華進呈經史講義。朕方將召見訓諭。伊已散去。科道等官。輪班進呈經史。數月不過一次。安知朕不召見。竟不

候旨而去。殊非人臣敬爾在公之道。著該部嚴察議奏。○丙戌。

上詣暢春園。問。

皇太后安。○丁亥。諭上年河南有被水歉收之州縣。除已經該撫報出者。將本年應徵之錢糧緩徵外。其未經報出之處。該地方官酌量撫卹者。民力亦屬艱難。此時方屆麥秋。正當加意培養。著該撫查明。將應徵錢糧分別停緩。俟秋收後再行徵收。該部即遵諭行。○戊子。

上詣暢春園。問。

皇太后安。○兵部議准。總理

三陵事務員勒允祐等疏稱。

端慈皇太子園寢。添設披甲四十名。請於本處八旗滋生餘丁內挑取。再新挑兵丁。未免生疎。應留二十名在

陵寢當差。於

陵寢舊有之領催披甲內。撥給二十名與新挑

者同往看守。從之。○又議准。湖北學政吳嗣爵咨稱。監生一途。從前照文生之例。准入武闈一次。現在議准文武鄉會互試。永行停止。則監生自不便仍令入武闈。第查監生中有由武生捐納者。仍應准入武闈。至由廩增附生及俊秀捐納者。應不准收入。從之。○準噶爾部人博爾博來降。命賞給安插如例。○己丑。諭軍機大臣等。朕聞山東德州以北河間一帶地方。從前雨水不足。民間望澤甚殷。不知近來得雨霑足否。高斌未曾奏聞。可寄信詢問之。○又諭。歸化城都統吉當阿著解任調養。吉當阿所遺員缺。著前鋒統領噶爾什補授。噶爾什所遺員缺。著阿岱以都統銜補授。前鋒統領阿岱未到以前。著瑪呢暫行署理。○庚寅。大學士等議准。署川陝總督馬爾泰奏稱。前安西改設提督案內。所有駐防哈密兵二千名。分撥塔勒納沁駐兵三百名。用遊擊一員統之。三堡駐兵三百名。用都司一

員統之。賽巴什達里雅駐兵二百名。用守備一員統之。其餘一千二百名。俱留駐哈密城。臣抵哈密以來。相度形勢。知塔勒納沁原非極衝。城內又無倉庫錢糧。應行防守。而三堡一城。實係哈密與準夷往來要路。又聯接烏克爾等處各卡。居五堡之中。平時既可彈壓。萬一有警。又可收聚各卡塘兵。在一城防守。請將塔勒納沁三百名兵。酌留更換卡塘之用。以千把總一員統之。其餘俱并歸三堡。即將駐塔勒納沁遊擊移三堡駐防。其原設都司。撤回哈密辦事。從之。○又議准署雲南總督張允隨奏。稱開化一府。懸處極邊。界連外域。外控安南。內制土夷。實為要郡。其原築土城。日就單薄。近年安南國內難相仍。亂靡有定。三岐安北。宣光。乾塘洪水。保樂安邊一帶。已為賊巢。此數處距開化邊界。遠者二三百里。近者百里。數十里不等。原設額兵二千四百名。七汛安兵一千一十八名。存城一千三

百八十二名。自安南有事。增設卡塘共四十七處。所需守卡兵丁。俱於存城內抽撥。城中兵力既單。復無堅城可恃。殊非慎重邊疆之意。請易置磚城。添置雉堞。城樓。礮臺等項。以資捍衛。所需工費。即於銅息項內動支。從之。○免江西永豐縣民欠社穀四百四十二石有奇。○辛卯。吏部議覆江南河道總督白鍾山奏。稱河工添設各缺。酌議照舊設立。查乾隆六年。大學士鄂爾泰等會同吏部奏。各省官制。均有定額。不容任意增添。應令各省督撫查明。從前添設各官。就現在情形詳議。如應裁。即據實具題。如無可裁。詳細聲明具題。再查雍正九年。大學士管江南河道總督嵇曾筠等題請。添設山陽縣童營司巡檢一員。嗣總督尹繼善等題請。阜寧縣添設駐劄廟灣縣丞一員。十年。大學士管江南河道總督嵇曾筠等奏請。芒稻河添設閘官一員。乾隆二年。江南河道總督高斌題請。添設徐州府

豐蕭碭通判一員。三年題請福興通濟二閘各添設閘官一員。舊設之廣濟閘官撤回。改為通濟閘。五年總辦江南水利工程大理寺卿汪澄等題請。天妃石碇二閘添設閘官一員。白駒三閘添設閘官一員。上岡北草堰二閘各閘官一員。今該督既稱設官分職典守河防。其可裁併者。斷不敢姑留糜費其實不可裁者。亦不敢輕去貽誤。今添設之豐蕭碭通判。阜陽縣縣丞。山陽縣童營司巡檢。清河縣之通濟福興鹽城縣之天妃上岡草堰興化縣之白駒江都縣之芒稻等閘官七缺。詳察情形難以議裁。應如所請。從之。○兵部議准。原任兩江總督宗室德沛疏稱。黃浦營官兵撥歸柘林營防守。添建把總外委官署十間。營房一百二十間。從之。○工部等部議准。署直隸總督史貽直疏稱。臨榆縣南北兩翼城。新添滿洲八旗佐領衙署。俱在山陂內。高低不一。應鳩工墊平。從之。○壬辰戶部議覆。

漕運總督顧琮疏稱。巡視南漕御史二員。每年養廉共六百六十兩。始於乾隆二年。令各糧道解送巡視北漕御史二員。程途較近。應照南漕之例酌派。各糧道減半公助。查各員出差。既有沿途船馬應付。又每日有廩給口糧。此項六百六十兩。通融分給已足敷用。應以四百四十兩。給南漕御史二百二十兩。給北漕御史之駐劄天津者一百二十兩。駐劄通州者一百兩。毋庸各道解送。從之。○癸巳上詣暢春園。問皇太后安。○諭軍機大臣等。據貝勒允祜奏稱。恭建泰寧山吉地。前經總督李衛奏准。將易州陞改直隸州。管轄廣昌涑水二縣。今遵化一州。恭值萬年吉地。定於州境。亦應仿照易州之例。陞為直隸州。將玉田豐潤二縣。改隸遵化管轄等語。若因州縣承辦事務起見。尚屬可行。但當申明。

孝陵

景陵俱在州境近復選定萬年吉地如此立言方為合理不應因萬年吉地而改制也爾等可寄信與高斌令其知此意題請所屬二縣是否合宜亦著高斌斟酌敘入疏內並將朕旨傳諭貝勒知之○甲午戶部議覆奉天將軍額爾圖疏稱奉天等三省兵餉盛京戶部每年於十二月內差員赴京戶部領取銀一百二十萬兩分給三省或遇雪大難行年分每遲至二月間始抵奉天其吉林黑龍江錢糧三四月間始能運到該處又復散給分防各城是以春餉較遲而三省備存錢糧每省只二十萬兩實屬不敷支放查奉天戶部大庫并臣衙門滋生庫俱可收貯請將戶部應撥項內量其足支二年之用者領取三百萬兩以二百萬兩貯部庫以一百萬兩貯臣衙門庫內到遲年分即將備存銀支放以領到者補額應如該將軍所請惟查備貯尚非急

需俟每年題撥俸餉之時陸續運往從之○乙未

上御勤政殿聽政○遣官祭

關帝廟○總理行營和碩莊親王允祿議覆兵部議直隸總督高斌奏稱盛京路程自京至陂賴村及進山海關抵京需用隨營馬二百三十餘匹照例調驛馬四百六十餘匹於東北二路分班安設中途更替至關內附近各站調赴關外之馬將營馬補額但營馬只可乘騎不宜背包請將前項調赴關外馬以隨營之馬湊足五百抵補即以摘撥營馬留為隨營之用至稱直隸通省驛馬五千八百餘匹除調撥協濟外存馬無多不敷應差如遇差多馬少臨時雇募應如所請至應用車四十輛行令該督即於古北口地方照數雇備應付直送至阿爾素邊口得旨依議速行○兵部議奏嗣後駐防兵丁逃走除照例咨報臣部外該駐防處即開明逃人年貌知照

該犯本旗及沿途有滿洲兵丁處并附近省分一體嚴拏從之○以湖南長州協副將哈尚德為湖北宜昌鎮總兵○丙申定邊左副將軍額駙策凌奏查閱喀爾喀四部落軍容器械向經臣處派叅贊大臣二員前往今年實屆比丁審事大盟會之期既經盟會又派大臣前往查閱衆蒙古須兩次豫備不勝勞費請查閱軍容即交四部落之副將軍與盟長辦理分別優劣具報無庸另遣大臣從之

實錄卷一百一十五

九

○又奏據副將軍輔國公巴蘇呈稱扎薩克台吉格勒克怠玩公事前因閱視軍容伊屬下器械不修兵數短少經叅贊大臣等嚴行訓飭格勒克並不悛改應備大營需用駝馬屢次嚴催全不交納容隱奸拐在逃之厄鱗經貝勒旺扎爾在伊旗下拏獲格勒克又強行奪取甚屬不法臣查訪屬實請加懲治得旨交部議處○丁酉諭外省佐雜等官朕俱已賞給養廉各就該省公項所餘以分多寡

之數查福建一省每員止給銀二十兩未免用度不敷可為軫念著從本年為始將通省大使佐雜等一百九十八員每員加倍賞銀二十兩以資養贍在鹽道庫盈餘項下支給該部即傳諭該督撫等知之○又諭朕聞臺灣換班兵丁一切行李俱係各番社撥車供應原議每里給銀五釐資其飯食三年合算共需銀六百九十九兩五錢乃以彼地無公項可動以致文移往來不能按期給發查臺

實錄卷一百一十五

十

地有官莊項下徵收租粟銀兩撥充內地各官養廉者著每年扣出銀二百三十三兩一錢零每逢三年合扣銀六百九十九兩五錢以為換班兵丁雇備車輛之費至內地養廉之項則於司庫另行撥補庶兵丁無患運載之艱而番黎亦免候領之苦著該部即傳諭該督撫知之○又諭項朝選現交部嚴加議處著解任聽候部議其建寧鎮總兵官印務著總督那蘇圖暫委員署理○大學士等議

奏乾隆二年十月

皇上往馬蘭峪恭謁

祖陵禮部奏准恭謁

陵行禮於駕行前一日告祭

奉先殿此次恭謁盛京

祖陵仍遵此例於駕行前一日及回鑾次日均

告祭

奉先殿從之○又議奏河南按察使王丕烈奏

稱各州縣平糶之先將某保某甲窮戶查明

實錄卷九十一

三十一

登簿分單雙日手執門牌赴糶即於門牌上

註定日期數目以杜重混查平糶之法總在

各州縣實力奉行多方訪察若徒以保甲分

別戶口無論貧富易淆即使登註明白而執

牌赴糶按簿發粟亦難免串通代領之弊且

恐里戶胥役等任意填寫轉滋弊端得旨是

大清高宗法天隆運至誠先覺體元立極敷文
奮武孝慈神聖純皇帝實錄卷之一百九十二

實錄卷九十二

三十二

大清高宗法天隆運至誠先覺體元立極敷文
奮武孝慈神聖純皇帝實錄卷之一百九十三

監修總裁官內閣學士大臣等奉 上諭事件管理

吏部理問書務正黃旗滿洲副都統世襲副都統功加七級隨帶加一級尋常加二級軍功紀錄一次臣慶桂

總纂官經筵講官太子太傅文華殿大學士大司馬領侍衛內大臣等奉 上諭事件管理理問部戶部三庫事務

世襲騎都尉軍功加九級隨帶加二級又加二級臣董誥內大臣戶部尚書鑲黃旗滿洲副都統軍功紀錄五次

尋常紀錄十四次臣德馨經筵講官太子少保工部尚書紀錄六次臣曹振鏞等奉

較修

乾隆八年癸亥五月戊戌

實錄卷一百九十三

十一

上詣暢春園問

皇太后安 兵部奏沿邊各缺分用滿員原以
表率弁兵整飭營伍近各該處保送旗員內
竟有年力就衰及年少世職不宜外任之人
驗其弓馬又無出眾之技皆緣各該管大臣
選送時或因曾經効力資俸已深或因諳練
旗務行走勤慎遽為保送更或人材弓馬實
屬出眾留旗陞用反不得與保送請勅八旗
滿洲各該管大臣凡遇咨取人員務揀年力

精壯弓馬出眾之員保送如實無其人即准
聲明咨覆倘各處俱無人可送及所送俱不

堪揀選即將其次應用旗分咨取揀選倘各

處保送人員內考驗人材弓馬僅可揀選一

員即咨取其次應用旗分人員一併揀選三

四員引見得旨此奏甚是此數次所揀選之

人多不如先正欲降旨依議即行 京畿道

御史劉方藹奏嗣後禮部考試各處教習照

考試中書例悉歸貢院糊名考試得旨著照

實錄卷一百九十三

十一

所請行該部知道 己亥諭下江淮揚徐海

四府州屬上年被災甚重其地漕錢糧朕已

降旨停緩所有應完雜稅向無因災停緩之

例自應照常催徵惟是各屬既被水災貿易

稀少行商完納稅銀未免拮据且本年又有

應徵之項若令新舊並徵民力更覺艱難朕

思積歉之餘元氣未復全在商販流通地方

庶有起色著將山陽阜寧安東清河桃源鹽

城高郵泰州江都甘泉興化寶應銅山豐縣

沛縣蕭縣碭山邳州宿遷睢寧海州沭陽贛榆等二十三州縣應徵乾隆七年未完牙行各項雜稅槩予寬免以示朕體恤商民之至意該部即遵諭行 諭山東臨清關向徵銅補商補相沿已久報部則統名之為船料前撫臣岳濬改為計石上稅而將銅補商補歸入石頭徵解是名革而實存也今朕既降旨蠲免各省米糧之稅此項亦應一體邀恩槩行豁免著該部即行文山東巡撫知之 又

實錄卷一百九十三

三

諭任啓運著充三禮館副總裁官該館奏稱現有繪圖之事擬揀選善繪圖之人二名充補謄錄亦照所請行 大學士等議覆貝勒允祐奏稱馬蘭峪等處駐防大小官員護守陵寢朔望祭祀隨班官員均當早集臣立功過簿稽查如功多過無者遇有相當缺出陞用功少過多者題叅議處無功有過屢誡不悛者題叅從重議處再此地有贊禮郎兼防禦十餘員一人兩缺凡遇祭期承值維艱差使

拮据不敷分佈臣現與總管內務府大臣公商另議請旨至

陵寢禮工二部供事官非年力精壯行走勤慎者弗克勝任除筆帖式仍照定例六年轉部外郎中員外缺出請敕令揀選精壯勤慎者充補與京員一體較俸陞轉其贊禮郎請照筆帖式例居六年於太常寺鴻臚寺兩衙門轉用等語查

實錄卷一百九十三

四

昭誠敬今貝勒請立章程隨時考覈亦獎勤儆情之一法應如所請所有兼缺之贊禮郎既稱現與總管內務府大臣商酌應俟奏到候旨遵行又查定例

陵寢郎中缺出俱按雙單月將議敘俸深各項應陞人員按班選用應陞缺出即與在京郎中等官一體開列陞轉其員外缺出行文各部院衙門將應陞員外之主事內揀選有年紀辦事中等之員補放是郎中應陞之缺原

與在京郎中一體開列惟員外未滿五年不准陞補京缺然各部院揀選人員亦祇因事務簡少就老成中等之員挑選並非將老邁庸劣者開送且員外五年限滿原准陞轉而郎中俸次應陞即未滿五年亦得陞用未為阻滯至贊禮郎向例原與小京官筆帖式等一體陞用主事自應如所請援照禮工二部筆帖式六年轉部之例轉用從之 庚子諭軍機大臣等直省地方向來令造烟戶冊以

平定縣志卷之三

五

便清查戶口原欲其確實可據即偶遇賑濟亦得按冊而稽易於查辦乃有司奉行不力多係虛開有名無實全不足據聞山東運河道陳法前任直隸知府時經理有方不致擾累而能得烟戶之實數朕因江南廬鳳地方土瘠民貧奸民雜處特將陳法調補廬鳳道爾等可寄信與尹繼善於陳法到任之後令其董率屬員將烟戶冊籍加意料理尹繼善並留心指教之若行之果有成效將來各處

便可倣行於地方自有裨益 戶部議准江

西巡撫陳宏謀疏稱德安縣長河及附河湖洲地五十七頃三十九畝有奇俱有漁草之利請於乾隆八年升科納課從之 辛丑戶部議覆江蘇巡撫陳大受奏稱江南賑糶需用川省倉穀接濟先於本年四月內據川撫碩色咨報派撥近江易運州縣常平監穀二十萬石礮碾委運江南蕪湖礮碾不及者准米穀兼運所需運礮并委員一切雜費作何

平定縣志卷之三

六

清還倉糧運到江南作何解繳川省糧價之處除咨商江南督撫外所有川省撥運價銀等項自應江南解還川省按數歸款今蘇庫既無堪動之項應如蘇撫所奏將應還川省米穀價銀運費准川省就款報銷並令川撫將礮碾解運雜費銀兩據實造報至川省運送穀石原係應補之項但查本年四月內大學士會同九卿議覆常平倉穀於原額數內無需動用者祇令將糶價解交司庫與動支

數目一併報部查核無庸買補今川省解運
江省出糶穀石原屬動用監穀並非常平原
額數內似無庸買補第查川省地處邊疆積
貯緊要前項穀石應否買補應令碩色就本
地方情形妥議辦理至稱委員領齋庫銀一
萬四千兩赴漢口接運而碩色前咨派撥米
穀係委員運至江南蕪湖是前項米穀究應
何處交卸接運應令陳大受碩色會商辦理
從之以侍讀學士文保赫瞻充日講起居

實錄卷一百九十三

十一

一

注官 賑山東歷城章邱鄒平長山新城齊
河濟東濟陽長清青城蒲臺博平茌平高苑
濟南肥城東阿平陰十八州縣衛旱災飢民
壬寅

上詣暢春園問

皇太后安 禮部議准署山東巡撫包括疏稱
安東衛屯丁向居衛城今衛城既歸併日照
應將該衛文武生童均歸日照考試其廩糧
亦於該縣地丁銀內額支從之 癸卯侍郎

玉保奏報熬茶夷使吹納木喀巴雅斯瑚朗
等入境 甲辰刑部議覆陝西道監察御史
楊朝鼎奏稱盛京刑部重囚應照直省秋審
之例會同各部侍郎并奉天將軍府尹巡察
御史會審具題查盛京刑部與督撫不同是
以無秋審具題之例但明刑折獄不厭詳慎
除奉天將軍於乾隆三年題准停止會審毋
庸議外至盛京刑部并奉天府尹衙門重囚
令該侍郎會同各部侍郎府尹巡察御史虛

實錄卷一百九十四

十一

一

孝恭仁皇后忌辰遣官祭

景陵 戶部議覆署兩廣總督慶復疏請將粵
東埤引難銷之順德新會香山沙灣茭塘鹿
步滙湖七門神安黃鼎三水花縣增城龍門
清遠英德翁源曲江河源博羅澄海海陽潮

陽揭陽惠來饒平豐順高安高明恩平開平
鶴山陽春新興開建四會羅定茂名合浦與
福建之清流粵西之博白陸川等四十二埠
應勻交易銷之和平連平龍川歸善嘉應樂
昌始興保運連州連山西寧信宜靈山湖南
之郴州宜章興寧永興臨武藍山嘉禾桂陽
江西之龍南信豐定南安遠石城瑞金大庾
崇義上猶南康福建之長汀上杭廣西之宣
化隆安永淳等三十六埠代運共撥引五萬
八千一百二十一道查大庾崇義上猶南康
四埠每引行鹽三百二十二觔龍南信豐定
南安遠石城瑞金六埠每引行鹽二百六十
四觔額餉俱多於東省但撥出之引均係每
引行鹽二百三十五觔額餉既輕不便照受
勻之埠加配應仍照本埠配鹽之數行銷。又
實存四五兩年積引十八萬八千五百九十
一道應統俟三年銷完毋庸派定每年銷數
從之。準噶爾部人達什林沁來降命賞給

安插如例 丙午諭奉天乃我朝發祥之地
歷朝實錄俱應繕寫滿漢文各一部送往尊藏
俟現在

皇史宬內閣藏本寫成後即著在館人員敬謹
繕寫其送往儀注大學士會同禮部詳議具
奏 又諭江西巡撫陳宏謀奏稱江西州縣
現在需人辦事請將在部候補知縣及記名
保舉人員內曾經任州縣者揀選五六員發
往委署題補等語著照陳宏謀所請行嗣後
不得援以為例 又諭據直隸總督高斌奏
稱通永道周彬奉旨調補平慶道周彬之母
年已八十有二迎養在署今調任平慶地處
極邊難以迎養伏乞天恩准令周彬回籍終
養但伊不早請終養奉調後乃始陳情應請
旨交部議處等語周彬著准其回籍終養伊
母向係迎養在署故未陳情從寬免其交議
戶部議准調任湖北巡撫范璨奏湖北開
爐鼓鑄員役薪水飯食等費請照浙省之例

分別給予從之。調河南巡撫雅爾圖來京。以四川巡撫碩色為河南巡撫。兵部侍郎紀山為四川巡撫。丁未。

上詣暢春園問

皇太后安。諭本年七月內。朕恭奉

皇太后前往奉天叩謁

祖陵。著履親王平郡王大學士鄂爾泰張廷玉

在京總理諸務。太常寺奏

皇上恭謁盛京

三陵起程後。秋季一應祭祀。奉旨派出承祭分獻之王大臣。遇有事故。不及奏派。請將留京齋戒之王大臣。令其承祭。得旨。著交紫禁城內總理事務王大臣遣派。稽察盛京事務。陝西道監察御史和其衷奏。盛京侍郎以下小京官以上。俱請加給雙俸。并公費銀兩。得旨。汝為巡查。似此市惠。是自取其咎也。且盛京官員等。向係如此。而康熙年間。在京官員不肖者。或可得賄。而盛京亦無可得也。今京

師之加雙俸。乃朕之特恩。亦所以禁其貪。而養其廉。盛京官員。安可同此。且其事之原簡。又無論矣。汝豈不知此而為是言乎。戊申。諭今年天氣炎熱。蘇祿國使臣等在京。著禮部派官員。加意照看。多給冰水。及解暑藥物。並遣醫人不時看視。免江蘇拖欠在軍。及驛站未完。並漕項隨正耗羨銀兩。調署兩廣總督慶復。為川陝總督。署川陝總督馬爾泰。為兩廣總督。實授張允。隨為雲南總督。兼管巡撫事務。以直隸宣化鎮總兵李質粹。為廣西提督。降廣西提督譚行義。為直隸宣化鎮總兵。己酉。諭軍機大臣等。拉達克汗策卜登那木扎爾。將自準噶爾脫出之馬甲卓鼎。辦給口糧馬匹。送至藏內。朕甚嘉予。著賞給各色緞八端。玻璃磁器八件。又諭。據將軍鄂彌達。奏驛站筆帖式舒蘭泰一摺。內稱此事。若以清字繕寫具奏。恐致漏洩。因在署內繕寫漢字具奏。嗣後若遇緊要事件。

請仍准用漢摺具奏等語。滿洲將軍等。如有密奏事件。自應繕寫清摺。若慮洩漏。恐用漢摺。轉致洩漏耳。清文何由洩漏耶。即如本身不能繕寫。或於屬員內。擇其謹慎者。令其繕寫。或於伊親信之人內。教數人繕寫。俱未為不可。果有緊要事件。令人繕寫者。即將其人暫留數日。事過再為放出。亦無不可。鄂彌達所奏非是。著傳諭申飭。○又諭。昨朕降旨。慶復補授川陝總督。馬爾泰補授兩廣總督。今據慶復奏稱。離京日久。今趨赴闕廷。懇請多住月餘。俟駕幸奉天。啓行之後。再赴西安之任。朕思秦粵兩省總督印務。現俱有人署理。已允其所請。馬爾泰上年冬間。始陞辭赴任。為時未久。不必來京請訓。著在西安辦事。俟慶復到後。交代即赴廣東新任。○又諭。地方偶遇荒歉。小民乏食。富戶家有餘糧。或蠲助賑卹。或及時出糶。原屬有無相通之義。該地方有司。平時固宜化導。使知周恤鄉閭。及至

米穀短少。市價昂貴。尤當加意勸諭。俾富戶不至坐擁其餘積。漠視鄉人之困苦。於貧民自有裨益。但周急之道。出於義舉。百姓衆多。良頑不一。若出示曉諭。勒令蠲糶。則奸民視為官法所宜然。稍不如意。即存攘奪之心。其風斷不可長。近聞湖北。湖南。江西。福建。廣東等省。多有此等案件。夫擁倉庾以自利。固屬為富不仁。而借賑卹以行強。尤屬刁惡不法。爾等可寄信與各督撫。令其密飭各屬。嗣後地方需米孔亟之時。善為化導。多方勸諭。令富戶欣然樂從。不可守餘糧以勒重價。若有強暴之徒。罔知法紀。肆行搶奪者。則宜盡法嚴懲。以戢刁風。○以侍讀學士于振。王會汾。裘曰修。充日講起居注官。○庚戌諭。前屠用中到部引見。朕已降旨。交與尹繼善。以知縣用矣。今聞該員在粵西年久。熟悉苗疆風土。著仍發往廣西。交與巡撫楊錫紱。以知縣題補。○吏部等部議准。署直隸總督史貽直疏

請建承德州屬理事通判暨巡檢衙署各一。計共七十四間。從之。○辛亥。諭本年朕以叩

謁祖陵親往奉天。往來約計四月。所有七月以後文武大選官員。若候回鑒引見。未免稽遲。時日著照乾隆六年之例。文員內之通判州縣等官。武員內之八旗護軍校驍騎校及外省送到之補放水手官驍騎校等官。並各省年滿千總。俱著交與在京總理事務之王大臣。

奉天五年

十一月

即行驗看。令其赴任。其中若有年老才庸。不勝繁劇之缺者。酌量調補。隨本奏聞。可傳諭該部知之。○又諭今歲夏至以後。天氣炎熱。甚於往年。省刑之典。允宜舉行。著刑部堂官。於在京徒杖以下輕罪。查明情節。或應釋放。或應減等。即速分別請旨完結。其重罪人犯。雖法無可減。際此炎天。身繫囹圄。實堪憐憫。著該部添蓋蓆棚。給與冰湯藥餌。無致病渴。該部即遵諭行。○蘇祿國王麻喊末阿稟勝

寧遣陪臣表貢方物。奏請三年後復修職貢。得旨。覽王奏進貢方物。具見悃忱。知道了。爾國遠隔重洋。再修職貢。將敬輸誠。良可嘉尚。至所請三年復貢之處。恐該國道遠。風信難期。著仍遵雍正五年所頒

勅諭內。酌俟五年之外。一修歲獻之

旨行。該部知道。○是月。盛京禮部侍郎那爾泰等奏。鑾駕關係甚重。盛京唯大清門內樓上。可以安放。然官弁出入。殊失慎重。請揀用大

奉天五年

十一月

清牌樓外義學官房十三間存貯。得旨。放在大清門內樓上。餘俟到時再降諭旨。○副都統銜管理呼倫貝爾瑪爾拜奏。巴爾虎弁兵感戴聖恩。備馬千匹。供此次巡幸之用。得旨。伊等誠意已悉。此次馬匹。俱已辦妥。著不必。倘有所需。朕再降諭旨。尚欲加恩伊等。將此傳諭知之。○署兩江總督尹繼善奏。江西缺米。請將上年江南被災借撥川米十萬石。截留江西得旨。甚是之舉也。○安徽巡撫范璨

奏。各關有口岸近而事簡者。裁委官一員。書役二十名。其巡船工食一切雜費。及現在官役飯食紙張等項。概以九折核給。歲可節存銀三千餘兩。再蕪關稅課。向係按季解部。若改為兩季。歲又可節存銀九百餘兩。得旨。是咨部知之。○又奏。盜宰耕牛。例有嚴禁。嗣後拏獲私開園店之案。必須究明房主保隣。及包庇之兵捕。分別懲究。得旨。好。在此際應如此辦。而又須實力稽查。○又奏。太平縣地方。

一村內訪拏燒鍋二十餘家。現飭照例懲治。得旨。好。實力為之。汝在湖北頗覺因循。若能似此振作奮勉。庶得勝任耳。○江西布政使彭家屏奏。人才以牧令為本。而保薦尤以不時為便。請不論年限。不拘通省。聽督撫隨時隨人。皆可奏聞。再藩臬與督撫。往往有意見取舍不同之分。而屬員之受知於督撫藩臬。亦才華德器不齊。或令兩司亦偶奏一二。上供採察。得旨。所奏俱悉。○浙江布政使潘

思渠奏。嚴禁奸牙冒糴囤積。吏役侵漁諸弊。得旨。所奏俱悉。因時制宜。實力為之。○閩浙總督那蘇圖奏。閩省民俗刁悍。難以驟化。若不嚴加懲儆。其風難以驟革。如光澤寧化等縣。挾制官府。鬧堂生事。雖已照律治罪。但由縣成招。解府解司。再行審題。聽候部覆。未免曠日持久。不足惕其天良。可否容臣提犯親審。將為首者從重究擬。示眾為從者分別輕重。枷號。俾知畏懼。得旨。是。應如此懲一警百也。○又奏。報閩浙二省田禾雨水情形。得旨。

覽奏稍慰朕懷。然必以秋成為準耳。○署湖南巡撫蔣溥奏。湖南地方甘霖疊沛。秋成後米價必減。除將本省缺額倉穀。先行買補。並移知鄰省。有欲行買補者。即赴楚採辦。得旨。此為不必。何則。鄰省若果需米。彼自然求之湖南。若再開其端。恐今年一年之收。不足供數省之求。而又為目下米貴之弊矣。此等識見尚宜擴充。○河南巡撫雅爾圖。因豫省上

年歉收。蒙恩停緩額賦。奏謝。內稱水旱雖堯湯不免。殊恩實千載難逢。并陳辦事認真。居常忤物等情。得旨。朕從不以地方偶有水旱。歸過督撫。惟有令其加意撫綏。使朕赤子不致凍餒耳。汝則不然。從不體朕此心。必欲以地方屢豐。為汝政治之效。試思汝一省尚可。若朕亦存此心。其如蒼生何。且堯湯不免水旱。若視水旱為固有之常。而不知懼。此則致亂之由。而必欲以無水旱為政治之符。亦唯勤其政耳。豈有政治之失處尚多。而侈談豐豫。將水旱漠不關心之理。即如前次陞見。朕觀汝高視濶步。昂然自得之意。已知汝必有滿招損之禍矣。此奏全屬客氣。朕亦無別諭。汝其候旨可也。○又奏遵旨祈雨。得旨。即爾祈雨。亦出於遵朕旨之心。並非為民可知。如此而欲仰邀

天眷。難矣。○又奏各屬得雨深透。得旨。所奏俱悉。一得雨澤。亟速奏聞。以慰朕懷。若有旱形。

則一切綢繆。須應實力為之。不可復蹈前轍也。○山東巡撫喀爾吉善奏。雨水不能接續。望澤正殷。得旨。昨有旨諭。今果有此奏。一切事宜。加意妥為之。○又奏。東省捕治瓜賊。立法未嘗不嚴。但自奉行以來。徧張告示。鋪壁杆旗。所寫瓜賊字樣。已經年餘。若驟行拭去。復將從前所給告示。一旦盡燬。竊恐兵役生疑。或致巡查懈怠。瓜賊潛伺。轉謂捕治漸寬。殊有未便。擬密飭該州縣。將布旗逐漸改製。易寫巡防盜賊字樣。至寫鋪本係隨時修葺。應即隨修隨改。所貼告示。風雨飄零。不難漸就磨滅。如此默為改易。方泯更張之跡。得旨。是應如此者。○山西巡撫劉於義奏。晉省糧輕丁重。非如江浙等省。丁輕糧重。易於均攤。者可比。若將丁銀歸入地畝。竟有原額糧銀一兩。今每兩加至三四錢者。查晉省每年錢糧。奏銷以前全完。從未見有以丁銀拖欠。完納不清申請者。且通省地土肥瘠不同。如平

陽之吉陽等州太原之岢嵐州并大同寧朔所屬各州縣地土實係瘠薄誠恐一例歸併倘年歲稍歉即錢糧逋負況晉省逐末者多力田者少丁糧歸併亦恐重累力耕之民得旨是得其理而後為之可也 陝西巡撫塞楞額奏陝省麥收豐稔而糧價未減實緣晉省商販運買所致私囤夥販過多入秋勢必增價晉省麥收既薄秋禾缺雨豫省隣陝各邑亦多歉收伏念秦晉兩省相隔一河即豫省亦可由渭入黃順流而下均可接濟但須先期備辦酌量收麥不致臨時有誤而隣省得有官糧商販不致居奇即陝省市價亦不昂貴得旨所見甚屬可嘉晉省似可不必豫省開封一帶至今未得透雨汝應先措十萬石以內速商之該撫一面辦理一面奏聞若彼省此際得雨無庸接濟則留以為本省之用亦屬便舉也 甘肅巡撫黃廷桂奏西寧府屬大通衛水旱可耕地招民墾種并稱

擺羊戎地方墾戶三百餘家城中不數居住應准自出夫工建築土堡得旨好墾田務農為政之本也 廣西巡撫楊錫紱奏梧州府知府戴肇名送到鹿茸開匣除鹿茸外另有小匣書長生果啓視乃係人參居心卑鄙不堪膺郡守之任得旨汝可謂不愧四知矣但此過尚小或戴肇名別有他過自應叅處耳此事知道了 又奏匪徒莫康武等滋擾保樂多半內地民人現經拏獲之周道南黃漢奸詭兇悍反覆無常應嚴加羈禁俟再有拏獲一併究議得旨此等即應重處以示警何必令其輾轉偷生耶

大清高宗法天隆運至誠先覺體元立極敷文
奮武孝慈神聖純皇帝實錄卷之一百九十三

實錄卷一百九十三

二十三

大清高宗法天隆運至誠先覺體元立極敷文
奮武孝慈神聖純皇帝實錄卷之一百九十四

監修總裁官經筵講官太子太傅文淵閣大學士文淵閣領閣事領侍衛內大臣稽察奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加一級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部庫事務

世襲騎都尉軍功加九級隨帶加二級又加二級臣等謹將內大臣部內各員經筵講官都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將奉

教修

乾隆八年癸亥六月壬子朔諭近日京師天

氣炎蒸雖有雨澤並未霑足若再數日不雨

恐禾苗有損且人民病暍者多朕心深為憂

惕著禮部即速虔誠祈禱又諭今年天氣

炎熱甚於往時九門內外街市人衆恐受暑

者多著賞發內帑銀一萬兩分給九門每門

各一千兩正陽門二千兩豫備冰水藥物以

防病暍可傳與步軍統領舒赫德即速遵旨

辦理其就近圓明園地方亦賞發銀二千兩

著旺扎爾永興帶同圓明園叅將辦理諭

軍機大臣等。碩色前在山東任內。郟城蒙陰等處被災辦理未善。朕念其於四川地方情形。尚能熟悉。是以調任四川巡撫。今復調任河南。該省事務殷繁。與山東相等。且有兼管提督印務之責。陳歸汝寧等處。亦當偏災之後。近差大臣查勘賑卹。將來撫綏輯寧之道。必須盡心經理。地方始有起色。爾等可寄信與碩色。令其努力振作。加意綏輯。若仍不改山東任內因循之習。則大負朕簡任之意矣。

○監察御史陳仁奏。考試翰詹諸臣。不用詩賦。宜試以經學註疏。全史原委。以覘其學術經濟。得旨。陳仁所奏亦是。朕前日考試翰林。原有論題。以覘其學問經濟。並非專用詩賦也。如李清植。即因其論有根柢。是以拔置一等。至於詩賦。原係翰林素應通曉者。聲韻之學。難以猝辨。以此考試。亦可驗其平日用功與否。如必試以經學註疏。全史原委。更恐難其人矣。且即有其人。亦遂能保其文行相孚。

坐言而起行乎。陳仁有進言之責。其意原屬可嘉也。原摺併發。○癸丑諭。近來天氣炎熱。臣工有奏請暫停引見者。朕思寒燠關乎庶徵。今歲蒸暑倍常。即是

上天垂象示儆。朕當省愆思咎。惕勵匪懈。勤於政治。以感召休和。若因此習於晏安。則大非祇承

天戒之意。所有部院及八旗引見人員。照常引見。其應辦事件。亦按期速辦。毋得稽遲。○又諭。太皞伏羲氏之陵。在河南陳州府郊外。向來祠宇巍峩。廟貌整飭。歷年既久。不無傾圯。有失觀瞻。著該撫飭令地方。於秋成之後。動項修葺。○又諭。此次前往盛京。未到熱河之前。俱在行宮駐蹕。所有行營應用之蒙古包。帳房布城等項。及應豫備物件。俱著於七月初三四等日。先行起程。於應行等候地方。豫備等候。其侍衛章京護軍內。酌量留用外。其餘著分別次序。豫先起程。過青石梁等候。此

數日內存留人等雖日常該班將來會齊時。仍可令伊等補還。其出行錢糧即於起程日支領銷算。如此分別次序。令其起程。則住宿處俱有空閒。而在途亦不致損傷田苗矣。其何項人先令其起程。及如何分別次序。並量派大臣二三員。帶領伊等起程之處。總理行營事務。王大臣即定議具奏。尋議查各處隨往官員人等。其豫先遣往者。侍衛一百五十餘名。親軍護軍六百餘名。并各項官兵拜唐阿等。共二千餘名。車七百九十餘輛。應分三撥。於七月初二至初四等日。派出大臣按撥帶往。分駐博羅河屯。喀喇河屯。熱河等處。并於侍衛章京護軍內酌留二百餘名。於青石梁黃土坎葦子峪等狹隘之處。如遇行李壅滯難行者。協力護送。至扈從人等除安設堆撥等項差使外。其無差之人。若俱在行宮週圍住歇。恐人多地隘。踏壞田禾。應聽隨便。借寓再牧廠派出馬六千餘匹。護送先往之人。

若俟駕到後更換未免耽延。請先派出放馬之章京。赴博羅河屯會同領撥大臣監視更換。其餘馬匹并已更換者。仍交與馬廠副都統等收放。以備御營官兵到時換用。得旨。所議甚妥。依議。諭昔我

皇祖聖祖仁皇帝前往盛京時。衆人所乘馬匹。曾照出兵例派兵巡哨馬廠。此次隨往官兵。久不出外。未能諳練。行營馬匹最關緊要。倘不能尋覓水草牧放。必致疲乏。若按官兵駝馬派兵巡哨。則隨往馬匹甚多。而此次官兵不甚贏餘。或令各自牧放。酌派深悉水草官兵引導約束。倘有遺失。令哨兵尋覓。其應於何處巡哨。至何處不必巡哨。著總理行營王大臣分別詳悉議奏。尋議

御營前後設有卡座。地面寬濶。水草豐美。卡內儘可牧放馬匹。惟左右兩翼無卡。應於曾經行走兵圍人等內。派出護軍校兵丁共八十名。侍衛章京四員。每翼派四十名巡哨。以侍

衛章京各二員統之。倘有遺失馬匹即著守卡人等尋覓。至回鑾時。係由大路經過。即不必巡哨矣。得旨。依議。所有隨營官兵亦著傳示。○又諭帶領豫先起程人等起程。著海蘭富達禮班第去。著公訥親總管照看。○大學士等議覆江西巡撫陳宏謀奏稱今日之耗農功而妨地利者。莫如種烟一事。乾隆元年。學士方苞曾條奏請禁。部議不准。臣詳繹部駁。一則以已經種烟之地。再種蔬穀。苦惡難食。徒成棄壤。一則以種少烟貴。偷種者多。犯法者衆。一則以烟地入官。罰及隣右。牽連滋擾。今謹籌禁止之法。城內仍許種烟。城外及各鄉。槩不許種。如有種者。責成鄉保報官。將烟草入官。若云禦瘴氣風寒。自明代以來。未見盡為瘴癘風寒所侵。即今不喫烟者。未嘗不入瘴鄉。其非必不可少之物。明甚。但已種之烟。全令拔除。未免失業。請豫行曉諭。以甲子年為始。令地方官通行禁止等語。查民間

種烟一事。廢可耕之地。營無益以妨農功。向來原有例禁。無如積習相沿。日以滋甚。如直隸山東江西湖廣福建等省。種植尤多。隴畝相望。穀土日耗。且種烟之地。多係肥饒。誠令改種蔬穀。則自八月收烟後。至來歲春相隔半載。土氣已復。並無不宜蔬穀之處。如或不種。則失業。改種則利輕。又當知烟無關於飢飽。原不必論其貴賤。自應禁止。惟城堡內閒隙之地。聽其種植。城外則近城畸零菜圃。亦不必示禁。其野外土田阡陌相連之處。槩不許種。得旨。即照大學士所議行。該部知道。○給事中陳大珩奏。滿漢選用御史。將各衙門合例人員取齊。請旨考試。得旨。陳大珩所奏亦是。但目下正值溽暑。難以考試。著吏部於立秋後請旨。○陝西布政使帥念祖奏。藩臬任滿三年。定例朝覲。得旨。著照所請行。該部知道。○甲寅。

上詣暢春園問

皇太后安。○諭朕前往奉天恭謁

祖陵典禮重大。所有祭文。理應盡心撰擬。今滿漢文俱甚屬平常。語意亦多重複。著將撰擬之于振鐸譯之文保德通。各罰俸三個月。以示懲儆。○又諭前據雅爾圖奏稱。河南通省。九府四州所屬。俱於五月初二日得雨深透。又彰德府屬之安陽武安等縣。於初七八得有雨澤。惟開封府所屬。雖於五月十一日得有微雨。未能霑足。若旬日之內。大沛甘霖。秋禾尚無妨礙等語。今既旬日矣。曾否得雨霑足。或應祈禱。及應照往例省刑之處。著該撫一面辦理。一面奏聞。無得怠忽稽遲。該部遵諭速行。○又諭前據喀爾吉善奏稱。山東各屬。於閏四月二十二二十四五二十七八九及五月初三四等日。各得雨二三寸至六七寸等語。此一月以來。其未經霑足之地。曾否得雨。喀爾吉善並未陳奏。現在情形如何。曾否祈禱。又包括前曾奏稱春夏之間。雨澤愆

期。請行恤刑之典。朕已允行。其如何辦理之處。喀爾吉善亦未奏聞。可傳旨詢問。如祈禱省刑。借種撫恤等事。有應行速辦者。即一面辦理。一面奏聞。該部速行文該撫知之。○又諭南掌國貢象。舊例以五年為期。朕思該國僻處天末。遠道致貢。未免煩勞。著改為十年一貢。以示朕柔遠之意。○戶部議准。江西南贛鎮總兵章隆疏稱。買貯糧石。每年值青黃不接時。借給兵丁。於六七八三個月扣還。為期太迫。請再寬兩月。俾得從容還項。從之。○乙卯。諭軍機大臣等。據都統阿揚阿等奏。天津兵丁所用弓箭撒袋。年久率多破爛。請由部製造發給。於錢糧內坐扣等語。外省兵丁。非京師兵丁可比。其破壞軍器。自應本處酌量修造。且該處生息銀兩頗多。原為接濟兵丁而設。自可酌量動撥修造。免令兵丁賠補。即寬展限期。於錢糧內陸續坐扣亦可。庶軍器可以整齊。而兵丁等亦有裨益。著寄信阿

揚阿等。○福建建寧鎮總兵項朝選。緣事罷職。以永寧協副將岳鍾璜。為福建建寧鎮總兵。○豁除江蘇沛縣乾隆七年分昭陽湖水沉田地銀米有差。○丙辰。諭京師自五月杪以來。天氣亢旱。且溽暑炎蒸。甚於往歲。明係上天垂象以示儆。朕夙夜憂惕。莫釋於懷。皆因朕躬之闕失。或用人行政之失宜。著九卿科道悉心思維。直陳毋隱。並將實有裨於國計民生之務。據實敷奏。候朕採擇。見之施行。庶幾感召。

天和。潛消沴戾。諸臣毋得視為具文。負朕諄切求言之至意。○吏部議准署山東巡撫包拯疏稱。安東衛守備已裁。將日照縣夾倉巡檢移駐安東衛城。從之。○丁巳。

上詣暢春園問

皇太后安。○諭山東春夏以來。雨澤愆期。二麥有歉收之處。近雖漸次得雨。尚有未曾霑足之州縣。若照例徵收錢糧。民力未免拮据。朕

心軫念。著該撫將麥收歉薄之州縣。逐一查明。所有六七兩月應徵錢糧。緩至八月後徵收。以紓民力。該部即連行文。傳諭該撫知之。○又諭前降旨將李質粹補授廣西提督。今據伊奏稱。父母年老有病。廣西路遠。不能迎養。情辭懇切。李質粹著調補陝西固原提督。其廣西提督員缺。著固原提督豆斌調補。○吏部等部議准。巡察寧古塔等處陝西道御史武柱奏稱。吉林烏拉寧古塔三姓。伯都訥

四處監督。照在京及各省監督之例。鑄給關防。其吉林烏拉水師營四品官二員。亦照各省水師營之例。鑄給關防。從之。○戊午。諭本月初四日。進愛奏請進見。朕因伊係欽天監堂官。當此亢旱炎蒸。或星象有無變異。關係朕治之得失。是以面加詢問。伊奏稱星象並無變異之處。但目下天氣亢旱。有應行調劑者。約舉四條。朕令寫出。交大學士等議奏。及覽所議之摺。第一條內開。向例禁止燒鍋賭

博鬪雞鵲之類。應大弛其禁。使民自便。則和氣感召。自可雨暘時若。第二條內開。從來官員。原皆定有陋規。到任即能充裕。又加以耗羨。是以辦事從容。今一槩禁革。以致泣任後不能償還借貸等語。悖理傷道。莫此為甚。至三條之言稅課。四條之言刑罰。皆係現在已行之事。勉強湊合。經大學士等議駁。朕尚恕其無知。置之不問。今日忽又封奏云。五月初九等日。金星晝見。初九十九等日。屢次流星。夜見等語。若其言果實。何以彼時不奏。且朕前日面詢。又以為並無災異。今忽為此語。豈非幸災樂禍。任意捏造。以惑惑人心乎。且其摺內又稱。去歲彗星現象時。伊曾將淮揚水災。今歲京師盛暑。豫先奏過。此皆伊並未奏及之事。捏為已奏。更屬無恥。愚而詐之甚也。又條陳時事數件。如大學士於一切本章。應行夾籤。九卿應時常召見。督撫等官。應行選擇等語。大學士之夾籤與否。伊何由得知。

且現今何嘗不夾籤。朕以得人。則諸事就理。雖道府等官。槩令陛見請訓。而況九卿。九卿之未嘗數召見者。則留保木和林。滿色。張廷璐。張廷琛。王承堯。許希孔。數人也。且此數人。即令日日召見。能有裨於政治耶。若夫督撫之慎選。更不待言。進愛獨全。不聞知耶。又稱京官外用。則以為樂。外官內用。則以為苦。宜加調停。不知伊意欲如何調停。想不過欲貪黷公行。賄賂交通。亦如民間之燒鍋賭博。槩弛其禁。乃為快意耶。至於內務府。何至開張鋪面。與民爭利。此人所共知。共見者。伊不知何處來此夢囈之語。朕因數日天氣亢旱。炎熱倍常。明係上天垂象。以示儆。想因朕躬之闕失。與用人行政之失宜。時加省惕。倍切憂勤。若人臣進言。苟有可採。朕必樂聞。若似此卑鄙悖謬。任意捏造。且有意惑人聽聞者。則不可不加懲治。況欽天監職司推步。豈可妄逞邪說。蠱亂人

心。進愛著該部嚴察議奏。并將伊摺內謬誕之處。曉諭臣工知之。○又諭。河南巡撫雅爾圖。現已來京候旨。碩色未能即日。到任。阿里衮。湖南審理事竣。路經河南。著即赴開封。暫署巡撫事務。俟碩色到任後。再來京復命。碩色接到部文。亦即赴河南新任。不必候紀山交代。亦不必來京請訓。○又諭。朕前降旨。將山東運河道陳法。調補安徽廬鳳道。目下正當伏秋大汛。河防關係緊要。運河道有督率經理。修防調劑之責。恐易生手。未免不甚諳練。陳法著暫留運河道之任。俟秋汛過後。再與高越對調。各赴新任。○給事中陳大玠奏。考試罰俸翰詹諸臣。將一年俸。勻作三年扣除。遇有陞轉缺出。均予開列。得旨。著照所請行。○已未。諭。今年既多閏月。又值炎暑。商販米糧。到來較遲。近日雖經得雨。尚未霑足。米價比往年增長。應將京倉官米。速行發糶。以平市價。俾八旗五城兵民。俱得霑惠。如何辦

理之處。著戶部速議具奏。再黑豆價值近亦漸貴。官私馬匹。俱須喂養。亦應酌量平糶。著該部一併議奏。尋議查八旗米局。現存自數百石至千餘石不等。臣部行文各該旗。將米石平糶。俟將次糶完。再酌撥接濟。至五城地方。擬於京倉撥發每城一千石。開廠設糶。不敷臨期酌撥。其黑豆舊存數千石。不敷糶用。查河東二省已到新豆。業經上倉正等酌議。聖駕啟行後。京師馬駝。隨營者多。空七八九十等月。關支料豆。可以通融辦理。計內務府共二十七局。每局發一千石平糶。或有奸胥滋事。責成各該管官稽查。得旨。著步軍統領順天府君一併稽查。餘依議速行。○諭。前因河南開封所屬。雨澤愆期。朕已降旨。令該撫虔誠祈禱。清理刑名。續據雅爾圖奏稱。近日雖得微雨。未能深透。此不過雅爾圖塞責之語。朕聞得彼地竟未得雨。大田多未栽種。此際正須籌畫平糶借種等事。如已成災。更宜撫

恤。著護撫趙城即速查辦。俟阿里衮到豫。詳細辦理奏聞。該部遵諭速行。○工部議准盛京工部侍郎德新奏稱。一切零星歲修工程。料估一事。向來未有專司。亦未定限。請照京都之例。設立料估一所。擇司員中廉幹者。派出一員。筆帖式二員。并料估人四名。以專責成。料估之人。毋月給飯食銀一兩。從之。○庚申。諭本年七月。朕前往奉天謁

陵。戶刑二部堂官。派出隨駕者多。俟朕起程後。著史貽直暫兼管刑部尚書事。盛安暫兼管戶部侍郎事。○又諭朕聞湖廣營伍甚屬廢弛。提督總理通省軍務。操練修整。是其專責。王無黨到任。已及兩年。全無整理。亦未將營伍情形奏聞。殊屬不合。著交部察議具奏。○大學士議准。禮部奏稱。今秋

皇上恭謁

永陵。請照康熙三十七年之例。停止

親獻帛爵。拜褥仍鋪設於

殿外。惟舊例

皇上詣

陵致祭。俱

躬親上香。此次恭謁

永陵。可否

躬親上香之處。俟相度定議。再行請旨載入儀

注。伏思謁

陵大典。纖微宜慎。

永陵殿宇。雖覺少狹。惟獻帛爵。仍於

殿外鋪設拜褥。其降

神之初。應請

躬親上香。以展誠孝。再初次舉行謁

陵大禮。一切典制。理宜周詳。應如所請。令學士

伍齡安帶領屬員前往。將各

陵一切祭祀品儀陳設。及行禮之進退周旋。俱

會同盛京禮部。詳細妥協料理。俾臨期禮儀

整肅。以昭盛典。奏。奉。報。可。○戶部議准。漕運

總督顧琮疏請。清查湖北武昌武左黃州蘄

州四衛屯田。按糧多寡。分別議定幫費。官徵官給。以均濟運。查定額武昌衛五十六船。武左衛五十五船。每船各得銀一百四十七兩零。黃州衛二十六船。每船給銀一百二十五兩零。蘄州衛三十二船。每船給銀一百三十五兩零。因屯派幫。民不擾而運費有資。又湖北減丁。俱屬輪運。并非永減之閒丁。出運者領給幫銀。減歇者尚出幫費。並不能坐享餘利。請就各衛所情形。有屯清屯無屯清費為便。從之。○辛酉。

上詣暢春園問

皇太后安。○諭直隸各屬。雍正十二年以前民欠錢糧。已於恩詔內寬免。惟有慶都靜海冀州武邑四州縣。民欠米穀共一萬一千九百餘石。向經部議。以係出借之項。不在寬免之例。朕思此項歷年已久。尚事追呼。小民未免苦累。著一體開恩。悉予豁免。俾窮黎均霑惠澤。該部即遵旨行。○世襲一等子孟可故。以

其子恩特和襲爵。○子浙江衢州鎮總兵康華齡年老休致。○以閩粵南澳鎮總兵李琨為浙江衢州鎮總兵。○壬戌。

上御勤政殿聽政。○以內閣學士開泰為兵部右侍郎。○降吏部侍郎留保為內閣學士。以江南總督宗室德沛為吏部侍郎。以光祿寺卿岳濬為福建按察使。○以吏部左侍郎阿克敦為鑲藍旗滿洲都統。工部尚書韓光基為正白旗漢軍都統。○旌表守正捐軀之

河南宜陽縣民姚介女姚氏。山東堂邑縣民陳八妻勞氏。○癸亥。諭在京各衙門事務。俱係滿漢堂司公同辦理。至遇罰俸處分。旗員則註冊合算。漢員則照常罰俸。例未盡一。嗣後凡在京臣工。有罰俸案件。不至銷去一次紀錄者。俱照旗員之例。註冊合算。戶部議覆漕運總督顧琮疏稱。凡軍田典賣在民。以及頂墾絕荒。培成沃壤者。該民願當軍差。准其管業。如不願當差。則聽本軍及同伍之軍

回贖。或軍置軍產。田差俱去者。亦准其管業。如田去差存者。仍准回贖。應如所請。但恐原戶有貧疲不能回贖者。仍令該督撫分別津貼。從之。○兵部議准。貴州總督張廣泗疏稱。該省各標鎮協營裁兵事宜。有汛防宜裁改者。安籠鎮標中營之馬鞭田汛。洛灞汛。右營之土橋汛。鎮遠鎮標中營之焦溪汛。右營之塘頭哨汛。響水汛。定遠協左營之威遠汛。大華汛。遵義協右營之鴨溪汛。平遠協右營之牛場汛。比却汛。俱改為塘。大定協左營裁塘四。右營裁塘五。黔西協左營裁塘六。右營裁塘四。有員弁當移駐者。安籠鎮標中營之把總。威寧鎮標右營之守備。鎮遠鎮標中營之外委。右營之外委。大定協左營之把總。平遠協右營之把總。定遠協左營之外委。遵義協左營之把總。銅仁協左營之外委。歸化營之外委。把總各一員。俱撤回存城。城安營之外委。把總各一員。悉撤去。其大定協右營之外

實錄卷一百九十四

十

委。原駐公雞山塘者。移籠巴倉汛。原駐落腳河塘者。與歸化營之遊擊移駐威遠。都勻協右營原駐勻城之遊擊。外委並原防獨山汛之把總。移駐獨山。原防獨山之守備一員。並八寨汛把總。外委各一員。移駐府城。有兵丁宜裁撤者。安籠鎮標之中營裁五十名。左營裁五十名。右營裁六十六名。威寧鎮標之左營裁一百名。右營裁一百名。鎮遠鎮標之中營裁一百名。左營裁九十四名。右營裁一百名。大定協之左營裁一百三十二名。右營裁一百名。平遠協之左營裁二十名。右營裁五十名。黔西協之左營裁五十名。右營裁五十名。定廣協之左營裁六十名。右營裁四十三名。遵義協之左營裁一百名。右營裁一百十名。清江協之左營裁五十名。右營裁一百五十名。銅仁協之左營裁五十四名。板武營裁十名。太平營裁十九名。滑石營裁十七名。噢腦營裁三十二名。正大營裁六十八名。長寨

實錄卷一百九十四

十一

營裁一百五十名。丹江營裁二百名。台拱營裁二百名。郎洞營裁二百名。貴陽營裁八十五名。畢赤營裁五十名。長壩營裁一百名。安南營裁四十七名。歸化營裁二百名。下江營裁二百名。城安營裁一百九十四名。水城營裁一百名。天柱營裁一百十名。永安營裁四十名。普安營裁六十名。仁懷營裁五十名。黃平營裁一百五十五名。凱里營裁一百名。從之。○甲子。戶部等部議准。湖南按察使明德奏稱。

實錄卷一百九十四

買補倉穀。如果一時購難足數。本地有穀之家。情願出售於官者。見穀交銀。官為經理。毋得豫發價銀。強行派買。亦不得勒令賣戶上倉交納。致啟愆期捏報。并擾累等弊。至將來如有未進倉穀。混行入冊捏報者。照捏報未完錢糧例革職。其上司知而徇隱者。降三級調用。失於覺察者。罰俸一年。從之。○乙丑。諭軍機大臣等。聞得天津水師營兵丁平日並不以操練為事。自設駐防以來。迄今將屆二

十年。而於海面行舟之道。尚未諳悉。每逢春秋。戰船停泊海岸。遇都統查閱日期。海口傍近地方。苟且塞責。畧為駕駛。俟都統查回後。即在船內飲酒賭錢。並不演習技藝。以致有名無實等語。著寄信常久。富清查明。此事據實奏聞。○丙寅。

上詣暢春園。問

皇太后安。○諭。從前留京總理事務之王大臣。是兩人一班。在紫禁城內直宿。此次為時較

實錄卷一百九十四

久。著一日一人在內。輪班直宿。戶部議准。都統兼侍郎。今授四川巡撫。紀山等奏稱。河南去歲被水地方。惟淮寧。西華。鹿邑。永城。最重。緣此四縣。與江南之宿州。亳州。接境。地勢頗下。水浸之後。地多板荒。兼之疫氣傷牛。苦無開墾之具。請勅撫臣飭府縣借給牛種。加意撫綏。又河道溝渠淤塞者。宜急為深通。均應如該都統所請。惟查治水必下流疏通。方有歸宿。應令該撫會同江省督撫。查勘各該

縣連界處橫遏水道者。挑挖開通。庶上流暢達。不致積淤成患。得旨。依議速行。

實錄卷一百九十四

吉

大清高宗法天隆運至誠先覺體元立極敷文奮武孝慈神聖純皇帝實錄卷之一百九十四

大清高宗法天隆運至誠先覺體元立極敷文奮武孝慈神聖純皇帝實錄卷之一百九十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領閣事務稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆八年癸亥六月丁卯諭今年天氣炎熱

實錄卷一百九十五

十一

甚於往年。聞山東山西河南陝西所屬地方。民人竟有病暈。或至傷損者。該督撫等。自必為之經理。此等窮苦之人。無所依倚。全在地方官善為撫恤。可令各該督撫轉飭有司。悉心查辦。有應動存公銀兩者。即行動用。嗣後如有類此之事。毋得漠視。該部遵諭速行。○陝西道御史西成奏。伏見前諭九卿之未嘗數召見者。則留保木和林滿色張廷璐張廷琰王承堯許希孔數人也。且此數人。即今日

日召見。能有裨於政治耶。仰見聰明睿智。凡諸臣能否。無不洞鑒。而不忍遽加罷斥。請勅部曉諭諸臣。令各自陳居官實蹟。或調用。或休致。得旨。御史西成所奏。似是而非。未免言之太過。不知朕意。前日進愛奏摺內。有請時常召見九卿。可以知其才品。有裨政治之語。夫朕於九卿。召見者甚多。不但確知其行事。并且深悉其隱微。進愛竟以朕為不常見九卿。若不知九卿之底裏者。是以明白曉諭。並及九卿中數人不數召見之故。其實此數人者。資以啟沃。加以諮詢。固不足以有裨政治。亦尚各恭謹奉職。匪勉不違。並無過愆。即應罷斥之處。何至不可居位。而責以避賢路乎。假使應陞卿貳之員。果有傑出之才。高出諸臣之上。朕早進彼黜此。推賢讓能矣。而無如現在各員。亦皆中等才具。若用為卿貳。未必不與諸臣等。或且不及。亦未可知。又何必輕棄舊人。而擢用新進乎。朕聞人主臨下之度。

在於包荒。用人之道。貴乎造就。內外大臣衆多。豈盡能才全德備。一無可議。亦惟量材器使。用其所長。教其所短。以合乎古帝王與人不求備之義耳。前因進愛條陳。召見九卿。朕憤於彼之謂朕不知人。是以評論及此數人。而無知之小臣。遂以諸臣不應晏然居位為言。大非朕兼容曲成之意。朕轉悔前言之有失。舍宏也。今特將朕用人之本意。求才之苦衷。曉諭諸臣共知之。西成摺並發。又諭御史胡定叅劾許容誣叅謝濟世一案。今據侍郎阿里衮逐一審明。胡定所叅俱實。此案朕特命孫嘉淦前往湖南。會同許容虛公查審。倉德又復揭報張燦等。致札換詳等弊。亦交孫嘉淦審理。乃孫嘉淦一概朦混具題。經侍郎阿里衮研審。始得實情。朕思胡定身為言官。若言事不實。自有應得之處分。今既實矣。若止為謝濟世辯白冤抑。其事尚小。因此察出督撫等之挾私誣陷。徇隱扶同。使人人知

所警戒此則有裨於政治。為益良多。胡定著
交部議叙。至於各省督撫。身任封疆。必舉劾
悉秉公心。方不負朕之委任。若以愛憎為舉
劾。如許容孫嘉淦之居心行事。豈不抱愧大
廷。負慚夙夜。各督撫等。當深自警省。以許容
孫嘉淦為炯戒。步軍統領舒赫德等奏。八
旗五城平糶米豆。向將錢交戶部。今錢價日
昂。懇將此項錢赴市易銀。減價解部。得旨。著
照所請行。該部知道。禮部侍郎滿色。以年
老休致。調理藩院侍郎勒爾森為禮部侍郎。
以鑲白旗滿洲都統旺扎爾為理藩院侍郎。
予宗人府府丞劉藻終養假。戊辰飭戒
武員袒護兵丁。諭朕惠養兵民。視同一體。即
如地方米少價昂之際。或平糶以濟民食。或
借穀以濟兵糧。均當斟酌其時而後行之。方
於兵民有益。而無如無識武員。欲博兵丁歡
心。好行其惠。不計候之早遲與倉儲之多寡。
輒冒昧請發。迨後來米糧不繼。而兵民俱受

其困矣。今年春夏間。廣西提督譚行義欲借
柳州倉穀五千石與提標兵丁。既已咨商撫
臣。自應聽其酌覆。乃該撫尚未回覆。而譚行
義竟將三千石借與兵丁。且欲全省照此通
行。是其意但知有兵。而不知有民矣。獨不思
兵丁每月既有餉銀。又有額米。非貧民無計
營生者可比。譚行義識見卑鄙。不知大體。著
交部察議。具奏。從來武官陋習。一味袒護兵
丁。以博稱譽。兵丁又恃強負氣。難於約束。西
北邊境以及苗徭地方。並濱江沿海之區。營
汛居多。一城一鎮之中。兵民幾於相半。一人
食糧而弟兄親戚遂有倚勢生事之意。及至
發覺。該管弁員又復為之請託。承審有司未
免顧恤同官處分不加窮究。而兵丁益無忌
憚矣。著各省督撫提鎮。時刻留心查察。嚴切
訓飭。倘有仍蹈故轍者。將該弁即行糾參。兵
丁加重懲治。不得姑容。鑲黃旗漢軍都統
和碩裕親王廣祿奏。查從前吉林等處。凡有

補放官員只寫綠頭牌進呈實難驗其可否。請嗣後由京補放吉林等處官員年滿時由該將軍保送到旗與京城應陞人員一體引見。如未奉旨補放回任後該旗又遇缺出。其已引見者無庸調取來京。若一年後缺出者仍調京引見得旨。好依議。兵部議准。漕運總督顧琮疏稱德州一衛管轄一百八屯軍地散處直東兩省十七州縣內稽查不易。兼之正左兩幫僉造南北兩汎河道修防應改繁缺泗州一衛近年以來並無疲憊掛欠應納屯糧亦多急公且地非孔道又無催趲之責應改簡缺從之。賞給蘇祿國陪臣馬光明等緞匹如例。己已。

上詣暢春園問

皇太后安。飭戒驛遞擾累。諭驛遞關係郵傳最為緊要濫騎濫應例禁甚嚴而外省擾害之弊究不能免。朕聞雲貴督撫齎摺入京路經湖南地方所用驛馬在勘合火牌額數以

內者固當應付乃陋習相沿有在額數以外者地方官亦不得不應更有並無勘合火牌而私索強騎者亦不能不應及被該省上司查出又以州縣濫應驛馬照例叅處甚為苦累著雲貴督撫嚴飭差弁家人凜遵功令不得於勘牌之外多索一騎如仍前不改經朕訪聞惟該督撫是問各省有類此者亦當一體凜遵。又諭軍機大臣等朕聞得今夏江西地方因米價昂貴奸民屢有聚衆搶奪之事閏四月十二三等日則有南安府屬大庾崇義兩縣鄉民朱佩月等之案閏四月初旬有南康上猶兩縣鄉村居民被搶之案又有贛州府城外虎喇橋七里鎮攸鎮搶米之案閏四月十九二十等日有贛縣萬安兩邑居民米穀被搶之案隨經總兵會同府縣官派兵查拏彈壓以上各案陳宏謀並未奏聞其所奏者止有二月內袁州府宜春縣之案閏四月內吉安府永豐縣之案看來江西刁民

生事之處頗多。陳宏謀全無料理於事先。及至有事。又不據實陳奏。是誠何心。可速傳旨詢問。令其明白回奏。目下光景如何。伊作何料理之處。著一并速奏來。○大學士等奏。此次由京交馬時。仍照乾隆六年哨圍例。各該旗派副都統一員。前往嚴查。再據總理行營處遵旨議奏。自七月初二日至初四日。編為三撥。共二千餘人。俱先起程前去。其辦給前撥遣往員弁馬匹。六月二十六日起。陸續放給。得旨依議。再朕前年哨圍。將賠交官馬之處。悉行寬免。此次程途雖遠。已換給馬匹三次。斷不似前歲寬免。將此旨傳諭乘騎官馬人等。務須加意牧養。毋致倒斃。戶部議准。廣東布政使托庸疏稱。粵東銅鉛礦廠。請招商開採。核計商費工本。酌量抽收。餘銅照時價每觔一錢七分五厘。交官收買。其銅鉛礦內間雜金銀各砂。應照滇黔例。分別抽課充餉。從之。○兵部議准寧古塔將軍鄂彌達疏

稱。駕幸盛京。沿途安設臺站。赫爾素至英莪。酌設八九站。每站撥馬三十匹。并隨營人等乘騎。共需馬七百匹。將各站馬匹存留馳送事件外。餘馬四百七十五匹。抽撥豫備。尚不敷馬二百二十五匹。於本處兵丁馬匹內挑用從之。給事中陳大珩奏。閩省去歲薄收。督臣奏請截留浙漕十萬石。海運至閩平糶。經御史沈廷芳奏。奸商泛海。購米逐利。凡產米之地。不許洋船夾帶越漏。竊思沈廷芳係浙人。臣係閩人。浙閩之民。皆我皇上赤子。今閩人全賴海運撥賑。且商船出入。原有行戶保認。官員稽查。請申明舊例。無庸禁止。以滋商民之累。得旨。此事著該部議奏。陳大珩只宜就事論事。疏中閩人浙人之說。先分畛域。立言失體。著飭行。○辛未。諭河間天津地方。今年雨澤愆期。米價昂貴。不得不速籌接濟之道。查上年通倉存貯。有口外採買備用之粟米。著先撥十萬石。運送天津。其

何以分貯平糶賑卹。聽總督高斌酌量辦理。可即傳諭倉場侍郎雇船運送。並著坐糧廳恩特督運。速赴天津。至一應搬運之費。照例開銷。該部遵諭速行。○諭軍機大臣等。前尹繼善奏淮水為洪湖上游。現在淮水陡長丈餘。倘續長不消。有必須宣洩之勢。自當權其輕重。相機妥辦。斷不敢將就因循。以貽百姓之累。朕已經批示矣。今白鍾山亦奏稱。淮水倘續長不消。洪湖難以容受。有必需宣洩之

勢。自當酌量情形。相機妥辦。是伊二人異口同聲。如出一轍也。開放天然壩。原係異漲無可如何。不得已之下計。豈有別無籌畫。惟恃此為長策乎。且滾壩原以過水。今水尚未過壩。即蓄意掘壩放水。是竟以下河州縣為壑。可以自免干係。如此則河道總督。人人優為之。又何難辦之有。況下河州縣。每年被淹。湖水日弱。縱可遮掩目前。恐將來為害甚遠。甚大。亦不可不慮及也。從前完顏偉任南河時。

因與德沛不合。以致債事。今尹繼善與白鍾山又未免有意扶同。亦恐於事無濟。爾等可傳旨訓諭之。廣西巡撫楊錫紱疏報富川貴縣永康天河鬱林五州縣。首墾新舊荒田共三頃二十二畝有奇。壬申訓督撫率屬重農。諭曰。朕惟養民之本。莫要於務農。州縣考成。固應用是為殿最。而向來功令。不專以此課吏者。因其事甚樸。無可炫長。其迹似迂。驟難見效。又或上官之查勘難周。有司之條

教易飾。不似催科聽斷捕盜等事之顯而有據也。督撫察吏。每於此等本計。轉視為老生常談。漠然不甚加意。以致州縣之吏。趨承風旨。專以簿書期會為先。而農事反居其後。職司民牧之謂何。不知為治之道。本舉而末自隨之。如果南畝西疇。人無餘力。于耜舉趾。日無暇時。則心志自多淳樸。風俗自鮮囂陵。人知急公。而閭閻無待追呼矣。人知畏法。而盜賊因以浸息矣。本計既端。末事亦次第就理。

如此則州縣之考成似疎而實密。即督撫之察核可簡而不繁。日計不足。月計有餘。民生大有裨益。即治道亦漸致郅隆。若夫朝令夕申。意非不美。束縛馳驟。適以擾民。為督撫者。當善體朕意。毋視為具文。毋事於塗飾。誠以實心化導其屬。俾屬吏亦以實力勸課其民。庶幾野無游惰之風。家有蓋藏之樂。朕以此訓示督撫。業已至再至三。不啻耳提面命。今復降此諭。實願與天下共敦本計。故不厭其言之重。而詞之複也。各省督撫其共勉之。

又諭據貴州總督張廣泗奏。黔省自交夏以來。米價昂貴。已通飭各屬。察看地方情形。將倉穀減價平糶。至於無錢赴糶之人。正自不乏。其中年力未衰者。尚可傭工度日。惟有鰥寡孤獨。以及夫男遠出。祇存妻子在家者。除前經收入普濟堂。足資存養外。尚有不願收入普濟堂者。嗷嗷待哺。急宜撫恤。臣與司道酌議。通飭各屬。逐一確查。按照普濟堂之例。

大口日給米八合。小口減半。以兩月為期。可以接至秋成。現在一面查報。一面散給州縣。若州縣力不能捐。臣等公同捐給。務期窮獨不致失所等語。此等窮困之民。國家自應加恩惠養。其養贍之資。動用存公銀兩為是。若散給州縣。令地方官捐資。豈朕保赤之意。張廣泗不識大體。可申飭之。戶部議准。直隸總督高斌奏稱。熱河及一百家二處看倉千總二員兵六十名所支俸餉。向係赴京關支。請改歸直省司庫豫行解交熱河兵備道庫從之。廣東道御史李清芳奏。選用御史。應令吏部將合例人員。奏請考試。得旨。朕以保舉可得賢才。李清芳所慮亦是。著照所請行。該部知道。癸酉。訓內外大臣寬嚴得中。諭曰。江蘇巡撫陳大受奏稱。金壇無錫等縣。坍沒蘆田。請豁免錢糧。部議以於例不符。未經准行等語。從來民間田畝。坍沒者免課。漲墾者升科。此定例也。即如陳大受摺奏中稱。請

自今每歲丈量。坍者即予以豁免等語。言坍而不言漲。則狃於一偏矣。朕觀近日各省督撫。見朕加恩百姓。於地方一切事務不詳察事理。不深籌國計。凡有可邀民譽者。一概巧思請寬請免。以見其為民請命之意。且以為縱干部駁。而此事已上請。可以使民知感。部臣議事。又以為為職司出納。慎重錢糧。於督撫題奏之事。可駁者固議駁。即情節可准者。亦無不議駁。專以綜覈為盡職。而待思出自上。

夫事事必思出自上。豈成政體。總之。內外臣工情形。督撫多失之寬。部臣多失之嚴。寬與嚴皆非中道。督撫與部臣。職任雖有內外之分。而為體國之大臣。則一朕以建中之理治天下。而二三大臣尚不能化此夙習。是朕之誠有未孚也。用是特頒諭旨。宣示俾共知朕意。命翰林院侍讀介福提督安徽學政。大理寺卿嵩壽提督陝西學政。甲戌遣官祭火神廟。諭據侍郎王保所奏。噶爾丹策零

此次遣使進藏熬茶。其詞貌俱極恭順。且請將所攜貨物先在東科爾貿易。朕之恩准夷使入藏者。因噶爾丹策零懇請為伊父修善事故。特允之前次來使。因貿易羈留。遂至過時不能前進。半道空回。此次所攜貨物。並無從前羚羊角。綠葡萄等項。止係皮張。尚易於變易。著行文甘肅巡撫黃廷桂。令其即往西寧。將夷使交易之事。速行料理。俾得即日起程。若復遷延過時。不能入藏。將來又須另為辦理。此次一切俱

令寬裕施恩。籌辦妥協。速竟其事。著王保將朕加恩接濟。并令即行進藏之故。曉諭夷使等知之。乙亥大學士等議。覆川陝總督慶復條奏。滇省武職大員。宜避本籍陞補。查例載各省題補缺出。本籍人俱行迴避。如要缺需人。籍隸他省者。無可題補。不得不用本省人。至月選推陞各官。本省人俱迴避。又定例。守備以上五百里外。始准補用。是武職官員原有迴避本省之例。向以雲南遠處天末。多

屬苗疆。必須熟諳風土夷情之員。是以自副將至遊守。共一百一十四缺。由部推補者。僅止四缺。其餘俱准該督等酌量題補。今該省本籍武職大員。雖現任者僅十一員。但副叅遊守等題缺。每由本籍兵丁。千把。漸次陞補。將來愈積愈多。誠恐不無交結瞻徇之弊。應如該督所奏。遵例迴避。再查該省守備一項。多由年滿千總題補。多係本籍之人。若不豫為變通。將來守備以上大員。仍係本籍者居多。嗣後遇有雲南年滿千總。酌量間發隣省。以守備題補。其隣近之貴州。四川。廣西。年滿千總。亦間發滇省。以守備題補。從之。○予故熊岳副都統額爾欽半葬。○丙子。

上詣暢春園問

皇太后安。○諭。今年直隸。山東。河南等省。有缺雨之州縣。將來或至成災。亦未可定。其經理之處。不容刻緩。若該督撫有請免請賑本章。應照例辦理者。朕祇謁

祖陵。事關鉅典。而民瘼之念。時時在懷。若俟行在降旨。未免稽遲時日。著留京總理事務之王大學士等四人。一面交部查辦。一面奏聞。部議之後。亦即一面行文該省。一面奏聞。如此則事得速辦。不至有濡滯之慮矣。○飭督撫開導愚民。諭據山東巡撫喀爾吉善奏。東省雨澤愆期之州縣。秋成漸致失望。民人多外出謀生。而隣省貧民。亦有轉入東省覓食者。夫地方雨暘不時。例有借給籽本。督令補種。設或得雨已遲。補種無及。亦應酌量撫卹。何至一時紛紛轉徙。即逃荒亦所時有。然必俟果至秋收無望。或流他處覓食可耳。豈有尚在六月可望續種之時。即流移至此。喀爾吉善又奏稱。在愚氓之意。不過希冀隣省收養。多霑恩澤。細察此輩。非習慣求乞。即游惰愚民。如竟行留養。不惟時日尚早。難乎為繼。且愈滋覬覦輕出之風。若任其過往。漫無稽查。又恐流離四散。不無為匪滋事。請即飭地

方官勸令各回故土。以待本處自有之恩。并令遮留撫馭。毋致再有外出等語。所見甚為得體。各省督撫。須當留心。於平居無事之時。委曲開導。使知敦本務實。力田逢年。若輕棄其鄉。則本業拋荒。失所依倚。即國家收養資送。亦不得已之計。非可恃為常策也。平日既諄切勸諭。俾各知安土重遷。及至歉象已形。百姓有漸不能支之勢。即設法安頓。使之各守鄉里。不致越境四出。如此則先事綢繆。臨期補救。於扶危濟困之道。斯為兩得。而閭閻實被其澤矣。若平時漫不經心。以致貧民遇歉。轉徙留之不能。驅之不可。豈經國子民之善計乎。可將朕意傳諭各督撫共知之。又諭據山東巡撫喀爾吉善奏。稱東省雖屢經得雨。未能一概霑足。恐將來查勘災賑。事務繁多。需員辦理。請將候補州縣之員。揀發數人來東。以備委用等語。著照喀爾吉善所請。交與該部。速於候補州縣人員內。揀選七八

員命往山東。聽喀爾吉善差委試用。如才可辦事。即酌量題補。若才具平庸。即咨部請旨。諭軍機大臣等。孫嘉淦許容。大負朕恩。現在交部核議。所有順義縣應修城工。著伊二人効力贖罪。但令出貲。無庸親辦。可傳諭高斌委員辦理。諭軍機大臣等。據高斌奏。稱天津河間二府所屬地方。雨澤愆期。秋成失望。百姓流移外出者甚多。臣現在出示曉諭。俟秋成時。所有歉收之處。自蒙聖恩賑恤。不使一夫失所等語。朕批示曰。若俟秋成再行賑恤。恐民去者愈多。可將朕已發粟十萬石。仍有續發之處。曉諭貧民。更將賑恤之處。速為辦理。朕所謂曉諭辦理者。乃曉諭黎民。不可輕去其鄉。如果成災。自有賑恤之恩澤。至於開賑。原有定期。若於此時即行開賑。則將來事更難辦矣。但民人既有流移覓食者。又不可聽其失所。可寄信密諭高斌。或先將極貧戶口。先為賑恤。或借與秋麥。一得雨澤。即

勸民耕種以安民心。諸事須善為撫綏。目前秋汛在邇。高斌現在固安。查看河渠。可因巡河之便。至天津一帶。鎮靜妥辦。即回保定。不必送駕。俟回鑾時接駕可也。諭軍機大臣等。廣西之鎮安府。雲南之廣南府。各有通安南之隘口。自前歲匪徒滋擾。保樂夷州以來。滇粵兩省文武大員。自應嚴飭守隘員弁。加謹防範。不許匪類往來出入。以清邊境。朕聞粵省稽查頗嚴。而滇省則近於疎懈。廣南土人出交者紛紛。甚屬混雜。張允隨亦未將隘口情形常時陳奏。未免視為泛常。爾等可傳旨密諭張允隨。令其加意防範。定邊左副將軍額駙策凌奏。貝子旺扎爾旗分協理台吉旺扎爾扎布。向因屢次資助軍營牲畜。部議授為頭等台吉。茲以豫備游牧兵護視哲布尊丹巴呼圖克圖。伊念本旗貧乏。於本分應辦外。請每年更為代辦一百名口糧牲畜。甚屬急公。得旨。旺扎爾扎布著加恩獎賞。該

部議奏。丁丑

上御勤政殿聽政。奉

皇太后詔。同樂園侍晚膳。諭本年天津河間等處較旱。聞得兩府所屬失業流民。聞知口外雨水調勻。均各前往就食。出喜峯口古北口山海關者頗多。各關口官弁等。若仍照向例攔阻。不准出口。伊等既在原籍失業離家。邊口又不准放出。恐貧苦小民。愈致狼狽。著行文密諭邊口官弁等。如有貧民出口者。門上不必攔阻。即時放出。但不可將遵奉諭旨。不禁伊等出口情節。令衆知之。最宜慎密。倘有聲言。令衆得知。恐貧民成羣結夥。投往口外者。愈致衆多矣。著詳悉曉諭各邊口官弁等知之。議政大臣和碩裕親王。廣祿議准。御史台柱疏。請齊齊哈爾墨爾根黑龍江三城官學教習。令該管官。於現任筆帖式內。擇繙譯明通品行端方者。充補。仍令值年御史查考所教生徒。內有清文通順。字畫端楷者。

准按名記檔如遇堂庫各司辦事之人挨次頂補不堪造就者除名從之。戊寅

上奉

皇太后詣同樂園侍早晚膳。○諭二十三及二十五六等日京師連得透雨不知天津河間一帶亦得透雨否如已得雨尚可補種晚菽否凡可以補種者著高斌上緊辦理即速奏聞。○又諭朕聞修書各館謄錄人員內竟有不能繕寫之人夤緣而進及上館之後轉

行情募以致承修各書不能刻期告竣夫國家開館纂修典制綦重書成之日謄錄人員亦有議敘錄用之例何得將不能書寫之人濫行充補從前滿洲繙譯謄錄亦由各館自行挑補後御史觀音保條奏請簡派大臣考試選取送館經部議行嗣後各館漢謄錄需人亦應另派大臣秉公考取其如何考核送館錄用并現在各館漢謄錄應如何查核之處著該部定議具奏。○疏通武舉選法。諭武

舉內有隨幫効力年滿人員應以衛千總用者其選用之法按其從前揀選等第分班銓選一等人數無多選期尚速其二等者有數十人三等者多至二百餘人每年選用不過三四人甚為壅滯朕思衛千總與營千總雖屬有間但武職人員俱尚技勇亦當及其強壯之時而用之且此項武舉既係隨幫年滿非閑散武舉可比若遲至二三十年之久方得錄用未免精力就衰難為國家宣力所當酌量疏通著該部詳悉妥議具奏請旨尋議衛千總班內設有二捐班係選用從前捐納之人應將此二班借於三等隨幫選用如本班捐納有赴部投供者仍儘本班先用其豫籌糧運例捐衛千總已經用完應將所有別設一班移於二班之上選用二等隨幫又議代領重運人員照繳委代領日期先後選用如日期相同照揀選年分科分名次選用從之。○又諭德山前為給事中。原屬中等之員

及任鴻臚寺卿行走平常。又復多病。著以原品休致。大學士等議准。署貴州布政使陳惠榮奏稱苗民滋事。審斷定案之後。一面取其兩造。遵依一面。取其兩縣文武收管。此後如再自反覆。先將伊等嚴叅議處。從之。○已卯

上詣長春仙館問

皇太后安。奉

皇太后還暢春園。○禁衿監充認牙行。諭民間

貿易官為設立牙行。以評市價。所以通商便民。彼此均有利益也。是以定例投認牙行。必係殷實良民。取有結狀。始准給帖充應。蓋殷實則有產業可抵。良民則無護符可恃。庶幾顧惜身家。凜遵法紀。不敢任意侵吞。為商人之害。乃聞各省牙行多有以衿監充者。每至侵蝕客本。拖欠貨銀。或恃情面而曲為遲延。或藉聲勢而逞其措勒。以致羈旅遠商。含忍莫訴。甚屬可憫。從前外省衙門胥役有更

名換姓兼充牙行者。已經降旨。勒部定議。嚴行禁革。積弊始除。而衿監充行。其弊與胥役等應將現在牙行逐一詳查。如有衿監充認者。即行追帖。令其歇業。永著為例。嗣後如有仍蹈故轍。而州縣官失於查察者。著該上司查叅議處。其如何定例之處。該部妥議具奏。尋議現在牙行。如有衿監充認。即行追帖。令其歇業。並永行嚴禁。如不肖衿監藐視法紀。州縣官奉行不力者。照胥役兼充牙行例。分別治罪從之。吏部帶領湖北降調知縣朱繼序引見得旨。朱繼序看來才力不及。著以教職用。巡撫范瓌將該員出具考語。謂其居官謹飭。尚可。若云辦事勤勉。有志向上。實與該員不符。朱繼序浙江人。范瓌未免有瞻顧同鄉之意。著飭行近來各省督撫。凡遇降革送部引見之員。其所出考語。大率過優。止知博一人之感悅。而不計該員之可用與否。此風亦不可長。可將此並諭各省督撫知之。○

工部議准直隸總督高斌奏稱。南運河青縣李家鎮地方。逼處運河東岸。近年汎水經臨。將河岸衝刷坍塌。居民房舍。危險可虞。且漕運至此轉灣。並無緯道。請於東岸中擺渡百步內添建挑水壩一座。并於南北接修鴈翅。又慶雲縣老黃河。逼近城垣。汎水浩瀚。護城隄身單薄。請照例加培。得旨。依議速行。○福建道御史陳仁奏。近見

皇上御極以來。臣工條奏。莫不嘉納。即抵觸忌諱。亦不肯輕罪一人。言路可謂開矣。然恐臣下有厭人言者。或謂其黨同伐異。或謂其賣直沽名。或謂其存心刻薄。好訐陰私。或謂此輩務要遷官。所以多言。如此惑亂上聽者。須防其漸。伏願容納直言。執此之心。堅如金石。行此之政。信如四時。成此之功。無間於天地。此亦豫弭災害之一大端也。得旨。所奏是。知道了。庚辰。

上詣暢春園問

皇太后安。戶部右侍郎署湖南巡撫阿里衮奏。請從前鹽價。每觔定銀一分。彼時錢價平賤。每銀一分。約收十文。嗣因錢價昂貴。小民零買用錢。準之銀數。已係一分二三釐。應請以銀數定鹽價。照錢價準銀數。總以時價折算。不得以銀一分收錢十文。再鹽舖所用銀錢。俱名老廣法。比官法馬較重。應請以官法馬為準。得旨是。酌中執法辦理可也。○是月直隸總督高斌奏。天津河間賑濟事宜。令地方官赴鄉。先查戶口。分別極貧次貧。並就近曉諭。不可離鄉外出。再選一二賢能佐雜。協辦至強勁勒借之風。更宜嚴禁。一將恩賞通倉運津備賑糶粟米。分運各州縣。照該地方時價大加核減。以平市價。一地畝無論旗民。但查無力購種者。即借與麥種。趕種秋禾。如地主外出。即責成該地鄰右承種。倘地主聞信歸來。計到日遲早。所收之麥。公平分給。○開賑不宜太早。自今冬十一月起。至明春

三月止。極貧賑五個月。次貧將日期伸長。賑四個月。其十月以前。惟於極貧戶中。令道府親查實在乏食飢口。酌給口糧。一口外地方。連年豐收。請於各該處添建倉廩收貯。以及運薊運通。且徑運津屬。以濟賑務。得旨。所奏俱妥。即照此實力為之。○又奏。報得雨寸數。得旨。覽。前此雖得透雨。然雨後所種晚田。又復望雨。雖數日可待。而實切望霖矣。○又奏。報二麥收成。分數得旨。麥雖半收。大田現望澤孔殷。且京師早暵特甚。病渴者多。此皆朕不德。小民其何辜耶。朕別無他諭。想卿同此心。惟有望。

上天早賜惠。一日。即早解一日之憂耳。直隸布政使沈起元奏。請立平糶一定之章程。悉照米穀本價為準。得旨。本價少於時價。固可如此平糶。設時價少於本價。又將如何。若謂時價斷無少於本價之理。則年復一年。秋成之際。仍買米存貯否。不通之極。與督臣看。

直隸提督保祝奏。直隸沿邊各口。添設旗兵。有冷口新到之兵。不遵法紀。該管官辦理不善。現在嚴飭查辦。得旨。汝雖提督。實係滿洲大臣。此等不法兵丁。即應喚至汝前。重處示警。參其所管之人。方稱合理。如此遲回。不愈滋事耶。天津都統阿揚阿。副都統常久等奏。水師營事務繁冗。請添左右二司。每司揀選協領一員。為司章京。并鑄給關防。鈐記。報聞。天津水師營副都統常久。總兵官傅清奏。滿洲水師營。原設滿洲兵二千名。戰船二十隻。每年按期習練水戰。歸城早操。雖皆無誤。但紀律不能嚴明。以致技藝生疎。現惟親加督率。務期技勇純熟。盡除游惰。得旨。所奏俱悉。交常久加意整頓可也。○署兩江總督尹繼善。江蘇巡撫陳大受奏。賑恤事宜。銅山沛縣極貧之戶。給賑六七兩。月次貧給賑七月。一月海州沭陽乏食貧民。亦賑一月。阜寧情形雖覺稍輕。然秋穫尚遙。應接濟一月。其

各衛所隨州縣坐落地方一體分別查辦得
旨所奏俱悉督撫率屬員妥辦可也 漕運
總督顧琮奏漕運應辦事宜一漕白各幫全
糧到壩恐不肖旗丁見今年餘米較多明年
所帶空重食米在次少為折乾過淮盤驗時
藉口在途食用過多現嚴飭監兌經徵各官
將全數兌足以憑盤驗并飭各州縣不許折
乾給丁一江廣幫船體重大喫水過深宜隨
帶剝船以濟運行得旨好皆屬妥協也 江

南河道總督白鍾山奏報秋汛內湖河各工
平穩情形得旨覽奏稍慰但今年非比常年
蓋災傷之後元氣未復所宜倍加兢業也至
秋汛踵至尤應妥辦朕起程在即卿其慎重
機宜有應行料理者一面料理一面奏聞
閩浙總督那蘇圖奏報雨水情形并拏獲搶
米奸徒現在各屬寧靜得旨欣慰覽之又撥
十萬漕糧接濟可速出告示以慰民心 又
奏漳浦縣吳林二姓各恃族大丁繁持械格

鬪除拏獲首犯究治外仍飭令各該房長族
正開導其餘俾知愧悔改過自新得旨此正
未易言也時常留心可耳 又奏辦理閩省
錢價將存貯場館錢文搭放市價已臻平減
并拏獲私鑄奸徒究辦得旨好應如是留心
者若能再獲則犯者益少矣 湖北巡撫晏
斯盛奏准原任荆關監督將稅務關防移送
到臣該關距臣駐劄之武昌計程千里耳目
難周請設監督一員前往該關專司其事得

旨有旨諭部但汝此奏巧矣朕固知汝是此
等人此等事尚可若諸事如此後悔莫及慎
之戒之亦不必盡批示汝會意可耳 又奏
楚北地當五達商旅雲集不逞之徒易於潛
伏巡查不可不嚴臣等各遣本標官兵分途
遊緝如荊口牌洲嘉魚新隄羅山臨湘岳州
此五百里內則係督臣標下千總一員帶兵
四名又水師頭舵水手兵四名駕船一隻往
來遊巡輪班更替其青山八吉堡白許鎮三

江口黃州武昌蘄州道士洑以迄九江此數百里內係臣標千總一員帶兵如前數更番遊巡此水路之遊巡也其陸路之上游如漢川沔陽天門潛江荊門安陸鍾祥宜城襄陽棗陽呂堰以迄豫省接界暨荊州松滋公安石首監利至湖南交界並岳州蒲圻咸寧等境則係督臣標下千總一員帶兵六名巡環繞截其下游武昌黃州蘄水廣濟黃梅以迄安徽之安慶江省之九江各接壤並本省麻城豫省信陽交界之武勝關廣水小河溪楊店黃陂等境則係臣標千總一員帶兵六名如前遊緝再弭盜之最善者莫如保甲現在遵條例極力整頓務令各屬實力奉行而又隨事化誨先之以節儉示之以純樸使鄉曲小民潛消其邪僻之念得旨是實力行與朕看空言無補也署湖南巡撫蔣溥奏楚南盜匪公行宜實行保甲以杜盜源如烟戶遷徙改業必督責保正牌頭隨時稟換門牌改

註冊籍至於查點亦不必拘定時日則奸偽自無所容再緝拏盜賊設立賞罰規條分別輕重辦理得旨是現在固應如是永久更當如是山西巡撫劉於義奏報雨水情形并陳酌量賑卹得旨覽奏俱悉朕今前往盛京不可以此而誤民瘼賑卹之事一面辦理一面奏聞廣西巡撫楊錫紱奏粵西懷遠縣之富祿寨與貴州永從縣之雲洞寨苗民上年互爭田土至今未結現飭右江道前往勘審得旨此等隔省之事向有各庇屬員之習汝等痛改此弊公同和衷妥辦可也

大清高宗法天隆運至誠先覺體元立極敷文
奮武孝慈神聖純皇帝實錄卷之一百九十五

實錄卷之一百九十五

三

大清高宗法天隆運至誠先覺體元立極敷文
奮武孝慈神聖純皇帝實錄卷之一百九十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級奉常加二級軍功紀錄一次臣等謹

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣等謹將內大臣戶部尚書錄藍旗滿洲都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣曹振鏞等奉

欽修

乾隆八年癸亥秋七月辛巳朔享

實錄卷之一百九十六

太廟遣和親王弘晝恭代行禮

上詣

安佑宮行禮○壬午吏科給事中鍾衡奏請嗣
後熟審時將案情通查除情罪相符仍照原
擬外倘有臨期極口稱冤按之情罪稍未允
協即細加研鞫果係從前枉斷十分冤屈者
立即改正題達以便令三法司再行確勘若
固執已見回護前非甚至明知舛錯含糊題
結別經發覺或九卿科道察出即行叅處得

旨所奏是著照所請行。該部知道。○禮科給事中鄒一桂奏。嗣後奉旨發議之事。科道官有不待部覆而越職議奏者。應發還申飭。以為撫拾浮囂者戒。得旨。科道職司言路。凡有見聞。自應陳奏。但如鄒一桂所奏撫拾浮囂。攙越瀆陳種種情節。則大不可。嗣後有交部議事件。而科道不待部覆。參差具奏者。該部於議覆本內。將伊等意見參差之處。聲明請旨。○天津都統阿揚阿。以年老休致。以鑲藍旗滿洲副都統富昌為天津都統。○癸未。諭河防關係重大。茲值秋汛長發之候。一切修防搶護機宜。事存呼吸。其應行辦理之務。督河諸臣自可相機速辦。若有具疏應交部議者。著留京總理事務之王大學士等四人。一面交部查辦。一面奏聞。部議之後。亦一面行文該省。一面奏聞。庶不至稽遲時日。○諭我滿洲舊俗淳厚。於骨肉宗族中。最為親睦。近見八旗襲職。率多爭訟。伊等俱係同祖子孫。

今雖疎遠。本屬一體。豈可因世隔已遠。遂不念祖宗耶。且襲職一事。朕特派王大臣等查明根源。雖俱行開列。而引見時。朕仍視其應得者。始令承襲。初不因伊等之爭而與之也。嗣後務當各念乃祖乃宗。敦孝弟而親骨肉。共成和睦之風。將此通諭八旗知之。○諭軍機大臣等。辦理流民一事。朕前降旨。令各省督撫務于平日諄切勸諭。俾各知安土重遷。及至歉象已形。漸不能支。即設法安頓。不致越境四出。原欲其先事綢繆。臨時調劑也。但恐地方官錯會朕旨。不善撫循。惟事攔禁。不許出境。轉致阻其謀生之路。爾等可傳諭各省督撫。轉飭屬員。如有本地災民。加意經理。安插其有不得不流移他處者。所到之處。該地方官亦必善為撫恤。無使失所。○大學士鄂爾泰等奏。請更定考試貼寫中書之例。查內閣滿漢本房貼寫中書。缺出。向係行文吏部。將願考人員咨送到閣。臣等會同吏部考

取補用。因缺出前後不齊。又不便久懸。是以一二缺出。即照例咨取數十人考試。臣等派員監查。雖代考傳遞。可以杜絕。而應考人員。同在一院。或不免私相授意。且缺既零星。人復衆多。易滋請託營求之弊。應請將臣衙門滿本房額設貼寫中書共二十四缺。漢本房共十六缺。統照乾隆七年。臣等奏准考取漢中書之例。豫期行文吏部。將八旗願考人員。轉行咨取。彙齊人數。知會內閣。臣等定期請旨。特派閱卷大臣。在貢院內編號彌封。秉公考試。并令覆試。以防換卷代考之弊。其繙譯試題。恭候欽命。仍咨都察院。派監試滿漢御史二員。臣等派侍讀典籍各一員。先一日進貢院。御史等散卷局試。閱卷大臣量人數之多寡。擇繙譯通順者。每旗取四名為率。以備漢本房貼寫中書之用。滿本房雖職係繕寫清字。將來皆有辦事之責。若僅考大小清字。恐取中不識漢字之人。應擇清字精工粗曉。

繙譯者。每旗取六名為率。以備滿本房貼寫中書之用。其試題令閱卷大臣量出。倘該旗佳卷無多。則寧缺勿濫。取中試卷。進呈欽定。拆封交吏部註冊。缺出。各論旗分缺額。挨次補用。將完時。再行文吏部咨送考取貢院內一切飯食供應。并應用人役物件。照上次考試漢中書之例。順天府備辦報銷。從之。○引見考取保送御史之吏部郎中錢度等二十六員。得旨。錢度。楊開鼎。官獻瑤。伍起。胡蛟齡。陸秩。歐堪。善張。惟寅。史積琦。沈景瀾。馮秉仁。馮元欽。吳雲。從儲。燧。宋邦綏。毛旭旦。王應綵。李清載。彭肇洙。范廷楷。時均。轍。俱記名。以御史用。○貸安徽寧國貴池和州含山等四州縣。電災飢民。并緩徵本年分額賦。○甲申。上詣暢春園問皇太后安。○詣大高殿行禮。○還宮。○禮部議盛京三陵。應一例增設爵墊。殿內應用白蠟。祝案應

設羊角燈一。又

三陵殿內陳設鑪餅五供及香合朝燈應一式製造祭祀所用帷幕改用黃緞從之。○乙酉

上御太和殿視朝文武陞轉各官謝恩。○詣寧壽宮視

順懿密太妃病。○雲南總督張允隨奏雲南普洱鎮總兵崔善元呈稱生母尹氏在籍病故因伊母先曾奪志格於成例未敢呈報丁憂可否准照出繼為人後之例給假三箇月

回籍料理喪事得旨允行。下部知之。○丙戌上御乾清門聽政。○軍機大臣等議奏安南連年不靖奸徒乘機竊發其中順逆曲直難以剖晰然揆厥情勢一時斷難寧息今復糾衆侵逼都竜賊勢頗盛查滇南開化地方臨邊僅百餘里雖奸徒賊夷從未敢稍犯內界但都竜廠內地人民聚集甚衆賊兵進攻廠民驚避若使一擁入關辦理殊費周章防範更宜嚴密茲據該督張允隨等奏報交賊勾通

攻打土目翁桂棄城先遁廠民洵懼一面刊發告示不許賊衆傷害商民並飭令文武整肅軍紀不許賊匪擅入界內而交夷亦一一遵奉不敢稍違辦理頗屬妥協至開化鎮總兵賽都以防邊與出師所費相等請調集官兵用彰天討等語不知交夷小醜仰視天威莫不震疊若敢於侵邊自應立加翦滅乃該國素無逆命之端又無仰籲救援之請忽焉越境撻伐師出無名即使傳檄可定亦非國家柔遠之意此萬不可行者但開化一鎮逼近賊氛逃竄民夷紛紛不一自應防守彈壓據該督奏稱已經調撥廣羅協兵三百名臨元鎮兵三百名星往貼防臣等酌議交夷必不敢犯界兵數似已足用倘添防添汛仍或不敷廣羅廣南兵仍可酌調內地土兵亦可派撥止須於我界聲威蓋交地炎蒸瘴癘甚盛我兵駐劄恐不免損傷既無關要害且易啓驚疑故不如添兵加防鎮靜俟之為得

也得旨依議速行。又議覆江南提督吳進義奏請照例暫停採買兵米。其有須借給時。即將所留米價銀。令自行零糴。並各省提鎮標營。照例遵行等語。查採買米穀。借濟兵丁。較之常平倉儲。雖為數無多。而事同一例。在兵食固屬緊要。亦不宜有妨民食。與其官為採買。取足於一時。或致市價漸昂。何如即留此銀。於應行接濟之時。酌量借給。俾兵自行零糴。於民食不致相妨。誠為兩益。應如所奏。變通辦理。並敕下各省提鎮。照例暫停。俟價減之年。再行酌買。從之。○禮部奏我朝

列祖

列宗聖聖相繼。溯自

龍飛東土。以至

定鼎神京。

聖德神功。同符兩大。

文謨武烈。丕冒萬方。是以大經大法。靡不載在實錄。尊藏

天府。垂之萬年。永永無極。欽惟我

皇上孝德光於四海。精誠格於

九廟。以克篤前烈。為心以率。由舊章為事。特念奉天為國家發祥之地。

實錄為

列聖紀事之書。命各繕滿漢文一部。送至盛京尊藏。仰見我

皇上至孝至誠。善繼善述。大表章而宗根本。恢鉅典以示來茲。乃

睿慮所獨周。實亘古所未有。臣等遵即行文

實錄館。敬謹繕寫。所有送往尊藏儀注。俟繕寫完備時。臣等遵旨詳議具奏。臣等伏思在京有

皇史宬尊藏

實錄。其奉天尊藏之處。查崇政殿後有鳳凰樓。高敞壯麗。堪以尊藏。請敕下奉天將軍會同盛京禮工二部。及奉天府尹。敬謹辦理。其尊藏之櫃。應照在京式樣置備。至將來需官守

護之處。應令該將軍等妥議具奏。得旨是。依議。○工部議覆署兩廣總督策楞奏稱廣東通省外海戰船。向分四廠。內高雷廉三府屬戰船。在高州芷芑地方設廠成造。嗣因木植稀少。另設子廠於龍門地方。專造龍門協戰船。其高雷兩府戰船。仍在芷芑成造。惟是芷芑地處偏隅。所產木植有限。自設船廠。迄今已二十年。不獨附近水次木植無餘。即深山邃谷。亦漸無可採。恐誤船工。應如所請。將芷芑一廠改設省城河南地方。高雷二府屬戰船。屆修造之期。駕赴廠所。仍令高雷等府屬文武大員。監督修造。由該管道員查核估銷。龍門子廠。照舊辦理。又調任總督慶復奏修造戰船。不必定用櫟木。不如松杉等料。更為駕駛便益。且料易購買。亦應如所請。嗣後不必採用櫟木。以致擾民誤工。從之。○鑾儀衛奏。巡幸盛京。起駕至駐蹕所。接駕細樂奏與不奏之處。請旨遵行。得旨。此次巡幸。需日甚

久。每日迎送。不必奏樂。至熱河之日。奏樂迎接。早晚仍照舊奏樂。○以左僉都御史任啓運為宗人府府丞。通政使司右通政張若靄為光祿寺卿。○丁亥。

上以詣盛京恭謁

祖陵先期祇告

奉先殿。○詣暢春園問

皇太后安。○幸圓明園。○諭曰。

溫惠貴太妃侍奉

皇祖多年。淑慎素著。朕幼年蒙

皇祖養育宮中。

貴太妃時加撫視。今欲晉封

皇貴太妃。以申敬禮之意。奏聞

皇太后。欽奉

懿旨。欣允。所有應行典禮。著該部察例具奏。○

又諭。朕前降旨。將河南上年未經報災之州縣。所有應徵錢糧。分別停緩。俟秋收後再行徵收。聞雅爾圖止將鄭州等十三州縣中勘

不成災之村莊展至秋收後開徵而新野汝陽西平遂平項城扶溝等六縣同屬勘不成災未經一例題請朕思該地方既被水淹秋收自減其應納錢糧亦著加恩停緩又太康一縣雖未被水去秋亦屬歉收其上年民欠錢糧併著緩至本年十月後徵收以紓民力該部即遵諭速行大理寺卿定柱奏

皇上恭謁

祖陵計回鑾之日為期甚長請於八旗都統副都統內派出數員自起駕之日起至回鑾之日止協同步軍統領等每晚在皇城內外及大城各處分地稽查再諭令都察院步軍統領轉飭五城巡察御史暨三營將弁亦不時勤加稽查務期周密得旨左翼著派松阿里廣祿王進泰允禧韓光基德敏右翼著派胡林弘炯卓巴李元亮阿克敦西武庫逐日每翼著一人輪班稽查○調正紅旗滿洲副都統雅爾圖為鑲藍旗滿洲副都

統○以江南糧道納敏為福建按察使○戊子

上奉

皇太后啟鑒○詣

皇太后行宮問安○諭朕奉

皇太后前往盛京恭謁

祖陵所有經過州縣不令絲毫擾累但安營除道未免有資民力朕心軫念著直隸總督高斌順天府尹霍備查明各該地方本年錢糧應徵數目請旨蠲免以昭朕體恤閭閻之至意○又諭前因直隸天津河間等屬夏間被旱米價昂貴朕特降諭旨令倉場總督撥通倉米十萬石分貯被旱各州縣以備平糶撫恤之用今據高斌奏稱被旱之地已經成災除先行酌量撫綏外現在查明分別賑恤照例於冬月開賑等語朕思開賑之後需米必多著倉場總督於通倉後粟各色米內再撥四十萬石於現撥十萬石運完之後即行接

運務於八月內全數運津。令總督高斌分發各處水次就近輓運。接濟冬間賑卹。該部速遵諭行。是日駐蹕南石槽。己丑。

上詣

皇太后行宮問安。旌表守正捐軀之直隸廣

宗縣民孫學文妻周氏。是日駐蹕懷柔縣。

庚寅。

孝懿仁皇后忌辰。遣官祭

景陵。

上詣

皇太后行宮問安。軍機大臣等議覆御史朱士俊奏請嚴夜禁一摺。查京城內外各色人等衆多稽查夜行原宜整肅。今恭遇車駕東行夜禁更宜嚴謹。前據大理寺卿定柱奏請特派副都統等每晚於皇城內外及大城各處稽查。已蒙派出松阿里等欽遵在案。今據該御史奏外城守汛營兵捕役及坐冷兵丁人等文武盤詰難以盡識。應設法查驗以杜

假託。應如所請。給與印信符驗。輪班傳掛。令步軍統領及五城御史酌定印牌傳給。除延醫覓穩等事不究外。其無印牌者即行查究。又奏請啓鑾後即照三冬查夜常例加謹巡防。亦應如所請。凡內城遞送文書使役人等亦令該管官傳給印牌查驗放行。其陪祭執事各官跟隨人役等夜行者亦令先期開明。知會提督查照從之。旌表守正捐軀之河南扶溝縣民李亮臣女李氏。是日駐蹕密雲縣。辛卯。

上詣

皇太后行宮問安。諭譚行義已經降調。伊到京之日該部帶領引見。吏部議准直隸總督高斌奏稱順天府屬遵化州拱衛

三陵近復於勝水峪選定

萬年吉地。所有守護官兵役及現在商賈匠作人等雲屯林集遵化一州向隸府屬。僅守境內非惟體制未稱亦恐呼應不靈。請將遵

化州照易州之例。升為直隸州。其附近之王田豐潤二縣。改歸遵化直隸州統轄。賦役仍照舊章。官吏不煩添置。其一切應行改隸事宜。另議題咨。從之。○戶部議覆直隸總督高斌奏。稱副都統達勒黨阿原奏。請於古北等口外。買米建倉運貯。遇青黃不接時。照本價糶賣一摺。查古北等口。素稱產米之區。近年屢經採買。運內地接濟兵民。今年古北一帶。既係秋成有望。而天津河間等處。需米賑濟。應如所請。即於九月底動支司庫銀會同提督保祝委員分買。并令熱河道協查。浮冒題叅。隨買隨運通倉。由水路轉運天津。分發各州縣賑濟。所需車腳口袋等費。照例辦理。事竣分晰題銷。第口外收成。現在尚無確數。前項米石。可否買至二三十萬之多。不致價昂妨民。令該督臨時確訪民情酌辦。至達勒黨阿原奏。請嗣後每年秋成。動帑採買。運貯遵蘆二倉。供應。

陵寢之需。餘俱運至通倉備用。原屬酌盈濟虛。第年歲豐歉。時價長落不齊。必須臨時酌量民情。奏請辦理。毋庸豫定。其豫東二省應運陵糈。原係漕項。應運通倉。緣

陵工俸餉之需。故每年截撥。若將

陵糈議於口外買運。則此項應運之米。自應仍運通倉備用。不便截留天津。至奏稱八溝。鞍匠屯為各蒙古米糧總匯之區。官民於此二處收買。各宜添建倉廩存貯。以便轉運。八溝倉廩應交八溝同知監管。鞍匠屯倉廩交承德通判監管。應如所請。酌量添建。得旨依議。速行。○兵部議覆直隸總督高斌疏。稱熱河舊設滿兵八百名。除分防外。兵數無多。設有小教場操演。迨乾隆三年。添設滿兵一千二百名。共二千名。兵加數倍。遇操演時。地窄難容。若移熱河大教場操演。施放鎗礮。地勢平坦。可以容納。該處原係旗兵舊教場。並非另設。況今秋。

皇上駐蹕熱河倘

聖駕閱兵尤須寬坦請建演武廳三間抱厦三間月臺一座應如所請得旨依議速行調廣西左江鎮總兵丁士傑為直隸宣化鎮總兵以廣西義寧協副將楊剛為左江鎮總兵是日駐蹕要亭（壬辰戶部議覆御史沈廷芳奏請截留江蘇等六省漕糧以實倉儲一疏得旨漕運關係京師積貯原未便輕議截留但目前京倉尚屬充裕而各省倉儲正在需米孔亟偶爾變通尚屬可行著將乾隆甲子年江蘇安徽浙江江西湖北湖南六省應運京漕糧各留十萬石於本省再著江蘇浙江各將十萬石運往福建著江西將十萬石運往廣東以備緩急之用此朕格外之恩不得援以為例貸山東歷城章邱鄒平長山新城齊河齊東濟陽長清肥城東阿平陰青城蒲臺博興高苑等十六州縣衛被旱被雹災民免本年額賦是日駐蹕兩間房

癸巳

上詣

皇太后行宮問安諭軍機大臣等前經降旨令韓光基三和修建倉廩朕思今年直隸天津河間被旱先後撥米五十萬石以備賑卹又江蘇安徽浙江江西湖北湖南各截留漕米十萬石又撥運福建廣東二省米二十萬石是明歲漕糧較之往年已為減少所有倉廩諒已足敷存貯可寄信三和令其傳旨韓光基將此項倉工暫為停止俟乙丑年應需添蓋之時另行請旨辦理再桃花寺白澗燕郊三處行宮工程現今三和於今歲辦料明歲興工第思燕郊為回鑾駐蹕之所此處工程不過畧加修飾所添房屋又屬無幾若於十月內可以告竣即一面辦理一面具摺隨本奏聞倘不能及時告成亦著伊具奏其桃花寺白澗行宮仍照原議辦理賜密雲縣搭橋官員人等飯食及緞匹銀兩有差是

日駐蹕常山峪○甲午

上詣

皇太后行宮問安○鑲黃旗漢軍副都統王進泰奏現當駕幸塞外京師夜晚巡察尤屬緊要除臣等按期不時親查外請勅下護軍統領及八旗都統等嚴飭該叅佐領倘夜間偶有應傳緊要事件務將關防執照按期註寫日月臨時給發持往次日即行查銷不許豫給半年數月之久關防執照任其收執假冒

分列卷一百七十六

三

如遇夜持月日不符執照查出即行拏究並將給發執照之該管官交部查議得旨允行下部知之○直隸總督高斌奏各屬得雨現在動項委員採買麥種分貯被災各州縣查明貧戶富有牛具者按畝五升借給如欲自買麥種每畝借給銀一錢缺乏牛力者照例每畝借給雇價制錢二十五文並令牛力有餘之家將外出貧民名下所遺麥地代為耕種亦按畝借給籽種視本人回籍月日遲早

酌量分與子利至因旱乏草不能牧養者即

令各員查賑之便驗明登註毛齒於八九兩月每月借給銀五錢餵養所借餵養牛隻銀兩並雇價俱於來年麥秋兩季分限還官並嚴飭各地方官親詣勸諭廣種即以勸課之勤惰為該員之優劣仍令查賑之道府就近督率稽查得旨覽奏稍慰朕懷其勸課補種秋麥實為目下急務亟力為之○又奏現在委員先將極次貧民戶口分別查明以為辦

實錄卷一百九十六

三

賑之地但先經奏明十一月開賑屆賑期尚有三月餘貧民實有迫不及待之勢應請照先賑一月之例每於查明一州縣之後即先賑一月以安民心其極貧內之老弱孤寡羸疾量加續賑並十一月開賑之期俱仍照原奏辦理得旨是知道了○是日駐蹕喀喇河屯○乙未中元節遣官祭

永陵

福陵

昭陵

昭西陵

孝陵

孝東陵

景陵

泰陵○

上至熱河詣

皇太后行宮問安○諭今年朝審秋審內情實

人犯著停止勾決○是日駐蹕避暑山莊至

實錄卷一百九十六

三

戊戌皆如之

大清高宗法天隆運至誠先覺體元立極敷文
奮武孝慈神聖純皇帝實錄卷之一百九十六

實錄卷一百九十六

三

大清高宗法天隆運至誠先覺體元立極敷文
奮武孝慈神聖純皇帝實錄卷之一百九十七

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院書寫黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣等謹將內大臣戶部尚書鑲藍旗滿洲都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將等奉

敕修

乾隆八年癸亥七月丙申

上詣

皇太后行宮問安奉

皇太后幸如意洲進膳。○賜扈從諸王大臣飯。

○御史胡寶瑒奏天津河間被旱業已蒙恩撥米五十萬石以濟冬賑請敕下督臣高斌速將現奉運米賑卹之諭旨徧行曉諭俾土著之民欲覓食他處者靜以待賑不必輕離鄉井其各處流民亦令曉示本無職業者或應留養或應約束毋令滋事外情願歸耕者

皆資送回籍趕種春麥不致田畝久荒得旨

著高斌速議具奏尋覆奏現在各事宜俱已

如所奏辦理奏入報聞下部知之○以故奉

恩鎮國公弘普之子永琮襲封奉恩輔國公

除福建連江寧德二縣水衝沙壓民田額

賦四十七兩有奇米十二石有奇連江縣歸

并福中衛屯田銀三兩有奇○丁酉諭淮揚

徐海四府州屬疊被水旱朕心軫念於賑卹

之外復借給籽種牛草銀兩此等借給之項

例應秋收後催還但此四府州屬六七兩年

水災尤重借給更多有已借冬種旋因無收

又借春種者有春種無收復借秋種者數年

之積欠一時恐難全完著該督撫轉飭地方

官酌量情形其力能清償者自應照例交納

若實屬艱窘無力不能完繳者著於來歲麥

收後再行分限催還以示朕軫恤積歉災黎

之至意○又諭淮北上年被災各屬一應錢

糧朕已降旨分別蠲緩惟海州沐陽贛榆三

州縣連年疊被災。今春又因亢旱。二麥歉收。雖五月以後得雨。可望秋成。但積歉之餘。小民元氣究難驟復。地漕兩項。一時並納。未免拮据。除地丁銀兩。仍於十月後開徵。其本年漕糧二萬二千六百石有零。并七年分蠲剩緩漕俱著於次年分限帶徵。緩一分之輸。將即可紓一分之民力。該部即遵諭行。○戊戌旌表守正捐軀之山東城武縣民趙建妻段氏。己亥。

上奉

皇太后自避暑山莊啟蹕往盛京。○詣

皇太后行宮問安。○禮部奏雲南總督張允隨

代奏南掌國王烏孫遣頭目先猛的陶貫等

表謝賞賜緞疋恩得旨覽王奏謝知道了該

部知道。旌表守志捐軀之河南寧陵縣民

某妻趙氏濟源縣民某妻衛氏。○補行浙江

省乾隆七年分大計。不謹官五員。罷軟官二

員。浮躁官二員。才力不及官一員。年老官三

員。有疾官四員。分別處分如例。○是日。駐蹕中關。○庚子。

上詣

皇太后行宮問安。○諭軍機大臣等。前據高斌奏請。今秋於古北口外採買米石。經部議覆。令該督酌量情形。委員採買。朕已降旨允行。第思採買米石。必資幹員料理。今天津等處被旱。先後撥米五十萬石。以備賑卹。一切運送需員必多。朕又恭謁

祖陵。經行口外。地方官不無應辦差使。恐採買米石屬員不敷。委用提督保祝。駐劄古北口。就近遴員採買。更屬便易。著照上年之例。仍令督提公同協辦。可寄信與高斌保祝知之。○軍機大臣等奏喀爾喀各扎薩克旗分所存官駝二萬五千有餘。馬四萬有餘。牛一千有餘。羊八萬有餘。自置買以來。並未應用。此項駝馬牛羊。常令蒙古收管牧放。恐倒斃賠補。或滋擾累。可賞給伊等為業。資其蓄息。於

生計有益臣等遵旨請交額駙策凌均勻給賞尋策凌奏請留駝一萬馬二萬羊二萬以備軍營之用軍機大臣等請仍令遵旨辦理從之 是日駐蹕波羅河屯 辛丑

上詣

皇太后行宮問安 軍機大臣等議御史王興吾奏請撫卹京師外來流民一摺查此等流民俱係直隸河間天津深冀等處及山東武定濟南東昌等處民人因本處秋成無望或出外傭工依親餬口或本有家業為避荒計挈家四出謀生由京出口者甚多而留住京師之人亦十之二三半月來日積日衆現經提督府尹查辦老病羸弱無依者即收普濟堂養濟院留養年力强壯可力作者聽自謀生理惟是將來天氣漸寒工作漸少一至八月下旬即恐凍餒不可不豫為料理茲又據該御史奏請妥議查辦臣等酌議現應撫卹事宜二條一飯廠宜早設也何例五城設飯

廠十處日各給米一石自十月初一日起今外來貧民日衆且本年多一閏月天氣早寒應請於八月望後即開廠煮賑各廠日增米二石柴薪照例開銷並於飯廠附近搭蓋席棚或收拾空閒廟宇聽其棲宿交五城御史飭司坊官於現今平糶銀內動支酌辦一情願回籍之人宜查明資遣也現在河間天津等府蒙恩撥米五十萬石令督臣賑濟東省亦照例查賑此等流民既可回家就賑且秋月得有雨澤正可及時播種秋麥應飭太宛兩縣五城司坊官徧行詳悉勸諭回籍若其中有願回無力者酌量資遣查乾隆元年部議資送流民回籍之例按遠近每口每程給銀六分令沿途地方官遞行押送今請令五城司坊大宛兩縣詢明各籍貫造冊於八月望後起至九月三十日止乘天氣不甚寒冷之時差安役押送前途地方官按程給路費遞行押送回籍交該地方官入冊賑濟其已

出口者。至八九月間。或在彼難以謀生。必將仍回內地。固不便聽其來京聚處。亦未便任其各處流蕩。應令沿途州縣。一體勸諭回籍。無力者資送。請交直隸督臣。轉飭辦理。其五城。大宛所需資送銀兩。即於五城平糶錢文內支給。至不願回籍之人。聽於五城飯廠存養。俟明歲春融。另行設法遣送。得旨。好。依議行。○湖廣總督阿爾賽奏。兩湖存營及湖北出師損壞軍裝。請於各營每兵百名內。留公糧二分。外。暫准再留一分。以為修補之用。并於司庫應支兵餉內。一面動給辦理。一面於各營領餉時。照所存公糧。按季扣還歸款。得旨。允行。下部知之。○是日。駐蹕張三營。○壬寅。

上詣

皇太后行宮問安。○諭朕此次詣盛京恭謁祖陵。衆蒙古王公台吉等踴躍歡欣。跪迎道左。恭請朕安。並懇請扈從効力。朕念伊等游牧

相距甚遠。若令全行隨駕。不惟勞頓。且於伊等應辦之事。亦恐有誤。是以降旨。令其隨往木蘭。四圍畢。即各回游牧。著於行圍後。賜宴遣還。其圍場兵丁等著一併賞賜。至隨圍行走之蒙古王公台吉官員兵丁。及遣回游牧之王貝勒等。應如何賞賚。並嗣後陸續隨往圍場人等。如何賞賚之處。著總理行營事務王大臣內務府大臣等會同理藩院議奏。尋議派出管圍之貝勒貝子公等賞衣帶等物。台吉塔布囊官員等賞緞疋。圍場兵丁等各賞銀三兩。管馱車人等各賞銀一兩。布一疋。其隨來侍衛等亦賞銀布。請安隨圍行走之王公扎薩克台吉塔布囊厄魯特散秩大臣侍衛等分別賞腰刀緞疋等物。至昭烏達哲里木盟所時。隨至邊界兵丁三百名。各賞銀三兩。昭烏達盟所之巴雅海地方。豫備圍場兵一千名。各賞銀一兩。哲里木盟所之戮子村。及和爾本淖爾二處。豫備圍場兵一千名。

各賞銀一兩五錢。其戮子村等處派出管圍及隨至邊界之王。公。台。吉。官員應賞之處。屆期查明議奏得旨。敏珠爾喇布坦著照公例賞給。其接至古北口打鹿鳥鎗手四十名。各賞銀五兩。餘依議。○奉恩將軍詹布以老乞休。允之。以其子嶽赫襲職。○以通政使司右通政嵇璜為左僉都御史。○予故二等子委署散秩大臣班達爾沙半葬。祭一次。○是日駐蹕十八里台。○癸卯。

上詣

皇太后行幄問安。○行圍於永安莽喀。○禮部議准署貴州布政使陳惠榮奏稱會典內春秋二仲月。直省守土官。應致祭各壇廟。其禮儀各載定規。惟祭文未頒成式。若聽臨時撰擬。恐致因循草率。應如所奏。請敕下翰林院。將外省文廟武廟城隍。龍神各廟。社稷。山川。風雲雷雨。先農各壇。并五王。三公。忠孝節義。賢良等祠。及每年大雩。祭。各應用祭文。撰

擬成式。恭呈欽定。頒行各督撫。轉飭所屬。臨祭敬謹繕用。從之。○以翰林院侍講學士鄧時敏為通政使司右通政。○予故奉恩輔國公璐賓祭二次。造墳立碑如例。謚恪思。○是日。駐蹕海拉蘇台口。○甲辰。

上詣

皇太后行幄問安。○行圍於巴彥喀喇。○是日。駐蹕穆磊喀爾沁。○乙巳。

上詣

皇太后行幄問安。○行圍於愛里。○諭據沈廷芳條奏三摺。其一摺。內開賑卹之法。一曰地方官宜親身督賑。一曰散賑宜各處設廠。一曰災民宜計月給糧。一曰流民宜隨地留養。皆係現行之事。數衍陳奏。毫無裨益。至請部頒冊式一條。更屬無謂。蓋地方官呈報水旱。皆係就本地情形。豈能限以一定之式乎。又稱北五省連歲有荒歉之處。民病正劇。士女仳離。流轉載道。强者鹿銜。弱者填壑。伊豈不

知上年直隸、山、陝俱屬豐收。而捏造此無稽之語乎。又一摺奏稱雨澤時降，邊方類多發水。密雲灤州河橋衝壞，道路阻隔，艤舟祇候。凡駐蹕之地，需用水漿，須鑿井數十，輦道兩旁。復築扈從臣工徑路，經過道路，不能耕種。至灤州所築三橋，費頗不貲，申詳大吏，止派千金，應請益廣皇仁，令直隸總督奉天府尹確查地方官倘有賠墊，應悉給帑金，其辦差勤敏者，量加獎賞。農民於蠲免之外，亦稍予賞給等語。此次經過橋梁，俱係乾隆六年舊有，木植不過稍加添補，皆動正項錢糧。有何賠墊之處。且經行數月之久，豈能免無雨雪。前者密雲等處偶被水衝，亦常有之事。有司文吏不諳奔走，其密雲懷柔等處因訥親率扈從人員先行，朕令其身親督理官兵修造。其近口橋座令提督保祝率領所屬官兵修造。朕已悉加賞賚。由是言之，地方官全無尊君親上之意，塞責而已。有何應加獎賞之處。

至於灤州，乃由山海關回鑾之路。此番並未經由。其橋梁尚未修建，有何被水衝壞，以致道路阻隔至費用幾何。地方大吏自必照例估撥。焉有派累之理。現在出口經行輦路，皆向來通行大道，凡屬臨幸，理應修治，並非開闢田疇。如遇寬廣之處，則扈從人員在兩旁行走。至狹隘之處，統歸御道，並未將舊路開展。有妨田畝。沿途禾黍如雲如錦，可望豐登。此隨從數萬人所共知共見者，一路俱有水泉，儘足供闔營之用。何須鑿井。每處至數十口之多。且巡幸亦所時有，官吏之經理百姓之力，役皆分所宜然。若因此即加獎勵賞賚，不但無此政體，並使官民不知尊君敬上之義。又豈可為訓。況朕前因安營除道，未免稍用民力，特降諭旨蠲免錢糧。且沿途年老農民亦時加賞給。此皆出自朕之特恩，非臣工所可奏請者。沈廷芳又稱車駕謁陵，內外臣工自七品以上皆宜一體賞給誥封。

夫覃恩乃朝廷大典康熙年間

皇祖因奉天

陵寢告成是以謁

陵時特頒恩詔後兩次恭謁亦未舉行朕今初

次叩謁

祖陵國家典禮自有定制而未舉行之前臣下

輒妄行覬覦有是理乎科道職司言路必有

益政治方可建白今沈廷芳並未隨駕何以

能知途間之事非係地方官中有伊親朋或

慮此次奉公不力將有處分傳遞信息令伊

陳奏希冀邀恩即係伊遣人跟隨密行偵探

如此居心行事甚屬卑鄙其所陳奏又皆妄

誕若不加以處分無以示警沈廷芳著交部

嚴察議奏○是日駐蹕愛里口○丙午

上行圍於錫拉諾海○吏部議准河東河道總

督完顏偉奏稱歸德府新設商虞通判應建

衙署設立典吏夫役及官俸役食從之○戶

部議覆給事中鍾衡奏請除坐倉之弊州縣

徵漕每僉派書役分廠收米多係歷年積蠹

又恐伊等朋比作奸遂令內署親戚家人長

隨等坐倉看收而不肖書吏暗通賄賂彼此

交結致糧戶交納分外刁難而包攬代納之

輩復潛相串通恣行無忌往往有之應如所

奏令有漕督撫總漕嚴飭徵漕州縣於開倉

時務必親至倉廩米屬乾潔隨到隨收響攬

平量一一親身查察萬一因公他出暫委本

州縣佐貳官輪流監收該州縣在倉看收人

等及僉派之書役如有包攬浮收通同舞弊

之事即行揭報嚴叅究治如監收之佐貳官

有扶同隱匿等弊該撫一併叅究從之○禮

部議覆河南學政林枝春奏各學樂舞生應

令學臣選取發學充補一條應如所請將取

進儒童之外擇其文理頗明者另案備取抄

發各學以充樂舞之用候新案既頒隨將舊

案停止倘其中有專攻舉業不願充補者勿

強從之○鑾儀衛奏查康熙三十七年

聖祖仁皇帝御筵宴時。迎接奏將軍令。進桌張奏普天樂。徹宴時。仍奏將軍令。今日

皇上御筵。臣等仍請照前豫備。此後若御筵宴。

皆照此敬謹豫備。得旨。知道了。此係私宴。著

豫備細樂。俟至盛京宴筵時。應有喜起舞大

臣者。可豫備中和樂。○是日。駐蹕克衣勒錫

爾哈。○丁未。諭軍機大臣等。向來山西一省。

民間需用小麥雜糧。本省時有不足。多往關

中販運。近聞該省督撫。於關中限數放行。不

許照常運載。以致山西糧食缺少。市價日昂。

朕思山陝。雖分兩省。均屬朕之赤子。難分畛

域。且平陽蒲州。兩處與陝西之西安同州。尤

為切近。今年陝西二麥豐收。秋成可望。本年

米糧。既屬充裕。自應使商販流通。以資接濟。

庶山西民人。無艱食之患。爾等可寄信與塞

楞額知之。○賑貸江南淮安分司所屬板徐

中莞臨興等場被旱竈戶。並緩徵七年及本

年分折價錢糧。○是日。駐蹕庫勒圖塔喇。昭

烏達盟長教漢郡王吹木丕勒恭進筵宴。○
戊申。

上詣

皇太后行幄問安。○貸直隸滄州被雹竈戶。並

免本年分額賦。○是日。駐蹕嗎嗎塔喇。○己

酉。

上行圍。至乙卯皆如之。○詣

皇太后行幄問安。○是日。駐蹕叟吉塔喇。○庚

戌。諭曰。頭等台吉璘沁頭等塔布囊敏珠爾

拉布坦。俱大家子弟。人亦去得。俱著加恩晉

封公爵。○又諭曰。怡親王弘曉。昨日向太監

高玉訴說。圍後管轄不善。令其轉奏。經朕降

旨。著總理行營王大臣會議查辦。今日高玉

又稱。怡親王言我所奏之事。如何向伊等會

議。朕復降旨。此係朕特旨交辦之事。有何不

可。會議之處。未幾高玉又稱。怡親王言今日

查看後護。已為整齊。奏請施恩。免其查辦等

語。此事朕已降旨。而高玉屢為代奏。若非怡

親王素與結納。則高玉何至如此。朕初念怡親王之父行走勤勞。特加恩養。自委用政務以來。伊毫無實心。於一切交派事件。並不悉心經理。伊之品行。諸王大臣皆所共知。既不感朕委用之恩。反結納奏事太監。此豈王之所當為耶。怡親王著交莊親王議處。高玉著九條鎖拏。解京城。交內務府大臣。令其在甕山鋤草。即交怡親王派人解送。朕看其如何照看也。○總理行營事務莊親王允祿等奏

先經行在理藩院奏。昭烏達盟長吹木丕勒桑里達等。以初次巡幸伊等部落。思欲少効微忱。恭進筵宴外。仍請貢牛羊駝馬。奉旨嘉獎。令送至筵宴地方呈閱。免其收受。此誠體恤殊恩。然伊等心實不安。仍懇請賞收得旨。所進牛羊。仍免收受。著護送前來閱看。即與賞收無異。朕思此次所備牲畜。儘足敷用。伊等既懇誠籲請。或另有可用之處。著總理行營王大臣等會議具奏。臣等查行營牲畜雖

足。伊等既再三懇請。應將駝隻交武備院。遇有用處領用。馬匹令其送至兵丁換馬處。應用。再查句驪河至京。約計一月。迴蹕時正值草衰氣寒之候。若將此項馬駝。令就近牧養。肥壯豫解彼處。再換一次。更屬有益。得旨。知道了。所進馬駝補換之後。仍將所換者。給與蒙古人等。○吏部奏。嗣後凡遇開復革職人員。如有降罰註冊之案。有加級紀錄。應行抵銷者。令該督撫於該員開復之後。查明該員

降罰註冊各案。咨部核議。如有例應引見者。即於引見文內聲明。准其抵銷。從之。○又議准左都御史劉統勲奏。稱嚴漏洩章奏之禁。杜專閫僭越之端。二條。查督撫藩臬。陳奏密封事件。關係重大。尤宜慎密。如陳奏既用密封。而又彼此關通商酌。若非扶同掩飾。即屬故意欺蒙。自應分別查議。以示懲戒。嗣後凡密奏事件。未經發出之先。即上司屬員。概不得互相計議參酌。如有漏洩通同。一經發覺。

按其情事輕重分別治罪。再查會典內惟開督撫見文武屬員儀注及旗鎗等執事。至於燕閒談笑之頃。坐位作何朝嚮。飲酒看山之際。屬員作何祇候。原無禮制可稽。而代天巡狩之牌。黃衣短褂之從。護衛班房之名。更無原委可考。或因舊習而不知改。或改除而不能盡。以致形迹涉於侈肆。趨承過於卑諂。殊非大吏謹慎威儀。小心翼翼之度。應通行直省督撫。嗣後儀從器仗。各遵會典周旋儀度。各凜寅畏。其妄為尊大。有乖定制之條。自行除去。如被指摘糾叅。照違制例議處從之。戶部議覆廣西巡撫楊錫紱奏稱。山斗岡銅鉛礦。酌定抽取支銷事宜。應如所請。將山斗岡廠民所獲餘銅。照回頭山例。每百觔給價八兩三錢零。收買供鑄。商民所獲餘鉛。聽其自行變賣。歸本所出銀兩。每兩暫抽正課一錢五分。俟出產旺盛。即照定例三七收納。仍將收買餘銅。給過價銀。及抽收各項稅課。

造入各礦廠歲底奏銷冊內。送部查覈。至密陀僧一項。應令該撫照例一體抽收。撒散留貯。備用其所設官役。該撫既稱現開鉛壠三口。銅壠一口。共設爐房二座。原議設廠官一員。書記一名。巡役七名。並無浮多。應准從之。禮部議覆江西學政金德瑛奏。請各學童生。每額進一名者。府試酌取五十名。申送學臣武童。每額一名。取送二十名。如有踰數多取。截去不准收試。其府學廩生。貧士。南昌等六府學。無租者。聽府庠生員報名。分附各縣學冊。後一體均給從之。賑卹江蘇銅山沛縣海州沐陽阜寧五州縣大河徐州二衛旱災蟲災飢民。是日駐蹕哈當和碩卓索圖盟長土默特貝子哈穆哈巴雅思呼朗圖恭進筵宴。是月兵部奏。臣部議敘八旗米局官員。向係奏請紀錄。今陸續年滿。送部者甚多。若逐案奏請。未免煩瀆。請嗣後臣等議敘此等人員。俱附入稟題完結從之。步軍統

領舒赫德奏年逢閏月來京就食者多應禁奸商興販已照例傳知內外各城門除三四石之米仍舊放行倘有車載馬馱至十數石以上者俱盤詰攔阻復不時遣人躡拏興販奸商量米多寡情罪重輕酌加懲治米交近廠減價糶賣所買錢文仍給本人得旨好知道了。署兩江總督協辦河務尹繼善奏鳳泗淮揚等屬閏四月停賑後所有鰥寡孤獨廢癯殘疾之人除已入養濟院外其餘無論

本籍外來一體收留酌給口糧暫養現據各屬查報約有數千口即於撥賑餘剩銀米內支銷至八月以後秋禾豐登聽其各自餬口或俟養濟院額糧缺出逐漸頂補可以停養奏入。報聞。漕運總督顧琮奏海州旱災派委標員前往巡查彈壓得旨料理甚屬可嘉仍應時刻留心以靖地方。江蘇巡撫陳大受奏報各屬蝻子生發捕撲情形得旨蝗蝻原可以人力勝上緊撲滅可也。又奏各屬

蝻子已未撲淨情形得旨捕蝗之法惟應盡人力而不可姑息耳。又奏酌籌買補糶缺倉穀擬俟新穀登場先將糶存價值量就本處及附近地方購買酌定價值以為準則查江蘇等屬向來平價米每石一兩二錢穀六錢如市價在此數以內即令買補如市價長至此數即行停止所買之數各照該州縣現缺常平額數買至十分之五而止如缺米一千石者本年先買補五百石缺六千石者買補三千石缺六千石以上者亦以買補三千石為止餘俟下年陸續再買至本境採買如有短發勒派責成該管道府嚴察請叅得旨是應如是辦理者。又奏各屬晴雨情形得旨覽奏稍慰朕懷海州雖屬偏災然積歉之餘不可不加意撫恤然為郡既小想亦不費周章也。江寧織造兼管龍江關稅務員外郎西寧奏嚴禁浮收等弊情形得旨知道了。不在陳奏惟在實心。安徽巡撫范璨奏密

行勸諭富戶出糶藏粟以濟貧民有願減價者量其多寡或賚花紅或給扁額其好善最多之處總作一碑誌以為鄉黨勸現在各屬米價漸平亦因時調劑之一法得旨好應常行者○江西巡撫陳宏謀奏南贛等府強借強搶各案已經完結及料理接濟地方寧謐緣由得旨所奏情節知道了然慎終如始人之所難以後凡關民瘼之事不可不留心速奏也○又奏籌畫補倉事宜查江西產米之鄉每年秋後民間多有糶賣米穀輸納條丁者臣擬暫為變通除已有納穀捐監者即以監穀補倉米多價平可供採買者即以採買補倉此外偶有捐監無人而又難於採買之縣如願將穀石就近納官者准抵作條丁俟秋後照該處時價酌定每石約在六錢內外凡就近而有穀者聽以穀代銀即將平糶之價抵還地丁其不願納穀者仍聽便是亦補倉之一策得旨捐監之例江西未停且停止

採買原指米貴之處而言江西今歲有收原可補足倉額若照所奏恐滋紛擾不必○刑部侍郎署福建巡撫周學健奏祇承聖訓竭力整飭各緣由得旨好勉力為之但汝係弱人精神亦須少惜○福州將軍兼管閩海關事務新柱奏海關每年額徵正課六萬六千餘兩係按季解交藩庫收存其銅觔腳價及盈餘正耗約計每年一十七八萬餘兩係年底解赴戶部而海關衙門從未設庫又無專管官吏前監督準泰曾將兩月一解之稅交藩庫寄貯至年底委員給批由司庫解部請照此辦理得旨覽○山東巡撫喀爾吉善奏濟武東三府亢旱濟東二府介在漕運又有府倉及臨德二倉存穀惟武定係改設府治之區距運河遙遠並無府穀存貯所屬倉糧節經糶借動用現貯無多應撥登萊之有餘濟武屬之不足得旨知道了○又奏兵丁紅白需賞生息銀兩交營支放殊為未

便請循舊制得旨。既如此。照舊可也。○又奏外來流民。仍照原奏。令地方官勸回故土。其傭工手藝。或有親識可依者。該州縣訊明。責令地保居停雇主人等。出結保領。聽自行趁食。惟此等貧民。內或年老無依。在東既難託足。回籍又艱。資斧者。准照例給路費。資送回籍。患病者。即撥醫調治。俟痊資回本籍。移令原籍地方官查明安插。所需資送及醫藥等項。酌動存公。事竣報銷。得旨。是知道了。○山西巡撫劉於義奏。聞喜縣得雨稍遲。米價昂貴。現飭開倉平糶。每粟一石。隨時價酌減銀二錢。其無力者。酌借倉穀。俟將來勘定被災分數。照例賑卹。其平陽府屬各州縣。亦令地方官隨時覺察。倘米價增昂。亦照聞喜縣辦理得旨。所奏俱悉。○湖廣總督阿爾賽奏。湖北武昌府省城隄工。於乾隆四年告竣。但水勢浩瀚。每當夏秋泛漲。排蕩震撼。易就傾圯。當急圖善後之費。請於現存司庫之前項節

省餘剩銀內。動支五千兩。發交江夏漢陽二縣。轉給殷實典商。營運生息。其息以一分五釐為率。按季交總理江工之驛鹽道庫貯。每年水涸時。著地方官查明應補處。據實詳報。臣遴委諳練之員。勘明確估。動支息銀修理。工竣核銷。如有浮冒侵剋。工程草率。題叅賠修。得旨。照此辦理可也。○又奏報楚省禾稻茂盛。所有偏災。撫恤查辦緣由。得旨。覽奏稍慰。其被災之處。如意撫綏之。○吏部左侍郎署湖南巡撫蔣溥奏。湖南產米之鄉。考之圖經。僉云其土廣沃。一歲再獲。今再獲之說。已不復覩。臣擬於明春。凡植早禾之地。於近處飭令一、二家早種。六月中旬。便可收割。即捐資令其繼種晚禾。如果有成。小民目擊再獲之效。便可勸諭。令下年照式踵行。得旨。勸民勤農。為政之本。然亦不可欲速以病民也。○廣州將軍兼管粵海關事策楞奏。整頓權務。裁汰書吏。辦理緣由。得旨。好。汝自能辦此也。

○廣西巡撫楊錫紱奏從前匪徒莫康武滋擾安南時。粵西西林。西隆。二州縣出交土人。現據雲南督臣張允隨咨。盤獲西隆州土人一百餘名。現在辦理。再西隆州人民出交。必由雲南之廣南。是以今回內地。亦在廣南盤獲得旨覽。盤獲雖由雲南。但廣西無去者。雲南何由盤獲。此語殊巧而拙矣。○又奏粵西桂林。柳州。二府。前五月缺雨。米價騰貴。臣是以暫禁梧關之米東下。令赴桂。柳糶賣。茲米價已平減。仍行弛禁。得旨。汝等遏糶之見。朕甚不取也。○四川巡撫碩色奏。川省年歲豐稔。糧價平賤。捐監收米之例。可否仍令報捐交糧。俟補足前項七十餘萬石之數。再行請旨停捐。得旨。停止採買。原恐米貴。川省有米。自應如是辦理。可告之紀山。○又奏。謝調補河南巡撫恩。得旨。覽。汝在四川。亦不過循分供職。今到河南。當勉力圖報。切毋自得也。○總理青海夷情事務副都統宗室莽古賚奏。

遵旨。派撥堵截郭羅克賊番之蒙古官兵。並派綠旗官兵各數目。緣由。得旨。所辦甚妥。鄭文煥若用汝處官兵。汝須親率前往相機成事可也。○四川提督鄭文煥奏。郭羅克頑番不法。祇緣準噶爾夷使進藏。暫緩鋤勦。夷使一過。未便再為寬容。俟新督撫慶復紀山到任。再咨商定議會奏。即一面飭辦料理得旨。是夷使一過。即應速辦。不可苟且了事也。○又奏。松茂所屬內外土司。惟雜谷最大。附省亦近。幅幘千餘里。前通瓦寺。後與郭羅克番接壤。該土司蒼旺。部目狡悍。近聞有下阿樹土百戶郎架扎什之子戎布甲及下郭羅克之擦喀寨副土目林蚌他。拆戎架等。俱稱投歸雜谷。或抗不請襲。或妄不奉調。並令所屬番民按戶與雜谷上納酥油。雜谷亦給與各土目執照。凡遣派兵馬。俱聽雜谷提調。不許別有應付。又中郭羅克之喀賴洞個寨副土目六爾務。縱放夾壩。知干罪戾。亦投附雜谷。

其他鄰近部落多被招納。領有雜谷頭人紅圖記番文可憑。臣思雜谷為閭內土司。而於口外地方誘致番目。恐將來內外勾通。現密諭副將宋宗璋令將歸附雜谷之各土目逐一查明。俟郭羅克辦理完竣。即可乘藉兵威。曉示利害。務令口外土目。恪守舊章。各歸管轄。並嚴飭雜谷蒼旺。約束頭人。安分住牧。得旨。好。慎重為之。○又奏。派定防範郭羅克出沒隘口官兵。俟夷使有信。即偵探遠近。嚴密巡邏。禁止頑番。不許出外打牲緣由。奏入。報聞。○貴州總督兼管巡撫事張廣泗奏。畢節縣鄉民索借米穀。以及銅仁縣街民罷市緣由。得旨。所奏俱悉。此等刁風。近日頗熾。所應留心整飭者也。

大清高宗法天隆運至誠先覺體元立極敷文奮武孝慈神聖純皇帝實錄卷之一百九十七

大清高宗法天隆運至誠先覺體元立極敷文奮武孝慈神聖純皇帝實錄卷之一百九十八

監修總裁官經筵講官太子太傅文淵閣大學士人閣閣學司事領侍衛內大臣稽察欽奉 上諭事件處管理

吏部理藩院事務正黃旗滿洲副都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅大學士人閣閣學司事稽察欽奉 上諭事件處管理刑部戶部三庫事務

世襲騎都尉軍功加十九級隨帶加一級又加二級臣董誥內大臣戶部尚書鑲藍旗滿洲副都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆八年癸亥八月辛亥朔

上詣

皇太后行幄問安 是日駐蹕查罕和羅 壬

子吏部議覆各館漢謄錄人員既有黃緣進館募人代書之弊請嗣後各館漢謄錄亦照考取滿洲繙譯謄錄之例需用時臣部將舉人恩拔歲副貢生及捐納貢監等願考者行文禮部國子監查明造冊并同鄉京官印結送部欽點大臣暨稽察專員交順天府照考試現任筆帖式之例在貢院內考試取中者

俟各館咨取挨名頂補至現在各館充補額缺之漢謄錄應交該館總裁將不合例者咨部除名合例者秉公考試甄別照原奏額數留館造冊報部不得額外多留掛名之人如仍將不能書寫之人留館辦事查出將總裁提調等官交部嚴加議處再查先經國史館奏准凡繙譯謄錄缺出移咨吏部將取中之人多送數名到館以便考選充補查繙譯謄錄既由臣部照例考取若該館再加揀選始行充補與考定名次轉多撓越恐滋弊端請令仍照臣部原議挨名咨補如繙譯生疎字畫潦草即行咨部除名從之 歸化城都統噶爾璽等奏上年十一月內大學士議准山西巡撫喀爾吉善等所奏將土默特蒙古典給民人地畝年滿贖回分給貧乏蒙古臣等遵即曉諭衆蒙古將牧場禁止開墾並行令巡道曉諭民人外揀派參領十二員會同該扎薩克覆查蒙古地畝及人口數目嗣因蒙

古耕地不計頃畝只計牛具一時難查本年雖得地畝耕種不及請將本年辦給蒙古之地仍暫歸各業主耕種秋收後再行徹出照官租例一具令納銀三兩給貧乏蒙古其田地照數指給從明年起自行耕種業經與將軍補熙巡撫劉於義會議報部在案茲據叅領等查報土默特兩旗蒙古共四萬三千五百五十九口原有地畝牧場及典出田地共七萬五千四十八頃有奇此內去年查出實

無地畝之蒙古二千八百十二口人多地少之蒙古二千一百五十六口伊等耕種地畝三百三十四頃有奇再去年各佐領未經報出今經查出有田三二十畝以上一頃以下不等之蒙古二萬二千一百四口耕種地畝一萬三千四百六十五頃有奇再典給民人地畝四千頃除牧場地一萬四千二百六十八頃有奇外現在田地多餘之人一萬六千四百八十七口耕種地畝四萬二千八百頃

有奇臣請將叅領等查明之七萬五千四十八頃除牧場及典出地畝併現在之三二十畝以上一頃以下者不論外於四萬二千八百餘頃內撥出四千六百三十三頃十二畝分給實無地畝及人多地少之蒙古每口以一頃為率以為常業分別造冊送戶部理藩院備查再原議典出地畝年滿撤回時分給四千九百六十八口貧乏蒙古等語臣請耕田在一頃以上者無須重給惟於地少之戶

均勻派撥其陸續年滿撤回者亦照此辦理造報又土默特耕地向俱任意開墾無冊檔可稽去年各佐領呈出數目與本年叅領所查亦不相符請自明年起凡有地畝俱著丈量所丈各戶地畝較原查之數多至一頃以上者計畝徹出分給如所餘無幾仍歸本主耕種俟丈量明確時將實數於各名下註明備查以免隱匿得旨是汝等即會同速辦賑貸雲南南寧縣霪益州水災飢民並減價

平糶。蠲免本年額賦十分之七。○是日駐蹕碧柳台。昭烏達卓索圖盟長蒙古王等恭進筵宴。○癸丑。

上詣

皇太后行幄問安。○諭朕此次經過地方。蒙古人等修理橋道。備辦一切用項。俱屬整齊妥協。實為敬謹。此不惟王扎薩克等各感我

皇祖

皇考。養隆恩。竭誠奮勉。乃至伊屬下蒙古。亦

皆歡欣鼓舞。不辭勞瘁。朕甚嘉之。伊等尚非王扎薩克可比。所有修理橋道。充當一切差使。自台吉以下。至官員兵丁等。應如何施恩之處。著總理行營事務王大臣會同該部議奏。尋議查卓索圖盟之五旗。公同在伊游牧地界查罕和羅一站。供用柴炭乳牛車輛。及設卡掘井等項。俱妥協預備。又傳集蒙古等運到物件。賣給官員兵丁。奮勉可嘉。臣等酌議行走。此等差事之協辦台吉塔布囊各賞

緞二疋。台吉官員五十二員各賞緞一疋。兵七百三十名各賞毛青布四疋。至昭烏達哲里木備辦之處。俟至該境時。照查議奏。得旨。協辦台吉塔布囊著各賞緞三疋。台吉官員各賞緞二疋。兵丁等各賞布六疋。餘依議。○戶部議准。河東鹽政吉慶疏請於頒發乾隆八年餘引十萬道外。添給餘引十四萬道。以備各商領運。接濟民食。從之。○又議覆奉天府府尹霍備奏稱旗兵遇歉乏食。應需口糧。旗倉不敷。在民倉借給。秋收還倉。實屬有益。查奉天旗兵分駐各城。有田地可耕者。或自種。或租佃。秋收後家有糧石。可以完納。應如所請。嗣後旗兵乏食。在旗倉指餉糴買外。再有不敷。准於民倉內借給。該管官造具冊結。送將軍衙門轉咨府尹。飭令該州縣官即行查明倉米年分次第開放。出納時如有剋扣短少淋尖多取。及胥役借端刁難等弊。查出嚴加治罪。該管官從重叅處。旗兵交還糧石。

亦不得以潮濕糠粃混行攙雜該管官員領催或將借出米石侵吞肥己以侵盜兵糧例分別叅處治罪所借米定於秋後完交免其加息止於正糧外每倉石量收耗一升以為出入拋撒添補蓆片之用倘奏銷前不能全交該管旗員照催徵錢糧未完例議處從之以內閣學士張楷為總督倉場戶部右侍郎賑恤湖北興國黃岡麻城等三州縣水災飢民分別蠲緩本年額賦○貸江蘇江寧

江浦二縣電災飢民並緩徵本年額賦是

日駐蹕額爾德尼陀羅海○甲寅

上詣

皇太后行幄問安○諭曰廣東雷瓊道張珪美緣事降調著吏部行文調取來京引見○又諭據署廣東總督策楞等奏上年十一月內喚咭喇國巡哨船隻遭風壞船飄至澳門海面并遣夷目撐駕三板小船徑至省城懇求接濟水米沿途水塘汎弁絕無盤詰稽查後

經督撫准令灣泊內海接濟口糧採買木料修理船隻俟風信便時飭令出口策楞隨將海口毫無查察之副將王璋並不早為揭報之總兵焦景竑題叅夫題叅固當然亦該省向來因循之所致也馬爾泰到任後當亟力整頓之至王安國雖無節制總兵之責但地方公務皆職守所關必協力同心諸凡商酌於事乃克有濟若撫臣於海疆諸務推諉武職而肩承不力或鎮臣玩視巡撫而呼應不靈不但失和衷之道且於地方公務必致貽誤豈朕委任之意用是特降諭旨著該部即行文該省督撫鎮臣等知之是日駐蹕哈喇陀海○乙卯

上詣

皇太后行幄問安○是日駐蹕查罕陀海翌日如之○丙辰秋分夕

月於西郊遣履親王允禔行禮○丁巳上詣

皇太后行幄問安。○祭

先師孔子遣大學士陳世倌行禮。○諭朕此次經過地方蒙古等不種田禾米糧缺少以致米價昂貴前經

皇祖聖祖仁皇帝諭令昭烏達之博囉額爾吉布爾哈圖兩處地方修建倉廩由盛京運米備貯著即動撥此項米石自隨駕之王以下大臣官員兵丁等酌量賞給口糧以資接濟仍在盛京照數撥補以實倉儲。○又諭朕聞

博囉額爾吉守倉之蒙古人等甚屬窮苦殊為可憫著加恩每人賞給銀五兩布爾哈圖守倉之蒙古人等亦照此賞給至看守兩倉之章京二名驍騎校二名著各賞官緞一疋所有此項銀兩緞疋交貝勒羅卜藏賞給。○又諭山西一省民間需用小麥雜糧全資關中接濟前聞陝省禁止商販朕已密諭塞楞額令其弛禁通商此現辦之事也今葛德潤係山西人而市惠桑梓以此陳奏謂之無私

可乎夫以本省言官條陳本省之事未免易滋弊竇近來此風漸熾不可不防微杜漸也葛德潤著飭行。○又諭前因孫嘉淦許容將地方一切政務廢弛不理而於謝濟世一案許容則挾私誣陷孫嘉淦則扶同作弊二人大負朕恩是以令其於順義縣城工効力贖罪今金溶奏稱孫嘉淦操守不苟中外共知且言歷任以來其辦事之能否才具之優絀未敢深論是意中明以孫嘉淦為才守兼優之人不當處分者矣獨不思孫嘉淦自朕簡用直隸總督並未能辦一事即如經理永定河務先請放水後倡築臺之議人人以為笑談及調任湖廣奏明往襄陽親閱隄工行至中途聞有匿名書帖之事即行回省此豈封疆大吏所為至於諸事廢弛扶同許容其錯謬難以枚舉即其操守一節亦不過見功令森嚴未敢肆行貪黷耳豈一塵不染者可比金溶係伊門生力為陳奏其意全為孫嘉淦

而發乃并為許容巧恩可謂巧矣當

皇考時臣工內有負恩溺職之員多令於河工城工効力贖罪者彼時言官從未見有一人陳奏何至今日乃敢喋喋以行其私耶且金溶摺內更申明不敢避師生之微嫌忘國家賞罰之大計巧詐已極朕即位之初陳樹萱曾薦伊兄弟二人託言內舉不避親之義朕深悉其私衷曾經議處金溶此舉事同一轍夫言路為國家耳目若以師生私誼擾亂是非所關匪細朕不惜處一言官而使臣僚知假公濟私必難逃朕之洞鑒庶幾少知儆惕亦挽回風氣之一道也金溶著交部嚴察議奏諭軍機大臣等前據尹繼善奏稱洪澤湖水勢浩瀚全資高堰一隄束水敵黃濟運昔年建滾水石壩三座又建天然壩二座非遇異漲原不可輕於開放今年秋汛較之上年尚少三尺滾水壩宣洩過水數寸日來業已斷流高堰隄工保護平穩天然土壩並未

敢冒昧輕開等語白鍾山所奏亦復如是今

據陳大受奏稱今年灌河之水比去年小三四尺及五六尺不等其所奏水勢之大小過水之多少與尹繼善白鍾山之奏殊覺參差至陳大受又稱本年南岸之天然閘尚未放水北岸銅豐等縣有被淹者六月十五日將天然閘開放正河之水平定消落五寸而天然閘引河黃水湍急銅山蕭縣土堰間有侵刷之處等語與尹繼善等所奏並未放水之處大相逕庭豈陳大受之所謂天然閘非尹繼善白鍾山之所謂天然壩耶抑尹繼善白鍾山未將開閘之舉奏明耶夫開閘開壩不過卸河臣一己之干係而不計百姓之受累豈朕簡任河臣之意爾等可寄信詢問尹繼善白鍾山令其將前後情節明白查奏尋覆奏陳大受所奏之天然閘坐落徐州府蕭縣地方係洩黃水之石閘臣等所奏之天然壩坐落洪澤湖山盱地方乃洩湖水之土壩今

歲並未開放。再淮河水勢情形。例應逐日呈報。將上年水勢較量大小。以備查考。其間忽長忽消。日日不同。則較量上年尺寸。亦日日互異。臣等所奏湖水較上年小三尺者。係指伏汎時之水勢而言。陳大受所奏較上年小三四尺五六尺者。當係秋汎時之水勢也。奏入報聞。○是日駐蹕布爾敦陀海。○戊午祭大社。

大稷遣慎郡王允禧恭代行禮。○遣官祭

關帝廟。○

上詣

皇太后行幄問安。○行圍至辛酉皆如之。禮部議覆巡視臺灣御史熊學鵬奏稱臺郡孤懸海外。情形與內地不同。向例額中舉人二名。錄送科舉五百名。今定額止送二百名。應裁減過半。恐無以示鼓勵。應如所請。於定額二百名外。擇其文理清通者酌量寬餘錄送。內地不可援以為例從之。○刑部議覆浙江

按察使萬國宣疏請廣恤寡之典。查婦人守節撫孤。實係相依為命。乃至其子無知犯法。多因格於年未老疾之條。不得邀恩法外。情實堪憫。况孀婦立志堅貞。已逾二十年之久。苦節可風。宜加體恤。是以從前成案。亦有因部駁而特恩寬宥者。則聲明題達。是亦仰體格外矜全貞節之至意。但竟照該按察使所請。鬪毆戲誤殺傷人等案。俱令聲明。則又與父母老疾奏請留養之條。並無分別。且恐兇徒倚恃家有孀母。皆得逞其鬪狠之習。亦屬未協。嗣後除孀婦獨子實係與人鬪毆。將人毆打致死。而伊母年未七十。又非篤疾與留養之律不符者。仍照毆殺律擬抵。毋庸聲明具題外。其戲殺誤殺等案。不過一時戲誤。並非有意向毆。情節尚有可原。應如所請。兇犯之母。雖年非老疾。與留養之例不符。但果係止生一子。家無次丁。又守節已逾二十年者。查明被殺之人。並非孤子。准取具切實供結。

於按律問擬外。將該犯實非有意逞兇致死人命各情由。於本內詳悉聲明具題。法司亦詳加核覆。恭候諭旨遵行。如蒙特恩准其留養者。行令該督撫照例枷責。追給埋葬銀兩。至軍流及徒役等罪亦宜區別。如姦盜誘拐行兇。及有關倫理擾害地方之惡徒。情罪較重者。自不得因係孀婦之子。概從寬典。其或被人引誘。或一時無知。誤罹法網。事非重大。情有可原者。均應如所請。令該督撫將可否留養之處。詳悉聲明報部。刑部仍詳加察核。酌其情罪。除不應准者駁令按照律例治罪外。其應准者。行令照例分別枷責。仍按季彙題從之。○是日駐蹕查罕鄂陀海。○已未。

太宗文皇帝忌辰遣官祭

昭陵。○尚書公訥親等遵旨覆奏。昭烏達博羅額爾吉貯米三千餘石。米色尚堪食用。攜帶便易。可資接濟。兵丁拜唐阿等各一大斗。校尉等各五升。官員等各一斛。大臣等各一石。

王貝勒等各十石。共給米一千五百九十石。仍行文盛京戶部照數運補。得旨知道了。又諭現因米價昂貴。隨從人等業經賞給米石。惟外來隨從人等尚有人多米少之虞。朕意將放賞所餘米石。賞給蒙古等。令其自運至營糶賣。伊等既可獲利。而衆人亦可免重價糶買之累。似屬兩有裨益。其如何定價。及令商人不至有賤買貴賣之處。著交訥親來保詳議具奏。尋議查昭烏達倉存米三千餘石。

除賞給隨駕王大臣官員兵丁等一千五百九十石外。尚餘米一千四百餘石。請交該管盟長教漢王吹木丕勒等妥為辦理。每日運米一百餘石。隨營糶賣。每米一石定價七錢。糶買之人。但令敷用。不准多買。以杜奸商設法圖利之弊。將此交該盟長明白曉示。該管蒙古人等。並交護軍統領。每旗派章京一員。護軍二十名。巡查。再令步軍翼尉不時查拏。如有違禁者。察出從重治罪。得旨依議速行。

○是日駐蹕哈布他海濠○庚申。

上詣

皇太后行幄問安。遣官祭昭忠祠。奉天將軍額爾圖奏奉天所屬圍場地方沿途雖有買賣但奸人謀利者多。米價未免昂貴。查開原旗民貯倉米現有三四萬石。請將此項動支十分之三酌量定價運至克爾蘇門糶賣。於隨駕人等有益。但旗倉係盛京戶部管理。民倉係府尹管理。臣未敢擅便。一面奏聞。一面遣協領前往開原令該城守尉會同知縣作速辦理。先行運往接濟。恭候命下。即行文侍郎府尹等一體遵照辦理。得旨好速行。○是日駐蹕庫庫烏蘇 辛酉

太祖高皇帝忌辰遣官祭福陵

上詣

皇太后行幄問安。諭河南永城鹿邑夏邑三縣乾隆四年被水成災。其地丁錢糧經朕降

旨分別緩徵帶徵以紓民力。迨六七兩年該處復遭水患。不特前項未完。而該年錢糧又復停緩。今年秋收屆期。俱應照數催徵。朕念三邑連年被災。閭閻未免艱窘。現今即屬有秋。而以數年逋賦並徵於一年之內。恐有妨小民仰事俯畜之計。著再加恩。將永城鹿邑夏邑三縣乾隆四六七三年未完帶徵緩徵銀一十四萬餘兩。就各縣原欠數目。自乾隆甲子年為始。再均作三年徵收。俾輸將不致拮据。以示朕優恤之意。戶部議准。御史周祖榮奏稱直隸河間天津所屬被旱地方。現開賑例。正在詳報之時。災民紛紛轉徙。請令該地方官切實開導。毋令遷流。并確查老弱廢疾之極貧者。先行撫恤。再鄰省亦有貧民流入直省。地方官酌量資送回籍。令其速歸從之。大學士等會議刑部左侍郎盛安奏稱從前減等盜犯。俱發黑龍江等處給披甲人為奴。近將有妻者仍前發往。無妻者改發

烟瘴地方是所犯之罪同而所遣之地苦樂懸絕且盜犯知有無妻改發之例或有妻豫先藏匿捏報無妻或僉遣行至中途暗加毒害種種狡飾冀圖改發俱未可知請將免死減等盜犯無論有無妻室照舊例仍發黑龍江等處給披甲人為奴應如所請但無妻室之盜犯務須嚴加約束應令該將軍等查明酌給年壯強幹之披甲人為奴責令拘管又奏稱兄若肆毆其弟弟一時情急避死或因一時抵格邂逅致死者方得留養承祀若實係鬪毆膽敢還毆其兄者雖非謀非故亦並不得在留養承祀之例請勅下直省督撫及九卿科道嗣後遇此等案件非情急邂逅致死者不得引用留養承祀之例應如所奏再行通飭各省凡弟毆胞兄致死有家無次丁而祖父母父母老疾應侍者或父母已故別無兄弟又家無承祀之人者問刑衙門遇有此案必須究明致死確實情形本內聲明應

留養承祀者分別題請法司核覆時仍照例以斬監候定擬遇秋審朝審另冊進呈若有恃強逞兇肆毆胞兄並非情急無奈邂逅致死者俱不得引留養承祀之例仍將不應情由亦於本內據實聲明如有勅交九卿等會議之案俱應遵照題准之例詳核議擬候旨遵行又奏稱弟毆胞兄致死律應斬決案內其情有可憫者該督撫有可否改為斬監候之請其後至有親姪殺伯叔者督撫亦有可否改為斬監候之請伯叔情親而分尊為子姪者敢於抵格致傷伯叔之命事關倫紀嗣後遇有此等案件不得濫引舊案雙請亦應如所奏如果有情實可原者止令於本內聲明俟法司核覆候旨定奪倘有濫引不符之案朦朧題請者察出照例交部議處從之○賑恤湖南沅江龍陽二縣水災飢民○是日駐蹕漆爾波庫至癸亥皆如之○壬戌賜扈從王公大臣及蒙古王公台吉等食○癸亥

萬壽節遣官祭

太廟後殿○遣官祭

福陵

昭陵

昭西陵

孝陵

孝東陵

景陵

泰陵○遣官祭

實錄卷百九

三

顯佑宮

東嶽廟

城隍廟○

上詣

皇太后行幄行禮○御行幄扈從王公大臣官

員及蒙古王公台吉等行慶賀禮○賜扈從

王公大臣及蒙古王公台吉等食○甲子浙

江巡撫常安疏報鎮海象山臨海太平平陽

景寧等六縣乾隆七年分開墾田地山蕩園

十一頃九十畝有奇○是日駐蹕巴雅爾圖

塔喇○乙丑

上詣

皇太后行幄問安侍宴○行圍至壬申皆如之

○諭科爾沁達爾漢親王羅卜藏袞布此次

行走勤謹居心誠實與伊第三子色卜騰巴

爾珠爾著加特恩晉封公爵○又諭科爾沁

二等台吉阿穆呼朗乃

孝惠章皇后長兄貝勒鄂奇爾之子且復年老

實錄卷百九

三

著授為頭等台吉○工部議准直隸總督高

斌奏稱天津水師營添設副都統一員滿兵

一千名每歲應添貯米一萬三千餘石舊厰

不敷收貯應添建倉廩二座又舊設倉大使

一員並無衙署應添建又副都統署前柵欄

兵房堡門礮臺及石閘橋座等項並墊基開

溝均於司庫地糧銀內撥給興修從之○以

右庶子秦蕙田為通政使司右通政是日

駐蹕烏達圖哲里木盟長科爾沁親王羅卜

藏衣布恭進筵宴

大清高宗法天隆運至誠先覺體元立極敷文奮武孝慈神聖純皇帝實錄卷之一百九十八

大清高宗法天隆運至誠先覺體元立極敷文奮武孝慈神聖純皇帝實錄卷之一百九十九

監修總裁官經筵講官太子太傅大學士八旗總領事領侍衛內大臣稽察欽奉 上諭事件處管理
吏部理藩院事務正黃旗滿洲副都統世襲騎都尉軍功加七級隨帶加一級每常加二級軍功紀錄一次臣慶桂
總裁官經筵講官太子太傅文華殿大學士八旗總領事稽察欽奉 上諭事件處管理刑部戶部二庫事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲副都統軍功紀錄五次
尋常紀錄十四次臣史源經筵講官太子少保工部尚書紀錄六次臣曹振鏞等奉

敕修

乾隆八年癸亥八月丙寅駐蹕多博圖丁

卯諭山東今歲夏間雨澤愆期齊東陵縣德平德州平原惠民樂陵陽信濱州利津商河恩縣夏津武城十四州縣俱有被災之處所有本年應納漕糧黑豆例應十月開徵朕念該州縣被災處所雖輕重不同收成均屬歉薄按期輸納實屬艱難著將東省被災州縣本年應納漕糧黑豆及原有帶徵之處視被災之輕重分別年分緩帶輸納以紓民力著該部即行文喀爾吉善令其查明具題辦理

○又諭山東今歲偶被偏災現在開倉賑濟但積貯未能在在充裕如有倉穀不敷之州縣勢必銀穀兼賑向例折銀五錢作穀一石按口散給朕思東省被災之地穀價必昂五錢之價恐有不敷著加恩每穀一石於舊例外再增一錢折給俾領賑貧民購買不致艱難共霑實惠該部即遵諭行○是日駐蹕遜忒依蒙古王等恭進筵宴○戊辰

上詣

皇太后行幄問安○是日駐蹕巴延和碩○己巳

上詣

皇太后行幄問安○遣官祭賢良祠○是日駐蹕達蘭拜山○庚午諭曰廣東糧驛道朱叔權著吏部行文調取來京引見○是日駐蹕訥訥赫席伯村○辛未

上詣

皇太后行幄問安○是日駐蹕蒙古爾吉○壬

申駐蹕伊克諾爾翌日如之○癸酉世宗憲皇帝忌辰遣官祭

泰陵○吏部議准吏科給事中陳大珩奏儀制司郎中韓之璋員外郎張鵠均非科甲出身於例不應用禮部一疏請將各部郎中員外郎由進士出身者遴選調補得旨韓之璋係由盛京員外郎調補戶部員外郎引見時朕因其不勝戶部之任是以改補禮部後論俸推陞郎中張鵠係籤掣戶部員外郎亦因引見時看來不宜戶部繁劇之缺降旨以禮工二部用續經補授禮部員外郎二人既非科甲出身例不應用禮部彼時吏部即應奏明請旨乃未經奏明實屬疎忽韓之璋著以工部郎中用張鵠著以工部員外郎用嗣後遇有此等調補之人若不合例著該部奏明請旨○甲戌

上行圍至丙子皆如之○詣

皇太后行幄問安命江南狼山鎮總兵林祖

成來京陛見。調福建海壇鎮總兵黃錫申為狼山鎮總兵。廣東左翼總兵焦景竑為海壇鎮總兵。以閩安協副將陳林每為廣東左翼總兵。○是日。駐蹕戡子村。○乙亥。戶部議覆。調任四川巡撫碩色疏報。西昌縣被水情形。應如所請。遵照定例。分別極次貧民。加意賑恤。其有城垣。河道。橋梁。急應濬築者。勘明興修。寓賑於工。俾災黎不至失所。本年錢糧。暫行緩徵。被衝田地。其能否開墾。及應徵應蠲之處。查明報部核議。從之。○又議覆直隸總督高斌奏稱。直屬各州縣被旱。應行賑恤事宜。應如所請。查明戶口。題報辦理。至乏食貧民。搬移外出。並老弱殘疾。及外省流民。應行撫恤資送之處。令該督遵照臣部議覆御史周祖榮條奏辦理。其各州縣極貧次貧各戶。應加賑接賑之處。該督遵旨因時熟籌。分別妥辦。如應賑戶口衆多。撥運米石不敷。或路遠難運者。銀米兼賑。每米一斗。折銀一錢五

分。不必易錢。致多寡互異。其散米酌量飢民日可往返處。於四鄉設廠。示期放賑。運費動項撥給題銷。各屬貧民。外出歸來者。一體賑恤。如十月前歸來者。仍補賑一月。被災旗戶。分別查明。照民人月分。動井田屯穀賑恤。無井田處。即於本處常平倉糧內給。應賑竈戶。該管大使查明造冊。移該州縣散賑。乏食貧士。照貧民例。動存公銀兩。交教官散給。即動司庫錢糧。委員採買鮮好麥種。查賑之便。查明無力者。每畝借給五倉升。麥收後追還免息。其查賑官盤費飯食。及造冊紙張價值等項。該督遵旨辦理。停徵蠲緩事宜。勘明分別具題核議。從之。○以少詹事李清植為內閣學士。兼禮部侍郎。○賑貸廣東始興花縣清遠三水南海順德四會高明鶴山歸善海豐陸豐博羅嘉應平遠鎮平等十六州縣被水災民。○是日。駐蹕和爾本諾爾。○丙子。

上詣

皇太后行幄問安。○諭此次口外之蒙古臺站章京兵丁等馳遞公文牧放牲畜晝夜當差殊為可憫。著加恩賞給坐臺章京等彭緞各三疋。兵丁等毛青布各八疋。至隨營備辦烏拉人等分段當差亦著賞給章京等彭緞各二疋。兵丁等毛青布各四疋。○吏部議准調任四川巡撫碩色覆奏川省議裁主簿鹽大使縣丞州判州同等十缺分別歸并兼理事宜應將裁汰綿竹縣主簿西充縣仙林場鹽大使三臺縣石板灘鹽大使樂至縣縣丞劍州州判富順縣主簿井研縣鹽井灣大使合州州同奉節縣縣丞所管事務各歸本州縣兼管。隄為縣裁王村場鹽大使所管紅壁山等處井竈關隘事務分歸樂山縣知縣兼管。五通橋等處井竈關隘事務分歸隄為縣知縣兼管。應行轉申事件由本管知州直隸州核轉從之。○是日駐蹕伊木呼哈達翌日如之。○丁丑賜扈從王公大臣及蒙古王等食。

戊寅駐蹕夸蘭河。○已卯上詣

皇太后行幄問安。○行圍於巴彥

親射殪虎。

御書賜盛京各衙門扁額將軍曰屏翰邵豐戶部曰宗邦會要禮部曰典重明禋兵部曰陪京樞要刑部曰弼教留都工部曰飭材山海奉天府曰風淳豐邑九卿等議覆給事中鄒一桂奏稱嗣後樂舞生州縣官於應考童生內畧知文義者選取學臣按臨時飭提調官考驗充補若目不識丁濫選者斥革該州縣教官叅處從之。○刑部議奏嗣後免死減等解部轉發之犯於起解時遞解長牌內將事由罪名年貌開明關照前途或遣犯妻室中途病故即申報上司報部遞回原籍改發從之。○是日駐蹕圭勒赫哈達。○是月總理事務履親王允禔等具摺請安得旨朕躬甚安王大臣等佳否朕恭奉。

皇太后歡悅而行已至科爾沁地方矣蒙古等皆誠心効力實屬可喜仰邀

上天之恩以塞外之地而和暖與內地同雨水稀少而青草未黃諸凡順適衆皆歡忭而行王大臣等其共歡喜之又具摺請安得旨朕躬安王大臣等佳否自入盛京歷觀舊蹟溯我朝之肇興憶

祖宗之開創為

天所與仰荷鴻庥垂萬世之統貽久遠之謀每

敬思之下欽畏之念彌增至蒙古地方皆所經由伊等誠敬備至殊快睹焉今業同到家安樂行次并睹豐收矣可將此旨與諸王大臣看其共欣喜之再盛京所得鹿肉已交三和令其賜王大臣等矣戶部侍郎三和等奏京城米價漸平所有八旗與內務府米局及五城米廠平糶米應請暫停派撥如關倉後米價或長臣等再行酌量奏明辦理得旨覽直隸總督高斌奏天津理事同知富爾

敏謹慎妥協請令留任守制於營務旗民有益得旨此尚易得人也何必又奏順義城工實估銀七萬五千七百餘兩隨行文孫嘉淦許容問其出貲若干於何日解交茲據孫嘉淦許容各具呈前來所稱出貲之數共計不過一萬餘兩遠不敷修城之費應作何查辦得旨令彼二人在工所督辦工成然後令回籍餘俟面諭署兩江總督協辦河務尹繼善奏江西民情漸已安帖而刁橫之徒斷難寬貸所獲搶奪各犯凡為首者俱令按律定擬為從者亦枷號重責鬧堂辱官各犯俱令兩司提審徹底窮究一一分別律擬具題臣訪聞辱官之時兼有專汛武弁袖手旁觀並不救護溺職倖災更難輕縱現在飭拏發審如果確實均應痛加處治並曉示各營俾加儆惕各緣由得旨應如是留心料理者陳宏謀畧短幹濟否耶○又奏辦理鹽務情形查各處興販私鹽皆由上中下三十鹽場透

漏。雖水陸紛歧。而自鹽場抵江口。各有要隘。可扼蹤跡。可尋第。地方文武緝拏不力。大梟多致庇縱。若不嚴定責成。鹽政終不能肅清。臣反覆籌畫。以三十場緝私之任。責成三分司。督各場大使力查。竈戶火伏曬掃之鹽。盡交商垣。貧難男婦。遵按名給籌之例。確查造冊存案。每次買鹽。不得過四十觔。止許零賣。本邑居民。如不凜遵。或致私鹽透漏出場。惟該分司是問。其毗連鹽場各邑。責成地方文武。查明境內要隘。分派兵役巡拏。私鹽轉運出境。惟該地方官是問。至永豐、大伊、泰州等關壩。乃鎖鑰之地。三江、青山等營汛。乃出沒之區。當日專因緝私。設員巡守。又有兩淮額設巡役一千三百餘名。巡船二百餘隻。聯絡哨捕。自裁鹽道後。於乾隆七年議定。責成淮揚道綜理。今淮揚雖專管河工。一應緝私事宜。仍令經管。若江寧、安慶等屬。地方遼濶。或恐淮浙引鹽。彼此侵犯。悉照各地方疆界。責

成文武。協同承緝。各歸江寧、安徽常鎮三巡道總理。得旨好。實力妥協。方得其益也。○又奏報秋收情形。得旨覽奏。曷勝欣慰。其間被偏災之處。亦應加意撫恤。○江南河道總督白鍾山奏。訓練官兵武藝。及製備軍裝完竣。並酌調葦營馬兵操演緣由。得旨如此諸凡留心方是。但須實力為之。○江蘇巡撫陳大受奏。各屬災區。應分別蠲賑。隨時斟酌辦理。得旨所見是。積年被災之地。自應加意撫恤。毋致失所。○又奏。淮、徐、海三府州屬。查編保甲。現在飭行該府縣印官。查照原奏妥辦。並委試用佐雜各員。分派各州縣。協同辦理。先將烟戶挨查。編定某保某甲若干烟戶。再設立保甲長。專令稽查所管烟戶內。奸匪棍徒。及面生可疑之人。一有蹤跡。立即舉首。倘庇匿不報。遇有他處竊刦。獲匪到案。究明住所。即提該甲長照例究治。向來凡人命。鬪毆。賭博。姦拐。催比錢糧諸事。一概責成甲長。胥吏

肆其魚肉。官長加以敲撲。故承充者皆頑鈍無恥之人。甚且與賊匪串通作奸。臣以為舉行保甲。必須簡切易循。若只責以稽查奸匪。則用心專一。而他事不得波累。良善者皆肯承充。日久庶可見效。得旨所見是。妥協為之。

○安徽巡撫范璨奏遵例宣講

聖諭廣訓。現在辦理緣由。得旨實力實心行之。不然。徒滋擾耳。○又奏雨水糧價情形。得旨。雖屬偏災。然安省積歉之後。撫恤為要。○江

南上江宣諭化導使鄧時敏奏報宣諭化導使倪國璉病故。得旨著黃明懿去。該部知道。○江西按察使李如蘭奏。江省介在閩廣吳楚間。雖俗尚儉樸。而民風刁頑。臣現在次第整理。得旨。汝在四川。諸事妥協。但稍欠振作。茲調繁鉅之任。宜勉力作興。以副弼教之意。戒之。○浙江巡撫常安奏。慈谿縣民邵士奇。飄依蘇祿國已久。彼國主授以甲必丹之職。因有請貢之舉。交付邵士奇燕窩珍珠等貨。

共計銀三千七百餘兩。今先赴蘇杭貨賣。邵士奇竟將各貨變銀。捲逃回籍。貢使懇求究追。現在審訊。邵士奇銀兩多已花費。臣即將司庫程費銀內動支。照數交明。正使馬光明等攜回。並將聖恩宣揚。咨明該國王。至邵士奇貨銀。容陸續追出還項。得旨。此事汝所辦甚屬可嘉。知道了。○刑部左侍郎署福建巡撫周學健奏。閩省不通輓運。而耗費米穀甚多。現在分飭地方官。將用米漿做紙張之處。長行禁革。其燒酒造麴二項。除以番薯大麥等項雜糧製造。俱免查禁外。凡有囤收米穀私燒及造麴者。無論豐收之年。概行嚴禁。犯者與私燒一體治罪。得旨。此係應為之事。但須妥協為之。方得有利無弊也。○又奏酌定銀錢兼用。查閩省近年。民間專用錢。價日昂貴。臣酌定章程。凡買賣交易。一兩以下者。准銀錢兼用。一兩以上。止許用銀。典當出入銀錢。亦照此例。又大小當舖所存錢。及出口船

隻攜帶錢亦分別定制。又州縣收納錢糧及鹽館稅館所收零星錢亦定限陸續發銷易換。庶流通既廣。民用充裕。得旨好。知道了。○湖廣總督阿爾賽奏請密諭各省督撫。如四川等產米省分。察看本地情形。若果年豐價減。而其他各省設有需用米穀之處。即令該督撫彼此密商。酌量動項。代為採辦。分撥運濟。解銀歸款。是於停止採買之中。仍寓豫籌積貯之計。得旨此奏亦是。待朕酌籌之。○湖

北巡撫晏斯盛奏。湖北現存穀數僅三十一萬五千餘石。應乘秋成。在本省產米價平。民有餘糧之所。分途購買。得旨所見甚是。妥協為之。○又奏雨水情形。得旨所奏俱悉。湖廣一切政治。廢弛已極。汝等當實力整頓。毋徒為空言也。此諭亦令阿爾賽蔣溥知之。○湖廣提督王無黨奏謝革職留任恩。得旨尚不實心悔過。整飭營伍。徒以軍裝一事塞責。殊屬無恥。看汝殊不妥當。慎之。○山東巡撫喀

爾吉善奏籌辦本省倉穀。分別買停。得旨所見甚是。知道了。○巡視河東鹽政吉慶奏。現在糧價昂貴。查商人行運陝鹽回空車脚。帶運糧食甚便。因選定殷商范天錫等十人。准其酌議認運。茲該商等在陝省各行鹽地方。購就小麥二萬六千石。陸續運發。約九月十五日前後。可以到齊。設廠減糶。於附近貧民。不無小補。得旨好。此事汝所辦可嘉也。○廣州將軍暫署兩廣總督印務策楞奏安南國夷目帶領兵船。於七月初八十九等日。與桃山夷匪兆曉打仗。殺傷賊匪一千餘人。獲賊船一百餘隻。兆曉仍逃回桃山。桃山離欽州遠隔一海。料不能遠越重洋。潛入內地。但邊防不可不慎。現檄沿海各鎮。督率營弁。酌撥兵船。加謹巡哨。又准雲南督臣張允隨密劄。稱安南自矣長投誠之後。復有矣揚。更名武賢卿及莫正豹等在該國安邊保樂等地方。嘯聚並稱莫正豹原名莫能仁。係泗城府人。

手下人等亦俱係廣西人居多臣查泗城地方從前原有安插莫姓之事其子孫現居凌雲縣境已照單行司跟查緝究再該國牧馬諒山等處連年用兵將來饑饉薦臻或致仍有盜匪竊發之事現在不時嚴飭沿邊文武各官加謹防禦稽查得旨所見甚是正宜如此辦理○又奏審明普寧縣散布飛條刊刻匪印之首犯李阿科照謀叛未行律擬絞立決其餘同謀糾夥諸人分別定擬得旨覽○

廣東提督林君陞奏考察訓練各事宜得旨是勉力為之亦不可欲速也○廣西巡撫楊錫紱奏前將拏獲在安南附逆為匪之黃漢及在內招人出安南為匪之周道南抱重亞項等嚴加羈禁俟再有拏獲漢奸一併從重定擬具奏奉硃批此等即應重處以示警何必令其展轉偷生耶臣遵即行令鎮安泗城二府將黃漢周道南亞項三犯即提出當眾杖斃至抱重即係亞項之父尚未出交為匪

且其子已罹重法應姑貸其生另行枷責完結得旨朕見汝所奏似有任其展轉案情之意故批示即應重處之旨所以令汝等連結此案題明正法也豈有錯會為立斃之理實屬紕繆之至雲南總督兼管巡撫事張允隨奏豫籌昭通鎮兵糧請照例發銀赴黔蜀豐收地方採買得旨所奏俱悉○又奏敬籌開濬金江下游工程事宜查下游原估應修者共六十四灘內最險灘五險灘十八次險灘四十一除鎖水一灘已於勘估試修時開通外尚有六十三灘今詳議籌酌次第經理一承修之員宜酌添查六十三灘綿長六百四十餘里雖設總理二員但既有承修灘工又須往來稽察難以兼顧應遴府佐州縣等官分灘承修並支放工價食米如有糜帑誤工即行題叅一協辦雜職宜豫委查有宣威州吏目陶世榮等十五員均堪委用工竣日果有勞績與承修之員一體題請議敘怠誤

營私。即行叅處。一承修灘工。宜量險易。勻派其總理協理大員。仍不時往來稽查。一官役夫匠所需食米。應於江工銀內。動撥八千四百兩。赴川買米四千二百石。支放報銷。一灘工石匠。約需一千二百名。應委員帶銀一千六百兩。赴川省雇募四百名。又委員帶銀二千兩。赴黔省雇募五百名。再於本省各府雇募三百名。其委員路費。照買運粵鹽之例。每員月給養廉紙張役食銀七十五兩。限十月內齊集興工。一鐵器應豫製造。滇省嶲峨縣出產鋼鐵。從前上游灘工。曾委員赴該處製造。今開修下游。每年約需用鋼鑽一萬枝。鑊子二千個。應仍委員前往。會同地方官監造。陸續運赴工所。此外尚需錐錘二百五十把。手錘一千五百把。千觔三百根。應令該知縣到川。順便購買。帶赴工所。以省脚費。一在工官役。應給養廉工食。總理知府每月給養廉一百五十兩。所帶書辦二名。每名日給工食

銀一錢五分。差役十六名。每名日給工食銀六分。協理知府每月養廉一百二十兩。書辦二名。差役八名。照數發給。承修之雲南府通判。永善縣嶲峨縣知縣。每月養廉八十兩。候缺通判一員。每月養廉一百兩。各帶書辦一名。差役六名。工食照例支給。其分修文武員弁內。現任及試用人員。每員月給養廉四十兩。差役飯食在內。至年滿千總。外委千總。二員。每員月給養廉三十兩。跟役飯食亦在內。俱以到工日起支。停工日住支。年歸年款。截數報銷。以上各條。俱係現在應行之事。其餘未盡事宜。容臣隨時斟酌。陸續奏請遵行。得旨。固應如是辦理。但期收實效耳。○又奏。拏獲偽武氏王矣。楊差往都童之偽。尚書盧英訊係開化夷人。現飭按察使將該犯及前次所獲之偽。宣光道林鵬鳴。嚴行收禁。俟有續獲黨羽。一併研審。定擬具題。又於木蘇菁內。盤獲自交趾逃回沙匪一百四十六名。木阿

賽坡頭。拏獲沙夷三百二十九名。收獲弓弩刀鎗等二百三十六件。查安南國內矣揚莫正豹。一稱交崗武氏後裔。一稱高平莫氏子孫。各以恢復舊封為名。內外夷匪羣相附和。經臣令地方文武設法招擒。計前後拏獲偽官二名。招回及盤獲夷匪一千餘名。現將偽官監禁嚴審。各沙匪按名給與口糧。分解黔粵各原籍。交地方官嚴加收管安插。其兩次盤獲之逃難交民。酌給養贍。俟安南賊勢稍戢。遣歸復業。又據安南保樂州土目農晏朝。差頭目蔣朝通等。羅髮變服。前赴廣南營投訴。乞准詳請勦除武莫二氏。臣飭開化鎮曉諭蔣朝通等。轉諭該土目。以中外各有界限。大兵無越境代屬國勦除盜賊之理。應速赴該國王處請兵。給以盤費。遣令回國。得旨。俱屬妥協。知道了。○又奏安南交崗夷匪武賢卿。即矣揚。分遣頭目陸元王奇等襲奪都竜。土目翁桂敗逃。賊兵復攻南山。查南山與開

化天生橋僅隔一河。因飭開化鎮府整肅軍威。遙助交人聲勢。如賊兵敢越界一步。即行擒斬。並令發諭南山土目。悉力固守。六月初七日。翁桂復奪回都竜。當即行令開化府將前項難民好為資給。護送出口。交翁桂領回復業。但翁桂兵少援絕。其勢終難保守。都竜接壤內地。現飭領兵將備。遙示聲援。以靖邊防。得旨。所奏俱悉。○貴州古州鎮總兵崔傑奏。報古州雨水糧價情形。得旨。所奏俱悉。勉力為之。古州尤不比他鎮也。○貴州鎮遠鎮總兵冷文瑞密奏。郡民閩衆罷市情形。得旨。如此據實陳奏。實可嘉也。但此風不可長。而苗疆尤不宜。汝等應留心也。

大清高宗法天隆運至誠先覺體元立極敷文
奮武孝慈神聖純皇帝實錄卷之二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆八年癸亥九月庚辰朔

上行圍於烏什杭阿

親射殪虎遣官祭黑龍潭

昭靈沛澤龍王之神刑部議准甘肅巡撫
黃廷桂奏稱番民貪競兇頑之性未悛凡仇
盜相殺之案兩造俱願罰服完結若驟繩以
律法恐若輩轉生疑慮應以乾隆甲子年為
始再寬限五年徐徐化導現飭各該地方官
將命盜治罪諸條譯出番文出榜曉示實力
化導以期潛移野性從之以四川夔州副

將邱策普為川北鎮總兵。浙江巡撫常安疏報鄞縣開墾乾隆七年分田畝九頃有奇。除浙江錢塘鄞縣西安海寧等四縣坍沒荒廢田畝蕩地額賦六十八兩有奇。糧米南米八石有奇。是日駐蹕庫魯河。辛巳。

上行圍於威準。兵部等部議覆署兩江總督尹繼善疏稱瓜洲營虎船八隻原備催漕。今運漕河道迫窄。二隻足用。請將原設虎船酌減六隻。即令哨官二員帶兵駕船在該地內河催漕護差。所裁六船兵三十名仍歸營差防應如所請。其船令該督飭令估變從之。是日駐蹕阿濟格威準河。壬午。

上詣

皇太后行幄問安。行圍於黃科。綏遠城建威將軍補熙等奏綏遠城請照歸化城之例。兩翼設立官學。於土默特二旗內選蒙古教習二人。每學選兵丁子弟十人令其教讀。教習每月給銀一兩五錢。學生每日給大錢十

文在公用房租內支給。再現在綏遠城繕寫扎薩克等處文移之土默特旗兵二名並無錢糧。請照同知通判衙門繕寫滿蒙字之土默特蒙古之例。每月賞銀五錢。得旨。行下部知之。夷使吹納木喀等自哈丹和碩起程進藏。侍郎玉保等傳旨加賞口糧。換給駝馬。是日駐蹕威準達巴漢。癸未。

上行圍於阿蘭。諭前據履親王條奏諸王以外概不准服用紅雨衣。如此轉致無所區別。嗣後一品大臣及朕前行走之御前侍衛等俱著穿紅雨衣。軍機大臣等奏據侍衛常吉圖等報稱哲布尊丹巴呼土克圖欲往額爾得尼昭禮拜。職等告以理應奏聞。俟命遵行。伊言諸事已備前往無妨。即於八月十六日自庫倫起程。臣等查哲布尊丹巴呼土克圖年少無識。任意而行。其徒楚揚托音及土謝圖汗敦丹多爾濟既不阻止。又不具報。均屬不合。請交部察議。得旨。哲布尊丹巴呼土

克圖欲往額爾得尼昭禮拜。應候朕旨。若果奏請。朕自必准行。乃並不具奏。又不納侍衛等規勸之言。急行前往。甚屬錯誤。著飭行。餘依議。尋理藩院奏。應將不行勸阻之土謝圖汗。敦丹多爾濟等。照例議處。得旨。土謝圖汗。敦丹多爾濟等。雖係蒙古。無知錯誤。若不照例議處。伊等不知懲戒。土謝圖汗等著加恩減半議處。○是日。駐蹕富拉哈。翌日如之。○甲申。諭。上年八月內。降旨。將江蘇。安徽。福建。甘肅。直隸。廣東。浙江等省。雍正十三年分。未完民欠地丁。漕項。一切銀米。加恩豁免。今聞福建。閩縣等處。向有寺租歸公一項。原係廢寺田畝入官。收租完糧。雍正十三年分。尚有民欠未完租穀四百餘石。因係另案造報。未獲一體邀恩。朕思寺租。雖屬另案題報之項。但窮佃無力輸將。事同一轍。所有閩縣古田。霞浦。寧德。四縣。十三年分民欠寺租。著加恩一併寬免。該部即遵諭行。○又諭。朕軫念民

艱。以米糧為民食根本。是以各關米稅。概行蠲免。其餘貨物。照例徵收。至於外洋商人。有航海運米至內地者。尤當格外加恩。方副朕懷遠之意。上年九月間。暹羅商人運米至閩。朕曾降旨。免徵船貨稅銀。聞今歲仍復帶米來閩貿易。似此源源而來。其加恩之處。自當著為常例。著自乾隆八年為始。嗣後凡遇外洋貨船。來閩粵等省貿易。帶米一萬石以上者。著免其船貨稅銀十分之五。帶米五千石以上者。免其船貨稅銀十分之三。其米聽照市價公平發糶。若民間米多。不須糶買。即著官為收買。以補常社等倉。或散給沿海各標營兵糧之用。俾外洋商人得霑實惠。不致有糶賣之艱。該部即行文該督撫將軍。并宣諭該國王知之。○吏部議覆。湖南按察使明德奏。請定滿洲知縣改補京職之例。應如所請。嗣後滿洲科目人員。已就知縣各官。有自揣才庸。難膺民社。情願補用小京官者。准於臨

選時呈明改補。不論雙單月。遇有通政司漢字知事。國子監典簿。監丞。博士。光祿寺署丞。詹事府主簿。翰林院典簿等十四缺。通照改補日期。先儘補用。其不自度量。必欲選知縣等官。到任後不能勝任者。該督撫即秉公察核。分別題叅。如不宜外任。而為人循謹。學問尚優者。該督撫將應否改補小京官之處。具本詳細聲明。送部引見。如蒙俞允。臣部即以通政司漢字知事等十四缺。不論雙單月。遇有缺出。通較奉旨日期。與現在應選文舉人等輪流間補。從之。○賑恤陝西商州水災飢民。○乙酉。

上詣

皇太后行幄問安。○行圍於舍里。○諭朕此次至盛京。視其兵丁身材壯健。弓馬嫻熟。猶未失滿洲舊制。大臣官員等。各相奮勉。訓練整齊。自朕來時。伊等歡欣鼓舞。諸務備辦。甚屬誠敬。尤為可嘉。朕雖加恩賞賚。念伊等生計。

恐屬不敷。所請領取生息銀二十萬兩。著交該將軍俱借與官員兵丁等。官員等展限四年坐扣。兵丁等於二年後再定限坐扣。俾伊等生計。日臻充裕。○兵部議准原署四川總督馬爾泰疏稱。四川越舊。於雍正十三年增設官兵。改設叅將。援照雲南尋甯等處之例。仍食遊擊俸薪。嗣撥添兵一百名。兼轄寧越一營。地處衝繁。非舊改設時可比。今雲南既經改食叅將俸薪。四川越舊營。亦應照例改正。從之。○是日。駐蹕瓜齊顯鄂佛羅。○丙戌。上行圍於善顏倭赫。○遣官祭

歷代帝王廟。

都城隍之神。總管。

三陵事務。五十四。奏考驗喜峯口冷口。羅紋峪三處官弁馬步騎射。內喜峯口冷口之協領富保。七十。因病未能騎射。其餘均尚平妥。得旨。二處協領。乃專管兵丁之員。推故不肯騎射。如何教訓兵丁。著該部嚴察議奏。五十四。

並未參奏巧為掩飾亦大不合著一併察議具奏所有駐防滿洲兵丁地方通行曉諭吏部等部議覆總理

三陵内外事務多羅貝勒允祜條奏從前額駙松阿彥因辦理内大臣事務管轄稽察此處侍衛等是以添設侍衛筆帖式二員今既無稽察侍衛内大臣且侍衛僅餘十員無應辦事務空設筆帖式二員等語應如所請將侍衛筆帖式裁去其現在二員令給咨赴部遇本旗筆帖式缺出補用從之○是日駐蹕六格山河沿丁亥

上詣

皇太后行幄問安○行圍於巴彥○賜扈從諸王大臣飯○諭荊州將軍袁泰年老著回京所遺員缺著鄂彌達調補吉林將軍員缺著博第調補黑龍江將軍員缺著傅森調補杭州將軍員缺著副都統薩爾哈岱補授乍浦副都統員缺著協領覺羅額勒登補授傅森

將印鑰交薩爾哈岱即赴新任吉林黑龍江兩處印鑰現係副都統署理鄂彌達博第俱著由盛京各赴新任鄂彌達至荊州時袁泰再行來京○是日駐蹕小黃科○戊子

上詣

皇太后行幄問安○行圍於尼雅滿珠○是日駐蹕伊勒哈雅番○己丑

上行圍於珠敦○駐蹕德里倭赫○庚寅

上詣

皇太后行幄問安○行圍於英莪邊門外○是日駐蹕烏蘇河○辛卯○戶部議覆調任四川巡撫碩色奏稱川省夔關從前徵收船料實為米糧非為船隻而設是夔關從前徵米不徵料與乾隆七年恩旨相符應如所請將夔關米船料稅免其徵收如有私徵侵隱情弊指名參奏所有承辦米糧稅務之書巡八名應裁從之○兵部議准湖廣總督阿爾賽奏稱湖北道士狀地方緊要額設都司一員止

屬提督管轄就近未有上司稽察難免縱弛
貽誤查該營離黃州僅一百四十里請將道
士狀都司改隸黃州協副將管轄從之○刑
部議覆署貴州按察使宋厚奏稱軍流人犯
之妻室無論願隨緣坐向有驗看面貌疤痕
手指箕斗之例州縣官當堂查驗以防頂替
令胥役人等執持婦手細看不惟近於褻玩
亦恐不無需索捏報應如所奏嗣後凡軍流
妻室同遣者飭令該州縣取具本夫開報妻
妾年貌有無疤痕並該犯之親族鄰佑人等
甘結驗明造冊發遣仍加具印結送部備查
其驗看兩手箕斗之處停止從之○是日駐
蹕馬前寨○壬辰

上詣

皇太后行幄問安○賑恤四川寧遠府屬冕寧
縣德昌所鹽中左所靖遠營等處被水民夷
並緩徵本年額賦○是日駐蹕油葫蘆村○
癸巳禮部奏謁

陵儀注

皇上御素服至正門外降輿禮部堂官導引由
正門之左門進

永陵入

啟運門之左門經

啟運殿東旁行以地狹拜褥設階下行三跪九
叩禮

福陵

昭陵入

隆恩門之左門經

隆恩殿東旁行詣祭臺處行三跪九叩禮興詣
東旁立俟設奠几畢

上進謁

陵

永陵凡四跪祭酒十二爵

福陵

昭陵各祭酒三爵每一祭酒行一叩禮禮畢仍
詣東旁立西嚮舉哀王以下三品以上官員

等於

殿之兩旁。按翼向上排立。均隨行禮舉哀畢。禮

部堂官導引

皇上由原進之門出。乘輿還行宮。又奏。

皇太后。

皇后至正門之右門外降輿。掌關防等官之妻導引。由正門之右門進。

永陵至

啟運門下。

福陵。

昭陵至祭臺處。

皇太后就正中拜位。

皇后隨後均行六拜三叩禮。興詣西旁立。俟設

奠几畢。

皇太后謁

永陵。四跪。祭酒十二爵。

福陵。

昭陵。各祭酒三爵。每一祭酒行一叩禮。

皇后均隨行禮。興仍詣西旁立。東嚮舉哀畢。掌關防等官之妻導引。

皇太后

皇后由原進之門出。乘輿還行宮。得旨知道了。

○廣東巡撫王安國疏報肇廉二府屬墾復

乾隆七年分遷移地畝七十頃有奇。招回人

丁二百四十一丁口。又廣惠潮肇高瓊連嘉

八府州屬開墾乾隆七年分水田六十四頃

有奇。廣潮三府屬沙坦四十一頃有奇。廣州

府屬香山縣歸併衛所屯田墾復遷移田畝

二十畝有奇。○是日駐蹕尚家河。○甲午。

上詣

皇太后行幄問安。○吏部議奏御史金溶居心

巧詐。有玷言職。應照溺職例革職。得旨朕廣

開言路。虛懷採納。原為或有闕君德。或有裨

政治。或內外大臣有婪贓不法。劣蹟昭著。言

官能直言無隱。朕始可收明目達聰之益。若

止於勸襲陳言。敷衍套語。則載籍具備。朕一

覽之餘。自能深悉。何待伊等陳奏。似此殊負朕虛已求言之意。乃近日科道習氣。更不止此。如沈廷芳之捏無稽而希惠澤。金溶之用巧詐而逞私情。並非限於識見。無心之過。若不加以處分。無以示儆。但以二人相較而論。沈廷芳不過卑鄙狂瞽。不稱言職。尚無情弊實據。金溶則袒護師門。假公濟私。漸開朋比黨援之習。其為人心世道之害。甚非淺鮮。二人該部雖俱議革職。其情罪却有輕重之不同。沈廷芳著從寬降二級調用。金溶著照議革職。並宣示科道等共知之。○兵部等部議覆山東按察使圖爾炳阿條奏。內稱商人雇募巡役。攜帶鳥鎗。原為抵禦大梟。並非令輕於施放。夥衆大梟。既不恒有。該巡役遇有百觔左右之私販。及市買食鹽數十觔之人。動輒使鎗。釀成命案。嗣後巡役概不准攜帶。如有大梟飛報營汛地方。差兵攜帶鳥鎗。協同擒捕。至尋常巡緝。止許執持棍棒等械。勤緊

緝拏。應如所請。其鳥鎗。令各該地方官按名照號查收。解該鎮衙門貯庫。俟各營應用。報部撥用。至兩淮廣東浙江河東長蘆等處。行鹽地方。事同一體。其有無攜帶鳥鎗。並應否查收之處。各該督撫鹽政。查明辦理報部。又稱軍流人犯。遇炎暑時。請照隆冬停遣之例。查定例。軍流及外遣人犯。十月至正月終。及六月。俱停其發遣。是軍流人犯。已定有六月停遣之例。其未經起解者。既得停發遣。若已解至中途。時遇六月。自應停遣。均無庸再議。再查隆冬停遣。例載有中途停遣之條。而六月停遣。尚未註明。誠恐州縣拘執例文。辦理未能盡一。應通行各省。嗣後軍流人犯。除未起解者。六月照例停遣外。其已解至中途。如遇六月盛暑時。沿途州縣。即照例停遣。不得強令前行。或到配將近。及單身人犯。自願前進者。令該州縣訊取確供。知會前途。一體接遞。仍將該犯不願停遣緣由。報部查核。從之。

○刑部覆奏。戶部右侍郎阿里衮奏稱會審湖南解任巡撫許容原叅續叅糧道謝濟世貪縱淫酗。營私剥民。各款皆虛。惟失察書役犯贓。屬實。應降一級調用。查謝濟世各款既虛。其原叅革職之處。應准開復。失察輕罪。仍照例議處。巡撫許容。合依奏事詐不以實律杖一百。徒三年。仍照例准其納贖。湖南布政使張燦。按察使今陞四川布政使王玠。扶同抑勒換詳。均照例革職。湖廣總督孫嘉淦。扶同許容。草率定案。應照溺職例革職。其餘各官。分別議處。署糧道倉德。通揭情由。審俱得實。可否照例議敘。得旨依議。許容。張燦。王玠。孫嘉淦。俱著革職。倉德著交部議敘。○是日駐蹕穆奇村。

大清高宗法天隆運至誠先覺體元立極敷文奮武孝慈神聖純皇帝實錄卷之二百

大清高宗法天隆運至誠先覺體元立極敷文
奮武孝慈神聖純皇帝實錄卷之二百一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶隆

總裁官經筵講官太子太傅大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆八年癸亥九月乙未

實錄卷二百一

上奉

皇太后率

皇后謁

永陵行禮祭酒舉哀如儀○

上詣

顯佑宮行禮○諭軍機大臣等革職湖南布

政使張燦著往順義同孫嘉淦許容出貲辦

理城工爾等可寄信大學士鄂爾泰張廷玉

傳旨令張燦前往順義工所并令鄂爾泰等

寄信高斌知之○是日駐蹕烏古尼嚕村翌

日如之丙申

上詣

永陵行大饗禮步入

啟運門詣香案前跪上香復位行三跪九拜禮

初獻奠帛爵讀祝畢行三拜禮亞獻三獻各

奠爵畢行三跪九拜禮王以下官員均隨行

禮

上詣望燎位望燎禮畢入

實錄卷二百一

陵寢左門至

明樓前西嚮立舉哀王以下各官咸舉哀○遣

官奠附葬之武功郡王禮敦恪恭貝勒塔察

篇古墓及附近之覺羅等祖塋詣

皇太后行幄問安○諭前漕運總督顧琮督運

來京奏請舉行限田之法每戶以三十頃為

限以為如此則貧富可均貧民有益朕深知

此事名雖正而難行即去年盛安均田之說

也因示諭云爾以三十頃為限則未至三十

頃者原可置買。即已至三十頃者。分之兄弟子孫。則每人名下不過數頃。未嘗不可置買。何損於富戶。何益於貧民。況一立限田之法。若不查問。仍屬有名無實。必須戶戶查對。人審問。其為滋擾。不可勝言。夫果滋擾於一時。而可收功於日後。亦豈可畏難中止。今輒轉思維。即使限田之法。地方官勉強奉行。究於貧民無補。是不但無益而且有累也。而顧琮猶以為可行。請率領地方官先於淮安一

府試行之。持論甚堅。甚至與大學士張廷玉公訥親等。動色相爭。朕見彼如此擔當。勇於任事。意尚可取。是以令其再與尹繼善熟商。今據尹繼善陳奏難行之處。與朕語不約而同。則是此事之斷不可行。斷不能行。實出人之所同然。又豈可以嘗試。茲特降旨曉諭顧琮。此事著停止。并令各督撫知之。賑貸河南祥符陽武封邱鄭州滎澤新鄭輝縣獲嘉河內濟源修武武陟孟縣溫縣洛陽偃師

鞏縣孟津宜陽永寧靈寶等二十一州縣旱災飢民。分別蠲緩本年額賦。○丁酉。以鑲紅旗滿洲協領噶爾岱為江寧右翼副都統。○賑貸山東齊東陵縣德州德平平原德州衛惠民陽信海豐樂陵商河濱州利津霑化恩縣夏津武城日照等十八州縣衛旱災飢民。分別蠲緩本年額賦。○是日。駐蹕穆奇村。○戊戌。

上詣

皇太后行幄問安。○諭去歲春季京師雨澤稀少。朕虔誠祈禱。曾降旨將輕罪人犯分別減免。因推廣於各省。如遇災青之年。著該督撫將清理刑獄之處。奏聞請旨。又恐各省遠近不同。請旨行文辦理。已不及時。因令該督撫除徒流等罪外。其各案內牽連待質及笞杖內情有可原者。一面量行減省。一面具摺奏聞。務使恤刑弭災之意。不致羈遲也。今據陳大受奏稱江南海州并所屬之贛榆沐陽二

縣。今夏被災。已經咨部減刑。但三州縣災青已成。較他處為重。減刑之事。應請於九月初一日為始。至明年麥熟後停止等語。夫赦非善政。古人論之。朕從前所降諭旨。原為地方偶有水旱。間修省刑之典。亦感召

天和之一端。非謂災傷之地。即應一例赦罪也。今海州既已成災。而始清刑獄。是為時已遲。且明示以麥熟為期。則小民無知。以為此半年之間。可以觸法。觖禁肆行無忌。是誘民為非也。陳大受所見甚為卑謬。朕已於伊摺內批示訓飭。恐各省督撫。尚有似此錯會朕意者。故特降諭旨。該部即行文知之。○諭軍機大臣等。山東鹽當二商。每年解司銀兩。除賞捕公用外。剩至三四萬兩之數。即著該撫交與長蘆鹽政。令其奏聞請旨。可寄信與喀爾吉善知之。○賑貸安徽桐城。宣城。南陵。無為。廬江。鳳陽。壽州。鳳臺。臨淮。懷遠。建平。盱眙等十二州縣水災飢民。○準噶爾部人額勒伯

克夫婦來降。命賞給安插如例。是日駐蹕腰站村。○己亥。湖北巡撫晏斯盛疏報鶴峯長樂二縣開墾乾隆四年分水旱田地六頃五十畝有奇。○是日駐蹕蓮花套。○庚子。上詣

皇太后行幄問安。○諭。此次所撰祭文及繙譯清文。俱甚平常。董邦達。石介德。通俱著交部察議具奏。○又諭。巡察山東漕運。著御史張湄去。不必赴行在請訓。即往山東協同完顏偉辦理挑淺事務。○又諭。軍機大臣等。巡察山東漕運。有旨著張湄去。張湄或有事故。著改派李敏第前往。○又諭。軍機大臣等。前廣西提督譚行義欲將邊防一事。謗咎鄰省。奏稱三月內。雲南廣南府。儂土丞差目何淑等由粵境之怕懷隘前往交趾。至四月內。該目攜帶夷男婦女三百餘名。仍由粵歸滇等語。經軍機大臣議交雲南總督張允隨。分別查驗。并將辦理情形奏聞。今覽該督覆奏之摺。

俱不相符。是譚行義明係推卸巧飾。朕思滇粵兩省。皆逼近安南。值該國有事之時。正宜加意防範。若止知推卸已責。而不實力稽查。於邊防甚有關係。爾等可將張允隨原摺抄錄寄信楊錫紱。務須查明確實。詳慎辦理。使關防嚴密。不得推諉掩飾。貽誤地方。○戶部議覆閩浙總督那蘇圖覆奏。閩省鹽政應行酌改各款。查場員薪水銀二千八百六十兩。節據該督彙同各場役食等銀。於每年奏銷。造入長價錢水等冊內。報部查核在案。其蘊支羨餘等銀一千七百一十七兩。向無報部之案。今該督等既稱係從前在外准收。所有單開年得薪水蘊支羨餘等銀共四千五百七十七兩。應如所請。准照舊收取。以資辦公。又單開西河浦下二館事務甚繁。年給薪水實不敷用。請於裁減州縣規禮銀內撥湊銀二百兩。亦應如所請辦理。其單開王祥團歸公蘊支銀六十兩。應解貯道庫。以充公用。均

按年造入長價錢水等冊內。報部查核。至州縣各官。業已按照事務繁簡。給有養廉。何得於養廉外。又復議給鹽規。即各州縣中。或有原定養廉不敷。尚須酌給公費者。亦止應核查實屬不敷。州縣量給。未便任意概議加增。沉州縣於釐務原有考成。緝私追欠等項。本屬分內。何得以水客在其轄下。裁革規禮。恐其懷私歧視為詞。所有單開各州縣廳年收規禮銀一萬八十四兩。內除撥湊西河浦下二百兩准支外。其酌給各該州縣銀五千七百四十四兩。應令再行確查。如原定養廉已敷。則此項毋庸議給。若果不敷。必須酌給據實查明。分晰具題核議。其單開下剩充公銀四千一百四十兩。俟將酌給各州縣規禮查明具題之日。再議。至從前奏報水客致送規禮。有一千兩以外之處。該督既稱原係訪聞。今逐加核實。確係自二十四兩至七百餘兩不等。並無千兩以外。州縣等語。應毋庸議。又

稱哨丁向係在場於誠謹鄉民內募充並非
兵丁派撥專為巡查督曬緝私而設今請酌
汰一十七名其餘照舊存留應如所請從之
○賑貸奉天中路善岱協理通判所屬善岱
里安民召上李塑善岱等四村永種官地水
災飢民分別蠲緩新舊額賦○是日駐蹕撫
順城○辛丑謁

福陵如謁

永陵儀○詣

皇太后行幄問安○諭朕至盛京時著於二十
五日筵宴盛京將軍大臣宗室章京文武官
員及

三陵官員等至自京隨來之王大臣官員蒙古
王額駙台吉等俱著入宴盛京官員佐領員
外郎以上及年老休致之員亦著入宴其閑
散宗室覺羅主事防禦以下官員拜唐阿等
併護守

陵寢嫡舅外戚之子孫及耆老等俱著加恩晚

膳賜食○是日駐蹕顏台尼嚕村 壬寅
上詣

福陵行大饗禮如祭

永陵儀禮成即往謁

昭陵如謁

福陵儀○諭奉天將軍額爾圖著賞銀五千兩

副都統哲庫訥等著賞銀二千五百兩辦差

備用○是日駐蹕瓦子窰○癸卯

上詣

昭陵行大饗禮如祭

福陵儀○遣官祭

福陵

昭陵之

壽康太妃

宸妃

懿靖大貴妃

康惠淑妃並公主園寢其親王貝勒及大臣

等墓以次遣官往奠○諭朕親奠克勤郡王

等園寢。據禮部援引

皇祖聖祖親奠功臣墳墓之例。隨駕之皇子王等皆隨行禮。此次隨駕之皇子王貝勒等應隨行禮具奏。朕已降旨依議。但思從前隨駕之皇子王等皆係

皇祖子孫。是以均隨行禮。此次隨行之王貝勒內有朕之叔輩。或朕之兄弟輩。非從前隨駕之皇子王等可比。每祭酒時亦隨行禮似屬未便。朕親臨祭酒。功臣即為榮寵之至。克勤王園寢。王貝勒等仍隨往。功臣揚古利等墳墓不必隨往。此後朕之子孫若隨來。朕降旨遵行。再蒙古王額駙王大臣墳墓皆不必隨往。著令禮部記載。奉

皇太后入盛京。盛京文武官咸朝服跪迎。朝鮮國王李昫遣陪臣恭迎。表貢方物。侍

皇太后膳。諭朝鮮使臣入貢。係國王族人稱君者始召見。其餘祇賜宴於禮部。此定例也。朕明日宴諸王大臣官員於崇政殿。朝鮮使

臣亦著與宴。以外藩陪臣得廁朝臣之末。係朕格外殊恩。該部傳諭使臣知之。又諭據河南巡撫碩色奏稱。今歲河南被災。通省共有二十七處查辦賑務需用多人。著該部將候補州縣人員即送總理事務王大臣揀選十員。令其速往豫省。以資該撫差委。又諭河南今夏雨澤不齊。其查勘成災者。已據該撫題報。照例賑恤。聞開封府屬之陳留。滎陽。汜水。彰德府屬之湯陰。衛輝府屬之淇縣。延津。並陝州等七州縣雖不成災。然高阜之處收成究屬歉薄。朕念此等鄉農薄有收穫。僅足供三冬饔飧之計。若將應徵錢糧一體催收。未免拮据。著將此七州縣勘不成災之地畝錢糧緩至明年麥熟後徵收。以紓民力。該部即遵諭行。又諭盛京戶部莊頭每年交納糧石豫備

陵寢祭祀各項供應。外其餘交收入倉。以為撥給各處匠役口糧之用。今朕恭謁

祖陵親詣盛京軫念各莊頭終歲勤苦輸將無
誤著將乾隆八年分應交倉糧一萬餘石加
恩寬免其各處匠役口糧著於舊存倉糧內
撥給再各莊尚有乾隆七年分未完米豆草
束俱著該部查明一併豁免以示朕優恤旗
莊之至意○賞奉天府百歲老民湯務大緞
一疋彭緞二疋○戶部議准甘肅巡撫黃廷
桂疏請於寧夏縣添建倉廩十座從之○鑄
給廣西義寧協副將關防從署兩廣總督廣
州將軍策楞請也○是日駐蹕盛京至庚戌
皆如之○甲辰

上以恭謁

祖陵禮成率王大臣等詣

皇太后宮行慶賀禮○

御崇政殿受賀賜諸王文武大臣官員及朝鮮

國使臣宴

御大政殿賜盛京文武官員宴及父老醵

御製盛京筵宴世德舞辭并序曰乾隆八年秋

朕奉

皇太后恭謁

祖陵還至盛京受朝錫宴夫漢高過沛而歌大
風情至斯動直已陳德況予小子觀揚

光烈能無言之不足而長言之哉爰作世德舞
辭十章章八句辭曰粵昔造清匪人伊

天天女降思長白閨門是生我

祖我弗敢名迺繼迺承逮我元孫章一元孫累葉
維

祖之思我西云來我心東依歷茲故土仰溯始
謀皇澗過澗締此丕基章二於赫

太祖肇命興京哈達輝發數渝厥盟如龍田見
有虎風生戎甲十三王業以興章三爰度爰遷

拓此瀋陽方城周池

太室明堂不寧不靈匪居匪康事異放桀何心

底商章四丕承

太宗允揚前列倬彼松山明戈耀雪以寡敵衆
杵漂流血惜無故老為余詳說章五余來故邦

瞻仰

橋山。慰我追思。夢寐之間。崇政清寧。載啟南軒。

華而不侈。鞏哉孔安。章六惟我

祖宗。欽

天敬

神。執豕酌匏。咸秩無文。帷幔再張。樽俎重陳。弗

渝弗替。遵我

先民。章七

先民宅茲。載色載笑。今我來思。

聖日俯照。爵我周親。蓋臣並召。亦有嘉賓。歡言

同樂。章八懿茲東土。允惟天府。土厚水深。周原

膺膺。南陽父老。於是道古。有登其歌。有升其

舞。章九我歌既奏。我舞亦陳。故家遺俗。曷敢弗

因。渾灝淳休。被於無垠。勿替引之。告我後人

章十○頒詔天下。詔曰。溯源報本。彌深追遠之

情。陳瑞薦馨。式重謁

陵之典。我朝定鼎中原。統一方夏。重熙累洽。海

宇昇平。聲教覃敷。民物康阜。百年於茲矣。緬

維

聖

聖相承。肇基東土。

太祖高皇帝。

太宗文皇帝。誕膺景命。式擴鴻圖。遼海瀋陽。實

為龍興之地。朕纘承大統。夙夜孜孜。念

祖宗締構之艱難。思

列聖燕貽之綿永。盛京舊地。瞻望

橋山。敬考典章。肅申思慕。於乾隆八年秋。恭奉

皇太后祇謁

永陵。

福陵。

昭陵。大禮既成。留都是蒞。瞻

神丘之葱鬱。仰

祖德之靈長。爰沛德音。用頒湛惠。所有事宜。開

列於後。一。隨從王等紀錄一次。大臣官員及

奉天文武大臣官員俱加一級。一。隨從兵丁

及內務府執事人等俱賞一月錢糧。一。奉天

山海關文武大臣官員兵丁。

三陵守

陵官兵俱著加恩賞賚。總理行營王大臣速議請旨。一奉天居住之宗室覺羅及國戚子孫俱著加恩。總理行營王大臣速議請旨。一奉天府屬應徵乾隆九年分地丁銀兩著寬免。一奉天旗民男婦年七十以上者給與布一疋米五斗。八十以上者給與絹一疋米一石。九十以上者倍之。一凡試職官員俱准實授。一奉天府寧古塔黑龍江等處除十惡死罪不赦外。凡已結正未結正死罪俱著減等。其軍流徒杖等罪俱著寬釋。一奉天內務府莊頭所有積欠在乾隆七年前者俱著寬免。於戲謨烈顯承隆億年之泰運恩膏沾被協萬國之歡心。布告天下咸使聞知。○諭盛京所屬各城旗員州縣官員內有承追錢糧未完承緝不力及舛錯公事失察等件罰俸住俸停陞降級留任者朕此次巡幸伊等俱各

黽勉効力。所有罰俸住俸及停陞降級留任者俱著寬免給還俸祿悉行開復。

御書扁曰式表東藩賜朝鮮國王李昉。○乙巳上詣

文廟行禮。○幸講武臺大閱。○諭曰

祖宗陵寢關係重大故特派宗室恭代行禮爾等皆出

祖宗一人之子孫非

陵寢官員可比且又無別項應司之事凡事關

祭祀及行禮等處務當共矢誠敬以副朕之

孝思不可稍有怠忽至平居之時須無忘舊

習謹慎醇樸確守法度勿致肆意妄行再覺

羅等皆係派衍天潢各宜謹慎勉為善良爾

宗室覺羅等果能敬謹祭祀循分守常

祖宗在天之靈亦必錫福與爾等矣。○又諭所

有

三陵總管副總管掌關防等官均係特旨簡放之員職任雖屬不同皆司

祖宗祭祀之事。所關綦重。其於防守之處。務當親身不時巡查。至一切祭品。皆當敬謹詳察。務致潔淨。以副朕之孝思。○又諭盛京乃我朝肇基之地。人心樸實。風俗淳厚。朕此次恭謁

祖陵。巡幸至此。見其兵丁。漢仗俱好。行圍演武。均屬熟練整齊。至其淳樸舊俗。百餘年來。未嘗少失。朕甚嘉悅。國本攸關。最為緊要。將軍副都統等。不惟職司訓練。兼有清理地方。養育兵民之責。與他省武職不同。至五部大臣。事亦無多。其於地方兵民。以養以教之事。應一體維持。惠愛旗人。視同子弟。於淳樸舊習。尤當留意。務使經久不渝。著將此旨通行曉諭。務宜共相奮勉。以稱朕意。○又諭此次隨來兵丁。起身前俱已優賞製裝。沿途又將伊等所乘馬匹。屢經補換。但念路途較遠。出外日久。多需盤費。著將恩詔所賞一月錢糧。即在此賞給。以資接濟路費之用。○又諭朕此

次詣盛京。此處大臣。官員兵丁等。無不踴躍奮勉。朕雖加恩偏賞。又加賞格外當差之人。並將伊等借項展限坐扣。朕心仍以為歉。著再撥銀三萬兩。交將軍額爾圖。查明格外奮勉出力之人。分別等第。即行議奏。將軍大臣以下。總管以上。官員等共賞銀一萬兩。著將大臣官員等名單開列具奏。候朕閱單指賞。○又諭朝鮮世篤忠誠。謹遵軌物。今朕恭謁祖陵。因至盛京。特遣陪臣進表貢獻。具見惓忱。理合逾格加恩。以昭敬順。朕已手書扁額。頒賜。再應如何賞賚。著內務府議奏。尋議賜國王弓矢全副。貂皮百鞍。馬一紅粧緞龍襪。各四。大緞紡絲各五。正使粧緞一。緞四。襪。襪。鞍馬銀五十兩。書狀官緞二。襪。襪。銀四十兩。大通官三人。各中緞一。襪。襪。銀三十兩。押物官十五人。各緞一。銀二十兩。從人二十名。各銀五兩。從之。○又諭此次武備院。太僕寺。駝隻。除京城原領外。沿路添辦駝隻。著施恩免

賠。原領數內。若有倒斃者。仍照例賠償。○總理行營事務和碩莊親王允祿等議奏。欽奉恩詔。查明奉天。山海關及守護

三陵官員自將軍以下。文武等官。一千一百餘員。分別賞馬鞍。撒袋。腰刀。緞疋等物。兵役人等。二萬八千餘名。分別賞給銀布等物。詳擬清單進呈。得旨。將軍額爾圖。加賞蟒緞。千里眼。小刀。火藥。葫蘆。烘藥。葫蘆。火鏢。各一。大荷包一對。副都統哲庫訥等。加賞大緞各一。隨

圍協領六員。加賞大緞各一。佐領騎都尉二十八員。加賞官緞各一。防禦雲騎尉三十一員。加賞彭緞各一。驍騎校三十九員。加賞銀各四兩。隨圍兵一千名。虎鎗手五百名。隨往山海關兵三百名。牽駝兵一百四十名。隨營當差兵五百名。火班兵一百二十名。修理橋道兵二千三百名。臺兵一百名。豫備柴炭兵一千名。隨營番子二十名。俱加賞一月錢糧。護鎗防禦藍翎侍衛。每員加賞彭緞一疋。大

荷包一對。兵四百名。加賞一月錢糧。餘依議。○又議奏。欽奉恩詔。查明盛京之宗室內章京六員。休致章京二員。六品廕生一員。八品宗學副管二員。閒散宗室八十二名。覺羅長八名。閒散覺羅九十六名。紫帶子覺羅四名。外戚子孫內。防禦二員。有頂帶無俸人一百一員。兵丁一百八名。分別擬賞馬鞍。緞疋。銀兩。從之。○又議奏。

皇太后恭謁

陵寢執事命婦總管之妻以下。至香燈上人之妻。共三十餘人。遵旨分別賞給緞疋。銀兩。報聞。○又議奏。此次閱看盛京官兵。練備整齊。遵旨賞賚。請將協領十二員。賞給金牌各二。佐領騎都尉共四十員。各一。雲騎尉防禦共十八員。銀牌各三。驍騎校五十五員。各二。記名領催十名。兵五千名。各一。共需金牌六十四。銀牌五千一百七十四。從之。○丙午。孝慈高皇后忌辰。遣官祭。

福陵。

上親臨克勤郡王岳託武勲王楊古利墓前賜奠。

○遣官望祭

長白山。

北鎮醫巫閭山。

遼太祖陵。

御書盛京

文廟扁曰。先覺斯民。○諭從前盛京五部

司員。皆由本地人員補放。彼此交通。蒙混舞

弊。不得不嚴行整飭。是以將伊等調至京師。

其員缺。將京城部員調補。三年更換。今看來。

盛京官員。俱各勤勉。積習亦改。所有應陞之

缺。若俱將京城官員補放。有礙伊等陞途。嗣

後盛京司員。若半將本地應陞人員補用。半

由京城補放。則於部務有益。而本地人員陞

途亦無礙。將如何分給伊等額缺。如何陞用。

及現在官員調用之處。該部詳悉議奏。再盛

京五部向無漢員。後因有人條奏。以戶工二

部關係錢糧。刑部辦理刑名。是以添設盛京

五部事務較少。現在考取筆帖式。俱用繙譯

人員。辦理漢文事件。並無遺誤。所有添設漢

員。概行裁汰。將現在人員。令至京候缺。或留

任候缺之處。該部一併議奏。○丁未

上詣

清寧宮祭

神。詣

皇太后宮問安。○諭盛京為王化始基之地。自

昔人心淳厚。風俗敦龐。甲於天下。但旗民雜

處。恐無知之輩。尚存畛域之見。殊非一道同

風之盛。惟在該管大臣。董率有方。則兵民自

知觀感。府尹一官。為各屬地方有司之統領。

其所職掌。亦不甚繁。凡有旗民交涉事件。務

須與將軍等和衷商確。一秉虛公。則諸務自

能妥協。倘先存一為旗為民之見。則意見參

差。辦理錯誤。既失寅恭之義。何以端人心而

厚風俗乎。此於根本重地。甚有關係。故特降

旨訓諭該府尹霍備等知之。○戊申。
孝敬憲皇后忌辰。遣官祭

泰陵。○

上親臨宏毅公額亦都直義公費英東墓前賜奠。○諭常平等倉穀石。民間於春月青黃不接之時借領者。例應秋後加息還倉。朕曾降諭旨。若值歉收之歲。祇應完納正穀。不應令其加息。永著為例。後經部議。秋成八分以上者。徵收息穀。收成七分者。秋後止徵本穀。免其加息。但專指本年春借秋還者而言。其帶徵舊欠穀石。不在此例。今聞河南秋收。多有歉薄之處。若本息兼徵。民力未免難支。著將豫省帶徵乾隆七年以前。民借未還穀。四十萬四千餘石。止徵本穀。概准免息。俾輸將不致拮据。該部即遵諭行。○兵部等部議覆湖廣總督阿爾賽疏稱。城綏新疆。於長安五寨。設營分駐事宜。一。長安營新設遊擊一員。守備二員。分左右營。左營守備兼管中軍事。

經管兵馬錢糧。文案由遊擊核轉。千總三員。分左營左右哨各一員。右營右哨一員。把總四員。分兩營頭司二司各一員。外委千總二員。外委把總四員。兩營各馬兵四十五名。外委在內。操馬四十五匹。步兵九十名。守兵三百十五名。又理徭同知駐長安。設把總一員。列入右營右哨二司。馬兵十名。馬十匹。步兵二十名。守兵七十名。糧餉在長安營散給。弁兵聽該同知約束。文武會同考校。降革募補。廳員移營照案開收。一。長安各路塘汛橫嶺。崗之長安坪。地勢開拓。安設遊擊居中。左營左哨千總一員。頭司把總外委千把各一員。右營右哨頭司把總外委千把各一員。兩營兵丁各二百五十名。內應設大寨三郎。兩汛巖寨一塘。分防左營頭司把總一員。外委千總一員。兵六十名。俱屬左營存城千總專管。又設長塘一汛。地悶五川隘。二塘。分防右營外委千總一員。兵五十五名。俱屬右營存城

把總專管。長安營實存千把外委四員。兵三百八十五名。又廳標把總一員。兵一百名。共兵四百八十五名。一。長安左路之老寨。安設左營兼中軍守備一員。所隸風界一汛。蓑衣新寨兩塘。分防千總一員。兵五十五名。老寨左營實存把總外委二員。兵一百四十五名。一。長安右路之鎮彝哨。安設右營守備一員。所隸地靈都里二汛。界箐陡包三塘。分防千總一員。外委把總一員。兵九十名。鎮彝右營實存把總一員。兵一百十名。一。武岡營分防城步縣汛守備一員。把總二員。外委千總一員。外委把總二員。兵三百四十九名。又收該營撥防欄牛崗新寨汛。把總一員。兵三十五名。該縣新設安崗蜡里紅沙洲三汛。及原設之欄牛應聲巖二汛。應設獨樹馬鞍山雲霧嶺飛鳳祖毛坪五塘。及原設之太平正涼石井西巖洪水崗斜頭堡崗頭山扶城毛田漿坳頭木大坪塔洲等處。共十七塘。以上二十

二處。安設把總二員。外委三員。兵二百五十七名。俱於存城及減撤兵內派撥。其舊設寨頭一塘。應撤城步縣汛。實存守備一員。把總一員。兵一百二十七名。一。綏寧營原兵七百四十二名。今撥歸長安馬兵二十名。戰兵四十名。守兵一百四十名。其遊擊照舊駐黃桑坪。領中軍守備一員。千總二員。把總四員。外委千總一員。外委把總三員。兵五百四十二名。外委在內西路。應設臨口汛。移駐守備一員。帶把總一員。兵七十五名。硬頭安一塘。南路設涼山汛。分防外委把總一員。兵三十五名。六甲安一塘。東路原設界溪箐子隘一汛。照舊設把總一員。兵三十五名。赤板牛路坡各設一塘。又綏寧縣原駐千總一員。兵一百四十四名。今於楓門嶺設一汛。其小水黃石雙溪關破硤會哨高坪大凍蓮荷天堂樂安界排沖口老鋪九溪沖分水坳惡石坳蓑衣磨石鋪等塘。俱照舊安設兵丁名數。分別增

減外楓香地方應添一塘。此新舊一汛十九塘。安設外委把總一員。兵九十八名。俱在綏寧縣汛內派撥。又縣城東北原設錫坡哨一汛。分防把總一員。兵四十名。內大坳老哨。抱陽茅灣。禾木樹五塘。照舊安設。黑漆門樓地方。添門樓一汛。分防外委把總一員。兵二十五名。又臨口西南原設長安堡一汛。分防千總一員。兵五十名。內麻隆雙江塘。沖池蓮江口。芙蓉竹塘。路塘。岩坪。芙蓉江口堡。乾溪鋪十一塘。兵丁分別增減派撥。以上新舊各塘汛兵丁。俱在黃桑營內分汛防守。又黃桑坪地方。為綏寧縣藩籬。綏寧營遊擊仍駐該地存營。帶領把總一員。外委千總一員。兵一百三十名。其梨子坳。清水隘。地林哨。高村。四塘。照舊各安兵五名。於存營派撥。均歸存營把總管領。再該營原設大坳等六塘汛。俱應徹同各塘汛抽減兵丁。移增臨口等各塘汛。所有原防鎮彝把總。隨守備移駐臨口。平溪汛。

外委移涼山界駐劄。一將備官弁俸薪銀兩。照例以受劄之日開支。其燭炭心紅紙張馬乾等項。應於新營任事之日。分別支給。又營廳額設經制兵一千名。內除理徭同知護衛馬戰守兵一百名。原係添募所需餉乾等銀。應以入伍之日起。一體在司庫兵餉建曠及餘朋銀內。按季發給。其餘九百名。內抽撥鎮草綏寧鎮標營兵丁。按以馬一步二守七。共兵五百四十名。又抽撥永州鎮標守兵六十名。其額支糧餉。應以收充新伍及召募入伍之日。於新營開支。又提標馬兵一百三十四名。戰兵二百二十七名。改作守糧。永綏協馬兵三十二名。俱改戰餉。合計餘餉共銀四千八百三十兩有奇。移撥新營。飭募馬兵三十六名。戰兵七十二名。守兵一百九十二名。令將改撥名糧。遇有缺出。即行扣留。移撥新營募補。所遺馬。亦即變價移解。買補騎操。再營廳額兵。雖經先後召募。但須教演熟諳。現在

貼防弁兵。未便遽徹。應於本年秋季換班。概行收徹。各歸原伍。一。添設遊守各員。共抽支親丁馬糧十六分。戰糧四十一分。應於提標永綏。扣撥募兵內。照數扣給。一。添設各員。親丁隨馬一十七匹。於提標永綏。二標協扣留遺馬價內。照數扣價存營。俟需用時購買。一。額兵一千名。營伍公費。每百名抽支二名。共守糧八分。戰糧十二分。照數扣存公用。一。弁兵俸餉銀米。令理徭同知公同監放報核。一。

苗疆新設邊營。應照楚南十三鎮協營之例。添養餘丁三十名。歲需餉銀。在司庫地丁內支給。一。長安營遊擊。應鑄給關防。一。遊守各員。照邊俸之例。五年報滿。果能苗徭向化。營伍整飭。題請陞用。一。公文應添募鋪兵遞送。查城步縣南路。由馬鞍至沉江渡毛里。應聲巖風界。簑衣界。老寨欄頭。欄頭至長安營總鋪地。閭界。箐漿坳。頭門樓坳。江頭。應設十三鋪。共鋪司三十一名。又該縣原設之太平正

涼水東西巖及縣前總鋪共五處。應增鋪司五名。又綏寧縣南路。梨子坳。黃桑坪。赤板。簑子隘。牛路坡。五處。西南自原設之大凍鋪至多龍。駕馬中團。臨口司。硬頭鎮。彞哨。陡包。七處。東路之黃石鋪至陽武。藍溪口。青坡司。唐家坊。四處。合計新設十六塘鋪。共募鋪司三十二名。每名歲支工食銀六兩。在司庫地丁內支給。均應如所請。從之。○己酉。

上詣

清寧宮祭

神。○諭。據碩色奏稱。伊子光祿寺署正穆克德。因民人爭灘地一事。寄字與伊家奴。妄冀照應。請革職發審等語。朕思碩色因伊子干豫外事。據實叅奏。甚屬可嘉。此事尚在未行。碩色既能叅奏。自必嚴束其子。不致滋事。穆克德著革職。交與伊父收管。其餘人等亦著碩色自行辦理。就近外結。碩色著交部議敘。兵部奏原任兩淮運使盧見曾坐臺年滿。應

否更換。得旨。盧見曾准更換。到京時。該部帶領引見。○是月。戶部議覆。浙江布政使潘思渠奏稱。浙省每年省城滿漢旗營。乍浦滿營兵糧。共應買米四萬三千三百石。今各省採買俱停。若浙省獨委員採買。恐市價復貴。請將兵糧停買。即在現截漕糧十萬石內。照數劃撥。以備來年湊放。將應買米價。暫行貯庫。俟江楚等省。歲稔價平。照一米二穀。酌量買穀抵撥。其餘米五萬六千七百石。分別存貯。

令各該州縣於歲稔價平之後。陸續換穀貯備。得旨。依議速行。○直隸總督高斌奏。遵化寶坻。玉田。昌平。順義。東安。良鄉。霸州。固安。大興等處駐防。本年冬季。及來歲春季。併保定雄縣。二處駐防。來歲春季。共應需採買兵米一萬二千餘石。請照從前折中一兩之價。每石增銀三錢。得旨。准增給。○又奏。天津。河間。深冀等屬。俱於八月內。戶口查完之日。開賑先普賑一月。銀米各半。其極貧內之孤寡老

疾尤困苦者。計至十一月大賑前。俱按日續賑。全活甚多。從前外出流民。聞賑紛紛回籍。沿途資送。通計原題二十五州縣。續報之天津。大城。二縣。查明應賑極貧次貧口數。共約大小口一百八十九萬餘口。約共折大口一百五十八萬餘口。合普賑加賑月分。銀米兼賑。約共需米五十七萬五千餘石。銀八十六萬餘兩。除恩賞通倉米五十萬石。俱已領運分派各州縣外。又添撥各該處倉穀約十五

萬石。已足敷用。得旨。所奏俱悉。○署兩江總督尹繼善奏報。秋成情形。得旨。所奏俱悉。去年被災之後。賑恤不遺餘力。以其普而且重也。今年按例妥辦。亦所以息其望幸之心。使之務農勤作耳。然實在失所。則不可不思所以安輯之。卿其知此意焉。○漕運總督顧琮奏。海州接壤山東。民悍地濶。西南之大伊。房山等四處。為私梟出沒險要。其山子口。房山二汛。汛防單薄。臣將該營簡僻之橫溝。青伊。

二汛兵抽撥數名。並派千把等弁專汛駐劄。需量添兵房數間。其大伊山、龍溝三處亦應添兵房數間。俾官兵棲止。水旱兼防。得旨所辦俱妥。知道了。○江南河道總督白鍾山等奏。邳睢廳之柏家灣灘地。於九月十五日塌開三十餘丈。大溜自西而東。忽成引河一道。次日即寬至一百二十餘丈。水深一丈七八尺。大溜全歸新河。舊河漸次淤墊斷流。對岸三百餘丈之工埽。一旦化險為平。不但每年節省歲搶二修如許錢糧。且張工一帶地方。長慶奠定得旨。以手加額。欣慰覽之。○江蘇巡撫陳大受奏。海州、贛榆、沐陽三州縣疊遭荒歉。米價頗昂。賑恤口糧。請照上年折賑之案。每斗仍折銀一錢二分。其餘漂水、高淳等縣偏災。仍照定例。每斗折銀一錢。得旨著照所請行。該部知道。○安徽巡撫范琛奏。鳳陽、潁州二府民俗。食麥者十之二三。食秫秫者十之七八。稻米非所急需。災祲之餘。似應稍

為變通。現飭各屬按本年糶數。糶買秫秫等雜糧補倉。得旨是。妥協辦理可也。○又奏。嚴禁躡麴燒鍋私宰情形。得旨覽。不至擾民斯可矣。○閩浙總督那蘇圖。署福建巡撫周學健奏。漳泉福寧臺灣各府屬廳縣。六七等月。被風被水。并賑恤過漳浦縣災戶情形。得旨知道了。其應賑之人。加意撫恤之。○那蘇圖又奏。臺灣被旱。辦理賑恤。借給各情形。得旨所慮甚屬周到也。○又奏。閩省世職既多。奸徒冒濫日甚。現查出魏世忠、葉闢、宋騏三員。均係頂替。並非功臣子孫。飭司究審。題叅定擬。以後應徹底清查。如實係功臣子孫。毫無疑似者。循例錄用。其餘跡涉可疑。或年遠無稽者。寧缺勿濫。並准各世職自首免罪。得旨正當如是。卿其妥辦可也。○浙江巡撫常安奏。浙省海寧縣魚鱗塘工告成。查海塘自雍正十一年起至乾隆八年止。各案工程共用銀二百三十餘萬兩。支銷各款。現在清查其

歷年効力人七十五員。擬一并送部引見。聽候部議。得旨。知道了。○刑部侍郎署福建巡撫周學健奏。臺灣四縣一廳被旱。現飭查辦。分別賑恤。至臺郡常平積儲。通額穀五千七百餘石。尚有借糶未補之項。將來賑糶不敷。查有流存累年供粟二十七萬一千餘石。係應運交內地各府補倉。及碾給兵糧之項。臣已飭令暫停撥運。留為賑借及將來平糶之用。內地應碾給兵糧。俟明春需用時。酌量於

平糶奏三十一

三十一

撥給江浙漕糧二十萬石內供支。倘臺郡存穀尚不敷備用。亦於江浙漕糧二十萬石內酌撥數萬石運往接濟。得旨。是。諸凡妥協為之。○又奏。辦理編查保甲。以靖地方。閩省現有鹽場期滿候補人員。擬於大縣派委賢能者一員。責令專辦查點保甲一事。即於附省二縣先行試辦。俟辦理妥協。續委前往衝繁各州縣。其中簡地方。則寬以期限。務令該州縣親身逐處查點編造。通屬編查確實。製給

門牌懸掛。一切造冊製牌等費。在公項動給。得旨。好。妥為之。○福州將軍兼管閩海關事務新柱奏。福州駐防官學。請於出洋操賞項內。每年賞給官學生二百四十兩。以為每月考試。分別等次。酌賞之用。一年外考不入等者。斥革另補。該管之協領筆帖式等員。教導有成。容臣奏請議敘。怠玩徇私者。叅處。得旨。覽。此祇可汝設法鼓勵。議敘不可也。餘皆可。

平糶奏三十一

三十一

○福建漳州鎮總兵雷澤遠奏。漳泉雖民情頑悍。究因任事多疎。近與文員和衷妥辦。強橫頗覺收斂。從此撫綏與懲創兼施。習氣應可漸除。得旨。言何容易。實心化導。要之以久可也。○湖廣總督阿爾賽奏。襄陽接壤之鄖陽府。有地名賽武當者。僻在萬山之中。係鄖屬之鄖縣。房縣。及襄屬之均州。三處交界。該處白龍洞。山深林密。距城汎甚遠。西南落家川地方。西連房縣。北連均州。應於此處添設一汛。安外委一員。防兵八名。不時巡查。再於

適中之毛塔河地方。添設一汛。安兵四名。駐宿巡防。並令該外委兼顧查察。所有外委兵丁。於鄖陽協屬弁兵內酌撥。營房墩臺。飭地方官估建。得旨。知道了。○又奏截留漕米。請抵應買穀石。以一米二穀計算。可抵穀二十萬石。既省採買之繁。亦免添建倉廩。得旨。好。知道了。○山西巡撫劉於義奏。省北之大同朔平寧武三府。及忻代等州。收成豐稔。米價尚平。惟省南之平蒲解絳隰等府州。收成歉薄。米價不能平減。其被有偏災之聞喜等一十二州縣。現委員查勘另題。查平蒲解絳隰五屬。共存倉穀五十五萬三千餘石。今被偏災之州縣。或應賑恤。或應借糧。并來春借貸接濟。俱屬寬裕。得旨。所奏俱悉。○陝西固原提督李質粹奏。敬陳營伍情形。得旨。所奏俱悉。甘省武備。頗賴調停。須實心實力。大加整頓。方可。然又不可欲速也。勉之。○甘肅巡撫黃廷桂奏。寧夏府平羅縣四堆子地方。二十

二堡。因疊遭河患。棄置埂外。已屬廢土。自乾隆七八兩年以來。戶民自備工本物料。築隄開墾。漸次成熟。人民已有一千五百餘戶。熟地已有二三千頃。田廬莊舍。居然樂郊。臣現飭地方官確勘。分立疆界。定畝給照。其居民酌量每畝每年約輸租若干。歸之社倉。留為該地方水旱偏災之用。有收則令照數輸租。無收仍免。凡徵收出入。官司經理。立有準則。情願多捐者。亦聽其便。至人丁既衆。應立保甲。編排烟戶。一切戶婚田土爭訟。歸平羅縣管理。令該縣將戶口土田。另造一冊。名為埂外閒田。不在升科之內。此外再有可開者。聽民報官陸續墾種。給照輸租。有衝廢者。查明刪除。並於原給照內註明。其隄岸渠道。加築防護。悉聽民自理。官為稽查。得旨。所奏俱悉。○又奏請陞見。得旨。汝自到甘。諸事得中。實心之處。朕甚嘉悅。甫去三年。何必即來陞見耶。若有要緊事務。摺奏以聞。○又奏甘省地

處邊徼豐歉不常。查自乾隆元年至八年止。通省舊欠額徵。尚有未完糧六十九萬餘石。此內逋賦過多。及苦寒薄收處所。均已蒙恩分年帶徵。至民欠籽種口糧。亦尚有六十餘萬石。今值豐稔之歲。正小民急公完賦之時。但地方出產不齊。細糧有限。惟青稞大豆。處處兼種。雖色樣少遜小麥。實本地食用所需。且堪久貯。自應通融收貯。立定章程。應將本年額徵新糧。仍照奏准往例。每一石收大麥

實錄卷二百一

四三

二斗。其額徵舊欠。除原係豆糧一色徵收。及兼收青稞之處。毋庸變通外。其餘各屬舊欠。請每一石於大麥二斗外。以豆稞四斗兼收。再累年民欠籽種口糧。例應照原借色樣交倉。可否乘此豐年。併令不拘色樣兼收。後不為例。得旨甚妥甚善。應如此辦理者。○甘肅提督李繩武奏。本年停止採買。接濟兵糧。並墊補續添銀兩數目緣由。得旨。所奏俱悉。但甘省兵丁。經歷年師征之後。當加意撫恤之。

而又不可令其驕縱。此為汝任內第一要務。而汝迴任後年餘。並未奏及。非朕所望於汝也。○總理青海夷情事務副都統宗室莽古賚奏。報出口會盟日期得旨。知道了。準噶爾經過情形如何。並汝如何料理之處。何不奏及耶。豈伊所過之地。與汝所轄之處無涉乎。○廣西巡撫楊錫紱奏。盤獲凌雲莫氏族內。自交趾逃回之梁點痘一犯。訊明現在安南。滋擾之莫氏姓名。並於該犯衣中搜出莫保

實錄卷二百一

四二

在交寄來約其家屬莫造莫誇書札二封。則泗城莫氏。其為莫登庸後裔。似屬實情。現在查辦防範緣由。得旨。汝所辦交趾邊情。祇此一事可嘉耳。更應上緊查察。而不可存歸案完結之念。○雲南總督兼管巡撫事務張允隨奏。昭通東川兩府收成歉薄。米價昂貴。現於銅息項下。動銀二萬兩。發駐劄四川永寧。轉運京銅之同知。於川東一帶買米一萬石。於明春水長前運回滇省。以多半運至永善。

縣之黃草坪。以少半運至大關鹽井渡轉運。以備平糶。其回空船。又可試運京銅。臣以新疆重地。未便拘泥停止採買之例。是以一面動項赴買。一面奏明。得旨甚是之舉。知道了。

實錄卷二百一

四十二

大清高宗法天隆運至誠先覺體元立極敷文奮武孝慈神聖純皇帝實錄卷之二百一

大清高宗法天隆運至誠先覺體元立極敷文奮武孝慈神聖純皇帝實錄卷之二百二

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆八年癸亥冬十月庚戌朔享

實錄卷二百一

十

太廟遣履親王允禔恭代行禮○遣官祭

永陵

福陵

昭陵

昭西陵

孝陵

孝東陵

景陵

泰陵○頒乾隆九年時憲書○順天府行鄉飲

酒禮○

上御大政殿奉天將軍額爾圖恭進筵宴賜隨從王大臣等宴於鳳凰樓前○諭王公宗室等爾等得與朕在清寧宮內祭祀皆

祖宗所賜之福亦係滿洲之舊例也今觀滿洲舊例漸至廢弛且如怡親王弘曉不佩小刀是何道理朕敬閱

實錄內載

皇祖太宗諭曰今宗室之子弟食肉不能自割行走不佩箭袋有失滿洲舊俗後之子孫何所底止是

太宗當時教訓諸子早念及後之子孫遺棄舊俗矣況怡賢親王昔時恪守制度爾等之所共知弘曉縱不顧

祖宗成憲獨不念及乃父乎至圍場之暇朕嘗射鵠連中多矢而與王等較射時往往不中者非故讓也因見爾等之射不嫌於中故耳此次除莊親王外其餘王等皆不能手格一

獸由不自奮勉習學所致乃反以為從朕遠行致罹罪戾又如朕食肉未畢而誠親王和親王便放筵匙默坐惟達爾漢王俟朕食畢始放筵匙方見遵循舊習且滿洲蒙古漢人皆有一定之理即以漢人文學而論朕所學所知即在通儒未肯多讓此漢人所共知者亦由朕於書文勤加披覽不染委靡之習故耳爾等皆係

太祖

太宗一派子孫乃至如此朕心深為愧惕嗣後爾等宜以朕今日教導之言常如

祖宗在天之靈親臨告誡革除陋習恪守舊章以仰荷

祖宗眷佑於奕禩可不勉乎可不慎乎將此通諭在京王公宗室等知之○又諭朕恭謁祖陵巡幸盛京所有奉天府屬錢糧及各莊頭糧石俱已豁免尚有盛京等處旗地未得霑恩著將盛京興京遼陽牛莊蓋州熊岳復州

金州岫巖鳳凰城開原錦州寧遠廣寧義州等十五處旗地應納本年豆米草束免徵一半。其乾隆七年以前積欠與七年分因災緩徵之項俱著該部查明一併寬免。再盛京尚惟邦耿化祚名下壯丁應交本年丁米及上年緩徵米石亦著一例免其輸納。俾旗民一體邀恩。普霑惠澤。該部即遵諭行。○又諭此次盛京革職降級官員共知奮免當差。此內有情節較輕之原任協領何顏青伊都著補用防禦。原任佐領王林著補用驍騎校。原任防禦佛壽著充領催。原任主事富爾遜仍補用主事。原任佐領降三級調用之哈薩爾著降二級調用。原任贊禮郎降二級調用之珠隆阿著降一級調用。○是日駐蹕盛京。

御製盛京賦并序曰。嘗聞以父母之心為心者。天下無不友之兄弟。以祖宗之心為心者。天下無不睦之族人。以天地之心為心者。天下無不愛之民物。斯言也。人盡宜勉。而所繫於

為人君者尤重。然三語之中。又惟以祖宗之心為心。居其要焉。蓋以祖宗之心為心。則必思開創之維艱。知守成之不易。兢兢業業。畏天愛人。於是刑兄弟而御家邦。斯以父母之心為心也。民同胞而物吾與。斯以天地之心為心也。孔子曰。明乎郊社之禮。禘嘗之義。治國其如示諸掌乎。宗廟禘嘗之典。固先王繼志述事之大經也。然自聖人象大過肇封樹以來。上陵之制。漢代已然。我國家肇興盛京。

邠岐之地。橋山在焉。昔

皇祖六十一年之間。三謁

丹陵。用展孝敬。

皇考在位。百度維新。日不暇給。適西鄙有事。徵役已勞。又

藩邸時曾奉

皇祖命。往謁

祖陵。是以十有三年中。未舉是典。予小子繼承丕基。懼德弗嗣。深惟

祖宗締構之勤。日有孜孜。敬奉神器。言念盛京。為天作之基。

永陵。

福陵。

昭陵巍然在望。不躬親祀事。其奚以攄懇忱而示來許。爰以乾隆癸亥秋。恭奉

皇太后發軔京師。屆我陪都。孝思以申。

祖武是仰。因周覽山川之渾厚。民物之樸淳。穀土之沃肥。百昌之繁廡。洵乎天府之國。興王

之會也。昔幽居相度。召頌公劉。岐宅作屏。周歌太王。莫不於

上帝之監觀。下民之君宗。三致意焉。故物以賦顯。事以頌宣。既見於斯。豈默於言乎。遂作賦曰。歲大淵獻。時旦柳中。協律無射。辨方庚辛。歷吉日以建旗。駕應龍之銖鸞。紛離虬。挺蛇。旌雄虹。撞鳴鳶。周乎神皋之壤。屆乎箕尾之躔。循我留都。殺裡珠丘。懷精氣。仰

德流。既備既申。迺御黼座。而覲臣寮。維締造之

彌艱。撫草創之鴻圖。曰於休哉。是蓋突載毫之子殷。躡宅鎬之姬周。憑虛致譏於東約。安處薦誚於西踰。下此離為十二之國。合為六七之侯。昂立瓜分者。蓋瑣纖旁魄。不足以殫攄。而孟堅平子。太沖者倫。方且艷陳嶠。函隴。抵之隘。鹽池墨井之腴。矜詣天梁之麗。三條五劇之區。極鋪張以詭辨。彼何辭迺稱諸。奚俾夫天作之皇宅。又何藉葦宏與魏舒。於是諮文獻。考圖冊。不慝不文。爰賦其畧。聚精構思。挂一漏百。粵我清初。肇長白山。扶輿所鍾。不顯不靈。周八十里。潭曰閨門。鴨綠混同。愛渾。三江出焉。

帝女天妹。朱果是吞。爰生

聖子。

帝用錫以姓曰覺羅。而徽其稱曰愛新。是剪是除。匪安匪康。乃有葉赫輝發。界藩撫順。遂築城於遼陽。以為東國之宗。

天篤其祐。載恢厥功。天命十年。相險宅中。謂瀋陽為王氣所聚。乃建盛京。而附關西。故言其封域。則雖始自秦漢。歷隋唐。以迄遼金。歟。而舉其規模。則維新。

皇運膺靈佑之獨深也。仰符十度之尾。實臨析木之津。得雲漢之所垂。維北極之所鄰。亦何異乎召伯相宅。卜惟洛食。奉春建策。留侯演成哉。於是乎左挾朝鮮。右據山海。北屏白山。南帶遼水。滄溟為地。澎湃為流。湯湯赴瀾。灋灋洶。迴渾漾。浴日沃星。莫測其始。東盡使犬之部。朔連牧羊之鄙。啟我漠惠之原。擴我俄朶之址。高燥埤溼。原田每每。走大野而拱太室者。萬有餘里。其山則鐵嶺繡嶺。平頂降龍木查石門。東水南雙。矗岵岵。聚葱茏。嵒兮岩崩。嵌兮嶮峒。崩兮巖嶂。律兮塘翁。蔽虧日月。源流湖江。既孕奇而盤鬱。亦含秀而隆崇。故夫四蹄雙羽之族。長林豐草之衆。無不博產乎其中。蹄類則虎豹熊羆。野馬野驪。鹿

麋麇麀。狼豺封駝。狐狸獾貉。跳兔婆娑。鼪鼯
艾虎。貂鼠輕嘉。其他牛馬羊豕之資。以日用
者。蓋填閭巷而烝寢訛。羽類則野雞沙雞。鵝
鴨青鶩。鸛鶴禿鶩。維鶩在梁。縮脖鳩燕。啄木
鵲。鵲鷹鵲鵲。紅牙商倉。黃鸝鼠化。白鴈霜
橫。曰海東青。出黑龍江。林擊則天鵝。禡魄。旬
搏則窟兔走僵。其他鴿雀銅嘴。桃蟲鴛鴦。雜
沓紛泊。騰軼翱翔。其草則蒿艾香蒲。蘆葦蕭
荻。章茅水葱。紅藍綬鷗。馬蘭。知時。木槿。紀節。
厥惟人葆。三桮五葉。氣稟地靈。功符陰陽。商
陸茵陳。篇蓄亭蔭。蠡實兔絲。均能已疾。其林
則五針之松。萬年之柏。重障隱天。幽林蔽澤。
挺崇槐之曾青。蔭柜柳之濃碧。大椿以八千
為春。壽櫟以不材為德。爛紅杏與緋桃。紛白
棟與黃蘗。山藤柔韌。是資鞭策。雞桑落黃。可
供蠶織。陸珍既收。海錯亦繁。鯉魴鱒鰕。鰻鯽
鱖鮓。鰱魚鱧魚。鮓鮓鮓。比目分合。重唇浮
湛。劒飾鮫翅。柳炙細鱗。牛魚之長丈計。帶魚

之白韋編。烏鰂之鬚黏石。渡父之喙斫船。他如蛇馬驢狗。豚獺豹獾。出沒乎洶涌。潛躍乎游淵。蒼龍捷鬣而雲作。赤螭掉尾而波開。老蚌含珠。九光燭天。神奇是韞。瓌瓌是生。雖山經與地志。羌莫得而詳焉。懿茲奧區。原隰昀昀。厥田上中。厥壤惟平。抱海負蓋。跨遠欲宣。渾河為帶。興京為襟。袤復陸而坦坦。橫拓落而芸芸。偉嘉禎之萃薈。信橐籥之絪縕。

帝眷東顧。用畀皇清。而為萬載之沛豐。若其測

圭臬。度廣輪。依繩尺。疏渠川。歌經始。詠攸寧。又可畧聞矣。天命天聰。丕顯丕繼。因其舊藩。拓我新制。規天矩地。嚮明授時。增八門之誅蕩。脅九遠之邇迤。翼翼俾倪。峇峇堞堆。起

園丘於郊南。單墀垣之潔祕。欽柴颺榑。陳玉薦幣。鼓雲和。升繭粟。以邀盱眙。而昭祀事。霜露在履。春秋聿遷。愾乎優乎。肇裡閔宮。滌濯毛魚。元酒太羹。

文祖

神宗爰歆於斯。符帝車之太乙。正王宮於未央。重三殿之實枚。表雙闕於闔閭。闕名維何。文德武功。殿名維何。崇政建中。高樓望氛。厥題鳳凰。後宮紫極。交泰清寧。闕雖麟趾。化洽家邦。維樸而安。乃鞏而臧。豈其工槐檻之刻鏤。豈其飾椽橈之焜煌。豈其疏龍首之裊業。豈其叛鳳翼之昂藏。匪有心於儉約。乃潛揆夫陶唐。大政當陽。十亭雁行。爰諏爰度。日贊日襄。吉君臣之一德。而擴我闡於八荒。正號紀元。以受天慶。於是定兩翼之位。列八旗之方。黃白紅藍。有正有鑲。法其象於河鼓。則其數於義經。神其變於三五。握其奇於九宮。大聖創制。動協天象。是猶易之書契。乃觀蹄迹焉。樹以屏翰。馭輕居重。本支百世。昌我宗潢。佐命之勲。曰費英東。額都希福。績茂蕭張。曰有坐謀。曰有折衝。既彬彬而濟濟。亦赳赳而彭彭。其餘附鳳而攀龍者。蓋車載與斗量。爰制國書。聿興文教。演義譯音。物取其肖。允維

大海克稱檢校。雖絕域其必通。即織故其亦貌。若夫人自為戰。王者無敵。角嚴則百埔失。憑旌揮則三邊定。檄義不返顧。勇不重壁。是以牧四海而莫撓。亘千古而鮮匹。故班錄於累世。用以酬夫勞績。及其斗杓北指。涉冬背秋。爰狩中原。我戎是修。靡虹采。梟蛇旂。拖霧纛。建雲旂。後屬車。前導游。乘我良產。屏彼彫輶。右忘歸之箭勁。左繁弱之弓柔。倩洌而雷動。鴻網而星流。又何必王良執轡。織阿御轡也哉。於是帶甲之士百萬。盡發鷹犬而驟驂。騶卑泰山之為櫓。跨渤海以張罟。林林裔裔。列列裒裒。命地而後中。應聲而先掊。散埜麋之羣友。剔穴狸之伏留。駭獻麋之儵俟。警郊兔之佻偷。既肩情指倦。而麋麋之羣。猶緣陵蔽野。比夏草之稠焉。爰用三驅。示無盡劉。更命羽林。欣飛之士。手豹尾。踞虎頭。搏洞熊。殲澤縷。觀壯夫之鶴躍。快猛獸之軀縷。乃獻我成禽。舍彼踐毛。擇其上殺。允惟左膘。以奉宗

廟。乾豆亨炮。次充賓客。乃薦君庖。班獲行賞。訖乎輿條。是蓋因天地之利。習軍旅之勞。戰則克而祭受福。古者蒐苗獮狩之禮。所為昭詎其害三時之土穀。奪百姓之腴膏。蹂桑柘之地。廣虞獵之郊。如子虛上林之所嘲也哉。將將蕃后。夔夔列君。奉贄來朝。齊邀侍宸。或稽首而請聘。或傾心而納姻。於是樂以九奏。饗以八珍。邁呼韓之朝天。踰頡利之舞庭。合內外為一家。自我

祖而已然。垌牧之宜。曰大凌河。亘肥壤之博衍。茁靈草之敷披。夏蚊避境。春泉漾波。是以駒駟之牡。蕃孳孔多。爾其驪驕騅駟。騂騂駘駘。致遠之有賴。亦揚威之無過。畿甸既闢。農桑是咨。爰飭田畯。爰勵甸師。物早晚之種。辨高下之宜。男則耕耘是務。女則織紉是謀。抑工賈之末業。勤衣食之本圖。故深耕易耨。穀用滋也。九夏三耘。免汙萊也。雨我公田。遂及私

也。序我錢鏹。銓艾時也。我簋斯盛。實佳粢也。我倉如陵。庾如坻也。服尚布棉。奚織美也。器用陶匏。戒奢靡也。土物是愛。神降嘉生。黍維秬秠。稻維糯粳。粟維糜芑。粱維赤黃。解蠡胡麻。來牟鈴鐺。蘇分紫赤。豆有豌豆。蔬則芸薹。薤蒜蘿蔔。韭葱萋蒿。蒲筍紫堇。茴香壺盧。蔓菁。萵苣葵蘆。鮮不旆旆。穰穰。嗷嗷。驛驛。厭厭。絲絲。穰穰。惟脈土之獨純。斯穡事之孔良。農隙教戰。守禦相望。國以殷富。兵以威彊。

鬱葱佳氣。盤礴無垠。民風噩噩。伋伋自然。休有

烈光。格於

皇天。

上帝其子之。維有歷年。是以我

世祖。因人心之歸清。順天意之厭明。掃驅除之閭位。統子弟之精兵。無亡矢遺鏃之費。而膺圖正位乎燕京。蓋嘗考千古之興替。稽百代之歷數。拒符瑞之難謀。信仁義之堪守。斥逐

鹿之蠱說。審神器之有授。乃知

帝命不時。眷清孔厚也。不有開之。何以培之。不有作之。何以得之。夫其披荆棘。冒氛霾。歷艱辛。躬利害。無嬗代之迹。而受車書之來者。蓋書所謂于湯有光。詩所謂民之攸歸矣。皇矣陪都。實惟帝鄉。乃命秉鉞之帥。乃置五部之卿。民安郡縣。旗樂屯莊。春秋耕斂。我倉我箱。朝會朔望。躋躋蹒蹒。昭萬年之有道。卜百世之靈長。乃作頌曰。於鑠盛京。維藩之陽。大山廣川。作觀萬方。虎踞龍蟠。紫縣浩穰。爰浚周池。爰築長墉。法天則地。陽耀陰藏。貨別隧分。旗亭五重。神基崇峻。帝系繇昌。周曰邠岐。漢惟豐沛。白水慶善。興王之會。長白隆降。滄溟濊濊。形勝之選。奕世永賴。俯臨區夏。襟控中外。休養百年。既豐而泰。溯其始謀。繼序敢懈。昔我聖祖。三至斯土。琴麗六飛。森沉萬旅。孔碩九重。不遑安處。祇謁

山陵亦臨朝。寧。置酒故宮。用酬父老。乃霽恩施。逮乎編戶。匪勤於巡。良慕乎古。閔予弗德。實續丕基。歲時。

太廟。陟降格思。緬仰。

鼎湖。惟瞻惟依。荷。

天之龍。際時之和。駕言徂東。絡繹羽儀。風舉雲搖。鱗萃魚麗。我賓我臣。我行是隨。載至神鄉。載觀。

園寢。靈鬱崇輝。祥凝巨瀋。原廟衣冠。霸陵余枕。

松柏雲縵。溪池流淦。盪滌洪爐。陶甄羣品。石。

馬悲風。淚泉霑衽。豈必羹牆。一氣是稟。聿造。

故宮。故宮赫赫。聿升太階。太階奕奕。無彩之。

飾。惟厚之積。皓曜靦照。歛赭烏赤。左城右平。

坤闔乾闢。土壁葛燈。遐哉儉德。詒我孫謀。萬。

年之宅。乃開南端。設席肆筵。爰爵周親。及彼。

鴛鴦。南陽故舊。洒如言言。惟此嘉師。

列祖之臣。是噢是咻。是貽我躬。敬之敬之。翼翼。

惴惴。於億萬歲。皇圖永綿。○辛亥。

上恭奉

皇太后自盛京迴鑾。○詣

皇太后行幄問安。○貴州總督兼管巡撫事張

廣泗疏報平越都勻思州銅仁大定等五府

及遵義廳開州鎮寧普安黃平威寧等五州

普安甕安清平荔波鎮遠施秉婺川玉屏桐

梓綏陽仁懷等十一縣乾隆七年分報墾額

內田二千二百五十畝有奇。額外田五千四百

畝有奇。○是日駐蹕板橋鋪。○壬子。禮部以謁

陵禮成。奏請行慶賀禮。得旨。禮部殊不知禮。當

日

皇祖祇躬謁

祖陵。朕此次係奉

皇太后恭謁。何以部臣祇為朕稱賀。況每年元

旦冬至皆有慶賀

皇太后表文。豈不知遵循耶。此本發還。著另改

具題。○河南巡撫碩色奏豫省倉糧匱缺。儲

備虛懸。通省計存倉糧僅一百五萬有奇。本

年祥符等縣。偶被偏災。各邑倉儲。即已不敷。動賑現在。又需賑卹。若再停買數年。必至積貯全空。今歲彰德。南陽。歸陳。光許。一帶均尚。有秋。應即酌量採買。又恐糧價漸昂。有妨民食。請將運江未補穀三十三萬餘石。上年永城等州縣賑穀九萬餘石。及平糶常平積穀一十六萬八千餘石內。有被災州縣應買一萬八千五百餘石。又平糶漕穀四萬五百餘石內。有被災州縣應買七千六百餘石。俱緩

俟來年麥熟。買補。其餘平糶常平積穀一十四萬九千五百餘石。漕穀三萬二千九百餘石。社穀二千六百餘石。及撥協永城等縣賑穀三萬六千石。又乾隆六年買補賑穀案內。未買四萬二千餘石。俱乘此新穀出糶之候。公平採買。得旨允行。○是日。駐蹕珠爾呼珠。○癸丑。

上詣

皇太后行幄問安。○戶部議覆廣州將軍署總

督策楞等奏。稱前截留江西漕糧十萬石。運往廣東。中經灘河大嶺。輓運維艱。請改於湖南撥運。查湖南一水可達廣東。撥運腳價。自較節省。但楚省倉儲。亦關緊要。應請即將江西應運粵東米石。運送湖南。而湖南運至粵東。兩省均歸實貯。得旨允行。○是日。駐蹕曹家屯。○甲寅。

上詣

皇太后行幄問安。○諭朕登極詔內。四品以上

官員。例得恩廕。刑部尚書張照。因彼時緣事。未與今特加恩。著照伊品級。補行給與恩廕。○又諭。所有奉天居住之舅氏兩姨之子孫。向補放章京職銜。昨朕施恩。增廣其額。因思此項章京職銜。均係來京引見補放。惟路途遙遠。往返跋涉。資斧維艱。嗣後不必來京引見。著該將軍於年終。指名奏聞補授。○是日。駐蹕二道營。○乙卯。

上行圍。○諭前據廣西巡撫楊錫紱奏。稱拏獲

在安南附逆為匪之黃漢周道南亞項等犯奸宄兇悍反覆無常已飭府羈禁俟再有拏獲漢奸一併從重擬議等語朕硃批此等即應重處以示警何必令其輾轉偷生耶今楊錫紱又奏稱已行令鎮安泗城二府將黃漢周道南亞項三犯即提出當衆杖斃朕覽之不勝駭異朕從前批示蓋因向來獲罪人犯知罪無可逭往往扳引多人使案情不結以圖延緩偷生楊錫紱前奏有再拏獲漢奸一併擬議之語似有任其輾轉延案之意是以批示即應重處所以令其速審具題明正典刑以彰國法也乃楊錫紱錯會朕旨竟將黃漢等三犯立斃杖下夫黃漢等三犯均屬應死之人楊錫紱尚未至於誤殺三命然亦應明正其罪設使以不應死之人亦如是誤會則死者不可復生矣楊錫紱此舉實屬純繆之至著交部嚴察議奏又諭軍機大臣等昨日行在戶部議覆策楞王安國摺奏存貯

廣東之米令湖南運往存貯湖南之米令江西運往已降旨允行矣在京大學士尚未知之陳宏謀本內照例擬簽可將此本改寫已有旨了票簽批發并寄信與在京大學士等知之議政王大臣等議覆署兩廣總督策楞奏稱粵西南境地接交夷土苗錯處各邊封禁隘口時有夷匪漢奸潛出竄入屢經設法查禁而奸民出入如故蓋因商民出口貿易并傭工覓食俱樂隘口出入近便又多娶有番婦留戀往來是以偷度不能禁止此等流落番境住家者皆係遊蕩匪民在內既無稽查在外又不能約束聚眾既多於安南苗疆均有大害安南列在藩服不敢設險自固又未奉有驅逐解回之令是以容留商販娶婦住家今該國亦屢被流棍侵凌應請特降勅旨諭該國王恤其屢被漢奸之擾赦其從前容留之非俟秋深瘴消督撫遴委文武大員督同該國陪臣夷目在於交界處所將嗣

後民人出入作何稽查商販到夷在何處交易私行出口及無故逗遛者作何縛送解回現在番境之民作何立限進口私娶番婦永遠禁止詳議規條以期永靖應如所請從之

江蘇巡撫陳大受奏海州沐陽贛榆三州縣疊被荒歉米價頗昂現在賑卹口糧若照例每米一斗折銀一錢不敷買食請照上年折賑之案每斗仍折銀一錢二分得旨允行○定邊左副將軍額駙策凌等奏乾隆二年

奏准烏里雅蘇台歲於夏秋二季遣員出哨自阿勒台以下至察罕託輝塔爾琿扎克賽吹安和碩等處分路偵探若無事則於所至之地埋記木為信至明年出哨則將新記木換出舊者回報今年屆期據總理烏里雅蘇台等處叅贊大臣副都統等報稱巡哨中路庫烈圖之頭等侍衛博勒赫恩車副台吉孟烏等於塔爾琿扎克賽等處偵探俱極寧謐換取舊記木還卡唯巡哨南路布拉漢之三

等侍衛鄂奇圖副台吉喇嘛扎布於八月十一日出喀勒展和碩邊卡駐於玻敦齊地方喇嘛扎布同副都統達錫帶兵五十名前往偵探於八月十四日見一馬跡即隨跡探去於次日黎明拏獲呼達雅爾等十人據供準噶爾已派巴圖孟柯端多布分兵三千於察罕郭勒等處設卡駐劄將十人分設於此等語又詢爾卡原設於索約勒圖喀勒塔爾等處何故又移於此據供因

天朝准我等熬茶國人向東而逃者不知凡幾故於各處設卡並無防範

天朝之意且遵噶爾丹策零示如遇天朝哨探人員必應措辭遜順並呈禮物等語喇嘛扎布等以此地不可久留俱令仍回原處賞給磚茶一方烟一裹呼達雅爾等皆摘取耳環呈送以為禮物臣以準噶爾分兵三千駐於察罕郭勒宜嚴加防範即遣鄂奇圖同達錫率官兵復行出哨過九月再回并劄

令中路博勒赫恩車一體防範得旨知道了
喇嘛扎布達錫等所處妥善可酌量獎賞
是日駐蹕羊腸河○丙辰

上詣

皇太后行幄問安○頒

御書醫巫閭山

北鎮廟乾始坤樞扁額○是日駐蹕興隆店

丁巳吏部議准兵部咨稱正白旗滿洲原
任佐領威赫納前在委署叅領任內屢經得

過各等功牌應照例授為雲騎尉從之戶

部議覆漕運總督顧琮議奏漕船變通事宜

一漕船當大造之年遇有減歇請將減歇之

船停造一年則與先運之船年限參差將來

可無需同年配造如湖北額漕十三萬石有

奇原需船一百五十九隻現奉旨截留十萬

石於本省其應運京漕糧僅三萬餘石內應

減存九十餘隻應即俟明歲配造一賠造之

船多因原船已出若干運現止須補出若干

運是以造船多未堅固請嗣後將賠造之船
接算原船已滿十運再能多出二運者准其
將船在通變賣一滿號之船無論堅固與否
向俱分年抽造其中有實在堅固可以加修
者交總漕慎加選擇令加修出運一次准其
留通變賣均應如所請行從之○工部等部
議覆陞任雲南巡撫張允隨疏稱安寧州界
內有無水荒瘠田地一萬三千餘畝若於高
處築壩開渠引水灌溉即可盡變膏腴今勘
得西界施家莊南界多衣者耳木村北界古
浪河松坪下溝九龍潭口共應建石壩六座
請即借項起建於乾隆八年起分限二年催
收還項其餘各處渠壩一併興修至荒地內
有原係旱田舊定徵額者於改成後照向定
科則徵收其未經開墾者俟六年後查明田
畝定則起科均應如所請從之又議覆署
川陝總督馬爾泰疏稱哈密大城內應築貯
糧護牆一百三十餘丈請動項建築其小倉

南面兵房二十間並請拆毀應如所請從之
賑貸河南中牟河陰新安羅山長葛伊陽
等六縣續報被旱災民 賑卹長蘆興國富
國豐財嚴鎮海豐等五場及滄州鹽山慶雲
海豐青縣南皮衡水東光等八州縣旱災竈
戶蠲免額徵○調直隸按察使翁藻為江西
按察使以清河道方觀承為直隸按察使○
以直隸宣化鎮總兵丁士傑為貴州提督通州協
副將蕭良金為宣化鎮總兵○以四川故母
朱土百戶阿拉烏金之子阿革甲布亞疊土
百戶騷大之子索朗襲職○是日駐蹕王山
鋪翌日如之○戊午賜隨從王大臣官員兵
丁等飯○已未

上詣

皇太后行幄問安○戶部議覆綏遠城建威將
軍補熙奏稱駐防協領以下人員如遇降革
留任即將伊等親丁名糧分內支給之項照
俸銀例裁革則其家口不能養贍當差行圍

訓練兵丁亦俱無力行走請將晉省駐防旗
員如遇有降革留任者除俸銀停給外其任
內應支養贍口糧馬匹草料均免其停支應
如所請並通行各省駐防一體遵行從之

理藩院議奏歸化城都統噶爾璽咨稱歸化
城添設土默特兵一千名操演烏鎗三百桿
所有今秋明春火藥已派員赴太原等處採
買但現在學習進步連環雖能合式然演放
火鎗不裝鉛子究恐不準請於明歲春季為
始每歲按春秋二季操演每季用鉛子六次
每次每鎗用鉛子六枚凡三百桿二季應用
鉛子二萬一千六百枚每鉛子重三錢共需
鉛四百五觔派員赴京採買由部支領口票
等語查歸化城係西北兩路軍營要路雍正
十一年揀選土默特兵一千名駐防該處節
經議定烏鎗三百桿自應如所請辦理仍行
令該都統將價銀造冊報部年終覈奏從之
○分別賑貸山西曲沃解州安邑夏縣平陸

芮城絳州絳縣聞喜稷山河津大寧等十二州縣被旱災民並蠲緩本年額賦有差○緩山東臨邑縣被霜災民新舊額徵又蠲長蘆永利富國濤維等三場及海豐縣民佃竈地被旱災戶本年額徵各加賑卹○以廣西故東蘭土州同韋朝佐之子韋振聲襲職○是日駐蹕雙楊店○庚申四川提督鄭文煥奏江南提督吳進義請暫停採買一摺經戶部咨行到臣川省比歲屢豐糧價平減秋後採買兵穀為數無多不礙民食若照例暫停留銀給兵令其自行零糴則臣所駐省會地方民商輻輳又於青黃不接之時添數千兵入市購取升斗轉致市價昂貴兵民均有未便應請照常買貯得旨允行○是日駐蹕七里河○辛酉

上詣

皇太后行幄問安○吏部議覆廣西巡撫楊錫紱疏稱太平府屬之上下凍土州思陵土州

俱地處極邊與安南犬牙相錯巡緝稽查最為緊要向未設立流官僅以巡查等事責之土司邇因安南地方滋事委員撥兵前往駐宿然官非長駐不足以專責成查土司中有下石西土州地小而近寧明羅陽土縣地小而近永康請將下石西土州吏目改為思陵土州吏目其下石西土州地方歸寧明州吏目兼管羅陽土縣典史改為上下凍土州吏目其羅陽土縣地方歸永康州吏目兼管應如所請從之○戶部議覆直隸總督高斌疏稱霸州豐潤二州縣營田被旱成災本非官田地畝賦額有定者可比不能援請蠲免請將額解通米在於不被災營田所收穀內通融碾米完納餘米變充公用又豐邑營田內有鰥荒無收及高鰥改種雜糧地畝霸州營田內有低窪改種葦藕地畝並無分收稻穀亦令於其餘營田收穀內通融完納其被災各佃借領籽本暫緩徵收應如所請從之○

以雲南故開化府土經歷周天爵之子周霖襲職。是日駐蹕甘菜嶺。壬戌諭封疆大臣具摺奏事或現辦之件奏報情形或疑難之事奏請訓示奉有硃批理當鎮密方為慎重近聞廣西巡撫楊錫紱凡有密奏之事及所奉諭旨每多揚言於人且或抄發屬員移咨察案機事不密則害成於國家政體甚有關係昔年

皇考曾為此嚴行通飭莫不凜遵楊錫紱獨未之聞耶嗣後各省督撫除以奏代題事件奉旨之後始許通行其餘奏報大概情形并密請訓示以及褒嘉申飭之奏摺一概不許輕洩一字如有抄錄咨行仍然宣洩經朕訪聞必交部嚴加議處該部即行文各省督撫知之。是日駐蹕硯臺河。癸亥。

上詣

皇太后行幄問安。○諭軍機大臣等昨據禮部題請謁

陵禮成俟朕回鑾之後擇吉於

皇太后及朕前行慶賀禮已降旨允行車駕於二十五日入京陛殿之禮即可於二十八日舉行可寄信總理事務王大臣傳知禮部令其照例奏請可也。戶部等部議覆甘肅巡撫黃廷桂疏稱西寧府屬西碾二縣之南山一帶地方遼濶番漢雜處內有擺羊戎溝囊思多溝諸處堪以開墾惟距邑城甚遠經前撫臣元展成奏請添設撫番通判駐劄擺羊城內董率墾種管轄各番又經臣請以鞏昌府通判改隸西寧府移駐督墾接准部覆俟開墾有效再行奏請定議茲試種三載已墾擺羊戎溝荒地二十四段囊思多溝等處荒地二十四段頻歲收成五六分至七八分不等成效已著請照原議將鞏昌府通判改為西寧府撫番通判移駐擺羊戎添建衙署其原管盤驗茶封之事改令鞏昌府管理所墾地畝照番地例籽種一石徵糧一斗於十年

後起科。應如所請。從之。○工部議覆倉場侍郎覺羅吳拜疏稱。北河挑淺。定有漕規。漕運總督顧琮奏請加挑濟運。事屬可行。但挑挖情形。難以懸定。應俟明歲重運到時。動項試挑。先於漕規外。加挑三寸。果於糧艘有濟。再行題定。久遠章程。應如所請。從之。○理藩院奏前據管理恰克圖事務員外郎增保呈稱。俄羅斯兵謝哩萬等二人。醉後在恰克圖界上毆死商人金成禮李萬興一事。經俄羅斯楚庫拜星首領雅固布咨稱。伊處醉後殺人者。向無擬斬之例。喀屯汗因念兩國和好。欲將謝哩萬等。即於恰克圖梟首示儆。等因。查臣衙門原定十一條內。兩國之人。執持軍器越境殺人者。抵償。今謝哩萬等係醉後殺人。遽議斬首。未免過重。請行文增保會同俄羅斯首領等。看視絞決。並飭知土謝圖汗敦丹多爾濟等。曉諭蒙古商人等。嗣後如遇爭毆致死人命者。俱照此絞決。著為例。從之。是

日。駐蹕沙河站。○甲子。成都副都統永寧奏。川省駐防兵。從前由荊州派撥者多。父子兄弟。不能禁其往來省視。例由該將軍副都統給咨。以四個月為限。責成荊州。成都兩處理事同知。不時稽察。定例誠善。今自去年十二月。至本年八月。陸續來川二十六人。一無正務。若不嚴申例禁。恐不肖者往返生事。請勅下該將軍副都統等。咨查屬實後。再行予假。若冒昧給咨。一經查出。除將謊告者嚴懲外。仍將該管各官。交部察議。得旨。允行。下部知之。○又奏。乾隆三年。奏准採買稻穀。以備兵食。嗣以所買不足。臣於叅員覺和托名下。追出入官銀一千四百七十九兩。於去年買足存貯。但穀多倉少。不敷存貯。應添建十五間。始足容納。再每年運赴城外水磨碾時。用人擔馬負。至為繁重。臣因詳勘水磨處。河水自西城水門流入。東注漢城水門。流入大河。商民買賣薪炭等物。俱由東水門運載。今此河

年久淤淺有礙船行。是以擬即疏濬。將西水門之柵欄。亦如東水門修理。運碾穀石較為利便。尋據覺和托呈稱情願捐辦。以贖前愆。今倉廩業已添建。河道業已疏通。復於河傍建糧房六間。存穀備碾。堆撥二間。派兵看守。并買船四隻備運。其舊隄亦俱築石修固。兵民稱利。得旨知道了。該處如有防禦缺出。將覺和托與應陞之員一并引見。○是日駐蹕中前所。

實錄卷二百二

三

大清高宗法天隆運至誠先覺體元立極敷文奮武孝慈神聖純皇帝實錄卷之二百二

大清高宗法天隆運至誠先覺體元立極敷文奮武孝慈神聖純皇帝實錄卷之二百三

監修總纂官經筵講官太子太傅文淵閣大學士文淵閣領閣事領侍衛內大臣稽察總纂官上諭事機處管理吏部理藩院掌印御史黃鴻圖副都統世襲騎都尉等以加七級隨帶加一級等因欽此○又欽此○總纂官經筵講官太子太傅文淵閣大學士文淵閣領閣事稽察總纂官上諭事機處管理吏部理藩院掌印御史黃鴻圖副都統等以加九級隨帶加二級入加二級○又欽此○內大臣稽察總纂官經筵講官太子少保工部尚書等以加七級隨帶加一級等因欽此○又欽此○

敕修

乾隆八年癸亥十月乙丑賜寧遠州姜女祠

御書扁曰芳流遼水 諭據直隸總督高斌奏稱直隸天津河間等屬今年夏間被旱業已蒙恩賑卹第歉收之後米價尚屬昂貴聞奉天米穀豐收請弛海禁俾商民販運米穀流通接濟天津等處民食等語奉天一省今年朕親臨幸目覩收成豐稔米價平賤以之接濟直隸洵屬裒多益寡著照高斌所請准其前往販運自奉旨之日起至次年秋收為止令該地方官給與商人印票聽奉天將軍府尹

實錄卷二百三

一

一

查驗收買之後給以回照仍行文知會直隸總督並令沿海官弁時加稽查毋令私出外洋庶需穀者得以餬口而糶販者又藉以獲利於奉天直隸二省均有裨益該部即行文該督撫將軍府尹等知之○戶部等部議准河南巡撫碩色奏陳祥符等二十七州縣旱災加賑事宜一被災各縣倉儲不敷請於懷慶府倉撥七千石協濟修武河南府倉撥四萬石分運陽武洛陽鄭州各一萬石孟縣孟津各五千石光山鄆陵二縣倉各撥給羅山長葛三千石密縣倉撥給新鄭五千石又於陳留杞縣倉各撥三千石蘭陽縣倉撥四千石運至祥符賑濟一協濟之穀糶借不敷請以銀兼賑每月銀穀各半搭放一兼賑銀兩按照米穀市價折給一加賑口糧應請按月支放仍於青黃不接之時借糶兼行一被災地方請以工代賑現有濟源輝縣獲嘉中年新鄭五縣城工即於來春興修一運穀腳價

照例動項支給得旨允行○戶部議覆左都御史管廣東巡撫王安國疏稱廣南肇惠嘉五府州屬本年夏雨連綿山水陡發兩江齊漲清遠三水南海順德四會高明鶴山等七縣淹斃人口衝決基圍倒壞房屋已分別賑卹其始興縣衝坍民田三頃二十五畝實難修復額賦請予豁免應如所請從之工部等部議准直隸總督高斌疏稱八溝熱河承德三廳所屬龍鬚門等汛應建兵丁馬棚四十間從之○賑長蘆寧津交河河間三縣旱災竈戶蠲免本年額徵以原任歸化城都統瑪尼為正黃旗滿洲副都統是日登望海樓駐蹕文殊菴 丙寅

上詣

皇太后行幄問安 諭曰奉天將軍額爾圖因朕恭謁

祖陵經行口外恐扈從人衆沿途米糧不敷供給奏請巡幸之先禁止米糧入關今已回鑾

自應開禁通商第恐各處關口胥役人等仍或借端阻遏希冀勒索以致米糧不能一時流通著該將軍府尹等即速行文關口各員弁稽查胥役毋許借端阻遏并出示曉諭關外商民聽其運往關內各處販賣俾米糧流通民食充裕以副朕痌瘝民瘼之至意又諭近聞京師黑豆價值昂貴今回鑾在即扈從官兵馬匹進京用豆益多戶部現存官豆應行平糶著在京戶部堂官即行查明定議速奏請旨尋議請照內務府八旗二十七局每局各先發五百石及時平糶從之又諭軍機大臣等元展成原係獲罪之人朕宥罪錄用畀以甘肅巡撫重任伊並不思感激報効在任聲名狼籍屢被糾參經新柱尹繼善審明革職治罪朕復從寬發往臺站効力又因伊情願修整滄州城工是以准其回籍辦理豈意伊巧卸坐臺之差回家之後借稱變產任意耽延以致工程貽誤即所變家貲多

歸私用情罪甚屬可惡著都統富昌率同該督委員嚴查伊家產不得稍容寄頓隱匿交與鹽政伊拉齊變價入官元展成即著該都統收管衙署內俟城工告竣之日再行請旨此旨並著與伊拉齊看是日駐蹕范家店丁卯戶部議覆直隸總督高斌疏稱天津河間等屬災區現俱藉賑資生賑畢即當青黃不接之時米價不能平減請將採買口外多餘米石運至被災各屬減價平糶應如所請從之是日駐蹕魏家莊 戊辰

上詣

皇太后行幄問安署熱河副都統色爾登奏據原任副都統達勒黨阿呈稱伊母病故無力營葬懇恩照伊所襲一等子爵應得俸銀賞借八年以為助喪之費得旨允行調直隸正定府知府王師來京引見是日駐蹕永平府已已諭昔蕭何相漢終舉曹參羊祜佐晉亦進杜預薦賢自代青史稱焉是以

宋有詔觀察薦忠勇自代之條金有勅宰相奏賢良自代之諭今三載考績黜陟幽明邦之要典大臣徒遵例自陳乞賜罷斥而不舉賢自代使遂其高尚職將誰任乎豈朕夢寐求賢寅亮天工之意也其以明歲為始凡大臣自陳乞罷者令各舉德行材能堪以自代之人隨疏奏聞若一人兼數職者材恐難全舉二三人或三四人聽食祿及韋帶之士均許但不得舉同列及位在已上者著為令

以山西巡撫劉於義為戶部尚書戶部右侍郎阿里衮為山西巡撫內務府總管傅恒為戶部右侍郎以吏部左侍郎蔣溥實授湖南巡撫原任戶部右侍郎歸宣光為吏部左侍郎以刑部左侍郎周學健實授福建巡撫內閣學士兼禮部侍郎彭啓豐為刑部左侍郎命大學士徐本仍兼管戶部尚書事務

以鑲藍旗滿洲副都統雅爾圖署兵部右侍郎調江西巡撫陳宏謀為陝西巡撫陝西

巡撫塞楞額為江西巡撫○是日駐蹕新店

庚午

上詣

皇太后行幄問安諭直隸總督高斌等今日

經過豐潤縣見城垣甚是殘缺想各處似此

者必多夫城垣所以衛民守土之官平日如

能留心經理偶有坍塌即於缺口嚴禁出入

踐踏隨時堵築本易為力維因常時漫不經

心以致任其殘缺日甚一日若於農隙之時

酌撥本地就近民夫徐為粘補自可漸次修

復是在良有司留心地方勸用民力善為辦

理尤在爾等大吏平時督率有方其加意整

飭之母得忽視戶部議覆雲南總督張允

隨疏稱東川府新附夷地之蒙居租地方田

土未開人民未集派撥駐劄兵丁歲需兵糧

府縣倉米實難遠運請將東川營歲支兵米

一百二十六石再於昭通採買兵米內減買

三百六十石兩處米價運腳發交會澤縣於

附近木欺古四站以內地方採買運汎以供
兵食應如所請從之 禮部議覆山東學政
李治運疏稱學政定例生員試居優等者准
其幫補廩增出貢又童生應考俱用廩生保
結今山東運學獨無廩增出貢之例前經鹽
臣莽古立題請添設部議以山東運學係濟
南府屬與河東另立運學不同未即議准查
天津商學亦附府學其廩增出貢與各學相
同應照此例添設廩增各二十名並依山東

山東志卷之三

小學例二年一貢至廩餼亦照天津商學例
無庸給與應如所請惟添設名數過多應酌
設廩增各五名准其五年一貢從之 工部
議覆江蘇巡撫陳大受疏稱省塢黃快船七
十隻每隻額編頭舵水手八名每名日給工
食銀五分如遇差遣添雇水手六名照例支
給其沙船三十三隻額設水手工食每年亦
係照常支給如遇京差添雇水手只領程限
五個月工食銀六十兩請將黃快船照沙船

例辦理遇有別項差使均照程途遠近酌給
應如所請從之 分別緩徵江南山陽阜寧
清河桃源甘泉泰州高郵寶應銅山豐縣沛
縣蕭縣碭山邳州宿遷睢寧等十六州縣上
年被災民欠 緩安徽太平壽州鳳臺鳳陽
懷遠霍邱泗州盱眙天長等九州縣及新安
鳳陽鳳中泗州長淮等五衛水災軍民新舊
額徵並分別賑貸 分別加賑河南祥符陽
武封邱鄭州滎澤新鄭輝縣獲嘉河內濟源
修武武陟孟縣溫縣洛陽偃師鞏縣孟津宜
陽永寧靈寶等二十一州縣被旱災民 分
別緩徵山東平原樂陵德平德州陵縣惠民
濱州商河齊東陽信利津武城恩縣夏津等
十四州縣被旱災民新舊額賦 是日駐蹕
豐潤縣 辛未駐蹕趙家新店 壬申

上詣

皇太后行幄問安 諭車駕東行數月在京總
理事務王大臣稽查妥協安靜無事著照恩

詔內扈從王大臣例履親王平郡王紀錄一次大學士鄂爾泰張廷玉加一級戶部議覆江西巡撫陳宏謀疏陳截漕辦理事宜一將截留穀與倉貯穀按照地方衝僻戶口多寡酌量分貯備來歲平糶一截米旋收旋糶應每石加耗三升於贈軍等米內動支一無漕地方擇水路可通者撥運各邑再撥與府倉一撥運糧石大江大湖順水每石給水脚銀五釐八毫上水每石按站給銀六釐九毫險灘上水一分二釐一撥運米石令各府縣自差丁役赴領一切脚費由司庫公項支用均應如所請從之又議覆陝西巡撫塞楞額疏稱商州地方本年七月內被水衝淹人畜房屋地畝前經題請賑卹並蠲免額徵內有沙石衝壓鐵地二頃七畝有奇實難修復請將應徵折色米石徭銀長遠豁除應如所請從之工部議覆湖廣總督阿爾賽疏稱荊門州屬有沙洋關廟官隄一道上自荊門

之沙洋下至潛江縣之石界計長二十餘里地處上游最為緊要隄外逼近襄江水勢極猛稍有疏虞則下游之江陵監利潛江沔陽四州縣屬均受其患應於頂衝處添建石磯十座並將一帶大隄加高培厚又每歲伏秋大汛後尚應勘驗歲修該處歲徵隄費銀三百兩實屬不敷應請發銀一萬兩分給荊安二府屬州縣交商營運以一分五釐取息按季呈繳息銀存安陸府庫備工應如所請從之○免沛縣水沈老荒麻地乾隆四年以前積欠以鑲白旗漢軍叅領鄧廷相為福州左翼漢軍副都統○以故廣西憑祥土知州李滋澤之子李桂襲職○是日駐蹕邦均○癸酉諭此次隨駕官兵自起程時曾領過四個月行糧今未及四個月例應將多領過錢糧按日繳還但官兵沿途俱各黽勉行走著施恩寬免○命山東巡撫兼提督銜給與印信○是日駐蹕烟郊○甲戌命接駕官員於

午門前按翼排班跪迎

皇太后聖駕

上奉

皇太后還宮

上詣

大高殿

壽皇殿行禮○詣

皇太后宮問安○吏部等部議覆江西巡撫陳

宏謀疏稱江西吉安府蓮花橋地方離縣僻

實錄卷三十三

十二

遠前經題請裁汰同知另設縣治嗣遵部咨

令照各省分防同知之例將事件改歸該同

知管理應請將永新安福二縣之磬西上西

兩鄉改為廳地移同知衙門駐蓮花橋經理

刑名事件及每歲民屯額徵五年一次編審

人丁其考成照州縣例再於吉安永新二營

內撥外委把總一員兵十名防護巡緝按年

更換至公文來往向於安福至蓮花橋中設

三鋪永新至橋中設一鋪應每鋪添設鋪兵

各一名再於蓮花橋設一總鋪添設鋪兵二

名又戶口田賦已歸廳管佐理需員請照湖

南永綏同知設立經歷之例將永新縣栗傳

巡檢改為廳照磨換給印信又將安福縣黃

茆司巡檢改屬廳轄移駐黃陂又將永新縣

訓導一員裁去改設蓮花廳學訓導又將永

新縣額取文童內撥出三名武童內撥出二

名安福縣額取文童內撥出五名武童內撥

出三名二縣各撥出廩生六名增生六名歸

實錄卷三十三

十二

入廳學廩生照縣學之例兩年一貢又該廳

原支養廉六百兩今公用較繁請照中縣例

增給衙署營房監獄庫房墀壇祠廟照例添

建又裁粟傳巡檢弓兵二十名添設各衙門

書役工食均應如所請行惟請設吏房等科

與例不符應令添設典吏四名又該同知議

給養廉應令永新安福二縣通融派給從之

○戶部等部議覆安徽巡撫范璨疏報望江

縣雍正六年十年自首開墾田畝共十二頃

二十畝有奇。實皆按畝加派。有賦無田。請將額徵豁除。應如所請。從之。又議覆漕運總督顧琮遵旨詳議湖南按察使明德條奏漕船事宜。一、東省自備漕船。宜停簽報副丁之例。查各省漕船添設副丁。原因到淮盤少。留一丁買米趕幫。一丁駕運北上。如抵通掛欠。則留一丁追比。一丁駕空回南。今東省自備丁船。既不過淮。又不同空。副丁虛設。應免簽。一、東豫二省各幫有先後量存船三十九隻。宜全裁。查此項存船。原在現運漕船之外。留備糧增及不時撥補之用。歷年輪減。例不支給。苦蓋銀米。軍丁拮据難支。不得不藉各丁公出幫貼。是以辦運之資。貼減歇之用。未免兩困。且十年滿號一體領價。請造徒糜帑項。漕糧定額已久。有增亦可。雇船兌運。實可全裁。均應如所議。辦理從之。禮部議覆福建學政吳華孫疏。稱漳州為朱子行政設教之邦。今有祠在芝山。請頒

宸翰。使官吏人士觀感興起。又先儒蔡元定蔡沈黃幹真德秀游酢等祠墓。歲久荒圯。請勅所在有司加意防護。又楊時游酢俱程門高弟。今游酢獨未從祀。亦屬闕典。請下禮臣定議。查朱子婺源家廟。延平講學舊區。俱經頒賜

御書扁額。其專祠在漳州芝山者。應如所請。交內閣撰擬字樣。進呈欽定。頒發至先儒墳墓。例由地方官於年終冊報防護。無誤。何以遽至荒蕪。應行文該督撫查明辦理。又楊時從祀。舊宗原以朱子淵源所出。故程門高弟如呂大臨謝良佐皆不與焉。該學政所請游酢從祀。應無庸議。從之。一、緩山東臨邑縣被旱災民新舊額徵。加賑河南中年河陰新安羅山長葛伊陽等六縣被旱災民。予廣西殉難之知縣。贈按察使僉事倪國正。縣丞贈衛經歷吳嗣昌。吏目贈府知事魯懋巡。檢贈縣主簿魯器千。總馮選外委廖廷邦。潘貴石

得勝朱國英謝名立祭葬銀兩如例以故
廣西結安土知州張廷翰之子張治寧襲職

乙亥

上詣

奉先殿行禮○詣

皇太后宮問安○諭上年將山東截漕貯穀撥
濟江南原屬移緩就急之計今歲夏秋之間
山東濟南武定東昌三府屬偶被偏災曾撥
運登萊穀八萬石以資賑濟嗣後各災屬補
種之處及續報之臨邑縣復被霜侵收成歉
薄又增賑糧目下賑給尚可敷用而來春借
糶不可不豫為之計著將山東本年漕糧截
留八萬石以豫備倉儲為災屬來春借糶之
需該部即遵諭行○又諭閩人驚悍成習而
漳泉為尤甚我

皇考暨朕亦既屢頒訓諭令地方有司誠心化
導朝夕提撕務感發其天良痛改其夙慝無
如怙惡不悛藐視法紀邇來辱官毆差之事

源源有之朕細察其故大抵因州縣官姑息
養奸每遇惡棍不法等事輒私自寢息以圖
省事並不申報上官而上官又復苟且消弭
不行究詰以致兇頑之徒習為固然無所忌
憚養癰貽患非一朝一夕之故也夫地方有
司原有父母斯民之責必平日有休戚相關
之誼視民如子至誠感孚則民亦莫不視之
如父母其尚有桀驁難馴甘蹈法網者無此
情理也蓋恤民之與懲奸二者原相濟為用
欲恤民斷不可不懲奸而非懲奸又斷不能
恤民今閩省司牧之道兩者俱失何以厚民
生肅吏治挽薄俗救頽風用是特頒此旨該
督撫等當時體朕心時時訓飭有司務期寬
嚴並濟懲勸兼施洗因循之積弊歸平康之
淳風朕於督撫有厚望焉○丁丑

上以謁

陵禮成率諸王貝勒貝子公鎮國將軍內大臣
侍衛大學士都統尚書子侍郎副都統詣

皇太后宮行慶賀禮。衆官俱於午門外行禮。

上御中和殿。內大臣侍衛內閣翰林院禮部都

察院詹事府等衙門行禮。

御太和殿。王以下文武大臣官員等進表行禮。

（定邊左副將軍額駙策凌奏準噶爾部人

克忒等率屬來降。派侍衛由驛送京報聞。）

戊寅。巡視臺灣給事中書山等奏臺地各官

案件。有報知巡察衙門者。有不報知巡察衙

門者。其不報知之案。經該處民人告發查詢。

臣等謹將

始將緣由聲明。又復任意延擱。至有經年不

覆不結者。請嗣後臺灣地方官所辦案件。按

月將已結未結造冊申送巡察衙門。如任意

遲延隱匿不報。查出題叅。又臺地民人每將

地方官已結各案。屢向巡察衙門控告。請除

原案判斷明晰者。批飭不准外。其另稱冤抑

有關民生風化者。應酌量輕重。分別批發提

訊。如有健訟棍徒。照誣告例治罪。得旨。允行。

己卯

上詣

奉先殿

壽皇殿行禮。幸瀛臺。是月總理事務王大

臣等奏報京師雨雪情形。得旨。覽奏。曷勝欣

悅。至得雪三寸。尤切卜麥之歡。途次亦屢得

瑞雪。遠近均霑。總賴

天恩浩蕩也。江蘇巡撫陳大受奏挑濬丹陽

丹徒運河事宜。得旨。督率屬員實力為之。此

等事最宜留心。又奏辦理流民事宜。得旨。

惟在汝等平情酌理。為之不然。則甚善之舉

徒成誘人輕去其鄉之弊政耳。江南河道

總督白鍾山奏葦蕩左右兩營舊定額柴。因

汎弁目兵通同盜賣。裝運船兵又復沿途改

捆偷售。以致工料日虧。今酌陳事宜。一各汎

地畝。應查明分劃十段。設頭目十名。各管兵

若干。每兵一名。分地一區。各立界址。經營倘

有缺少。惟該管兵是問。一葦柴開採。定以霜

降為期。令該管將備下。蕩督採。定限年內採

十分之六。於來年清明前全數採完運交。一。蕩地遼濶。全賴溝渠深通。方可依限出筏。從前葦營備弁。領有挑溝銀兩。半歸私橐。應委員會同營備。確估興挑。并委幹練効力。官住工監督。一向例浚船每幫裝柴五百三十六束。柳船每隻九百束。石船每隻一千五百束。船大料少。船兵等利其裝載不多。遺留在蕩者。可以任其售賣。今委幹員在汛酌令加裝。每幫實可增柴二百餘束。每運一次可增柴四萬餘束。每年左右兩營可增柴四十餘萬束。增載多運。即可依限濟工。惟運柴交厥雇人馱負堆垛。及添補繩纜等項需費。請照糧船附帶土宜之例。每浚船一幫准帶餘柴二十束。柳船三十束。石船五十束。委員給銀收買。資其前項餘費。不許船兵私賣。仍將此柴另堆給廳。准作工料。扣銀抵帑。一。浚柳石船裝柴。往往脫幫停泊。以圖盜賣。應照糧船例編號依幫。令沿途文武催儆。不許停泊。得旨。

諸凡留心經理。殊可嘉也。安徽巡撫范璨。奏鳳陽泗州一帶連年積歉。復被旱災。桐城宣城南陵銅陵繁昌無為廬江臨淮建平。九州縣。又皆被水。現在分別蠲緩賑恤。得旨。欲慰朕懷。必實力妥辦賑務。使小民不至失所。方能稍解飢溺之思而已。刑部左侍郎署福建巡撫周學健。奏廳縣折收兵米。司道知情徇隱。現在嚴行飭禁。得旨。此事實可嘉悅。諸凡如此認真為之。何愁閩省吏治不清耶。福建建寧總兵岳鍾璜。奏謝擢任總兵。恩得旨。知道了。勉力為之母。負任使之意。福建兵驕而懦。不知禮法。治之頗難。不可不加之意也。吏部左侍郎署湖南巡撫蔣溥。奏民間外結案件。向無審辦定限。是以州縣任意遲延。胥吏利其懸案不結。可以生事漁財。為害不少。現嚴立定限辦理。得旨。聽訟吾猶人也。必也使無訟乎。吾為汝誦之。又奏。提臣吳進義請停採買米穀一案。查湖南各標。

營暨永綏長安等營均係苗疆產米無多之地全賴買貯米穀就近接濟兵食應請照舊採買得旨所奏俱悉山西巡撫劉於義奏山右米價視別省加貴歸化城托克托城一帶連歲豐收應將口外米運至內地但歸化城等處距太原千餘里舟車輓運甚難臣前在蘭州見百姓於黃河中以牛皮混沌運米最為便捷因遣人至蘭募善運混沌水手二人并製買牛皮混沌二十於保德州買米三十八倉裝入試運不過四日已至永寧州積口自此陸運至汾州每石較市價可減銀四錢陸運至太原可減銀二錢似於百姓有益現已照式廣製俟來春再試有效奏請動項買米轉運接濟民食得旨卿如此留心民瘼朕實嘉悅已交阿里衮令其續此妥辦矣陝西肅州鎮總兵許仕盛奏整頓營伍事宜得旨須實力為之不然徒云整飭營伍而接任者復云前任廢弛現在整頓朕竟誰信耶

陝西安西鎮總兵永常奏準噶爾夷使到境進貢貂皮馬匹并稱來至肅州貿易又有攜帶羊隻懇請變賣或為代牧查準噶爾舊例準於寅午戌年赴京貿易一次申子辰年赴肅貿易一次今實早到兩月然去明歲為日無多若令其久待夷人自備口糧未免多費已令副將瑚寶俟貿易夷人到來即照例酌派官兵護送赴肅至所留羊隻亦令瑚寶變價存貯得旨料理甚妥知道了甘肅巡撫黃廷桂奏甘肅民間地畝頗有以多作少給予微租詭寄軍戶名下規避正賦因令蘭州府知府李元英確查辦理據報蘭州一府首明欺隱者已一萬三千餘畝則他屬欺隱自不能無現飭各府廳出示照辦得旨若果如此自是應辦之事但朕看李元英循分供職則有之未必能辦此也若彼有見長之心而辦理不妥則非曰愛之其實害之矣至於各府照此辦理之議尤應慎重蓋邊省窮壤

之地寧可留有餘於小民不可為錢糧起見
況所加者又不過太倉一粟九牛一毛哉
四川巡撫紀山奏川省數年來有湖廣江西
陝西廣東等省外來無業之人學習拳棒并
能符水架刑勾引本省不肖奸棍三五成羣
身佩兇刀肆行鄉鎮號曰咽喉子奸淫劫掠
無所不為其聚集多在州縣交界處所出沒
各有記認羽黨日多捕役鄉保或一票報查
拏必致遭其慘毒為害實甚現在多張告示

許其自首減罪以散黨與并令自首之人開
呈同類姓名記檔存案一面相機查拏究處
至此等咽喉兇惡異常應請將著名巨魁拏
獲到案即照光棍例治罪或枷杖立斃以其
罪名揭示鄉鎮集場其脅從者照律飭審如
係外來流棍遞回原籍永遠不許出境如係
本省奸民責令鄉保管束朔望點名稽查鄉
地齊心協拏者加以重賞坐視放縱者示以
重懲地方官設法擒拏者特疏保薦優柔不

振者據實糾叅再查湖廣等省外來之人皆
因誤聽從前川省地廣人稀之說羣思赴川
報墾不知川省已無荒土可闢嗣後除有親
族可依來川幫工為活者令各省地方官給
與印照使彼此均有稽查其無本籍印照者
各該管關隘沿途阻回毋使積聚多人滋事
得旨所見甚是妥協為之 署兩廣總督策
楞奏凌雲縣拏獲安南奸匪梁敬洪於棉衣
內拆出莫正臣在交趾封寄安插內地之伊

兄莫造莫誇二信內有伊姊夫岑際康冒稱
莫姓現住夷境衆心不服專待長房以圖恢
復土地并令莫誇等檢帶莫氏案底前往商
議等語其為交通夷匪妄冀報復舊怨情事
顯然案情重大已密劄布按兩司親提人犯
究審辦理得旨所奏俱悉○廣西右江鎮總
兵畢映奏查出梁敬洪同莫造莫誇等交通
夷匪情形并追出案底圖冊現飭沿邊各隘
嚴加守禦得旨所奏俱悉嚴邊防之出入以

靖地方可也。○署貴州提督冷文瑞奏報年成米價得旨此等奏報惟應務實若徒以慰朕為意而粉飾奏聞庸何益耶。○貴州古州鎮總兵崔傑奏停買兵米一案古州上江朗洞下江各營地係苗疆素不產米向來兵丁俱仰食於粵西柳慶三府查上江每年需米八百石朗洞每年需米六百石下江每年需米八百石又鎮標三營每年需米二千五百石應請照舊採買得旨是知道了

實錄卷二百三

二十六

大清高宗法天隆運至誠先覺體元立極敷文奮武孝慈神聖純皇帝實錄卷之二百三

大清高宗法天隆運至誠先覺體元立極敷文奮武孝慈神聖純皇帝實錄卷之二百四

蘇休總管經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂總管經筵講官太子太傅文華殿大學士文淵閣領閣事稽察欽奉 上諭事件處管理刑部戶部三軍事務世襲騎都尉軍功加十九級隨帶加二級又加二級臣董誥內大臣戶部尚書張靈樞滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞尋奉

敕修

乾隆八年癸亥十一月庚辰朔禮部以慶賀

實錄卷二百四

一

皇太后聖壽節先期疏請得旨是照例行禮奉皇太后懿旨今年停止筵宴 諭朕君臨天下勤求治理小民生養之源無日不為深計而勸諭之術尤在久道化成是在督撫諸臣董率羣吏日就月將實用其心於興化致治之要以駁駁於上理非徒奉文守法循分苟安遂謂無忝厥職也朕聞雅爾圖在河南官署鞠為茂草許容之居湖南至以文書廢紙糊牕此即孫樵所謂以官為傳舍醉濃飽鮮笑

與秩終而已雅爾圖許容尚稱勤於職事者而猶有此則推而至於他省等而至於州縣其在官無異一驛耳古之人臣處官事如家事試問今之為官者其料理家務果肯如此之草率簡陋漫不經心乎此雖細務可見其心不在官欲望其曲體民情而代謀家室此必不可得之數也張九齡云縣得良宰萬戶息肩州有賢牧千里解帶蓋吏數變易則下不安業久於其任則民服教化若當官而存

苟且之心將百事皆從廢弛矣漢時治尚循良重書勸勵增秩賜金以儲公輔之用意在久任以安民也雖朝廷用人量才審器必酌人地之宜自不能一無更調而欲吏與民相接俾氣協而情通究以久任為常法居是職者暫不忘久即一日而為數十年之計久不生倦數十年仍當如一日之心則訓俗型方自必視為切已事也今親民之官不至苞苴肆行亦多兢兢職守然僅惕於功令以遏其

貪黷迫於考成以策其勤敏簿書期會之外豈真有以民心之淳薄為念者歟此間閭之所以不盡馴良而化導之未洽也夫身膺民社即為其父母師保官之視民如子弟則民之視官如父兄官民同其休戚而情意相接斯叩之而即應感之而易從今之州縣於黎元之身家性習視同膜外平時不相聯屬而誠諭俱屬具文澆漓溺於其心凌競狃於所習此則所謂痼疾外視若無所苦而病隱中

於本根愈久愈大治之甚難誠不可不亟為究心者試思身為牧令若但司簿領事承接則一書吏之能事何以官為昔韓延壽閉閭思過而民自悔悟吳祐以身率下而民不忍欺是民非無良權實操之在上惟教深於隱微故其樹績益顯為督撫者果以此為課最使有司提撕儆覺百姓觀摩漸漬日計不足月計有餘將見官與民相習情與事相通一氣感孚不致扞格於以興教化而移風俗無

難也。倘任其波流。無以發其孝弟廉讓之至性。豈能使之奉長吏之命。而羣然率從乎。朕聞駟馬不馴。御者之過也。百姓不治。有司之過。有司與民漠不相關。咎在督撫。督撫不能使有司化導其民。咎即在朕。今吏多玩愒。而風不古。若朕實愧之。國家承平日久。治具畢張。雖久道化成。未易驟至。而整吏治以戒因循。正人心以除積習。凡有涖民之責者。皆當審時務之急先。思致治之根本。而加之意焉。其各遵奉母慈。○又諭安徽省鳳潁泗三府州屬壽宿等二十四州縣衛。連年被災。歉收民生艱苦。朕加恩撫恤。蠲賑兼施。務期登之衽席。所有未完帶徵之舊欠。原降諭旨。令俟民間元氣漸復之後。另行定限帶徵。今思此等地方。當積困之餘。既有本年應納之錢糧。又有昔年帶徵之舊項。勢難竭蹶。輸將深可軫念。著將鳳潁泗三府州屬壽宿等二十四州縣衛。乾隆七年舊欠地漕銀兩。隨同新糧

於本年十月徵收。其六年以前現應帶徵地丁及折漕銀兩。緩俟甲子年麥熟後起限徵收。應改徵穀石之舊欠漕米。於秋收後起限徵收。仍照定例分年帶納。所有宿州靈璧虹縣臨淮懷遠泗州五河等七州縣。五年以前未完帶徵銀兩。及漕項銀米。仍俟年歲屢豐後。定限帶徵。其本年歲旱地方。照例另請停緩。如此則民力得以稍紓。庶副朕撫綏惠養之意。該部即遵諭行。○工部議覆閩浙總督那蘇圖疏稱。各標鎮協營兵丁需用鉛觔。向例每百觔准銷價銀三兩五錢。此係就價賤之時。與產鉛省分統計折中定價。浙省向不產鉛。又兼商販稀少。現在各鋪每鉛百觔實需價銀七兩上下。若照原定部價承辦之員。實多賠累。事關軍需。急宜變通。請將各營需用鉛觔。豫備三年之數。每百觔於公項內支價銀四兩八錢。委員赴楚黔產鉛地方採買。運回分給應用。應如所請。從之。○加賑兩淮

板浦徐清中正臨洪興莊荒潰各場續被秋旱民竈分別蠲緩本年額徵（辛巳）

上御乾清門聽政（詣）

皇太后宮問安（諭軍機大臣等前因暹羅國商人連年帶米來閩朕曾降旨免徵船貨稅銀并令嗣後凡外洋商民運米至內地者酌量米石多寡分別免稅著為常例蓋外洋果有餘米運來內地貿易於沿海各處民食自不無裨益加恩免稅所以嘉惠遠商亦為內地民食計也第恐內地奸商希圖寬免貨稅之利將來偷漏出洋復借此夾帶貨物轉載至口捏稱該國運來米石冒恩肆竄弊益滋甚向來販米出洋例有嚴禁惟在各該督撫時飭地方員弁於各口要隘實力巡查嚴覈出入毋得稍有疎懈庶幾弊端可除而沿海民人得實受外洋運米之益可寄信與江南浙江福建廣東等省督撫知之○戶部議覆陝西巡撫塞楞額疏稱陝省西鳳同乾四府

州屬軍屯地畝經前撫臣史貽直將寄莊寄糧題請改隸尚有咸寧長安醴泉高陵臨潼盤屋渭南興平鄠縣涇陽咸陽藍田三原寶雞郿縣岐山扶風大荔華州蒲城乾州永壽武功等二十三州縣未經改隸屯田一千一十餘頃應令寄糧州縣將額糧科則移送地畝坐落之州縣徵收內有人糧本在一處而地在別邑者即於改隸之時開註佃戶姓名著令催輸更有屯戶軍地已售而糧未過割者即行令州縣清查使典主賣主過戶完賦應如所請從之○又議覆陞任山西巡撫劉於義疏稱豐州衛乾隆五年召民墾種荒地一百四十四頃內虛報大莊科等村地十頃有奇將額徵豁除應如所請從之○分別蠲緩江蘇海州沭陽贛榆溧水高淳金壇溧陽銅山豐縣沛縣蕭縣阜寧安東鹽城及徐州淮安大河等十七州縣衛水災軍民本年額徵並賑卹有差又貸上元清河高郵甘泉寶

應興化等六州縣災民籽種。賑貸安徽無為州被水災民蠲免本年額賦。賑貸粵西永安州被旱災民。以翰林院修撰于敏中充日講起居注官。命山東布政使包括來京候旨。以原任湖北布政使喬學尹為山東布政使。引見拉達克送歸自準噶爾脫出之馬甲卓鼎。降旨授為護軍。並賞銀五十兩。壬午。御史章佑昌奏京察定例部院衙門所屬官員俱由該堂官填註考語惟四五品京堂與正卿分屬同官並無統轄往往俱置優等立法似未周詳請嗣後四五品京堂照國子監例止令正卿開寫各員事實移送吏部都察院大臣於諸員過堂時秉公填註考語得旨允行。分別賑貸甘肅皋蘭狄道金縣河州靖遠寧遠通縣會寧真寧合水平番清水秦安西寧安定碾伯階州靈州中衛寧夏花馬池禮縣成縣高臺等二十四廳州縣水蟲風雹災民暫緩新舊額徵。以故喀爾

喀扎薩克和碩親王額駙敦多卜多爾濟之子康沁多爾濟扎薩克輔國公巴海之子袞楚克扎布襲爵。○癸未兩淮鹽政準泰奏淮鹽運楚成本於乾隆五年具題內有湖廣運費布稅充公等三款每引應派銀一錢九分四釐聲明俟楚省議定添入成本因部中通案駁款未清至今尚未攤入賣價而匣費等款各商已在楚按年扣繳積至三年幾虧本四十餘萬請將前項應派銀數攤入成本行銷其各商已繳銀兩并請於甲子綱起分作三年帶入成本攤銷得旨允行。是日起。上以冬至祀天於圜丘齋戒三日。甲申諭軍機大臣等據杭州將軍傅森奏稱四五月間雨水稍多老鹽倉以東一帶柴隄畧有衝動等語從前巡撫常安六月內奏報雨水塘工一摺祇稱海塘工

程經上旬霽雨。並無衝溢。臣親往工所細勘。觀音堂汛。應下石簍一百餘丈。業已安置等語。其老鹽倉柴隄衝動之處。並未指出。何以所奏與傳森不符。爾等可寄信詢問常安。令其回奏。○遣官祭先醫之神。○乙酉。

上詣

南郊齋宮齋宿。○諭兵餉有搭放錢文之例。江南省於乾隆六年。設局鼓鑄。僅設鑪十二座。鑄出之錢。不敷搭放兵餉。又覈計成本。每銀一兩。鑄出錢八百九十六文。是以題明每銀一兩。止折給餉錢八百八十文。餘錢一十六文。充作錢局公費。及運送餉錢之水腳等項。經部議覆。搭放兵餉。暫照八八折發。俟將來銅鉛減價。錢價漸平。再行酌增錢數。或照舊制。每錢一千文。作銀一兩。搭放等語。朕思兵丁所得月餉。僅足以敷食用。若搭放錢文。又行扣除。則所得減少。朕心軫念。特頒諭旨。將

江南省搭放餉銀。自乾隆甲子年為始。仍照定例。每銀一兩。給錢一千文。其錢局公費運錢水腳。准動公項報銷。不敷成本。照例准其銷算。至現在鼓鑄各省。如有折扣搭給者。亦一體加恩。照江南之例給發。○丙戌。冬至。祀

天於

圜丘

上親詣行禮。○遣官祭

永陵

福陵

昭陵

昭西陵

孝陵

孝東陵

景陵

泰陵。○諭朕前降旨。令江蘇安徽浙江江西湖北湖南等省。各截漕糧十萬石。存貯本省。以備一時缺乏之用。今聞湖南地方。本年雨水

調勻。中晚二稻收成豐稔。民食有賴。廣西今秋收成稍薄。恐將來不無需米之處。湖南與廣西接壤。一水可通。著將截留之漕米酌撥四萬石運往廣西。以備明春糶濟。似為有益。著該部即行文湖南廣西巡撫遵旨會商速辦。○丁亥。

上以冬至節詣

壽康宮行慶賀

皇太后禮。王大臣於

十一月二十五日

慈寧門。眾官於午門行禮。○御太和殿受賀。○諭今年上江所屬地方有旱潦偏災之處。如桐城宣城南陵銅陵繁昌無為廬江建平平等八州縣所有勘實成災之地。朕心軫念。其應完漕糧漕項著緩至來歲徵收。以免歲內催科。至壽州鳳臺鳳陽懷遠臨淮泗州盱眙等七州縣雖成災止有五分。而地土瘠薄。連年荒歉之後。民力均覺艱難。著將此七州縣及坐落七州縣之衛田應完漕糧漕項概行緩至

來歲徵收。以紓民力。朕原降旨截留江南漕糧十萬石於本省以補倉儲。今將所緩即算在截留之內。不過補倉畧進。而問閭得以從容輸納。自可免於竭蹶。該部可速傳諭該督撫知之。○又諭四川松茂為川西邊要之地。設立道員。原以控制彈壓。使內外大小土司部落皆奉令守法。無敢滋事。方為稱職。朕聞前後各任道員往往僞寓省會。希圖與上司相近。並不親至其地。以致官吏兵民相隔。疎遠。邊方情事不能周知。重負國家設立方面大員之意。著該督撫嚴行申飭。務改前轍。不得藉口公事久居省會。以曠職守。倘有無故逗留者。督撫即行題參。○又諭軍機大臣等據四川按察使姜順龍奏稱。東省有蠶二種。食椿葉者名椿蠶。食柞葉者名山蠶。此蠶不須食桑葉。兼可散置樹枝。自然成繭。臣在蜀見有青杠樹一種。其葉類柞。堪以餵養。山蠶大邑縣知縣王雋曾取東省繭數萬散給民

間教以飼養兩年以來已有成效仰請勅下東省撫臣將前項椿蠶山蠶二種作何餵養之法詳細移咨各省如各省現有椿樹青杠樹即可如法餵養以收蠶利等語可寄信喀爾吉善令其酌量素產椿青等樹省分將餵養椿蠶山蠶之法移咨該省督撫聽其依法餵養以收蠶利再直隸與山東甚近餵養椿蠶山蠶不知可行與否并著寄信詢問高斌又諭曰大學士鄂爾泰張廷玉俱已年邁

來馬維艱著在紫禁城內乘輦行走戊子諭軍機大臣等制錢乃民間日用必需之物近來各處錢文短少價值昂貴民間甚為不便有言江廣等省現在鼓鑄若山東山西等數省亦開局鼓鑄則錢文充裕價值可平此說不知可行與否該省若開鼓鑄銅劬取於何處爾等可寄信與各省督撫令其酌量本地情形悉心籌畫定議具奏順天府府尹將炳奏京城外來流民除陸續資送回籍外

現在五城十廠約三千餘名口各廠多寡不等查廣寧門外普濟堂每年冬月堂內收養貧病之人堂外每日施粥窮民藉以存活者甚衆本年直屬歉收堂外就食者比往年更多所有恩賞錢糧及租息各項恐不敷用請賞給京倉老米二百石俾窮民日食有資得旨允行準噶爾部人額爾奇沙喇率弟姪來降命賞給安插如例己丑諭向來在京八旗武職及外省駐防官員并在京文武官

員遇有罰俸案件准其將議叙加級改為紀錄抵銷惟在外文武各官不在此例朕思大小臣工雖分職有內外之殊而以功抵過俱屬一體嗣後外省地方文武各員有情願將議叙加級改作紀錄抵銷罰俸者著照在京文武官員之例准其抵銷工部議覆江南河道總督白鍾山等奏稱會勘中河古淺之處甚多向來從未興挑逐段測量勘估應先將駱馬湖尾閘堵閉以蓄湖水再將楊家莊

頭二三壩相機接長收窄以束水勢俾運水入黃之處不致一瀉無餘並請乘此水落時一律興挑動項趕緊辦理應如所請從之○以四川故大金川安撫司色勒奔之弟色勒奔細結藏土百戶蒙塔爾之子松正邦沙卡土百戶洛藏林琴之子納處巴襲職○庚寅上詣

皇太后宮問安○諭各省兵丁全以冊籍為憑必姓名年貌人冊相符始足以杜鑽營侵冒之弊從前項名食糧之人屢經飭令首報更正定有處分不許復行徇隱近聞各營尚有頂冒之習皆緣舊冊相沿稽查不力以致弊竇漸開於營制甚有關係今特再降諭旨此次仍許其據實首報更正造冊報部以嚴考覈并令各將軍督撫提鎮出結報部嗣後仍留心稽查倘再有頂名冒功等弊或經叅奏或經訪聞定將各官弁照例嚴加議處該將軍督撫提鎮等亦各有攸歸該部即遵諭行

○戶部議覆川陝總督慶復查奏陝省自雍正六年以後軍需各案內有用過喂馬棚槽藥油等銀及運送衣帽藤牌腰刀弓箭腳價又各屬應繳駝價駝隻及解肅採買正餘騾頭沿途供支草豆各費實因彼時軍務孔亟以致購價稍貴支用浮多領回疲瘦駝隻又未能及時變價陸續倒斃均與虧空侵那有間所有各屬未完銀兩請予豁免應如所請從之○禮部議准山東巡撫喀爾吉善疏稱東鎮沂山之神禦災捍患靈應昭著前經發帑修葺祠宇遣官告祭載入祀典一切祭品應請照山海羣祀之例每歲春秋二祭需用祭銀動項報銷從之○安南國王黎維禕遣使表謝賜祭前國王黎維祐並頒敕襲封國王恩恭進二次謝恩方物及乾隆三年六年兩貢儀物下部知之○辛卯諭曰校尉白達色偷竊金龍等物案內官員等自應革職已降旨令將伊等世職另揀人員承襲矣但念

世職官與職任官究屬有間其行竊之犯已經拏獲著特加恩將此佐領仍留蘇徵額管理所有此案內革職世職官員俱著照此留於本身各罰世職俸二年○吏部議覆原署兩廣總督策楞等疏稱廣州一府省會要區東南緊接大洋前已奏設香山虎門二協而文員未有專屬防範難周又澳門番夷亦宜嚴密彈壓請將肇慶府同知移駐前山寨稽查出入海船兼管澳夷歸廣州府管轄其原管捕務歸肇慶府通判兼理又將香山縣縣丞移駐澳門專司民番詞訟屬該同知管轄再照理猛同知之例給與把總二員兵丁一百名在香山虎門兩協內各半抽撥并酌撥巡緝船隻添建衙署營房鑄給印信應如所請從之○戶部議覆長蘆鹽政伊拉齊奏稱上年河南偶值偏災鹽觔不無壅滯今歲直屬天津河間二府深冀二州又復夏秋被旱車脚挽運盤費倍加商力未免艱難請將本

年秋冬二季正課加課等銀二十六萬八千餘兩分限四年完納尚有倒追積年加觔課銀請展至前項帶徵完後接徵查直屬今歲被旱止係偏災如有難銷之引可酌撥於未經被災州縣運行何致鹽觔壅積遽請將數十餘萬帑課緩輸所奏應毋庸議得旨乾隆二年至六年加觔課銀原係從前按年應徵正課除乾隆七年一年課銀已經完納外尚應作七年帶徵但朕優恤衆商特格外加恩著分為十四年完交餘依議○又議覆直隸總督高斌疏稱忻州平山二州縣乾隆五年分被水沙衝壓地共六十頃有奇額徵請予豁免除應如所請從之○壬辰

聖祖仁皇帝忌辰遣官祭

景陵○

上詣

奉先殿

壽皇殿行禮○癸巳禮部侍郎木和林奏恭查

東西陵每屆大祭豫期守

陵之內府大臣親往視牲潔治棗盛每年太常寺堂官奏請赴

陵演禮至盛京禮部係專辦

三陵祭祀事務平時贊禮郎雖在署演禮但

陵寢祭祀大典攸關請勅盛京禮部令贊禮郎等每月齊集衙門數次照

陵寢大小祭祀禮演贊如遇

福陵

昭陵大祭就近派侍郎或司員豫期前往視牲

演禮惟

永陵相隔較遠如遇祭祀請勅盛京禮部侍郎

每年前往一次視祭巡察除派讀祝贊禮等

官豫期前往演禮外再派郎中或員外郎一

員前往視牲帶領演禮得旨是著照所奏行

御史馮元欽奏凡大臣自陳乞罷者遵旨

各舉堪以自代之人隨疏奏聞查定例大臣

自陳本先送通政司轉交內閣進呈如令將

所舉之人隨疏奏聞是未經睿鑒之先而已

宣洩於衆也請將自陳本照例送交通政司其所舉之人另摺密封隨本進呈得旨允行

○甲午

上御太和殿視朝文武陞轉各官謝恩○諭軍

機大臣等河間天津等處來京就食之民日

益衆多蓋因愚民無知見京師既設飯廠又

有資送盤費是以本地雖有賑濟伊等仍輕

去其鄉而不顧且有已去而復來者不但拋

荒本業即京師飯廠聚人太多春暖恐染時

氣亦屬未便爾等可寄信與高斌令其設法

安插妥協辦理○戶部議覆江蘇巡撫陳大

受疏稱嘉定寶山二縣海濱沙瘠不宜禾稻

民間應輸漕白每年照時價折徵銀兩官為

採辦第米價貴賤早晚不同設折徵後不敷

採買勢必累官若豫存長價地步勢入累民

請照江西瀘溪縣例每年開徵時先動藩庫

存公銀兩確訪時價購買兌運再行按數出

示徵完應如所請從之○兵部等部議覆川
陝總督慶復疏稱遵旨詳議四川提督鄭文
煥請於阜和營改設遊擊等員又甘肅涼莊
道楊勲請將瀘寧營移入冕寧縣城並添裁
弁兵各事宜查瀘寧營在冕寧縣西北山路
直通爪別並非人跡不通地雖僻處遇有緩
急實可以資聲援且兒斯遺孽戶口漸多又
紫古喇開設銅廠均資彈壓未便將瀘寧營
移駐瀘寧既未改移則嘉順懷遠二營聯絡

二九二

三

控制亦不可少惟嘉懷二營額兵四百名較
冕山營為多應每營各減兵一百名至冕山
靖遠等營舊設弁兵制已周密無用更張鄭
文煥所請阜和營添兵三百名部議令於事
簡兵多營內調撥應即將嘉懷二營新減二
百名撥給合阜和營原額共五百名已足防
守尚少百名毋庸再募至阜和營原設都司
應改為遊擊添設中軍守備一員千總一員
把總三員查巫山營營汛甚少舊設遊擊體

制不稱應將巫山營遊擊守備各一員移設
阜和營即以阜和都司移設巫山其應添千
把酌量抽撥以符經制又雅州府屬清溪縣
地方當建昌打箭鑪兩路之衝苗獠出入要
區且新將大田改流尤宜專營彈壓向令黎
雅營中軍帶兵防守往來未便阜和營既請
添兵則鑪地門戶嚴密相距泰寧聲援密通
其中間之瀘定橋不必多兵防守請將原駐
瀘定橋之協標右營都司帶領該營千總一

四

三

員把總二員額兵二百名再於泰寧存城兵
內撥兵一百名移駐清溪將所屬之富林泥
頭萬工堰漢源街一帶塘汛分布防範所遺
瀘定橋汛撥歸協標左營都司管轄止須派
千把總一員帶兵五十名看守其清溪原駐
弁兵撤回黎雅營酌撥添防要汛官署兵房
照例添建均應如所請從之

大清高宗法天隆運至誠先覺體元立極敷文
奮武孝慈神聖純皇帝實錄卷之二百四

上諭卷二百四

古

大清高宗法天隆運至誠先覺體元立極敷文
奮武孝慈神聖純皇帝實錄卷之二百五

監修總裁官經筵講官太子太傅文蔚閣大學士七副閣領侍衛內大臣稽察欽奉 上諭事件處管理

吏部理藩院事務正黃旗滿洲副都統世宗憲御前軍功七級通帶加一級尋常加二級軍功已終一次臣等謹

總纂官經筵講官太子太傅大學士七副閣領侍衛內大臣稽察欽奉 上諭事件處管理刑部戶部工部事務

世宗憲御前軍功加十九級通帶加二級入加二級臣等謹將內大臣戶部內書院並滿洲副都統軍功紀錄五次

尋常紀錄十四次臣等謹將經筵講官太子太傅工部尚書地祿六次臣曹振鏞等奉

敕修

乾隆八年癸亥十一月乙未

上詣

皇太后宮問安 幸圓明園 丙申諭據副都

統索拜奏稱那克素三十九部番民豫備馬

匹牲畜為接濟護送夷使官弁之用因官弁

等其力尚堪自給並未動用番民所備等語

此次雖未經應用但伊等番民生長邊末感

激國恩詎勉急公甚屬可嘉應施特恩將伊

等明年錢糧盡行寬免以示鼓勵 丁酉戶

部議覆署兩廣總督策楞疏稱廣州府香山

海姓等場於乾隆三年七月內颶風吹倒寮倉雨淋潮泛消化鹽觔三萬一百九十三包計帑本銀一萬二百餘兩經前督臣鄂彌達馬爾泰慶復等查明漂失是實先後題咨請豁部議以該省是年並未報災仍令勒追完報查是年被風時莊稼並未受傷未經報災又粵東鹽場向係商辦竈丁領本煎曬所收鹽觔遇風水災例俱商人承認嗣革去場商歸官辦理鹽俱發帑收買場地俱在海濱颶風潮水自所必有原應於歸官之初將應賠應撥之處詳議章程乃從前恃鹽規充裕羨銀得任意撥動凡遇風潮衝失場鹽俱在場羨及陋規銀內彌補並不題報今陋規俱已肅清在外無可撥之項而萬餘金帑項實難令竈丁賠補請全行豁免應如所請從之○兵部議覆調任署川陝總督馬爾泰疏言甘涼西肅各提鎮馬廠照例三年考覈分別報部至各標營出羣另牧驢馬嗣後如有倒斃

請照收放軍需馬匹之例每年每百匹內准開報六匹應如所請從之 戊戌

上還宮 詣

皇太后宮問安 吏部議覆江蘇按察使李學裕奏稱月選州縣官請於得缺後吏部會同刑部試律例數條將原卷進呈查新選州縣官員現皆正途出身其未中式時學政按臨各講律例一條及鄉會試復試五判立法已詳且銓選會同刑部亦乖體制所奏應毋庸議得旨李學裕所奏月選州縣官掣籤得缺後考試律例數條事屬可行但吏部會同刑部誠如部議體制未協著即於九卿驗看時摘問律例數條令其條對與履歷一併進呈著為例 己亥

上御乾清門聽政 諭據監察御史舒敏奏稱巡城察倉職任綦重所派科道有另派遠差者其員缺都察院但委員署理不復具奏仰懇凡所派官員有另派遠差者著奏請派委

等語嗣後巡城察倉官員另派之差係在三
月以內者該衙門照常委員署理如係過三
月之差著奏請署理又諭曰李如柏繳回
奏摺一件交與大學士鄂爾泰抄錄寄信慶
復將李如柏摺內所奏缺曠等項從前西寧
一鎮果否如此辦理再他鎮協亦有似此辦
理與否之處令其逐一查明覆奏以右通
政秦蕙田為內閣學士兼禮部侍郎庚子
諭近來京師黑豆價昂朕已諭令將倉貯豆
石分發各米局減價平糶將來價值自可漸
次平減但思黑豆為餵養馬匹之所必需務
令充裕然後喂養有資今年奉天地方收成
豐稔豆價平減著戶部簡派賢能司官一員
前往奉天會同該將軍府尹等採買數萬石
接濟京師其如何運送之處著該將軍府尹
等速議奏聞尋議運京豆石請即委員由海
運至天津轉運通倉交坐糧廳運送至京下
部議行又諭引看女子若八旗所屬外任

文武官員之女俱令送京路途遙遠往返維
艱嗣後引看女子外任文職自同知以下武
職自遊擊以下官員之女著不必送京吏
部議覆署江南總督尹繼善等疏稱新設淮
徐海巡道請駐劄徐州府城建造衙署養廉
照江蘇各巡道例支給應如所請至書役祇
准照例添設一律給與工食從之又議覆
左都御史管廣東巡撫王安國疏稱大埔坪
同知一缺先經題准裁汰將所管各縣捕務
歸各該府同知通判管理惟廣州府理事同
知先經題定專管旗務所有從化花縣二縣
捕務未便照舊管理請歸佛山同知管轄應
如所請從之又議准甘肅巡撫黃廷桂疏
稱碾伯縣典史職司監獄巡查倉庫未設衙
署請動項建造從之兵部議覆直隸總督
高斌疏稱直屬各標營鎮協續添兵丁實因
差防緊要不能裁汰惟固關營馬兵額數較
多應將續添馬兵十五名改為步糧泰寧鎮

新添守護端親王等園寢大餉步兵一百名
應照順治年間守護榮親王園寢之例改為
守糧俟現在兵丁缺出陸續更募應如所請
從之 以故甘肅岷州土百戶后永慶之孫
后發葵襲職 辛丑

上詣

皇太后宮問安 諭本年朕恭謁盛京隨往兵
丁均屬効力前雖賞過一月錢糧但回鑾時
正值嚴寒修補衣服費用稍多著再加恩賞
給護軍校驍騎校及兵丁執事人等各一月
錢糧除扈從王公大臣外其侍衛官員所借
一年俸祿應如何展限坐扣之處著原議之
王大臣議奏尋奏原議內借支文武官員一
年俸祿作為二年扣還但查文員係食雙俸
而原借乃正俸尚有恩俸應展一年限作為
三年分扣武弁係食單俸應展二年限作為
四年分扣從之 又諭鑲黃旗護軍統領將
應放護軍叅領人員帶領引見朕已將頭等

侍衛雙柱補授矣似引見人員內有黑龍江協
領瑚琛係在協領任內已滿五年應調京缺
之人看瑚琛保亦可補授護軍叅領此次若不
補放嗣有缺出仍應來京道路遙遠將此護軍
叅領一缺即著瑚琛保補授雙柱著交該旗遇
有護軍叅領缺出即行奏補不必帶領引見
分別賑卹廣東萬州陵水崖州文昌新寧陽江
茂名電白化州石城吳川海康遂溪合浦等十
四州縣風災兵民一賑貸福建臺灣鳳山諸羅
三縣被旱災民並緩新舊額徵○壬寅戶部議
覆前署黑龍江將軍布爾沙等奏稱黑龍江地
方夏初被旱禾苗已不能暢茂七月內又遇霜
災兵丁水手拜唐阿等地畝惟初犁所種尚有
一半成熟隨令上緊刈穫末犁所種則皆未熟
被霜所得糧石以各戶口節省計算除足敷食
用一千二百一十三戶外其次年不敷口糧請
借倉糧散給從之○賑山西曲沃解州安邑夏
縣平陸芮城絳州聞喜絳縣稷山大寧等十一

州縣被旱災民免額賦有差○加賑直隸天津大城二縣被旱災民○癸卯

上詣

皇太后宮問安○甲辰

皇太后聖壽節遣官祭

太廟後殿○

上詣

壽康宮行慶賀

皇太后禮王大臣於

慈寧門衆官於午門行禮○命署直隸清河道

王師傳諭直隸總督曰近來京師流民甚多

多是滄州人景州尤甚資送盤費每日六分

僅足抵家嗣後如何過活麥收須至明年五

月此數月又如何安頓常平倉社倉例應於

青黃不接時減價平糶但遇荒歉之年又不

可一例而論再流民內有懶於耕作輕去其

鄉愚頑之輩當如何教導安插諸事不可全

靠州縣州縣官之冒濫侵欺下愚不移者固

非所論即祇知慎重錢糧不能多方調劑亦於地方無益須委大員逐一妥協辦理傳諭總督知之○河南巡撫碩色奏豫省常平義社等倉積穀外尚有存留漕穀及勸捐社穀二項自乾隆元年至七年借出未完之尾欠共二十三萬四千四百餘石緣各州縣屢逢災歉是以停緩未清今常平義社積穀舊欠四十六萬四千餘石已蒙恩旨概予免息所有漕社二穀事同一例可否將二項息穀仰邀寬免止徵本穀得旨允行 乙巳

上詣

皇太后宮問安 大學士鄂爾泰等議覆直隸

總督高斌奏稱永定河上游為桑乾河發源

山西境內綿長八百餘里多開渠道可以灌

溉前經大同西寧等縣居民捐地開浚未成

尚留渠口舊跡乾隆六年該處士民又呈請

借帑興工經署督臣史貽直遣員查勘事屬

可行移交到臣臣念興修水利不特有裨民

田亦可減洩永定水勢應請於桑乾河南北兩岸各開渠一道北岸自山西大同之西堰頭村黑石嘴起至直隸西寧之辛其村止計長四十六里南岸自大同之冊田村起至西寧之揣骨墮止計長五十八里渠尾俱歸桑乾正河北岸地勢衍順應先施工俟有成效再行估挑南岸又山西應州境內之渾源河發源渾源州匯歸桑乾亦可開渠灌田應俟兩岸渠成再商辦理至永定漲發之時湍流奔注最稱險急若於宣化境內之黑龍灣懷來境內之和合堡宛平境內之沿河口三處建築玲瓏石壩以束其勢則下游水患可減亦應先將和合堡築壩俟試行有效再於黑龍灣二處興工所需工料各銀請即動項速辦俟營田成熟後按畝均攤歸款查開渠既有裨於河道民生應如所請惟永定水勢洶涌若於下流層層攔築水大之年上游不無阻遏應令該督詳慎辦理從之吏部議奏

盛京五部司員分缺陞用及裁汰漢官之例一五部郎中十三員內除戶部銀庫郎中一缺由京派往三年更換餘十二缺酌分六缺歸本處人員陞用現尚無應陞人員仍照例由京補放俟本處有合例之人陞補三年限滿無庸調補京缺其陞轉與在京郎中等官一體論俸一五部員外郎三十八員內刑部蒙古員外郎二缺將理藩院之在京蒙古主事補放盛京並無蒙古人員無庸議外餘三十六缺各部僅有堂主事八員內四缺由京補放止主事四員陞補十八缺未免過多且盛京之贊禮郎讀祝官筆帖式等共二百餘員俱係應陞缺額遇員外郎缺出既難陞用且以二百餘員坐守主事四缺實為壅滯查盛京禮部止設員外郎四員兵工各六員戶刑各十員各部又無額設司主事缺請將戶刑二部照兵工之例設員外郎六員各裁四員改設司主事四員兵工二部俱照禮部之

例設員外郎四員各裁二員改設司主事二員尚存員外郎二十四缺酌分十二缺歸本處人員陞用盛京郎中缺出照例陞轉不准與在京員外郎較俸亦無庸調補京缺一堂主事戶部二員禮部一員兵部二員刑部一員工部二員共八員今改設司主事十二員共堂司主事二十員內禮刑堂主事各止一員難以均派且本處應陞人多請將禮刑主事各一缺留歸本處餘十八缺再分九缺歸本處陞用應陞之員由盛京兵部會同各部出具考語保送引見補放其陞轉遇本處員外郎缺出陞補不准與在京主事等官較俸亦無庸調補京缺又五部向設委署主事十二員定例於贊禮郎筆帖式內簡用三年限滿遇本部主事缺出坐補今既添設主事自可無庸再設請將現在委署主事任滿者保題註冊遇缺先補即將委署缺裁汰又盛京刑部設漢軍堂主事一員定例歸部按班銓

選查盛京本處現有漢軍筆帖式等俱係應陞人員應歸本處陞用至漢軍堂主事盛京並無應陞之缺應准與在京漢軍主事人員一體論俸停止調京一郎中員外主事各缺既經分定先儘本處人員補足後再由京補放至主事既照各部所派缺數銓選無庸再行分別堂司一戶部刑部工部漢郎中各一員員外郎各二員主事各一員共十二員今遵旨裁汰該員等回京俟在京應調缺出調補其應陞者調回陞用一盛京各官既經分缺陞用其銓選照在京人員一體辦理一威遠堡等六關口章京定例於五部員外郎主事小京官內揀選引見補放其缺即行開選二年期滿或照原銜議敘或以京缺調補今本處人員例不調補京缺期滿後守缺需時應照在京各部院官員出差之例俱以原銜管理無庸開選期滿各回原任如係在京人員補放者仍照舊例調補京缺其未經調補

任滿者亦先回原衙門辦事一盛京倉官例由五部堂官於本處筆帖式內揀送引見補放其員缺例不開選三年任滿如居官好者以在京主事等缺陞選尋常之員以在京各項小京官員缺推陞其情願守候本處武職者記名以本處驍騎校陞補今既分缺陞用嗣後年滿倉官居官好者以本處主事陞用惟盛京向無小京官額缺其尋常供職及情願守候本處武職者俱仍照舊例辦理一五部筆帖式例將本處考試應用人員擬正以在京應補人員擬陪引見補放今既將司員分缺補用其筆帖式亦應將本處人員補用嗣後遇盛京五部等處筆帖式缺出令盛京兵部將本處應用人員指名擬補無庸將在京人員擬陪其考取之處仍照定例行至由京補放各員俱遵舊例辦理從之○以行尊封禮遣官祭

太廟後殿

奉先殿 丙午加尊

溫惠貴太妃為

溫惠皇貴太妃禮部恭進冊寶

上詣寧壽宮行六拜禮 諭盛京所有原賞生息銀二十萬兩於賞兵丁紅白事不敷應用經將軍額爾圖奏請又施恩加賞銀二十萬兩俱已分別借給官兵但今年因朕前往盛京官兵各設立馬匹橐鞬器械粘補衣服豫備公務等項需用甚多諒俱於所借銀兩內費用朕雖降旨展其扣限至將來坐扣時於伊等生計仍不免艱窘此次該處官兵於一切官差俱各竭誠奮勉為此特加恩將此二十萬銀兩即賞給伊等照此數再賞銀二十萬兩交與該將軍生息以為賞項之用 又諭軍機大臣等曰大學士鄂爾泰等所議開濬永定河上流一摺內云永定河攤泥挾沙水勢洶湧若於和合堡等處建築玲瓏石壩恐水大之年下流層層攔築上游不無阻遏

壅淤之虞。應令該督酌度形勢。詳慎辦理。所議甚是。高斌原奏。或有所見。未能透徹言之。耶抑或其中尚有另須籌畫之處。耶爾等可寄信詢問之。令其詳悉具奏。尋高斌覆奏。永定上游酌建三處石壩。一在宣化縣之黑龍灣。一在懷來縣之和合堡。一在宛平縣之沿河口。桑乾河自西寧石匣村入山十八里至黑龍灣。又一百八十里至和合堡。又四十里至沿河口。又一百三十里抵石景山。自和合堡以下一百七十里。皆兩山夾束。桑乾並洋河等水匯此。勢等建瓴。臣擬於和合堡先建玲瓏石壩一處。以勒其直注之勢。則下游之患可減。至壩上山勢陡峻。壩身止高五尺。遇汛漲時。水即漫壩而過。此玲瓏壩之設。止於迅流中稍加節制。實不至有阻遏之虞。水路雖經截頓。然在山間噴薄衝刷泥沙。亦不至有壅淤之患。謹將道里情形備細陳明。得旨覽奏。始悉矣。又諭朕聞山東河道及諸湖

蓄水之處。疏濬宣洩。尚未妥協。倘遇淫雨大潦。地方必遭水患。與其臨事傍徨。何如先期籌畫。可寄信與完顏偉喀爾吉善。令其相度情形。凡有闕疏濬宣洩之事。詳悉查奏。為有備無患之計。軍機大臣議覆。御史馬燦奏稱。奉天將軍額爾圖私用滋生銀兩。請派員盤查。得旨。本年朕巡幸盛京。該處官備馬匹并喂養官兵騎用馬匹。修備衣裝器械路費等項。不無多費。且自赫爾蘇邊至山海關沿途頓次。皆有豫備。及闔營所用草豆柴薪米糧除官為備辦外。尚有私行備辦之項。是以隨往人等於一切使用物件。均得廉價置買。此等經費。即動用新領滋生銀兩。亦屬宜然。朕特降諭旨。施恩將此銀二十萬兩全行賞給。另賜銀二十萬兩滋生矣。至額爾圖係本處地方大員。即於隨朕人等有備一寓所贈一馬匹。餽一飯食之處。亦無不當。但觀其備辦光景。務期整齊華麗。公私皆為過費。徒恃

朕恩賞銀兩并伊所得分例自屬不敷但孰是官項孰是私款亦當分晰聲明額爾圖雖無侵那情弊而隨伊辦事屬員或希圖見長巧為那用或從中侵蝕額爾圖未行查出遂覺公私牽混以致衆議沸騰今御史馬燾既有此奏而朕駐蹕盛京時即有兵丁呈控者此等風氣殊屬可惡不可不將為首者重懲治罪額爾圖雖彼時業已起程未及查辦回任後亦應即查明辦理何至今尚未將查辦之處奏聞可將馬燾原摺並爾等議片俱行抄錄發交額爾圖看並將此告狀之兵如何辦理及伊用項之內曾否用過衆項并於朕恩賞之外自出已貲實係費用若干之處據實明白回奏若因朕此次巡幸致伊糜費家產朕亦不忍也○大學士鄂爾泰等議覆鑲藍旗漢軍都統弘暄等奏稱臣旗於乾隆三年由內務府領銀二萬五千兩照宗人府例一分五釐起息借給八旗官員生息賞給兵

丁復於乾隆七年將滋生銀兩本利覈明陸續交納原本其扣留奏明以三萬兩為準今於本年五月奉有減輕利息之旨查現在借出之銀雖三萬六千兩有奇恐將來扣存三萬本少利微難以滋息請扣留三萬五千兩減以一分起息所有贏餘仍陸續交本清帑應如所請從之吏部等部議准江蘇巡撫陳大受疏稱寶山縣典史向係賃居民房請照例建衙署從之丁未賑貸安徽壽州鳳

陽懷遠鳳臺泗州盱眙等六州縣及鳳中長淮泗州等三衛被旱軍民緩徵新舊額賦戊申諭湖南新設長安營乃楚南極邊苗疆要地山多田少又無商販可通兵丁所領月糧止數本身餬口其餘眷屬雖有官貯米石聽其支領扣餉銷算而兵丁又因價值腳費繁多難於支領是以設營以來業經三載而營丁中接到眷口者甚屬寥寥深可軫念查該營實兵九百二名著加恩每兵每月增賞

眷米一斗。每年共米一千八十二石四斗。俟數年之後。兵丁家室團聚。開墾荒地。日食有資。該督提再行奏聞酌減。此係軫念苗疆新營兵丁艱苦。他處不得援以為例。○已酉。大學士鄂爾泰等議奏。京師流民日多。已於五城飯廠增米。又議於明年二月內。將在京流民概行資送回籍。交地方官安插。無誤春耕。並諭各安室家。勿復外出。但貧民接跡而來。州縣豈能概阻。不可不於近京州縣妥協撫綏。請於京東之通州。京西之良鄉。分設飯廠二處。搭蓋棚舍。俾續來流民得就食宿。明春即在該處資送。更便通州交倉場侍郎辦理。良鄉交直隸總督派委道員料理。米石柴薪照五城例支給。至在京流民有願赴通州良鄉者。即給路費分遣。再至城內者。交五城御史即行遣送。從之。○定織造養廉額。尚書訥親議奏。前據杭州織造管北新關務蘇赫訥奏稱。織造兼理關務。江寧蘇州兩處各項經

費。均有定額。惟北新關向無定額。由管關之員按年支銷。期滿奏聞。亦未造冊報部。錢糧理應慎重。關口每歲員吏丁役一切雜費。約需銀一萬五百六十餘兩。請於一年期滿造冊送部查覈。至養廉為辦公日用幕脩等需。從前亦無定額。聽管關之員自行支用。多寡不齊。請交內務府酌定章程。旋據內務府議奏。查江寧龍江關辦公銀一萬五千兩。養廉銀一萬五千兩。蘇州織造兼管潯墅關養廉銀二萬二千兩。今專管織造養廉銀一萬兩。從前管北新關務各員約支養廉銀一萬二三千兩不等。惟伊拉齊任內。每歲支一萬兩。應照此定額。久遠遵行等語。查杭州至京較江寧蘇州為遠。除織造應得鹽規養廉銀一千六百兩外。再酌給銀一萬兩。似無浮多。應照內務府議定額。至蘇州織造祇支養廉銀一萬兩。亦屬允當。惟江寧未免過多。應一律定為一萬兩。將來如有交別員兼管者。已有

本任養廉不准再支從之。大學士陳世倌以葬親請假回籍。命吏部尚書史貽直教習庶吉士。命通政使勵宗萬在懋勤殿行走。是月直隸總督高斌奏來京就食災民已遵旨飭各州縣沿途勸阻回籍領賑安業。遠者照例留養。俟明春資送本籍安插。總不得令入京師。得旨知道了。有人奏流民多恐薰蒸成疫。故有此諭。又有人奏今年流民亦祇三四千之數。較之雍正二三年數至盈萬者尚為減少。朕反悔前諭之失斟酌矣。夫民不幸而遇災。幸有京師就食餬口之一路。又復邀之途而使空返焉。赤子其何以堪。卿其體貼前後所降諭旨酌中行之。○又遵旨議奏聖駕謁陵經過州縣安營除道所雇民夫實皆通縣輪撥。若以營盤道路附近村莊應徵錢糧造冊請豁則隔遠者不克一體霑恩。請照行圍之例將各州縣廳額徵蠲免十分之三得旨即

如此辦理可也。江蘇巡撫陳大受奏徐州府屬漕糧例徵粟米第民間種粟甚少有願將二麥交倉抵算者查於積貯平糶俱便應照以麥抵米例徵收得旨知道了。福建巡撫周學健奏鼓山為省城藩籬重地外洋瞭望要區請於鼓山寺添設汛地即於福協城守營內派出經制外委千把一員帶兵二十名駐劄寺旁按季輪換防守並添建營房得旨甚是之舉知道了。又奏請汀州府城添設育嬰堂每年需費二千餘兩於所屬各縣應繳鹽規內支用得旨應如是者知道了。湖廣總督阿爾賽奏乾隆五年城綏苗徭不靖旋即平定有把總李三省歐國璋巡檢王淦及外委兵役奉令撫諭逆苗被執不屈慘遭殺死又千總張文英把總王宗江張章以及兵丁人等皆攻勦逆苗臨陣傷亡請於長安營地方設祠歲祀並於逆苗入官叛產內撥給田二十畝以為春秋祭祀之資得旨是

知道了。○河南巡撫碩色奏豫省今歲被災糧價稍貴。滿漢兵丁所領月餉實不敷用。現屆歲底需用之時。請分別借給俸餉。千把每員借銀五兩。馬兵每名三兩。守兵每名二兩。於來歲二月起。作十個月扣還。得旨。此即常年亦可行之事也。○山東巡撫喀爾吉善奏辦理賑務情形。得旨。山東流民至京師者頗多。此必賑卹有不通給者耳。尚應飭屬員加意妥辦。不應存為國家惜費之小見也。○甘肅巡撫黃廷桂奏。甘撫衙門向有親丁名糧四十分。照馬步各半之例支食。內除給筆帖式二員十分外。實支三十分。為一歲應用紙張及門皂軍牢夜役各項口糧。本年接准部咨。令將親丁姓名裁去。改為養廉名糧。造報臣隨即按名募補。以實營伍。其紙張各費。即自照數捐備。惟筆帖式二員原食名糧十分。今止給歲額養廉。身家實難兼濟。應請仍照從前支食。得旨。知道了。又奏口外有從前

出征故兵骸骨。請俟春融。派員帶兵前往揜埋。得旨。此係應行之事。知道了。○四川巡撫紀山奏。川省松潘地處極邊。節氣寒冷。不產稻穀。全賴成都龍安等府接濟。本年因郭羅克頑番一案。駐兵及差使往來。需米愈多。市價昂貴。請於灌縣倉穀內動撥六千石。運往平糶。得旨。應如是調停者。○又奏郭羅克頑番不法。已委漢土弁目持檄前赴各寨。明切曉諭。令其擒賊獻贓。嗣據各酋目等環跪稽顙。懇請繳令回營。願將贓物賠繳。又追出鳥鎗牛馬等項。惟奎蘇共架寨之副土目林噶架父子。怙惡如故。應行勦辦。得旨。知道了。雲南總督張允隨奏。報昭通府永善縣瀕江一帶。於本年七月間。大雨連綿。山水泛漲。夾雜沙石。衝壓田地房屋。現已分別賑卹。查明附近官山。撥給耕種。並令搭蓋房屋。以免露處。得旨。知道了。

其敬上愛君之義尚皆出於純誠素風未泯朕心深為嘉悅但現在流寓民人甚多商賈輻湊以致本處之人漸染流俗以奢靡相尚若不及時力加整飭誠恐漸染習俗墮棄素風後人愈尚奢侈惟耽安逸所關甚重朕心時為厯念今雖議定嗣後勿許留寓外鄉流民惟是各行買賣甚屬殷繁其如何不致日漸加增之處自應留心經理至本處之人向於官差餘暇俱各力田躬耕以資生計今則本身自種者少雇民佃種者多將來生齒日衆若不務農業惟資錢糧度日費用又繁其生業有不日漸消微乎嗣後兵丁等除操演緊要官差外減其閑散雜差俾伊等得有餘暇親自耕作並著查明應行開墾荒地酌令自行墾種或借給籽種令其開墾以資生理又聞兵丁錢糧俱有扣項雖係因公坐扣相沿已久但每月所得錢糧若不多留有餘恐於伊等生計有礙自應通盤籌算裁減扣項

俾伊等留有餘資不致拮据著交該將軍大臣等公同悉心籌酌務期均霑實惠妥議具奏並令飭禁浮華務使人心風俗不致漸染崇尚淳樸生計饒裕勤加訓練技藝精強不失滿洲本色以副朕敦重根本崇尚素風至意又諭福建布政使張嗣昌已起身來京引見俟到時朕另降諭旨戶部議覆廣西布政使唐綏祖疏稱粵西恭城縣回頭山銅礦向例於二八抽課外餘銅官為收買每百觔給價八兩三錢現在礮口日深取砂工費已加數倍商人以不敷工本觀望不前砂課日絀請照收買客銅渣銅之數每百觔給價十三兩四錢又懷集縣將軍山河池州響水廠向止給價六兩八錢亦屬不敷該處開採較回頭山稍易請照回頭山舊例以八兩三錢收買查回頭山採礦商本不敷自應量加惟十三兩四錢未免浮多應照滇省廠價每百觔九兩二錢其將軍山廠響水廠准照回

頭山舊例支給從之。○命吏部尚書史貽直協辦大學士。○以原任山西布政使高山為福建布政使。○定邊左副將軍額駙策凌奏據巴彥珠爾克親軍喀蘭泰報稱準噶爾逃人格布克於卡倫外被噶爾丹策零所遣厄魯特拜什里拏獲。應令攜回。嗣後如有似此事件。於卡倫外被獲者。均照此例辦理。得旨甚是。知道了。○壬子。諭今年直隸所屬河間等處。偶被偏災。彼地貧民赴京覓食者。俱已加恩賑濟。不令失所。但其間尚有不在賑濟之數者。或手藝營生。或傭工度日。適值米價漸昂。當此歲暮天寒。情殊可憫。著戶部將京倉米石。酌量給發各旗局。及五城米廠。照依時價覈減平糶。賣與零星肩販之人。俾得沿途糶賣。使僻巷窮簷。皆霑實惠。再京城近日錢價。尚未平減。著仍照夏間平糶之例。將賣米錢文。赴市易銀解部。以平錢價。該部即速妥議辦理。○除浙江溫台。海洋魚船塗

稅。諭朕聞浙省溫台二洋。為魚船採捕之所。從前玉環未經展復以前。凡魚船在洋採捕者。汎兵需索陋規。無異私稅。後因展復玉環。該地方官惟恐經費無出。遂將陋規改收塗稅。以資經費之不足。此一時權宜之計也。而每年所委徵末員弁及丁役人等。往往借端苛索。上司查察難周。不無苦累。朕思濱海編氓。以海為田。每歲出沒於風濤之中。捕魚以餬其口。生計淡薄。應加軫恤。況自玉環展復以來。地方所有錢糧。已敷公事之用。無庸更收塗稅。著將此項永遠革除。免致不肖官弁丁役苛刻需索。擾累貧民。該部即行文該督撫知之。○戶部議覆奉天將軍額爾圖等議。奏御史明德條陳奸商私囤糧石。藉邊外蒙古人等進關販賣之便。攬載運至臨榆縣屬沿海有船地方。偷運入海。請設法查禁。查關內臨榆盧龍等州縣。向資奉天米糧接濟。是以舊例止禁海運。不禁陸運。茲既有奸商私

因偷運他處。應交奉天府尹嚴查辦理。嗣後如邊外蒙古人等進關糶賣米糧。邊門章京呈報西錦州副都統詳查。給與印文沿途查驗。奉天旗民進關販賣者。報明該地方官。查係本家餘糧。亦呈報錦州副都統錦州知府行文沿途查驗。准進關隨到隨賣。不許積貯。又山海關內沿海州縣捕魚船隻攜帶米糧往鄰邑販賣者。應飭天津寧河等處州縣於給船票時查明實係本地民人裝載米數。給票販賣。同時文武衙門詳查出入各數。倘有私越外洋立即詳究。或巨船可入大洋者。不得濫行給票。均應如所請從之。○禮部侍郎張廷璐以老病乞休得旨張廷璐尚不甚老。禮部事務亦簡。暫且供職。俟明年秋冬具本再奏。○癸丑。

上詣

皇太后宮問安。○諭據公豐安奏伊父豐陞額在日曾借鑲藍旗生息銀四千餘兩現在無

力完繳。請借俸五千兩作速完項等語。豐安乃功臣之孫。伊高祖揚古利宣力國家。勞績懋著。豐安現在家計艱難。若俯照所請賞借俸銀。則伊每年無俸可支。生計愈致艱窘。著由廣儲司支銀五千兩。賞給豐安。完此欠項。以示朕軫念勲臣勞績。加恩子孫之至意。○工部議覆署兩廣總督策楞疏稱廣省河南廠及芷芎廠新歸省。廠修造外海船隻。原定監修之廣南韶道高廉道駐劄寫遠。請將河南廠改歸鹽運司經管。芷芎廠改歸糧驛道經管。其府修內河船隻亦令該二道各半督修。不得仍前委佐雜千把微員料理。又本地木植稀少。請於六個月前。委員領銀購辦。均應如所請從之。○又議覆江蘇巡撫陳大受疏稱寶山縣采淘港等處外護塘工前因風潮衝塌。奏請改建護塘石壩。茲復勘得采淘港南首並無坦壩保護。應請接築單路石壩一百丈外築石坦坡加釘排樁。又吳家濱迤

南靠壩加築石坦坡并東門外土塘一百七十五丈加高二尺應如所請辦理從之旌表守正捐軀之四川綿州民戴永珍妻謝氏

（甲寅）

上御乾清門聽政（詣）

皇太后宮問安（兵部議覆福建巡撫周學健疏稱福寧府霞浦縣桐山地方前經添設福鼎縣治應將霞浦縣原設舖司兵六十名內之蔣洋等舖司兵二十三名割歸福鼎管轄

其霞浦存留舖司兵三十七名僅數原舖分遞柘洋地方移設巡檢應於柘洋青林面嵐中觀音亭嵐下等五舖每舖添設司兵二名共十名又福鼎地既衝要公文較繁應於水北翁潭周倉嶺激城等四舖再各添兵一名連割歸共三十七名照例支給工食應如所請從之○以廣西故遷隆峒土官黃在中之子黃文光四川故納奪黎窩土百戶工布交之子七丁登朱上革齋土百戶六枯之子登

朱他咳土百戶格冗塔之子雍中達襲職（乙卯）

孝惠章皇后忌辰遣官祭

孝東陵○諭山東今歲濟東武三府偏被旱災雖現在加恩蠲賑但念來歲麥秋未接之候被災獨重之區遽行停賑小民難以謀生著於今冬例賑之外將陵縣德平原德州德州衛惠民樂陵海豐濱州商河霑化武城等十二州縣衛成災六七八九分之極貧者加賑兩個月七八九分之次貧者加賑一個月其糧即於撥穀截漕內通融散給其或本色借糶需用即照恩加一錢之例均勻折給此十二州縣衛成災五分之戶不得與賑者仍照例酌借口糧該部遵諭速行（丙辰）

上詣

皇太后宮問安○議政王大臣等議覆川陝總督慶復疏稱定邊協口外之寧條梁四十里舖石渡口三處經前督臣查郎阿請各築土

堡一座。派弁兵駐守。原為軍興時商民湊集而設。今軍需停止。行旅稀少。無需建堡。惟寧條梁有居民三百餘家。應請於寧塞堡撥出把總一員。帶馬守兵四十名移駐。將前督臣奏請移駐之備弁兵丁。撤回原處安設。至四十里鋪。石渡口二處。仍照原議派駐巡查。衙署兵房酌量添建。應如所請。從之。○丁巳。諭軍機大臣等。天津河間等處。今年被災。業已加恩賑卹。第歉收之後。米價頗昂。來歲青黃不接之時。民食未免拮据。所當豫為籌畫。現據總督高斌奏稱。動撥司庫銀兩。委員前赴奉天採買。明春凍消。運回平糶等語。現在曾否買就。并運回之後。是否足敷接濟。如或不足。明春山東河南漕船。經由直隸地方。即可於此內酌量截留。以備該處平糶借給之用。爾等可寄信高斌。令其速議具奏。○戊午。

上詣
皇太后宮問安。○諭前因川省松潘引多茶壅。

故將天全州之積引。改撥成都彭灌等縣行銷。每年空繳引張。賠納稅課。官商交累。乾隆六年。朕降旨開除成都彭灌三縣積引四千四十九張。併課稅銀二千四百一十七兩二錢。從乾隆七年為始。官商均受其益。惟是乾隆七年以前之羨餘截角。尚屬拖欠。成都未完銀五百六十五兩二錢。彭縣有未完銀四百三十兩九錢六分零。灌縣有未完銀一千二百九十七兩九錢二分零。川省茶商資本微薄。無力復完舊項。朕心軫念。著將所有三縣舊欠。悉行豁免。以示朕優卹商民之意。該部即遵諭行。○又諭。昨歲江蘇安徽兩省被災獨重。是以竭力賑卹。復恐民隱未能上達。民俗或未休淳。宵衣軫念。用是差員前往巡視。宣諭化導。今年仰蒙

天恩。兩江薄有收穫。民情業已相安。朕思移風易俗。非可期以歲月之事。而三四人亦豈能遍及閭閻。若徒視為虛文。毋寧省其繁令。惟

在地方有司。實心體朕愛養百姓之念。與民休息。彰善癉惡。則風聲樹。而日計不足。月計有餘矣。所有命往宣諭化導使。著於明春回京。○工部議覆左都御史管廣東巡撫王安國疏稱。海康遂溪二縣濱海隄岸。前經加築四千九百餘丈。應請於保固三年後。如遇衝激過甚。民力難施者。准地方官勘明估報。動項興修。應如所請。從之。○添派稽察左翼宗學滿洲文臣一員。從詹事業一棟請也。○以

貴州故朗溪副長官司土官任世澤之子任秉鑑襲職。○已未諭京師米價昂貴。現在平糶。尚恐未能驟減。明年八旗春季甲米。向於二月給放者。著改於正月初十日放起。○戶部議覆漕運總督顧琮疏稱。江淮衛領運頭幫千總席榆。四幫千總李愉。前在壽張營汛脫空。經部議以降二級戴罪督運。今已將領運漕糧交納通完。應請將降級開復。查定例。運官脫幫遲誤。降二級戴罪督運。並未載有

完糧後准其開復之條。惟過淮踰限定例。內開革職戴罪督押之員。總漕於完糧後題請開復。又定例。經徵漕米未完。降級戴罪督催者。完日開復等語。所有原叅脫幫之席榆李愉二員。應照此例辦理。並請飭知兵部。著為成例。從之。○又議覆雲南總督兼管巡撫事張允隨疏稱。開化府馬白地方。路通交趾。都竜廠舊設稅口。抽收商稅。近因該國有沙匪之亂。經臣調撥官兵前往沿邊各隘稽查堵

禦。嚴禁客商出口。所有額稅無從徵解。請暫停抽收。應如所請。從之。○工部議覆調任江西巡撫陳宏謀疏稱。江西糧道原與布政使司同一衙門。自奉文關防之後。大堂專為布政使治事之地。糧道止分內宅住屋。又皆年久塌損。請動項修理。並添建堂衙庫藏。又該道廣盈庫大使一缺。前設官時。亦未議建衙署。賃住民房。與庫隔遠。一律添建。應如所請。從之。○又議覆甘肅巡撫黃廷桂疏稱。平番

縣大通河。修建永利橋。於三年限內。被水衝壞。應將用過銀兩。著落承辦原員賠繳。並將橋梁移至舊橋南三十里下窖堡。水勢緩處重建。應如所請。從之。○太常寺奏。神樂觀改為神樂所。應請改給印信。又神樂所向設提點。知觀共三員。除提點一員。毋庸更改外。其知觀二員。亦應改為知所。該員等每年例支俸米十二石。並無俸銀。今已改為樂員。應照伊等品級賞給俸銀俸米。得旨。不必賞給俸銀俸米。餘依議。○庚申。諭本日刑部覆奏福建二案。因此事係該督摺奏。刑部亦即用摺。朕思此二案。該督以事應密奏。故無揭帖。但俱關人命。該部仍具本題覆為是。可將原摺發交該部。換本具題。奉旨之後。六科接旨。亦不必發抄。即令該部密行文該省。遵旨完結。嗣後各省督撫摺奏事件。有關係人命。發交部議者。俱著照此辦理。○戶部議覆雲南總督兼管巡撫事張允隨疏稱。寧州。寶寧。浪穹。

景東。元謀等府州縣。於雍正五年至十一年。虛報開墾。並節年被水衝塌民屯田地。共五十頃七十畝有奇。所有額徵。請予豁免。應如所請。從之。○兵部議覆四川巡撫紀山疏稱。麻林土百戶工布病故。無人承襲。請將遺缺註銷。每年應輸狐皮折銀。亦請開除。又下瞻對雲多儀蓋等三處。實無田地可耕。歲徵賦額。並請豁免。應如所請。從之。○命廣東按察使陳高翔來京。以原任福建布政使張嗣昌為廣東按察使。○調直隸宣化鎮總兵譚行義為山東登州鎮總兵。○予順天。明兵部尚書盧象昇。故滄州知州姚孔鎰。安徽故巢縣知縣嚴覺。寧國縣知縣陳養元。石埭縣教諭朱澄。江西前任巡撫大學士白潢。河南。明分巡大梁道李乘雲。故桐柏縣知縣高士鐸。臨潁縣知縣沈近思。山東故魚臺縣知縣馬得正。登州鎮總兵王文雄。雲南前任學政魏方泰。入祀各該省名宦祠。順天。故刑部右侍郎。

周道新翰林院侍讀學士薄有德內閣學士郭棻員外郎韓萬吉御史張蓮吏部侍郎加尚書銜李旭升禮部尚書李周望翰林院檢討曹傳江蘇明布政使叅議丁元復贈按察使沈受宏安徽故左都御史楊汝穀温州府知府盧璣新陽縣訓導周家祺禮部尚書吳襄浙江故禮部尚書陳詵左都御史沈近思河南故內黃縣教諭董萬山儀封縣教諭呂復恒山東故阜城縣知縣李華國入祀各本籍鄉賢祠○旌表守正捐軀之山東博山縣民史明妻杜氏○辛酉諭朕為旗人生計再三籌畫屢沛恩施但念本年米價稍昂又值年終諸物皆貴八旗貧苦世僕未免窘迫朕心深為軫念著加恩八旗各賞銀一萬兩分與滿洲五千兩蒙古二千兩漢軍三千兩令各旗查明實在貧苦之人不論各甲喇佐領統計人口多寡各賞銀二三兩並著該都統等曉諭衆人勿將賞賜銀兩妄行糜費務期

均霑實惠又內務府三旗亦每旗各賞銀一萬兩交內務府大臣等一體查明賞賚所有賞銀著由廣儲司支領即行賞給○壬戌上詣

皇太后宮問安○諭哈密向派章京二員筆帖式一員前往駐劄辦理回民事務新舊交錯二年一換瓜州亦派章京筆帖式各一員前往辦事照哈密之例二年交錯更換朕思二年一換為期太速未能熟悉邊情嗣後著定期三年仍照例新舊交錯更換庶於邊方有益○又諭曰內務府補放司員竟有春季纔補員外郎秋季即帶領補放郎中者凡遇陞轉理應按其資格擢用倘不論行走年分止以目前差委熟識之人屢登陞進之階豈年久俸深人員果俱不可用耶若謂現出之缺緊要俸深補授之人未必即諳某司之事則補授後伊等酌量對調亦無不可嗣後遇有陞缺揀選人員應擇其年深人去得能辦事

者帶領引見。如有年分雖淺。人實超衆。才具優長。其缺必需此人者。聲明緣由具奏。帶領引見。著為例。○御史陸秩奏。月選州縣。現於九卿驗看時。摘問律例數條。因思吏治尤以教養為先務。請再就教養事宜內。摘問一二條。表裏相資。於民生更有裨益。得旨。摘問州縣官律例。不過驗其留心政務與否之一端。非謂為治之本。繫乎此也。即如所奏摘問教養之事。尤恐空言無補。比之條對律例。益滋蔓矣。所奏不准行。○旌表守正捐軀之直隸寧河縣民蘭從舉媳苗氏。河南考城縣民李霖樞妻徐氏。○癸亥。皇六子永瑤生。○大學士福敏。以衰病乞休。得旨。卿才品優長。老成恪慎。內廷講誦。宣力多年。特簡綸扉。正加眷注。著照舊供職。不必以老病求罷。尋又諭曰。大學士福敏。以年老求退。朕已降旨慰留。但掌院學士事務。恐不能兼顧。著大學士鄂爾泰兼管。○太學士鄂爾泰等議覆。署兩江總

督尹繼善。江南河道總督白鍾山。覆奏河務三條。一。疏通毛城鋪減水壩。以保北岸新工。前欽差大臣奏請填高壩門水底。廷議以分洩過多。恐黃水日進。近河處所。日就淤墊。且流分勢緩。河身必致日高。行令臣等詳悉辦理。毛城鋪從前原有支河十餘道。未免進水過多。近年支河淤平。僅留倒勾河三道。進水無幾。以致南岸漸高。黃河大溜。全注北岸。若再將壩門水底填高。則過水不行。難以分洩。今將現在之倒勾河道。相機疏通。進水並不致過多。且徐州以上。地勢緊束。黃流湍急。北岸石林壩。又已堅堵。水勢俱由中洪暢達。毛城鋪支河。祇分洩有餘之水。並非正流旁趨。河身自無淤高之虞。至豫省上江近河處所。仍當隨時疏濬。一。天然壩導議改建石壩。前欽差大臣奏請將天然南北二壩。酌定尺寸。改建滾水石壩。使水大則自能漫過。水小則可以貯蓄。臣等所過計者。恐出格之水。湖不

能容。既欲減洩異漲。添建滾壩。不若仍循舊制。操縱由人。是以覆請仍用土壩。並不敢謂平時輕為開放也。隨奉諭旨。以開放天然壩。係不得已之下計。令臣等敬慎遵辦。天然壩既不便開。應請仍建滾水石壩。一高郵三壩上下。及昭關壩之上。遵議添建石閘七座。前欽差大臣。以高郵三壩。衆水下注。興鹽等處。必受其患。奏請添建石閘七座。但下河山盱滾壩。共寬二百丈。七閘金門。止議各寬一丈

二尺。共止有八丈四尺。較之三壩舊制。寬一百八十丈者。廣狹懸殊。且山盱地方。議建滾壩二座。口門共寬一百二十丈。連舊有之三滾壩二百丈。已共寬三百二十丈。而尾閘之石閘。僅止八丈四尺。較進水處不及十分之一。雖入江之路。稍有分洩。而就近趨下。頂衝之高實。先已難支。臣等細察情形。三壩既不便開放。請於三壩之中。除中壩洩水過多。不得輕開外。南關車邏二大壩。脊高於河底。自

八尺餘寸至九尺不等。每遇汎發。始與壩脊相平。今均改為滾水石壩。再將壩脊加高五尺。則高出河底一丈三四尺不等。平常水發時。七閘可以啟閉。二壩不致過水。如遇湖河異漲。七閘不足宣洩。高實一帶堪虞。始從壩面過水一二尺。水一平壩。便已斷流。必不致奔騰漫溢。而湖河甚漲之際。又可少殺其勢。雖有異漲。旬日即退。如此稍為變通。上而淮揚免壅潰之虞。下而興鹽無滄漫之慮。且與

山盱新建之壩。形勢相應。再查南關車邏二壩。現議改建石壩。雖將來洩水無多。然去路亦宜豫籌。倘由壩下之官河。以達興化。由興化而東趨梓新。白塗等河。以出范隄。再由丁溪小海以入海。原皆舊時道路。現在水皆東下。海口並不高昂。祇因河身淤狹。水勢不能暢出。民田未免受淹。今擬將通海各河疏濬。再將窪下之地。督民修築圩圍。方為有備無患。均應如所請辦理。惟下河從興化入范隄

歸海。路甚遼遠。沿海地面。本昂於內地。無論通海支港。潮汐往來。難以施工。且范隄各閘。原為串場河運鹽河道出水之路。常時閉多。啟少。若疏濬寬廣。必致鹹水倒灌。且高寶興鹽二百餘里。形如釜底。運河分洩之水稍多。必致漫淹普徧。方能東歸入海。事關重大。應令該署督等再行妥議。從之。○吏部議覆甘肅按察使鄂昌奏稱藩臬陞見。及遇有陞調事故離任者。應令道員署理。如道員內一時不得其人。而該司尚能兼攝者。亦即委該司攝辦。應如所請。從之。○御史永世奏。理藩院蒙古外館。係各邊進貢蒙古等往來居住公所。其應給廩餼。及蒙古等牲畜。應入官廩喂養者。俱由館查報理藩院辦給。但到館人員名姓。及跟役牲畜數目。必須譯出清字。方可查辦。向派科道稽查。多非蒙古人員。不能譯清。止據買賣通事鋪戶人等。詢報轉行。殊非體制。且於給發廩餼。恐有需索勒措情弊。請

敕下理藩院。選通曉蒙古文義蒙古筆帖式一員。蒙古領催一名。每日進館。領催詢明姓名數目。筆帖式繕清咨送科道。鈐用關防。轉行理藩院照例辦理。下理藩院速行。○涼州將軍烏赫圖等奏。夷使吹納木喀帶回藏地之喇嘛羅卜藏丹怎。經臣等詢問。係從前策妄阿喇布坦。留下未經遣回之人。居住二十六年。今因熬茶之便。懇求回藏。請照上年喇嘛噶津林沁之例。留於羅倫布廟居住。交郡王頗羅鼐善為防範。得旨。羅卜藏丹怎。係在準噶爾久居之人。不可深信。若令在藏居住。恐有私行送信之事。著索拜將羅卜藏丹怎。及從前回藏之噶津林沁等。俱送至京師寺廟安置。○命四川按察使姜順龍來京。以湖南岳常道倉德為四川按察使。○琉球國中山王尚敬遣使表貢方物。賞賚筵宴如例。○甲子

上詣
皇太后宮問安。○諭陝西蒲城縣王幼女被殺

一案。陳惠正用刑誣服。牽連無辜。經塞楞額題參。已降旨將陳惠正交部察議。今據慶復奏稱。陳惠正面稟。此案巡撫將本司附參。心有不甘。已具密摺辯明。並將揭部科印文。交家人帶往京中。若摺子已蒙恩准。即將原文帶回。不必再揭。若摺子不准。即令投揭部科。於回陝日。再向總督衙門補揭等語。陳惠正前有奏摺。乃請嚴抑勒換招改詳之例。並未申辯王幼女被殺一案。乃於督臣前捏稱密奏。並稱若蒙恩准。即將通揭部科印文帶回。若摺子不准。即令投揭。夫朕之批示奏摺。伊家人何由得知。即使將摺發出。而不准則投揭。准則中止。又豈家人所能主持。其中顯有探聽商謀情弊。似此居心行事。甚屬狡詐欺罔。陳惠正著革職。交與該督嚴審定擬具奏。○工部議覆。河南巡撫碩色疏。稱歸德府屬之永城鹿邑及陳州府屬之淮寧西華四縣。頻年被水。總由界連江南。事關兩省。疏濬之

事。格礙難行。今酌疏通之法。其壤接江省者。移咨會商。其水道在豫者。先行開濬。查永城一縣。與江南碭山蕭縣宿州毗連。其縣境北隅。有洪溝河一道。上接碭邑毛城鋪。減黃河之水。注宿州之睢河。而歸洪澤。其上游碭蕭二縣境內。又有蔣溝河。巴河二道。以分洪溝瀉黃之勢。亦由蕭邑匯歸睢河。自蔣溝年久淤塞。又將巴河堵閉。毛城減下之水。盡歸洪溝。不能容納。以致黃水漫溢。永邑屢被其災。又該縣城北。另有巴溝一道。西接虞城。夏邑之水。東亦達於睢河。因下游宿州翟家橋地方。中隔沙礮。不能下洩。遂致溝身淤墊。淫潦為害。臣移咨江省。據覆稱。蔣溝已經開浚。巴河土壩。現有洪溝宣洩。無庸開放。沙礮俟下游五湖工竣後。再議疏通。查今歲夏秋水不盛漲。故洪溝尚能納黃。一遇汎水漲發。不開巴河。洪溝豈能容受。至沙礮距五湖甚遠。其下游即屬睢河。若通沙礮。則水歸睢河。亦不

必待五湖工竣而後施工。且將溝於開通後。又復淤墊數里。亦應再加挑浚。至豫省本境河渠。當乘來歲春融。趕緊疏濬。巴溝俟沙壘開通後。再行挑挖。永城又有王家古溝一道。在洪溝河西。因黃水漫溢。淤為平陸。應循舊跡開通。又淮寧縣境內有灌河一道。起自該縣洪山廟。下至范家橋。入鹿邑縣境。即為黑

河。直達江南之太和縣。兩邑之水。俱藉此二河宣洩。近年灌河淤墊。黑河底淺岸低。每遇

實錄卷二百六

二十六

大雨時行。即致泛漲。又鹿邑縣清水河。亦起自淮寧。下達江南之淝河。河身亦甚淺窄。應將灌河挑濬寬深。俾上流通暢。其黑河清水河。地勢低窪。未便挑挖。應於兩岸加高隄堰。束水下流。其淮寧縣尚有沙河清流河。柳涉河。蔡河。鹿邑縣尚有三里河。八里河。急三道河。小明河。或隄岸單薄。或間有墊淤。均應幫培修浚。至西華縣疊被水災。實由地勢低窪。河道盡屬深通。無庸議浚等語。應行令江南

總河總漕巡撫委員詳勘。妥酌辦理。其豫省各河。均准來春確估辦理。從之。○準噶爾進藏夷使吹納木喀。遣圖爾都等至京謝恩。表貢方物。○補行浙江福建山東乾隆七年軍政共卓異官十二員。不謹官一員。罷軟官三員。年老官三員。有疾官二員。才力不及官二員。浮躁官三員。分別陞賞處分如例。

實錄卷二百六

三十一

大清高宗法天隆運至誠先覺體元立極敷文奮武孝慈神聖純皇帝實錄卷之二百六

大清高宗法天隆運至誠先覺體元立極敷文奮武孝慈神聖純皇帝實錄卷之二百七

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務

世襲騎都尉軍功十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆八年癸亥十二月乙丑諭昨據慶復奏

實錄卷二百七

稱陳惠正因王幼女一案被巡撫塞楞額題
參陳惠正具密摺申辯並帶有揭部科之文
若奏而不准則將揭帖投遞部科准即中止
朕覽奏即知其必與伊兄陳惠華商量特命
大學士等詢問據陳惠華奏稱惠正原有辯
摺及部科揭帖遣家人齎送來京寄信與臣
臣以惠正係被參現交部議理宜靜候何得
瀆辯立將奏摺並揭帖令家人帶回等語陳
惠正以密奏之摺及用印之文齎送來京與

伊兄陳惠華相商投遞與否伊既欲駁回豈
有不奏知於朕之理况伊身為大臣既深知
其非即當據實參奏乃隱匿不發及朕詢問
始行奏出大臣事君豈容如此詐偽夫父為
子隱子為父隱直在其中朕非不知以此風
示天下然君臣之倫實在弟兄之上陳惠華
著交部嚴察議奏○又諭三年京察之期朕
命自陳之大臣舉賢自代者原係朕寤寐求
賢欲多得人才之意且視其所舉亦可覘其
人之識見心術也乃臣工等不能深喻朕旨
陳奏紛紛如御史陳其凝奏稱自陳之人若
人人可信其賢則不宜聽其乞罷遂其高尚
而無庸舉賢以自代等語夫舉賢自代在大
臣為推賢讓能在朕為儲才備用豈有大臣
中舉一人即將舉一人者更換之理乎又云
自陳之大臣有意避嫌勢必博採名望而處
士虛聲終南捷徑所謂賢者不賢矣如必親
知而後舉則呈身識面自昔所譏不能保其

實錄卷二百七

二

無攀援黨附之私等語。夫大臣薦賢必當享公論而協衆望。若親知者既疑其黨援而採望者又謂為捷徑。是薦賢竟屬必不可行之事。古云進賢受上賞。蔽賢蒙顯戮。又何以稱焉。又云為大臣者如無可信之人。即照例具本自陳。不必拘於定例。勉強塞責等語。如此勢必至於人人緘默。不舉一人。豈闢門顯俊之典。獨不可行於今日乎。禮云爵人於朝與衆共之。昨李清植奏請明舉尚屬可行。朕已勅九卿科道集議矣。夫朝廷綸綍下頒。如果事有未當。雖面折廷諍。亦為朕所取。若徒於語言文字之間。深文辨駁。既大昧事君之體。而適見其識見之卑矣。此風斷不可長。陳其疑著嚴飭行。○戶部議覆貴州總督兼管巡撫事張廣泗疏稱。南籠府屬坡坳板堦地方。開採硃砂雄黃。應照二八抽收之例。每百觔抽課二十觔。所抽課砂課黃價值不能豫定。應令管廠人員照依時價變賣。於年底分晰

造冊報部。再二廠地皆僻壤。砂黃售賣必須解省招商。需用腳價雜費。請即在於抽收砂黃課價銀內與各員役養廉工食一律開支。均應如所請從之。以故二等子般達爾沙之子班帶三等男明中之子永昌襲爵。以四川故霍耳咱安撫司阿旺初中之子阿旺勞丁上八義土百戶雍中多爾濟之子扎什喃金襲職。旌表守正被戕之山西偏關縣民白奇英妻張氏。直隸獻縣民葛某女葛氏。○丙寅諭曰。廣西李梅案內李捷三廖士美等。乃緊要重犯。緝拏已經二年。而兇徒尚無一獲。則地方文武官弁疎忽怠玩。可知其潛匿經過之地。此時固無從指叅。然將來拏獲之後。必一一究出。將該管員弁加以嚴處。不稍寬貸。著該督撫提鎮等出示遍行曉諭。俾知儆惕。無貽後悔。○吏部議覆左都御史管廣東巡撫王安國疏稱。欽州濱臨大海。與安南國地界犬牙相錯。雍正十三年將州判一

員移駐東興並未頒給關防查欽州州判撫輯民夷實為分疆要任應請於本省州判內揀員調補並鑄給欽州分防東興州判關防應如所請從之○禮部議覆給事中程盛修疏稱元旦冬至

萬壽聖節

皇上常朝御殿凡丹墀內文武官員舊皆按班列坐近定賜茶之典經禮部樂部議令文官三品以上武官二品以上方得坐班餘皆起立臣思大典攸關觀瞻所在與其坐立之錯綜不若班行之整肅除賜茶之典遵旨改定外其殿外簷下及丹墀內文武官員應仍照舊制序坐應如所請從之○以故教漢扎薩克固山貝子諾們額爾和圖之弟達色襲爵○以故一等男兼一雲騎尉胡世勲之子胡松齡二等男伍十之子廣福三等男法保之子五十襲爵○準噶爾部人那木喀濟木札率屬十人來降命賞給安插如例○丁卯

上御乾清門聽政召大學士等前曰今年冬至以後天氣過暖京師得雪甚微且星象見異至今未退數夕之前其芒為月所掩故不甚顯昨月出稍遲則不減於前矣朕思

天心仁愛垂象示儆必政事之間有所缺失我君臣當夙興夜寐勤加修省以回

天意惟是應天以實不以文修省之實非徒託之空言也且書不云乎王省惟歲今歲序將周正其時矣我君臣必深思所以致此之由缺失何在亟圖悔改庶幾盡事天之道有以感召和氣而消未萌之眚也○諭軍機大臣等昨據陳大受奏報江南挖除蝻子之法朕已降旨將原摺抄寄高斌令其留心照此辦理夫蝗蝻之生多由卑濕之地復經水旱所致直隸河間地勢低窪天津則係濱海今年既已被災入冬又復少雪恐蝗蝻潛生暗長有妨明歲田禾此時切須豫為籌辦爾等可再寄信去○戶部議覆貴州總督兼管巡撫

事張廣泗疏稱天柱縣相公塘東海洞等處出產金砂。地係曠野。並無干礙民田廬墓。前令商民試採。已有成效。請准開採。照例抽課。暫令天柱縣就近督採。俟旺盛。再議委員兼管。添設書役。所抽課金。估照成色。變銀充餉。應如所請。惟每金一兩。抽課三錢。及於抽課之中。支給廠費。俱與成例不符。應令該督另行妥議辦理。從之。○工部議覆浙閩總督那蘇圖等疏。稱崇安之分水關。路通江西。為閩省西鄙屏蔽。關墻塘房。應請修造。撥兵八名防守。該地舊設巡檢一員。僦居縣城。亦應移駐大安舊驛。添建衙署。又光澤之杉關。直抵江西新城。地當衝要。舊設目兵四名。應添派把總一員。再抽兵六名稽查。又福鼎之分水關。界連浙江。詔安之分水關。地隣廣東。已設千總一員巡緝。關城亦應勘修。再浙省之仙霞安民草萍等關。地皆險要。城柵傾圯。均應修造。應如所請。從之。○以兵部左侍郎汪由

敦充經筵講官。○調涼州將軍烏赫圖為西安將軍。西安將軍綽爾多為涼州將軍。○以故奉恩將軍宗室英俊之弟英勇襲職。○以甘肅故撒喇族土千戶韓大用之子韓振武。四川故祈命寨土千戶郎阿之子拔各肖襲職。○戊辰。湖廣總督阿爾賽等奏。洞庭湖航桿洲石臺。舊例發帑歲修。原為利民起見。今臺基朽腐。臺身損裂。行舟畏其撞觸。避之惟恐不遠。且地居下游。舟楫往來。多由君山一帶。水涸時。湖深尺餘。港汊亦易灣泊。無藉石臺。請停止歲修。得旨知道了。又阿爾賽奏。兩湖塘汎營房烟墩望樓。亟須修理添建。兩省各需銀一萬兩。上下為費既多。非地方官所能捐辦。湖北請於司庫內支一萬兩。辦理湖南無閒款可動。即支歲修石臺銀一萬兩。為修建塘汎之用。工竣後。每冬交巡道查看。諭據湖廣總督阿爾賽奏。稱湖北湖南二省塘汎營房墩臺廢壞不整。相沿已久。實須急為

興修以固邊防。除向來已接交代者。仍著落各州縣修整外。其應行設立而廢置未舉者。自當照本地成式辦理。今約畧估計。北南每省各需銀一萬兩。上下為費。既多。非地方官所能措辦。仰懇天恩。准於司庫公項內。動支銀一萬兩。應用。至湖南公項。現在不敷。難以支撥。臣與撫臣蔣溥。查勘洞庭湖舵桿洲石臺情形。另摺奏請。無庸歲修。所有原存歲修石臺本息銀兩。既可不用。請即於此內動支一萬兩。以為修理塘汛之費。修理之後。兵丁住房。應令自行隨時修整。毋許推諉。其官廳墩臺望樓等項。照依定例。文員修竣。移交營員收管。每年冬月。道員出巡時。留心查看。如有傾圯頹敗等弊。即行揭叅等語。楚省武備廢弛已極。不獨塘汛墩臺一項也。今欲修建完整。費用浩繁。諒非地方官所能措辦。著照阿爾賽等所請。動用公項銀兩興修。但此後保固修整之處。該督撫提鎮。應不時查察。若

稍有疎忽。仍蹈前轍。則責有攸歸矣。○戶部議覆貴州總督兼管巡撫事張廣泗疏。稱鎮遠銅仁二縣。並鎮遠思州黎平三府。例應行銷川鹽。但該地人戶攪雜。楚省地界距川寫遠。民苗就近買食淮鹽相沿已久。應從民便。改食淮鹽。惟是鎮遠等府村落零星。夷多漢少。買食不常。其行銷引目。遽難懸定。應令淮商試銷一年。再為增引定額。應如所請。行令兩淮鹽政會同各該督撫。將試銷納課各事宜妥議具題。從之。○又議覆調任江西巡撫陳宏謀疏。稱江西省甲子年應運粵東米石。准部咨令運赴湖南分貯。應請運至岳州漕倉交卸。又船號既多。運官勢難兼顧。應照湖南運閩穀之例。募人看管。每名日給工食銀五分。同時無船可坐。每名酌給銀二兩。不給工食。應如所請。從之。○以故奉恩將軍宗室巴延之子尚福襲職。○贈故貴州提督韓勲為右都督。照例賜卹。諡果壯。○予廣西義寧

縣遇賊被戕之下雷州吏目魯懋蘆田市巡檢魯器各廕一子監生已已

上詣

皇太后宮問安諭據盛京兵部侍郎春山奏稱盛京等處驛站每年大驛各出銀十六兩小驛各出銀八兩餽送侍郎盤費又出銀四百兩餽送正副監督此外逢節又有規禮其二十九驛驛丞一年所得俸銀三十餘兩又皆餽遺侍郎各計有一千餘兩凡此皆係驛丞自送因而驛丞有所恃以無恐將錢糧任意花費雖馬匹疲瘦短少侍郎與監督俱置不問等語餽送陋規原干例禁盛京陋習相沿料非一任若事窮究未免拖累多人今姑寬其已往嗣後著永行革除如有再蹈前轍者必從重治罪至於各省驛站或有此等情弊亦未可定向來設有巡察御史稽查今巡察既裁督撫更當留心查察使積習漸除驛務不致廢弛若日久弊生或經科道糾叅或

欽差大臣經過查出朕惟爾督撫是問該部即遵諭行大學士鄂爾泰等議奏署兩廣總督策楞等議覆布政使唐綏祖請廣西各州縣訓練鄉勇查粵西所屬如臨桂靈川興安永寧永福全州永安恭城賀縣修仁岑溪桂平貴縣宣化隆安橫州永康雒容柳城羅城融縣來賓宜山思恩東蘭上林遷江西隆凌雲天保歸順鬱林博白北流陸川興業等三十六州縣原有設立鄉勇堡卒耕兵隘丁狼丁土丁止須汰其老弱另選補額富川蒼梧懷集平南武宣上思養利左州崇善寧明馬平懷遠象州天河河池武緣西林等十七州縣逼近苗獞或係邊隘已飭扼要村寨量行設立義寧一縣已經設協安兵又陽朔灌陽平樂荔浦昭平藤縣容縣永淳新寧賓州奉議等十一州縣皆非苗疆均無庸設此項鄉勇原有額設仰食公田及公給口糧者仍舊其新設者應照鄰近州縣公給口糧之例

聽民自行辦理。再於每歲農隙時。令各州縣傳操一次。其遠鄉。乘公便下鄉。就近操練。或委巡捕等官查操。不必會同營汛。有技藝可觀者。量賞鼓勵。遇有調遣。照土兵例。給鹽菜口糧。事竣分別獎賞。並應如該督撫所議。惟委巡捕等官操閱。恐致滋擾。未便准行。從之。

○署福建巡撫周學健奏。閩省將軍旗營甲兵。及督撫各標官兵。每冬將軍督撫會操。需賞號等銀一千兩。又駐防八旗官兵。每歲演放大礮。需絳紅袋靶人夫等銀八十兩。向於耗羨存公銀內動支。經前督臣以公用不敷。奏裁。閩省邊海重地。練習行陣。演放礮位。事關緊要。此項銀兩。實難停止。查有寺租歸公一項。除每年完納額糧。修理壩工外。尚餘穀二千一百餘石。撥兵充餉。此係寺廢餘租。本非額徵糧稅。請撥作會操演礮之需。所取租穀。照折中價。每石五錢。適敷支應。仍遞年歸入存公冊內報銷。得旨允行。○庚午。諭直隸

天津河間等處。今年被災。業已加恩賑恤。第歉收之後。米價頗昂。來歲青黃不接之時。民食未免艱難。所當豫為籌畫者。除督臣高斌已遵旨遣官。在奉天買米八萬石外。朕思明春山東河南漕船。經由直隸地方。若截留漕米十萬石。令高斌視州縣大小。酌量分派存貯。以敷糶借之用。於民食自有裨益。其如何截留東豫各船。及分貯沿河州縣之處。該督即會同倉場侍郎。逐一詳悉妥議辦理。○是日申子年立春。順天府進土牛春山寶座。○辛未。大學士鄂爾泰等議。覆湖廣總督阿爾賽疏。稱世襲千總覃梓楚。覃邦舜。六年俸滿。年富材優。照例送部引見。田貴龍。弓馬生疎。留營學習。又稱覃梓楚。覃邦舜。効力精勤。請格外施恩。即予陞用。查舊例土司歸流之土千戶。給與千總職銜。世襲。願隨營者。一體食俸。年滿保題。與該督所請相符。但予即陞。則改流土弁甚多。並生倖心。其不得志者。且懷

失望。應將此意令該督知悉。酌宜妥辦。覃梓楚等既經給咨赴部。即交兵部照例辦理。至該土弁等。既有保送陞轉之例。則材技平常者。亦宜定議處分。請嗣後不堪保送土弁。照俸滿註冊千總之例。給與原銜。飭令離營從之。○戶部議覆四川巡撫紀山疏稱。寧遠府西昌縣。本年五六兩月。被水衝壞民田。內有衝瀼成河。并沙石壓蓋。本色屯秋田九十四畝。有奇。又折色屯田二十三畝。有奇。所有額徵請予豁免。又有沙石淤蓋深厚。須俟三年墾復者。共屯秋夷田六十畝。有奇。及沙淤稍薄。一年即可墾復者。屯秋夷田二頃二十七畝。有奇。折色屯田一十五畝。有奇。應徵額賦。暫請蠲免。俟勘明可耕之歲。再照例徵輸。應如所請。從之。○又議覆雲南總督張允隨疏。稱滇省大理府。自雍正五年。停止鼓鑄。十餘年來。迤西一帶錢少。兵民零星交易不便。該地產有銅礦。應請設法開採。設爐十五座。每

年需銅二十八萬餘觔。即以所出之銅供鑄。不敷。再將迤東各廠銅觔添撥。鉛錫等項。於各廠運往。統計每清錢一千文。約需工本六錢有零。每年可鑄出錢六萬餘串。照例搭放兵餉。所需局房。舊地已改考棚。並擇地建蓋。應如所請。從之。○賜湖南嶽麓書院御書扁曰道南正脈。○壬申。

上詣

皇太后宮問安。○總理

三陵事務多羅貝勒允祜奏。朱華山距

景陵新城三十餘里。新設朱華山八旗章京。各有差務。勢難兼管。請添設委署副總管一員。於

陵寢舊駐章京內恭選四員。奏請引

見。簡放。責令管轄。得旨允行。○癸酉。諭。昨召見大學士陳世倌。據奏。近日彗星見。宜下修省之詔。以宣示百官。使天下共知之。將來並可垂之史冊等語。朕思人主君臨天下。敬天勤

民之心必嚴恭寅畏無時不凜

上帝之鑒觀念兆人之休戚以期弭咎於未然誠以修省全在乎平日此朕之所以夙夜兢兢者事

天以實不以文以誠不以偽也若平日不能時幾交敕及至

上天垂象方事修省已屬臨事儆惕所為緩不濟急若災異既徵又不竭力補救但託於文告飾為敬慎警懼之辭而無引咎責躬之實徒務臣

民之觀聽以塞責是明以示戒而更加粉飾則慢天欺世其過愈大豈能感召天和潛消沴戾乎前日御門時朕以京師得雪甚微且星象見異面降諭旨原欲與大臣等交相儆省深思所以致此之由缺失何在亟圖悛改並非欲衆人聞知冀垂史冊掩一時之耳目示後世以虛文乃陳世倌身為大學士見不及此而勸朕為文飾之事是朕心不能見白於大臣朕深以為愧此正朕之所當修省者朕雖不及古之帝王而

誠敬事天之心無一刻之敢懈可以自信可以

質諸神明今星象示儆乃僅欲以修省一詔謂可了事即此一念誠乎偽乎此實朕夢寐中所不敢萌者是用特降此旨俾知格天之道惟在乎修省之實而不在修省之文我君臣其共勉之○吏部等衙門議准內閣學士李清植奏稱臺臣馮元欽請令諸臣於自陳時舉賢自代俱用密封陳奏此適足以開鑽營之便而滋結納之緣請仍遵諭旨即於疏內奏聞從之○甲戌

孝莊文皇后忌辰遣官祭

昭西陵○

上詣

皇太后宮問安○諭軍機大臣等山東相近直隸諸府今年歉收冬間又復少雪倘蝗蝻潛生明歲必為禾苗之患前陳大受奏報挖埋蝻種之法朕已令直隸仿照行之爾等可寄信與喀爾吉善令其留心及此農隙之際飭諭有司董率民人早為料理若東作方興則農民有事南畝

即恐不及矣。○又諭據鄭文煥奏稱郭羅克番民輸誠服罪。認賠搶刦物件。永遠遵守約束等語。鄭文煥所奏此時只得酌量完結。但善後之計。非鄭文煥所能辦。慶復可仍於明年前往四川。會同紀山悉心料理。期於永遠寧帖。爾等可寄信與之。○是日起。

上以歲暮祫祭

太廟齋戒三日。○丙子。以歲暮祫祭。遣官祭

太廟中殿。

後殿。○

上詣

皇太后宮問安。○諭翰林院衙門。年久未能修葺。傾圮之處甚多。著哈達哈海望三和料估修理。

○丁丑。祫祭

太廟。

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

恭陵。○遣官祭

太歲之神。○諭硝磺為邊關嚴禁之物。久有定例。聞各省沿邊口隘。奸民嗜利。往往勾通守口兵役。夾帶出口。以圖重利。又聞準噶爾境內。不產硝磺。每令內地往來之番夷喇嘛。私偷夾帶。出重價購買。各督撫提鎮。當時刻留心。嚴飭文武官弁。一體實力搜查。以防偷漏。再遣妥員於各口隘之外。細行訪察。如有出產硝磺之處。作何設法防範。毋得稍有疎忽。該部即行文各省督撫提鎮等知之。○召見夷使圖爾都等。諭曰。朕本欲明年召見爾等。賜予筵宴。因爾等求觀步踏。故今日即令瞻仰。噶爾丹策零疏內。稱前往西藏之人。准

由噶斯路賜助牲畜。每年准派二三十人。巡閱托爾輝等處。故遣爾謝恩請安。朕深為欣慰。一應進藏所加恩典。吹納木喀回巢時。自然詳悉告知爾台吉。查閱托爾輝。乃係朕諭旨。但疏內又稱貿易之人。不論何時皆可前來。來京貿易者。在甘涼等處。任便皆准貿易。並非朕之原旨。朕大臣等奏言。此係噶爾丹策零巧詐。以圖僥倖。朕言噶爾丹策零未必如此巧詐。蓋伊使者稟告之誤也。昨朕大臣向爾訊問。果係爾等誤告之故。大凡為使之。人往返勞頓。詞語繁多。隻言片語。保無錯誤。朕亦不復追咎爾等。但爾等歸時。須詳告噶爾丹策零。知悉貿易之人。於限定年分。或春夏。或秋冬。總在一年之內。不論何時。皆准進邊貿易。非不分年限。無論何年。皆可前來也。若來京貿易。亦應在定例來京之年。但爾等貨物。皆係自備腳力。原屬艱難。京師道遠。力不能前。即在肅州貿易。亦屬可行。肅州與爾

游牧相近。尚可獲利。若在甘涼等處。實屬不便。朕並非以爾等為外夷。不令留頓甘涼也。爾等來時。並從彼處經行。其地皆屬褊小。商販無多。爾等貨物到彼。若貨賣不盡。將馱載回歸耶。抑久住以待售耶。勢必反至失利。於爾等何益。肅州亦屬褊小。不比京師。因前既與爾國議定。先期傳集商人。至彼與爾貿易。若無指定之處。商人豈能各處豫備耶。如欲來京貿易。於定限年分。仍來京。不然。即在肅州亦可。朕此等籌畫。皆與爾等有益。爾明告噶爾丹策零。知之。夷使圖爾都叩謝奏言。大皇帝諭旨甚是。所稱貿易。無論何時。與甘涼等處。皆可貿易之語。大皇帝敕書內。實未開載。我等來時。曾向中國大臣言及。意謂已經許可。誤行稟告。噶爾丹策零遂據我等之言。寫入疏內。乃我等之過。非噶爾丹策零有意如此也。上曰。偶爾錯誤。朕不責備。想噶爾丹策零亦未

必歸咎於爾。爾等可勿疑懼。惟以朕敕書開載者為憑。自屬妥協。但一切事宜。既經議定。自當永遠遵守。今初次舉行。即便反覆。可乎。不惟於事無益。眾人觀瞻。亦屬不雅。朕前降旨甚明。豈有即行更改之理。可傳諭噶爾丹策零。其善體朕意。圖爾都奏稱一切事宜。大皇帝皆已降旨。敬謹記憶。同時詳告噶爾丹策零知之。○戊寅。

上詣

皇太后宮問安。○御保和殿筵宴朝正外藩。左翼科爾沁親王羅布藏袞布。郡王阿旺藏布。貝子銜鎮國公達爾瑪達都。和碩額駙拉什那木扎勒。多羅額駙色旺諾爾布。固山額駙拉里達。固穆頭等台吉鄂齊爾達什。麟扎勒。格扎多爾濟。塔布囊阿齊圖。二等台吉達什拉布坦。達瑪林。那木扎勒。拉什根敦。薩木魯布。沙克扎木素。那木扎布。德勒格楞貴。朋蘇克。阿爾塔。丕勒。塔雅勒。多爾濟。三等台吉松兒。

敦多布色楞達什。璘奇釵。那蘇圖。那木扎勒。濟克濟扎布。四等台吉袞布扎布。畢里袞達賴。車凌庫勒。車木楚克。鄂固里克齊。多爾濟拉什。垂扎布。卓特巴。扎木散。錫拉布。畢濟扎敦多克。布木布齊。索諾木。諾們桑。烏爾瑚滿。恭格托岳特。裕木多爾濟。羅布藏。敦多布。鄂摩克圖。恩克巴雅爾圖。巴顏博勒瑚。阿里袞達賚。額林沁。阿薩拉瑚。阿拉布坦。巴圖祿塔。阿拉布坦。布圖格爾。畢里袞達賚。貴岱。色楞多爾濟。色楞。匝雅噶爾弼。色楞。德勒格爾。丹巴色。巴克扎布。薩木雅。阿裕錫。薩木坦。七十六。垂扎布。羅布靖。色布騰。巴顏猛克。那遜鄂勒哲衣色本。索諾木。扎木素。蘇瑪第。拉什色旺。阿敏達爾。阿裕爾。朋蘇克。努登。布達。那木薩賚。扎布。喇嘛扎布。伊特格勒圖。索諾木。圖薩圖烏巴什。鄂爾濟圖。猛武勒哲衣。教漢貝勒。羅布藏。錫拉布。垂金扎勒。旺扎爾。柰曼固。

山額駙敦多布。三等台吉尚圖。喀喇沁貝子。
瑚圖靈阿。輔國公敏珠爾。拉布坦。烏喇特。輔
國公。阿穆爾。凌貴。鄂爾多斯貝勒。諾衣羅布。
扎木素。輔國公色布騰。諾爾布。右翼喀爾喀。
車臣汗達瑪林郡王成衮扎布。貝子散都布。
鎮國公旺舒克。輔國公巴蘇。旺扎勒。扎木禪。
車布騰扎布。扎薩克頭等台吉旺扎勒策旺。
敦多布。車布登。旺扎勒。散都克爾多濟。旺舒
克。拉布坦。車凌多爾濟。薩拉海都布。拜都布。

拉什和濟格爾。索諾木。烏呼木濟。阿裕錫布。
達扎布。多爾濟扎布。二等台吉敦多布林沁。
完楚克多爾濟。車登達尼斯。班珠爾。羅布藏。
拉什。垂扎布。鄂勒哲衣巴雅斯瑚朗。尚圖。旺
舒克。拉布坦。三等台吉班珠爾。錫拉布。扎木
素。班珠爾。扎木巴拉。巴特瑪。薩旺扎布。四等
台吉烏巴什。沙津達賚。鄂博允。德勒格拉瑚。
朋蘇克。騰錫根。敦猛庫。鄂勒哲衣茂勤。阿裕
錫。貴呼格。堪珠爾。索諾松衮巴雅斯瑚朗。賽

科岳圖。巴拉彌特。鄂濟克圖。賽音圖。薩圖。齊
旺多爾濟。托和齊。噶麟得里。散濟扎布。賽音
察衮。那木扎勒。扎木顏。色旺扎木素。固穆扎
布。丹達爾桑。丹津。那穆。阿勒達爾。扎木揚阿。
拉布坦。旺舒克。齊拉布。根敦扎布。布顏德勒
格爾。恩克濟庫。伊斯貴。錫拉布。額勒濟。色楞
固爾扎布。羅布藏。蘇班。阿爾斌。丕雅噶爾弼。
滿沁保。托克托瑚。烏爾圖。那斯圖。噶勒桑。伯
爾清。伊魯勒圖。喀勒津。達爾瑪。阿木瑚朗。阿

彌爾圖。達克巴。錫拉布。扎木桑。扎爾瑚齊。索
諾木。諾木巴里克齊。三達什里。烏巴什。那蘇
阿爾和。丹津。厄魯特郡王色布騰。旺布。及內
大臣等宴。召科爾沁親王。羅布藏衮布。郡王。
阿旺藏布。貝子銜鎮國公達爾瑪達都。教漢
貝勒。羅布藏。喀喇沁貝子。瑚圖靈阿。輔國公。
敏珠爾。拉布坦。鄂爾多斯貝勒。諾衣羅布。扎
木素。喀爾喀車臣汗達瑪林郡王成衮扎布。
貝子散都布。輔國公巴蘇。扎木禪。車布騰。扎

布厄魯特郡王色布騰旺布至

御座前賜酒成禮○是月直隸總督高斌奏本年河間

天津等處被旱災民入冬以來祁寒可憫已會

同鹽臣伊拉齊及各司道並勸紳士商民等

公捐棉衣四萬三千六百九十一件查明極

貧者於領賑時當面散給得旨知道了○江

蘇巡撫陳大受奏寶山縣胡巷鎮及蘆草濱

一帶臨海居民稠密土塘日漸坍卸每遇大

汛潮水浸刷塘根甚屬危險請於蘆草濱北

岸橋東鎮西市梢對官路起迤東至鎮梢止

建築單層排樁石坦坡四十丈自胡巷橋東

鎮起迤東北至稅房止接築雙層排樁石坦

坡四十丈動項價辦得旨知道了○又奏蝻

子入土設法剪除查蝗蝻生子必堅土高亢

處所用尾栽入土中深不及寸仍留孔竅形

如蜂窩一蝗所生十餘粒中止白汁漸次充

實因而分類一粒中即有子百餘交冬遇雪

即深入寸許若積雪尺餘蝻子便難出土今

歲入冬以來各屬俱未得雪海州等處窮民

挖取草根類多掘得蝻子累累成團愚民罔

知剪除仍棄土內交春遺孽萌動甚為可慮

臣已飛飭地方官出示鄉民凡掘得蝻子一

斗交官者立即給銀二錢或只數升者亦照

此例減給並飭報過生蝻各屬一併遵行得

旨甚善舉也○福建巡撫周學健奏接到大

學士等議准江西巡撫陳宏謀奏請禁止種

烟一摺查閩省種烟最廣民情又悍猝加查

禁抗法必多請設法從容勸諭得旨大學士

等所議陳宏謀摺原非盡令各省一概禁止

種烟也亦云因時制宜勸諭而已況閩省尤

不能行此令想汝錯會意矣○又奏請查禁

官吏收捐監生規禮得旨周學健在閩他事

容有過當之處以致與那蘇圖有不睦之狀

至此事若實則是那蘇圖在閩所司何事若

復以此益致不和則見輕於朕矣汝二人共

觀之仍共徹底清查妥辦奏聞○湖廣總督

阿爾賽奏湖北武昌管關之員。向於口岸項下。每年留銀六百兩。為辦公之用。實屬不敷。請再於餘銀內酌給四百兩。得旨。知道了。○護陝西巡撫帥念祖奏。陝甘二省綠旗兵丁。向准支借司庫銀兩。以資接濟。惟八旗未有此例。請嗣後駐防官兵。如遇歉收。及糧價昂貴。照綠旗馬兵例。每名借給四兩。常年分限四季。歡歲六季坐扣。得旨。著照所請行。○陝西提督永常奏。準噶爾夷人到肅貿易。即帶駝馬牛羊。至哈密變賣。節經諭止。不許過山。該夷使以牲口疲乏。不能行走。懇求賣去。察其情形。尚非有意違例。已派弁查看。將實在疲乏者。准其變賣。得旨。所奏俱悉。○甘肅巡撫黃廷桂奏。寧朔縣迤南地名青龍灘。距縣城一百二十餘里。逼近唐渠正閘。土曠平行。儘堪樹藝。祇以地高於渠。水不能入。廢棄已久。查閘西地勢微低。開挖渠口。以資灌溉。可得膏腴地六十餘畝。現已動工挑濬。又靈州

城西羊馬湖地方。於乾隆六年查出可耕地兩年招墾。已獲成效田一萬三千餘畝。得旨。勸課農桑。為政之本。知道了。○四川提督鄭文煥奏。曲曲烏蠻夷。於本年二月間搶劫萬工堰。事幾一載。該夷首恃險匿。不遵調訊。應相機除捕。得旨。知道了。○廣西巡撫楊錫紱奏。永寧州知州董天良。樸實無華。視民如子。據實奏聞。得旨。此等循吏。應使久於其任。與民休息。方有實濟。仍不止之一人之一

處也。○是年旌表孝子。直隸等省楊雲解等二十七名。孝婦。江蘇等省張氏等八口。守節合例。八旗。滿洲。楊桑阿等妻莫勒遮爾氏等一百八十一口。蒙古。阿里衮等妻赫佳氏等二十四口。漢軍。杜一元等妻白氏等四十五口。西安等省駐防圖爾什等妻他喇氏等五十八口。奉天等省陳芝荷等妻許氏等一千九百六十口。未婚守志。江蘇等省李仙桂等聘妻洪氏等三十口。夫亡殉節。鑲紅旗石

柱妻瓜爾佳氏。江蘇等省于會中等聘妻蔡氏等二十七口。孝義。安徽等省曹七善等四名百歲壽民。婦江蘇等省陳氏等十一口。各給銀建坊如例。○是年一產三男包衣滿洲張九德等六家。○是年會計天下民穀數各省通共大小男婦一萬六千四百四十五萬四千四百一十六名口。各省通共存倉米穀二千九百六十二萬六百五十二石二斗四升七合零。

實錄卷二〇八

三十一

大清高宗法天隆運至誠先覺體元立極敷文奮武孝慈神聖純皇帝實錄卷之二百七

大清高宗法天隆運至誠先覺體元立極敷文奮武孝慈神聖純皇帝實錄卷之二百八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄次臣慶桂總辦官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄次臣奉常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆九年甲子春正月己卯朔

實錄卷二百八

上詣

奉先殿行禮○詣

堂子行禮○率王以下文武大臣詣

壽康宮慶賀

皇太后禮成御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○庚辰

上奉

皇太后幸重華宮侍宴。○諭大學士等上年直隸天津河間等處收成歉薄貧民乏食朕宵旰焦勞多方區畫惟恐一夫失所總督高斌又遵旨酌議明歲加賑並奏請動支司庫閒款銀兩於停賑後為接濟民食之用朕俱已俞允惟是上秋被旱之後冬月雨雪又少麥苗待澤甚殷東作方興之時麥秋收成未卜窮

實錄卷二百八

十一

民尤堪軫念著高斌詳察本地情形若於從前定議之外有應加賑月分者據實陳奏朕當格外加恩○辛巳諭前因大學士陳世倌告假回籍懇求開缺朕曾降旨不必開缺令尚書史貽真協辦閣務今大學士徐本又復患病調理尚需時日況陳世倌亦稱在家頗需擔閣不能即回供職現今內閣辦事人少著史貽真實授大學士吏部尚書員缺著

戶部尚書劉於義補授協辦大學士事務其戶部尚書員缺著張楷補授○又諭兵部尚書陳惠華現有處分著解任候旨兵部尚書員缺著廣東巡撫王安國補授廣東巡撫事務著將軍策楞署理○壬午

上詣

皇太后宮問安○幸瀛臺御大幄次賜準噶爾使臣圖爾都宴命尚書班第等引準噶爾使人圖爾都等立首班大臣末跪迎

實錄卷二百八

十一

上陞座引進行禮傳旨諭圖爾都以爾極其誠敬

皇上特加恩寵不以外國異視與中國臣工一體行禮使臣叩謝入宴復傳諭旨因爾台吉噶爾丹策零恭順遣爾來請朕安爾亦誠敬可嘉故特加恩賜宴爾於宴所可隨意醉飽以盡爾歡勿以大禮所在致生拘束所演各藝爾詳細觀看俟回時告知爾噶爾丹策零可也又召圖爾都近前跪賜飲三爵並傳旨

賞噶爾丹策零粧緞漳絨寧絀各二端。玻璃器六事。琺瑯器四事。使臣圖爾都大緞四端。玻璃器四事。銀二百兩。○訓飭司牧教養兼施諭。朕君臨天下。愛育黎元。厚生正德。時切於寤寐。蓋教養雖為二端。而實則相為表裏。衣食足。乃可興禮義。飢寒迫。則罔顧廉恥。是不能養民。不可以言教。不能教民。仍不得謂之能養。故教即在養之中。養即可收教之效。其理其勢。固如此也。乃今之司牧者。但知用心於刑名錢穀。自顧其考成。苟免無過。便為得計。上官亦即以為稱職。求有視百姓為一體。視民事如家事。以實心行實政。經畫有方。勸課有法。使地無遺利。家有蓋藏者。百不得一。雖遇有收之年。而小民之生計亦窘。及荒歉偶形。議蠲議賑。已非上策。而胥吏作奸。豪強侵蝕。種種弊端。不可枚舉。其百姓之狡猾者。又復捏虛領賑。欲無饜足。以致效尤。罵凌刁風日熾。此雖百姓之無良。亦由有司之不

能教養於平日。賈誼所謂移風易俗。使天下回心而嚮道。類非俗吏之所能為也。朕以教養之責。付之天下督撫。督撫分任之州縣。此古所稱親民之官。與百姓最為近切。其所轄之地。不過數十里。或一二百里。形跡不甚隔絕。情意易於流通。果能視百姓如赤子。察其飢寒。恤其困苦。治其田里。安其室家。以父母斯民之誠心。行父母斯民之實政。凡茲小民。具有秉彝。斷無有不中心感激。服教從風者。外省向設宣諭化導使。究之一二人之身。難以家諭而戶曉。且經年累月。一至其地。未免一暴十寒。終不若州縣官各子其民。勤勤懇懇。惟教養是務。以養為教之本。以教成養之功。而不事具文。不沽虛譽。但期實有裨於民生。初不責效於旦夕。為督撫者。又當開誠布公。諄切訓誨。遇良吏則嘉獎成全之。其不及者。則督率勸戒之。聖人曰。至誠而不動者。未之有也。如督撫果以誠心課吏。有司果以誠

心治民歲月既久漸摩淪洽庶幾教養有成
可副朕之厚望焉 管理

三陵事務員勒允祐故諭聞朕叔二十二貝勒
薨逝深為悼惜著大阿哥明日即攜茶酒往
奠履親王莊親王誠親王亦著往弔慎郡王
弘昉弘曠弘映永喜隆愛著前去穿孝一切
應用各項俱准由該部取用官物莊親王著
留住數日在彼照料海望亦著前往協同辦
理俟事畢交與五十四再回 癸未是日起

上以孟春享

太廟齋戒三日 甲申諭曰哈達人甚糊塗自
管

陵寢事務以來不能辦理一事今所管庫貯銀
兩被盜據所奏竟似與伊無涉從前代侍衛
慶恒冒昧請假朕曾降旨申飭亦未覆奏請
罪

陵寢事務關係緊要哈達不能辦理著原品休
致餘著該部察議 又諭

泰陵事務關係緊要不可無總理之人著貝勒
允禔內務府大臣覺和託總理事務 乙酉
世祖章皇帝忌辰遣官祭

孝陵 諭軍機大臣等

泰陵事務甚關緊要是以朕降旨著貝勒允禔
內務府大臣覺和託總理雖諸事俱有定例
從前各自辦理於總理定例內或有相應畫
一之處汝等將此旨寄知伊等伊等若明悉
定例即令遵行彼處若無定例著伊等查

東陵總辦衙門之例遵照辦理 丙戌享

太廟

上親詣行禮 遣官祭

太歲之神 丁亥

上詣

皇太后宮問安 詣

大高殿

永安寺行禮 辛瀛臺御大幄次賜蒙古諸王
等宴 諭大學士等上年直隸天津河間等

處收成歉薄。冬月雨雪又少。今當東作方興之時。麥秋未卜。深厯朕懷。是以前經降旨。令高斌詳察本地情形。若於從前定議賑恤之外。有應加賑月分者。據實陳奏。朕當格外加恩。今據高斌覆奏。天津府屬之天津縣。河間府屬之肅寧。故城。寧津。順天府屬之大城。保定府屬之束鹿。深州。並所屬之饒陽。安平。冀州屬之衡水。又續報保定府屬之新城。共十一州縣。原屬偏災。業按分數給賑。民情大勢。

實錄卷二百八

六

寧謐。但與災重之十六州縣。地界毗連。青黃不接之際。生計仍屬艱難。應請遵照恩旨。按前賑戶口。再加賑一月。以資接濟。於地方實大有裨益等語。著即照高斌所奏。將此十一州縣。按冊再加賑一月。該部即遵諭速行。諭軍機大臣等。據高斌覆奏。請將偏災應賑之十一州縣。再行加賑一月。朕已降旨允行。至所稱此十一州縣。一月賑米約需四萬二千餘石。照現例折銀。共約需銀六萬三千餘

兩。應儘各該州縣現存倉貯米穀支給。其不敷者。仍照例折給銀兩之處。朕思地方既屬歉收。米糧自必昂貴。若因米穀不敷。折給銀兩。恐糴買仍屬艱難。終不若散給本色之為妥便。且四萬餘石。為數亦不多。通州各倉。所有減色米。儘可撥運接濟。爾等可寄信與高斌。若實有裨益。著即會同倉場侍郎。及早辦理。或另有所見。亦立速奏聞。工部議覆。直隸總督高斌奏稱。永定河伏秋二汛。發水甚大。現在北岨三工之胡林壩。至六工半截河壩。相距七十四里。應於五工大盧家莊重隄之內。添建滾水草壩一座。其出水舊隄壩外。添築灰土簸箕等項。又下口范窰口以下。統以沙淀葉淀為歸宿。本年汎水。多歸葉淀。應將歸沙淀之路。再行疏濬。流通至兩岨草壩。迴非石閘可比。飭令永定河道於每年汎漲之前。詳加查勘。修理粘補。即入於歲修項內。通融辦理。均應如所請。從之。戊子訓督撫

整飭吏治。諭直省州縣地方繁簡不同。屬員中才具短長亦不一。是以准各省督撫酌量人地相宜。題請調繁調簡。以收器使之益。惟是調繁之員。該督撫既已特疏保舉。向後非踰閑蕩檢。未必不格外優容。調簡之員。該督撫既已置之下考。向後縱奮勉向上。未必肯即登薦章。朕看各督撫於屬員調繁之後。因其貪劣改操。而檢舉糾叅者。尚偶有之。至於調簡之後。因其政績可觀。復行薦拔者。十不獲一。此則成見私意之未化。非虛公察吏成就人才之道也。嗣後督撫等於調繁調簡之員。均當秉公體察。屏去成心。覘其成效。凡先舉而後叅者。國家原有檢舉之條。若先調簡而後保薦。亦著於疏內摺內聲明具奏。如此則被薦者必倍加儆惕之心。即更調者亦獲詎勉自新之路。庶整飭吏治之一策歟。是日起。

上以祈穀於

上帝齋戒三日。○己丑。諭大學士等。安西道屬沙州衛。有原招戶民六百五十九戶。因所置牛隻。節年倒斃。不能買補。恐誤耕作。雍正十三年。經撫臣奏明。每戶借給銀十五兩。購買牛驢。以資力田之用。共借給銀九千八百八十餘兩。分作五年帶徵還項。自乾隆元年起至今。止徵完銀七千二百九十餘兩。尚有未完銀二千五百九十兩零。朕念沙州地處邊外。天寒土瘠。招徠之民。力量單薄。既有本年應完之正賦。若兼顧舊欠。未免拮据可憫。著將此未完牛驢價銀。從乾隆九年起。分作三年帶徵。俾邊民從容完納。該部即遵諭行。○庚寅。

上詣

南郊齋宮齋宿。○駐藏副都統索拜奏。近日據郡王頗羅鼐告稱。上年十月初四日。夷使喇嘛尚卓特巴。率桑吹納木喀。至大小廟拜佛。謂頗羅鼐曰。我噶爾丹策零。聞拉達克人言。土伯特黃教盛興。民生亦日安樂。此皆大皇帝廣興黃教。撫輯羣生所致。十月二十二

日尚卓特巴吹納木喀。又謂頗羅鼐曰。噶勒招穆倫河邊之策地方。原是溫都遜喇嘛等坐禪之廟。聞此廟破壞。我噶爾丹策零令我等攜帶銀兩而來。欲煩王子代為修廟。令溫都遜衆喇嘛照常坐禪。頗羅鼐答曰。我仰賴大皇帝洪恩。豈不能修一廟宇。但喇嘛坐禪。常在山上蓋房。所以策地方不必重修。況汝台吉噶爾丹策零。并未奏請在彼處修廟。我未奉

大皇帝諭旨。何敢擅行。十一月二十六日。第巴喇嘛與宰桑巴雅斯瑚朗。謂頗羅鼐曰。我等到大小各寺廟熬茶。留心細看。宗喀巴佛之黃教實屬比前興旺。衆喇嘛亦覺齊整。甘珠爾經。丹珠爾經。甚是靈應。乞王子將汝誠心扶助黃教。所行一切事體。寫明付我等攜歸。與噶爾丹策零觀看。頗羅鼐答曰。我本土伯特地方。一微小台吉。蒙

大皇帝隆恩。拔至郡王。振興黃教。成就甘珠爾

丹珠爾經。以安土伯特之人。此皆仰賴

大皇帝之恩。非我力所能成就。若將我如何振興黃教之處。寄與噶爾丹策零。我自愧無能。不敢矜誇。此事亦不可行。第巴喇嘛宰桑巴雅斯瑚朗。又曰。我準噶爾地方。並無好額木齊。噶爾丹策零分付我等。熬茶事畢。將好額木齊。與通經好大喇嘛。延請一位帶回。乞王子即為給發。前去頗羅鼐答曰。汝等欲請好額木齊。與通經好大喇嘛。並未奏請

大皇帝。既未奉

大皇帝諭旨。此事我何敢專主。自夷使至藏後。言語情形。理合奏明。奏入得旨。頗羅鼐所辦一切事務。俱極得體。甚屬可嘉。著傳旨獎諭。辛卯祈穀於

上帝。

上親詣行禮。○奉

皇太后居長春仙館。○詣

安佑宮行禮。○幸圓明園。○諭新歲朕奉

皇太后駐蹕圓明園所有燈節恭進

皇太后筵宴及賜蒙古王等筵宴關係國家典禮不可廢缺應照舊舉行至於王大臣本應同霑湛露酌茲春酒但三冬雪澤稀少近日星示災異朕心儆惕無時暫釋於懷知王大臣等之心與朕相同不待朕之宣諭也其王大臣等賜宴之處著停止 壬辰
上奉

皇太后幸同樂園侍早晚膳至壬寅皆如之 癸巳

上御正大光明殿賜朝正外藩等宴召喀爾喀車臣汗達馬林烏珠穆沁親王阿拉布坦那木扎爾敖漢郡王吹木丕爾敖漢貝勒羅布藏阿魯科爾沁貝勒達克丹土默特貝子哈穆噶巴雅思呼朗圖科爾沁親王羅布藏衮布喀爾喀郡王成衮扎布烏喇忒郡王色布登旺布鄂爾多斯貝勒諾羅布扎木素烏珠穆沁公朋舒克拉布坦扎魯特公查漢凌華烏珠穆沁公德里克旺舒克等至御座前賜

酒成禮 諭軍機大臣等去冬諭令高斌酌

買八溝米石備用據高斌奏稱目前米價昂貴應暫停緩俟十二月後各處米糧齊集價值自平若較前平減再行糴買等語朕思口外之米每至春初價平況又有停買之信奸商必不囤積若此時得買不拘多少總屬有益朕已批諭保祝矣爾等可即寄信與高斌務期多得米糧以為備用至於前歲平減之價原不可為常縱眼前稍覺浮多及至需用之時仍得其濟不必拘拘較量錙銖也 又諭近來流民漸多皆山東河南天津被災窮民前往口外八溝等處耕種就食并有出山海關者山海關向經禁止但目今流民不比尋常若稽查過嚴若輩恐無生路矣大學士等可即遵旨寄字山海關一帶各口并奉天將軍令其不必過嚴稍為變通以救災黎此亦無聊之極思耳 順天府行鄉飲酒禮

大清高宗法天隆運至誠先覺體元立極敷文
奮武孝慈神聖純皇帝實錄卷之二百八

大清高宗法天隆運至誠先覺體元立極敷文
奮武孝慈神聖純皇帝實錄卷之二百九

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄次臣應桂

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部工部事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆九年甲子正月甲午

上詣長春仙館問

皇太后安 諭令夕山高水長處點放烟火盒

子著外省將軍副都統大臣等及京城部院

衙門旗下滿洲大臣等進內觀看著御前乾

清門行走之蒙古王額駙台吉等在兩廊下

坐大臣等皆在階下兩旁列坐準噶爾使臣

圖爾都著在頭班大臣後隨坐 召見準噶

爾使臣圖爾都諭朕召見爾等三四次矣爾

貿易事竣即可起行歸告爾台吉噶爾丹策

零。一切事宜。總憑朕所降謄黃諭旨為定。和好之事。以信為本。既已議定。永遠奉行不爽。使內外羣生。均得安樂。不亦善乎。○諭大學士等。朕於正月二十五日恭謁

泰陵。所有應行事宜。著各該衙門先期備辦。又諭。朕此次恭謁

泰陵。著莊親王。和親王。大學士。鄂爾泰。張廷玉。在京總理事務。乙未

上詣長春仙館問

皇太后安。丙申

上詣長春仙館問

皇太后安。○工部議覆甘肅巡撫黃廷桂奏。稱寧夏府屬靈州之永寧暗洞。洩漢渠尾水。及上游東南一帶。蘇家湖等處山水之去路。橫穿秦渠之下。上年山水陡發。衝塌秦渠中斷。應請南移三十丈。重建石洞。如築秦渠。并將附近澇河一帶。挑挖寬展。量築隄埂。并改建利濟橋。但前項渠洞。原係民間自為經理。今

需費甚鉅。請動項官辦。幫民興築。應如所請。從之。○丁酉

上詣長春仙館問

皇太后安。○僉都御史嵇璜奏。乾隆六年七月。勅諭各省督撫提鎮。留意整飭營伍。俟一二年後。派王大臣前往。驗其優劣。今已逾二年。請特派大臣前往。近省簡閱。其邊遠省分。或即於駐防將軍副都統內。慎選派往。再苗疆等處。請令該督撫嚴飭所屬。悉心整頓。得旨。直隸山東武備尚屬整飭。著先派大臣由河南一路。查上下江一帶。餘省候旨。餘著議奏。該部知道。○戊戌

上詣長春仙館問

皇太后安。○諭大學士等。查閱外省營伍。著尚書公訥親去。從河南至上下江一帶。及淮徐山東一路。查閱營伍。并看驗河工。俟事竣。回京。此次朕恭謁

泰陵。訥親不必隨往。可令其束裝。於二月初間

乘驛起程 已亥

上詣長春仙館問

皇太后安 諭大學士等直隸天津河間等處
去年歉收入冬又復少雪現在加恩賑濟一
切地方民隱時厯朕懷訥親現奉差前往河
南一路查閱營伍著便道從天津河間二府
查看奏聞再海塘情形亦著訥親就近由江
南前往勘視 大學士鄂爾泰等議署兩江
總督尹繼善等奏稱江西捐監收穀於乾隆

字樣卷二〇九

一

七年十月奉旨仍著一年限滿奏聞今已限
滿現在報捐者尚源源而至至年底約可得
穀二十萬石則本地收捐之有益倉儲有濟
民食已有明驗謹覆奏請旨查江省已捐二
十萬石現在限滿應否將本省收捐之例暫
停得旨該撫既稱有益倉儲有濟民食著再
行一年請旨 御史馬燾奏定例大臣自陳
概用露章陸續進呈但今歲自陳與從前不
同舉賢自代概用露章某官舉某人既所共

上詣長春仙館問

字樣卷二〇九

一

知具本日期又無一定先後遲速之間易開
觀望依違之弊且恐所薦偶同將無心之薦
舉疑為有意之雷同請勅該部酌定日期通
行各衙門大臣自陳本章同日齎送通政司
衙門彙送內閣按品級分三日陸續進呈得
旨大臣等皆朕推心置腹之人若如此防閑
將朕自亦不能信矣馬燾所見甚鄙著飭行
庚子

皇太后安 諭大學士等王安國報丁父憂其
兵部尚書員缺著彭維新補授戶部侍郎員
缺著湖北巡撫晏斯盛補授湖北巡撫印務
著許容前往署理以觀後效 又諭雲南昭
通鎮總兵官張士俊現患耳疾重聽請解任
調攝著伊解任來京陛見再降諭旨昭通鎮
總兵官員缺著雲南永順鎮總兵官陳綸調
補永順鎮總兵官員缺著陝西金塔寺副將
張聖學補授 又諭原任道員許登英年老

有疾著從寬免其前往坐臺。辛丑

上詣長春仙館問

皇太后安。諭本日欽天監值班朕召見該堂官詢問星象據奏不能深悉及問危宿分野亦皆不能對在星學甚微觀占殊難若輩猶不足怪至於各宿分野書籍詳載乃人所共知而亦漫不經心則其平日之曠廢官守已可概見監正雅琦監副法林湛露俱著交部嚴察議奏原任監正進愛因其妄行條奏時務是以治罪但彼人雖糊塗於職分內事向曾問彼尚能留意著帶革職仍辦理監正事如果努力無過再請開復。又諭盛京工部侍郎德新以伊母老病奏請留京情辭懇切伊原由內閣學士陞用著留京仍補內閣學士盛京工部侍郎員缺著內閣學士留保補授。又諭此次準噶爾之人入藏熬茶所有賞給路費口糧雖係動用帑項豫備而郡王頗羅鼐實心効力凡來使所用之物一切俱辦

理妥協甚屬可嘉著加恩賞蟒緞二端大緞四端即交與來使齎往 御史薛澂奏山東巡撫喀爾吉善列款參奏登州鎮總兵馬世龍奉旨交該撫嚴審定擬具奏伏思參劾官員定例督叅撫審撫叅督審今喀爾吉善以巡撫而兼提督自叅自審恐無以服馬世龍之心且武職之總兵猶文職之巡撫也今提督叅總兵而即令兼管提督之巡撫審擬定案行之日久恐開大吏專擅之漸啟臣下蒙蔽之風似應仍照喀爾吉善所請欽差大臣前往審定得旨前喀爾吉善叅奏總兵馬世龍一案朕已降旨交該撫審擬令御史薛澂援引督叅撫審撫叅督審之例請另遣大臣前往審定總兵馬世龍貪黷營私劣蹟種種即在京科道亦應有風聞該撫兼管提督自應據實題叅其與馬世龍亦有何嫌隙不可以審訊至摺內所稱武職之總兵猶文職之巡撫令提督叅總兵即令兼管提督之巡撫

審擬。若總督叅巡撫勢必即令總督審擬巡撫原不比總兵。如或有其事。朕臨時自有定奪。乃薛澂憑虛引證。更屬牽強。著將原摺發還。以都察院左副都御史彭樹葵為倉場侍郎。○壬寅。

上詣長春仙館問

皇太后安。諭積貯民食所關從前各省倉儲務令足額。原為地方偶有水旱得資接濟。是以常平之外復許捐貯多方儲蓄無非為百

千九百一十

一

姓計後因糴買太多市價日昂誠恐有妨民食因降旨暫停採買俾民間米穀自相流通價值平減亦無非為百姓計也乃近聞各省大吏竟以停止採買為省事州縣等官又多素畏積穀之累因而倉貯缺少不思常平之設不特以備荒歉即豐稔之年當青黃不接之時亦得藉以平糶於民食甚有關係從前所降諭旨總在督撫大吏奉行之時將實在情形籌酌妥辦其間因時制宜原不可執一

定之見今因有停止採買之令遂任倉穀缺少置而不理一處如此各處效尤將來必致糶借無資又似昔年倉穀有名無實如此因循固非設立常平本旨又詎朕停止採買之本意乎用是特頒諭旨曉諭各省督撫務須斟酌地方情形留心辦理應買則買應停則停總在相機籌畫不可膠執定見希圖省事以副朕軫念民食之至意賜準噶爾台吉噶爾丹策零勅諭爾奏疏內稱據使者吹納木喀歸奉到諭旨我屬前赴西藏之人准由噶斯路行走賜助牲畜盤費托爾輝地方每年遣派二三十人前往查閱是以遣使者圖爾都具奏恭請聖安朕欣悅嘉納又奏稱曾經奉旨來肅州貿易之人無論何時乘便而來來京貿易之人願赴京者聽其來京若以京師遙遠准在甘州涼州蘭州西安等處聽其所願貿易其貿易時與通事同往街市購買需用貨物等語此則與朕原降諭旨迥異

故我國大臣向爾使者圖爾都訊問據云大皇帝諭旨內原未諭及茲事。吹納本喀等曾向大人言及以為大人業已允行。是以歸而誤告噶爾丹策零。噶爾丹策零誤以為大皇帝諭旨。故寫入奏疏等語。大凡使者往返行走。語言繁多。隻言片語。豈無舛錯。朕亦不咎。既係爾使者誤告。爾宜仍照朕前旨遵行。其來肅州貿易之人。於應來年分。無論何時。隨到皆可准其進邊貿易。至來京貿易之年。爾等以京師遙遠。難以前來。欲在肅州貿易。亦可若甘州涼州等處地方。徧小。商賈聚集。無多。與爾等交易。無益。朕為大皇帝事。若可行。則施恩準行。和好之事。必慮久遠。既已議定。永遠遵守不爽。始為有信。今特頒詔旨。付爾使者齎回。隨勅賜佛二尊。並賞各色緞十端。錦緞粧緞各八端。玻璃磁器十五事。又諭訥親派往出差哈達哈著兼管鑾儀衛大臣事務。又諭總督哈爾賽奏稱伊之二女併

一孫女因向不知例。並未奏聞。今業經字人請將伊治罪。並應選之女送京等語。阿爾賽因不知例。將女業經許字於人。不必送京。著行文令伊知之。○吏部議准。湖南巡撫蔣溥疏稱。湖南湘潭縣永寧司巡檢距縣匪遙。印捕各官。可以兼顧。湘鄉安化二縣主簿。前因開煤收礦。添設稽察。今已停採煎。現在並無專司。均應裁汰。從之。○又題大學士史貽直。應授殿閣及尚書兼銜。得旨。史貽直著為文淵閣大學士兼吏部尚書。○禮部題。朝鮮國王李昫遣使表賀。萬壽冬至元旦三大節。及進歲貢方物。賞資筵宴如例。○命保和殿大學士翰林院掌院學士鄂爾泰。充日講起居注官。○給尚書公訥親欽差關防。○以刑部左侍郎錢陳羣充經筵講官。○以故杜爾伯特扎薩克固山貝子色卜騰端羅布之叔父三等台吉丹珠爾襲職。○癸卯上奉

皇太后自圓明園啟鑾謁

泰陵○諭大學士等上年直隸河間天津及河南山東省間有被災州縣朕多方賑恤令該督撫轉飭地方官加意安插無致流移此等被災窮民聞口外年歲豐稔有挈眷前往八溝等處耕種就食并有出山海關者該關向例禁止但目今流民因迫於本地之荒歉與平時不同若稽察過嚴恐阻窮民謀生之路從前曾降旨密諭寬其稽察朕念冬春雨雪未能霑足年歲之豐歉尚在未定近見流民漸多大學士等可再密寄信山海關等各隘口該管大臣官員并奉天將軍令其稍為變通查明實係窮民即行放出不必過於盤詰亦不必聲張務須善為辦理以仰副朕軫念災黎多方體恤之至意 貝勒允祜遺疏聞得旨二十二叔貝勒患病薨逝朕心深為軫悼著大阿哥即攜茶酒往奠一切應用各項俱由該部移取官物彼處事務著莊親王等

料理已有旨了應得卹典仍著察例具奏該部知道○是日駐蹕黃新莊○甲辰

上詣

皇太后行宮問安○是日駐蹕半壁店○乙巳上詣

皇太后行宮問安○直隸總督高斌奏河間天津府屬上年被災多方賑濟咸稱得所惟是被災地方薪米豆草價值俱昂兵丁所得月餉米折不敷日用請將天津鎮河間協馬步兵丁於司庫內各借一季餉銀自本年七月起至來年六月止按四季扣還得旨如所請行下部知之○是日駐蹕五里河○丙午

上謁

泰陵未至碑亭即降輿慟哭步入

隆恩門詣

寶城前行禮躬奠哀慟王以下文武大臣官員隨行禮○奉

皇太后回鑾○諭上年上下兩江秋收大概豐

稔間有偏災地方朕已加恩蠲緩賑恤其壽
州鳳臺鳳陽懷遠臨淮桐城泗州盱眙八州
縣勘不成災地畝所有新舊錢糧原應照例
催徵但念該處連年積歉之後雖未成災收
成不無歉薄目下正當青黃不接之時若仍
事追呼問閭未免拮据著將壽州等八州縣
並坐落八州縣之衛田應納新舊錢糧俱緩
至本年麥熟後徵收以示朕體恤烝黎之至
意該部即遵諭行 禮部題准琉球國王尚
敬遣耳目官毛文和等表進七年分貢物留
作九年正貢從之 以河南道御史陳其凝
為太僕寺少卿 是日駐蹕五里河 丁未
上詣
皇太后行宮問安 是日駐蹕半壁店 戊申
上詣
皇太后行宮問安 是日駐蹕黃新莊 是月
直隸總督高斌奏報得雪情形得旨數日以
來朕日夜焦思以待

天澤想卿同此憂也 江蘇巡撫陳大受奏上
下江所屬之鳳潁淮徐等處連年歉收蠲賑
兼施撫循安輯現在春秋二季均有收穫自
當督率地方有司勤加教導務期風俗人心
盡歸淳厚得旨所奏俱悉正德厚生之事非
可以歲月計汝其實力留心教養之事尤必
正其心以及萬民不可徒令有司為告示之
文即為稱職也 又奏江蘇寶山縣楊家嘴
一帶建築石塘帑繁工鉅擬於二月中親赴
該處細勘得旨此等查勘不可虛應故事必
身履其地逐一細查若有工不固而冒帑者
即應叅究以示警也 又奏漕糧徵收米色
因上年久晴無雨稻穀不能圓足援照乾隆
六年諭旨飭令紅白兼收之例酌量收兌是
以米色不能一律純潔得旨去年豈可比前
年災重之年此端不可開汝見頗覺小矣
江西巡撫塞楞額奏江右民多刁悍家鮮蓋
藏近來米價貴於曩昔倘措施稍有未協貽

誤正自不淺得旨數年以來米貴之弊各處皆然是應平日留心樽節方可有備無患耳至察吏為安民之本尤當加意而正己率屬則在爾之自立何如耳○閩浙總督那蘇圖等奏各省督撫提鎮協營每兵百名扣守糧二分三分不等名曰公糧以為修理旗幟器械軍裝及營中公用浙江所轄標兵前因石塘工程緊要添設召募未經扣除今工竣應照例每百名扣守糧二名得旨著照所請行

○又奏閩省鼓鑄錢文現在需銅今有遭風商船願將自本洋銅抽賣一半以資鼓鑄請按數給值以卹難商得旨著照所請行咨部知之○又奏據兵科給事中胡定奏請申禁兵民結盟以杜驕悍查閩省此風尤甚現在密會提鎮再行司道府等官時刻提撕竭力查拏得旨所奏俱悉化民先須管兵與吏而管兵與吏尤須先令文武屬員各知法紀奮勉有為方可稍期有移易耳未有不治其本

而治其末者尋據覆奏民間如聯盟械鬪謗訕抗官拒捕罷考罷市造軍火器械揭旗聚眾等事干係甚大密速趕辦嚴加懲治其餘平常小疵仍當加以教導如再不率然後案治得旨所見是矣若能行之以實日積月累自可抒朕南顧之憂○福建巡撫周學健奏閩省兵役借領銀米積弊已久請將從前已借之項徹底清釐漸次歸補嗣後歲底豫借之例永行禁革得旨此事尚可通融亦不但閩省為然所見殊過當矣○湖北巡撫晏斯盛奏楚省徵催錢糧每鄉每里各有里書冊書盤踞鄉曲包攬侵收飛灑詭寄以及需索冊費等弊前署荊門州知州高世榮縱用里書朋比為奸業經叅革嗣後頑抗之戶臨限無完令該管官照例查比即山區窩遠亦分委佐貳就近徵比無事蠹役代賠藉為弊柄得旨汝在湖廣年餘惟此事尚屬辦理得宜耳告之許容令其繼此妥辦○川陝總督公

慶復奏報郭羅克番民習於為匪擾害行旅前經天兵問罪俱已輸誠畏服認賠搶刦物件今現在咨諭在事文武布以誠信明白告諭使愚番知儆永斷夾壩惡風得旨所奏俱悉彼既悔罪豈可窮兵亦不能必其終不為惡其何以令其終不致為惡則在我之措置得宜卿到彼因時制宜可耳 陝西按察使赫慶奏謝授臬司恩得旨汝小心謹慎則有餘明達諳練則未能當奮勉不當玩愒 護

實錄卷二百九

一

理廣東巡撫布政使託庸奏粵東通省額中舉人七十八名其廣南韶惠潮五府連嘉二州文風稍優每科獲中六十餘名至肇高雷廉瓊五府羅定一州文風稍次每科僅中十一名至十五六名不等今酌定錄送遺才科舉廣韶學臣以五千二百名為率肇高學臣以二千六百名為率得旨所見亦是知道了 廣西巡撫楊錫紱奏鎮安府屬魁來舊村於上年十月內被賊焚燬茅房刦去牛隻現

在設法嚴拏得旨此等要犯務須緝獲汝等徒云設法嚴拏而從未見獲一人以後戒之 廣西左江鎮總兵楊剛奏督率營弁時加訓練又飭從容教習毋得過急急則銳進無成亦不得過緩緩則易生罷玩惟循循訓練庶兵力不勞日計不足月計有餘得旨好實力為之以副所言

實錄卷二百九

一

大清高宗法天隆運至誠先覺體元立極敷文奮武孝慈神聖純皇帝實錄卷之二百九

大清高宗法天隆運至誠先覺體元立極敷文奮武孝慈神聖純皇帝實錄卷之二百十

監修總裁官臣廷議官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶隆

總纂官廷議官太子太傅文華殿大學士文淵閣領閣事稽察欽奉 上諭事件處管理刑部戶部工部事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆九年甲子二月己酉朔諭大學士等直

隸按察使方觀承前經隨往江南看視河道

此次著隨訥親前往即從天津馳驛起程其

按察使事務著總督高斌酌量委員署理

調任江西巡撫陳宏謀疏報南昌豐城縣修

築沿江隄防以捍衛水鄉田廬從之是日

駐蹕黃新莊庚戌

上幸南苑詣

皇太后行宮問安

上行圍至甲寅皆如之諭軍機大臣等各省

城垣自應加謹防範以資保障其殘缺處所

修理雖有緩急若地方官果能隨時補葺自

不至介然成路豈可縱容民人登陟不為查

禁整理朕從前經過地方見有殘缺之處聽

民人踰越漸成路運者昨已面諭高斌爾等

可寄信與各督撫令其董率有司留心整飭

毋得仍前玩視○駐藏副都統索拜奏郡王

頗羅鼐告臣等云準噶爾來使第巴喇嘛吹

納木喀等於起行前一日過我辭別據吹納

木喀云自今以往我台吉噶爾丹策零於

大皇帝前永矢恭順聞揚黃教不但兵戈永息

羣生亦皆樂業不知如何能得結信於

大皇帝可以永久不渝我答以

大皇帝包容四海以天地為心與日月並明中

外並無歧視諸部之人悉皆一體同仁即如

爾等至藏熬茶

大皇帝格外加恩賞給馬駝路費俾極充裕爾

等將還又加恩賜爾熬茶之事得以完善者

悉由爾台吉於

大皇帝前恭順有加。誠心懇請之所致也。聞爾台吉素奉黃教。自今以後。惟有恭敬釋迦佛。常如臨之在上。虔心供奉事。

大皇帝恭謹彌篤。一切悉遵諭旨訓誨。必得厚福。我土伯特雖為黃教藏地。前此初無如此蕃盛。唐古忒人亦從無此安樂。後因

大皇帝廣闡黃教。休養衆生。是以自五世達賴喇嘛班禪額爾德尼至我頗羅鼐。悉予印授

封。疊荷隆恩。有加無已。人物愈加庶富。此蒙古唐古忒人所共知者。爾歸將我言告知爾台吉。噶爾丹策零。是否任其自擇。吹納木喀等皆以為然。彼又云。前聞入藏人言。此地唐古忒人不能乘馬。兵械亦不完備。今我至喀喇烏蘇時。爾子扎薩克台吉珠密納木扎爾率兵迎接將軍侍郎。觀爾地之人。乘騎兵械亦甚可觀。我答以此乃興黃教之地。素不以武備為事。因爾前台吉起兵襲藏。我唐古忒

始重武備。悉加意練習。且

大皇帝加恩。令我統轄藏事。我悉力簡閱甲兵。繕治器械。他部即有以兵犯我邊圉者。亦久已有備。蒙古唐古忒兵藉

大皇帝天威。足資抵禦等語。吹納木喀等唯唯而退。奏入。得旨。頗羅鼐與夷使答應言語。極為得體。此皆伊平日感朕厚恩。實心報効。是以所言皆合朕意。實屬可嘉。著傳諭頗羅鼐知之。○是日駐蹕新衙門。翌日亦如之。○辛

亥。諭上年御史沈廷芳條奏行營事件。顛倒謬妄。金溶保奏孫嘉淦袒護師門。二人身居言路。顯挾私心。不得不加處分。以示懲儆。是以降旨分別降革。諒伊等此時亦自知愧悔矣。朕以廣開言路為心。於諸言官寧可待之以寬。沈廷芳金溶俱著復還原官。遇缺補用。以觀後效。○以調回北路軍營參贊大臣塔爾瑪善為鑲黃旗蒙古副都統。○以故青海扎薩克輔國公策凌第三子達什扎布襲爵。

○壬子。

上詣

皇太后行宮問安。○大學士等議覆直隸總督高斌奏稱古北口外零星餘地請仍聽民耕種。臣等前議該處本非民地。若聽民人占種。則旗地轉多侵礙。且有地民人輕去其鄉。反致拋荒故業。如無業之人聽其出口。則五方聚處。旗民交雜。易滋事端。再熱河地方原駐滿兵二千名。若將此項民地分給旗人耕種。則兵糧充裕。尚可添撥駐防。於邊防更為周密。是以令該督查明定議。請旨辦理。今該督查查喀喇河屯廳所轄之白馬關。潮河川。熱河廳所轄之張三營。白馬川。四旗所轄之波羅河屯各汛內。凡有平坦可耕之區。悉係旗地。間有民人新墾者。俱係旗園餘地。自雍正十年奉

旨聽民認墾輸糧。從此民人安立家室。悉成土著。如一旦撥給旗人。恐民餬口無資。難於別

處安置。且係零星段落。計地二千九百餘頃。而地段有十萬四千餘段。散布山巔溪曲。即分給旗人。亦不能自種。是旗人未受得地之益。而民人先有失業之累。應如所請。將喀喇河屯等處地畝。仍聽民人照舊耕種。但古北口外邊防所係。尤宜慎重稽查。應令該督轉飭該管各員。留心約束。實力嚴查。無許無藉游民藉口墾地滋事。從之。○兵部議覆甘肅巡撫黃廷桂疏稱。大通衛守備衙署。駐劄向陽堡。該處並無城郭防汛。倉庫監獄。均關緊要。查附近之白塔營。既有城垣。又有都司駐劄。請將守備移駐白塔營。不惟倉庫監獄嚴謹。即番民納糧訴訟亦便。應如所請。從之。○予故江南副都統兼騎都尉七神保致祭如例。○旌表守正捐軀之直隸鹽山縣民張得財妻邵氏。○是日。駐蹕南衙門。○癸丑。

上詣

皇太后行宮問安。詣

永慕寺行禮。○諭軍機大臣等。張若靄一摺。朕已交訥親帶去查辦。但訥親歸途始到山東。為時尚遲。可照原摺鈔錄一封。密寄與喀爾吉善。令其留心訪察。若易於辦理。便可早結。若不能即結。則俟訥親到彼會同妥辦可也。尋據山東巡撫喀爾吉善奏。奉到密寄原摺。有登州府屬海陽縣。私立中央教名色。得自傳聞。現在留心密訪。一得確實。即行拏究。得旨。覽。○大學士等議覆。御史史積琦奏請。勅令州縣。化導鄉人。各省立有規條。似無庸議。得旨。庸民正俗之要。雖屢經朕諭。不啻再三。而各省督撫。實力奉行者鮮。其去取屬員。不過以聽斷明。應對給者為能。如該御史所指者。實有之。若槩以屢奉上諭。立有規條。無庸再議為辭。則頽波日下。民不知禮義。所係誠非小也。其令各省督撫。將歷年所奉教養百姓之事。現今如何奉行。並行之有無成效之處。悉心條對。後大學士九卿再行詳議。以聞。

是日駐蹕舊衙門。翌日亦如之。○甲寅。上詣元靈宮瞻禮。○遣官祭先醫之神。乙卯。上奉

皇太后還宮。○春分朝

日於東郊。遣誠親王允祕恭代行禮。○工部議覆甘肅巡撫黃廷桂疏。稱秦州羅峪河發源於州治西北之鳳凰山。東流至周家磨。繞城而過。匯入沙河。從無水患。嗣州民因利目前取水之便。將周家磨河流故道。建壩堵塞。引歸西流。由羅峪河橋下。南入沙河。不能暢洩。以致屢受衝淹。又城南之呂二溝。向於南岸修築長隄。開濬小河。引水東流。至城東關對面之南。匯入沙河。嗣因廢河為地。將舊隄掘開。直衝沙河。以致州城東西兩面受衝。請將周家磨新開河。築壩堵塞。使河流仍歸故道。并於壩上建龍王廟一間。復於壩之上流。疏濬舊小渠。引水濟用。建大小木橋。上蓋卷棚。

以濟行旅。其呂二溝缺口。照舊築壩堵塞。使溝水仍由小河東流。均應如所請。從之。○予故原品休致領侍衛內大臣薩穆哈祭葬。如例。謚勤恪。是日起。

上以祭

社稷壇齋戒三日。○丙辰。諭曰。給事中陳大玠奏。許容捏款誣陷謝世濟。以致民怨沸騰。許容身為大臣。敢肆其欺罔。罪既無逃。於刑書位何堪列。於察案伏乞收回成命。另簡賢員。庶欺罔知儆。而於封疆有益等語。鄒一桂所奏亦同。朕因湖北巡撫員缺。一時不得其人。許容久歷外任。頗能辦事。是以宥過。令其署理。以觀後效。今陳大玠既如此陳奏。其言亦是。許容不必署理。湖北巡撫印務晏斯盛著仍留原任。戶部侍郎員缺。著汪由敦調補。兵部侍郎員缺。候朕另降諭旨。向曾用趙宏恩。石麟。皆以言官糾論而罷。夫人材難得。豈可一棄終不復用。若果新進之人。師師濟濟。朕

亦何樂於必用已罷之人。用人之難。外臣何由得知。其出於不得已者。往往類此。然言官各抒已見。陳奏朕前。乃其職掌。今陳大玠。鄒一桂。兩人所奏相合。顯有商謀扶同之處。且近日有旨。金溶。沈廷芳。著仍以御史用。獨非棄而復用者乎。言官何無論列者。此風亦不可長。但朕既不用許容。此中情事。姑不究問。莫謂朕終不知也。將此并諭諸臣知之。○管

理

三陵事務奉恩輔國公祿慶奏從前總理

陵寢貝勒大臣等遇有慶賀事件。悉赴京請安。每致事務無人照管。嗣後請分為兩班赴京。庶事件不致貽誤。得旨。知道了。○蠲免安徽桐城。宣城。南陵。銅陵。繁昌。無為。廬江。臨淮。建平。等九州縣。并無為州。歸衛田地。上年水災額賦有差。○丁巳祭

先師孔子

上親詣行禮。○諭。上年江南淮徐所屬歉收之

州縣朕已諭令該督撫悉心體察撫綏安輯不使窮黎失所但聞海州贛榆二州縣地瘠民貧又當積歉之後其艱窘之狀較之他處為甚計賑濟之期正二月便當停止此時去麥熟尚遠民食艱難朕心軫念著於原議之外將極貧者加賑四十日次貧者加賑三十日以恤窮困又聞鹽城銅山沐陽三縣其情形較海贛為輕而較他處則稍重停賑之後亦應量為籌濟著該督撫商酌速辦尋據兩淮鹽政準泰奏淮安分司所屬莞瀆臨洪興莊等場上年被旱竈戶係素不產鹽之地惟以耕種為業請照海贛二州縣民戶一體將極貧者加賑四十日次貧者加賑三十日得旨著照所請行該部知道○又諭朕聞閩省地方因循廢弛之習不獨有司為然武職各官尤甚衙門兵役均有緝捕查拏之責文職衙門之壯捕豈能如營汛兵丁之衆多遇有大夥梟販武職弁兵自應首先擒捕方不至於

兔脫乃上年十月內晉江縣梟販莊鬚三等持械押護私鹽二百餘擔兵役攔截擒拏竟被殺傷兵丁將器械奪去又十一月內長樂縣江田地方梟販陳德賜等八十餘人哨捕向前擒拏反被剥衣捆打巡兵繼至見梟販勢衆不敢擒拏盡被走脫其餘十數人及數人一起之私梟在地方肆行者甚多而弁兵捕獲者甚少朕所聞如此鹽梟既敢抗玩則其他聚衆不法等事一任其疎縱可知著總督卽蘇圖巡撫周學健加意整頓體國家設兵衛民之意大破從前積習嚴飭弁兵緝奸禁暴以靖地方倘或仍蹈前轍將弁兵嚴加處分毋得姑容尋據卽蘇圖等奏沿海販私奸民處處都有至大夥私梟聚衆至八九十人及百餘人之多兵捕四路查緝勢力渙散猝然相遇衆寡不敵上前擒捕轉致損傷欲清梟販之源當思捕緝之法查各梟私挑往來出沒定有經由之要隘要津能於津隘處

所酌撥兵役。併力遊巡。梟賊或知斂跡。但沿海產鹽之處。地界遼濶。津隘頗多。非各處汛防之諳練員弁。不能熟悉。現在除莊鬻三。陳德賜等多人。俱已拏獲外。復移行提鎮協營司道等。確核安辦。并飭令查保甲以防窩頓。嚴場竈以杜私售。得旨。知道了。諸事皆當如此。上緊料理。方合。○戊午。祭

大社。

大稷。

上親詣行禮。○詣

皇太后宮問安。○御史胡寶瑗奏。特命大臣前往河南等省。查看營伍。該將弁等一聞此信。惟圖掩飾一時。其修理戎器。刻期墊補。不無借派扣抵之累。請敕下該部。行文各督撫提鎮。嚴飭營弁。毋得臨時派累。事後坐扣。倘容隱徇庇。將該管上司一併議處。得旨。著照所請。行該部知道。○己未。

孝康章皇后忌辰。遣官祭。

孝陵。○諭。上年天津河間。深州等屬十六州縣。被災較重。朕已格外加恩。賑濟撫綏。毋令貧民失所。但今已屆仲春。雨澤未降。二麥收成。不能期必。倘青黃不接之際。已經停賑。恐貧民仍不免乏食。朕心軫念殷切。此十六州縣。著於從前議定之外。再加賑月分。以濟民食。總督高斌。可分別妥議具奏。早為辦理。其或米穀不敷。著一併豫籌。以備臨時之用。該部遵諭速行。○又諭。江南布政使安寧。現丁母憂。其布政使並關務。著吏部郎中愛必達署理。即前往赴任。○庚申。大學士張廷玉等奏。京官郎中以下至小京官。外官道府以下至雜職。捐納議敘。論俸陞補。均有成例。惟各部院官員。議敘保題。款項繁多。舊例內未有明條者。須詳參定例。明立章程。一員外郎由降官補用者。照降官補用主事之例。試俸二年。陞轉。一內閣侍讀。由中書保題者。照保題員外郎之例。試俸三年。陞轉。一內閣票籤。中書。

吏兵二部掌稿筆帖式。戶部三庫大使。寶泉寶源二局大使。刑部司獄。年滿陞補主事等官。俱照議敘之例。試俸三年。題請實授。其未題實授者。概不准陞用。一理藩院堂司主事。於本衙門人員內揀補。黑龍江寧古塔將軍衙門主事各缺。於京部院筆帖式內揀補。盛京五部委署主事。於盛京各部筆帖式內揀補。侍衛衙門主事。於本衙門應陞人員內揀補。稽查欽奉上諭事件處。委署主事。於筆帖式內揀補。提督衙門主事。於本衙門筆帖式內揀補。起居注滿洲堂主事。於各部院衙門熟習繙譯。應陞主事人員內揀補。寧古塔各處倉官。於本處有品級無品級筆帖式內揀補。俱照保題之例。試俸五年。照常陞轉。從之。

○戶部議覆山東巡撫喀爾吉善疏。稱歷城等各州縣舊設民壯三十一百五十五名。裁四百六十七名。留二千六百八十八名。部議存留過多。駁令再行酌減。該撫以東省東環

大海。為九道通衢。自應准其存留。時加訓練。專責巡防撥護。從之。一理藩院議覆喀爾喀郡王功額薩木丕爾之王爵。不應准承襲。得旨。功額薩木丕爾原係施恩。著在額外郡王上行走之人。因無甚効力之處。故議不准承襲。甚是。但功額薩木丕爾已經在郡王上行走。遽行永替。朕心有所不忍。特加殊恩。著照功額薩木丕爾遺本所請。將伊四子丹津賞與貝勒。伊後日行走若好。朕再加恩。○御史錢度奏。直隸天津河間等處舊歲偶有災荒。流民至京者以千數計。請敕下各直省督撫嚴諭所隸州縣。一有偏災。如辦理稍遲。致民人四散者。立即糾叅。得旨。錢度言之似是。而其實非也。地方水旱之災。使有司一面具報。一面辦理。務使得所。不致流離。此皆久定之功令。朕亦不啻三令而五申矣。去歲天津河間之災。民來京者誠多。亦以離京路近。而京師賑恤厚也。遠方州縣。安能如京師五城御

史之多。辦理就近而得宜乎。若定民人四散。立即糾叅之例。是使窮黎餓死溝壑。而阻其謀生之路矣。然督撫辦理。又不可泥於遵朕此旨。以為卸責。而使民輕去其鄉也。錢度所奏不准行。該部知道。○旌表守正捐軀之直隸任邱縣民趙昌印養女郭氏。○免長蘆永利富國濤碓等三場。并海陽縣竈地。早災額賦有差。○免江蘇溧水。高淳。金壇。溧陽。銅山。豐縣。蕭縣。阜寧。安東。海州。沐陽。贛榆。并徐州。大河。二衛。及鹽城所。一十五州縣衛所。水災額賦有差。○加賑湖南龍陽。沅江。二縣。被水貧民三個月口糧。○辛酉。諭安西提屬布隆吉。雙塔。柳溝等處營兵。於乾隆元二兩年。屯種恒田案內。喂養牛騾馬匹。採買豆草。用銀一千八十七兩。當時無項可動。是以於屯糧內借給。後經該督撫以成卒寒苦。請於元年秋收糧內。作正開銷。部議不准。朕思此項銀兩。已歷多年。當日屯種各兵。事故開除。正復

不少。難以責令現在之兵丁還項。著將此項銀一千八十七兩。准於元年秋收糧內。扣抵開銷。以示朕優恤邊兵之意。該部即遵諭行。大學士等議覆。巡視南漕御史王興吾奏。稱直隸山東。去歲偶有偏災。米價昂貴。請將本年重運漕船所帶餘米。暫准糶賣。於德州。天津等處。報明押運員弁。每船以十石為率。且令天津巡漕御史。實力稽查。毋許於十石外。多行糶賣。應如所請。得旨。依議速行。○吏部左侍郎田懋奏。今春京師直隸等處。雨澤缺少。曾命刑部清理獄犯。至外省未結之案。甚多。雖定限四個月完結。違者處分。而案犯患病。例得扣除日期。外官恃有此例。於難結之案。每故捏案犯患病。有病至數月二三年不等者。伏思案情不結。人犯拖累無窮。請諭刑部。將各省案件。逐一細查。有託案犯患病。及別項事故遲延。其正限外。在四個月以內者。情理尚有。其在四個月以外。至二三年者。

逐一奏明。嚴行催結。如仍遷延觀望。督撫加以嚴議。得旨。各省案犯有因患病遲延。至一二年未結者。著刑部查明行文。速催完結。在京各犯。亦照此辦理。○禮部議覆安徽巡撫范璨奏。稱各處僧道。多自稱參禪訪道。朝東暮西。或假星相醫卜之名。糾結匪徒。作奸犯科者。雖向有僧道陰陽等官稽查之例。但未明立治罪之條。是以止存按季取結之具文。毫無實益。請嗣後凡外來投歇。驗無牒照者。許住持僧道報明地保鄰甲。呈官驅逐回籍。若私自容留犯案事發。將住持僧道分別治罪。地方官徇隱。併行議處。又民人情願出家者。必投師呈官註牒。方准簪剃。如並不投師註牒。私行出家者。以違制例治罪。並嚴飭各地方官實力奉行。應如所請。從之。○考試滿洲繙譯童生。以吏部右侍郎宗室德沛工部右侍郎德齡為考官。蒙古繙譯童生。以理藩院尚書納延泰國子監司業多爾濟為考官。

免長蘆興國富國豐財等三場。并滄州南皮鹽山慶雲青縣衡水海豐交河東光樂陵等十州縣被旱竈戶災民額賦有差。士戍

上詣

皇太后宮問安。○諭曰。戶部尚書張楷著寬給假限。令其安心調理。俟疾痊愈後。到部辦事。此際戶部事務著彭維新署理。○吏部議覆甘肅巡撫黃廷桂疏。稱高臺縣屯田縣丞專司屯務。向無衙署。請於附近屯所毛目城添建工料銀在司庫存貯捐納土方銀內動支。應如所請。從之。○又議覆雲南總督張允隨疏。稱姚安府沙地新開鹽井。錫名安豐。一切煎鹽事宜。請歸併就近之白井提舉兼管。應如所請。從之。○太常寺卿李世倬奏。太常寺漢官已足敷用。請將漢贊禮郎十八員內裁汰四員。司樂二十九員內裁汰六員。得旨。如所請行。下部知之。○又奏壇廟工程一千兩以上者。俱由太常寺行文工

部修理。嗣後一千兩以上工程。仍照舊例。交工部會同太常寺修理外。其一應未及一千兩以上之土木作。俱移咨工部。派員修理。至於修理祭器等工。事屬零星。照舊令太常寺派員修理。得旨。如所請行。下部知之。○予故多羅貝勒允祐致祭二次。立碑造墳如例。謚恭勤。○免福建臺灣鳳山諸羅三縣旱災額賦有差。分別賑貸。○癸亥。

上詣

皇太后宮問安。○詣

大高殿行禮。

實錄卷一百一

三

大清高宗法天隆運至誠先覺體元立極敷文奮武孝慈神聖純皇帝實錄卷之二百十

實錄卷一百十

三

大清高宗法天隆運至誠先覺體元立極敷文
奮武孝慈神聖純皇帝實錄卷之二百十一

監修總纂官經筵講官太子太傅文淵閣大學士文淵閣閣學領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣閣學事務稽察欽奉 上諭事件處管理刑部戶部工部事務

世襲騎都尉軍功加十九級隨帶加二級又加二級尋常加二級軍功紀錄五次臣戶部尚書錢弘璘滿洲都統軍功紀錄五次

尋常紀錄十四次臣德璉經筵講官太子太保工部尚書紀錄六次臣曹振鏞等奉

教修

乾隆九年甲子二月甲子

實錄卷一百一

上御乾清門聽政 遣官祭

關帝廟 吏部議覆解任兵部尚書陳惠華
將伊弟陳惠正密封奏摺及部科揭帖有意
隱諱不奏應照例革職得旨陳惠華應照部
議革職但兄為弟隱與他人有間著從寬降
二級調用（又議覆湖北學政吳嗣爵奏稱
向例訓導專用歲貢其由生員補廩挨次二
十餘年始得出貢又候選十餘年大約遲暮
方能補缺其有教諭訓導兼設之處一學兩

官尚可協同辦理若施南府恩施建始二縣
只設訓導一員況地屬苗疆必須年壯學優
實心膺迪方為有益請以會試後揀選之明
通舉人選授以教諭管訓導事仍照教諭原
銜陞轉應如所請從之 山西巡撫阿里衮
議覆按察使多綸奏州縣承審案件有呈報
犯証患病者照例委員查驗後具結詳該管
知府直隸州知州核明加具並無捏飾印結
詳撫司備案至報愈有無遲延亦責該管府
州稽查臣與按察使仍不時留心倘承審官
捏報委員徇庇捏結及病愈而遲延不報者
嚴叅分別議處知府直隸州知州冒昧出結
不行查揭者一併嚴叅照通同徇隱例議處
其知府直隸州審轉案件有犯証患病者結
報該管道員察實加結倘有捏報遲延徇隱
等弊將道員照知府直隸州知州一例叅處
得旨如所議行（命大學士史貽直在紫禁
城騎馬 以通政使司通政使勵宗萬為都

察院左副都御史。補行直隸省乾隆七年軍政年老官一員。有疾官一員。才力不及官一員。分別處分如例。廣西太平府羅陽土知縣黃恩憲故子澤遠年幼。以族弟宏憲護理印務。乙丑。以舉行仲春經筵。遣官告祭奉先殿。

傳心殿

上御文華殿講官暨侍班之大學士九卿詹事等行二跪六叩禮。分班入殿內序立。直講官

宣義卷百十一

三

四人出就講案前。行一跪三叩禮復位。直講官阿克敦。任蘭枝進講論語古之學者為己。今之學者為人章。講畢。

上宣御論曰。此聖人歎世道之衰微而慨想古之人也。夫學者何。明明德以新民而止於至善。惟行其心之所安。而盡其分之當為耳。豈有人己之分哉。自精一之學不傳。而人已乃判分。於是。不知而愠者有之。蓋不能克己也。故孔子矯之曰。汝以此為己乎。古之學者

不蘄人知。而人無不知。此乃所以為己也。今之學者。惟蘄人知。心逐於外。而日喪。是為人耳。豈為己耶。究之古之學者。何曾有為己之心哉。夫有己必有人。人已之見介於中。天理之公於是泯矣。故古之學者。無人已之分。又豈有為己為人之別。聖人慨今之學者之不如古。於是。有古之學者為己之歎耳。程子曰。古之學者為己。其終至於成物。今之學者為人。其終至於喪己。蓋亦微見聖人本意焉耳。

宣義卷百十一

四

講官暨侍班官跪聆畢。興。直講官索柱。錢陳羣進講。易經天地之大德曰生。講畢。

上宣御論曰。天地之大德曰生。德與生不可析。而二之。若謂職覆職載。德莫大。大始成物。生莫盛。是德與生為兩事。而非易簡矣。德即生。而無聲無臭之理。於是乎昭。生即德而成形。成象之用。於是乎溥。故曰元者善之長也。此天地之心也。天地之心不可見。以天地之大德見。天地之大德不可見。以天地之生物見。

然而生即德。德即心。大生廣生。孰非易簡之至德哉。講官暨侍班官跪聆畢。大學士鄂爾泰等奏曰。

皇上精一執中。繼唐虞之道。統尊崇正學。一天下之人心。造士各因其材。儒風日進於古。天地以生物為德。帝王以成物為功。

皇上一以貫之。天德王道備於是矣。臣等幸侍經筵。親聆睿訓。不勝榮幸之至。奏畢。諸臣出就拜位。行二跪六叩禮。禮成。

上還宮。賜講官侍班官等宴於協和門。國子監帶領博士黃施鶚引見。諭曰。黃施鶚著仍留國子監博士之任。令其啟迪諸生。如果勤於訓課。爾監具奏請旨。加以陞銜。示之鼓勵。朕觀今之秉鐸者。與肄業者。惟以成均為仕路之捷徑。所為古之學者為己者。百無一二。爾祭酒等亦應知此為世道人心之害。使博士與諸生。沉潛踐履。則天爵修而人爵隨之矣。如惜其材品。或致淪棄。且別無鼓舞之方。

殊不知天下之大。州縣之多。豈少此一二能幹之縣令乎。加之陞銜而不離其任。則其身已榮。且成全多材。是化一二而百十也。爾監其永遵之。大學士等議覆。貝勒允禔奏稱。從前。

東陵禮工二部關防。皆係本部郎中掌管。後因設立總理衙門。將工部關防改為鈐記。今總理

泰陵。請照例將工部關防作為鈐記。又

泰陵承辦事務。請添設主事一員。筆帖式二員。又原任尚書憲德住房空閒。請改為總理衙門。又

泰陵侍衛三十九人。因領侍衛內大臣哈達休致。無人管轄。請總理事務處兼管。應如所請。得旨。侍衛等著貝勒允禔管轄。餘依議。直隸提督保祝奏。豫東兩省應運

陵糶四萬七千餘石。請將八溝所買四萬石。就近撥運薊州供用。不敷。再將唐三營等處採

買米照數撥足。所有豫東兩省運薊漕糧毋庸復運。輓運既易。腳價可減。得旨著照所請速行。下部知之。○丙寅諭本月二十二日皇后千秋節。適值清明。未便照常行禮。是日行禮之處著停止。又諭京師及附近府屬如天津河間等處。自冬徂春雨雪稀少。今清明已屆。農事方殷。朕心深為憂惕。宮中默禱已非一日矣。此時雖未至雩祭之期。亦當敬謹祈求。以期膏澤早降。著禮部順天府虔誠祈禱。速議舉行。並傳諭直隸總督高斌知之。

年表卷二十一

一

諭軍機大臣等。蔣炳開井之奏原可有益於田畝。但不知如何舉行。方為妥協。可將原摺

奏寄與高斌閱看。令其悉心商酌可否。即試行於天津河間。俾小民傭工餬口。至崔紀既曾行於陝西。可否令其前往直隸董率辦理。否俱著高斌詳細妥議具奏。再朕聞得天津河間一帶上年歉收。米糧固屬艱難。柴草亦甚稀少。民間甚以為苦。若平時多種樹木。便

可以供炊爨之用。可令高斌轉飭有司。於民力寬暇之時。勸諭為之。其他府亦應照此辦理。尋奏保定府屬已開成土井二萬二千餘口。一井所費不過需銀一二兩。目前農事方殷。亟需澆灌。民間俱各踴躍從事。其天津河間兩府以次辦理。至種樹以備柴薪。最足廣地利而厚民生。但收效在數年之後。小民每不肯勤手足為之。請照河工栽柳之例。官員栽柳五千株者。紀錄一次。一萬株者。紀錄二次。一萬五千株者。紀錄三次。二萬株者。加一級。次年查驗活數。造冊議敘。得旨覽奏稍慰朕懷。戶部議奏京師上年豆價昂貴。已酌發京倉官豆平糶。今黑豆市價尚昂。旗民需豆甚殷。請將倉貯豆仍按八旗內務府二十七局。每局各再撥五百石。共一萬三千五百石。及時平糶。價仍照前。每石市平銀一兩并交九門提督順天府府尹稽察。毋致奸民囤積販賣。得旨依議速行。工部右侍郎德齡

年表卷二十一

八

奏考試滿洲繙譯童生。每有越號換卷傳遞代倩等弊。請於入場前一日順天府行文兵部轉行左右兩翼。各派滿洲叅領一員。各帶領催二名。馬甲十名。於試日入場分撥巡視。如有越號等弊。或該領催馬甲等生事不法之處。即將該叅領指名題叅。得旨。如所請行。

丁卯。

上詣

皇太后宮問安。諭朕因直隸天津河間深州

等處上年被災較重。今春雨澤未降。麥收未

能期必。恐停賑之後。貧民不免乏食。著高斌分別妥議。於從前定議之外。再加賑月分。以接濟窮民。並豫籌米穀。以備臨時之用。今據高斌奏稱。查現在次貧之民。前議賑至二月止。極貧之民。賑至三月止。今遵旨加賑。應將次貧再加三月一個月。極貧再加四月一個月。但次貧情形不一。各村莊被災輕重亦不同。除次貧內現在乏食。仍需接濟者。照常加

賑一月外。其有加賑一月。尚不能支持。無異極貧者。若祇照次貧加賑一月。仍恐不能自存。應同極貧一例加賑至四月為止。此應賑之民。若全給本色。更於民食有益。約計需米三十萬石。仰懇勅下倉場侍郎。於通倉內照數給發。即令被災州縣。自雇船隻。赴通請領。其水脚照例報銷等語。著即照高斌所議速行。其一切查辦事宜。著飭原辦之道府親赴各州縣督率辦理。務令貧民均霑實惠。諭

軍機大臣等。前因直隸山東河南等省老瓜

賊為害地方。屢經降旨。該督撫設法嚴拏。并諭令密行緝緝。不得張掛告示。以致奸徒聞風遠颺。乃近聞山東河南通衢大路。仍有瓜賊出沒。早晚刦奪行李。該州縣官僅於道旁搭棚豎旗。大書嚴拏瓜賊字樣。又或建築堡房。並無兵役巡瞭。轉為瓜賊潛蹤伏跡之地。似此草率辦理。虛應故事。焉能詰奸禁暴。淨厥根株。爾等可寄信與喀爾吉善。碩色。令其

督率文武員弁。密加訪緝。實力查拏。務使宵小絕跡。以安行旅。再直隸河間。天津等處。收成歉薄。或有無業貧民。勾結匪類。滋事害民者。亦傳諭總督高斌。留心稽察。綏靖地方。補行乾隆七年大計。直隸省不謹官二員。年老官十二員。有疾官六員。才力不及官五員。浮躁官二員。湖北省不謹官二員。罷軟官二員。年老官二員。有疾官二員。才力不及官四員。浮躁官一員。分別處分如例。雲南鶴慶府在城驛土驛丞田生蕙。故子躍龍已故。以孫大治襲職。加賑雲南雷益州南寧縣被水災民三個月口糧。戊辰兵部議覆署貴州提督鎮遠鎮總兵冷文瑞奏稱。參將一缺。有題補部推之別。查有應陞參將之大銜遊擊。既係功加人員。自應推陞。其有蒙特恩將該員陞銜。留於遊擊任者。並有仍留守備任者。此項人員。原有行令該省督撫等題補。參將之例。乃該省督撫以為係奉旨留任之員。

不便另行題補。且該員等如遇副將缺出。開列時論。其參將尚在遊擊任。論其遊擊已陞參將銜。既難列名。又難題補。終無陞轉之路。請嗣後雲貴川廣陝西五省。遇有大銜遊擊守備。已經推陞參將。奉旨留任者。應令該省督撫提鎮酌量人地相宜。不拘應陞應選。參將缺出。即行題補。應如所請從之。工部議覆直隸總督高斌疏稱。滄州新添滿兵二百名。連舊共五百一十一名。每歲截留漕米一萬一千四百石。舊無倉廩。請建倉廩一十五間。收貯應如所請從之。己巳祭歷代帝王廟。上親詣行禮。庚午清明節。上詣壽皇殿行禮。詣皇太后宮問安。遣官祭永陵。福陵。

昭陵

昭西陵

孝陵

孝東陵

景陵

泰陵○遣官祭

端慧皇太子園寢○遣官祭昭忠祠○綏遠城建威將軍補熙秦綏遠城馬匹向雇蒙古人等與兵同牧前任將軍伊勒慎奏請停止

今查牧場地狹與衆扎薩克連界且蒙古往來貿易者甚衆所有之井俱係本地蒙古等自行刨挖若將馬場各分地方牧放停蒙古等盤費恐不免偷盜馬匹爭競水草請仍給蒙古等盤費按月每人給價八分五個月共銀四錢令其與兵同牧有遺失蒙古等照數擬償得旨著照所請行○辛未

上詣

皇太后宮問安○幸瀛臺演耕○壬申諭戶部

山東上年濟南東昌武定等屬三州縣被災

歉收朕已加恩賑濟毋使小民失所聞該省今春雖已得雨尚未霑足將來豐歉難以豫定應及時籌畫以備臨時之用目今東省閘內現有運京漕糧四萬餘石著就近截留以濟借糶不敷之州縣再將北上糧船內截留漕米二十萬石分貯沿河臨清德州二倉倘遇需用之時即動撥接濟戶部即速行文倉場侍郎及山東巡撫遵諭速行妥辦尋倉場

總督戶部侍郎覺羅吳拜等奏東省應運薊糧四萬七千餘石再山東河南尚有五幫糧船計米一萬餘石可以截留令其輓運應賑州縣水次得旨依議速行○又諭山東齊東等十九州縣衛被旱歉收朕已降旨將應徵錢糧照例分別辦理但被災州縣尚有勘不成災之地畝例不在緩免之列朕念此等地方既屬薄收自冬徂春民食未免拮据今當青黃不接之際餬口維艱若令其輸納國課

實為竭蹶。著將濟南府屬之齊東陵縣德州德平平原臨邑德州衛武定府屬之惠民海豐樂陵商河濱州霑化陽信利津東昌府屬之武城恩縣夏津沂州府屬之日照縣南鄉并安東衛等十九州縣衛應徵乾隆八年地丁及帶徵錢糧寬至本年秋成後再行徵輸以紓民力。該部即遵諭速行。大學士鄂爾泰等議奏。總理青海副都統莽古賚咨稱青海扎薩克王貝勒貝子公台吉等二十九旗所屬蒙古住牧有居處孔道者有地雖稍僻而與夷使經過之路相近亦應搬移者前因準噶爾夷使於乾隆六年八年兩次往東科爾貿易經過青海地方業經委員前往督率搬移應議分別賞賚其扎薩克郡王二員擬各賞大緞二。官緞四貝勒貝子各一員各大緞一。官緞四鎮國公一員輔國公三員各大緞一。官緞三台吉八員各官緞三各旗屬蒙古人等四千四百七十八戶每戶賞銀四兩

從之。戶部議覆甘肅巡撫黃廷桂奏稱甘省向緣版籍脫訛戶口混淆州縣衛所多無實徵底冊花戶並無易知由單以致里甲包收代納隨意作奸今將渭源金縣二處查造實徵花名紅簿挨里甲核對於徵收前照底簿開單發給花戶按額催徵各屬俱循照查造以便徵收應如所請從之。禮部議覆山東學政李治運奏稱新定武生捐監不准入文場之例原因舊例武生准入文場一次監生准入武場一次經臣工條奏互試弊多永行停止是凡為監生即應歸併文場乃部議以武生捐監生者一概不准入文場但武生既經捐監自應歸入文途應試不得更入武闈滋弊應如所請從之。以原任兵部尚書陳惠華為兵部左侍郎。癸酉遣官祭賢良祠。復各省捐監以實倉穀諭積貯為備荒之要務不可不為豫籌從前因採買過多市價昂貴是以降旨停止今停止已及一

年各處米價。總未能平減如常。揆厥所由。米價之貴。原非一歲驟長。自不能一時驟平。蓋奸商狡獪之故。智猶存。而百姓圖獲厚利之積習未改也。夫採買既有妨於市價。而倉儲又不可以虛懸。雖令各督撫按地方情形。應買則買。應停則停。相機籌畫。不得膠執定見。但年歲豐歉不齊。即隨時零買。恐所入不抵所出。終非經久之計。朕思欲停採買。而使廩積仍不至有虧。惟有復開外省本色捐監之

例。蓋米價之貴。貴於官買。不貴於捐監。官買則商民聞風增長。或吏胥作奸舞弊。往往至於累民。若捐監則各出其有餘以輸之官。於市價原無關礙。是外省多收監穀。採買即可以久停。於倉儲民食。兩有裨益。若在戶部收捐。發銀各省糴穀。仍是未停採買也。著將戶部捐銀之例停止。其各省捐監生俊。俱令於本地交納本色。至捐監穀數。從前所定。不無過多之處。今照各省時值。酌定其穀數。如江

南每監生一名。捐穀二百二十石。今江南米價時值一兩七八錢不等。若照例收穀二百二十石。則值銀一百六七十兩。捐者仍必觀望不前。今應照數減二。每穀一石酌以六錢計算。每名收穀一百八十石。如將來穀價平減。該督撫具奏到日。仍照舊例收捐。其各省如何照此酌減。並官吏需索勒捐等弊。如何嚴行查禁之處。著該部即速妥議具奏。大學士徐本因病奏請解任。得旨。覽卿奏俱悉。

漢大學士事務。現在張廷玉史貽直辦理。劉於義協辦。卿可安心靜攝。不必管理閣部諸務。亦不必懇請解任。禮部議覆陝西學政嵩壽奏。稱州縣錄取童生。以送府州考試。府州拔取方送學臣。今府州考試童生。多無考棚號舍。無從編定坐號。或在衙署。或在學宮。聽自備桌櫈進考。師弟父子。共坐一處。父師作稿。子弟謄鈔。或一人幾卷。更易姓名。僥倖俱取。另與他人進院考試。諸弊叢生。請嗣後

府州考試童生。即在學政衙門考棚內編號局試。如學政衙門不在府州治內。令該府州選擇就近緊密公所。照院試例編立坐號。仍按名取具廩生保結。臨時認識。倘有不按本號者。即行逐出。應如所請。從之。○兵部議覆原署兩廣總督廣州將軍策楞疏稱。廣西南寧一郡。為苗疆要地。並無城守專員。而左江鎮向設四營。請將前營遊擊改為南寧城守營。遊擊並鑄給南寧營遊擊關防。應如所請。從之。○甲戌。

孝昭仁皇后忌辰。遣官祭

景陵。○戶部議覆雲南總督兼管巡撫張允隨疏稱。昭通東川二府新闢夷疆。產穀無多。上年雨水稍多。收成歉薄。兼因地產銀銅。商民輻輳。民食殊艱。請於銅息項下動銀二萬兩。至川東採買米穀。轉運平糶。應如所請。得旨。依議速行。○兵部議覆署江南總督尹繼善疏稱。太湖營向設馬兵七十名。今已裁減四

十八名。該營界連江浙地方。遼濶止額設步戰守兵九百三十名。不敷巡防。請將所裁馬兵四十八名改設步戰。俟所裁馬兵缺出。照數募補。餉數照原額不增。而水鄉益收巡防查緝之效應。如所請。從之。○調河南南陽鎮總兵韓應魁為四川重慶鎮總兵。調直隸宣化鎮總兵蕭良金為河南南陽鎮總兵。以直隸薊州協副將高琦為直隸宣化鎮總兵。○乙亥。

上耕耤詣

先農壇行禮。更服至耤田所。

躬耕三推。復加一推。

御觀耕臺。命莊親王允祿裕親王廣祿恒親王弘旺各五推。吏部侍郎阿克敦戶部尚書海望禮部侍郎鄧鍾岳兵部侍郎雅爾圖刑部侍郎托時工部侍郎索柱都察院左都御史劉統勳通政使塔爾岱大理寺卿定柱各九推。畢。順天府府尹率農夫終畝賞

賚農夫耆老如例 丙子

上侍

皇太后幸悅心殿進膳澄懷堂進茶果奉

皇太后還宮○諭軍機大臣等江南太倉州

知州趙錫禮海州知州衛哲治此二員為人何如居官辦事何如係何等才器可於尹

繼善奏事之便寄信詢問令其據實具奏○

大學士張廷玉等奏部曹保題者多歸選者

少致挨俸應陞及候補候選之員多至壅滯

今請酌分吏部文選司滿郎中二員員外郎

一員主事一員考功司滿郎中一員員外郎

二員主事一員該二司內漢郎中各一員員

外郎共三員主事各一員定為題缺其餘員

缺統歸銓選刑部十八司滿漢官員如有三

缺咨二留一應題之缺若揀選無人仍歸銓

選從之○湖北巡撫晏斯盛疏報鶴峯州乾

隆六年分勸墾水田三畝旱地六頃六畝

免廣東吳川縣旱災額賦有差 丁丑

上詣

皇太后宮問安○諭山海關喜峯口冷口羅文

峪張家口等處增設駐防兵丁內有在京時

借過庫銀及指錢糧製造盔甲器械者此皆

應行坐扣之項但伊等初到服習未定若於

每月所得錢糧內再行坐扣伊等未免拮据

此項坐扣未完銀兩俱著加恩豁免停其坐

扣該部知道○禮部議覆四川學政蔣蔚奏

稱川省文武各生多有居住該州縣而入庠

他邑者與本學教官素不謀面及滋事敗露

又以現在州縣非本管往返移查聞風遠颺

輾轉拖延弊竇繁多請通諭限兩月內自行

呈明係何學生員居住某里某甲鄰佑某某

有無田糧廬墓逐一詳細開載如逾限不行

呈明查出即行黜革又鄉試士子場前蜚語

流言臨場紊亂坐號互相糾約希圖作弊請

令該督撫將科場條例先期曉諭倘有仍蹈

前轍者照例治罪又學政錄遺恐一人耳目

難周。請檄調教官。在旁認識。均應如所請。從之。○兵部議覆閩浙總督那蘇圖奏稱。衝鎮中營多設把總一員。城守營多設守備一員。把總一員。俱請裁汰。至金華所屬之蘭溪。汛界處嚴衢大路之間。請於蘭溪地方另設兵十名。安一塘。改隸金協管轄。所需馬守兵十名。即於所裁之守備把總名糧內撥補。應如所請。從之。○以湖廣總督阿爾賽為戶部尚書。荊州將軍鄂彌達為湖廣總督。○戊寅。吏部議覆署江南總督尹繼善疏請添設鹽城。興化二縣境內天妃石碇二關。關官一員。上岡北草堰二關。關官各一員。白駒南北中三關。關官一員。共關官四員。各照未入流之例給俸。鑄給條記。添設皂隸各二名。其關官均責令東臺水利同知統轄。應如所請。從之。○命翰林院檢討胡中藻為陝西學政。是月。尚書公訥親奏報查勘災重之天津府屬靜海青縣滄州南皮鹽山慶雲河間府屬東光

吳橋交河景州并景州以北之阜城獻縣河間任邱又冀深二州屬之武邑武強等十六州縣領賑貧民咸無飢色白叟黃童無不感戴深仁得旨覽奏俱悉卿去後又復兩旬矣尚未得雨朕憂想已知之○又奏奉旨愛必達署理江蘇布政使誠恐未經外任不克稱職懇請另揀賢員署理得旨汝弟之所以尚未擢用之故久已諭汝矣若論其才品當不在安寧以下也但安寧現今丁憂目下又復無人俟其或半年或一年仍令彼往滿洲亦不能與漢人一例也且圖拉在彼若無人彈壓恐不安靜傳與汝弟諸事皆如安寧所辦即織造處所傳辦物件汝弟雖不知內裏做法亦不可但聽圖拉任意為之至一路所經關稅如倭赫圖拉輩之聲名如何之處一一留心其有一日不可留者即具奏若中常者回來時奏聞亦可直隸總督高斌奏面奉諭旨天津河間等處地方若城垣有應行修

築之處興工代賑。今查大城阜城二縣本應修築。但磚城工大費繁。惟照景州滄州土城之例修築土工。小民得以力作餬口。為合以工代賑之意。得旨。好。知道了。署兩江總督協辦河務尹繼善奏。江南河道工程。於水利効力人員內。擇其諳練勤慎者。酌派工段。照估興修。如有偷減遲誤。即行詳揭。叅究得旨。今之外省官員。公然貪黷者實少。惟尚有工程一途耳。若不嚴察。將來未必無代人受累之處。此意亦令白鍾山陳大受范璨知之。安徽巡撫范璨奏。鳳潁一帶。積歉之後。米價昂貴。官倉不敷糶濟。仍照上年勸諭富民出糶。分別獎勵。督率守令實力查辦。得旨。觀所奏尚屬留心。但須實力董率。有司妥帖為之。浙江巡撫常安奏。查勘寧波府沿海地方。更坐戰船。駕入海洋。抵鎮海縣。復由鎮海抵定海。巡視海面。凡涉外洋之山。最易藏奸。雖膏腴沃衍之區。必須嚴行飭禁。毋許開墾採

捕煎燒等類。以滋事端。得旨。所奏俱悉。汝如此勤於王事。衝冒風濤。不無勞頓否。湖南巡撫蔣溥奏。按察使明德本有可用之才。居官亦能向上。但多偏執。已見如巴陵縣兇徒糾眾搶奪。理宜按法究處。而明德必欲從寬辦理。寶慶等處關稅。理宜按額徵解。而明德必欲奏請豁免。現今大計卓異。開列一等者五十二人。多出自明德前署藩司時酌定者。特為核去二十餘人。不使冒濫。布政使長桂老成持重。但才具不及明德。不能和衷共濟。得旨。所奏甚屬公當。之論明德實係有才一邊。其所以尚寬者。亦因今之政令從寬故耳。設遇嚴時。彼亦係能嚴者。至其志氣尚在未定。惟應教訓造就之。若甚不妥。即行奏聞可耳。又奏楚南苗徭應於羈縻之中。寓懾伏之用。現在嚴飭文武員弁。禁約兵役。不使擾累。仍勤練兵丁。整飭武備。不許懈弛。得旨。御苗之道。首以不擾為要。次則使知兵威之不

可犯此奏頗得之。湖北巡撫晏斯盛奏楚省雨澤頻仍。麥苗長發。向後雨暘時若。應書大有得旨。覽奏曷勝欣慰。但方當春初。即為是滿足之言。非所以勤民矣。○又奏關稅銀多官吏染指。胥役侵漁。今確查荆關盈餘。乾隆八年五月至十月計四個月盈餘銀八千四十一兩有奇。查該關盈餘。遞年盈縮難齊。乾隆五年一萬三千四十九兩有奇。乾隆六年一萬四千七百五十五兩有奇。乾隆七年二萬七千五百七十一兩有奇。本屆盈餘較之七年雖不足較之五六年則有餘。再以原少日期計扣不甚相懸。得旨。如此錙銖較量。竟似一篇言利章奏。奏於朕前。不知汝出何心耶。果汝稽察嚴密。或者自不染指。雖少向妨。若有如上所指之弊。即費詞掩飾。亦無久而不露者。且如此居心。亦不過內府微員。只司關稅者尚可。汝為一省巡撫。亦國家方面之寄矣。如此居心行事。尚可問耶。此奏亦不

交部。縱交部議駁。不過如是登答而已。汝等伎倆。朕實洞悉。批諭使知愧耳。○又奏謝調任戶部侍郎恩。得旨。今以無人。復留汝原任。但汝諸事不肯認真。一味沽名邀譽。恐終難勝此封疆之寄也。戒之慎之。○又奏請賜侍郎原銜。管理巡撫事務。得旨。侍郎已出缺。此奏不合例。況汝有何勞績耶。○監督荆關稅務內務府郎中富貴奏報徵收數目。送部考核。現在嚴飭遵行。不許奸民地棍把持包攬。致虧課額。得旨。覽勉力為之。但自不存貪利無恥之心。則可。不必過求稅銀增盛之鄙見也。○山東巡撫喀爾吉善奏報東省各屬正月得雨一二寸。雖未霑足。如二月望前得透雨。麥苗自可勃發。得旨。所奏俱悉。目下遠近俱待澤孔亟之時。朕懷曷能暫釋也耶。聞東平汶上等處有地震之事。何未奏及。○山西巡撫阿里衮奏。晉省自雍正四年至乾隆元年收買銅器小錢六十八萬九千五百餘觔。

儘數鼓鑄。後有商人王廷煜開採銅礦。僅獲銅九百四十餘觔。現在開局鼓鑄。並無存貯銅觔得旨。晉省殷實商人尚多。惟有令其承辦洋銅。以供鼓鑄。為可行之事耳。此意已於汝兄處有旨。汝再行酌量。○甘肅巡撫黃廷桂奏涼州府屬開墾之笈笈難營田。距涼城寫遠。若派兵丁耕種。難免曠廢差操。請聽民人承種。納租交營。接濟兵食。得旨著照所議行。○貴州總督兼管巡撫張廣泗奏報黔省

實錄卷之七

三

入春以來雨澤時降。至節過清明。民間爭布稻種。望雨方殷。如果市米漸少。即行開倉平糶。接濟民食。得旨覽此。黔省頗有旱形矣。邊遠之地。鞭長莫及。一切補救之策。務須及時為之。百姓方得稍救。不致流離耳。○福建漳州鎮總兵雷澤遠奏報閩省雨澤應時。米價平減。漳泉悍習。現在督率將弁。努力整飭。得旨不在文言。只宜實力行之。漳泉積習。豈可期移易於旦夕者耶。○四川建昌鎮總兵袁

士弼奏曲曲烏夷人阿黑不聽化導。皆由從前文武辦理馬澤占繼及改土一事。先後不妥。以致已故土官馬溶之妻子繼沒愚夷仇恨。馬澤所致。今一面撥兵駐劄卡隘。以惕其心。一面令馬溶之女前往化誨。擒獻首兇阿黑。准其立功襲職。似可不煩兵力。得旨覽。一切事宜。慎重為之。不可貪功而肆殺戮。不可示弱以損國體。勉之。

實錄卷之七

三

大清高宗法天隆運至誠先覺體元立極敷文奮武孝慈神聖純皇帝實錄卷之二百十一

大清高宗法天隆運至誠先覺體元立極敷文奮武孝慈神聖純皇帝實錄卷之二百十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣 慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣 董誥內大臣戶部尚書鑲藍旗滿洲都統軍功紀錄五次

尋常紀錄十四次臣 德瑛經筵講官太子少保工部尚書紀錄六次臣 曹振鏞等奉

校修

乾隆九年甲子三月己卯朔工部議覆署江南

寄錄卷二百二

一

總督尹繼善等疏稱邳州境內東南官湖係往來要道逼近運河地勢低窪每遇雨水充溢時溝渠壅塞道路阻礙請於官湖迤上起至州城東止估築隄路凡經由溝洫建造橋座俾水道通行應如所請從之○直隸總督高斌疏報順天永平保定正定順德宣化等府并易州屬雍正十一年並乾隆二年分開墾水旱地一百一十四頃五十八畝有奇○庚辰遣官祭黑龍潭昭靈沛澤龍王之神○戶部議覆直隸總督

高斌奏稱京城豆價日昂原議以保安宣化萬全三州縣存貯屯豆運京平糶應及時運貯附近倉廩分發八旗官局得旨依議速行○工部議覆署江南總督尹繼善疏請桃源縣境內水晶湖倪家蕩洩水溝間段淤塞安東縣境內鮑營河河身淤淺睢寧縣境內柴家湖沈家湖年久淤平俱應挑濬銅山縣境內房村民堰年久殘缺應修補又村南小堰及三都三圖地勢低窪挑洩水溝應如所請從之○又議覆江南河道總督白鍾山疏稱豐蕭碭廳所屬之石林工程本係大溜頂衝向於壩內加築月隄重護而捍禦全在臨河埽工得力請幫築裏戩以為埽壩內靠應如所請從之○署兩江總督尹繼善疏請宿遷縣境內沐河西岸上自山東郟城縣禹王臺竹絡壩尾起至宿遷交界民堰殘缺須幫築高厚楊家莊舊河西關東關水溝及運河南岸俱年久淤塞應行挑濬山陽縣境內烏沙

河。河底過高。不能宣洩。亦宜挑濬。洩水涵洞。口門過窄。拆修改寬。運河北岸。紹興家廟一帶。應挑水溝一道。添建石涵洞一座。清河縣境內。浪石鎮廢隄之南。南高北窪。張家莊更為卑下。應濬支河一道。并建木橋。從之。○辛巳。

上御乾清門聽政。○兵部議覆直隸總督高斌疏。稱正定鎮左營守備。駐劄府城。右營守備。駐劄深州。各有衙署。自雍正四年。改協為鎮。添設兩營遊擊。即將左營守備衙署。改為左營遊擊衙署。右營遊擊另建衙署。而左營守備。竟未建衙署。雍正六年。又將右營守備。移駐府城。所遺衙署。改為深州千總駐防。右營守備。亦未另建衙署。賃居民房。俱請建衙署。應如所請。從之。○又議覆湖廣總督阿爾賽疏。稱楚省各標鎮協營。例應提督三年親身。遍歷全省巡察一次。但楚省幅輿遼濶。往返不下萬有餘里。恐屆輪巡之年。在外日久。貽

誤衙門公事。請改為每年秋收之後。察其緊要者。酌量巡查數處。三年之內。輪巡亦可一周。再巡察營汛賞號事。所必需。每年給賞銀三百兩。均應如所請。從之。○以光祿寺卿張若靄為通政使司通政使。○鑄給湖州府南潯通判關防。從閩浙總督那蘇圖請也。○壬午上詣。

大高殿行禮。○辛圓明園奉。

皇太后居暢春園。○癸未。諭軍機大臣等。聞蘇州尼僧東悟。造言募化興修寒山寺。以致結訟。控告於吳縣。遂有地棍等聚眾鬧堂。大肆咆哮。知縣姜順蛟。倉皇退避。竟任東悟逃去。地棍等以寺內有原任翰林蔣恭棗租房。疑其向該縣說情袒護。遂毀其門壁。並將寺內之酒肆茶棚。盡行拆平。喝令各舖戶罷市。各舖雖未依從。而兇惡暴橫。不知法紀。比時撫臣飭令有司查拏眾犯數日之後。所獲者不過一二名。至東悟及首棍。竟未到案。將來必

至遠颺此事關係地方風俗。且糾衆罷市之惡習。尤不可長。前日陳大受雖曾具奏。朕所聞此等情節。並未詳陳。爾等可寄信與陳大受。令其上緊緝拏。務獲分別輕重。置之於法。毋得姑息玩縱。以長刁風。○吏部議覆貴州總督張廣泗疏稱。黔省原定三年俸滿之糧驛道。及定番州知州。威寧州知州。獨山州州同。南籠府經歷。清平縣縣丞。鎮遠縣縣丞。施秉縣縣丞。威寧州巡檢等缺。地方情形較前辦理稍易。應改為五年俸滿。其未議俸滿年限之古州兵備道。荔波縣縣丞。天柱縣縣丞。黎平府照磨。潭溪司吏目等缺。應定為三年俸滿。黎平府知府。經歷。普安州州判。安順府經歷。定番州州判。黃平州巡檢等缺。應定為五年俸滿。其安順府知府。通判。都勻府鎮遠府。大定府知府。通判。南籠府知府。貴陽府同知。黃平州。獨山州。普安州知州。貴筑縣。普定縣。清鎮縣。鎮遠縣。永從縣。畢節縣。知縣

等缺。原定為五年俸滿。都勻府鎮遠府銅仁府。黎平府。同知。都勻府。丹江。通判。都江。通判。鎮遠府。通判。永豐州知州。州同。州判。吏目。荔波縣知縣。開泰縣縣丞。永從縣縣丞等缺。原定為三年俸滿。仍照舊例。按年報滿。應如所請。從之。○刑部議覆。湖北按察使石去浮奏。稱嗣後除緣坐犯屬。及強竊盜家屬。例應僉遣者。仍僉發外。其他軍流等犯。止訊本夫。如情願帶往者。開具年貌。一同僉發外。其妻妾背義不從。必須該犯親告。方准提解。如本夫已供不願攜帶。悉聽自便。其本夫不願。而妻妾願隨者。報地方官造冊。一體隨行。毋得豫先特提妻妾訊問。其訊係無妻者。即據供為定。毋庸另行取結。應如所請。從之。○工部議覆江南河道總督白鍾山疏稱。挑清中河廳屬運河淤淺。亟宜築壩興挑。并將駱馬湖尾間堵閉。以蓄湖水。楊家莊各壩。相機接長收窄。以束水勢。應如所請。得旨。依議速行。○以

戶部右侍郎汪由敦為工部尚書。鑲紅旗漢軍副都統李元亮為戶部右侍郎。○調江西南昌鎮總兵李如栢為直隸宣化鎮總兵。直隸宣化鎮總兵高琦為江西南昌鎮總兵。○甲申調正紅旗漢軍副都統王承宗為鑲紅旗漢軍副都統。以原任工部尚書趙宏恩為正紅旗漢軍副都統。○滿洲繙譯鄉試以吏部右侍郎宗室德沛為正考官。工部右侍郎德齡為副考官。蒙古繙譯鄉試以理藩院尚書納延泰為考官。○乙酉。

上詣暢春園問

皇太后安。○諭曰提督李繩武現無住房著交內務府大臣查房一所賞給。○

泰陵內務府總管覺和托奏稱各處

陵寢文職官員與在京官員一體較俸陞用俱照寧古塔等處將軍衙門之例入於京察至各

陵內務府官員例不能與在京官員一體較俸

陞用。但遇京察之年請照在京內務府官員例由內務府編列等第繕摺具奏得旨是知道了。○調廣東順德縣知縣許龍章來京引

見。○丙戌諭戶部向來八旗官馬出場後留京馬匹皆支給錢糧停其支給官豆但現今豆價昂貴若仍照前停其支給官豆恐伊等採買豆價益加騰貴今歲留京馬匹仍著支給官豆。○諭軍機大臣等此次準夷進藏熬茶郡王頗羅鼐之子公珠爾默特策布登等感戴狀恩管轄兵丁暗中防範各處卡哨出力報効殊屬可嘉應加特恩賞給頗羅鼐長子公珠爾默特策布登次子扎薩克頭等台吉珠密納木扎爾辦理噶布倫事務公班第達蟒緞各二端大緞各二端賞給噶布倫扎薩克頭等台吉策凌旺扎爾布隆燦色玉特塞布騰扎薩克頭等台吉齊旺多爾濟大緞各一端官用緞各二端再賞給岱綢羅布藏達爾扎章魯占巴達顏台吉巴扎爾鼐大緞

官用緞各一端。以示鼓勵。○以故輔國將軍宗室弘暉子永恭。照例襲封奉國將軍。○丁亥。諭戶部。去歲朕詣盛京。恭謁

祖陵。扈從官兵。由京城騎去馬匹。至和爾本淖爾更換時。所有沿途倒斃遺失馬匹。俱已施恩免其賠補。其由和爾本淖爾至盛京。所有沿途倒斃遺失馬八百七十七匹。據原議著於今歲四月照數賠補。送交商都達布遜淖爾太僕寺牧廠。以足原額。令其牧放等語。但現今全行追補。恐官兵一時難得如許馬匹。抑且有關伊等生計。此項倒斃遺失馬匹。亦著施恩免其賠補。○諭軍機大臣等。江西南昌總兵官李如栢來京陛見。朕看其人材壯健。亦尚明白。是以調用宣化總兵官。但尹繼善前曾奏其不宜邊地。想伊自有所見。可寄信詢問之。令其據實覆奏。○諭曰。廣西巡撫楊錫紱著來京陛見。其巡撫印務。著廣東布政使託庸前往署理。廣東布政使印務著福

建按察使納敏。前往署理。福建按察使印務著汀漳道王廷諍署理。○戊子。諭近來各省錢價。日加昂貴。民間日用不便。朕時時留心籌畫。曾諭山東山西等省巡撫。於該省開局鼓鑄。以濟民用。銅劬取於何處。令該撫悉心妥議具奏。今據阿里衮奏稱。山西購覓銅劬。惟有招選殷實商人。採買洋銅之一法。現有平陽府洪洞縣監生劉光晟。家道殷實。呈稱世受國恩。心切報効。情願領辦洋銅。以資鼓鑄。少盡犬馬微勞等語。阿里衮既稱劉光晟情願承買洋銅。辦公効力。著即准其承辦。其如何給與銅劬價值。及一切運費等項之處。著該部詳悉定議具奏。○禁止臺灣武員置產。諭外省鎮將等員。不許在任所置立產業。例有明禁。在內地且然。況海外番黎交錯之地。武員置立莊田。墾種收利。縱無占奪民產之事。而家丁佃戶。倚勢凌人。生事滋擾。斷所不免。朕聞臺灣地方。從前地廣人稀。土泉豐

足彼處鎮將大員。無不創立莊產。召佃開墾。以為己業。且有客民侵占番地。彼此爭競。遂投獻武員。因而據為己有者。亦有接受前官已成之產。相習以為固然者。其中來歷。總不分明。是以民番互控之案。絡繹不休。若非徹底清查。嚴行禁絕。終非寧輯番民之道。著該督撫派高山前往。會同巡臺御史等。一一清查。凡歷任武職大員。創立莊產。查明並無侵占番地。及與民番並無爭控之案者。無論係本人子孫。及轉售他人。均令照舊管業外。若有侵占民番地界之處。秉公清查。民產歸民。番地歸番。不許仍前朦混。以啟爭端。此後臺郡大小武員。創立莊產。開墾草地之處。永行禁止。倘有託名開墾者。將本官交部嚴加議處。地畝入官。該管官通同容隱。並行議處。○戶部議覆。四川巡撫紀山疏。稱邛州。鄧都。二州縣。請增鹽引四十四張。應徵稅銀一百四十九兩有奇。應如所請。從之。○予故喀爾喀

輔國公衮布策凌。祭葬如例。○免江蘇沛縣旱災額賦有差。○免河南中年河陰。新安。羅山。長葛。伊陽等六縣旱災額賦。○己丑上詣暢春園。問

皇太后安。○戶部議覆。甘肅巡撫黃廷桂疏。稱高臺縣三清灣屯田地畝。鰾重砂多。收成歉薄。每歲官役俸工養廉。渠長工食。並渠道歲修等項。所收不敷所用。請改歸民種升科。其原設之主簿。並額設屯長渠長口食歲修銀兩。一併裁汰。又柔遠。平川。二屯。應改歸高臺縣典史管理。至三清灣民渠。並責令該典史稽查督率。隨時修築。其已裁之三清灣主簿。改為西寧縣主簿。移駐丹噶爾地方。稽查邊隘盜匪。均應如所請。從之。○御史胡定等奏。直隸宣化鎮總兵李如栢。不應為失節之母。妄請封典。得旨。李如栢之母。既係改嫁之婦。實不應受誥封之榮。朕從來披閱諸臣章奏。無不詳覽細繹。擇其當否而審行之。昨李

如栢具摺時。適因望雨心煩。開摺見其有請恩。馳封之語。遂降照所請行之旨。而其摺實未詳閱。若知其改嫁之事。亦斷不允所奏也。此朕一時疎畧之失。胡定章佑昌如此陳奏。甚屬可嘉。李如栢之母。不必給與誥封。李如栢亦不必交部議處。○庚寅。諭軍機大臣等。口外八溝等處。採買米石。原議運貯遵化。後因該州未設倉廩。難以收貯。經提督保祝奏請改運薊州。朕已降旨允行。今聞遵化州又請仍運該處存貯。就近支放。更為省便。自應仍照原議運往遵化。但此項米石。關係

陵糈。其應於何處收貯。該督高斌身任地方。久應酌量情形。奏明辦理。乃一任地方官輾轉遲回。至今尚未起運。亦尚未奏聞。爾等可寄信詢問之。尋奏查遵化薊州豐潤三州縣。供應

陵糈四萬七千餘石。向經提臣保祝奏請運貯薊州。奉旨允准。今據遵化州知州嚴文照稟

稱。薊州在遵化之西一百二十里。八溝米石。由喜峯口運至薊州。必經遵化州城。若照舊例囤貯。可節省車價五千餘兩。隨行藩司照議。飛飭辦理。得旨。覽奏俱悉。然殊覺遲緩矣。○駐藏副都統索拜奏。上年十二月。奉旨於準夷熬茶事竣。將自準噶爾回藏之喇嘛羅布藏丹。怎及噶津林沁等。一併送至京師。寺廟安置。臣當即傳諭郡王頗羅鼐。據云。喇嘛羅布藏丹。怎噶津林沁。俱在準噶爾久居。人不可信。但噶津林沁。乃拉達克人。幼為班禪額爾德尼弟子。居扎什倫布廟。我猶及見。今自準噶爾回藏後。我留意訪察。不惟無偵探消息。行間構釁之事。於班禪額爾德尼。實亦誠信敬奉。今若移送京師。拉達克人。必得聞知。若失其意。後此探報準噶爾消息。恐致阻礙。且噶津林沁。年已七十餘。病腫衰殘。餘生無幾。我今可信人。時嚴防範。必不致有啟釁之事。我意噶津林沁。不必赴京。止將羅布藏

丹怎解送京師。似為妥協等語。臣思噶津林沁為拉達克人未入版圖。而年老病廢。移送京師。彼或以老病為辭。請將羅布藏丹怎遣員解送京師。噶津林沁候旨定奪。得旨。著照頗羅鼐所請行。惟防範之事。頗羅鼐宜益加勤勉為善。○廣西巡撫楊錫紱疏報乾隆七年分桂林府屬開墾民徭田九十八畝有奇。平樂府屬恭城縣開墾徭田二畝。○免江蘇鹽城縣被水災民額賦。○辛卯。

上詣黑龍潭祭

昭靈沛澤龍王之神。○工部議覆河南山東河道總督完顏偉疏稱。德州黃泥灣運河汎發。請將現在河身西涯開寬數丈。撈濬深通。設遇水勢微弱。仍照例相機築壩。束水利漕。應如所請。從之。○尚書公訥親奏報查閱河南開封府駐防滿兵操練陣勢。與京師迥異。進退生疎。隊伍亦不甚整齊。清語除履歷外。能者甚少。皆由向來怠忽所致。請由京另派

大臣。整理訓練。得旨。將此照汝所奏綠營兵

丁一體俟江寧青州閱竣後。有應參處者。參

處。至另派大臣。朕意省城似此者尚多。未便

概行另派。即使另派亦豈有益。將原摺發還。

或統俟閱竣後。若僅此一處。再將原摺另日

具奏。○雲南臨安府納更山土巡檢龍鱗故

無嗣。以其弟龍壘襲職。○壬辰。諭曰。準提保

著調補右衛副都統。寶筠著調補綏遠城副

都統。右衛副都統印務。著準提保掌管。六格

不必掌管。○河南巡撫碩色疏報輝縣濟源

二縣開墾民田旱地六十六畝有奇。○癸巳

月食。

上詣暢春園問

皇太后安。○諭據江西巡撫塞楞額奏稱。驛鹽

道陳浩呈稱。親母譚氏年已七十五歲。迎養

在署。近來痰喘日甚。亟圖歸里。以終餘年。伏

乞轉奏。恩准送母回籍。終養等情。查陳浩現

有兄弟。與終養之例未符。但該道呈稱母子

相依為命。不忍遠離。情辭懇切。是以據情代奏等語。陳浩著准回籍終養。○又諭。奉天將軍額爾圖。辦理鑲黃旗色勒圖等五佐領。並正黃旗阿什圖等三佐領。因未明悉根源。經該旗奏請。駁令該將軍復行核辦。朕曾降旨。著行文額爾圖。令伊詳加核辦。作速咨覆。去年朕往盛京時。彼處一切辦理事件。俱係額爾圖一身經理。是以於佐領根源。未及詳查。辦理錯誤。尚屬可寬。嗣後斷不可復怠忽從事。著傳諭額爾圖知之。○吏部議覆廣西巡撫楊錫紱疏。稱廣西舊隸右江之泗城府。就近改隸左江道統轄。腹地之潯州府。就近改隸右江道統轄。以便巡查。應如所請。從之。○工部議覆直隸總督高斌疏。稱務關廳所屬運河西岸下坡莊。臨河隄工。緣東岸逼水頂衝。全河大溜向西。以致隄岸汕刷。請於板壩南三十五丈之外。修建護岸草壩。應如所請。得旨。依議速行。○又議覆浙江巡撫常安疏。

稱海寧縣境內。觀音堂老鹽倉柴塘。上年春伏秋各汎逼塘。有間段抽掣蹲踞之處。請拆築加鑲。並堵塞毛洞。應如所請。從之。

大清高宗法天隆運至誠先覺體元立極敷文奮武孝慈神聖純皇帝實錄卷之二百十二

大清高宗法天隆運至誠先覺體元立極敷文
奮武孝慈神聖純皇帝實錄卷之二百十三

監修官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總管官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

數修

乾隆九年甲子三月甲午諭軍機大臣等直

隸地方至今尚未得雨朕心深為憂慮上年

天津河間等處被災最重是以加意籌辦今

思旱象漸形不特兩郡為然其他處亦應早

為計及若日內得有雨澤猶可望其有收倘

致成災則撫卹之方或應借給或應平糶俱

當先事豫圖其各處倉穀足用與否亦須酌

其盈虛妥協辦理種種籌備之法該督高斌

尚未奏聞以慰朕懷在高斌之意不過以災

尚未形惟務鎮靜但恐州縣各官惟事因循

不知先期區畫且有以諱災揆高斌者矣可

寄信與高斌令將一切應行經理事宜豫為

籌酌雖不必過於聲張使百姓妄生希冀亦

斷不可視為緩圖務必悉心計議為未雨綢

繆之策毋致臨事周章○管理鑲白旗蒙古

都統事務誠親王允祕奏八旗另戶人等在

逃者每於直隸遠處州縣或八溝熱河蒙古

邊界等處藏匿恐日久聚眾未免滋事請勅

各該管官員出派官弁訪拏解部審詢如非

緣事出逃實係因病失迷或被人誘拐者仍

准挑差効力若有緣事情節即照逃人例分

別輕重治罪交該旗嚴行管束其有踰年自

知改過者由該旗呈送令挑步軍倘能奮勉

三年後由各該處移送各旗令挑護軍馬甲

得旨著照所請行該部知道○大學士鄂爾

泰等議覆甘肅布政使徐杞奏稱甘省幅員

廣濶山多路險輓運維艱每倉穀一石每百

里給費一錢實屬不敷請量增脚費應如所

請每石每百里以一錢三分給發。從之。○戶部議覆四川巡撫紀山疏稱樂山等縣開淘鹽井一百三十九眼。鍋六十二口。大寧縣額井內增寬二十六座。鍋七十八口。共增水陸鹽引二千一百八十八張。自乾隆八年為始。應徵榷課并引稅銀一千二百七十兩有奇。應如所請。從之。○總理

三陵事務內務府總管五十四奏。

景陵原設官七員。

皇貴妃衙門官一員。辦理大小各祭不敷遣用。請添設委署尚膳正。尚茶正。委署副管領各一員。俱給七品虛銜。附各官內行走。於膳上拜唐阿。茶上拜唐阿內簡選熟練者。擬定正陪。引見題補。得旨。知道了。○以故甘肅岷州上百戶趙世興之子趙名俊襲職。乙未。諭曰。巴靈阿前往拉林阿勒楚喀地方。辦理開墾地畝。蓋造房間等事。正藍旗副都統員缺。著副都統瑪爾拜補授。○丙申。

上詣

恩佑寺行禮。○諭。去歲拉林阿勒楚喀地方墾田。所獲收麥七千七百餘石。皆係存公備用之項。朕思墾田蓋房兵丁。雖經賞給鹽菜口糧銀兩。但伊等因身赴拉林阿勒楚喀種地蓋房。其原籍私田。不獲耕種。恐養贍家口。或致拮据。此所存收麥。著施恩賞給種地蓋房兵丁。俾伊等養贍家口。得以寬裕。○丁酉。

上詣暢春園。問

皇太后安。○諭。科場乃國家大典。必期選拔真才。以收實用。積習相沿。學臣於科舉之外。復有錄遺大收等事。臨場之際。督撫大吏。又將不取者。不問文藝之優劣。盡送入場。濫觴已極。是以上科經臣工條奏。朕勅令九卿定議。每舉人一名。准取科舉百名。此亦不為不多矣。夫國家之所以慎重科舉者。原欲士子奮力於學業。試官盡心於蒐羅。以副掄才之典也。今科臣吳煒乃請仍照舊例。並蓄廣收。則

士子見入場之易。不肯專心學問。將應試者日益衆多。主考房官。不過一二十人。為期不過二三十日。豈能精心校閱。盡得真才。且試卷既多。而中額不廣。則多取科舉。仍屬無益。若因此而議加中額。則現在舉人。非二三十年不得一官。亦斷無因候選者多。而議增天下職官之理。不幾終身無仕進之日乎。所謂及鋒而試者何居。是中額尚應酌減。即科舉百名。亦屬浮多。祇因積習既久。不復議裁。朕方自咎不免姑息。而況可輟轉增添無所限極耶。總之此輩。非能為國家實心求賢。以佐國是。不過取悅士類。釣譽沽名。動以人文日盛為辭。實則使士子徒懷僥倖之心。不肯黽勉向學。而國家亦不得收登進之實效也。吳煒識見卑淺。特行曉諭。並使衆知之。吳煒又稱順天鄉試。南人看北卷。北人看南卷。則南人無所展其長。北人不能勝其任等語。向來順天鄉試。原未定有分閱之例。後因臣工條

奏。恐有弊端。是以勅令南北各自迴避。但思文字短長。南北原有微別。且房考南人多而北人少。士子則北卷少而南卷多。人多而閱卷少。未免於閒曠。人少而閱卷多。又患其不精。且主考全閱通場。房官即有營私之處。主考豈肯任其朦混。則作弊之源。不在乎此。自可無容膠柱鼓瑟。其順天鄉試閱卷之處。著仍照舊例行。至吳煒所稱今當望雨之時。適多士鬱望之際等語。此言甚為悖謬。目今場期尚遙。士子何人自知不在百名之內。而即懷鬱望之心。且雨澤未降。與科舉多寡何涉。而吳煒乃欲借此為言。期朕必從其奏乎。朕於人言。不可者不行。可者則自行之。從不以人廢言也。吳煒牽引無理之處。甚屬不合。著嚴飭行。吳煒摺併發。○又諭科場乃抡才大典。其正副考官。必精於衡鑑者。始克勝任。今年鄉試屆期。著大學士。尚書侍郎。於翰詹科道。部屬等官。應差主考人員內。擇其人品端

方學問醇正。堪膺衡鑑之寄者。各舉所知。交送內閣彙奏。候朕簡用。其非科甲出身。及無真知灼見者。亦不必強舉。○又諭將軍烏和圖著來京候旨。西安將軍員缺。著博第調補。寧古塔將軍員缺。著副都統巴靈阿補授。巴靈阿現在前往拉林。阿勒楚喀。辦理墾地。蓋房事務。所有將軍印務。著巴靈阿在副都統內揀選一員。暫行署理。○戶部議覆安徽巡撫范璨奏請贖罪之犯。按例每銀一兩。改收稻穀二石。核算收納。造冊報部。凡矜監平人有犯笞杖等罪。呈請納贖之案。均照徒罪以下。貢監生捐運糧銀八百兩。平人捐運糧銀四百六十兩之例。即令照數交穀貯倉。又命案人犯情有可原。奏准贖罪者。向追埋葬銀二十兩。今倍追銀四十兩。給付屍親。均應如所請。從之。○都察院等衙門議覆巡察盛京御史和其衷奏稱。各處設立巡察。並無隨帶筆帖式之例。惟盛京巡察衙門。因初任巡察

御史傳色訥奏准。帶筆帖式一員。繕譯檔案。嗣後添設外郎二名。專司繕譯。每年隨帶筆帖式。應停派往。又巡察衙門。向設書吏四名。工食銀兩。均有陋規幫貼。今陋規全行禁革。應照五部書吏之例。每名月給工食銀一兩。均應如所請。從之。○戊戌。諭軍機大臣等。訥親前曾奏令高斌。於密雲縣添設船隻。不知此時修造與否。未見奏聞。朕於明秋始幸避暑山莊。五六月造成。亦未為晚。不必備辦。如此時造完。比到明秋。勢必虧舊。更須修理。可寄信令高斌知之。○管理鑲黃旗漢軍都統和碩裕親王廣祿奏。正黃旗另記檔案之佛保住。呈稱伊曾効力有功。各路將軍大臣。保為頭二等。請照例削去另記檔案。作為另戶等語。伏思此項人等。俱作為另戶。另記檔案。原係念其祖父軍前微勞。格外施恩。若不另記檔案。削去開檔。逕入另戶。則與滿洲毫無分別。恐日久混淆。無所查照。必致與滿洲一

體揀選秀女。應試科場。與國家名分制度甚有關碍。請將佛保住作為另戶。仍另記檔案。現在八旗。如有似此削去另記檔案字樣。與滿洲一體作為另戶者。仍遵照原旨。作為另戶。仍另記檔案。於滿洲名分。庶有分別。從之。
○禮部議覆盛京禮部侍郎納爾泰奏稱盛京禮部所轄壯丁。採買品物。關係

陵寢祀典。舊設六品官一員。領催四名。管轄現在丁壯滋生。已有一千三百餘名。請添設七品官一員。領催四名。其七品官即於外郎領催內揀選補用。六品官即以現任七品官陞補。所添領催即於所轄千丁內選充。應如所請。從之。
○旌表守正捐軀之正黃旗滿洲王哥妻王氏。○己亥。

上御勤政殿聽政。○以署正白旗滿洲都統德敏為正白旗漢軍都統。○庚子。諭軍機大臣等。四川重慶鎮。係緊要地方。新調總兵官韓應魁。看來似未能勝任。著總督慶復。巡撫紀

山。留心察看。○辛丑。上詣暢春園。問

皇太后安。○訓飭有司勸課。以足民食。諭人君以養民為急務。養民之道。在使之上順天時。下因地利。殫其經營力作。以贍其室家。非沾沾於在上之補苴救恤。遂長恃為資生之策也。在昔善圖國是者。謂以君養民則不足。使民自養則有餘。誠不易之論。國家歲轉漕粟。以實京師。乃備天庾之出納。關係最重。或因偶遇災歉。萬不得已。而為截留之計。僅可間一行之。豈遂視為常法。今內外臣工。動以截漕為請。朕念切民依。亦屢次允從。出於一時之急濟。其實京倉所貯。雖云可備五年。可備十年。要僅為官俸兵餉所必需。若統為京師人民計。即一二年。恐亦不足供支。况欲更分此以賑貸直省。何未之思也。漢文景間。太倉之粟。陳陳相因。至紅朽不可食。彼時豈無一方之凶歉。而未聞輕議分減者。誠以經國之

大計。務籌久遠。在官在民。於內於外。莫不各有本圖。舍本圖而謀兼濟。事多未便。勢且不能。一有虧。則兩俱損。依古以來。無取焉。上年各省倉儲。需米孔亟。朕因偶爾變通。將江蘇安徽浙江江西湖北湖南六省漕糧。各留十萬石於本省。並著江蘇浙江各將米十萬石運往福建。江西將米十萬石運往廣東。又因直隸天津河間被災。前後撥通倉米八十萬石備賑。今年又令山東截留二十萬石。分貯接濟。凡此皆因民命所關。不得不變通辦理。若小民不知各務生計。而惟官糧是賴。無論官兵之外。斷不能偏給窮黎。即近漕之處。可以議截留。其邊遠省分。更無漕可截留。又將何以取給乎。朕思一方之地利。原可以養一方之人。一家之人力。原可以養一家之人。古者九職任萬民。一曰三農生九穀。二曰園圃毓草木。三曰虞衡作山澤之材。四曰數牧養蕃鳥獸。何一非資生養贍之術。為民父母。民

事即家事。宜實心勸課。隨時區畫。使地無遺利。民無餘力。則家有蓋藏。自可引養引恬。俯仰不匱。倘督撫不能董率有司。有司復不以田里樹畜為事。及歉收之年。但請給發倉糧截留漕米。為督撫有司備賑之良策。將使民間謂水旱可以不備。不圖自食其力。甚至游惰成風。舉身家衣食之切務。皆委之在官。是非愛之實以害之矣。天下之大。億兆人民之衆。惟正之供。祇有此數。焉得人人而濟之用。是特降諭旨。通諭直省督撫。並飭守牧等官。各思所督何事。所撫何事。所稱知府事。知州知縣事。實應知何事。凡以為民計。即所以為身計。既為民計。而不使民知各自為其身計。其能為民計者幾何。繼自今督撫尚各體朕心。毋忽民事。懇切開導。并勸良有司。務使百姓各知自謀。以裕生養之源。不徒望恩俸澤而思澤之加。斯實足以利濟。則豐年樂其降康。歉歲亦可恃無恐。朕願與諸臣共勉之。

又諭據鑲藍旗滿洲都統奏稱康熙五十七年閒散滿洲四格因與族嫂鬪毆移送刑部發往三姓地方今四格之子達蘭泰以伊父四格年老有疾無人侍養即死後亦無人殯葬願退護軍前往三姓地方終養伊父具呈相應轉奏等語看來四格無甚大罪且又年老想亦守分度日達蘭泰欲往三姓地方終養伊父頗知孝道甚屬可嘉應施恩寬免四格之罪令達蘭泰前往三姓地方迎伊父來京奉養達蘭泰仍留護軍○又諭頭等侍衛達賴護軍叅領馬進泰護送熬茶之準噶爾使臣等至藏病故甚屬可憫著加恩賞給伊等家屬銀各二百兩料理喪事○大學士鄂爾泰等議覆直隸總督高斌疏稱豫籌直隸賑米事宜得旨依議著倉場侍郎將尾幫漕糧截留五十萬石有貯天津北倉備用○以兵部尚書彭維新工部尚書汪由敦充三禮館副總裁○以廣西巡撫楊錫紱為禮部侍郎

壬寅大學士鄂爾泰等議覆兵部侍郎副都統雅爾圖奏稱荒歉之年米貴兵艱應令提鎮咨明督撫酌量借給米穀定限扣還得旨依議速行○癸卯諭曰綏遠城副都統那明患病著太醫院派太醫一員前往診視○甲辰諭甘肅地方向來民間積欠繁多朕曾降旨將張掖皋蘭狄道靖遠安化平涼涇州靈臺中衛九州縣民欠自乾隆八年為始分作四年帶徵又將武威西寧二縣帶徵雍正十三年至乾隆四年之項一併蠲免此外應徵舊欠錢糧理宜按期輸納但念該省土瘠民貧地處邊陲非內地可比一年而清積年之欠未免艱難著將張掖肅州高臺皋蘭河州狄道靖遠安化平涼涇州靈臺靈州中衛十三州縣及武威西寧二縣累年未完積欠銀糧草束等項再行寬緩自乾隆九年為始分作六年帶徵以紓民力該部即遵諭行○又諭乾隆三年寧夏地震被災鎮標及外路協

防兵丁。在於寧夏府庫。共借支銀一萬三千五百五十九兩。除扣完司庫銀二千六百四十八兩外。未扣完銀。尚有一萬九百一十一兩。現在著追。朕思寧夏。自昔年地震之後。屢值歉收。兵丁倍覺艱苦。可為憫恤。且此借支之項。已歷數年。人多更換。難以責令還項。著將未完銀一萬九百一十一兩。悉行豁免。以示優恤。該部即遵諭行。○川陝總督公慶復奏。河州鎮所轄之苦紅二堡。原隸西寧鎮。地處河西。與涼莊等營一例。請照甘涼西肅之例。每糧一石。折銀一兩者。增銀二錢。一體增給。得旨允行。下部知之。○又奏準噶爾甲子年貿易夷人。於正月十三日到肅。所攜貨物。俟派出商人李永祚。至肅交易。其羊二萬三千餘隻。路遠羸瘦。水草不宜。夷人急於求售。李永祚尚未至肅。且為數甚多。亦難盡售之近地。應倣安西之例。於公帑給值。以羊分予提鎮標兵。扣餉償帑。但夷人索價甚昂。尚未

議定。夷人無知索值。當從容開示。以釋其疑。至今年已定以貨易貨之例。雖前在哈密。曾給現銀。今在肅。必將羊價議定。併入諸貨之內。令商人以內地貨物互易。至商人到肅。不能牽羊遠售。分予各兵。以餉抵值。此係內地自行變通辦理之道。但期於兵有益。議亦可行。復准甘肅撫臣黃廷桂手札云。準夷貿易。方經定例。以貨易貨。夷人所攜貨物。羊與馬駝。計值銀四萬兩有奇。因聞肅州地少巨賈。必招商異地。夷人殊窘迫求售。及聞以貨易貨。則云上年東科爾全數給銀。固為大皇帝格外深仁。而俄羅斯各處。我部曾有人往彼。見其與內地交易。有貨物。有金銀。何以今年肅州概不給銀。若盡以貨易。我輩寧攜歸貨物。此事所關頗重。倘夷人於以貨易貨之外。仍不免索銀。應如何辦理。囑臣札復。臣復札云。準夷年來貿易。獲利數倍。今當恪遵諭旨。堅持易貨。始可遏其無厭之心。該夷今

年所攜皮貨甚少。而羊與馬駝。值銀不過數萬。彼攜回原貨之說。亦狡猾之詞。然因時制宜。亦不必遽令缺望。蓋示以貨易貨之常例。可杜日久無已之貪心。今若稍以銀互市。再為申明定例。堅其後約。亦為兩得。然必須文武曉諭。俟商人熟察夷情。詳定價值。如果感服公平。方稍為給銀。一面辦理。一面奏聞。始覺周密。惟當審其輕重。妥協辦理。奏入。報聞。

○旌表守正捐軀之河南伊陽縣民于迪妻宋氏。○乙巳。諭山東德州海豐樂陵陽信德州衛五州縣衛。上年遭值旱災。聞今春又復少雨。麥收失望。窮民艱於謀食。著該撫酌量各處情形。加賑四月一個月。毋令窮民失所。該部即速傳諭該撫知之。○諭軍機大臣等。以工代賑。原屬救荒之一策。近今喀爾吉善奏請。於每省被災之處舉行。前經高斌曾奏築城一事。必須燒磚始得興工。而燒磚只於工匠有利。無益於小民等語。朕思築城燒磚。

擔泥挑水。需用多人。於窮民亦未始無益。至於開渠築隄等事。則言下即可施功。似尤於濟民為便。可寄信詢問高斌。○江西巡撫塞楞額疏報。南昌進賢寧州高安上高泰和萬安玉山鉛山貴溪定南等一十一州縣。乾隆七年分。開墾老荒地塘。六頃三十九畝有奇。續荒地。二頃五十二畝有奇。額外新生田地。二頃七十三畝有奇。又分宜縣袁州衛開墾老荒屯田。二頃二十一畝有奇。○丙午。上詣暢春園。問。

皇太后安。○戶部議覆。江西巡撫塞楞額疏稱。臨川縣。乾隆三年。報墾地三十四畝有奇。查係貼近教場牧廠。請禁開墾。免其升科。應如所請。從之。○綏遠城建威將軍補熙奏。副都統那明故。無力進京。得旨。即在該處滋生銀內。酌給赴京。○丁未。御史李清芳奏。奉天等處海禁。不必限以七月。請俟豐收後。民食充足有餘。再為酌量辦理。得旨。奉天海禁。著照。

所請。寬至今冬。餘著議奏。○又奏。大臣等保舉應差主考人員。共四十九人。各直省止十六人。滿洲四人。餘二十九人。均係江浙兩省。如河南。四川。貴州。廣西。雲南。五省。未見一人。膺是選。可見保薦人者。皆平日往來相知之人。而所舉之人。大抵饒於財而憑於勢。至守正不阿者。不肯伺候公卿之門。邊隅之士。聲氣不通。交游不廣。是以無人薦舉。請將合例人員。通行考試。庶得者不由奔競。而邊省亦無偏枯。得旨。李清芳所奏。似是而非。審如是。則朕所用之大臣等。皆不可信矣。大臣不可信。將孰信之。明係伊未列保薦之中。激為是語。且所稱多觸大臣忌諱。似為骨鯁。以朕觀之。亦以彼無可懼之大臣耳。若有其人。李清芳斷不敢為是語。當今之時。借觸大臣。進直言。以為忠者。誰則不能。至所云所舉之人。饒於財而憑於勢。聲氣相通之處。著伊列名指叅。明白回奏。○以故奉恩將軍海琳子福喜

襲奉恩將軍。○山西巡撫阿里衮疏報大同府屬豐州衛鎮寧所。乾隆七年分。開墾民田旱地。二十一頃八十六畝有奇。○是月。欽差尚書公訥親奏。查閱河南一省營伍。大畧相同。至江南壽春鎮。亦不相上下。倘各省官兵。悉以平庸廢弛被劾。亦覺聽聞未便。請俟閱看全完之日。通盤比較。其廢弛尤甚者。據實叅奏處分。其餘各標營。通行訓飭。俾加整頓。得旨。所見甚是。不可不懲一警百。亦豈能遍加之罪。覽此。即可見外省大吏。無一不欺朕者矣。益增慙愧。○山東巡撫喀爾吉善奏。東省各營兵米。例係本折兼支。但春季青黃不接。米價騰貴。各兵支領折色。秋季已屆收成。米價平減。各兵轉支本色。殊未稱便。請將春季米折銀兩。移於秋季支給。秋季本色米石。移於春季支放。得旨。是。可行之事也。○又奏。報得雨情形。得旨。覽奏稍慰朕懷。直隸一省。與夫相近之德州等處。望澤甚殷。朕憂曷其

有極耶。○又奏報麥苗雖經得雨。但連日大風。日色燥烈。恐日久不雨。分數稍減。得旨。京師亦然。益增朕憂矣。然惟有修人事以補不足。未雨之綢繆。汝不可少忽也。○又奏充鎮營伍。軍裝器械。隨時修補。將備訓練。尚屬嚴飭。得旨。充鎮雖較登鎮為差善。然亦欠整飭也。○又奏報風刮日曬。麥苗漸致黃萎。得旨。京師亦復如是。朕躬不德。以致旱災示警。側身思省。寢食靡寧。憂懷曷由寬釋耶。○又奏德州。海豐惠民。三州縣。應修城垣。俾窮民相率趨事。以資養贍。得旨。好。以工代賑。可行之事也。○江蘇巡撫陳大受奏。宜興縣民蔣祖法等。男婦幼孩共十五口。往西昂山。水平王廟燒香。自初二日起。連日坐功不食。至十三日。十三人死於船內。僅存兩人。其親屬到彼。連船焚化。聲言成佛。因究出龍華會教頭僧時濟。師巫邪術。愚惑鄉民。至戕人命。現在拏究。得旨。是此案應嚴處以示警。得時濟取供。

奏聞。不可走漏。且既有此事。汝地方大吏。即應早知。若再使漏網。不能辭責矣。尋奏拏獲時濟。供稱蔣祖法等。向拜時濟為師。時濟勸伊等持齋拜佛。認真修行。便可成佛。作祖。白日昇天。並無邪教符術。但時濟不勸伊等修行。蔣祖法等亦無由致死。該犯煽惑愚民。確情。應依律按擬。至附和之人。概多鄉愚。俟訊得確情。酌量分別辦理。得旨。覽。○又奏報寶山縣海塘石工告竣。但水勢變遷。靡有一定。自應隨時查勘。相機防禦。得旨。知道了。相機防禦。甚為至當之論。勉為之。○浙江按察使萬國宣奏。督率屬員。申明保甲。戢匪安良。地方稍為整頓。得旨。一省之事。豈一按察司所頓能整頓者。此語殊不誠。惟應實力盡汝職分之事。與撫臣藩司和衷竭誠。共相勉勵。以圖久而有成。斯可也。○川陝總督公慶復奏。前奉旨。令將郭羅克善後之計。赴四川。會同紀山料理。今據提臣咨稱。郭羅克土酋林噶。

架等。前肆搶奪。旋以大兵臨巢。投獻贓物。悔罪乞命。總以畏罪為辭。不肯親自投出。經遊擊買國良。鎖拏該酋等八名。斬訖。號令威震。帖服。至軍營。先後獲犯四十餘名。另委大員審訊。準情酌理。分別定罪。其餘親加訓導。夷民知感。向化得旨。所辦殊合機宜。欣悅覽之。其買國良。頗屬可嘉。可送部引見。○甘肅巡撫黃廷桂奏。甘省農事草率。收穫有限。督率有司。教民易耨深耕。佈種鋤草。分別勤惰。量加勸懲。得旨。專以農桑課有司。此為政之體也。○又奏。甘省苦寒。土不宜桑。種棉紡織。概置不講。布帛之價。貴於別省。飭行各道府。督率有司。購買棉子。擇地試種。併量給花絮。製造紡車。請女師教習婦女。其實在不能種棉地方。或雇覓工匠。教民織氍。得旨。勸課農桑。為政之本。然須以久遠之心行之。所謂農事無近功。而有久長之效也。○又奏。甘省公儲倉穀。多係堆集民房寺宇。風雨滲漏。黷變堪

虞。嚴查所有舊倉。補葺完固。其倉廩不敷處。所另添建造。又查州縣監獄窄小。混禁一處者。俱令酌量寬展。男監分別輕重。女監各開戶院。得旨。如此諸凡留心。實堪嘉悅。○署廣東巡撫策楞議覆。副都統沈之仁奏。稱廣州旗營裕信倉穀。久已支借無存。買補甚費周章。且該處物價高昂。各兵度歲拮据。請將存庫穀價。於年底借給兵丁。分作十個月扣還。應如所請。按名借給八旗四營兵丁。資其度歲。俟豐收之年。穀價平減。仍當酌量買補。以實倉儲。得旨。著照所議行。○廣西巡撫楊錫綏奏。布政使唐綏祖三年任滿。循例陞見。但體弱多病。請於循例陞見時。酌調內地。更換精力強壯之員。於邊省有益。得旨。此奏不公。汝二人不和。謂朕不知耶。○雲南總督兼管巡撫事張允隨奏。上年昭通東川兩府秋成歉薄。已動撥銅息銀二萬兩。買川米一萬五百石。運賣平糶。再通查各屬。如有民食不敷

之處。分別借給籽種。以助春耕。其應行平糶者。即詳請平糶。得旨。是。此滇省最要之事。加意為之。○綏遠城建成。將軍補熙奏。右衛八旗官兵馬步弓箭生疎。皆由副都統六格。性好安閒。不諳訓練。查左翼副都統準提保。每事認真。約束嚴整。歸化城副都統查木素。操守廉潔。熟練旗務。或與六格互調。實屬有益。即六格亦當知儆戒。以圖後效。得旨。準提保著調掌關防。六格仍留該處。想當知勉。查木素係循分供職之流。可以毋庸更調。有旨諭部。○山東登州總兵譚行義奏。登鎮營伍廢弛。器械損壞不堪。約需二三年後。方能修補齊全。現與撫臣商酌辦理。得旨。是。徐徐妥協為之。應與喀爾吉善商酌者。聽其裁奪可也。○貴州提督丁士傑奏。謝陞任恩。得旨。張廣泗在黔。甚為幹練。一切與彼和衷共濟。至營伍之訓練。則汝提督之專責。尤須實力為之。以副任使之意。

大清高宗法天隆運至誠先覺體元立極敷文奮武孝慈神聖純皇帝實錄卷之二百十三

大清高宗法天隆運至誠先覺體元立極敷文奮武孝慈神聖純皇帝實錄卷之二百十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆九年甲子夏四月戊申朔享

太廟遣恒親王弘晈恭代行禮○以始建

先蠶壇告成議叙總理監修海望等加級紀

錄有差○兵部議准原署兩廣總督廣州將

軍策楞疏稱西義協係新聞苗疆額兵一千

名內除公費親丁實八百六十名軍裝器械

無項可動請於乾隆五六兩年支剩餘朋銀

內動支從之○直隸總督高斌奏覆臣前於

正月內面奏築城燒輒僅有益於工匠無益

於貧民者陳奏未能明晰伏思以工代賑最有

益於貧民者首惟挑河次築堤次修土城又次修輒城蓋挑河無論丁壯老幼男婦均可赴工擡土築隄有畚碇潑水等工多須丁壯城工則土城雇用夫工為多輒城備辦灰輒料物工匠為多雖所用夫工於窮民亦有益但未若挑河擡土民易趨赴再永定河石景山興隆廟前應修石工挑挖引河以及南岸修滾水草壩北岸建滾水草壩并永定河下口疏濬引河挑挖淤墊工程俱現在興工辦理得旨統計現今工程可以稍濟窮民幾何若所費不甚過多河間城工亦應議修耳尋奏覆河間府城分別拆修補修等工估需銀七萬七千四百餘兩即於司庫正項內先撥銀五萬兩備辦興工報可○已酉諭京察乃國家考績大典現在舉行之際恐各部院堂官瞻徇情面有濫列一等者著大學士於驗看過堂時慎重分別凡不稱一等者俱行裁去○戶部議准四川巡撫紀山疏稱樂至鹽

亭南部威遠樂山。犍為。榮昌。資州。八州縣。坍塌鹽井一百五十眼。應徵課稅銀七百四十兩零。請自乾隆九年為始。照數豁免。從之。
○兵部議覆川陝總督公慶復議。秦陝甘二省之河州。西寧。肅州。安西等處營制。新添改設不下數十處。或以新立營汛。添設官兵。或以挑備戰兵。加添舊額。本非腹地。可比。勢難一例減裁。應如所請。將延綏鎮屬之麻地溝。寧條梁。并河州。保安各營。及甘提標。涼州。寧夏。西寧。肅州。安西各標營。新設營汛。續添馬步守兵。悉照舊額安設。至中衛營。古水井堡。派防長流水等處新兵五十名。現今征防官兵撤回。既足輪流更換。應將此項新兵。與未汰新兵。一體裁汰。從之。
○庚戌。諭大學士等。雩祭之典。所以為百穀祈膏雨也。從前大臣等定議。一應禮儀。悉照恭祀圜丘之制行。朕思目下畿輔雨澤愆期。此次舉行。

雩祭。正望恩迫切之時。非每夏常雩可比。其先期前詣齋宮。及祭畢回鑾。朕俱御常服。不乘輦。不設鹵簿。不作樂。以示虔誠。祈禱為民請命之意。可傳諭各衙門知之。
○諭軍機大臣等。朕見直隸地方事件。遲延者頗多。即如旗人派往種地一事。已歷數年。尚未料理就緒。又如莊頭地畝。撥給之後。彼此呈辦。至今尚未清楚。此時直隸有賑濟備荒等事。高斌雖專心籌畫。未免匆忙。然於一切應辦事件。正當留心料理。不得任屬員輾轉遲延。可寄信傳諭申飭。尋奏覆。現在勒限催辦。不敢任聽屬員得旨。上緊料理。毋事姑息可也。
○黑龍江將軍傅森奏。齊齊哈爾。黑龍江。呼倫貝爾等處。官員兵丁。器械理宜整齊。前任將軍副都統等。僅於年終保題。並未據實陳奏。今臣既查出。原應照例參奏。但此項缺欠。該地方官併從前濫行保題之大臣官員。俱有關係。不得不豫行密奏。或准照例參奏。或交臣整

齊辦理之處。恭候命下。得旨。今年仍具本保題。作為汝意。給限一年。趕緊全備。若再查出。即行叅奏。○辛亥。

上詣暢春園問

皇太后安。○詣

大高殿行禮。○還宮。諭拉林阿勒楚喀地方新添副都統員缺。曾派巴靈阿矣。今巴靈阿已授為寧古塔將軍。所有員缺。著副都統巴爾品調補。巴爾品即前往拉林阿勒楚喀地方

協同巴靈阿辦事。俟開荒蓋房諸事完竣後。巴靈阿再赴將軍任。○戶部議覆兩廣總督兼署巡撫策楞疏稱。湖南撥濟粵米十萬石。原應存貯備用。但船載日久。難免潮蒸。且粵東地土卑濕。不便久貯。自應變通出易。應令該署撫俟運到日。撥各州縣。或陸續平糶。或支放兵糧。至所稱糶價銀兩。俟秋成買穀還倉。則有生俊捐穀一項。可以扣抵歸款。毋庸議買。應將糶價解貯司庫。報部查核。得旨。依

議速行。○又議准雲南總督張允隨疏稱。昆明嵩明宜良羅次富民尋甸宣威霑益邱北彌勒建水寧州阿迷晉寧鎮沅寶寧元江他郎思茅寧洱賓川永平騰越鶴慶劍川中甸姚州和曲元謀大關鎮雄永善各府廳州縣。請建棲流所房屋七十六間。所需工料。并口糧藥餌棺木擡埋。以及資送回籍等項。俱於司庫公項銀內動支。從之。○刑部議覆湖北按察使石去浮疏稱。向來通行事件。各省接准部咨。有藩臬並行者。有祇行專管衙門者。行司之後。有轉移知照者。亦有竟不移會者。於道員府佐遺漏尤甚。即或得之。邸抄勢難全備。以致見聞疎畧。率借幕賓之鈔白。以為引據。應如所奏。嗣後凡有關涉定例之部文。該督撫接到日。一槩通行藩臬。到司後。專管該司於行府外。分移各道。到府後。於行州縣外。并分移丞倅等官。如此。則大小臣工。嫻習律例。臨事不致歧誤。至稱派撥專書經手。彙

總齊全入於新舊交盤內亦應如所奏倘有疎忽將該管官照遺漏行文例叅處其典吏照遺失官文書律治罪從之○免廣東吳川縣風旱兩災額賦有差○壬子諭湖南按察使明德著解任○是日起

上以初舉常雩祀

天於

園丘齋戒三日○甲寅

上詣

南郊齋宮齋宿○浙江按察使萬國宣奏府州縣向設申明亭刊教民榜文於內凡不孝不弟與一切為惡之人書姓名於亭能改則去之迄今年久有亭在而板榜未設者有基存而房屋傾圯者更有為胥役民人侵占租賃者良法徒存勸懲未著請通行直省將各屬亭基房屋逐一清查修葺仍於各里大村巨鎮現在宣講

聖諭之所一體設立申明亭將所奉教民勅諭

刊刻懸挂嗣後為惡之人除誤犯情罪本輕

及罪在軍流以上千重典者不列外其餘不

孝不弟武斷把持窩賭窩娼唆訟逞兇奸盜

一應有心故犯者於治罪外將姓名惡蹟書

於亭五年無過親族地鄰公保除刪下部議

刑部尋覆舊有申明亭現為胥役民人侵占

者查出交官修葺至原無申明亭之處及傾

圯僅存基址者毋庸糜費重建令各該督撫

即於該地城市通衢可安木榜之所酌量辦

理不得借端科派至所請大村巨鎮一體立

亭之處無庸議從之○乙卯常雩祀

天於

園丘

上親詣行禮○詣暢春園問

皇太后安○幸圓明園○丙辰諭直隸總督高斌

現在患病著劉裕鐸王鳳翔馳驛前往醫治劉

裕鐸看視一二日商定藥方後即回京留王鳳

翔在彼看治○戶部議准署黑龍江將軍布爾

沙疏稱官莊被旱。應補交廳糧四千五百石。細糧二千二十二石。俱請免。從之。○兵部奏。原任固原州知州史載魁。不應養贍蒙古。另。以王相派往請旨。得旨。朕曾降旨。令史載魁。赴軍臺効力贖罪者。特為養贍蒙古耳。今兵部謂伊不應養贍蒙古。亦應請旨具奏。乃並不請旨。伊等即定議。奏請另派王相。明係瞻徇。此次即派史載魁前去。兵部大臣交部嚴察議奏。以江南淮揚道徐德裕為湖南按察使。

○丁巳。

戶部議覆。陞任左都御史管廣東巡

撫王安國疏。稱各屬倉貯穀石。分別州縣大小。戶口繁簡。水次遠近。將舊貯及新捐共穀三百三十五萬九千七百六十七石。著為定額。應如所請。至各屬節年平糶。未買穀石。請俟價平買補。并糶價請免解司。仍貯各州縣庫。統俟捐穀陸續補足。不必更買。其從前平糶穀價。悉行解貯司庫。從之。工部議准。河南巡撫碩色疏。請興修陽武封邱榮澤孟縣。

鞏縣。伊陽。長葛。七縣城垣。

文廟。以工代賑。所需工料銀兩。在乾隆八年耗羨銀內動支。從之。○是日。浙江溫州鳳凰洋大風。所有截留江蘇漕糧。運閩十萬石。沉失五百五十石。督運之蘇松水師總兵官胡貴奏報。願按數捐賠。得旨。汝冒險成全此事。已可嘉矣。豈有復令捐賠沉失米石之理。督撫自有定例。題請豁免也。○除山西榮河。聞喜。二縣。雍正十年十一年分報墾地畝水衝。一百一十二頃有奇。科賦。○戊午。

上詣暢春園。問。

皇太后安。○大學士鄂爾泰等議覆。陞任湖廣總督阿爾賽奏。稱湖北鼓鑄。用金釵廠銅。成色低潮。請不必照京局配用黑鉛。應將買備漢口客銅試鑄。每百觔用金釵廠銅三十一觔。漢口銅十九觔。除去黑鉛。用白鉛四十八觔。點錫二觔等語。查湖北所用銅。本非京局用滇省湯丹廠淨銅可比。若必照加黑鉛。恐。

錢文黑暗。應如所請。增白鉛配鑄。仍可杜絕私銷。至所稱金釵廠銅低潮。配以漢口銅鼓鑄。又因客銅無幾。不敷應用。請截留滇銅十萬觔配鑄。即於范毓麟解楚銅內。令先撥運十萬觔解京還項。查滇省運京額銅。原未可輕議截留。但本年正月內。戶部議奏范毓麟辦運洋銅案內。於乙丑年為始。每年以二十五萬觔分運湖北。今事在急需。請截留十萬觔。仍於應解湖北銅內還項。是屬有抵之項。

宣統三年三月

二

不須另行採買。亦應如所請。從之。○兵部議准。原署兩廣總督廣州將軍策楞疏稱。提標左右前後四營。惠州協右營。南雄協增城營。新會營。原設櫓槳急跳巡哨船四十五隻。俱請裁。添設各標協營兩櫓八槳船三隻。所需工料。於水師朋扣銀內動支。再各添三板小船四十一隻。所需工料。於營中公費銀內動支。從之。○裁河南通許。滎陽。汜水。偃師。西平。縣丞。改設永城。夏邑。鹿邑。淮寧。祥符。縣丞。從

河南巡撫碩色請也。○予故致仕總管內務府大臣尚書銜赫奕祭葬如例。○己未大學士鄂爾泰等議。覆御史馮元欽奏。稱直屬甘霖未溥。荒政宜修。請敕直督飭屬豫將倉儲查明戶口。核算貧戶若干。大小口若干。據實查造存案。將來易於經理。查直屬倉穀。近經奉旨交直督高斌查明豫備在案。馮元欽所奏。應無庸議。至所稱清查戶口。即係編查保甲之事。并以緝匪除奸。原屬地方平日應行者。今若豫籌散賑。似亦有益。應將馮元欽所奏。密交直督高斌閱看。酌量本地情形。應行即轉飭所屬。清查造冊存案。將來或有需賑之處。便可按冊給發。得旨。允行。尋奏。覆上年河間。天津等屬被旱。查災辦賑時。奏明派委道員。督率州縣。并派賢能佐雜。逐戶稽查大口小口。分別極貧次貧。凡地畝多寡。藝業有無。一一註明造冊。於散賑之中。即行編查保甲之事。是以後來辦理加賑。按冊而稽。畧為

宣統三年三月

上

查覈即可照辦。至不被災地方。編查保甲。乃弭盜安民之要務。係現在實力奉行之事。臣謹遵酌各本地情形。加意清查。以備臨時需用。奏入。報聞。○戶部議准。川陝總督公慶復疏稱。甘肅肅安四處。派防哈密官兵。應需乾隆九年分鹽菜口糧。二萬二千八百九十七兩。請於哈密及柳溝衛庫貯鹽菜銀。并扣收官兵借支銀內動支。從之。○庚申。諭直隸河間天津深州等屬十六州縣。上年被災較重。今春雨澤愆期。朕恐二麥收成。不能期必。小民東作方興。已降旨於停賑之後。再加賑四月一個月。以資其力作。目今雨澤稽遲。麥收已經失望。而秋田收穫尚早。此際若不格外加恩。恐貧民仍不免於乏食。著再加賑五月一個月。該部即傳諭總督高斌。先期籌畫。速行辦理。尋奏如此。厚澤不特臣等思慮不及。即河間等屬百萬災黎。亦想望不到。天澤感通。將甘霖普遍矣。得旨是何言歟。益增

愧耳。又奏。二月賑額。約需米二十三萬石。查今春截留漕米十萬石。奉天採買粟米八萬石。高粱七萬餘石。古北口外買米。除撥供陵糈外。餘三萬石。共二十八萬餘石。除被災較輕州縣。撥運借糶。及順德府屬儲備三萬石外。計災重十六州縣。派領現有之米糧。合之一月賑額。尚不敷五萬餘石。應在豫省彰衛二府。現在運直之十五萬石穀內。動用奏賑。得旨所奏俱悉。○大學士鄂爾泰等議覆。兵部侍郎雅爾圖奏。稱直隸民食。首重高粱粟米。其次則春麥。秋麥。今春雨愆期。已失其一。倘再彌月不雨。則高粱粟米。又屬難期。秋麥一項。實為至急。請於豫東二省。及奉天地方。採買備貯。萬一大秋不能播種。即借給秋麥。於五六兩月廣種。亦可佐數月民食。查秋麥堪佐民食。播種可以稍遲。倘雨澤稍緩。五六月間尚可種。豫備籽種。借給民間。自屬有濟。但所稱豫東購買。東省亦有歉收地方。應請

交與總督高斌。令查明直屬有無籽種。倘有不敷。則委員於河南奉天等處採買。分發存貯。如秋成有望。仍可變價還項。倘秋禾難種。即借給種植。又議雅爾圖奏稱直隸春雨愆期。麥收既失。倘大秋復難播種。民食何賴。請敕直督早委幹員。分往湖廣。江西。江南三省。不拘米麥豆穀。採買四十萬石。運至直屬。分發收貯。再豫省彰衛二府。水路可通直隸。該處今歲二麥豐收。亦應委員酌量赴買。以湊賑用。查先經直督高斌奏報。通省存倉米穀。及截留之項。共二百一十餘萬石。今除大名。宣化。雨澤已降外。其餘各處。俱須豫籌。恐前項米穀不敷。

皇上念切痼瘼。不惜帑金。調卹。則先事豫防。自應再加購買。但查江南地方。民衆所產米穀。祇足供本地民食。况歉收後。偶遇有秋。亦未必能接濟他省。其湖廣。江西二省。距直隸遠。現雖據總督阿爾賽奏稱。兩湖地方。米價

平減。二麥茂盛。巡撫塞楞額奏稱。該省麥苗茂盛。米價亦平。而收成分數。尚難豫定。恐委員往購。轉致商賈居奇。彼處或有未便。至河南與直隸接壤。彰衛二府。水路可通。如果該處二麥豐登。自當酌量買貯。應請將雅爾圖所奏。密交直督高斌。斟酌本地情形。應如何豫籌。并湖廣。江西二省。可否採買之處。詳細計議。奏聞辦理。諭曰。雅爾圖所奏直隸備荒二摺。及大學士等所議奏帖二件。可俱發與

高斌閱看。從來辦事之道。貴乎得中。凡身在事外。常不察其事之究竟。而先期張大其詞。啟人心之希冀。固屬太過。而身在事中者。或稍觀望遲回。以致臨時急迫。此又不及之病也。高斌之意。以地方災尚未形。此時當務鎮靜。並非視為緩圖。朕亦深知之。然麥秋既已失望。萬一大田再不能佈種。則辦理甚為棘手。未雨綢繆之策。所當悉心豫籌者。而高斌此時。則尚未有成算。可寄信問之。至於委員

前往河南奉天採買之處亦詢問高斌此時尚可無需亦不必如果必需即行具奏朕思直隸官員現有查災散賑修工等事難以兼辦採買俟高斌具奏到日朕降旨令河南巡撫碩色奉天將軍額爾圖委員採辦運送直隸交納似更便益可將此一併詢問之若彼直隸官自能辦此則不必尋奏覆直隸除大名一府雨澤霑足宣化永平廣平次之順德又次之正定府及趙州雨尚未足至順天保定二府及定州屬二麥歉收而上年被災之河間天津深冀等屬早象尤覺可慮備荒之策多儲為先今歲河南河北一帶及直隸大名府俱豐收可期河南彰衛二府與大名水路可通若委員採買運貯災區實為有益臣擬先撥司庫銀十萬兩遴員前往不拘定數察看市集情形如可多得即添銀購辦至目下差委辦事之員現足敷用雖河南隣省辦運之事均屬辦公究不如就臣所素知之屬

員易於策勵至收麥籽種所需不至甚多即河西務等處水路馬頭地方糶賣市集尚多易於購辦屆期謹先豫備此時無庸赴河南奉天採買得旨知道了○戶部議覆江西巡撫塞楞額疏稱江西截漕運送粵東改運湖南酌辦事宜內稱自江西至長沙難免折耗請每石給與折耗四合至原請耗米三千石內應給米四百石外尚餘米二千六百石即以湊補春糶又稱江西耗羨無多所有運米腳費請於乾隆八年地丁項內動支至原議運送岳州交卸止委正運官一員盤費一百兩協運官三員每員六十兩今分送常德請添派協運官一員照例給銀六十兩均應如所請從之○江西道御史歐堪善奏今年鄉試主考特命大學士尚書保舉復加考試引見慎重文衡至矣惟現在保舉人員為數無多考列一二等者僅二十一員除遠省先行典試外所餘更無幾人倘近省士子有父兄

親友在京往來隨便探聽。縱本員自愛而其家人親戚或乘此在外宣洩招搖亦未可知。且京師士子雲集不無揣摩此項保舉人員於試差外必與順天同考官百計鑽營亦或有之。請勅下此項人員務宜肅靜候旨慎擇交遊。凡家人親戚俱嚴為防範得旨允行。下部知之。○旌表守正捐軀直隸鉅鹿縣民王嘉會女王氏浙江蘭谿縣民鄭希裴妻胡氏。○辛酉戶部議准長蘆鹽政伊拉齊報開石

分集卷三十四

河場鹽鍋一十四面。每面納課一兩四錢。自乾隆九年為始照例徵收從之。○正定鎮總兵官范毓綺以病乞解任報允。閩浙總督那蘇圖等奏請建湖州協安吉營所轄梅溪孝豐遞舖三汛派防弁兵營房從之。○除廣東廣州肇慶高州瓊州四府屬水衝砂壓民屯山田水田三百六頃額賦。○旌表未婚守志勒聘捐軀之廣東瓊山縣民林學文聘妻王氏。○壬戌諭曰直隸提督保祝患病著太

醫院派好醫官一員令伊子傳景帶同前往看視。○吏部議准兩廣總督馬爾泰疏稱廣西羅白土縣梁承烈子梁應乾應襲父職因年未及歲族內又無堪以協理之人援照遷隆崗以漢員協理之例請以江州州同張永昭暫行協理該土縣事以官男祖母李氏護印從之。○漕運總督顧琮奏奉旨截留尾幫漕糧五十萬石貯天津北倉備用。今歲尾幫係江西湖廣二省糧石俱係稜米可以經久

分集卷三十四

示

如數有未敷再行酌撥江浙等省漕船得旨著照所請速行該部知道。○天津水師滿營都統福昌等奏賞給兵丁滋生銀三萬兩陸續將本銀交庫外現餘銀八萬九千八百餘兩經高斌奏請將錢布油醬等四舖關收只存典當估衣弓箭染房等舖皆減為一分五釐息所存銀三萬兩交鹽運使轉交天津殷實商人等按一分生息臣等查每年所得利息現雖敷用而添駐兵到時一切需用既增

若不另籌滋生之計。必至不能接濟。若將現存本銀。在此生息。又恐難以獲利。請將現有銀一萬兩。仍交鹽運使轉交天津殷實商人。按一分生息。嗣後再剩銀兩。即交此處兵民酌量生息。可以久遠有益。奏入。報聞。

平定縣志卷十四

主

大清高宗法天隆運至誠先覺體元立極敷文奮武孝慈神聖純皇帝實錄卷之二百十四

大清高宗法天隆運至誠先覺體元立極敷文奮武孝慈神聖純皇帝實錄卷之二百十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次慶桂總裁官經筵講官太子太傅大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆九年甲子四月癸亥諭曰。

三陵事件最關緊要。五十四自補授總管內務府大臣以來。並未實心經理一事。前在張家口游牧總管及軍臺總管任內。藉稱患病來京。亦毫無効力之處。為人亦不安分。著解任來京候旨。所遺員缺。著巴圖補授。令其總理三陵事務。其熱河總管員缺。著盛京包衣佐領七十補授。又諭軍機大臣等。據阿爾賽奏稱楚省今歲雨水調勻。二麥收成豐稔。為數十年所未見。朕心深為欣慰。今春直隸地方。

雨澤愆期。麥秋失望。恐將來有須外省接濟之處。可密寄信與鄂彌達。令其豫備米麥。或二十萬石。或三十萬石。若直隸需用之時。信到。即速運送。庶不致稽遲。鄂彌達接到此旨。即先期料理。不必聲張。又諭前據碩色。紀山奏稱。河南今歲雨水調勻。二麥可望。川省今年膏雨頻施。四野霑足。春收豐稔。可望豐登。朕心深為欣慰。今春直隸地方。雨澤愆期。麥秋失望。恐將來有須外省接濟之處。可密

寄信與碩色。紀山。令其豫備米麥穀。或二十萬石。或三十萬石。若直隸需用之時。信到。即速運送。庶不致稽遲。碩色。紀山。接到此旨。即先期料理。不必聲張。尋河南巡撫碩色奏。豫省二麥初登。尚未乾透。恐收貯易致霉變。而直省又需用甚急。惟有先期將倉穀十五萬石。豫為派定。俟需用時。即可先行碾運。再採買乾麥十五萬石。隨後運交。得旨嘉獎。又四川巡撫紀山奏。川省常平倉穀。應留本省備

用。即上年採買米穀。亦在本省平糶。其餘穀。又准兩淮鹽政。準泰移咨。撥濟揚倉。惟鹽穀一項。計一百五十一萬八千石。上年撥運江楚二省四十萬石。尚存一百一十一萬八千石。酌撥四十萬石。碾米二十萬石。以省運費之半。惟是棧道崎嶇。必由川江水運。時值五月封峽之際。重載俱不敢行。俟八月內開峽。委員速運。由漢口換船至儀徵。再換船抵直。一切雇船過載等事。必地方官代為經理。請

勅下遵照辦理。如十月前能運至。固克有濟。倘風色不便。北河屈凍。直屬又需米甚殷。應否豫咨直督。臨時酌量。或就泊所起卸接運。或俟春融趕運。為青黃不接之需。得旨。今京師已得雨澤。可毋庸此。○又諭軍機大臣等。湖南巴陵縣生員方宣。點家失竊一案。蔣溥以衡陽縣知縣。謝仲坑所審。似屬實情。明德以謝仲坑鍛鍊成獄。撫臬意見參差。大相牴牾。朕已降旨。將明德解任。謝仲坑係蔣溥卓

異之員。謝仲坑現有刑斃民人麻友一一案。蔣溥即具摺奏。是其存心公道。不護庇薦員處。但謝仲坑既有刑斃麻友一之事。則其於方宣點竊案內。或有鍛鍊之處。亦未可定。可密寄信與蔣溥。令其留心體察。務得實情。以成信讞。○戶部議覆廣州將軍前署兩廣總督策楞疏。稱粵東順德等四十二準額引。共撥出五萬八千一百二十道。勻交和平等三十六準代運。其額餉除與受勻之準相等。及數不甚懸者。不議外。惟歸善信宜二準。受勻順德增城引餉。係以課重之引。勻於課輕之準。受引三千一百七十道。照本準輕引核算。應減餉五百九十一兩零。其新會等三十三準。及順德勻於信豐等準。俱係課輕之引。派於課重之準。應增餉七千九十八兩零。至南安府屬大庾等四準。贛州府屬龍定等六準。行鹽既多。額餉更重於東省。應增餉三千三百六十三兩零。共增一萬四百六十一兩

零。所減者少。所增者多。似非疏銷本意。應仍照原奏。將每引應納銀數。均照原引額餉。辦納。免其加增。今部議既照受勻之準加餉。又令照勻出之準行鹽。減其鹽餉。增其餉課。勢必大虧商本。查該署督冊開鹽餉數目。係照原準配運。原未增添。而餉課數目。係照現準額則。計鹽升除。餉從地改。銀以鹽計。減其鹽。即減其餉。應令將順德等準撥出額引。仍照原準鹽餉配運。其餉課按受勻之準。計鹽完納。所有應增一萬四百六十一兩零。減五百九十一兩零。准照數完納。從之。○補行乾隆七年分大計。山東省不謹官四員。罷軟官二員。年老官三員。有疾官一員。不及官二員。浮躁官一員。湖南省不謹官三員。年老官六員。有疾官二員。不及官二員。浮躁官一員。分別處分如例。○旌表守正捐軀之河南確山縣民張鳳妻劉氏。○甲子。孝端文皇后忌辰。遣官祭。

昭陵○兵部議准河東河道總督完顏偉疏稱德州衛額設南北千總二員請照黃運河營千總之例支食守糧六分又總河衙門有坐糧四十分請照陝省親丁虛糧之例募補充伍從之○乙丑

上詣暢春園問

皇太后安○諭曰

順懿密太妃侍奉

皇祖三十餘年淑慎溫恭慈祥和易誕育賢王

壽踰七袞福德兼備亦史冊所罕見朕心敬

禮虔祝康寧近日體中違和方期調治痊可

今日聞病勢沉重朕已降旨親往看視乃啟

駕之先奏報

太妃薨逝本日朕不便遙往俟明日殯殮之

後躬親奠醢輟朝三日著和親王大阿哥穿

孝一應典禮該部內務府察例具奏○戶部

議准直隸總督高斌疏稱直屬被災所有新

舊應徵錢糧既經停緩請於部庫撥銀三十

五萬兩為兵餉急需至秋餉一十六萬餘兩

仍在各屬未完八年地糧內動撥如果不敷

更於九年地糧內湊放從之○以御史葛德

潤為雲南鄉試正考官編修朱奎為副考官

侍講田志勤為貴州鄉試正考官編修何其

睿為副考官○以理藩院侍郎玉保為正黃

旗滿洲副都統仍兼理藩院原任正紅旗滿

洲副都統慶泰為正白旗滿洲副都統調鑲

白旗漢軍副都統舒靈阿為鑲白旗滿洲副

都統○丙寅

上自圓明園奉

皇太后至

順懿密太妃几筵前奠酒奉

皇太后居暢春園

上幸圓明園○丁卯

上詣暢春園問

皇太后安○諭曰

三陵事件最關緊要應於朕之諸叔內派一人

守護。公祿慶年幼。不足統轄。貝勒允祁為人厚重。著總理。

三陵事件。執掌關防。祿慶已圖。仍隨同總辦。○予假回籍。大學士陳世倌奏出都時。道經山東。聞有劇盜田大豬頭等。夥黨十餘人。行劫衙署。如山東之莒州。陝西之鄠縣。湖南之祁陽。四川之大邑。河南之汜水等縣庫。俱被劫。前任桃源集同知劉輝祖。帶兵往捕。尚自抗拒。捕役受傷方獲。又有沛縣金陵鎮巨窩姚乾。姚敬止。姚九。兄弟三人。各聚多盜。四出行劫。據供山東現有十餘案。其他夥盜行劫之案甚多。經前任滕縣知縣王爾鑑懸賞設法。將巨窩擒獲。並因各省劫案。關訊待質。臣愚以為此等大盜。但有數案審實。即應題請正法。若因彼此關訊。連年不結。此等奸猾之徒。狡計百出。信息常通。安知不故將口供不符。苟延旦夕。往來移解。設有疎虞。滋累地方。請勅山東撫臣喀爾吉善。將所有本省各案審

定。即行題請正法。其餘行劫他省之案。訊取確供。分移各省。就案定讞。得旨。所奏是。已有旨了。諭軍機大臣等。大學士陳世倌所奏是。著抄錄密寄與喀爾吉善。照此辦理。○又奏二月十一日抵家。並三春得雨情形。得旨。卿家鄉雖幸蒙

天佑。而直隸則望雨甚切。朕心日夜焦勞。幾忘寢食矣。雖百方補救。尚無旋轉之機。此中愧歎。卿亦知之否耶。江湖廊廟。朕為卿誦之。至大學士徐本抱病。似屬不起。漢堂甚屬蕭條。亦因無人。尚待卿補闕耳。○己巳。以旱命省刑寬禁。諭今年各省雨澤。尚屬應時。惟京師及畿內數府。甘霖未降。二麥歉收。目下已屆佈種大田之時。望恩尤切。朕脩省祈禱。宵旰靡寧。因念清理刑獄。亦感召

天和之一端。著刑部堂官。於在京各案內。徒杖以下輕罪。一一查明情節。稍有可原者。或應肆赦。或應末減。即速分別請旨完結。其重罪

人犯雖法無可貸而天氣炎熱身繫囹圄亦屬可憫著於夏至前後遵照舊例暫寬刑具添蓋蓆棚給與冰水藥物免致病暈以上省刑寬禁二事並即傳諭直隸總督高斌於所屬地方一體速為辦理○兵部議准湖廣總督阿爾賽疏稱湖廣北南兩省外委千把總隨糧支戰支守事未畫一查外委同有分防差遣之責似應概給戰糧如湖北德安營漢陽營湖南鎮筳鎮標永州鎮標永綏協長安營守糧俱請改為戰糧與通省畫一至湖南撫標鎮筳鎮標長沙協保靖營長安營尚有千把總三十五員亦應易給戰糧從之○庚午諭今年畿內數府雨澤愆期二麥收成歉薄若照向例麥熟後開徵民力拮据可憫朕心軫念著傳諭高斌令其酌量地方情形其應行緩徵之處所有額徵錢糧暫停催納俟將來可以完糧之時該督再行奏聞開徵該部即遵諭行○又諭直隸河間天津等處上

年被災今春雨澤愆期誠恐二麥不能有收不得不豫為籌畫山東河南山西等省充公耗羨銀兩歷年尚多餘剩爾部可即詳查密行酌撥銀百萬兩運交直督高斌將來或有以工代賑或養廉不敷應動此項銀兩之處奏請動用其山東西三府今歲雨澤亦少可量為酌撥尋戶部奏覆山東省現存充公銀五十一萬二千二百兩零耗羨銀一萬一千八百兩零二共五十二萬四千兩零山西省現存充公銀四十三萬六千兩零耗羨銀五萬三千八百兩零二共四十八萬九千八百兩零河南省現存充公銀四萬九千四百兩零耗羨銀四十四萬六千二百兩零二共四十九萬五千六百兩零山東德州等處去年被旱今春西三府雨澤亦未霑足自應酌留銀四十萬兩零止酌撥銀十二萬兩山西省應留銀十萬兩零酌撥銀三十八萬兩河南省酌留銀十九萬兩零酌撥銀三十萬兩共計

八十萬兩。解交直隸藩庫收貯。奏明動用。從之。○諭軍機大臣等。御史陸秩奏摺。可抄錄寄與高斌看。朕想陸秩所奏。未免太過。即以工代賑。亦屬現辦之事。但不知直隸地方情形。實在如何。現在如何辦理。陸秩所奏。有無可採之處。著高斌一一妥商定議。速行具奏。尋奏。河間以南至景州。係上年被災較重之區。春夏乏雨。加賑至五月。此時麥雖失望。尚冀得雨。播種晚穀雜糧。民情尚屬安帖。所奏實屬太過。至平治進京大道一條。臣查雍正八年。平治江南山東直隸一帶進京道路。其時臣任江蘇布政使。猶記江南三縣地方。共用銀不過七千餘兩。則三省地方所用錢糧。數目無多。可以概見。以此窩賑。殊屬有名無實。現在河間阜城景州滄州大城修城代賑。需用帑項十數萬兩。區區治道工程。不過數千百金耳。所濟幾何。又請開濬濟寧至通州運河一條。查運河工程。有每歲挑濬者。有間

歲挑濬者。因地制宜。全在臨時酌量情形。分別辦理。並無一勞永逸之策。其勢使然。原非為省費起見。若不論河道水勢。概議大挑虛糜帑項。轉與興工代賑之意不符。所奏均無庸議。得旨。覽奏俱悉。○又諭提督保祝患病。著解任調理。提督印務。著傅清署理。其天津總兵印務。著高斌委員署理。○戶部議覆奉天中江稅銀。每年定額四千八兩零。自雍正八年十一年十二年。乾隆元年。俱不缺額外。其餘年分皆缺額。自一百餘兩至一千數百兩不等。節經叅奏追賠。而缺額如故。實由貿易人等。較前稀少。今既據該侍郎雙喜等查明確實情形。自應如所請。派各部司員試收定額。倘朝鮮有謝恩等事。與商人貿易者多。於定額外儘收儘解。至稅務監督。臣部既議於京員派往。則五部毋庸揀選。俟京員徵收定額後。再照舊例揀員接徵。再中江去奉天百餘里。京員初到。用度浩繁。盤費應較奉天

城內之牛馬稅差員量為加增。即於該年所收火耗內歲支銀三百六十兩從之。○又議覆閩浙總督那蘇圖等奏請將范毓麟辦回滇銅量勻二十萬觔運閩添鑄。查該省自乾隆六年十月開鑄以來採買滇省費金釵二廠銅并商人辦回洋銅共六十萬餘觔按四鑪核計每年需十五萬九千八百餘觔除已冊報供鑄外應存銅三十餘萬觔足敷兩年之用。所請未便議行。至臺灣兵餉錢俱由省城鼓鑄運往今錢價既貴自應酌量加鑪鼓鑄以平錢價。應令該督作速報部仍行令或飭經管海口各員於商人自本辦回洋銅動項收買抑或咨商雲督酌買滇銅接濟從之。○辛未諭戶部前因山東德州海豐等五州縣衛上年被旱今春又復少雨已降旨加賑四月一個月以濟貧民今據喀爾吉善奏稱德平陵縣平原商河濱州霑化惠民利津八州縣雨澤未沛二麥黃萎小民艱於謀食請

照德州等五處之例加賑一個月等語。今四月將盡而該撫始行奏請殊屬遲緩著飭行所請依議速行。所需米石即於截漕內補給如有不敷即照每穀一石折銀六錢之例動項折補該部即行文山東巡撫喀爾吉善令其速為辦理。○壬申

上詣暢春園問

皇太后安。○諭軍機大臣等直隸數府一春亢旱二麥歉收萬一雨澤再愆大田難以佈種則貧民謀食於外勢所不免或投奔親故或覓食於糧賤之地傭工力作以餬其口本地方有司不必禁止其所到之地方官善為安插毋使失所。此等窮民既失耕種之期不必急於資送回籍徒使僕僕於道路向來州縣官每見外來貧民驅之出境以卸己責最為惡習可密寄信與高斌令其密飭所屬共知此意民可使由之不可使知之亦不必宣播使羣相效尤輕去家鄉也。同日又諭寄信山

東巡撫喀爾吉善密飭所屬共知此意不必宣播使百姓輕去其家鄉則美政反為執政矣○癸酉兵部議准奉天將軍額爾圖奏福陵

昭陵管千丁四品官請鑄給圖記其應挑取隨四品官圖記不食錢糧外郎各二名照盛京禮部挑取外郎之例於所轄千丁內挑補六年期滿送部考職從之○又議准河南巡撫兼提督銜碩色疏稱南陽鎮未裁新兵議裁右營五十名汝寧營七十二名歸德營四十二名陝州營五十六名鄧新營十五名信陽營三十五名共裁兵二百七十名其新兵一百七十名并河北鎮屬之開封營新兵六十一名因該地差繁兵少不能議裁應照舊存留從之○又議准雲南總督張允隨疏稱滇省鎮雄尋甸魯甸恩安會澤五廳州縣新添運銅道路請建官廳塘房從之○甲戌直隸總督高斌奏順天府屬之霸州大城保定府

屬之新城雄縣束鹿高陽等縣河間府屬之河間獻縣阜城肅寧任邱交河景州故城吳橋東光寧津等州縣天津府屬之天津青縣靜海滄州南皮鹽山慶雲等州縣并津軍廳正定府屬之樂城縣廣平府屬之威縣清河冀州屬之武邑衡水饒陽安平等州縣遵化州屬之豐潤縣共三十三州廳縣上年既歉收今歲又未得雨民間錢糧無力完納又順天府屬之文安保定府屬之新安二縣上年雖未成災但與災地毗連今春均未得雨請將該州縣廳無論上年被災與未被災應納乾隆九年分新糧及未成災應完八年分新舊錢糧并已未成災應於九年麥熟後完納之八年分錢糧及各年舊欠均予緩至本年秋後徵收得旨近亦有旨矣又奏應徵錢糧既緩其歲需佐雜俸銀及胥役工食無項留支現遵五年十一月內諭旨於司庫存公銀內撥補至驛遞工料乃夫馬計日必需自應

按季支給。除河間等處春季應支工料已於司庫銀內撥給。今被災各屬銀糧既緩。則未經開徵以前。夏季以後。均請通融撥給。得旨。又撥公項八十萬。即為此一切也。所奏俱悉。又奏請借各州縣貯備米石。為大城寧津故城肅寧衡水深州安平饒陽新城雄縣霸州文安十二州縣災民口糧。共需三萬六千石。秋收後民力未紓。更請豁免。得旨。著照所請。賜予。秋收後不必還倉。該部知道。○以內閣學士呂熾為工部右侍郎。○以杭州鑲白旗漢軍協領王如正為京口左翼副都統。侍衛舒明為綏遠城左翼副都統。○乙亥。上御勤政殿聽政。○戶部議覆倉場侍郎覺羅吳拜疏稱。撥運易州漕糧。原議於天津西沽起剝。運至白溝河交卸。嗣因雇剝費繁。疊次起卸不便。議自天津直抵雄縣亞谷橋轉運。上年漕臣顧琮以淀河每多淤滯。糧艘不能遙行往返。請於水小之年。仍令西沽剝運。今

確勘各州縣所屬水程不甚相遠。尚易挑挖。請於每年糧船將到之前。豫行探明淤淺之處。及時挑挖。倘船身過重。於水小之年。仍需足數起剝。應如所請。從之。○工部議覆署兩江總督尹繼善疏稱。大學士等議准上下兩江興修水利。今查鳳陽府屬靈璧縣大路官溝輝山橋河葛家溝宿州境內大路官溝。潁河。淮河南岸沙溝唐家溝。濉呂溝。百靈溝。龍山溝。鳳陽縣屬大路官溝。虹縣境內婁家橋溝。唐溝。泗州境內臨淮口舊河。謝家溝。盱眙縣境內蔣家壩子堰。五河縣境內三衝壩陸家壩。張家壩等工。急應挑濬開築。再宿州之范家灘。邢家灘。燕子口。靈璧縣之王城溝。為濉水咽喉。實與彭家溝等處表裏。既濬彭家溝。則上游王家山頭之水。建瓴直下。加以沙溝等溝。河開後。各水歸入濉河。其勢更大。而范家灘等咽喉阻塞。必致漫溢。須將下游開濬深通。庶可循塗順軌。直達濉河。又宿州大

路兩旁官溝。既請疏濬。以挑溝之土培築大道。但其中有界溝。便溝。禪堂溝。官溝。梁溝。橫溝。橫穿大路。下通澮河。年久淤塞。自應一律開通。使各水分歸各溝。以達澮河。俱應如所請。從之。○川陝總督公慶復奏報。準噶爾貿易夷人圖卜濟爾哈朗等。自肅州起程還部。○以詹事王會汾為內閣學士。兼禮部侍郎。侍講學士莊有恭為光祿寺卿。○旌表守正捐軀之河南禹州民吳生妻王氏。○準噶爾部人鄂勒哲依來降。命賞給安插如例。○丙子。諭據揚錫紱奏稱。廣西武緣縣知縣赫昇病故。所遺員缺。例應歸部銓選。但武緣乃思恩府首邑。地廣民刁。又承審各土司一切命盜案件。素稱難治。若聽候部選。未必即得相宜之員。查有安平州州判施敏政。曾經大計薦舉。奉旨准其卓異。回任候陞。該員在粵已二十年。熟悉風土。堪膺牧民之任。若陞署武緣縣。頗為入地相宜等語。施敏政在粵年久。

又經保薦卓異。著陞授武緣縣知縣。○熱河副都統達勒當阿奏。馬圈節省銀兩。請將動用數目。每歲造冊咨送熱河正藍旗滿蒙漢三旗查明。一併奏銷。自乾隆六年九月起至本年四月。除雇用鋤夫及採買薪炭草料。共節省銀四千四十二兩。此內酌給本蘭隨圍兵丁及兵丁公事動用銀兩。共開除一千四百二十六兩。尚實存銀二千六百十六兩。查熱河八旗二十佐領下兵丁子弟。向於各兵住房內撥取二三間為官學。但占兵房為學舍。恐日久有名無實。請將現存節省銀內以一千六百十六兩存為公事。備用其餘一千兩。即於駐防熱河十四佐領喀喇河屯四佐領化育溝二佐領地方就近設立官學。擇兵丁內熟習清語清文者分教各子弟。仍於每翼派幹員一名稽察教習。三年果有成效。以應陞之缺保題。得旨知道了。汝辦理實屬可嘉。○旌表守正捐軀之河南永城縣民鍾大。

妻郝氏、丁丑。

上詣暢春園問。

皇太后安。○是月，江蘇巡撫陳大受奏覆蘇州尼僧東悟募修寒山寺，因所欲不遂，致地棍閑闌縣堂一案。緣二月十二日，吳縣知縣姜順蛟拘審是案時，即有地民二百餘人持香跪求准修寒山寺。該縣升堂審究，東悟收徒情由狡匿不吐，欲用刑嚇。衆人以為修寺不成，將香擲地。該縣喝拏，隨即奔散，並無閑堂之事。姜順蛟亦未倉皇退避，其糾衆拆房為首原無多人。旋將確訪之張佩尊等，并尼僧東悟共二十餘人拏獲。經蘇州府雅爾哈善分別處置。東悟不守清規，哄誘男徒，違例披剃，倡修起募，重責發原籍常熟安插。其餘分別妥辦，不使長刁。至成招事件，例由縣審。因有蔣恭棐說情之浮言，是以改委長洲縣承審。得旨：近今蘇城風氣益浮囂矣，朕所知者是案未楚，又有合家乘舟餓斃之事。其汝等

未經奏聞者，不知其凡幾也。汝在蘇亦數年矣，而風俗人心不見其歸厚，日見其漓。汝所司何事，豈簿書期會無誤，即封疆大吏所為勝任而愉快耶。○又奏蘇城六門舊有義學，皆係借設寺院，又無一定經費。現據紳士捐銀四千餘兩，在郡城適中之王府基及六門地方建設七處，又建市房一百二十間。歲得租銀發典生息，又紳士捐助圩蕩九百餘畝，統計歲入租息酌給塾師膏火及一切費用，已屬充裕。聽民間貧寒子弟入學講讀，得旨嘉獎。○督理淮關稅務倭赫奏報稽查官民船隻徵收貨課驗放餉銀硝銅并河工料物各情形，得旨：所奏俱悉，酌中為之。○安徽巡撫范璨奏安省倉儲原有一百八十五萬二千石，連年歉收，糶借兼行，現實貯僅七十餘萬石。是以入春以來有贖罪以穀之請，有平糶不宜過減之請，有買麥暫貯通融捐監之請，皆仰體慎重倉儲足民足食之至意。今歲

二麥豐收。無藉平糶。惟查囤戶。例有嚴禁。民因米價昂。不敢糶盡。而又待用銀錢甚迫。暫行典質。此亦人情之常。遂有一種射利之徒。避囤戶之名。為典質之舉。先與富戶當戶。講定微息。當出之銀。復行買當。資本無多。營運甚鉅。坐視市米缺乏。價值大長。始行贖賣。取利。不顧民食艱難。視囤戶尤酷。臣現飭行。除農民餘米無多。質押者聽。如數至百十石。概不得質當。得旨。好。甚應查禁者。不謂汝能辦此。勉力以實為之。○鎮海將軍王貳奏。左翼副都統朱廷桂病故。員缺。請以鑲白旗協領呂禧補授。得旨。協領可奏舉。至於副都統。乃共辦事之大臣。亦可奏舉耶。殊不知大體矣。○浙江巡撫常安奏。覆遵旨閱蘇撫陳大受一摺。查各省年歲有豐歉之分。地方產穀。有多寡之別。藉商販之流通。為閭閻之接濟。茲陳大受因浙江溫處商販。謂蘇郡非產米之地。意為蘇郡起見。未免過分彼此。臣以為

溫處所糶蘇郡之米。亦不過江廣上江。聚集於蘇郡者耳。既可聚集於蘇郡。似無有但到蘇郡。即行禁遏之理。況浙省衢嚴之米。多為江南徽州販運。即溫處少米之地。尚且有閩商販運。浙省從無禁遏。不應溫處之與江蘇。獨有彼此之分也。若云海禁。查浙省乍浦海船出入。必由內河起剝過壩。與別省沿海內河。直接大洋者不同。自乍至溫。斷難飛越。凡商運米船。先令地方官查選土著驗明商本。取具印保。各結開明。年貌籍貫。通詳給照。赴江買運。乍口官驗符合。於照內填註鈐印。移會經過汛防。查驗放行。一面咨會給照。地方官。米船進口。查驗數目相符。然後銷照。是浙省稽查之法。已為詳備。而蘇撫以為輕開海禁。殊不知倍常加謹也。總緣溫在海濱。處在山內。民貧土瘠。即非歉歲。米亦無多。因查照乾隆二年大學士嵇曾筠奏。准招商給照。赴江省販運。以濟溫處民食。蓋溫處地方與江

省之水道四通。商米雲集。情形迴別。是以招商接濟。以免臨時周章。實以海洋之禁。惟在汎口查察之精嚴。不在內地商船之來往。況蘇浙誼屬輔車。何必過分畛域。今奉旨特賜截漕。臣現已酌撥二萬石。分發溫處。既民食有可取給。已將招商之舉。飭停得旨。汝謂陳大受有此疆彼界之心。是也。然以朕視汝。亦不可謂全無。總之汝等即為此而矛盾。亦尚係為民之事。出於不得已也。但以後豐年。可不必若實需穀孔亟。只可仍照此行耳。將此旨寄與陳大受觀之。○福建巡撫周學健奏。新任布政使高山到閩。口傳面奉諭旨。福建民情刁悍。官常廢弛。巡撫周學健。雖留心地方。亦不無探聽習氣。有應辦事件。即行辦理。依違遷就。大有壞於吏治。臣到閩以來。凡關民生休戚。地方利弊。一有聞見。無不勉力查辦。第慮識力未到。或有太過不及之處。是以不得不出之審慎。可行者。即辦理奏聞。其未

敢自信者。則必奏請訓旨。然後施行。非敢稍涉逡巡也。得旨。高山所傳畧誤。汝尚不至此太過不及之處。則有之。勉力秉公。執中辦理可也。○又奏母老子亡。病軀遭慘。乞解任回京効力。得旨。閩省自汝為巡撫。漸覺有起色。豈可驟更。至汝遭遇之慘。須自排遣。孟子曰。修身以俟之。所以立命也。朕為汝誦之。湖廣鎮筸鎮總兵王廷極。奏三廳地方。寨目苗長。近日有一二薙髮者。因加獎賞。而苗衆鼓舞。自願薙髮者。竟有二千六百餘名。一面移會辰沅道。轉飭三廳。加意撫恤。一面嚴飭員弁。及苗外委百戶等。無稍強制滋事。得旨。此事朕殊不多許。但令地方安靜足矣。何必如此。○河南巡撫碩色奏。豫省鰥淺沙地。雖不可種五穀。未始不宜樹木。因令鄉耆士民。有能勸種一千株者。給以花紅示獎。州縣官有能勸種二三萬株者。分別記名。仍不得以欲速強民。始勤終怠。得旨。甚是之舉。知道了。○

又奏。現將秋審查核。五月中旬。即可具題。運直米石。其時亦可全數開行。擬於五月十九日兼程赴闕。得旨。所奏俱悉。來期可於七八月之間。蓋目今直隸成災之處。頗有流民至豫省者。此等若即資送回籍。不但徒費。而至本籍者。仍無地可耕。轉多不便。惟應聽其自謀。所至州縣。不過安插。使得宜斯可耳。汝可即以此意諭州縣。○山東巡撫喀爾吉善奏。報各屬得雨缺雨情形。得旨。汝之答。即朕之答。汝之心。即朕之心。汝止一山東。而朕又增一直隸。且比山東更有甚焉。將以寬朕。朕憂安得寬耶。○又奏。東省曹沂兗泰等府屬。雨澤調勻。惟濟武所屬。被旱成災。除奉旨將德州等五州縣衛。加賑四月一個月外。其餘被旱之處。賑糶借三者。急需兼行。現擬於本省豐收之曹沂等府。廣為採買。已密飭各該州縣。先期密辦。至糶數不拘多寡。即運送濟武。災屬應用。得旨。此甚善之舉也。○又奏。濟東

武三府屬缺雨之州縣。酌核省刑。除徒流重罪。未便議減。即罪止杖責。而情無可原。如姦盜詐贓。挾嫌誣告。尋釁打降。亦毋庸酌減外。其餘所犯杖笞。無心過誤。因人連累等罪。概予寬免。即於四月初十日起。至七月初一日為止。得旨。此係為早而恤刑。不應示以止期。如是。是誘民犯法也。可細繹此意。○又奏。興修德州等四處城垣。以工代賑。原為補救良圖。若辦料需時。轉恐有名無實。請將各該處現在確估工料。即行動項購辦。及時興工。得旨。知道了。辦料速畢。即可興工耳。○山西巡撫阿里衮奏報。巡邊情形。得旨。所奏俱悉。外省武備總屬廢弛。近命汝兄查閱。已奏參不勝參。惟處其甚者。以示警耳。可知向來督撫無一不欺朕者。汝自斷不出此。然亦不可漸染外邊習氣。諸事盡汝力量。勉力為之。然後稍能全朕用人顏面耳。○川陝總督公慶復奏。郭羅克番。除首惡林噶架。酸架已於軍前

正法及首惡譚蚌借先經拒捕被殺忙徹革藏蚌甲素二名。於獲禁後病故不議外。所有續獲為首聚眾殺人之蒙借等七名委員當郭羅克各土目面正法。並傳首各寨從犯二十五名。各杖責。同家口解赴成都。分發川東川南。寫遠土司安插。又傳集三郭羅克土酋丹增等目番共二十六人。明切開導。宣揚三次。宥過不殺之恩。并分別賞給銀牌緞紬烟布等物。臣事竣。即兼程回川。至徹回官兵。駐劄遠近不同。其起程各日期。應俟提臣陸續咨報。得旨。不動聲色。而處此難處之事。足見卿幹濟有方。嘉悅之外。無可批諭。○又奏。三月初十日。自成都起程。道經郭縣崇寧灌縣汶川。保縣茂州等境。出疊溪平番等堡。於十九日行至松潘。自灌縣之東。麥收茂盛。自灌口而西。直溯岷源。萬山重疊。鳥道盤空。行數十里。山巖起伏處。地稍開拓。始有漢民數十家。兩崖陡峻之區。重巒疊嶂。俱係羌蠻窟穴。

山頂建築碉房。就石墾荒。撒種青稞。生計艱苦。自汶川以西。雪山聳峙。半係瓦寺金川雜谷。沃日等强大土司所轄。各有隘口。守禦自茂州以西。俱係西番。尊奉喇嘛。其熟番土司微弱。生番不服管轄。言語不通。形狀獐惡。臣宿平番堡時。沿途土司迎送極其恭順。比至郭羅克土千戶丹增率領子姪及上中下各土目伏道迎謁。頂戴國家好生之恩。又附近之鄰寨土千戶墨丹住均在軍前出力擒惡化誨之人。一同迎接。臣即分別激賞。自古氏羌野性難馴。今之保縣。即唐之維州。我朝休養百年。羌番順則。革而草心。不勝欣幸。得旨。所奏俱悉。道路跋涉。卿體佳否。○又遵旨覆奏。前署督臣馬爾泰准兵部咨稱。據岳鍾璜所稱。郭羅克生計甚窘。查有相近之柏木橋地方。可以屯種。事定後。請勅交該督妥酌。臣查該地計荒土七十餘頃。四十餘里。狹長一條。河西必留大路。以通階文官道。河東又係

民羌住牧之地氣候陰冷上年試墾無收與郭羅克離遠且與內地營汛逼近不便遷移安插除郭羅克已就本境勸令開荒於善後事宜另摺請旨外所有岳鍾璜所奏無庸議奏入報聞○又奏四川大田土司原管曲曲烏夷寨先以各夷因舊土司馬溶妻妾子姪被馬澤奪襲致斃懷疑報仇誤搶萬工堰漢民致煩兵力今馬溶之女神姐前往化導宣示兵威各寨投誠其阿黑雖係年老頭人究因心戀舊土司起見即萬工堰滋事並未同行今夫妻父子乞哀伏罪情尚可原其上年在場搶刦之犯業已斃命且該地與縣治遠隔仍令土女神姐承襲父職一面飭令雅州府酌量情罪照夷例完結并委女神姐查點戶口督同各寨頭人酌議納糧管束得旨覽奏欣慰陝西巡撫陳宏謀奏報各郡雨水調勻可卜豐稔得旨既喜陝省之有麥復憂直隸之無禾然喜者遠而憂者近故憂常多而

喜常少也○甘肅巡撫黃廷桂奏上年九月內奏明平羅縣屬四堆子以下埂外閑田不在升科之內仍立社倉酌量輸租今計墾熟田二十三萬五千三百餘畝民二千五百餘戶俱給執照聽其管業按戶設牌開明丁口選立堡長編排保甲因令各戶田一畝輸租一升每堡選身家殷實二人充社總社副專司登記仍令官為經理歲底報查惟四堆子一帶舊有老埂延長七十餘里近年以來該地民復於老埂之內逼近河流之處加築新隄二道均應歲修令於春融農隙時每田百畝出夫一名量備柴草并力興作官為督率得旨知道了○又奏據布政使徐杞口傳諭旨清查地糧一事查明使無中飽便民則可若加賦斷乎不可臣敢不敬體但此番查造實徵紅簿原因官徵民納不知實數里長甲首得以串通書役乘間作奸或包輸侵用或任意多收或分派飛灑其弊不一是以行

令州縣傳集里甲。開出各戶姓名。應納科則。然後按戶查對確切。冊籍一定。里甲不敢蒙官滋弊。每歲開徵之始。將一戶田地錢糧。應納若干。開明由單。給民照數交納。里甲不得欺民多索。實於小民有益無累。並非料民增賦也。奏入。報聞。○涼州鎮總兵段起賢。奏陝甘豫保人員。引見後。兵部註冊。俟本省缺出。照銜缺籤掣補用。要缺原不致久懸。但部臣按簿遙擬。究未能人地相宜。請嗣後遇應題缺出。不必部掣。令該督提一面題報。一面於准保各員中。擇材缺相當者。委署。俟部覆到日。即將委署之員題補。得旨。此係久行之事。未可驟改。待朕緩酌之。○又奏報地方安靖。營伍整頓情形。得旨。不可徒為粉飾之言。外省有武備。保其不廢弛足矣。豈得云盡善盡美乎。仍宜實力整飭可也。○署廣東巡撫廣州將軍策楞奏。前護撫託庸題准截留楚漕十萬石。改抵春夏兵米外。儘數減價平糶。於

秋收後買補還倉。今臣查各屬。暘雨應時。米價有減無增。並無望糶情形。此時不早籌辦。無論以有用之倉儲。狼籍於無用之地。并恐將來購補時。轉致價昂。莫若全留支放。秋冬兵米。即以應徵兵糧。改收穀石貯倉。既免採買之煩。倉儲亦歸實貯。得旨。好知道了。○又奏。粵省番禺等三十州縣。俱有產礦山場。大概鉛砂多於銅砂。微有金銀夾雜。粵東地處濱海。民間生計窘迫。非無小補。又可供本地鼓鑄。惟查從前礦廠規條。委員經理。定以二八抽課。另收餘銅。以供養廉。誠恐未開廠以前。先已那動帑項。既開以後。所收不敷公用。而抽收太多。有虧商本。仍前隨採隨停。轉致與民無濟。計惟令本地有司。督同商人。先行試採。其作何抽課。應否設立廠員。俟辦理就緒。酌量題奏。得旨。所奏俱悉。○廣西布政使託庸奏。謝署廣西巡撫恩。得旨。巡撫不比藩臬。但得謹守無過。諸事黽勉。即可為稱職。此

乃全省民命攸繫。必慎重端方。務持大體。方可為合省表率也。聰明用不得。勉之。○又奏粵西地方。西北界聯楚南滇黔。悉係苗疆要地。省南即與交趾接壤。近因匪徒滋擾。奸民潛越邊外。尤宜加謹。請賜訓誨。得旨。已批示前摺矣。至於交趾。乃在化外。固我邊隅。示彼大義。毋輕動。毋喜功。斯可耳。○雲南總督張允隨奏滇省每年運京正耗銅六百三十餘萬觔。本省臨東以及黔省鼓鑄。共需銅八百餘萬觔。惟賴各廠旺盛。始能無誤。近年湯丹等廠產銅較少。因思於附近金江地方。豫覓旺廠。先行試採。嗣據東昭二府報稱金江北岸大山頂阿壩租地方。產有礦苗。當飭煎樣與湯丹廠成色無異。隨給工本銀三千兩。煎揭鑿殼銅。除抽課外。餘銅每觔給價六分收買。自乾隆八年十二月十五日起。至九年正月十三日止。共收過四萬五千餘觔。茲又發工本銀一萬兩。以便接續開採。查阿壩租甫

經開廠一月。即獲四萬餘觔。且離金沙江小江口銅房不遠。較湯丹水運尤便。再大理府地方。前經奏請設鑪開鑄。歲需銅二十餘萬觔。因滇省旺廠皆在迤東。若由迤東運往。未免多糜腳價。茲得迤西麗江府產有旺礦。試採頗多。又查順寧府打靶山廠。前因知府張珠經理不善。未能旺盛。今另委員設法調劑。較前大旺。二廠銅觔儘可敷大理鼓鑄之用。得旨甚善之舉。知道了。○貴州總督張廣泗奏報畢節縣夷民貓兒等。因爭佃不遂。率眾逃赴川省。現為永敘廳暫行安置。臣隨飭布按二司。遴員前往會審。得旨知道了。此等事不可姑息。東公執法辦理可也。

大清高宗法天隆運至誠先覺體元立極敷文
奮武孝慈神聖純皇帝實錄卷之二百十五

實錄卷之二百十五

三八

大清高宗法天隆運至誠先覺體元立極敷文
奮武孝慈神聖純皇帝實錄卷之二百十六

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲將軍副都統加七級隨帶加一級尋常加二級軍功紀錄一次臣處桂

總裁官經筵講官太子太傅大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德齡經筵講官太子少保工部尚書紀錄六次臣曹振鏞等奉

較修

乾隆九年甲子五月戊寅朔戶部議覆湖北

巡撫晏斯盛疏稱楚省備鑄銅鉛赴滇採買
較之自川赴滇道路實有遠近險易之別原
議盤費府佐月給銀十八兩隨帶家人書役
五名人日給銀五分雜職月給銀十二兩隨
帶家人書役三名人日給銀五分均難核減
查委員盤費只應按往返月日多寡計算不
應按月加增且川楚二省同一採買未便多
寡互異應令照川省之例支給至錢局後樓
改為銅鉛貯庫所有估修工料現已移咨工

部查核從之。又議覆前護陝西巡撫陝西布政使帥念祖疏稱鋪司專為傳遞公文而設。須因地制宜。請將咸寧等州縣鋪兵裁八百三十六名。其實係要地之臨潼等州縣增一百一十八名。即以裁額工食加於增設之鋪兵。歲以六兩為準。所有裁減工食銀八百七十二兩七錢零。閏月銀八十兩九錢零。歸藩庫充公。查前項雖屬節省之項。究係正項錢糧。不便充公。應令該撫陳宏謀收入地丁起運項下。按年解司充餉。至實額鋪司工食仍於地丁項下支領。從之。工部議准護山東巡撫布政使喬學尹疏稱濟寧東昌東平諸衛所千總俸餉。并河兵餉米銀兩。有於司庫各役小建銀內支領者。有於工食銀內支領者。有於司庫地丁銀內支領者。一官兵俸餉而各處支領。甚屬繁雜。請照黃河官兵之例。自乾隆九年為始。在司庫各該年地丁銀內動支。從之。○以故多羅貝勒允祜子弘曠

照例襲固山貝子。○已卯。

上詣暢春園問。

皇太后安。○諭一春以來雨澤稀少。二麥黃萎。今逾芒種之期。甘霖猶未普降。切恐秋禾難以佈種。民食堪虞。朕心憂灼。思過省愆。無一時之暫釋。朕詣暢春園問安。

皇太后雖慈訓屢頒。寬慰朕躬。而每見

皇太后以天時亢旱。憂形於色。朕心更為不寧。

今日

太后從寢宮步行至園內。

龍神廟虔誠祈禱。朕敬聞之下。惶恐戰慄。此皆朕之不德。不能感召。

天和而累。

母后焦勞。至於此極。為人子者。實無地可以自容。即刻前往請安。諄懇謝罪。恐眾不知。以為別有他故。並諭內外臣工知之。賜江西白

鹿洞書院。

御書扁曰洙泗心傳。四川阿樹郎達寨土百

戶部加劄舍故以其子酸布架襲職。庚辰。孝誠仁皇后忌辰。遣官祭。

景陵。○諭據禮部奏稱。旱雩之禮。於五月初二日。七日期滿。又七日不雨。應致祭。

太廟。因初五日節屆端陽。請於初六日齋戒。起於初九日祈禱等語。此奏甚屬錯誤。朕以天時亢旱。宵旰焦勞。敬舉旱雩之典。惟祈甘霖早沛。尚何間於節令。宮庭之中。偶逢節令。朕奉侍。

皇太后。意在承歡。蓋恐因朕宵旰憂勤之事。上煩。

慈慮耳。今

皇太后愛朕之切。憂朕之憂。昨又從寢宮步禱於

龍神之前。朕惶恐戰慄。莫知所措。如復以逢節而議改齋期。不大拂

母后之聖心乎。著即於初五日齋戒。起。初八日致祭。悉照議定典禮行。○又諭軍機大臣等。

武進陞奏稱。據千總許廷珠稟稱。臺灣狼交番地方。有匠頭劉奇容。隱流棍。欲并番奪取鹿鎗。又稱臺地朱一貴。吳福生。案內匪類。尚有郭接。吳應等。犯或埋名潛匿。或串入衙門。又稱各社時常殺死民人。影射生番。通事善於逢迎。地方官徇隱不報等情。一摺。朕降旨。交與該督撫將軍等。留心訪查具奏。今據那蘇圖。周學健。策楞。新柱。陸續回奏。將武進陞摺內所稱。一一剖晰。皆屬全無影響。夫封疆大吏。如遇地方有事。自應據實奏聞。若其事本無風影。豈宜冒昧陳奏。至於輕信匪人之言。不加詳察。尤屬不可。今武進陞聽信千總許廷珠之言。據以入告。查許廷珠。現以婪贓被揭提審。造此無據之詞。希圖徼幸。似此巧詐小人。其言豈可輕信。可寄信與武進陞。嗣後待人聽言。俱須留意。不可輕率。尋奏當時聽信未弁之言。謂臺灣非係管轄。虛實不便行查。欲專差密訪。又慮遠隔重洋。冒昧入奏。

實難辭咎。得旨。又不可因此畏縮而一切匿不奏聞也。○南掌國王烏孫表謝五年貢象一次改為十年恩。報聞。○旌表守正捐軀直隸祁州民張龍水妻楊氏。○辛巳。

上詣暢春園問

皇太后安。○諭乾隆七年十一月內漳州城守營把總馬庇管帶班兵赴臺更換。在洋遭風折舵。飄至廣東瓊州府文昌縣地方。彼時各兵借支盤費口糧銀五百七十九兩六錢。例應於各名下均攤扣追還項。朕念兵丁等於海洋遭風備歷艱險。情殊可憫。所有借支銀兩。此時難以扣抵。著加恩豁免。以示優恤。該部即行文該督撫提鎮知之。○禮部議覆肇高學政金洪銓條奏內稱儀禮周禮辭意博奧。習者益少。請嗣後童生於背誦講解五經之外。能兼周禮儀禮者。酌量書藝。從寬錄取。應如所請。但文藝如屬草率。仍不得藉背誦濫收從之。○壬午。

上詣暢春園問

皇太后安。○癸未。諭京師自春徂夏雨澤愆期。風霾時作。朕心憂惕。親製祭文遣平郡王福彭虔禱於

風神廟。著禮部太常寺遵照典禮。即於初八日敬謹行禮。

御製告風神文曰。維

神大元中精輔翊生成。以吹以噓。百昌勾萌。昔我

皇考。作是靈宇。在紫禁巽方。維歷有年。所側聞曩時旱魃為災。彭怒漲天。繼日以靈我

考。竭誠爰命宗枝曰。帛曰牲。祝史致詞。遂蒙

神庥。駭聽為收禾黍沐澤。乃亦有秋。茲者雪早於冬。雨早於春。自春徂夏。震雷無聞。山川出雲。慶散於風。不惟其景。乃惟其終。曰予不德。小民何辜。無麥無禾。渺渺愁予。曰惟百神各有攸職。功在蒼生。乃廟而食。用是陳詞。祈神之佑。致是咎徵。皆予之咎。願勅飛廉速收。

其暴油雲以作雨師前導曰予不誠

明神之欺降罪於予予其敢辭屏息以待惟神之思○又諭歐堪善所奏部院督撫議覆臣工條奏祇應就事論事揆情度理固不得有意苛駁更不宜節外生枝以肆其譏責如常安之於楊二酉條奏兵餉一案指為東野不經虛謬躁妄刑部之於薛澂條奏贖罪一案既責其不學又訾其惜惜詞氣之間甚於怒罵此釁一開漸成爭角之風有乖國體等語朕思臣工議事自當平心和氣折中事理以求一是即如刑部常安議駁二案詞意原屬稍過而言官所奏豈必盡實亦豈能盡合歐堪善同為言官而為此奏亦不得謂為公論彼此詆訶愈多畛域於協恭和衷之道均未為得也猶之乎非有與非非有此固失彼亦未為得也將此曉諭內外臣工等知之○戶部議准兩廣總督馬爾泰疏稱茂名開平二縣雍正十一年十二年分報墾地內成熟二

十五頃六十九畝餘請豁除從之旌表守正捐軀之山東東平州民李富妻張氏○甲申

上詣暢春園問

皇太后安○還宮○賜故多羅順承郡王熙良祭葬如例謚曰恪○乙酉祭

太廟遣履親王允禔恭代行禮○諭曰夏至致祭於

方澤去歲新葺齋宮朕先期一日住宿但彼地樹木新植尚未成陰天氣炎熱扈從人多不免有病暍者今歲炎熱勝於舊歲此次不必前詣壇內齋宮仍在宮內齋宮住宿將來遇親祭之年該衙門兩請旨意俟樹木成陰後仍照例齋宿壇內此番前往致祭正當祈雨之時不乘輦不設鹵簿即傳諭各該衙門知之○山西道御史柴潮生奏古者東南未闢王畿侯國皆在西北王畿不過千里餘遞減至五七十里地可謂狹矣一夫受田百畝周

制六尺為步百步為畝僅當今二十六畝有奇田可謂少矣而祭祀之菜盛賓旅之既廩君卿百官吏人之祿入賑貸之委積戰陣之芻糧無不取給於此費可謂廣矣而且三年耕有一年之食九年耕有三年之食今之天下即古之天下何無備之甚也則以田制既已盡廢水利亦復不修平日鹵莽而薄收一有急則待賑恤為活計而已矣查河間天津二郡經流之大河三曰衛河曰滹沱河曰漳河其餘河間府分水之支河十有二潞水之淀泊十有七蓄水之渠三天津府分水之支河十有三潞水之淀泊十有四受水之沽六是水道之至多莫如此二處故河間號為瀛海山東之水於此而委輸天津名曰直沽畿輔之水於是而奔匯若蓄洩有方即逢旱歲灌溉之功可救一半即不然而平日之蓄積亦可撐支數月以需大澤之至何至拋田棄

宅挈子攜妻流離道路哉雖其事屬已然言之無益然水利之廢即此可知今甘霖一日不足則賑費固不可已臣竊以為徒費之於賑恤不若大發帑金遣大臣將畿輔水利盡行經理既可接濟賑民又可潛消旱潦而且轉貧乏之區為富饒一舉兩得轉敗為功直隸為禹貢冀州之域田稱中中今日土壤乃至瘠薄東南農民家有五十畝十口不飢此間雖擁數頃之地常慮不給可怪之甚也雖其土燥人急風氣異宜亦不應懸殊至此漢張堪為漁陽太守於狐奴開稻田八十頃民有兩歧之歌狐奴今之昌平也北齊裴延儁為幽州刺史修古督亢陂溉田百萬餘畝為利十倍督亢今之涿州也宋何承矩為河北制置使於雄鄭霸州一帶興堰六百里灌田初年無功人咸病之次年大熟承矩輦稻米入都示朝臣謗者乃息邊民之食以充明汪應蛟為天津巡撫欲興水田將吏皆不欲應

蛟乃捐俸自開二千畝。畝收四五石。惟旱稻以醵立槁。於是軍民始信。今東西二淀。即承矩之澆。天津十字圍。即應蛟水田之遺址。又查國朝李光地為巡撫。請興河間水田。言涿州水占之地。每畝售錢二百。尚無欲者。一開成水田。畝易銀十兩。上年直督高斌。請開永定河灌田。亦云查勘所至。衆情欣悅。又臣聞石景山有莊頭修姓。家道殷實。能自引渾河灌田。比常農畝收數倍。旱潦不致為災。又聞蠡縣亦有富民。自行鑿井灌田。愈逢旱歲。其利益饒。又聞現在霸州知州朱一蜚。於二三月間。曾勸民開井二千餘口。今頗賴之。則水利之可興也決矣。今請特遣大臣一員。齎帑金數十萬兩。前往河間。天津二府。督同道府牧令。分委佐貳雜職。除運道所關。及滹沱正流水性暴急。慎勿輕動。其餘河渠淀泊。凡有故蹟可尋者。皆重加疏濬。而又於河渠淀泊之旁。各開小河。小河之旁。各開大溝。皆務

深廣。度水力不及則止。節次建立水門。遞相灌注。旱則引水入溝。以溉田。潦則放閘歸河。以洩水。其離水寥遠之處。每田一頃。掘井一口。十頃。掘大塘一口。亦足供用。其中有侵及民地。並古陂廢堰。為民業已久者。皆計畝均勻撥還。民情自無不踴躍樂從。即將現在之賑民與遞回之流民。停其賑給。按地分段。派令就工。逐日給與工值。酌濟二三人。口糧。寧厚毋減。一人在役。停其家賑糧二口。二人在役。停其家賑糧四口。其餘口與一戶皆不能執役者。仍照例給賑。其疏濬之後。有可耕種者。即借予工本。分年徵還。更請另簡大臣一員。齎帑分巡直隸各府。一如河間。天津二府辦理。雖所費繁多。而實為畿輔興無窮之利。與議賑迥然不同。然而或曰。北土高燥。不宜稻種也。土性沙鹼。水入即滲也。挖掘民地。易起怨聲也。且前明徐貞明行之而立敗。怡賢親王與大學士朱軾之經理。亦垂成而坐廢。

可為明鑒。臣竊以為九土之種異宜。未聞稻非冀州之產。現今玉田豐潤。秔稻油油。且今第為興水利耳。固不必強之為水田也。或疏或濬。則用官資。可稻可禾。聽從民便。此不疑者一也。土性沙礮。不過數處耳。且即使沙礮而多一行水之道。比聽其衝溢者。猶愈於已乎。不疑者二也。若以溝渠為損地。此尤非知農事者。凡力田務盡力而不貴多。今但使十畝之地。損一畝以蓄水。而九畝倍收。與十畝皆薄入孰利。況損地者。又予撥還。不疑者三也。至於前人之屢行屢罷。此亦由徐貞明有幹濟之才。所言亦百世之利。其時御史王之棟叅劾。出於奄人勲戚之意。其疏載在省志。不過言渟沱不可開耳。未嘗言水利不可行也。但其募南人開墾。即以其地予之。又許占籍。是奪北人之田。而又塞其功名之路也。其致人言也必矣。至營田四局。則成績具在。公論難誣。但當日効力差員。不無奉行不善之

處。所以賢王一沒。遂爾廢之。非深識長算者之所出也。凡始事難。成事易。賡續以終之。則是中道而棄之。則非。不疑者四也。今日生齒日繁。民食漸絀。苟舍此不為經理。其餘皆為未節。臣愚以為盡興西北之水田。盡闢東南之禁地。則米價自然平減。閭閻立致豐盈。但其事體至大。請先就直隸為端。俟行之有效。次第舉行。得旨。大學士會同九卿速議具奏。

○是日起

上以夏至祭

地於

方澤齋戒三日。○丙戌。諭軍機大臣等。前據部選藁城縣知縣高崙。呈請自備工本。開採礦廠一事。戶部議令發與喀爾吉善查議。朕思此事於地方甚有關係。必不可行。可寄信前去。即停止。並不必聲張。直隸總督高斌。尋奏前准戶部密行藁城縣知縣高崙。請自備工本。於嶧滕費及淄沂平陰泰安等山。開採銀

銅鉛礦。臣查山左開礦之說。聞明嘉萬間。到處開採。積歲無獲。官民重困。至我朝康熙五十八年。巡撫李樹德奏請開濟寧青登四府礦場。以佐軍需。

聖祖仁皇帝恐其擾民。差部員六人前往試看。無益。即停止。蓋開採礦砂。向惟行於滇粵邊省。若山左中原內地。從未舉行。而沂鎮泰安。山屬岱嶽。費滕嶧縣。地近孔林。更屬不宜。且開鑿之處。官役兵弁。必有不能不擾民之勢。

若致開掘民間廬墓。更易滋怨。況利之所在。易集奸匪。爭鬪之釁必生。更可懼者。去冬彗星所指。僉稱在齊魯之方。今開礦適當其地。是於事則無利而有害。於地方則甚不宜。於輿情則甚不願。若必俟試行無益而後中止。萬一有奉行不妥之處。將為盛德之累。得旨。所奏甚是。朕竟為舒赫德所欺。有旨諭喀爾吉善停止矣。欽差大臣尚書公訥親議奏杭州將軍薩爾哈岱疏稱杭州駐防官兵生

齒日繁。漸至窮乏。稱貸。經前任將軍等於通融例馬案內。請令官養例馬。減養一半。兵丁三匹者養一匹。匠役二匹者三人合養一匹。其空額每匹扣價銀十六兩。存貯具奏。現存銀七萬餘兩。請將此項動支四萬兩。量官兵俸餉。減半支給清欠。即於官兵所領草乾銀內。大建每兩扣留五分。小建三分三釐。二年歸款。一年後。可得一半。請復勻給官兵。年收年放。於生計大有裨益。倘遇應用馬處。既有各官兵例馬三十餘匹。且現存銀三萬餘兩。購買不致缺乏等語。臣查核省城官兵例馬。原備緩急之用。從前俱有空缺。經

世宗憲皇帝特諭。斟酌拴養。其空缺馬匹。照市價扣銀存公。遇有用馬處。購買備用在案。今該將軍所奏。不但於各官兵生計有益。且存馬存銀。兩足購用。其官兵內有未經扣完革退病故者。除將應扣未完之數開除外。餘再補給。亦於本銀四萬之數無傷。惟是新補兵

丁尚未扣完。即經革退病故。此項作何歸還之處。摺內並未聲明。請行知薩爾哈岱等。查明報部。再此銀原為買馬備用。今暫濟官兵一時之急。若竟不歸還收貯。亦不可行。請令該將軍接濟數年。俟兵稍寬裕。即將借款陸續遞減。寬限扣完備用。再查杭州兵丁窮乏已久。雖不能驟令寬裕。而核其每月所得錢糧之外。又有草乾銀兩。今又借給扣存馬價。自可漸至寬裕。仍請飭該將軍嗣後留心訓導。代為籌畫。得旨依議。該部知道。○山東巡撫喀爾吉善奏。濟南武定二府所屬災役相繼。米少價昂。濟武二營所支餉銀糧米不敷食用。請於司庫內借支餉銀一季。自本年冬季為始。分四季扣還。得旨允行。下部知之。○以直隸督標中軍副將羅俊為天津鎮總兵。湖廣施恩協副將張大猷為襄陽鎮總兵。○丁亥。順天府府尹蔣炳奏。天時亢旱。糧價日昂。請於四路同知駐劄處。分設四廠平糶。東

路之通州。西路之盧溝橋。北路之沙河三廠。各發米三千石。南路之黃村六十石。即令該同知就近管理。通州廠交通永道。沙河廠交霸昌道。盧溝橋黃村二廠。派御史一員前往督察稽查。得旨著照所請速行。仍照乾隆二年之例。遣御前侍衛等。即行前往。一同查辦。通州著永興去。沙河著德保去。盧溝橋黃村著馬爾拜去。○戊子夏至祭

地於

方澤

上親詣行禮。○詣暢春園。問

皇太后安。○幸圓明園。○庚寅。遣官祭

關帝廟。○兵部議奏。嗣後在京八旗。及各省

駐防五品以上旗員缺出。如應陞之員。遇有

親喪。一概不准奏請署理。另揀合例人員補

放從之。○辛卯。

上詣暢春園。問

皇太后安。○諭。朕前降旨。將襄鄖道王際。調補

四川松茂道今據巡撫晏斯盛等奏王槩生母年老多病難以入川懇請改補近地等語著仍留襄鄖道任其松茂道員缺緊要著總督慶復巡撫紀山於所屬知府內揀選一員題補○又諭軍機大臣等河間天津等府連年歉收今年近京缺雨之處不止此二府深恐將來民食艱難不得不資藉於外省近聞上下兩江二麥豐收秋成亦大可望朕心欣慰爾等可密寄信與該督撫著上下江兩省

各豫備米麥十數萬石此時不必聲張俟將來直隸需用之時信到即可迅速運送不致臨時匆促○吏部議奏正黃旗滿洲散秩大臣奉義公噶爾薩患病乞休所襲三等公該旗送臣部查核銷減查噶爾薩承襲時經臣部查明削去

恩詔所加之爵祇存侯爵奉

世宗憲皇帝特旨仍給所銷官職授為三等公准其子孫世襲該旗自應遵照定例辦理無

庸復交臣部查核得旨噶爾薩公爵著授為侯爵承襲○戶部議覆江蘇巡撫陳大受條奏捐監交納本色減二收捐一摺內稱江省捐監生俊既奉旨減二收捐倘再年歲屢豐倉儲易足請以原定添貯二百一十一萬一千石之數作為定額并均貯添貯二項統歸常平額所奏事屬可行至該省常平易為均貯名色始於雍正十年今既請仍用常平本名應如所請改正又收捐穀照數減二每石以六錢計算屢增附武青衣其等差一准戶部銀數亦應如所請其給發倉收應照乾隆五年前任太常寺卿朱必堦條奏辦理正實收彙同捐冊按季送部核明填照給發該省其副收先給本生收執俟給照後仍於年底將副收送部查對又收捐原應稻穀而准徐海三屬粟麥價值與糙米相等請米穀粟麥一併收捐應飭各屬一體遵行如粟麥價減即隨時報部酌辦從之○又議覆盛京戶部

侍郎雙喜奏錦州義州現存倉豆一千九十七石零遼陽倉一千七百七十八石零相離海口不遠俱可運京接濟應如所請錦義各屬即速運至海口囤貯俟奉天將軍奏報運豆船隻到日將此項一併運至天津轉運得旨允行○以翰林院侍講學士萬承蒼沈德潛檢討韓彥曾充日講起居注官○引見京察一等內閣侍讀赫泰等三十一員得旨赫泰定長蘇宗阿福興羅慶舟塔哈蘇章阿曹瑛袁銑文綬傳爾勤蘇凌阿西蒙額三保德綬白泰查隆阿朱錦王正功俞大受王愷伯文泰明俊索祿石岷峨倭昇額希朱瑟克圖俱准其一等綽普通石麟著改為二等○壬辰諭曰阿斯海現已年邁人亦糊塗不能辦理都統事務著革去都統在散秩大臣上行走正白旗蒙古都統員缺著烏和圖補授○又諭軍機大臣等直隸河間天津二府連年荒歉此時撫綏安插經理賑務最為緊要聞

得河間府知府徐景曾天津府知府胡文伯二人謹慎有餘而才幹不足恐不能辦理此二府之事廣平府知府吳穀順德府知府五麟辦事之才似較二人為優爾等可寄信與高斌令其酌量可否將四人調換即速定議具奏若徐景曾胡文伯能勝河間天津之任亦據實回奏又昨夜得雨頗大不知河間天津及別府如何可一併速奏來尋奏知河間府徐景曾為人似覺善軟居官不見諳練但其端謹和平可作屬員表率而清勤不怠亦不致有貽誤之事知天津府胡文伯氣度局促本非繁劇之才但為人質樸實心愛民頗有惻悌無華之意天津俗尚浮囂以此表率似亦人地相宜二府連年荒歉現在賑務頗著勤勞得雨之後二員正可駕輕就熟臣愚以為不必調換容臣再加策勵以觀後效至廣平吳穀原熟於吏治但居官過於蒼老若尋常則稱職勝任恐交辦緊要之事轉未能

實力擔當。順德五麟。居官清勤。辦事努力。現在整飭吏治。清查保甲。地方頗有起色。但其人風度平常。未能出衆。臣愚以為似宜仍留順德。俾得殫其所長。吳穀之賢否。臣自信不能知人。可否諭部調令引見。至各屬得雨寸數。謹另摺進呈。得旨。所奏俱悉。吳穀亦無庸引見矣。○又諭大學士等。朕覽那蘇圖摺內。稱閩省兵餉。搭放錢文一案。前經該省司道議詳時。臣與周學健面同商酌。意見相同。批

准照議辦理。旋據周學健移送奏摺前來。與臣前議不符。揆之閩省情形。實屬難行等語。朕詳閱那蘇圖奏。於情事允合。著照所奏行。朕以大公之心。接待臣工。無纖毫之分別。況督撫同在一方。休戚相共。必同方合志。水乳交融。始於國事有益。無日不以此訓勉臣工。而微察那蘇圖。周學健二人。共事以來。不無齟齬。業已諄諄告戒。至再至三矣。今觀閩省搭放錢文一事。周學健與那蘇圖面議如此。

而在朕前陳奏。復如彼。是周學健猜疑未泯。畛域未化也。然那蘇圖不能使周學健猜疑盡泯。畛域盡化。亦必平日誠意未孚。故爾扞格。當返躬自問。未必不有以啟之也。朕前於閩省鹽梟肆行一事。則申飭那蘇圖。今於兵餉搭錢一事。則申飭周學健。悉皆準以事之是非。理之曲直。不但無所偏徇。亦不肯稍為假借。二人皆受朕深恩之人。當仰體朕心。痛改舊習。矢和衷之誼。以副朕之切望。爾等可

詳悉傳諭之。尋據那蘇圖奏謝。當返躬省咎。合意同心。共濟公事。得旨。所奏尚得大臣體。又據周學健奏。覆臣與那蘇圖平日辦事。情意實無絲毫扞格。惟因督臣摺內。將三月初六日。司道議詳。經臣駁回之案。與四月初三日。司道詳請搭放省城四月分餉錢。及撥運臺灣錢文。經臣批准之案。一併牽叙。又未叙明。臣摺奏在前。詳議在後。情節。以致上勞塵念。臣不但並未面議。如此。陳奏復如彼。即督

臣亦並未因此事輒生異議。臣與督臣實無猜疑之未泯。畛域之未化也。得旨。人之性情各有不同。少有齟齬。亦常有之事。朕尚不深怪汝。而此番摺奏。則巧而險矣。不謂汝亦出於此。大非朕平日所望於汝者。○以恭修

天。

地。

日。

月。四壇工竣。議敘承辦大臣三泰等。加級紀錄。

實錄卷一百十六

二十六

有差。○戶部議覆直隸總督高斌疏稱。乾隆五年。派往阿爾台種地兵丁三百名。改為駐防。期滿回營。其起程時所借一年餉銀。共七千二百兩。請寬限扣還。得旨。種地兵丁應扣餉銀。著寬期作十二季扣還。

大清高宗法天隆運至誠先覺體元立極敷文奮武孝慈神聖純皇帝實錄卷之二百十六

實錄卷一百十六

六十六

大清高宗法天隆運至誠先覺體元立極敷文
奮武孝慈神聖純皇帝實錄卷之二百十七

監修總裁官經筵講官太子太傅文淵閣大學士大淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅文華殿大學士人閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣等謹將內大臣戶部尚書張鳳翔滿洲都統軍功紀錄次

尋常紀錄十四次臣等謹將經筵講官太子少保工部尚書紀昶六次臣曹振鏞等奉

敕修

乾隆九年甲子五月癸巳戶部議覆江南河

道總督白鍾山疏稱南河自乾隆元年以來

宿遷等縣陸續報墾地四百五十頃有奇

前因濱河淹涸靡定兼之淮徐一帶連年災

歉尚未報升但已墾灘地若再不勘定科則

適啟豪強爭奪官吏侵漁若即報升則灘地

較腹地課輕納稅無多而完糧則一設遇水

旱勢必一例報災議賑議蠲徒滋紛擾况坍

漲無定今歲報升明年請蠲亦非體制且愚

民無知恐報升後遇坍難於豁免往往畏累

不欲承種者有之莫若將此項灘地酌定額

租另立一冊租銀彙解河庫以為河工之用

歉則減免坍則豁開歲於搶修案內動用報

銷查該河督所稱此項淤出之地是否係民

間舊田水沈近復涸出抑係河灘新漲請勅

下督撫確勘如係新漲之田即照該河督所

奏妥議具題從之○甲午

上詣暢春園問
皇太后安○諭前因畿輔地方自春徂夏雨澤

稀少深恐大田不能佈種民食維艱資藉外

省米糧接濟是以諭令江南總督豫備米麥

以待直隸之信今京師於五月十六日已得

透雨近畿大概相同看來秋成尚屬可望爾

等可寄信與江南督撫所有豫備之米麥可

以減少其數上下兩江各在十萬石內外若

將來直隸不須此米即留貯本省以實倉儲

亦甚有益○戶部議覆署兩江總督尹繼善

等奏稱下江水利河工善後急辦工程請於

下江藩庫動撥地丁銀十六萬兩。捐款銀四萬兩。上江藩庫捐款銀二十萬兩。共四十萬兩。解赴河庫道庫。先行濟用。其不敷銀兩。俟續收捐款內陸續解濟。應如所請。從之。○又議覆江西布政使彭家屏疏稱。江西省兵米係按額兵每年十二個月支數編徵。原未編閏月。向例在七月開徵。未開徵前應支月米。在上年存剩并建曠米內動給。且尚不敷支放。倘遇閏在六月以前。則新糧既不能徵收接濟。而支發又不便後時。若不豫籌。恐致臨事周章。請以裁兵餘米折色改為本色。存倉備用。所請固是。但裁兵餘米准交折色。由來已久。今因兵米不敷。遽議改徵本色。是欲求便於兵。轉致不便於民。應毋庸議。至裁兵餘米折收銀兩。查每年除屯丁行月糧并運通毛竹等項動用外。實存餘銀二萬四五千兩不等。此項原係裁兵所餘。以之採買兵丁閏月不敷米石。事屬可行。從之。○直隸總督高

斌奏順天府文安縣地方上年秋收歉薄。蒙恩借給口糧。共米三千石。現在尚不敷用。應量加二千石。再上年同被偏災之固安及未成災之永清東安香河保定五縣。亢旱日久。應一體借給口糧。保定需米一千石。餘四縣各需米二千石。一例秋後還倉。得旨允行。下部知之。○又奏報五月十六日大雨竟夜。四野霑足。晚穀黍豆俱可播種。得旨覽奏。曷勝欣慰。所稱晚禾尚可有望。不知百姓今皆趁種否。籽種備否。何不詳悉奏聞。以慰朕懷。又今接賑已至五月。所辦米麥已敷用否。六月以後當復作何料理。尚須別有撥濟否耶。一連行明白奏來。尋奏得雨後各屬呈報借給籽種者。絡繹前來。臣即通行各屬。無論災地與否。各該印官赴四鄉細查。凡有未種之地。必詢明情由。或本人出外未歸。或另有別故。務即代為料理。至五月又加普賑一月。所需米石已經齊備。今得透雨。六月初領得一

月賑米。至七月底。即有新穀登場。更不須另為料理。儘可不需隣省撥濟。得旨。覽奏稍慰朕懷。○乙未。

上御勤政殿聽政。○戶部議准。直隸總督高斌疏稱。

泰陵員役俸餉。并供應。

妃衙門。端親王。懷親王。三阿哥。園寢月餉。共銀三千八百二十六兩。例應先期撥給。但員役增減無定。難以豫計。請於乾隆八年地丁項內動撥題銷。多則解還。不敷補給。從之。○

暫署西安將軍。右翼滿洲副都統。奇爾丹奏。涼州將軍。綽爾多來陟。口傳諭旨。現據訥親奏。河南營伍不堪。如此看來。別省營伍。豈必可觀。可曉諭西安副都統。官員等。將官兵等不時訓練。若不認真。或經朕查出不整不熟之處。決不寬貸。臣伏思西安駐防滿兵。世受教養。訓練又臣等職守本務。惟有謹遵諭旨。實力奉行。得旨。不在乎空言一奏。惟在龜勉。

辦理。○以詹事葉一棟為內閣學士兼禮部侍郎。○以編修汪士鋐為四川鄉試正考官。工部主事章大有為副考官。修撰金甡為廣東鄉試正考官。刑部員外郎李本樟為副考官。編修吳嗣富為廣西鄉試正考官。編修羅源漢為副考官。檢討夏之蓉為福建鄉試正考官。翰林院侍讀學士萬承蒼為副考官。編修吳紱為湖南鄉試正考官。刑部主事周承勅為副考官。○引見京察一等吏部郎中富勒赫等三十二員。得旨。富勒赫。何浩。瓜蘭泰。王應綵。增福。薩寧。阿額爾敏。達冲。阿伍鐸。多泰。永貴。麗柱。書隆。安范。廷楷。張之浚。藍欽。奎黃。登賢。名舉。德紳。伍爾卿。額來熙。齡昌。佟保高。文潮。瑚世泰。顧珊。兆清。明善。今柱。滿岱。俱准其一等。文成。伍起。著改為二等。○丙申。諭軍機大臣等。畿輔之地。從前少雨。難以佈種。河間。天津之民。謀食於外者甚多。即保定。順天。亦有之。本身既已他出。其地畝無人耕種。

恐致荒棄。舊年高斌曾借麥種。與在籍居民。令其代為耕種。今應仿照此法。將無人耕種之地。著有司查出。給與籽種。勸令里鄰代為耕種。俟本人回日。秋收之後。算還籽種工價。庶地土不致荒蕪。於百姓之居者行者。俱有裨益。可寄信與高斌。速為辦理。又本年春間。有旨。流民不必資送回籍。以遂其資生之路。今既雨澤霑足。究不若歸而謀食之為是。亦應樹之風聲。凡流民有願回籍耕種者。著地方官即行善為資送。亦不必彊民之所不欲也。并諭山東。河南等省巡撫辦理。○吏部題酌定部曹題補缺額。俾待陞待選人員。不致壅滯。戶部陝西。雲南。山東。福建。四司。每司滿郎中。員外郎。各一員。漢郎中。主事。各一員。江南。廣東。廣西。貴州。四司。每司滿員外郎。主事。各一員。漢員外郎。一員。以上八司。共二十八員。禮部儀制司。漢郎中。員外郎。各一員。滿員外郎。主事。各一員。祠祭司。滿郎中。員外郎。主

事。各一員。漢員外郎。一員。以上二司。共八員。兵部武選司。滿郎中。一員。員外郎。二員。主事。一員。漢郎中。員外郎。各一員。職方司。滿郎中。一員。員外郎。二員。主事。一員。漢員外郎。主事。各一員。以上二司。共十二員。工部營繕司。滿郎中。員外郎。各二員。主事。一員。漢郎中。員外郎。各一員。都水司。滿郎中。一員。員外郎。主事。各二員。漢郎中。員外郎。各一員。以上二司。共十四員。理藩院五司。除滿洲堂主事二缺。蒙古主事三缺。仍照定例遇缺保題外。其餘各司。滿洲郎中。一員。蒙古郎中。二員。滿蒙員外郎。各二員。滿蒙主事。各二員。共十一員。以上各部院。派定額缺。如不敷辦理。仍准該堂官於本部司員內。派委協辦行走。其保題各缺。於截缺以前。行文來部查核。聽該衙門帶領引見補授。倘保題無人。仍歸吏部銓選。從之。○鑲黃旗滿洲都統博爾屯奏。頭等侍衛烏達禪。三等侍衛仲秋。呈稱伊等原在黑龍江

吉林居住。於康熙年間。奉旨移居京城。附於常雲世管佐領內。並非常雲原編佐領時所屬之人。可否援例。改隸旗下人少之公中佐領。仰懇勅部議覆。遵行得旨。從前因伊等著有勞績。故令移居京城。宜皆附於公中佐領。不宜附於世管佐領。此事無庸交部。烏達禪仲秋著即移於公中佐領。此外自尚有未經查出者。交與八旗都統。亦著查明。移於公中佐領。嗣後有似此關東帶來之人。俱照此辦理。

○戊戌戶部議准。陞任廣西巡撫楊錫綬疏稱。前任明江理土督捕同知張允臨。領銀備貯穀一萬石。貯土府舊署後樓。嗣因明江改為州治。將所貯穀歸於寧明州知州經管。所有穀石。自不便仍貯明江。且土府舊署已改為明江同知衙署。亦非可久貯之所。應於州署添建倉廩二座。計十間。估需銀兩。於乾隆八年地丁項內動支。從之。○倉場侍郎覺羅吳拜等奏。漕船幫丁起欠。例不准買餘米。

抵補。今到通鳳陽等幫。起欠者甚多。緣去冬挑濬中河。展限停泊。宿遷河口等處。水勢微弱。添緯加夫。一切用度繁費。且天津河間等處被災。許各船在途糶賣。或致浮多。請今歲起欠之丁。於本幫暨別幫食米內買補。得旨依議。今年照所請行。後不為例。○駐藏副都統索拜奏。據兵部咨稱。郡王頗羅鼐欲令伊唐古忒兵丁。在哈濟爾得卜特爾地方。安設卡座。是欲豫得準噶爾信息。以為保固之計。

應如頗羅鼐所請。令索拜會同駐劄西寧副都統莽古賚。公同商酌。應於何處安置防範。并何時應設應徹之處。定議奏聞。臣隨知會頗羅鼐。續據呈稱。穆魯烏蘇河之前。有哈喇哈達地方。為哈濟爾得卜特爾通衢。準噶爾來藏。必經此路。於此置設卡座。不時瞭望。可無疎虞。然必會同駐劄西寧大臣商議。簿書往返。動需時日。今歲將不及置設。準噶爾賊性狡猾。近由藏還巢。當亟防範。請遣我所信

第巴巴克都率兵十五名於五月間前赴哈喇哈達瞭望賊跡偵探防範俟十月雪降後人不能行時斟量調還臣因設置卡座為地方緊要之事不及會商西寧副都統即令頗羅鼐嚴諭所遣第巴巴克都至哈喇哈達時遣人赴哈濟爾得卜特爾偵探一有賊人消息即時呈報並移文駐劄西寧副都統如彼地於哈喇哈達置設卡座已為合宜即無庸置議倘或更有應置卡座接應之地即行定議奏聞請旨奏入報聞○旌表守正捐軀之河南洛陽縣民韓福妻韓氏○已亥

上詣暢春園問

皇太后安○奉

皇太后御長春仙館○護理廣東巡撫布政使託庸奏龍門協撥穀一萬石請令移駐龍門之廉防同知經管至建倉工料銀除合浦靈山二縣撥運監穀五千石動用原收倉費外其廉州府并欽州撥運五千石既係買貯之

項應在火耗公用項內動支下部議行○又奏粵省各屬孤貧正額四千六百七十四名口照江西省之例日給銀一分遇閏加增小建扣除惟額外孤貧一項在收養院支給口糧通省除韶嘉二府州並無額外孤貧外廣南等九府連羅二州共額外孤貧二千九百一十四名口應請照額內之例日給銀一分歲給銀三兩六錢共需銀一萬四百九十兩四錢自乾隆九年為始在房稅羨銀內動支下部議行○庚子

孝恭仁皇后忌辰遣官祭

景陵○

上奉

皇太后還暢春園○訓督撫勸課州縣實行教養諭為治以安民為本安民以教養為本二者相為表裏而不可偏廢務求實效而不務虛名乃克盡父母斯民之道蓋人君總其成於上而分其任於督撫督撫總其成於上而

分其任於州縣。州縣者。民之司命。而又與民最親者也。身居此官。身履此地。耳聞目擊。切近易知。非地遠情疎。遙為揣度者可比。是則民生之休戚。民俗之醇疵。雞犬桑麻之細。日用飲食之常。良奸之不一。其類勤惰之各異。其情必一一洞悉於中。而後可加之調劑。所謂知州必能知一州之事。知縣必能知一縣之事。顧名思義。循名責實。豈簿書錢穀。無誤期會。遂謂可勝任而愉快耶。朕御極以來。孜孜圖治。訓飭大吏。廣勵羣僚。至再至三。辭繁意複。無非欲措斯民以衽席之安。復斯民以降衷之性。而細察近日有司。究不免奉行故事。罕有能深體朕意。以行實政而收實效者。夫一州一縣之事。既不周知。洞見則官之與民。益相隔而不能相親。欲其視民之疾苦。如家人之困厄。視民之作偽。如子弟之悖淫。救焚拯溺。竭力殫心。不可得矣。州縣所屬地方。雖廣狹不一。事務亦繁簡不同。然一月之中。

豈無齋戒停刑之日。亦有因公下鄉之時。果能乘此餘暇。不辭勞瘁。親履田間。與父老子弟歡然相接。如家人父子。言孝言慈。啟其固有之良。化其惰窳之習。因而詢問疾苦。講求利益。度其原隰。相其流泉。審物土之宜。因閭閻之便。利所當興者舉之。害所當除者去之。則養教兼施。善政莫大乎是。至於身所不能遍及之處。則有約正值月人等。或給之廩餼。或加之獎誘。使之分佈四鄉。代為化導。亦可冀其分任耳目。以助官之不及。務使一州一邑之民。情聯勢合。如父子兄弟之相為扶掖。如頭目手足之相為捍衛。一州一邑如此。他州他邑從而效之。一郡一省如此。他郡他省從而效之。始則艱苦。久則漸近自然。所謂日計不足。月計有餘。古之循吏。獨不可再見於今歟。是在為督撫者。實心以勸課屬吏。為州縣者。實心以愛育羣黎。勉強力行。毋憚勞勩。政成於上。民悅於下。事有必至。理有固然。語

曰至誠而不動者未之有也。為其事而無其功者亦理所無也。用是再頒此旨。通行訓誨。自督撫以至州縣各官。皆當身體力行。以奏治效。毋徒視為具文焉。○諭軍機大臣等。從前畿輔缺雨。內地貧民。出口謀食者甚多。今直隸各處已得透雨。秋田悉可佈種。所有出口民人。不若歸而謀食之。為是著高斌轉飭熱河等處官弁。通行曉諭。若有情願回籍。而力量不能者。即行資送。其在外可以傭工度日。不願回籍者。亦不必強。○戶部議覆。巡視南漕御史王興吾條奏。內稱各省糧船到淮。所有盤驗將弁。應令營衛互用。并於籤盤之日。始行拈閤分撥。則將弁難以作奸。旗丁無由打點。應如所請。著為定例。從之。○以故奉恩將軍克齊子魯賓襲職。○引見京察一等禮部郎中佟琦等三十一員。得旨。佟琦。楊廷為慶柱。永常。永昇。平治。達爾楚清。福德。魁明。倫孟清。奇徹伯。伊泰。朱文灝。託恩。多善。吳雲。

從溫必聯。敏昌。隆光。明福。何昂忠。定福。祿格。格圖肯。福拉禪。佛倫。灝善。四十七。淑寶。伊祿順。俱准其一等。海全著改為二等。○旌表守正捐軀之河南固始縣民趙柱甫妻于氏。守正被戕之廣西宜山縣民韋應海女韋氏。○辛丑。諭軍機大臣等。從來耗費米麥。莫如躡麴一事。朕前已屢降諭旨嚴禁。近聞畿輔地方私燒之弊。猶未盡絕。夫米麥為民食所關。而消耗於無用之地。殊為可惜。況今年直屬麥秋歉薄。尤當加意防維。可寄信與高斌。令其密飭所屬。實力奉行。以敦本計。尋奏。現在加意防維。實力查禁。得旨。覽。實力為之。○又諭。從來耗費米麥。莫如躡麴一事。朕前已降諭旨嚴禁。近聞豫省造麴之弊。猶未盡絕。夫麥為民食所關。而消耗於無益之地。殊為可惜。今歲該省麥收豐稔。尤當加意撙節。以裕蓋藏。可寄信與巡撫碩色。令其密飭所屬。實力奉行。再雅爾圖為巡撫時。曾奏明於秋後。

嚴禁躡麴。今碩色並未陳奏。可一併傳諭碩色。務令留心辦理。毋得疎忽。尋奏歸德、南陽、毗連江楚。麴販奸徒。廣為買麥。臣於四月內。已飭地方官曉諭商牙。凡外來正實商販。買麥數十石者。聽其流通。如數至二三百石者。令其請領原籍地方官印照。以杜躡麴影射之弊。現在麥價平減。此其驗也。得旨。汝既云先已辦理。何不早即奏聞。大約汝謹守自為之念多。急公擔當之意少。可惜汝所閱歷。都為免過自善之謀耳。甚非朕所取也。○戶部議准。貴州總督張廣泗疏。稱黔省錢價漸貴。實緣兵民交易便利。即鄉僻苗保。皆知用錢。請於每年額鑄三十六卯外。加鑄十卯。從之。○禮部議准。江西布政使彭家屏奏。稱今歲春夏二季。并上年冬捐納監生。有願應科舉。而部照未到者。令該州縣官查明。並無違礙等情。出具印結申文。給發本生。親齎實收。赴藩司核實。轉送學臣錄科。從之。○御史錢度

奏貢監考職。向例不論文字優劣。盡行錄取。請敕下考試大臣。擇文理優通者錄取。寧少毋濫。永著為例。得旨。允行。○旌表守正被戕之廣西臨桂縣民梁應朝妻黎氏。○壬寅。上詣暢春園。問

皇太后安。○大學士鄂爾泰等會同九卿議覆。御史柴潮生。請於直隸興修水利事。查北方地勢平行。原有河渠淀泊。水道可尋。如聽其自旱自雨。自盈自涸。淫潦則巨浸為災。炎烈則暵乾是患。有水無利。而獨受其害。柴潮生所奏。誠非鑿空無據之說。惟是欲興水利。必使全省之地形水道。脈絡貫通。以圖經久。決非旦夕所能奏效。若如該御史所奏。遽遣大臣齎帑。前往開濬。即將現在之賑民。派令就工給值。無論待賑之民。緩不濟急。實恐查勘倉猝。勢難妥確周詳。現今直隸河道工程。交督臣兼理。請敕下總督高斌。確查妥議。具題到日再議。得旨。依議。畿輔興水利。乃地方第

一要務。必簡用得人。始能有益無弊。總督高斌。事件繁多。難以專心水利之事。協辦大學士吏部尚書劉於義。曾任直隸總督。及布政使。於合省情形。素所練習。若與高斌悉心籌畫經理。自可成利濟之功。而收永遠之效。此時著劉於義前往保定。會同高斌。詳加計議。酌定規條。將來興修之時。二人同心合力。督率辦理。務期有成。以副朕望。又諭協辦大學士吏部尚書劉於義。前往保定。辦理直隸水利事務。著乘驛前去。嗣後凡有往來查勘之處。俱著乘驛行走。○癸卯。刑部議覆巡察黑龍江員外郎伊祿順條奏。遣犯在途患病。即著解役與該驛筆帖式。呈報就近地方官。詳驗取結報部。一面留養醫治。若取結後身故。相驗有無傷痕。取結報部。若患病並未取結。在途病故者。將該驛筆帖式並解官兵役俱照例議罪。如呈報而該地方官不行留養。以致身故。地方官照例議處。查此例遵行已久。

惟未指明發遣黑龍江人犯耳。今自應照所請行。但關外驛站筆帖式。或不知定例。或地方遼濶。或因郵無餘金。及醫藥為難。間有不留養者。應令該將軍查明辦理。至人犯中途病故。或州縣寫遠。或向未設有件作。關取尚需時日。暴露潰變。相驗為難。反失矜恤罪囚之意。應請嗣後除解至關外。在途患病。已經該驛移會就近地方官。驗明留養。報部後身故者。止將病故緣由。報明遣所存案。免其相驗報部外。若該犯並未報病。而猝然病故者。即令經由地方官。照例審訊。開會。取具解役有無凌虐確供。并相驗填圖報部。仍將不留養之原解官役。及經由地方官。分別議處治罪。其實有不能留養。已經呈報該將軍。及猝然病故者。免其處治。又稱齊齊哈爾將軍衙門。將秋審重犯。在木城北門外設監。圍禁。只草房數間。外立木椿。甚不堅固。其現審人犯。分禁兩處。礙難稽察。應如所奏。另行移造城

內將秋審現審各犯分別內外。一併監禁。從之。○調工部左侍郎張廷瑑為內閣學士。兼禮部侍郎。以正紅旗漢軍副都統趙宏恩為工部右侍郎。○以正白旗漢軍都統德敏署荊州將軍。戶部左侍郎李元亮署正白旗漢軍都統。○引見京察一等刑部郎中胡寶琳等四十員。得旨。胡寶琳。李鍾份。唐紹祖。曹瑜。蔣洲。沈永。有吳。紹詩。黃永年。富郎。阿。常泰。海敏。永常。英泰。拔格。佟海。張萬國。常額。四達。王

炳。李天翼。武陵。保廣。愛傳。爾臣。富德。覺羅威和。圖善。著永安。伊靖。阿。王宗燦。清馥。西紳。書成。石禮嘉。薛成。瑋。珠。覺羅西安。僧保。玉神。保俱准其一等。西敏。成德。著改為二等。○甲辰諭軍機大臣等。直隸二麥被旱。歉收之地方。例應具本題報。雖高斌已經陸續具摺奏聞。朕已降旨料理賑卹。然該督仍應照例題報。為是可即傳諭知之。○又諭據山西學政蘇霖。渤奏稱。籍隸滇南。親母居住本籍。因路遠

不能迎養。今母年已七十有九。現今患病。懇恩俯准給假。俾由晉省遄歸。省視。所有錄送遺才等事。俟接任學臣辦理等語。蘇霖。渤准給假回籍省親。其山西學政員缺。吏部即行開列請旨。○兵部議准。陞任湖廣總督阿爾賽疏稱。漢陽營沙戰船四隻。巡船四隻。荊州城守營巡船三隻。宜昌鎮沙裏戰船三十隻。岳州常德。二水師營沙船二十隻。常德水師營八槳船十二隻。俱請裁。至洞庭協戰船五

十隻內。已議裁之二十隻內。仍留十二隻。以四隻補塘汛。四隻給外委。四隻為存城兵丁操演。所有議裁各船。確估變價報部。從之。○直隸總督高斌。奏。灤州知州李鍾。俾不能體察民情。及時出借口糧。遽赴延慶州交盤。致有刁民羅天才等。乘機糾眾。搶割麥田。強借糧食等事。臣現飛飭嚴拏首犯。按法重究。餘犯量加懲儆。李鍾。俾玩視民瘼。理應報叅得旨。是。不宜姑息。以長刁風。猶憶劉於義。曾

奏李鍾俾勸民開井有效云云。即是人否。畢竟如何。有旨諭部。諭曰。朕聞直隸灤州知州李鍾俾。不勝繁劇之任。著掣回。交與總督高斌。以簡缺另行題補。灤州知州員缺緊要。著盧見曾補授。○乙巳。

上詣暢春園問

皇太后安。○諭上年陳宏謀在江西巡撫任內。辦理截漕運赴湖南一事。今據該撫蔣溥奏。稱此項米色。皆熟黠發變。間有霉爛。蓋因上年奉有截留之旨。江西各屬。或以無庸兌運。續收之時。不免草率。所雇民船。不能堅好。稽察難周。刁奸船戶。潛竊撓水。送至米色不齊。竟有難於變價者。現在嚴查明確。據實題叅等語。漕糧關係正項。徵收本係好米。何得因截運他省。遂至草率不堪。陳宏謀辦理此事。漫不經心。著交部察議。其承辦各員。俟蔣溥查叅到日。交部嚴察議奏。○又諭軍機大臣等。從前因畿輔雨澤稀少。恐民食維艱。是以

令外省豫備米糧接濟。今直屬俱得透雨。秋禾皆已佈種。收成可望。爾等可寄信與蔣溥。將已備米糧存貯該省。無須撥運。○大學士鄂爾泰等議。奏左副都御史勵宗萬條奏。直省災民到境。或棲寺廟。或設席棚。或勸諭殷實之家。隨力周給。或該地方有曠土可耕。工程可作。隨宜處置。務遂其生。所奏悉屬安頓良法。應令奉天。山東。山西。河南。各督撫遵照辦理。又奏。近來資送流民之例。原以保聚流離。但果有業可歸。自能回籍。若無可歸。姑就資送。是途中暫有餬口之資。而歸後轉無可生之路。倘故土豐登。情願復業。官與路引。聽其自歸。毋庸差役押送。查舊例。流民入境。即加意賑撫。春融時。有願回籍者。始行給資護送。並非災黎甫集。即行押回。不容逗遛也。若聞本地得雨。情願復業。聽其自歸。則沿途資斧無出。且押送無人。或致聚衆生事。自應仍照例辦理。至稱興工代賑。甄工利歸。密商。不

若興修土城得以挑築傭工為有益應令直督將河間等處城垣現在興修者速飭辦理外其餘應修者再行估題代賑又稱將來普賑興工所費不貲請於江南限滿停捐之後改於直省收捐現在樂善好施之例雖經減四終覺太多其途亦尚可增益請照雍正五年怡親王等題定營田事例分班銓選查從前直屬被水興舉營田事例至乾隆七年兩淮水患上下兩江又議開樂善好施事例今直屬疊被災傷賑卹工作需帑浩繁該副都御史請照例開捐彌補工賑之費實權宜應行之舉惟是捐納人員急公効力藉為進身之階必須力所能為庶免逡巡觀望江賑例款自減四收捐較原定銀數已屬從減該副都御史以為數尚多其途尚可增益請照營田舊例收捐查營田事例與戶部糧運事例輕重髣髴應將江賑例內除與營田糧運事例相同并多寡不甚懸殊者毋庸更正外其

有較二例過輕過重之條悉照二例酌為增減并將舊例所有江賑所無者酌量添入另定條款照營田糧運之例在戶部收捐至於郎中員外主事知府知州知縣若准一概捐陞恐礙正途今各款既議加增其途已廣應酌定京官自中行評博以下外官自同知以下准捐仍令吏兵二部將各項滿漢文武應增應減之項作何分班銓選之法詳加參酌具奏遵行再兩江捐例已展限一年應至乙丑年十月停止若俟限滿部捐始開未免緩不濟急所有江南捐例仍於限滿停止外戶部即奉旨之日開捐從之○戶部議准綏遠城建威將軍補熙疏稱善岱崑都崙和林格爾清水河托克城五處民人借過籽種及額徵草折銀兩請照綏遠城駐防兵馬米豆折銀之例兼收粟米每倉石折銀一兩五分黑豆八錢五分穀每倉石五錢零作銀交收免其加耗所需腳價亦准照運本色之例於司

庫存公耗羨項內領給。從之。○刑部議奏。署黑龍江將軍布爾沙等疏稱。齊齊哈爾等處水師營內。除三藩人外。俱係發遣人犯子孫。現在額設水手六百八十八名。幫丁一百一十二名內。情願攜骸回籍之水手。二百三十五名。幫丁八十九名。若將伊等不時改換頂補。令其回籍。則新到之人。俱無產業。且不諳修船水戰事務。查該處水手幫丁。共八百十名。情願回籍者。僅二百八十餘人。前臣部辦理各省五次緩決人犯。擬以外遣。并現今陸續發遣者。儘可充足人數。且到配者。既得差使。便可食糧。不必慮其無業。若以新到不諳船務。則該營現有不願回籍四百餘人。可令教習。倘教習需時。差使不便空懸。何難俟頂補有人之日。再令回籍。從之。○旌表守正捐軀之貴州南籠府屬苗民阿腊妻阿各。○丙午。諭軍機大臣等。前因直隸地方缺雨。恐秋禾難以佈種。將來民食艱難。藉外省接濟。曾

寄信與河南。江南。湖北。湖南。四川。督撫。豫備米糧。以待直隸需用之時。即便運用。今直隸已得透雨。秋禾俱已廣種。收成可望。湖南。四川。道路甚遠。朕已降旨。停其撥運矣。爾等可再寄信詢問高斌。令其酌量本地情形。若將來尚需外省之米。伊即就近知會河南。江南。湖北。三省。商酌運送。以備用。如直隸可以不需。即行奏聞。待朕降旨停止。○又諭。朕命尚書公訥親。前往河南等省。原係查驗營伍。並看河道海塘工程。訥親素性謹慎公正。朕所深知。今奉差委。自然臧臧否否。事事據實陳奏。豈因地方官之趨承與否。遂意為軒輊。今聞江南。浙江。河南數省。豫備公館供應。過於華盛。而江浙為尤甚。揣摩逢迎。無所不至。訥親一概却避。並不延留。有司奔走不遑。輒言辦理欽差大差。其餘公事。半皆停閣。甚且有言訥親此行。乃朕將來南巡之意。是以聖祖向曾駐蹕勝概。無不整飾。以待訥親觀覽。

此語更屬荒唐。該督撫等皆朕簡用大臣。如是逢迎。是不但不知訥親之為人。亦並不知朕心矣。為此降旨申飭。俾衆知之。以解其惑。○又諭軍機大臣等。朕聞得訥親奉差在外。江南浙江河南等省供應甚為華盛。訥親一概却避。即隨行官員亦甚安靜。伊素性謹慎。朕所深知。而地方官之糊塗卑鄙若此。朕若不明降諭旨。不但衆人不識是非。徒滋浮議。即於訥親亦甚無益。此朕申飭各督撫之本意也。可將朕旨鈔錄。並諭訥親知之。尋據訥親奏覆。備陳感悚得旨覽。並有謂朕欲南巡者。悠悠之口。亦無足怪也。○大學士鄂爾泰等議奏。川陝總督公慶復奏。郭羅克善後各事宜。○各寨有荒地可墾。而水草可以孳生羊馬。責成土酋。分別勤惰。定其賞罰。○各寨窮番。三百一十九戶。其中有牛籽無資者。酌量借給。○打牲立以限期。歲五六月。許打牲一次。九月至十二月。在本境近地打牲。其打

牲之人。按寨分班。每起多者不得過十名。於駐汛官處。挂號給票。定限回巢。○大兵雖徹。而要口俱應稽查。請歲遣老成千把總帶兵二十名。輪往郭羅克并派兵十五名。於小阿樹中阿壩郎壩鵲個甲凹五處。安設塘遞。以通聲息。再於阜和營派千把一員。帶兵二十名。於上革費達及霍耳甘孜分防巡駐。○越境搶奪。已照盜一賠二立結在案。但黃河沿游牧蒙古亦與毗連。并咨明青海副都統。飭弁至黃河北面。傳集阿里克各部頭目。令郭羅克土目前往會議。定界立誓。不許偷竊。再西寧屬之蒙古城永豹沙及鄰境與郭羅克有婚姻往來者。均令於防弁請票稽查。○番民爭競之事。隨時剖晰。而開墾畜牧。以及有無遠出打牲責成松潘鎮。歲加查察。如土目管束有方。加以獎賞。○上中下三郭羅克事務。請將輸誠悔過擒賊自效之土目丹增甲喀蚌革亞主持辦理。又鄰寨之阿彌壩土

千戶墨丹住老成向上。亦令互相稽察。均給與土職部頒號紙。子孫世守。至各寨外委土目。均有管束之責。亦請給與頂帶。俾知向化之榮。一土目宗族子姪。若有為匪犯法。而土目知情故縱。一體坐罪。均應如所請。從之。○欽差大臣尚書公訥親奏。清口對岸有灘。即向來開挑陶莊引河處。長六百餘丈。寬一二十丈。至四十餘丈不等。此灘原長八百餘丈。寬四十九丈。至一百九十五丈。數年以來。日漸衝刷。視擬挑引河之處。刷却已踰其界。現在溜趨灘根。灘後積土。有臨流者。臣與督河二臣。商將四十餘丈之灘嘴。用挑切之法。助溜。急為刷去。並積土漸坍。則黃河循岸東趨。遠越清口。允合機宜。至運河現在一律深通。惟運口日久抽溜。漸順。進水較多。已與督河二臣。商將運口南壩。添建大墩。圓長十七丈。寬三丈三尺。俾清水至此有滌洄之勢。以收酌劑之益。再臣自清江浦沿黃河南岸。至老

頭隄。由葦蕩各套。抵海口。地名七巨。此處黃河兩岸。自三四百丈。漸寬至五六里。大溜直趨。朝宗暢順。其黃水與潮水相接。並無所謂橫沙尖沙阻截之勢。傳言海口祇寬八十三丈。又言淤塞亟須疏濬。皆妄也。再查水利案內。新開河六道。疏濬舊河五道。俱與原估相符。惟新開之石洋溝河中段。並會入石洋之廖家溝全河。新濬之百汊河。因兩岸沙土虛浮。大雨衝刷。溝槽沙墊。河身自數寸至二尺餘不等。又石洋溝白塔河董家溝秦塘港。俱有潮占蓄。據河臣云。芒稻開外。亦漾江潮。尚無礙於宣洩。所墊浮沙。水過即可隨流衝去。若不過水。轉恐日久雨淋沙積。淤墊漸高。得旨。所奏俱悉。○欽派查辦通州糶廠鑲白旗漢軍都統永興奏。四路同知駐劄處所。設廠平糶。業將通倉所存成色米一萬石。糶賣七千七百餘石。市價漸減。但通州連得透雨。正在佈種之時。必仍須米石接濟。庶市價不致

頓長請仍照府尹蔣炳原奏發給通倉十成米二千石。在通平糶得旨著照所請行。咨部知之。命庶吉士張泰開在尚書房行走。○調四川北鎮總兵邱策普為重慶鎮總兵。重慶鎮總兵韓應魁為川北鎮總兵。○是月江蘇巡撫陳大受奏上元縣七里洲江寧縣銅井地方新漲洲灘原無業主應照例入冊升科。即以所刈蘆薪變價納賦其餘為普濟育嬰廣仁各堂經費。報聞。○浙江巡撫常安奏臣自到浙以來頻年秋審無不竭盡愚忱竊念上司之與屬員雖職有大小均一牧民之責是必集思廣益始無遺義爰於秋審前檄飭巡道各府州縣先期細行核議將各案中應擬情實緩決可矜并有疑似之處開具密單其意見相同者固可即為定案以臻畫一其意見偶殊者亦不妨歧出以俟推求並令嗣後長遠遵行得旨是應如是慎重民命也。○署湖廣總督鄂彌達湖北巡撫晏斯

盛奏報荊門州七寶山地方民家產麟得旨覽汝甚務此外飾朕所不取豐年為瑞汝豈不知耶。○晏斯盛奏近聞畿輔亢旱據湖督鄂彌達以內閣寄字內開楚省二麥豐收豫備米石以待撥用臣查湖北現有截漕十萬石又有川米及買補添貯常平糶三米可足二十萬石已經備妥候撥得旨覽奏俱悉茲京師已蒙

天賜甘霖大不似從前氣象其所備米穀候旨可耳。○湖南巡撫蔣溥奏楚南山澤樹木中有青岡櫟木等樹均可放飼野蠶且桑蠶每歲止獲利於春而山蠶可兼收於秋據道州知州辰州府同知等報稱已於四月間成繭絡絲州民無不懽忻鼓舞併將養蠶收種綠絲始終載為規條一冊臣即刊刷頒發各屬令其照依領種放養奏入報聞。○湖南岳常澧道新授四川按察使倉德具摺謝恩得旨汝因去歲謝濟世一案秉公是以朕嘉悅擢

用。但汝究屬守有餘而猷不足者。當時常勉力學習。若能推此一事。諸凡皆如此。不顧私情。而惟公事是務。斯善矣。○河南巡撫碩色奏。東省濟武二府。被災待賑。前准山東巡撫喀爾吉善札商。可否赴豫採買。查豫省麥石。節經直隸運買。若再益以東省。則市價必至昂貴。且彰衛為豫省瘠薄之區。今歲麥收雖稔。勢不能供官買數十萬石之多。非惟民食有妨。并於官買無益。惟有令祥符等縣將本地抵補倉糧麥石。暫停採買。俟東省委員到日。速為協同料理。得旨。所辦甚妥。嘉悅覽之。朕豈不知豫省甫獲有收。而官買轉致病民。然直東二省。待麥孔亟。實係不得已之舉也。○山東巡撫喀爾吉善奏報。欽差尚書公訥親。由江南不日抵濟。有商辦事件。臣即擬六月初三日赴濟寧一帶。巡查察看。得旨。近聞江浙所辦欽差大差之事。竟成笑話。汝所奏內。復似前轍。是以朕不便諭部。雖云公出。朕

豈能代汝明剖心跡於衆耶。○又奏。德州平原。德平陵縣。德州衛。并海樂陽濱商。需利惠等十三州縣衛。既被秋災。又繼夏旱。待賑情急。現已詳查增入賑冊。但四五月均可無虞。倘再不雨。則災屬倉糧未裕。截漕動用無餘。惟有視得雨之遲早有無。隨時調劑而已。得旨。隨時酌量調劑。甚為得賑恤之宜。然亦不可不存成竹於心。不然。事至而為之。有緩不及期者矣。○又奏。濟武連災兵丁食貴。請照江南直隸之例。於司庫內借支餉銀一季。於本年冬季為始。作四季扣還。得旨。允行。下部知之。○川陝總督公慶復奏。陝省州縣倉糧。例出陳易新。今春民有儲蓄。現在麥蠶豐收。是以糴者寥寥。臣在川時。撫臣陳宏謀札商。恐久貯不能出易。致有霉變。今減價出糴。臣以現在二麥。可望豐收。固應豫籌減易之計。但應俟麥已登場入囤後。於下半年方可酌辦。得旨。老成之見。陳宏謀豈能及此。但知目

前而已。又奏榆林口鄂爾多斯蒙古地方。今春內地佃民初定章程。牛具出口。先因旱熯。佈種為憂。自四月下旬得雨。已獲徧種秋苗。貧民與蒙古彼此相安。業照原議辦理。得旨甚好之事。非卿不辦。覽奏曷勝欣慰。○又奏覆。已故叅革寧夏道阿炳安。在莊浪道任內。侵冒寧夏城工帑項。已據伊弟納英阿認贓二萬餘兩。至彼時督撫。有無染指之處。現據榆葭道王凝稟稱。前奉委承辦莊浪滿城。實用工料銀十萬一百六兩九錢零。較原估題報數目。節省甚多。曾將總冊面稟前撫。元展成。乃元展成竟加呵斥。勒令回任。將餘銀剩料。交阿炳安收領。任憑造冊報銷。苟非袒庇營私。馬肯若此。即查督院奏加匠工食米。盈千累萬。阿叅道恣其侵扣。豈無訪聞。是督撫斷無不勾串染指之理。但阿炳安生前奸詭。實不能知。及至被叅。所侵銀兩。俱已吐交。其是否自交。或係督撫幫交。在當日毫無憑據。

得旨。所奏俱悉。朕亦不欲窮追。但查郎阿之護庇阿炳安。實非為大臣之所應有。阿炳安欠項若清。則已。若有不完。可著落原舉之查郎阿代賠耳。○四川巡撫紀山奏報貴州大定府屬畢節夷民。逃入川省永寧縣。業俱暫為安頓。并移咨黔省招回。及批飭會同黔員。無分疆界。協力辦理。情由。逐一奏明矣。茲准貴州督臣咨開。緣王之臣等。拖欠蘇文王租穀無還。并冀占田為業。倡首商同貓兒。注應賢馬保等。率眾越境。希圖挾制官長。聞現為敘永廳安置所屬乾溪地方。自應委員前往。會該廳嚴審屢次遷徙。逞刀挾制等情。定擬招解等因。臣即飭該廳遵照。毋致滋事。得旨。此等事不可歧分疆界。惟應公平妥辦。以公事為先。斯可矣。

大清高宗法天隆運至誠先覺體元立極敷文
奮武孝慈神聖純皇帝實錄卷之二百十七

高宗實錄卷二一八

三二

大清高宗法天隆運至誠先覺體元立極敷文
奮武孝慈神聖純皇帝實錄卷之二百十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部工部事務

世襲騎都尉軍功加十九級隨帶加二級入加二級臣董誥內大臣戶部尚書鎮藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆九年甲子六月丁未朔戶部議准江蘇

高宗實錄卷二一八

一

巡撫陳大受疏稱蘇省起運漕糧每正耗米
一石徵贈米五升原係給丁之項如遇正糧
截留此項米石毋庸給丁向於漕船搭運赴
通交納今年額徵兵米除坍荒應蠲外所存
不敷一歲兵食請將八年截漕項下減存五
米留充兵糧不必運通從之 欽差大臣尚
書公訥親奏直隸山東荒旱貧民不恤轉徙
他鄉亦出於不得已非盡輕去其鄉也臣愚
以為似應密行該督撫轉飭地方官不必拘

定資送之例。迫令回籍。但勿令聚處滋事。俟應行資送時。仍照定例。資送庶災黎謀生之道。益寬得旨。是早已如是。辦理近因雨澤霑霈。後密行各處。有願回籍耕種者。資送回籍。餘亦不强。又議覆兩淮鹽政準泰奏稱。吉安一府。引鹽原係侍郎永壽行鹽地方。於雍正四年。蒙

特恩賞給。怡賢親王。置辦用度。於雍正八年。欽奉

諭旨。交淮商黃德。辦理計額。引五萬一千五百四引。每引納窩利銀一兩。每年春秋二季。交納運庫。起解王府。續於乾隆四年九月內。經前鹽政三保。請將吉安引窩。改交淮商。程可正。照例辦理。今因該商力乏。求退。議請仿饒州之例。多僉良商。協辦。查此項引地。交納王府。窩利。既交鹽政經理。如商人力乏。或應仍交專商。或另僉商。分辦。鹽政自應隨時酌辦。若必逐一奏明。究與國課不同。嗣後遇商力

實難辦運。應行籌畫更替之處。無庸奏請。奏入報聞。戊申。調江南安慶府知府倫達赴部引見。已酉。諭軍機大臣等。朕聞江南昭陽湖去冬水涸。魚子化為蝻。孽湖內淤泥深。皆尺許。難於捕滅。遂爾成蝗。飛至附近各縣。及山東地方。將為禾稼之害。朕思蝗蝻之患。原可以人力驅除。即淤泥之處。亦當乘其初起。盡力設法捕治。稍有遲緩。便難捕滅矣。可寄信與江南總督。遴委文武員弁。多派人夫。竭力捕治。務淨根株。毋致蔓延滋患。大學士徐本。以病乞解任。得旨。卿才品優長。宣力中外。簡預機務。正資倚任。去冬偶患疾。特遣御醫診視。冀其速痊。今覽奏以病體未愈。求請解任。情辭懇切。著加太子太傅。准其解任。俾得安心調攝。一俟病痊。即行赴闕。以副朕眷注之至意。○庚戌。

上詣暢春園問
皇太后安。○詣

雍和宮行禮。還宮。戶部議准陝西巡撫陳宏謀疏稱。西安省會。為旗標兵丁屯集之所。是以豫為儲備。寧有餘。毋不足。滿漢官兵。計歲需本色米八萬石。今止貯穀十萬石。作米止五萬石。不敷一年之用。應再增米三萬石。在地丁銀內動支。從之。○直隸總督高斌奏。請修理天津府屬之靜海。青縣。南皮。鹽山。慶雲。五縣。河間府屬之東光。交河。吳橋。寧津。故城。五縣。十處城垣。以工代賑。得旨。好。知道了。

山西巡撫阿里衮奏。戶部咨開。劉光晟運辦洋銅。議照范毓麟辦運西安。保定。陸路定價。每百觔價腳銀十四兩之例。詢明該商。自備資本。出洋採辦。俟回時給價。抑或先行量給價腳。於就近藩庫內撥發。臣即傳詢該商。據稱。自備資本。買銅五十萬觔。照例定限一年。運回交局。其價腳銀兩。俟回時具領。奏入。報聞。除山西解州雍正十一年報墾地水衝六十畝。有奇額賦。○辛亥。

上御太和殿視朝。文武陞轉各官謝恩。幸圓明園。○壬子。緩徵長蘆所屬興國。富國。嚴鎮。三場。寧津一縣。乾隆八年被旱。勘不成災。竈課。又興國。富國。嚴鎮。海豐。四場。滄州。南皮。鹽山。慶雲。青縣。五州縣。帶徵乾隆三四兩年五分之一。并緩徵乾隆七年被水。勘不成災。舊欠竈課。○癸丑。諭安徽巡撫范璨著來京候旨。安徽巡撫印務。著兩淮鹽政準泰前往署理。兩淮鹽政印務。著河東鹽政古慶前往署理。河東鹽政印務。著內務府郎中衆神保前往署理。○又諭據四川巡撫紀山奏稱。叅革署新寧縣知縣周昭代。因周公騰控告張公拔搶親一案。長隨龍二。婪贓脫逃。比將周昭代監候待質。查定例。監候待質人犯。已過三年。俱得分別減等保釋。今周昭代監候將及十年。伊父母年老。侍養無人。可否仰懇聖恩。暫行釋回原籍養親等語。著照所請。周昭代准其釋回原籍養親。俟緝獲龍二之日。

另行審明結案○又諭土謝圖汗敦丹多爾濟患病著派醫官一員前往診視○又諭軍機大臣等前經準奏請於四川貯備米石內撥米四萬石運貯揚州鹽義倉以實倉儲朕已允行今思本年江南麥收甚好秋成亦大可望似可毋庸撥運爾等可寄信詢問準奏令其酌量若鹽義倉可以不需此米即行停止若尚需用準奏即行酌定知會川撫可也尋奏兩淮鹽義倉自揚州以及通泰淮等處鹽場共設十倉應貯穀三十二萬七千六百石截至八年歲底共缺額三十萬石有餘即將川米四萬石運回以一米作二穀核算尚屬缺額將來買補已甚不易且江南商民繁庶食米常慮不足一聞採買即有昂價病民之患倘將鹽義倉三十餘萬石之缺額求足於江南近地尤勢有所難至於兩淮所屬鹽場二十有五皆海濱僻遠產糧無幾民竈衆多若商販稍稀即資官米接濟今各場倉

貯既虛惟藉撥給於揚州鹽義倉而揚倉又屬空虛未雨綢繆似不可緩請仍准於四川撥運使一時緩急有資即將來買補亦易奏入報聞○河南巡撫碩色奏節年平糶撥協及動賑運江等項穀石從前未及買補虛懸甚多若令驟行採買恐妨民食應除平糶撥協及上年被災州縣緩買之糶穀乘此新麥登場買抵秋後易穀還倉外所有運江一項及七年分被災賑穀均俟秋成後議買得旨所奏俱悉但此意不可使州縣知之彼皆以倉儲為累若知此必借端延挨倉穀無足額之日矣○駐藏副都統索拜期滿以副都統傳清代之甲寅

上詣暢春園問

皇太后安○諭安徽之鳳潁泗三府州屬連災之後朕屢經降旨將舊欠銀糧分別緩徵俟豐收後起限收納此時二麥登場正宜催輸積欠之候但查壽州等州縣衛從前被災稍

重。實為積困之區。若令新舊銀米同時並徵。小民未免拮据。著將壽州鳳陽阜陽亳州蒙城太和盱眙天長八州縣並附入各州縣之鳳陽鳳中長淮泗州宿州五衛應徵乾隆五年以前未完舊欠銀兩緩俟六七八等年應徵民欠全完之後啟限徵收以紓民力該部即遵諭行。○禮部議奏河南學政右通政林枝春奏豫省標立三教名目立堂設像至五百九十餘處使萬世之師屈居釋道之下舉事不經誣民實甚競施耗產以蔑典常請勅該撫嚴行禁止應如所請并令查明通省書院義學宜於安奉聖像處漸次奉迎安設僧道酌令遷於別寺觀居住其佛老諸像亦即聽其移奉並移知各省一體禁止從之。○卹山東濟南府屬之歷城章邱鄒平齊河齊東濟陽禹城臨邑長清陵縣德州德平平原德州衛并歷城齊河濟陽長清四縣收併濟南衛泰安府屬之肥城平陰并肥城縣收併濟

南衛武定府屬之惠民青城陽信海豐樂陵商河濱州利津霑化蒲臺并商河縣收併濟南衛東昌府屬之博平高唐州恩縣青州府屬之博興高苑樂安等三十二州縣衛被旱災民又沂州府屬之蘭山蒙陰沂水三縣東昌府屬之博平臨清館陶三州縣被雹災民。○引見京察一等御史徐以升等三十五員得旨徐以升王興吾劉芳躅孫灝錢度和書春寶雲舒通阿富申李廷臣阿喇卜坦富森老格善泰法寶車福富德董書穆山策塔爾祿謙西成立柱福德官泰朱士級那海明福蘇勒圖五十九善著鍾秀俱准其一等陳仁伊爾泰瑪常阿著改為二等。○丙辰大學士鄂爾泰等議覆署兩江總督尹繼善奏稱江省商賈不便販運米穀到閩一摺查米石出洋向有例禁近因閩省米價昂貴該撫周學健請暫准江省出口商船帶運給與照票赴閩此亦一時權宜之計不知東南海防利害

攸關開禁之後所恃為稽查者不過印照一端其實帆檣迅駛借運閩之名轉售外洋以博重利印照豈能攔截其間或捏報失風或捏稱沉溺茫茫大海何從究詰又況懷詐小民保無潛引洋面諸國私通偵探亦不可不防至於閩省必須接濟之處業經乾隆四年戶部覆准原任閩督德沛等照依江浙買江廣米石之例如遇歉歲委員於米賤省分購買海運接濟是海運有文武員弁督押稽查非比商販自去自來易於滋弊應如該督尹繼善所奏仍循定例委員採買毋庸招商以弛海禁從之奉天將軍額爾圖奏

永陵副關防官遇有掌關防官缺例不得與揀選實無陞途請照

福陵

昭陵副關防官之例咨送盛京禮部附於五部應揀選官員內一體揀選下部議行○命編修夏廷芝提督山西學政○丁巳戶部議准

山東巡撫喀爾吉善等疏稱齊東等一十八州縣上年被旱蠲免銀兩內所有德州衛并各所椿草等項與現役淺夫工食銀兩無項可支請於八年地丁項內撥補從之○戊午上御勤政殿聽政○詣暢春園問

皇太后安 兵部議准甘肅巡撫黃廷桂奏請西路同知所轄在城塘驛夫馬改歸中衛縣管理從之 工部議覆欽差大臣尚書公訥親奏稱勘視江南海塘寶山縣新築石塘一

千三百丈俱倣松江海塘辦理細加量驗係

用營造匠尺量建較之浙江塘工營造部尺折算有減但查浙江工價多於江省原係照匠尺估計尚無以少報多之弊惟尺式參差易於滋弊應如所奏嗣後凡有工程俱用部頒官尺畫一從之○署兩江總督尹繼善奏請將江省樂善好施之例移於直隸藩庫投收補救災區於民有濟得旨已議行勵宗萬條陳事例況京師亦已得雨矣○以右春坊

石中允董邦達充日講起居注官。○引見京察一等戶科給事中慧中等四十員。得旨。慧中增壽保。傳參。胡定。程盛修。都隆額。吳煒。福喜。銘。余。嘉慶。玉柱。德賢。琚。祿。布。伊。布。廕。阿。晉。文。福。博。周。諾。摩。齊。賽。當。阿。碩。鼎。趙。嘉。穀。鈕。鈕。布。登。廷。寧。永。安。蘇。柏。赫。黃。明。懿。周。煌。蔡。新。官。獻。瑤。周。長。發。周。禮。永。柱。五。喜。薩。穆。哈。索。銘。諱。泰。文。敏。俱。准。其。一。等。福。德。納。左。粵。章。著。改。為。二。等。吳。日。燦。人。平。常。著。改。為。二。等。不。必。以。御

平定三

二

史記名。○已未。旌表守正捐軀之江蘇吳縣民董瑞聲女董氏。河南淮寧縣民杜柱妻王氏。○庚申。大學士鄂爾泰等議覆。欽派查辦通州糶廠鑲白旗漢軍都統永興奏稱。通州設官米局。原因官兵等出賣俸米。官為糶買存貯。以憑減售。而平市價。今通州止設一局。領銀不過六千兩。收買無多。民間增長價值。官米不足。調劑平減。徒有官局之名。而無平價之實。所奏情形。頗為明晰。應如所請。於現

在官局外。在舊城查出官房一所。添設一局。局領銀一萬兩。放米時。先儘官局買足。方准民間收買。官兵等有情願借支者。准於前一月將局米借支。至放米時扣還。倘遇歉收。米貴。則減價平糶。不患不敷。又稱倉場侍郎事繁。添局不能兼顧。請仍照舊例。於八旗大臣內。每翼欽派一員。稽查管理。每月將米局出納銀錢米石數目。咨報戶部。都察院及監查御史。以憑查核。至三年屆期。照例奏銷。局員

平定三

二

仍應更換。亦應如所奏。從之。○福建巡撫周學健奏。汀州府屬武平縣鄧王氏。控告劉祿麟等毆死伊夫。棄屍滅跡一事。雖現據祿麟之弟昌麟供出。鄧美生縊死。祿麟家內將屍拋入溪河。但身屍現無著落。是存亡尚無確據。鄧王氏是否受冤。亦難豫定。而監生王國藩等。倡謀糾眾。闕堂塞署。刁風實不可長。現在緝獲。審擬得旨。生監如是甚屬可惡。向亦有因生監糾眾。而罪及學道者。可引此例。參

奏。又奏清流縣董家嶺村民徐毛、徐進父子濟惡窩藏賊犯，抗納官糧，毆差搶犯，隨密飭汀漳道王廷諍設法招誘，現已投首，并指出賊犯姓名，旋即拏獲。又寧化縣趙家源李姓族大丁強，有李春、李桃等，與隣邑生員柯發蘭有嫌，輒行擒歸，網禁兩月，勒令納銀三百兩，始行放回。該地方文武設法引誘，現亦投首。該府審明，援首請免。臣以兇徒聚眾抗官違法，雖逃匿之罪，自首得免，其本罪仍應嚴擬，得旨甚是。皆以自首而免，玩法者益眾矣。所奏俱悉，仍應不時留心。汀漳積習甚惡，可告之雅爾哈善，令其徐徐化導，亦不可因循玩愒。聽其日甚也。○辛酉，刑部議准本部左侍郎錢陳羣奏：請將弟毆胞兄致死之犯，查明例應承祀者，令該督撫將該犯依律擬以斬決，仍遵例請旨減流，具題。法司亦仍以斬候定擬。俟秋審時另冊進呈。恭候諭旨。倘蒙恩准，其減等發落者，行文該督撫將該犯杖

一百流三千里，查明妻室，一併僉發從之。○巡察盛京御史和其衷奏：奉天將軍額爾圖於

聖駕謁

陵時，不能先事酌辦，以致遺累兵民各款。一、藉辦差為名，於上年八月領餉時，令各旗佐領將奉天兵丁五千餘名，每名應領十二兩，全數坐扣。其各城兵餉亦多坐扣。一、八旗屯莊每壯丁一名，派小數錢一千二百文，添派小數錢一千二百文，仍令十四城城守尉於所屬每壯丁派小數錢一千文，彙齊交送。有上年未能完者，今尚追呼。一、勒派舖戶，每門面一間，自銀一兩至小數錢一千文不等。一、富戶每借銀三五百兩不等，俱係交用事家人介富父子繳進。至各城臣所知者，則蓋州富戶銀一千兩，遼陽富戶銀九百兩，得旨和其衷奏額爾圖情節，著刑部尚書來保、國子監祭酒鄂容安、永驛前往奉天，會同侍郎兆

惠查審定擬具奏。○貴州總督張廣泗議奏署貴州按察使宋厚條奏苗地建城一事。黔省各處城垣。建自明季。迄今塌廢幾盡。甚有向無城垣者。其界在內地郡邑。自應以工代賑。猶可緩圖。惟下游新闢苗疆。除台拱。都江。朗洞。荔波。八弓。松桃等處。俱已建有石城。丹江地勢險峻。雖係土城。亦易防守。均毋庸議。至古州。清江。八寨。三處。雖有土城。然係一時權宜之計。必應建造石城。方為鞏固。又上游新闢苗疆。長壩。捧鮮。俱有石城。其長寨。營盤。歸化。營之威遠。汛皆深處苗穴。並無城垣。可恃。議建亦不可緩。又如黎平。大定。都勻。安順。四府城垣。年久傾頽。平遠。獨山。二州。以及草壩地方。原未建城。雖係內地。而四面環夷。亦應急修。共確估需銀二十四萬六千餘兩。但工費浩繁。若請動撥帑項。則從前經理苗疆軍需。以及修理鎮遠城垣。所費已多。若俟水旱不齊。以工代賑。則又黔省之所罕覩。惟查

黔省辦解京鉛。向係官為收採。轉售京商運局。所獲餘息。留為本省公費。養廉。嗣於雍正十二年停止商辦。令黔省動帑收買。委員解京。除陸運腳價外。每百觔照例給水腳銀三兩。則官運既無餘息。養廉公費。無項補苴。因節據各運員冊報。水腳每百觔只用一兩五六錢不等。節省原定之半。經臣題請以此節省之項。留充公費。養廉。第乾隆八年以前。解鉛止一百七八十萬觔。水腳節省無多。嗣因京局添鑄。自乙丑年為始。歲解黑白鉛四百五十四萬二千餘觔。則節省水腳。較前加倍。歲可餘銀六萬餘兩。除公費。養廉外。尚可餘銀三萬餘兩。請即以此項為修建城垣之用。又黔省兵額。止共二萬三百六十名。迨雍正四年以後。有湖廣。四川。粵西等省。先後改歸黔省之州縣十餘處。其額兵亦隨地改隸。更加以苗疆初定。添設營汛。是以共有四萬三千九百二十名。經臣密奏議裁四千六百名。

現今苗境安帖。又可酌減一千餘名。歲可節省餉。乾月米銀二萬餘兩。城垣既已修整。原不在多設兵丁。況城工需費於一時。較多設兵丁。長年糜餉。似於錢糧有益。得旨所奏甚屬妥協。分案具題可也。

大清高宗法天隆運至誠先覺體元立極敷文奮武孝慈神聖純皇帝實錄卷之二百十八

大清高宗法天隆運至誠先覺體元立極敷文奮武孝慈神聖純皇帝實錄卷之二百十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹秉燾等奉

教修

乾隆九年甲子六月壬戌

上詣暢春園問

皇太后安○補行乾隆七年分軍政卓異官江南二員江西二員不謹官江南一員罷軟官江南一員年老官江南二員江西一員有疾官江南二員河南一員才力不及官江南二員江西二員分別陞賞處分如例○緩徵臺灣鳳山諸羅三縣八年分被旱勘不成災額賦○癸亥戶部議准四川巡撫紀山疏稱雲陽萬縣捷為南部綿州五州縣增水陸鹽引

八百三道。自乾隆九年為始。按年徵收。從之。
○引見京察一等起居注主事查史等四十
九員。得旨。查史七十六。王統。特七。陸學泌。誠
和。英山。常祿。諾穆。渾書。章阿。圖克善。瓦爾達。
佟倫。嘉祥。書昌。色楞。七十四。黃施。錫。珠爾圖。
德爾得克。錫鼎。陳憲祖。呂煒。蒼霖。王圖。炯明。
德保。傅爾敦。明安圖。毛嘉梓。祝喬齡。傅明。明
德。通州。陳世銓。常亮。博和。恒光。常福。復諸。禮。
廣福。朱璉。俱准其一等大棒。瑪爾岱。何圖卿。
德保。巴爾善。齊克昌。永保。蘇爾德。俱著改為
二等。○甲子。刑部議覆侍郎錢陳羣奏。稱。官
吏犯笞杖輕罪。應的決者。宜量予納贖。查官
員有犯革職。問擬非奸贓等項。俱照有力圖
內數目納贖。是官員不但笞杖輕罪。即流徒
雜犯死罪。俱准納贖之例。但律稱官員因枉
法不枉法事受財者。計贓科斷除名的決。若
律稱准者。與實犯有間。故准枉法准不枉法
等贓。在律既不除名。即流犯亦俱納贖。自無

的決之事。因續增例內有貪贓官役。不准納
贖之文。未將律意申明。於是一概的決。嗣後
准枉法准不枉法論等贓。應納贖者。可否照
原律准予納贖。得旨。准枉法准不枉法之處。
仍照現行舊例行。餘依議。○以內閣學士王
會汾為浙江鄉試正考官。編修官獻瑤為副
考官。內閣學士張廷琰為江西鄉試正考官。
編修蔡新為副考官。翰林院侍讀學士沈德
潛為湖北鄉試正考官。戶部郎中西成為副
考官。○乙丑。諭朕前聞江南昭陽湖。去冬水
涸。魚子化為蝻。孽遂爾成蝗。飛至山東地方。
將為禾稼之害。近又聞河南永城縣有飛蝗。
從江南蕭縣飛入境內。夏邑縣有飛蝗。自江
南宿州。由該縣之韓家道口集地方飛過。夫
蝗蝻之患。原可以人力驅除。總當乘其初起。
盡心設法捕治。若稍遲緩。便難捕滅。今江南
之蝗。至將貽害隣省。則江南督撫辦理此事。
不能盡心。可知著飭行。仍令速行查明飛蝗

起自何處將從前捕蝗不力之各該地方官逐一指叅示儆○以工部右侍郎趙宏恩兼總管內務府大臣○丙寅

上詣暢春園問

皇太后安○豁免江蘇山陽阜寧清河桃源安東淮安大河等七縣衛七年分被災蠲餘銀四千二百十兩米麥豆一萬五千四百九十石有奇○丁卯

上御勤政殿聽政○直隸總督高斌奏順天學

政趙大鯨原奏內稱請於直隸藩庫撥銀一千兩移交江西撫藩刷印

聖祖仁皇帝御纂四經性理交直隸藩司收貯學臣帶往出考之處分發生童購買所收書價學臣交還藩庫歸款所奏事屬應行臣即咨商江西撫臣塞楞額去後茲據覆稱直隸經書紙貴士子艱於購買於江省司庫內酌動銀一千兩先行刷就附糧船交收帶銀回江還項查銀一千兩每部一兩七錢七分合

經書性理五種為一部計算可得每種書各五百六十四部得旨嘉獎○以少詹事張鵬翀為詹事○己巳遣官祭

火神廟○江西道監察御史衛廷璞奏臣見兩廣總督馬爾泰等議覆布政使託庸奏請粵東開礦一摺查明廣州等府報出銅鉛及夾雜金銀砂等礦共二百餘處又稱山場在叢山疊嶂人跡罕到之區現在招商試採等語夫以二百餘處之山場一時並採臣竊以為未盡善也蓋開採必視乎商力粵東僻處天末土著之殷富者通省不過數家至外來流寓如洋行鹽行雖有數千家而殷富者亦不過數家餘皆那移補苴虛張聲勢非如兩淮山右之擁巨貲者雖經小虧折而無損也更有一種無藉之徒典賣現在之產希圖未然之益合什伯小分為一大股官驗則有銀興工則有銀一或失利坑陷多人蕩產破家勢所必有請飭下督撫將各府州屬礦山各

擇一二處先行試採。果有成效。方漸次舉行。是有利則異時之利甚長。無益則目前之害尚小也。且粵東山海交錯。形勢異於他省。米價亦復騰貴。雖據稱以本地之土人。應本地之力作。米價似不致貴。然現在山場二百餘處。將來續開者。又不知數十百處。安得如許無業之人。以供其用。其附近隣省者。勢必潛入山場。商方藉其力。誰肯驅之使去。則米價未必不因此致貴也。誠莫如先行試採數處。徐觀後效。使各礦聚集之人。亦可以少分其勢。奏入。諭軍機大臣等。此摺抄錄寄與馬爾泰。策楞。令其議奏。○辛未。

上詣暢春園。問。

皇太后安。○諭湖南巡撫蔣溥奏稱。鹽驛道謝濟世。以該道養廉不敷公用。會同布政使長柱詳請。於司庫內再支養廉銀一千二百兩。合計公費共五千兩。庶辦公不致拮据。謝濟世又稱。去年被叅之後。此地紳士。頗有為濟

世鳴冤者。因此往來熟識。今復補授道員。凡受理詞狀之處。若從公決斷。則理短之人。必多怨謗。此輩甚屬可懼。懇求代奏。調補廣東。臣訪得紳士等實多與謝濟世往來。并有拜為門生者。且捏造私書。謬附輿論。種種誕幻。任意褒議。臣已嚴行禁毀。不敢奏陳。謝濟世年已老邁。每常託疾在署。復自稱與紳士情熟。礙難辦事。即其不能表率僚屬。可知合併奏聞等語。謝濟世係獲罪發遣之員。朕特赦回。用為湖南監司。昨在湖南任內。誤被許容叅劾。經朕降旨開復。仍用為湖南驛鹽道。乃伊不知感激朕恩。乖張狂妄。且欲徇紳士之私情。而忘國家之公義。又復自請調補廣東。尤無忌憚之甚。非人臣之體。況伊現得養廉較之他處道員。已加倍豐厚。而伊不知止足。更請加增。甚屬無恥。蔣溥既奏其老邁有疾。著勒令休致回籍。○大學士鄂爾泰等議奏。綏遠城建威將軍補熙等。奏覆烏喇特與土

默特爭地一摺。據稱烏喇特東界烏達蘇勒哲哈朗貴三處山地。在土默特北界內。自應斷歸土默特。但烏喇特四佐領下人。自順治九年移居以來。九十餘年。已立墳塋牧廠。數百戶一時遷徙。未免失業。應將此三地仍歸烏喇特。至烏喇特屢次控索寶圖村。灝來等地。既在土默特界內。應并歸土默特。其大青山北察罕齊勞地。雖在烏喇特游牧南。然須均勻分給。始靖爭端。應將西北者劃歸烏喇

特。東南者劃歸土默特。至稱前經奏准土默特貧戶承種地六十三頃。今雖在烏喇特所得地界內。但現據四子部落王拉布坦多爾濟等。皆愿出具甘結。仍與該貧戶耕種。并已會同該扎薩克定議。各邊界立有鄂博。嗣後如有越界耕牧者。查出時報部治罪。均應如所請。得旨允行。○戶部議覆直隸總督高斌酌議。直屬常平。比照江南減二收捐事例。一倉穀均貯案內。議定大治一萬八千石。至二

萬五千石不等。中治一萬二千石。至一萬四千石不等。小治三千石。至一萬石不等。又於捐監事宜案內。議定大治四萬石。中治三萬石。小治二萬石。是原定均貯之數太少。若於均貯之外。再加捐監穀石。則又太多。恐將來足額無期。應如所議。令將各州縣均貯定額。大治四萬石。中治三萬石。小治二萬石。即將此次捐穀補足。其各屬應行捐補。并平糶撥賑。未經買補者。均於乙丑年為始。概以捐穀補足。毋庸採買補足。即行停止。一從前捐監事例。原定納穀之數。今宜酌為變通。但總不出通省減二之例。順天。保定。正定。順德。天津。河間。六府。冀。趙。深。定。易。五州。或係地土沙礫。濱河倚海。或係地多旗園。產穀無多。約計穀價每石七錢五分。請將俊秀一名。捐穀一百四十五石。永平。宣化。廣平。大名。四府。遵化。一州。或積貯豐盈。或地土膏腴。穀價平減。每石約計六錢五分。請將俊秀一名。捐穀一百七

十五石。其廩增附武青衣之數。照例遞減。俱准作監生。應如所議辦理。一。原議捐監案內。米麥兼收。秋後易穀存倉。但米麥不能久貯。應如所請。專收粟穀。一。建立倉廩。請動贏餘。并正項銀兩。查臣部原議。每穀一石。收銀四分。已足敷用。應仍照原議辦理。一。八旗聚處京城。因並無存貯穀石。是以令在部報捐。收納銀兩。應照原議辦理。毋庸再議。至旗人近京五百里以內。情愿報捐者。應照乾隆三年捐監案內。准在現住有產業地方報捐。其願赴部納折色者。聽一。收捐本色數目。自應豫為曉諭。願捐者親赴本州縣。具呈交倉地方官用印烙倉斛。平面響攬。當堂填給實收。該管道府廳州。不時稽察盤查。虛冒那移虧空。棍徒包攬吏胥勒捐。斗級踢斛淋尖。概行參處。通同徇隱者。一併題參。一。每石收耗三升。俱照乾隆三年收捐原議行從之。○又議覆雲南總督張允隨疏稱。臨安等六十三屬。并

雲南等十四府廳州縣。試抽一年商牲稅餘銀。共二萬七千九百九十五兩零。遇閏加銀二千二百七十七兩五錢零。應如所題。著為定例。從之。○又議准。張允隨疏稱。潞江府通判未建衙署。賃居寺觀民房。查有原任湖南巡撫李發甲。入官房屋一所。請以改建通判衙署。從之。○江南道監察御史歐堪善奏。臣見兩廣總督馬爾泰等。議覆前任藩司託庸奏請粵東開礦一摺。凡開採條項。以及防範事宜。臚列詳明。似屬可行。顧臣生長粵東。知此事斷不可行。粵省環山距海。黎瑤雜處。數十年來。安堵皆由勤耕力穡。民有常業。故雖有宵小。無由起釁。若深山巨谷。大興廠役。商人獲利。尚難相安。倘各商虧本。工丁良頑。不齊人眾。難散。或乘此暗通海寇。勾引黎瑤。騷擾百姓。防範難周。且承商既多。或因山場隴口。爭訟鬭毆。器凌莫紀。至於開礦之處。雖云無礙田舍。而其中或經胥役捏報。有司查訪

難周。以致被累居民。爭競肆起。亦未可知。此未然之情形。不可不慮。至託庸奏稱。以本地之土人。應本地之力作。不致人多糧貴。竊思粵省田畝雖少。而山河海濱。種植雜糧蔬果。皆可為餬口之資。是以頻年米貴。小民得勤本計。藉以謀生。今大興力役。愚民貪圖傭值。較耕作稍優。勢必拋荒本業。賈誼云。一人耕之。十人聚而食之。欲天下無飢。不可得也。至稱潮。韶。肇。等府。礦山不下數百處。則所需工

丁。不下數十萬人矣。夫此數十萬人者。平日皆勤耕力種。非盡游手好閒者也。開礦多此數十萬工丁。則南畝少此數十萬農夫。以數十萬之衆。日勤本計。尚恐民食艱難。乃盡驅之工役。欲米糧不貴。豈可得乎。雍正十三年。廣東總督鄂彌達。巡撫楊永斌。奏請開礦。九卿議覆准行。

世宗憲皇帝以有妨本務。特諭停止。夫當日年穀順成。尚慮開採累民。況邇來米價騰踴。去

歲截漕十萬石。運粵接濟。米價每石尚至二三兩不等。今歲元氣未復。復使營營工作。致荒本計。其何以堪。伏乞乾斷。飭令停止。奏入。諭軍機大臣等。歐堪善奏。摺可抄寄與廣東督撫馬爾泰。策楞悉心定議。務期妥協。無弊。不可拘執前見。○準噶爾部人扎卜多爾濟。幹克濟爾哈朗等來降。命賞給安插如例。○壬申。工部議准直隸總督高斌疏稱。南運河淺夫。改設河兵。及子牙河新設役夫。應需俸

餉等項。原定於天津。靜海。青縣。滄州。南皮。交河。東光。吳橋。景州。故城。清河。十一州縣地糧內支放。緣該州縣上年被災。難以徵解。請於司庫節年地糧銀內改撥從之。○癸酉。戶部議覆浙江巡撫常安疏稱。浙省錢價甚昂。滇省新礦甚旺。請勅部行文滇省。准令浙省購銅六十萬觔。以裕鼓鑄。應如所請。從之。○甲戌。工部議覆山東布政使喬學尹奏稱。東省產硝之區。實止德州。東平。聊城。博興。荷澤。五

處其餘概不產硝。祇因辦硝之款。列於地丁項下。從前通省州縣。派定數目。俱令採買。以致不產硝之州縣。俱差役遠赴出產地方購買。又復運至省城交收。有遠隔七八百里。及千餘里者。州縣養廉有限。力不能賠。保無暗中轉派里民之弊。請照直省採辦香勛顏料之例。委員赴產硝處採買。如法煎熬馬牙足色。解省驗明。即令採買之員。運交工部。應如所請。其不產硝之州縣。概免勻派。再直隸河南事同一例。亦應各按產硝地方。委員就近採買。無致派累。從之。○乙亥。

上詣暢春園。問

皇太后安。○直隸總督高斌議奏。喀布齊路六道河界內。居住民人。已經五十餘年。蒙古耕種地畝。即藉其力資生。至

聖駕行幸圍場。一應橋道營盤地面。俱係該處民人出力。蒙古不能辦理。今議遷移之喀布齊路。局勢窄隘。無地可耕。若令回鄉。無可託

足。難免飢寒失所。請仍准其照舊居住。惟禁再行開墾。得旨。且不必遷移。但嚴其向內再墾。若有向內再墾者。必如前議遷移。該管官亦有罪。將此諭彼處知之。○是月。江蘇巡撫陳大受奏報寶山縣六月二十日。颶風大作。海潮湧出塘面數尺。塘工有損傷處。現在飭蘇松道。作速勘明搶修。得旨。田廬無恙否。查明速奏。○江南河道總督白鍾山奏。江南河標四營。中營駐劄清江浦。左營駐劄徐州。右營駐劄宿遷縣之白洋河鎮。蕭營駐劄蕭縣。額設馬步戰守兵丁。除各官養廉空糧外。實共二千三百四十餘名。請倣照河南之例。建設營倉。貯糧借放。查道庫內現有各廳扣留飯食公費一項。除解部外。俱有餘剩。原屬閒款。現存銀二萬七百六十七兩零。即以此項動支六千兩。乘此二麥豐收。市價平減時。在附近沿河。糴買麥石。各處收貯。遇糧貴時。借給各營。秋後還倉。得旨嘉獎。○浙江布政

使潘思渠奏報春收分數。及田禾雨水情形。所有八年分地丁各項銀糧。俱報全完。得旨。所奏俱悉。克盡爾甸宣責任。固不徒以催科為盡職也。○福建巡撫周學健奏。民間積貯。固不可繩以官法。未始不可加以獎勵。請令州縣於豐收後。令城鄉力農殷民。及有田富戶。將收穫米穀。除本家食用外。餘粟自百石以上。至數千萬石。使本家同保鄰。呈明積儲數目。其中或願貯備本鄉需用時出糶。或願俟別府州縣需米時運往發糶。於具呈時。詢明存貯實數。勞以酒醴。呈明後。除本家或有急用。仍聽隨時糶賣。報明銷除外。該州縣於歲底將各戶呈報實數。造冊通報。俟次年青黃不接時。聽本家呈明。或在本鄉。或往他處。其糶價或照市值。或量為平減。均聽自行呈明。不必官為限定。但不得增長市價。糶畢。查明實數。做照社倉之法。分別獎勵。能減價平糶一百石。至三百石以上者。給以花紅扁額。

能至三千石以上者。給以八品頂帶榮身。得旨。有司虛應故事。固不可。但亦須聽民之便。不必繩之以法也。至官吏之勸懲。尤應慎重。妥為之。○又奏報嚴飭所屬緝拏械鬥糾會各案。得旨。疎懈者不可不整飭。亦不可欲速以滋事。酌中為之。○署福建按察使王廷諍奏。近日泉漳三府。似畧有轉移之機。而汀邵延建等府。薄俗難馴。尚須整飭。得旨。此係朕注意之處。新用之道。亦係出衆之員。到彼便知。然汝仍當加之意可也。○山西巡撫阿里衮奏。通省百餘州縣。或緣事叅革。以及陞遷降調。老病告休。遇有缺出。委任乏員。甚為周章。請勅部照乾隆七年之例。將應用州縣人員內。揀發十員。得旨。此事久不行。不可因汝而壞此例。所奏知道了。俟引見時。酌量陸續發往數員可也。○河東鹽政吉慶奏。報麥收得雨情形。得旨。欣慰覽之。今用汝為兩淮鹽政矣。此非河東之比。當勉力為之。準泰所辦。

甚妥。一一效彼為之。而不用自己聰明。則善矣。○川陝總督公慶復奏。請以河州協副將王能愛。更換駐防哈密。即將前副將瑚寶撤回。得旨。瑚寶尚應多留一二年為是。若未起身。可即令其在彼指示王能愛。協辦半年。於冬底再回內地可也。○又奏報。秋禾得雨。情形得旨。覽奏俱悉。目今雖晴雨應時。而朕之懷。必至秋成後方得稍釋。且不僅直隸一省。即汝陝省雨晴。豈不厯朕寤寐之懷耶。○又奏。本年舉行大計。所出員缺。需員署理。請於曾任知縣。現在候補人員內。揀發六員。得旨。各省皆請揀發人員。亦殊非善事。但員缺待人。此又各省之苦衷也。所奏俱悉。待朕酌量命往。但不可為例耳。○甘肅巡撫黃廷桂奏。報前往噶斯搭連戈壁。瘞埋故兵骨殖。得旨。好知道了。○又奏報。甘省五月下旬。各屬望雨情形。得旨。所奏俱悉。若有成災之象。一切先事綢繆。不可不詳妥速為。甘省離京甚遠。

救災之事。不可待摺奏也。○又奏報。各屬被雹情形。得旨。所奏俱悉。雖云偏災。其被災之處。則無論偏全之分也。惟應加意撫恤之。○四川巡撫紀山奏報。各屬得雨。裁秧情形。得旨。覽奏。曷勝欣慰。川省連年有收。朕所深慰。但盈虛消息之理。不可不豫防。一切詳審為之。○又奏報。成都府屬灌縣之都江堰。乃成都華陽崇慶等州縣。藉以溉田之區。自都江堰一帶。迤邐東流。至郡城南北二大河內。有支流。從省城之西洞門入於玉河。由東洞門而出。仍歸大河。不意六月十八日。大雨連日。山水陡發。都江堰暴漲。郡城南北兩大河。不能容納。以致郡城居民。附近河干者。多有溺斃。房屋衝坍。并及貢院墻垣。號舍。秋禾亦有被淹之處。現在動項撫恤。開倉平糶。併估計興修貢院。城內滿漢兵丁。亦一體酌恤。得旨。消息盈虛之理。必不可忽。朕批示之。摺想尚未到。而即有此事。然暴漲為害尚小。川省連

歲有收。尚易辦理。惟應實力賑恤。毋濫毋遺。則小民得所。且可弭滿盈之咎。朕轉用稍慰矣。○四川提督鄭文煥奏報。泰寧協屬護理巴底安撫司喇嘛納旺。住巴旺地方。其叔土舍汪扎。住巴底。納旺係大金川之壻。而汪扎係革布什咱之甥。今年巴旺民多災疫。大金川遣發人夫運送各物。將為其壻賞賚百姓。汪扎慮金川乘機占奪。遂調兵堵禦。納旺又疑汪扎要截餽餉。亦派人抵敵。並告金川借兵。革布什咱聞之。恐不利於其甥。即帶兵來援。汪扎互相爭殺。臣於五月初四日。據報飛檄泰寧威茂兩協。速飭解散。分割去後。乃金革二酋。挾有積憤。不聽解釋。緣乾隆二年內。大金川故酋色勒奔。霸占革布什咱丹津羅爾布。蓋古交地方。久經斷令退還。迄今未交。丹津羅爾布。遂藉此番舉兵。乘隙報復。始則各袒其親。繼則別懷異見。相持穴門。竟不由納旺。汪扎主持。恣意攻圍。是金革二酋私怨。

相尋。徒令巴底巴旺人民。困於鋒鏑也。臣與撫臣紀山。會飭強幹文武員弁。分往川西川南。務令查明起釁根由。一併分晰公平剖結。飭令罷兵回巢。得旨。知道了。妥協為之。不可存省事之心也。一併告紀山知之。○兩廣總督馬爾泰奏。請興建提標。及左右兩鎮所轄協營。在通衢之塘房墩樓。四百餘所。共需銀二萬餘兩。即以官商冬埠餘鹽羨銀充用。得旨。著照所請辦理。署廣西巡撫託庸奏。廣西布政使唐綏祖。動用封貯庫項。並不詳請題明。擅將二萬五千餘兩。令太平南寧梧州鬱林四府州屬買穀。又接受那墊銀六千八百餘兩。本任內亦有那墊未清銀五萬餘兩。是侵是那。或私動生息影射。均未可定。又賓州知州阮維璋。前任布政司經歷時。唐綏祖任為腹心。委管恭城縣回頭山銅廠。以商民欠積之私銅。不得出關。巧立首賣名色。俱令賣與廠員轉賣。每百觔解繳充公羨餘銀。

一兩。是以阮維璋每百觔私得盈餘銀二三
四兩不等。管厰一年私賣銅四十餘萬觔。婪
賊一萬餘兩。唐綏祖凡有喜慶之事。阮維璋
俱有厚餽。有打造金器銀匠為證。又河池州
南丹銀錫厰。唐綏祖並不照例另行委員。即
委該州知州朱紅兼管。以致恣意舞弊。每年
抽收課銀五千餘兩。每兩於庫戥外加收二
錢六分。又將商人紋銀概作九三折算。填入
印簿。計每兩浮收銀八九分一錢不等。又南

平定金三十一

三

丹厰留餘并實甚多。各商不時試採納課。朱
紅將試採課銀盡行肥己。唐綏祖亦難免通
同情弊。得旨此人實係一聰明小有才情之
人。不謂其操守敢於不謹也。即其摺奏收買
銅觔一事。朕已不能無疑。部議亦不准。仍令
督撫查辦。此一節汝亦應留心。○又秦南寧
太平鎮安三府屬緊接交夷。原設三關。首隘
經原任撫臣金鉷題定。平而水口二關許商
民出入。鎮南一關為該國經由貢道。其餘百

隘悉行封禁。惟三關百隘之間皆有小徑。瘴
深霧毒。人跡罕到。而土苗生長彼地。慣於越
山踰嶺。巡查偶疎。奸徒即已偷越。數年來安
南內訌時經前署督臣策楞奏請嚴禁。漢奸
出入不許商販到夷交易。逗遛番地私娶番
婦。及臣抵任後。檢閱案牘。見司道從前會詳
各隘用甄木堵塞。設立卡房。多撥兵勇。并於
沿邊村寨編立保甲。嗣又請將太平府明江
同知所管之由村一隘開放出入。以便商民。

平定金三十一

三

又據會稟。沿邊一帶萬山矗立。袤長千有餘
里。在在可攀。藤附葛而過。實難堵塞。似此前
後詳稟互異。漫無定見。臣復留心體訪。緣由
村隘距寧明州一百一十里。寧明商販願從
出入。蓋因由村隘係通交趾祿平文淵驅驢
等處。為貨物聚集之所。若從平而水口兩關
出入。必須繞道數百里。計程十餘日。不如徑
從由隘出口之便。雖經封禁。踰越終不能免。
且明江五十三寨土民。原係思明土府管轄。

因恃頑藐法。土府黃觀珠不能管束。分土歸流。於雍正十年歸併寧明州管轄。此等土民。全賴挑販營生。若將由村隘封禁。恐失業者聚而為匪。必百計包貨偷越。轉於邊防無益。又訪得交趾濱海產鹽最多。且無私鹽之禁。聽夷人自曬自賣。販賣者納官錢二十文。即儘力挑運。及挑回內地。每觔可得銀一二分。至五六分。交趾萬寧州與內地南寧府地方。只隔土名十萬山。沿邊之民。貪利赴販。遇兵役。即恃衆相拒。現在飛飭司道設法禁止。并使商民均便。不致滋事。得旨。如此留心。據實陳奏。實可嘉悅。仍應悉心妥辦。以期順民情而革宿弊。酌中為之可也。○又奏。匪犯李捷。三。廖士美。李尚彩。胡啓昌等十餘名。均係作逆在逃。地方官平日怠忽。乃疑李捷三並無其人。不過李梅虛誇相貌奇異。以惑愚衆。即或有其人。此時自必遠颺。迨北流縣地方拏獲李梅之後。訊其行止。數年以來。俱在潯南。

實錄卷三十一

三

思太。鬱林等處。地方文武。漫無覺察。以此推之。則今日之李捷三等。與從前未獲李梅之時。實無異同。豈可謂並無其人。現在密飭臬司。檄諭各屬。懸賞務獲。得旨。甚是。見上。緊緝。拏務獲可也。○雲南總督張允隨奏報。金沙江下游。原勘應開修者。六十四灘。除鎖山一灘。已於乾隆七年春間試修時完竣。並苦竹。乾溪。二灘。尚未興修外。自乾隆八年十一月開工。至九年四月止。共開修過六十一灘。內異石。大霧基。大錫圈。大貓。大漢槽等最險五處工程。開至五分。柯虎口。象鼻頭灘。象鼻二灘。沙河。黑鐵關。大楔子。大虎跳。小虎跳。溜樟。特衣。冬瓜。木孔。四崖。三腔。新開等十五險灘。開至六分。上石板。黃草。乾田壩。金鎖關。焦石崖。小楔子。中石板。米貼。梨園。窩洛。鼓漬。烏鴉。小霧基。水崖。大獅子口。小獅子口。硝廠。硫磺。三堆石。磨盤石。那此渡。平亭子。豆沙溪。貴擔子。猪肚。石門坎。小錫圈。長崖。坊溝。洞子。檜

實錄卷三十一

三

溪。四方石。羊角囊核。擺定。小漢槽。大芭蕉。小芭蕉。杉木。嚴王。塌葉灘。鑼鍋耳。次險。四十一灘。開至四五六七八分不等。所有礙船巨石。先令夫匠伐木堆積。用火燒燬。再用錘鑿劈打。已十去八九。又應開兩岸懸崖。鑿路。一萬數百丈。內已完工者。八千四百九十八丈。其陡險之處。皆於石罅插木搭架。工匠用藤纏腰。懸空剗鑿。悉已開通路徑。從前上水船隻。日行不過一二十里。自開成緯路。鑿去礙船

寶錄卷三〇

三

巨石。上水日行三四十里。至奉檄試運京銅。查河口以下。百里之內。接連異石。柯郎虎口。象鼻頭灘。二灘。五大灘。歷來挽運兵糧船隻。止到黃草坪而止。此五灘原未通運。自興修以來。當將運到川米船隻。雇募至河口銅房。每隻裝銅二千五百觔。共發運銅十萬五千觔。俱安穩無慮。得旨。所奏俱悉。統計此工。所費若何。作何籌辦。并目今獲效。與將來如何有益之處。詳繕簡明摺奏來。○又奏。署雲南

寶錄卷三〇

三

開化府孫光祖。久在軍營。熟悉交地情形。請令在任守制。俟軍務告竣日。給假回籍治喪。得旨。此事久不行。且回籍治喪。亦須數月。應令何人辦理耶。既有人可以代此數月。豈不可令其署理。朕將何以對言官乎。照例辦理。為是。○雲南開化鎮總兵賽都奏。報營伍地方情形。得旨。滇南萬里。一切若不據實奏聞。則是大負任使之意矣。○先是。貴州提督丁士傑奏報苗疆安靜情形。得旨。此情形何待汝奏。但汝既不可存新疆要整理之念。亦不可存目下無事。即可廢弛武備之心。一守現在成規。而加之以安靜謹嚴可耳。將此旨問之張廣泗。以為何如。又奏。下江古州一帶。見苗民恭順之形。實本至誠。因諭以國法森嚴。何不為盛世之良民。而必欲冥頑梗化。自貽誅戮。得旨。此等語。殊非對今之苗人之體也。問之張廣泗。便知。至是。張廣泗奏覆。敬繹訓諭周詳。當與提臣和衷共濟。竭盡控馭撫綏。

大清高宗法天隆運至誠先覺體元立極敷文
奮武孝慈神聖純皇帝實錄卷之二百十九

[illegible]

乾隆九年甲子秋七月丙子朔享

太廟遣和親王弘晝恭代行禮。○諭從前直隸河間天津等屬被災之地一應新舊錢糧經總督高斌奏請停其徵比。緩至本年秋成後催徵完納。朕已降旨俞允。今幸甘霖疊沛。秋成可望。所有應完錢糧例應於秋收後徵收。但朕思二府被災既重。又當歉收之後。元氣一時難復。當格外加恩。以滋培養。著高斌確查災重之十六州縣。將本地應徵新舊錢糧。緩至明年看彼地收成。光景奏聞。再行開徵。

其被災稍輕之州縣各處情形不一。或有應行緩徵者。并著高斌詳查奏聞。請旨務俾民力得以寬紓。不至輸將竭蹶。又據高斌奏稱天津府屬之慶雲縣地僻民貧。商販罕至。米糧缺乏。民食艱難。請於河南大名等處買到雜糧內酌撥二千石。確查窮民酌量散給。以資接濟等語。著照高斌所請。即行散給。並即照大城等州縣出借口糧之例。免其秋收還倉。該部即遵諭速行。○鑲黃旗滿洲副都統嵩阿禮等奏。本旗於乾隆三年奉旨於廣儲司領本銀十萬兩。營運生息。自一分二三釐至二分不等。以為恩賞兵丁之項。借給旗員。則以一分五釐起息。今年久本既充足。而滋生銀於給賞外。尚有贏餘。嗣後旗員指俸支借。請照鑲藍旗蒙古漢軍例。概以一分起息從之。○戶部議覆浙江巡撫常安疏。稱乾隆六年仁和錢塘海寧餘杭歸安烏程長興德清等縣水旱成災。業經題請分別蠲緩額賦。

外。其不徵漕米之蕭山永嘉樂清瑞安平陽等縣被災情形。與仁和等縣相同。請於地丁款內一體分別蠲緩。應如所請。從之。○工部等部議覆戶部尚書前任湖廣總督阿爾賽疏稱。湖南永綏廳隆團汛守備巡檢移駐花園汛。其附近之河口汛。今外委一員駐防。一切衙署營房動支地丁銀修建。應如所請。從之。○盛京工部侍郎留保疏報牛莊五道溝丈出葦塘餘地六千七十畝有奇。豁免雲南宜良縣被水衝沒學田額賦三十八兩有奇。及河西縣泚革銀廠硎老山空向徵課額九十兩有奇。○賞給哈密副將瑚寶總兵官銜。再留駐防三年。○丁丑吏部議覆大學士鄂爾泰奏。稱內閣蒙古本房繙譯外藩奏摺及繕寫諭旨冊命碑文等項。俱用竹筆字。前令實錄館人員譯寫。自告竣後。俱分派各衙門行走。請即於此內挑能繙譯及寫竹筆字者八

員為蒙古本房貼寫中書補用完日再將八旗人員考取應用等語查內閣滿漢貼寫中書共四十缺蒙古本房向無貼寫中書請設蒙古中書六缺不論旗分令內閣會同理藩院將前項

實錄館議敘人員考取咨補俟挑補完日再將八旗蒙古舉貢監生考試擇佳者取中十餘名不論旗分按名頂補缺出先將貼寫中書論俸用一員次將各項蒙古人員考補一員

分缺間用統計五缺後將降調人員補用一員從之以諭德興泰為陝西鄉試正考官御史錢度為副考官禮部侍郎鄧鍾岳為江南鄉試正考官內閣學士葉一棟為副考官戊寅諭軍機大臣等朕聞德州一帶近有發水之處德州年來收成歉薄且與北直接壤不知水發情形有無妨礙田禾朕心實深為廛念可速寄信詢問喀爾吉善高斌目今水勢如何並如何辦理之處著即行奏聞尋

奏查德州境內自五六月間連次得雨運河水勢雖長並未滿槽繼即消落實無妨礙田禾之處即與直隸吳橋景州故城接壤之區亦委員星赴確查並無水發情形不敢稍有隱諱等語得旨覽此奏則朕之所聞似屬子虛但願無此事庶小民免怨咨之歎耳○又諭馬爾泰著調補浙閩總督那蘇圖著調補兩廣總督部文到日各即速赴新任○己卯補行乾隆七年分江蘇省大計卓異官十二員不謹官三員年老官八員有疾官一員才力不及官二員浮躁官一員分別陞賞處分如例○豁免山東博興高苑樂安等縣築隄挑廢民田五十頃七十四畝有奇竈地八頃八十畝有奇地丁額賦於乾隆九年為始從山東巡撫喀爾吉善請也○庚辰

上詣暢春園問皇太后安○諭大學士等向來邊省地方官員缺部選之員因途遠不能即到往往懸缺需

人。是以准督撫等奏請豫發人員。以備委署之用。近省概不准行。至其中或有萬不得已。奏請發員者。朕亦間允所請。然此終非經常之道。近據川陝總督慶復。陝西巡撫陳宏謀。山西巡撫阿里衮。浙江巡撫常安。署廣東巡撫策楞等。陸續具摺請發人員備用。自因本地方一時情形。出於不得已之苦衷。著該部將候補候選州縣人員內。於此四省各揀選數員。帶領引見。候朕降旨分發別省。亦不得援例奏請。大學士鄂爾泰等奏各省武員。例由督撫提鎮揀選題補。或由部將該省豫保人員掣補。是以本省之人。陞授本省之缺者甚多。如雲南一省。雖因極遠邊徼。非諳練之員。不克勝任。應令該督將副參遊都守各缺。分別苗疆險要者。留為題缺。稍近內地事簡者。改為部推之缺。咨部查核。其陝西福建兩省。題補之缺甚多。各員籍隸本省者。亦不少。應一例酌改。除直隸山東廣西三省並無

題缺外。如江南浙江廣東湖廣貴州四川六省。應飭令內地題缺本省之員。概行迴避。其苗疆沿海各缺。行令分晰里數。聲明題補豫保人員。一律辦理。至內地陸路題缺本省之員。亦請一體迴避。俾腹地候推各員。均得疏通從之。禮部議覆鴻臚寺卿梅穀成奏稱。本寺序班會典開載。由直隸河南山東山西四省生員充補。向來自行具呈。不由學政咨送。挂名回籍。並不赴寺學習。請定章程。并設定額。查向例應考時。令取同鄉官印結。以絕倩人遞呈之弊。應補缺出。移咨學政查取冊結立法。已屬周詳。惟向無定額。不無濫冒。嗣後正員不敷。考取學習生員。以十二員為定額。請詳加甄別。擇合式者。按額留用。餘仍咨回各學肄業。庶執事不乏。亦免名器濫邀。從之。辛巳兵部議覆甘肅巡撫黃廷桂奏稱。營制每兵百名。留守糧二分。以為操演火藥之用。其修理軍裝器械等項。公費不敷。請留

戰糧三分或馬戰糧三分以充此項公費應如所請將原留守糧二分改留步戰糧二分則扣存銀兩已較前寬裕一切公費可敷從之○福建福寧鎮總兵烏麗珠故以福寧協副將靳光瀚署理○以故翰林院五經博士關蔚子關顯宗承襲○壬午戶部議覆署廣東巡撫策楞疏稱粵東常平倉穀除廣州等府屬地勢稍高之各州縣并額穀不甚多者三年可出舊易新均毋庸開報氣頭廠底至高雷瓊三府屬地雖潮濕因每年撥給瓊郡兵民日食亦可無霉變之虞餘如廣州府屬之南海番禺東莞順德新會惠州府屬之歸善海豐陸豐潮州府屬之海陽潮陽揭陽饒平惠來澄海廉州府屬之合浦并通判經管之省倉以上各處沿海最濕又肇慶府屬之高要廣州府屬之通判經管三水廣益倉惠州府屬之河源博羅永安潮州府屬之普寧嘉應州屬之興寧長樂以上各處地為次濕

如有二三年未經出易之穀請於乾隆九年為始照廣西例每千石以三百石開報氣頭廠底每百石氣頭穀一石廠底穀四斗其穀照成色減價糶賣秋後買補不足於存公項內動支其未及糶半糶三者平糶時已將氣頭量出以後必復生氣頭請每千石以五百石開報氣頭廠底穀七石應如所請毋許將新作舊捏報至未及糶半糶三者距平糶時未久濕氣少洩亦一例以三百石開報從之○癸未戶部議准直隸總督高斌疏請將乾隆八年
聖駕恭謁
祖陵自京至易州
鑾輅經由之七州縣所有入官旗地及餘絕網戶莊頭等項租糧照易州等七州縣例蠲免十分之三從之○補卹康熙五十八年隨征西藏陣亡之鑲黃旗滿洲叅領鄂起正黃旗滿洲閒散章京書倫正白旗蒙古閒散章京

烏爾圖鑲白旗滿洲閒散章京多尼鑲藍旗滿洲閒散章京瑪起等五員給與全葬祭一次世襲雲騎尉○甲申

上詣暢春園問

皇太后安○大學士鄂爾泰等議覆綏遠城建威將軍補熙等奏請將綏遠城額兵三千九百名內徹回軍營効力之年老有疾兵二百名以幼丁挑補馬甲一百名其餘一百名糧餉即以養贍徹回二百名之家口應如所請將二百名兵丁一半馬乾銀兩暫行存貯遇需用馬時買補其所折草豆等價通融養贍孤獨無倚之人令該翼長協領佐領等監放咨部仍不得援以為例俟數年後挑充原額拴養馬匹從之○戶部議覆廣東按察使張嗣昌奏稱粵東需錢甚廣每庫紋銀一兩換錢七百餘文至八百一二十文不等且薄小破爛雜以前代古錢蓋因錢少價昂相沿行用查粵東存留局銅現有九萬六千餘觔且

與滇省金釵者囊兩廠相距不遠尚可採買一二十萬觔至需用配合之點銅黑白鉛俱本省出產採辦亦易仰懇開鑪鼓鑄濟用應如所請令該督撫將現貯局銅配搭鉛錫先行開鑄至滇省兩廠有無餘剩銅觔應咨該省督臣酌辦得旨依議速行○長蘆鹽政伊拉齊疏報東省舊冬雪少本年春夏雨澤又復愆期所屬海豐縣之永利富國永阜等場及王家岡竈地二麥被旱請將無業貧竈戶口附入各縣民籍一體撫恤得旨該部速議具奏尋議應如所請除照例一體撫恤外仍將各場竈地成災分數并應蠲應緩之處確勘具題得旨依議速行○乙酉

孝懿仁皇后忌辰遣官祭

景陵○戶部議覆兩廣總督馬爾泰署廣東巡撫策楞條陳粵東開採礦廠召商抽課各事宜一據廣州府屬番禺等縣報銅礦十二鉛礦二十二銅鉛礦砂三韶州府屬曲江等縣

報銅礦五。鉛礦二十七。銅鉛礦砂三。惠州府屬博羅等縣。報銅礦十六。鉛礦十。鉛礦兼有銀砂者五。潮州府屬海陽等縣。報銅礦六。鉛礦七。銅鉛礦砂十五。又銅鉛礦砂。雜有金銀砂者十四。肇慶府屬鶴山等縣。報銅礦二。鉛礦五。又銅鉛礦砂九。金礦九。羅定州屬西寧縣。報銅鉛礦砂五。連州及連山縣。報銅鉛礦十七。銅礦一。嘉應州及長樂等縣。報銅礦四。鉛礦六。現勘明於田廬無礙。即召商試採。第每銅百觔。實需工本十二兩有奇。若照洋銅每觔一錢四分五釐。交官收買。除百觔內抽課二十觔外。工費不敷。應如所請。飭該督定議報部。一。銅礦原本無銀。間雜銀屑。為數甚微。現酌議何等以上抽課。何等以下免抽。應如所請。俟確查定議。其餘銅鉛。仍照例二八抽課。一定例每縣召一總商。承充開採。聽其自召副商協助。一縣中有礦山數十處。遠隔不相連者。每山許召一商。倘資本無多。聽其

夥充承辦。應如所請。如礦少砂微。并令居民開採抽課。一。并按季按月彙報。一。每山設一山總。每隴設一隴長。約束稽查。每工丁十人。設一甲長管領。應募者。取保互結。亦應如所請。飭該管官嚴行防範。從之。○直隸總督高斌疏報據布政使沈起元詳稱。霸州。保定。固安。宛平。大興。文安。大城。涿州。房山。良鄉。永清。東安。香河。昌平。順義。懷柔。密雲。平谷。延慶。衛薊州。通州。三河。武清。寶坻。寧河。灤州。盧龍。遼安。撫寧。昌黎。樂亭。臨榆。雄縣。高陽。新安。清苑。滿城。安肅。新城。容城。定興。唐縣。博野。蠡縣。慶都。完縣。祁州。安州。束鹿。河間。獻縣。阜城。肅寧。任丘。文河。景州。故城。吳橋。東光。寧津。天津。津軍廳。青縣。靜海。滄州。南皮。鹽山。慶雲。靈壽。新樂。廣宗。鉅鹿。平鄉。南和。廣平。雞澤。曲周。磁州。成安。威縣。清河。廣平。開州。赤城。延慶。萬全。冀州。並所屬之新河。南宮。武邑。深州。並所屬之武強。饒陽。安平。定州。並所屬之曲陽。深澤。易

州並所屬之涑水遵化州並所屬之豐潤玉田熱河八溝喀喇河屯等一百五州縣衛廳今春雨澤愆期間被水雹二麥歉收再東安遷安撫寧唐縣定興河間靈壽延慶懷安西寧蔚州懷來等州縣四五六等月被雹傷禾業經借給籽種俟秋收後確勘分數另行題明得旨該部速議具奏尋議應如該督所請辦理秋穫後將收成分數另題并將借給籽種數目咨部得旨依議速行○丙戌吏部議奏現准戶部將京職外任降革人員具呈捐復者陸續咨到逐一察核查直賑定例內開凡京察大計及所犯私罪者均不准捐復外其餘事屬因公審明定案後並無餘罪者均准一體捐復但其中事介兩歧恐辦理歧誤上下其手臣等酌議內外革職人員除事屬因公應准捐復外至雖非因公而審明定案後並無餘罪及有餘罪而准納贖者究與犯貪酷迥異應准捐復其或奉持旨或於京察

大計案內革職者或革職後曾經引見奉旨仍行革職者或革職外餘罪不准納贖者或犯贓奸及故勘斃命出入人罪者均不准捐復若革職後又有另案擬罪者應否捐復請照一案內革職又經擬罪人員一體核辦至革職外有別案革職及別案降調註冊者應將原參革職之案照例准其捐復但照原捐之例未免過重應比照捐復降級減半之例減半加捐再京察大計案內降調或曾經引見奉旨仍行降調者亦應不准捐復其餘降調人員情罪本輕例得補用應請無論是否因公准其捐復至比照六法條例降調者與京察大計特參人員不同亦應准捐復其降調註冊者應照所降之級報捐再休致人員除由京察大計特參及奉持旨休致者不准捐復外其餘告休勒休有願出貲捐復者俱准捐復以上各項悉由戶部具呈務將原參續參降革治罪共有幾案并曾經引見與否

逐一聲明移咨查核。又文職既經酌量情節，准其捐復，則綠旗滿漢遊擊以下武職除軍機獲罪、軍政糾參及貪婪等員不准捐復外，其餘因公罣誤無餘罪者，俱准捐復。與文職畫一辦理從之。○賞卹江南京口左營巡洋遇颶被溺馬步兵丁葬祭銀兩。○豁免江安二省雍正十三年分民欠實銀六千九百二十兩有奇，米二千九百六十石有奇，麥一千七百八十石有奇，豆一百十石有奇。○丁亥

上奉

皇太后御長春仙館。○諭山東濟南府屬之歷城、章邱、鄒平、齊河、濟陽、禹城、臨邑、長清、陵縣、德州、德平、平原、德州衛、武定府屬之惠民、陽信、海豐、樂陵、商河、濱州、利津、雷化、青城、蒲臺、泰安府屬之平陰、肥城、東昌府屬之博平、臨清、高唐、恩縣、館陶、沂州府屬之沂水、蒙陰、蘭山、青州府屬之博興、高苑、樂安等三十七州縣衛，勘不成災之地，畝應徵錢糧例應

輸納。但朕思各州縣麥收原屬歉薄，若因此時勘不成災，將新舊錢糧一時並徵，小民未免拮据。著將乾隆九年應徵地丁寬至本年十月後啟徵。其歷年舊欠緩至來歲麥熟後徵收，以紓民力。○兵部議覆奉天將軍額爾圖疏請議敘拏獲私造賭具之步軍協領佐領等員，分別首先拏獲及察訪協同三項議敘等因。查拏獲賭具例內首緝者加二級協拏者紀錄二次。嗣後各省提鎮等題請議敘，每案止准一員首緝一員協拏，倘有濫行捏報者，即將該上司照例議處從之。○都察院左副都御史勵宗萬奏國家設科取士，立法嚴明，非積學有素不敢妄生覬覦。近年條例雖嚴，而積久玩生，士不務學，或以夾帶獲中。查科場設有兵役，專司搜檢，而奉行總屬具文，以官卷旗卷監試官礙於情面，兵役等畏其聲勢，遂致民卷難於獨嚴。一例虛應故事，請派親信大臣先從官卷旗卷嚴加搜檢，其

餘一體遵行。仍約束兵役。不得陵辱刁難。致滋紛擾。得旨。如所請行。○以吏部尚書協辦大學士劉於義。兵部尚書兼管理藩院事班第。充經筵講官。○戊子。

上奉

皇太后還暢春園。○戶部議覆。廣西布政使唐綏祖奏。稱乾隆七年。粵東廣肇惠潮等處。米價騰貴。督臣慶復。酌撥西省倉穀二十一萬石。運東平糶。每石定價四錢。交該處於秋收後買補。嗣後桂林米價日增。每石至六七八錢不等。原議定價。不敷採買。請動司庫銀兩。增添買補等語。查穀價低昂。原視歲收豐歉。如歲豐價減。即照定價買補還倉。或實有不敷。應飭該司。隨時酌量。動項墊買。移明東省。照數補解還款。得旨。依議行。○己丑。

上詣暢春園問

皇太后安。○工部議准。江蘇巡撫陳大受疏。稱太倉州屬之寶山縣地濱大海。潮汐洶湧。所

有月浦土塘被潮衝刷。請建築單路石壩。外加椿石坦坡。各一百七十丈。并接築抄塘。使與土塘聯屬。中設涵洞宣洩。從之。直隸總督高斌疏。報開墾順天保定易州永平河間天津正定順德宣化各府州屬水旱荒地一百十四頃五十八畝有奇。○以編修宋邦綏為河南鄉試正考官。編修葉酉為副考官。侍講周玉章為山東鄉試正考官。御史曹秀先為副考官。中允于敏中為山西鄉試正考官。侍講雙慶為副考官。○旌表守正被戕直隸饒陽縣民侯進才妻蕭氏。○庚寅中元節。遣官祭

永陵

福陵

昭陵

昭西陵

孝陵

孝東陵

景陵

泰陵 遣官祭

端慧皇太子園寢

上詣

安佑宮行禮○大學士鄂爾泰等議覆甘肅巡撫黃廷桂奏稱西寧口外日月山之西南地名沙喇庫圖爾距丹噶爾六十餘里係商民往來總要之區亦賊番出沒經由之所築堡駐劄守備一員把總一員馬步兵二百名專司巡緝其地孤懸口外氣候寒冷不能耕獲又係新設之地無糧可撥官兵起支例係折色商販稀少兵丁謀食維艱前撫臣許容以大通鎮及丹噶爾白塔永安三營兵糧缺少奏准將大通米三千石分貯各營每年四五個月間存二借一秋後於兵餉內扣買還倉可否照例即於西寧縣倉採買備貯糧內量撥裸豆五百石運送脚價於司庫給領交丹噶爾城叅將收貯以資接濟等因應如所請沙

喇庫圖爾兵丁照大通等處之例於西寧備貯雜糧內撥運五百石交該營員收管每年存二借一秋後扣餉買補仍嚴飭營弁及時給發買還無得侵扣虧空從之

大清高宗法天隆運至誠先覺體元立極敷文奮武孝慈神聖純皇帝實錄卷之二百二十

大清高宗法天隆運至誠先覺體元立極敷文奮武孝慈神聖純皇帝實錄卷之二百二十一

經筵官經筵講官太子太傅又開閣大學士又開閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂總核官經筵講官太子太傅人參贊大學士又開閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常加二級又加二級臣德順經筵講官太子少保工部尚書紀錄六次尋常加二級臣曹振鏞等奉 敕修

乾隆九年甲子七月辛卯諭曰索諾木達爾

扎之公爵部議無庸承襲固屬按例辦理第

念索諾木達爾扎係達賴喇嘛之父

皇考加恩達賴喇嘛

特予封爵伊亦深感

皇考之恩行走謹慎歷有年所今已溘逝深為

可憫著加恩令伊子恭格丹津仍襲輔國公

之職以示優眷 吏部議覆河東鹽政吉慶

奏稱鹽屬人員有管場徵課之責請照大計

例會同督撫秉公考察應如所請嗣遇大計

之年照長蘆兩淮向例令該鹽政會同督撫

詳加考察其操守廉潔才幹優長者開列具

題有干八法者一律叅處從之 〇壬辰諭大

學士等本年未經保舉考試之編修檢討及

庶吉士著吏部傳齊於二十外赴圓明園候

旨考試 〇戶部議覆署涼州將軍黑色奏稱

各省分給鹽當生息銀兩向例不得過一分

五釐涼州米布煤等鋪皆係自行貿易早晚

贏絀不齊并賃屋租銀亦係本人情願均與

交商生息者不同故有二分至三分八釐不

等倘息銀太少恐不敷賞兵之用應如所請

通融量加不必定拘一分五釐舊例從之 〇

補行乾隆七年分安徽省大計不謹官二員

罷軟官一員年老官六員有疾官四員才力

不及官二員浮躁官一員分別處分如例 〇

奉天將軍額爾圖緣事解任以熱河副都統

達勒當阿為奉天將軍以滿洲正藍旗副都

統瑪爾拜為熱河副都統 〇癸巳戶部議覆

江蘇巡撫陳大受疏報常州府屬之靖江縣三面濱江。地多坍漲。現勘明新坍折實平田二頃四十六畝有奇。新漲折實平田一十九頃二畝有奇。均應如所請。蠲免升科。從之。○兵部議覆。調任閩浙總督那蘇圖疏稱。興化府屬仙遊縣之石馬俞潭二處。地屬衝途。應各設一汛。每汛駐兵五名。又南至楓亭五十里。深山曠野。易藏奸匪。應於適中之仙嶺地方。添設一汛。兵五名。均於興化城守營兵內派撥。其添建塘房瞭樓等項。於地丁項內給發。應如所請。從之。○又覆陝西巡撫陳宏謀疏稱。陝省神木同知一員。向管沿邊十堡塘馬。現改為理事同知。於所司糧捕鹽茶外。又辦理蒙古民人種地諸務。繁劇難於兼顧。請將建安高家二堡塘馬歸所屬之葭州管理。柏林永興解州鋪三塘鋪神木縣城五站塘馬歸神木縣管理。鎮羌鋪孤土堡石嘴頭三站塘馬歸府谷縣管理。應如所請。其夫馬工

料銀兩。均照舊例支給。從之。○鑄給拉林阿勒楚喀副都統印信。及添設左右二翼協領關防。從寧古塔將軍巴靈阿請也。○甲午上詣暢春園問

皇太后安。○諭軍機大臣等。廣西地處邊遠。聞各官養廉。有不敷用者。蓋緣當日酌議養廉之始。皆就各該地方餘潤之多寡。以定數目。是以參差不等。今諸弊肅清。養廉未免不足。朕思州縣以及同知通判各官。均有辦理公務之需。豈可使之用度不敷。至於艱窘。意欲酌量加增。以示體恤。可寄信與總督那蘇圖署巡撫託庸。令其密議。應於鄰省何項銀兩內。酌撥萬金。以協助粵西之不足。至何員應添若干之處。一併籌酌妥協。具奏請旨。○予故盛京兵部侍郎阿山祭一次。○乙未上御勤政殿聽政。○予故奉恩輔國公齊努渾祭葬。謚簡僖。○丙申。兵部議覆直隸總督高斌疏。稱天津城守營都司陳嘉言母老無人

侍養請改補本省等因。查武職官員並無因父母年老改歸本省補用之例。所奏未便允行。得旨。向來文員原有親老調補近省之例。武職雖與文員不同。其為養親則一。但改歸本省補用。殊多未便。若於附近省分改補。亦屬可行。著該部另議具奏。尋議請照文員親老改補近地之例。發往該員原籍附近省分。交該督題補。俟養親事畢。仍補直隸天津城守營都司原缺。各省一體辦理。從之。○又覆寧古塔將軍巴靈阿奏稱。拉林阿勒楚喀地方。現補放副都統。添設左右二翼協領。移駐滿洲一千戶屯田。請於拉林多歡蒙古邊卡兩處各設一站。每站壯丁各十名。筆帖式各一員。領催各一名。應如所請添設。從之。○以福建福州將軍標中軍副將李有用為福寧鎮總兵。○丁酉。兵部議覆調任閩浙總督那蘇圖疏稱。武職親丁名糧業遵旨改為養廉。將虛造姓名冊籍裁去。所有詔安營紅花嶺

添設守備一員。把總一員。應加給養廉馬糧四名。戰糧八名。兵丁公費守糧三名。應如所請。准其支給。一體停造名冊。至該汛兵一百十名。原係各標協營額兵內抽撥。無庸另添公費名糧。即於原隸之營汛扣給。從之。○戊戌。

上詣暢春園問

皇太后安。○諭大學士等。甘肅地方土瘠民貧。非內地可比。朕所軫念。其有舊欠錢糧。一年

難以併徵者。已加恩寬緩矣。頃聞甘州府山丹縣積年民欠亦屬繁多。乾隆元年至八年共欠屯糧一萬二千六百餘石。又自三年至八年共欠籽種糧六千五百餘石。又自元年至八年共欠草六十萬一百餘束。此時若按例一併催徵。民力未免艱窘。著從本年為始。分作六年帶徵。俾小民從容完納。該部即傳諭該督撫遵行。○戶部議覆廣州將軍兼管粵海關稅務策楞奏支銷經費各事宜。一通

關經制書吏共十一名應留七名裁四名。其各書吏原定火食銀三千九百兩。裁一千三百二十兩。改為各總口七處派委稽收稅項。各旗員養廉。餘仍報解。一修理稅館巡船及各口神誕戲供三項。乾隆六年以前該撫冊報多者至二千六百餘兩。經部行令核減。第粵省濱海風信靡常。稅館巡船年內兩三次修理。倘因部駁任其倒壞日久需費轉多。請嗣後每項以二百兩為率。每年共核定銀六百兩。一該關需用心紅紙張等項向來每年支銀自一千九百至七百餘兩不等。請嗣後心紅紙張以三百兩為率。修理衙署以二百兩為率。洋船神戲以二百兩為率。每年共核定銀七百兩。一齋捐公用各關本無開支之例。請永行停止。外至丈量夷船往來船隻飯銀及季報領冊路費原屬必不可少。請丈量盤費每次給銀三兩。季報領冊一年酌定銀三百兩。一凡遇被風難商由地方官通詳海

關動支給發未免無可稽查。請將給過數目先行報部。年滿彙冊送核。至賞給夷船牛酒麥麵等銀。每船以三十兩為率。一各口徵收擔規銀色高低不一。請嗣後傾銷色銀番錢俱照實在所收平色扣除折耗彙為一冊報銷。一併封平。餘漏稅罰科員役截曠三項。請照閩海關之例另款收貯充公。餘銀另列報解。以上各條均應如所請辦理。至奏稱粵海關所轄口岸大小七十處其差委書吏家人巡役等盤費頗繁。每年支銀一千兩為定額。查前任廣撫王安國疏稱瓊州等六大口又有小口四十三處。此外並無私行新添。今該將軍又稱係七十處。數目不符。又奏稱船貨到口凡則例不載者即屬應免之項。不得比照則例概徵規銀。以為商民苦累。但各口設立比例清冊該商自可按則輸稅。其如何苦累商民處合行詳細聲明。至請各小口一如正稅口岸給發商民親填印簿以杜官吏侵

漁需索等弊。統俟口岸數目確報後再行定議辦理從之。○又覆雲南總督張允隨奏稱滇黔兩省辦理京銅皆由滇省之威寧州轉運嗣經將東川至永寧道路開修兩路分運銅餉每年四百四十餘萬餉後又加運一百八十九萬餉威寧一路實運三百一十六萬餘餉加以辦運黔省黑白鉛四百七十餘萬餉雇運艱難日見遲誤請於板蚌百色一路官買牛馬設站分運并將黔省月亮巖鉛餉停止爐民私銷概歸官買全由貴陽運至京局再於水次相離不遠處查有鉛礦即行採買解京庶東威兩路可免壅擠應如所請將月亮巖鉛餉概歸官買全由貴陽轉運以分東威銅鉛並運之勞再查現開金沙江將滇省銅餉改由水運每年可省陸運之半則威寧及昭通兩路餘出馬匹辦運自見敷裕又據滇黔兩省督撫請增腳價每站一錢二分九釐零則該處馬匹亦可雇募敷用至請板

蚌百色一路安設臺站需費浩繁且廣南烟瘴最盛夫役牛馬恐致倒斃未便准行自後如有遲誤應將威寧永寧及委駐承運各員叅處經過之地該員亦協同雇募船馬遲延者一例查叅得旨是依議行。○左僉都御史嵇璜奏直省河間天津等處現估修城垣舉行水利以工代賑加惠窮黎請諭督臣轉飭地方承修各官凡諸工力應取無業窮民散給工價務必親臨查驗勿任奸蠹侵蝕冒銷得旨著照所請行。○貴州道御史孫灝奏科場首防夾帶搜檢務嚴查順天鄉闈人數太多往往點名至四五更不得竣事致使不肖之徒乘入夜覺察之疎反得任意懷挾請勅監試諸臣於三場點名之日將貢院一應事宜黎明趕辦完竣即會同特點之大臣在點名處所唱名散卷公同查察務使搜檢嚴密夾帶廓清得旨著照所請行。○陝西固原提督李質粹丁父憂以涼州鎮總兵段起賢署

理印務。○以故喀爾喀扎薩克輔國公策魯布弟多岳特多爾濟襲爵。○已亥諭。科場大典。為人才所由出。關係甚重。我

皇考加意整飭。今科場之弊。雖覺漸清。而因循日久。外場弊竇多端。尚有不可枚舉者。即如懷挾一事。倩人代作文字。夾帶入場。主司憑文取中。無從知非。已出。僥倖弋獲。相習成風。則是讀書作文。皆可不用。立身行己。皆可不問。何以名為士子。何由得見真才。而國家賓興鉅典。竟成虛設矣。朕已嚴飭所司。於今年科場。實力稽查。毋得虛應故事。而凡為士子者。亦宜返心自省。以讀書之本業。進身之階梯。而不務研求於平日。惟思竄取於他人。詭詐潛藏。行同盜賊。此等之人。尚何望其莅官分職。為國為民。清夜自思。得不深自愧赧乎。至於內簾職司文字。雖暗通關節之弊。近日未有所聞。然衡鑒罕能精當。文風未見振起。且專意頭場。而不重後場。頭場之中。又專意

四書。而不重經文。夫設科之始。定有經義論表判策者。經所以考其根柢。論所以試其識見。表所以覘其淹洽。判所以觀其斷制。策所以驗其經濟。事事皆切於士人之實用。而不可偏廢。夫然後明通淹雅之儒。經綸幹濟之士。庶幾出於科目之中。為國家臂指之用也。今表文率多雷同。竟為南北通病。在北人於聲律素所未協。尚應稍寬其限。令得加意習學。至於南人。本屬易能。而不肯盡力。勦襲相

沿。豈可任其暴棄。自今以後。司文衡者。務思設立三場之本意。於經義表判策論。逐一詳加校閱。以定去取。毋得軒輊其間。俾僥倖之徒。無從獲售。若尚積習相沿。倘經九卿磨勘。或科道指參。或被朕查出。將主司與房官。從重議處。如是。則雖未能奏效於旦夕。而數科之後。趨向自定。實學共勉。真才可得。於國家設科取士之事。庶有裨益矣。將此永著為例。○又諭。科場為國家抡才大典。關係綦重。向

來外場弊竇多端。士子懷挾文字入場。希圖弋獲。此等無恥之習。一日不除。則真才何由得出。今年順天鄉試。朕已降旨。嚴飭所司。實力稽查。聞外省夾帶之風。亦復間有。不可不嚴行禁止。著各省監臨提調等官。於點名時。嚴加搜檢。片紙隻字。不許攜帶入場。務使弊絕風清。毋得虛應故事。至於主司衡文。向來專重四書文字。而忽於經義。後場其實經文。所以考其學。後場所驗其用。各有深意。無容軒輊其間。嗣後主司應將三場文字。悉行盡心閱看。就優劣以定去取。毋得草率從事。該部遵諭速行。○欽差尚書公訥親奏。遵旨查閱外省營伍。將河南省之河北鎮標。河南撫標。南陽鎮標。江南省之壽春鎮標。安慶撫標。江寧督標。蘇州撫標。松江提標。蘇松水師鎮標。京口將軍標。狼山鎮標。淮安漕標。清江河標。山東省之河東河標。兗州鎮標。登州鎮標。山東撫標。以次閱看三省共一十七標。除

器械完整。技藝未甚生疎外。其弓馬鳥鎗。生疎最甚者。莫如河南南陽鎮標。連環每隊九人。施放亦多斷續。蘇松水師鎮標。槍風折戟。全在頭舵水手。兵丁專司鎗礮弓箭。水操時。見其衝敵對陣之船隻。進退參差。往來間斷。全與陣勢不合。皆由二鎮該管大員。不能勤加訓練所致。應請分別察議。東省漕河三標。雖有催漕趲運之事。然亦防守地方。與專司樁埽之河兵不同。弓馬技藝。亦應操演純熟。再京口將軍標。駐防八旗漢軍。自應循照八旗騎射架勢。勅該將軍訓練。至各省兵丁弓力。能挽五六力以上者。不過十之二三。其餘多係二三四力。未免過於軟弱。無資實用。亦應習挽五力以上。方為適中。又各省標營送閱兵丁。江南提標竟有衰老者。餘亦多半老弱。至墩撥防兵。每汛不過二三十人。皆有巡緝差防之責。不應參用老弱。有妨差緝綠營兵丁。原取漢仗。召募時。亦應挑選壯健。庶於

體制相合。再督撫提鎮統司訓練。其教導指授全在將弁得人。今閱各營員弁。步馬箭多有生疎。衰老者固然。即少壯者亦不免應飭令將從前著有勞績。精力尚堪驅策。與年壯弓馬平常。猶可造就者。酌量或調兼營。或補簡缺。其精力衰憊。及年壯不能造就之員。詳加甄別。再各營步兵鎗手。所戴之盔。有鐵盔者。有棉盔。加釘鐵樑錫樑者。亦有竟用棉帽。不似盔式者。在營陣尤不壯觀。應更換畫一。

其汛鋪瞭樓。大路尚屬完整。至偏僻小路。亦應一律修理得旨。如所請行。該部知道。○又奏各省滿洲駐防兵丁情形。查江寧駐防兵。係順治二年設。德州係順治十一年設。河南係康熙五十九年設。青州係雍正十年設。伏思滿兵駐防。原以威鎮地方。為綠營表率。如遇緩急。即資調遣。技藝自應嫺熟。現查閱各省滿兵。雖比綠營稍優。而較之滿洲舊技。殊多廢弛。除將閱過河南。江寧。青州等處。繕寫

清單呈覽外。所有德州員弁技藝均屬生疎。騎射尤劣。烏鎗兵計其著牌人數。十僅得五。而中牌次數亦僅十三。施放連環亦未嫺熟。請將該將軍副都統等。一併交部察議。再查河南滿兵。向無大員專管。請交該城守尉勤加教訓。五年一次出派大臣考驗。其江寧。青州滿兵陣式。與京師操演不同。請飭該部將火器營陣式條規。咨行該將軍大臣等畫一操演得旨。如所請行。該部知道。○庚子。諭國家承平日久。各省營伍日就廢弛。朕早已知之。並非因嵇璜之奏始遣尚書公訥親前往查閱。亦非因訥親此番查奏而後諭令整理也。現今據奏各處情形。大槩甲仗旗幟尚屬鮮明。而烏鎗騎射各種技藝則皆屬平常。蓋該管大臣聞朕命訥親查閱。無不倉猝屏當。然器械可以猝辦於臨時。而技藝則向來生疎。一時驟難熟練。其間情事顯然。該管大臣平日所司何事。而輕視武備若此乎。本宜緊

行從重議處。但人數衆多。祇將甚屬廢弛者。交部議處外。為此特降諭旨。嚴行申飭。該將軍督撫提鎮等。各宜痛改舊習。勤加訓練。俾士皆精銳。戎行改觀。務期平時可資捍衛。有事可以折衝禦侮。孔子曰。不戒視成。謂之暴。今朕與以三年之限。著兵部請旨。遠省地方。亦必差員查閱。其就近省分。已經閱過者。有無整頓。亦必再行考驗。該管大臣等。皆朕信任之人。於職分所在。未能辦理。以致營伍廢弛。負朕委任之意。豈不可愧。此次派往查看之訥親。及將來所遣之人。俱係朕親信簡用者。自必據實陳奏。斷不肯代為容隱。倘此番訓諭之後。尚不知自勉。仍復因循怠忽。視為具文。或經朕訪聞。或被欽差查出。則曠職之咎。朕不能為該大臣等寬也。著通行曉諭知之。○又諭據訥親所奏。閱看河南。江南。等處兵丁一摺。奏稱河南。江南。山東。駐防滿兵。技藝騎射。率多廢弛。漸失滿洲本業等語。此皆

朕所素知。不待訥親陳奏。曾經諄諄降旨。飭諭各省大臣。今乃仍復如此。是大臣等實負朕恩矣。夫令滿兵駐劄省城者。原欲威鎮地方。表率綠營。遇有調遣。即可迅速得力耳。該將軍大臣等。理宜勤加訓練。使之極其精強。近看各該將軍大臣等。辦理事務情形。不過以約束兵丁。俾各守分。不滋事端。即謂克盡厥職。若果如此。則滿兵漸至下流。非惟有負駐防地方之本意。倘遇調遣。又安望其得力耶。夫養育滿兵。固應謀其生計。然亦不可不勤加操練。俾之技藝精強也。將軍大臣等。皆朕簡用之人。伊等赴任之時。朕未嘗不諄諄以教養滿兵。勿致廢棄本業為訓。此等緊要之事。伊等並不留心。一味苟且塞責。不肯勤練兵丁。以致技藝生疎。甚屬不堪。但念人數衆多。僅將其中尤劣者。交部議處外。其河南。江南。山東。駐劄之將軍大臣等。著嚴行申飭。至各省旗兵駐防之處。通行降旨曉諭。嗣後

務令兵丁等勤習騎射期致精熟勿使廢棄滿洲本業漸至下流也俟一二年後朕特派大臣等前往閱看倘仍前廢弛定將該將軍大臣官員等一併治罪○又諭曰段起賢已經降旨署理固原提督涼州總兵員缺甚屬緊要著交與總督慶復於所屬總兵內揀選調補所遺員缺以候補總兵施廷專補授○步軍統領舒赫德等奏外場巡察御史等官請先期派出於二十八日即往貢院大門外

實錄卷之三

十九

駐宿凡運送供給以及進院夫役人等應槩行搜檢并請磚門外各派叅領守備一員協同點名給籤令應試諸生隨牌聽點以次搜檢放入得旨著照所請行其先期前往貢院稽查之處著派永興德保安寧索凌阿去○以故奉國將軍宗室東海子恩成照例承襲奉恩將軍○辛丑諭近來外省吏治率多欺蔽即如江南許墅關乾隆六年十一月至七年十一月稅銀缺少一案經戶部駁查去後

今巡撫陳大受署布政使愛必達查奏覆稱實係按月計算未經減少並無絲毫侵隱等語朕之裁減各關稅課並免米麥稅銀無非普惠商民之至意從前有旨盈餘減少戶部不必過於苛察惟令督撫就近查奏乃自有此旨之後各處所報盈餘無不減少者而督撫之查奏亦不過虛應故事該管官員未必不無染指或委用不得其人旁有透漏該員以正課不虧遂爾疎忽究之非實在徵收之

實錄卷之三

三

數目其奏報短少緣由則皆以年歲不齊為詞豈有各省之殊數年之久歲收盡皆不齊乎至督撫之查核亦祇據屬員回覆並無實力查出畧有異同者近來部中竟有以此等為刊板稿案之語此豈成政體哉故自減免稅課以來米豆價值仍然昂貴而於商民未見有益於稅課日見有虧轉使官吏得以高下其手也朕頗覺其弊用頒此旨通行訓飭朕既寬免稅課數百萬兩之多豈較量此些

小盈餘之數各督撫及司稅官員毋得錯會朕意以報增盈餘為念但嗣後務須核實辦理無欺無隱不得視為具文朕從前降旨時會計之臣有以此旨若下各關稅必至一年少於一年者朕謂之曰此弊朕豈不知但得商民獲一分利益則雖稅額缺數分亦可不顧行止者終必敗露海保輩即明驗也以今觀之商民并未得一分利益則大非朕從前降旨之本意矣而必令符朕前旨則又非朕所厚望於各督撫及司稅者也○禮部議覆安徽學政介福奏稱安徽鳳陽府屬之鳳陽鳳中長淮三衛童生考試應照新安建陽各衛之例令於該衛守備處報名造冊錄送提調轉送學臣并令該衛廩生認保如無廩生即令增附互相稽察以杜頂冒等弊應如所請從之○壬寅

上詣

安佑宮行禮○諭今日朕閱看刑部本章尚有

尚書來保銜名來保已出差一月有餘是豫先畫題於月餘之前矣向因刑部本章繁多每先行畫題以待臨時依次進呈然亦止應在數日之前不應厯月餘之久又聞海望辦理部務亦往往於十數日前畫十數日後之稿夫果於部件詳細閱看則本日一日之事尚恐未能周到豈能旁及十數日後之案是該部堂官等但以畫題為辦事而於事件之情節並未悉心詳度草率塞責可知矣為此特行訓飭並令各部堂官共知之○又諭各館所修之書理宜上緊纂輯漸次告竣乃纂修人員皆怠忽成習經歷年久率多未成雖天心月窟討論務須精詳魯魚亥豕考據恐其訛謬亦何至易成者亦不即成輾轉耽延竟視為不急之務韋編三易非積日以成者乎其意不過借此多得公費以資養贍所謂事君敬其事而後其食者何居且現在所修之書告成後尚有應行纂輯者又當開館修

輯未嘗不可載筆從事也。夫今日之翰林即異日之公卿。若所見如此卑鄙。其器識豈足以當鉅任。嗣後除內廷所修各書。未經開館者。不必稽查外。其餘各館。俱著稽察。上諭館之大臣。按月察核。倘仍前怠玩。責有攸歸。其該管大臣。應如何稽查之處。著即定議奏聞。尋議除律呂正義館藏經館。文韻館。隨領隨寫。與修書各館不同。無庸稽查外。其餘館繕寫漢文。請照明史綱目館每員每日。一千五百字。繕寫清文。請照

玉牒館每員每日八百五十字。校對數目。請照實錄館每員每日二十五篇。再查明史館。

國史館三禮館每書一本多寡不同。總裁閱定期日。亦屬互異。請令各館於每月初五日以前。將前月纂輯繕寫校對各若干。詳細造冊咨送臣等查核。如有稽延者。即行參奏。得旨依議。○戶部議覆山東巡撫喀爾吉善奏報山東二麥被旱之歷城章邱鄒平齊河齊

東濟陽禹城長清平陰肥城青城蒲臺蒙陰沂水博平臨清恩縣博興高苑樂安陵縣德州德州衛德平原惠民陽信海豐樂陵商河濱州利津霑化臨邑高唐三十五州縣衛應請一體借給籽種口糧得旨依議速行。○又覆福建巡撫周學健疏稱據布政使高山詳開省存貯倉穀。閱三年以外者為數既多。氣頭厥底。勢所不免。請定以每石氣頭穀八合。厥底穀二合。碾米減價二錢。糶換好穀補倉。如不敷原數。請酌動贏餘買補。應如所請從之。考察乾隆九年分盛京及

三陵等處各官。不謹官一員。年老有疾官二員。才力不及官一員。分別處分如例。○癸卯

上奉

皇太后還宮 詣

大高殿行禮 詣

皇太后宮問安。○諭軍機大臣等。朕聞七月初三日

起至七月初六日止。浙省連雨四日。杭州繞城江塘石條水衝一二層相近居民。房屋傾倒。杭州府嘉興府嚴州府紹興府屬錢塘仁和海寧等處十數縣。江海石塘土隄稍有損壞。房田亦被水衝。官船民船傷損。人口亦有淹斃。再嚴州府屬淳安縣紹興府屬山陰縣。此二縣被災又稍重。此事常安並未奏聞。爾等可寄信詢問。令其據實具奏。尋奏。七月初三四五等日風潮。杭州江塘眉土衝激。當即填平。民屋並無傾倒。海鹽海寧石塘亦未損壞。惟老鹽倉觀音堂等處柴塘間有蹲踞。隨晝夜搶修。剋期告竣。嘉屬所轄乍浦城外天后宮一帶。曾經進水。旋即消落。紹興一屬被水亦輕。獨嚴州一屬山水陡發。人民田廬多有淹沒。業經繕摺具奏報聞。○又諭常安近來辦事頗覺粉飾外觀。而不留心民瘼。被水一事已降旨詢問。今朕聞浙江西安地方缺雨。六月二十日該縣知縣董宗孔正赴各鄉查勘。

之際。有鄉民多人各將被旱禾苗棄置縣堂。人聲嘈雜。近縣市店多有閉門。傳聞罷市者。此事常安並未奏聞。爾等可寄信詢問。或係該縣辦理不善。或係刁棍倡謀滋事。令其據實具奏。如刁民藐法妄行。則尤應嚴懲。而地方官或以罷市為諱。則更不可也。尋奏。六月二十日。西安知縣董宗孔查勘各處鄉民不知該縣他出。遂將旱禾棄於堂上。非不行驗看所致。至罷市之說。乃係人衆訛傳。實無此事。嗣以其中為首之人未經查獲懲治。不敢遽行陳奏等語。得旨。汝雖不言。朕豈不知。此等鄙見。改之戒之。○刑部議覆吏部參奏同知張卿雲於所捐生母封典外。又冒領本身封典一摺。查張卿雲領軸家人聞會典載五品官有應封一代之例。隨具呈開列生母及本身妻室三項。託吏書沈璫辦理。沈璫希圖朦混。以致歧誤。除追贓入官外。謹繹會典及捐例。凡嫡母在生母不得並封者。准另捐生

母封典。若嫡母既歿。生母即在應封之內。今張卿雲父母既歿。生母原無庸另捐。乃不明例義。誤行報捐。致天下謂嫡母歿。生母尚不在應封之內。是國家格外之恩。竟不明於衆矣。請將張卿雲所捐生母誥軸。交內閣銷毀。仍令另捐本身。應得封典一軸。將伊生母一并受封。方與會典例意相符。從之。○以廣東督標副將蕭瑒。為福建建寧鎮總兵。廣東香山副將陳汝鍵。為福建海壇鎮總兵。○甲辰。

上詣

萬善殿瞻禮。○詣

皇太后宮問安。○諭甘肅涼州府屬之柳林湖。肅州所屬之三清灣。柔遠堡等處。及口外之安西沙州。柳溝布隆吉等處。屯田民人。從前開墾之始。借有牛具口食銀兩。日久未得全還。朕已於乾隆七年五月內。降旨全行豁免。惟肅州所屬之九家窰一處。當時未經議及。是以尚在帶徵。朕思此等原係窮苦之民。責

令完納。不免拮据。著將九家窰未完牛具銀一千六十餘兩。一體加恩豁免。以息追呼之擾。該部即遵諭行。○又諭。據倉場侍郎吳拜等奏。稱本月初七日夜間。風雨猛驟。外河水勢陡長丈餘。將興武三幫旗丁鄭士元。張映陳九如。鄭子明。漕船四隻。遭風磕壞。淹没人口。虧折米石。又興武七幫旗丁蔣堯臣。楊俊崇。回空船二隻。八幫旗丁尹礪。逸回空船一隻。亦於是夜遭風。磕擊破損。雖因風起倉猝。

字集八十二

不及隄防。然疎忽之咎。究亦難辭。應請將漂折漕米。照例責令賠補。損壞船隻。責令賠造。押運官弁。移咨吏兵二部議處等語。今年七月初旬。暑雨滂霈。河流驟長。昏黑之夜。漕船被風。人力難以搶救。尚非運官旗丁疎忽之故。查雍正十一年六月間。曾因風大水湧。撞沉漕糧船隻。蒙

皇考聖恩。免其賠補。賠修。並官弁處分。今年情事。與雍正十一年相類。著將賠補米石。賠修

船隻並官弁處分之處。悉行寬免。倘將來運官旗丁等。因有屢次寬典。不加意防護。或有捏報等弊。一經察出。定行從重治罪。○兵部議覆福建福州將軍兼管閩海關事務新柱奏稱。福州駐防四旗兵丁。軍裝器械修葺之資。向無公項。懇於庫貯扣存減半。給養馬價內。借銀一萬兩。發商營運。以一分五釐生息。為歲修之費。應如所請。三年後。將本銀還庫。即以息銀作本營運。以備歲修。令該將軍遴選賢員辦理。倘有侵蝕那移。及違例累民等弊。即行叅處。從之。○蠲免福建臺灣府屬之臺灣諸羅鳳山等縣。乾隆八年秋旱成災。額賦。○以故廣西廣遠府那地土知州羅會禧子羅元善襲職。○是月。直隸總督高斌奏報。直屬久旱之後。喜得甘霖。秋禾十分長發。不嫌雨水過多。惟順天保定河間天津各府屬。因得雨未甚深透。潮濕之氣所蒸。致生蝻子。現飭文武員弁。極力撲捕。務期盡絕。得旨好。

上緊督催捕滅。毋令傷稼也。又批近日頗覺雨多。晚禾與隄工。皆無恙否。速奏以慰朕心。○又覆奏近日各屬得雨。固安迤北州縣較多。然時晴時雨。亦未至淋澇過甚。晚禾藉以滋長。蛄蟲亦可消除。惟霸州迤南一帶。得雨尚未霑足。再永定河石景山於七月初四日。長水六尺餘。隨即消落。上下南北兩岸隄埝。俱屬平穩。得旨覽奏稍慰朕懷。卿所奏乃前日之情形。茲復連陰二日。昨晚之雨頗大。不傷農否。然霸州迤南。必霑足矣。朕差努三前去看水。可詳悉告彼。令其帶摺回奏。○又奏固安自七月初一至初六日。連得雨澤。不嫌過多。霸州迤南。近日並已得雨。永定河工亦俱平穩。得旨。今天已開晴。朕懷稍慰矣。努三見莊河有下埝之處。今平穩耶。○又奏永定河北岸三工。莊河係河溜頂衝之處。初七日水勢長大。河灘塌卸。漸逼隄根。隨接築護隄埝工二十餘丈。工已完竣。再查山東德州一

帶並無發水之處。惟雄縣新城雨水甚大。窪地晚禾間有淹浸。近亦消退。得旨。此處連年被災。必撫恤十分得宜。然後可作何措辦。速奏以慰朕懷。統計天河兩府所屬。秋災復有幾處耶。有成災之處否。○又奏。上年被災之河間。天津。二府。深冀。二州等屬。連次得雨。秋禾隨亦改觀。至雄縣以北。河水漲溢之處。亦止低窪被淹。旋即消落。高地晚禾現俱暢茂。得旨。覽奏朕懷稍慰矣。○署兩江總督尹繼

平定八年十二

三

善奏。疊奉諭旨。因畿輔春夏缺雨。飭令上下兩江各備米麥十數萬石。以待直省需用。嗣因五月間京師已得透雨。可望收成。飭令豫備之米麥可以少減其數。伏思江省連歲豐稔。收買不厭其多。倘價昂即行停止。不致有妨民食。至直屬需用多寡。信到即可如數運送。得旨。得雨之後仰賴

天恩。竟有轉歉為豐之幾。並此亦可不用矣。○又奏。下江於七月初三等日。大風驟雨。江潮

盛漲。沿江沿海州縣。漫入田廬。飛飭蘇州布政使。委員確勘。上江徽寧池太數郡。亦於七月初旬。或因山水驟漲。或因起蛟發水。田舍人口間被衝淹。亦已飛行江寧布政使。委員查勘。如有成災。即行照例辦理。得旨。下江有災。飛飭蘇州布政使。上江有災。飛行江寧布政使。此固外省辦事之成例也。然若此。則總督亦易為耳。此等習氣。似汝尚不免安望於他人乎。○江蘇巡撫陳大受奏報。七月初三

平定八年十二

三

等日風潮衝損塘工業。經具摺奏聞外。其沿海沿江各州縣。間有淹沒田廬之處。現飭藩司委員履勘。如果水難即退。勘明是否成災。再行具報。得旨。是應行撫恤者。加意撫恤之。○署安徽巡撫準泰奏報。安省廬鳳潁三府。滁泗二州。所屬州縣衛。現在飛蝗雖盡。而蝻子萌生。抵任後。即飭各處剋期捕盡。不敢稍延。現田禾暢茂。可獲豐收。惟徽州寧國池州太平廣德四府一州屬。或因蛟漲。或因山水

迅發。俱有衝塌廬舍。淹沒田禾之處。當即飛飭藩司。委員確勘。并將安屬就近倉穀。量撥運往。接濟民食。俟確勘情形。分別輕重賑恤。得旨。所奏俱悉。亦甚明晰。惟在實力為之。安省雖屬事簡。然被范璨廢弛已極。須善為整理可也。○江西巡撫塞楞額奏報。南昌袁州。建昌南康等府屬州縣。高阜田畝。早禾被旱。嗣於六月下旬。七月初旬。連日透雨。可望收成。其補種晚禾雜糧者。飭地方官。確查無力之家。酌給口糧籽種。倘有應蠲應緩應賑之處。仍令據實詳報得旨。覽奏曷勝欣慰。但不可出於粉飾。慰朕之意也。其有成災者。仍加意撫恤為要。○浙江巡撫常安奏報。杭嘉湖寧紹嚴台溫處九府。雨水應期。早禾已收。糧價平減。惟金華衢州二府屬。自六月以來。雨澤稀少。早禾不無傷損。業經委員勘驗。量借籽種。俾令乘時補種雜糧。得旨。所奏俱悉。又批。浙省亦不甚遠。此事何不早奏。斯而可緩。

孰不可緩。再如此將以玩視民瘼。罪汝矣。○又奏浙省於七月初三四五等日。雨勢連綿。東北風潮較大。海寧縣老鹽倉觀音堂等處。柴塘間有蹲踞。現飭塘工各員。晝夜搶修。將次告竣。又乍浦城外。天后宮一帶土塘間。有衝塌。石塘幸未損傷。亦飭一律修補。又因江南徽州府。山水陡發。嚴州相距百餘里。所屬之淳安縣。溪水驟漲。居民廬舍。多被淹沒。現照乾隆七年。賑恤玉環營瑞安平陽之例。按名散給。加意撫綏。得旨。此等奏報。惟應據實。不可存慰朕之念。而有所粉飾。恐汝不能免。此近已有旨。向大學士處頒發矣。○又奏浙省嚴州府屬之淳安縣。被水最重。業經賑恤。他如寧波等屬。雖因風雨急驟。田廬皆致淹沒。其與猝被山水衝漂者不同。但浙民積習。偶遇雨水過多。遂有紛紛藉詞。妄希蠲賑。伏念國帑至重。虛糜既非所宜。而民情易驕。陋習尤不可長。務期勘驗確實。辦理一歸至當。

得旨所言亦是但須以公誠之心行妥實之政耳○杭州將軍薩爾哈岱奏前經陳請將存貯馬價銀撥出四萬兩為支借官兵撫育旗人之用嗣經部咨若新丁借用此項銀兩或旋被革退或業經病故其如何扣還之處妥議具報查向來杭州兵拜唐阿內若緣事革退及病故者將伊自置馬匹器械交該管官確實估價轉交頂補之人請照此例凡革退病故新丁所有馬匹器械估價抵欠給頂補者代還原款得旨知道了妥協辦理惟在汝等勉之○福建巡撫周學健奏閩省各屬積年拖欠錢糧甚多固緣戶籍不清苦於賠累亦有糧戶離城遼遠不能自赴繳納以致胥役攬收代完因而假印假串滋弊多端現飭藩司委員攜帶該縣各年日徵紅簿挨戶查對如紅簿無名而執有印串者即知係假以冀徹底查出私收侵蝕之弊得旨如此實心剔弊朕所嘉悅也勉之○署湖廣總督鄂

彌達湖北巡撫晏斯盛奏據襄陽縣知縣郭芝報該縣現產嘉禾有一莖兩穗一莖三穗者穗長六七寸不等洵稱上瑞理合貯匣繪圖具奏得旨嘉禾之可喜者以閭閻盡得豐登為貴耳若夫九穗雙歧碩大且長而不能千畝攸同亦何足異耶○湖北巡撫晏斯盛奏國家於學校外設立省會書院慎選院長伏念人師經師實難其選請嗣後各省本鄉如有老成望重可膺講席者督撫奏明請旨如乏其人仰懇於現任編檢內各揀發一人前往六年一更替以觀教育人才之效得旨養士育賢固為政之先務然亦不可好名而無實若各省皆遣翰林往居臯比之席是又添一學政矣有是政體乎○湖南巡撫蔣溥奏報湖南今歲各屬豐收惟茶陵一州六月初旬以後半月不雨畧被偏旱尚可補種勘不成災無庸題報得旨覽雖不成災亦應撫恤得宜也○又奏遵例恭刊

欽頒諭旨。發各屬令其留心觀覽。得旨。覽惟在實力行之不然。與騰黃貼示以塞責者何異。○又奏湖南水陸汛地營房墩臺望樓等項。舊多殘缺。前會同督臣阿爾賽奏請動用舵桿洲工程節省銀一萬兩。分別修建。陸續將次告竣。得旨。實力為之。以期營伍漸有起色可耳。○又奏楚南士習囂凌。所當慎選教官。以資訓誨。其有劣蹟昭著及老邁廢疾之員。已於大計內列入奏牘。餘請會同學臣嚴加

三
三

三

甄別。除年雖老而神力尚健文理通順者。准其照舊供職外。倘有漸至衰頹訓迪無效。即行咨部罷黜。得旨。好應如是辦理者。○湖廣提督王無黨奏報修整軍械陸續完備。并將次巡查各營協器械船隻考校官兵技藝等因。得旨。覽實力為之。不可稍涉粉飾也。江南各省已查閱營伍將次及湖廣矣。告之鄂。彌達。○河南巡撫碩色奏報歸德府屬一帶飛蝗入境。隨委員協同各該縣撲捕。業經淨盡。

其餘如陳州府屬之沈邱太康光州屬之商城等縣。現率該縣緊捕。但飛蝗停處。即有遺下蝻子。亦徧行搜撲。無致貽害民間。得旨。是嚴飭督捕。毋涉粉飾也。○山東巡撫喀爾吉善議覆據登州總兵譚行義奏請各營兵餉按月支給。以杜兵丁花銷。查通省支放自應畫一起司請領。除各營或按季支領。或兩季兼領。以省腳費。仍照舊例辦理外。請於領回日儘數移交同城文員貯庫。於每月朔日會同散給。具報得旨。如所奏行。○甘肅巡撫黃廷桂奏據土司楊冲霄詳稱。奸僧馬爾完卜武生馬履祉等勾引所管朱扎等番族聚眾挖路。不容行走。屢掠人口糧石馬匹。又據各番民控土司楊冲霄縱容頭目科派勒索等情。隨會同督臣慶復質訊。後將此案土奸分別懲治外。其土司每歲所收土民錢物原係養廉之需。請嗣後量定其數。交納地方官。勒石曉諭。俾各遵守得旨。此等事視之雖細。而

三
三

三

辦理不妥。往往釀成禍端。慎為之。○貴州鎮遠鎮總兵官冷文瑞奏。各協營民苗村寨。雨水需足。俱卜有秋。糧價日就平減。所轄苗疆重地。惟有訓練官兵。綏輯苗衆。實心保衛百姓。得旨。欣慰覽之。又批。須實力行之。今江南等省。查出營伍不齊。汝等非不聞知。則外省吏治。率多粉飾。已可概見。將次未必不查及汝省也。告之張廣泗。令其早為之。

實錄卷二十二

書

大清高宗法天隆運至誠先覺體元立極敷文奮武孝慈神聖純皇帝實錄卷之二百二十一

大清高宗法天隆運至誠先覺體元立極敷文奮武孝慈神聖純皇帝實錄卷之二百二十二

纂修官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶隆

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部工部事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄四次臣德瑛經筵講官太子少保工部尚書紀錄六次臣曹振鏞等奉

敕修

乾隆九年甲子八月乙巳朔鴻臚寺卿梅穀

實錄卷二十二

成奏。本寺序班前經臣請定額。并飭遵照會典。行文學臣咨取。毋許止憑同鄉官印結。令生員自行具呈。乃部議止準定額。餘以立法既詳。無庸再議。伏思員額既定。得者更為榮幸。若止憑印結濫收。將夤緣請託弊端滋甚。請仍照會典舊例。由學臣咨取。將生員自行具呈之處停止。得旨。著照所請行。該部知道。

○是日起

上以祭

社稷壇齋戒三日。○丙午。諭內閣禮部所修禮書。每次進呈。俱有錯誤。該部專司典禮。而於職分內事。漠不經心。是何體制。著將該堂官交部察議。至任蘭枝。乃翰林出身。文章之事。是其所能。而亦一味推諉。過誤多端。著嚴察議奏。○又諭大學士等。天津河間二府屬。本年雖獲有秋。究非豐收。景州滄州。尤屬不及。慶雲則猶有雨水未足之地。小民當積歉之後。朕心倍為廛念。可傳諭

實錄卷三三

二

總督高斌。如尚有應行料理之事。著即加意料理。尋奏景州滄州禾稼收成。尚有七分。惟慶雲一邑。被旱貧民。漸有出外謀食者。其慶雲接壤之鹽山縣。情形畧同。現將採買豫省及大名之麥糧。撥運三萬石。及時借作籽種。再動撥司庫銀三萬兩。收買大名所產高粱。查明戶口。賑卹有餘。留為二縣來春借糶之用。專委天津道陶正中督查得旨。覽奏俱悉。看來陶正中尚能辦

實錄卷三三

三

此也。○吏部尚書公訥親奏。遠科舉人多屬衰庸。如截取得選知縣。姑令赴任。察其不能稱職。然後降調改教。則事務已多廢弛。嗣後請擇年力尚強者。分部學習一年。期滿果堪勝任。再請歸班選用。舉人既經停選。其應得各缺。暫令進士抵選。嗣吏部左侍郎田懋秦分部學習之例。雍正年間已行之。爾時並未辦事畫稿。第於數日內。偶一進署。無事而歸。堂官並難稽其勤惰。何由察其才識。是以旋行停止。況各省知縣之缺。其選用班次。外省陞任題補之人。與進士教習期滿捐賑議叙等項。外多才幹。退而大不可問者。何項無之。寧獨舉人要在為督撫者。加意整飭耳。嗣請仍照舊例選用。但令吏部過堂時。詳加驗看。九卿驗看時。不得稍為姑息。加意甄別。倘再有年力衰邁者。引見時。自難逃洞鑒。至該員到任後。令督撫不時稽察。如不勝任。勿稍寬容。則例不更張。而衰庸自退矣。得旨。訥親之

奏朕不即以為是當而必可行但其摺內所云姑令赴任即督撫察其不能稱職亦須待至一半年而此際事務廢弛已多則深中時弊而姑息一人貽誤一方此咎朕亦不能自解即田懋此摺所云如意甄別豈非朕向日所諭九卿者乎汰之不勝汰而日久復成故套矣此用人之難也如訥親所奏進士必喜而舉人謗之如田懋所奏舉人無屈而吏治有妨輾轉思維朕亦不得良策將此一併議

實錄卷一百一十二

四

奏尋議請定三年一次揀選於每科會試榜發後奏派大臣除甫經中式者毋庸揀選外其餘前科舉人通行驗看擇年力強健質地明白堪任縣令者列為一等各按科分名次銓選至下科揀選時除上次不列一二等者不准再揀選外再將入選而尚未用并下次應揀選之人挑足五百名為定數遇各省需人與別項應挑人員一體揀發至教職一項訥親原奏內云凡進士拔貢出身者尚多年

力壯盛其恩歲等項類皆衰老難用應一併酌議等語請將會試舉人揀選知縣外再擇年力精神堪司訓迪者列入二等仍各按科分名次照就教舉人原班以正諭銓選其揀選一二等外之舉人准其改教以教諭管訓導事與歲貢分缺銓選再恩貢之應選教諭歲貢之應選訓導各員應於每科鄉試後令各督撫學政大加淘汰除衰憊無用者給以應得職銜休致外仍各註冊備選至該員輪

實錄卷一百一十二

五

選時應令該督撫詳加驗看從之○副都統管理通州米廠事務慶泰王保奏稱據大學士鄂爾泰等議都統永興請於通州添設米廠加採官米以備減糶平價等因查通州新城原設右翼一廠今左翼議再設一處通州舊城內有入官房一所可作米廠請飭該旗轉行地方官辦理再兩廠各領銀一萬兩收買米石為數既多辦事官兵亦宜添撥請交八旗大臣於每翼滿蒙漢內揀選章京驍騎

校等員。每廠各派官四員。並照京城米廠例。三年一換。交部察其能否。其看守領催馬甲。於舊設十六名外。添足四十名之數。按翼分補。所有官兵飯食銀兩。照舊廠例。於生息項內賞給。得旨。如所議行。○丁未。祭

先師孔子。遣和親王弘晝行禮。○諭臺灣雍正七年以後。升墾田園。欽奉

皇考諭旨。照同安則例升科。後經部議。以同安科則過輕。應將臺地新墾之田園。按照臺灣

平定未墾字三

六

舊額輸納。朕念臺民遠隔海洋。應加薄賦之恩。以昭優恤。除從前開闢田園。照依舊額。毋庸減則外。其雍正七年以後報墾之地。仍遵雍正九年奉

旨之案辦理。其已照同安下則徵收者。亦不必再議加賦。至嗣後墾闢田園。令地方官確勘肥瘠。酌量實在科則。照同安則例。分別上中下。定額徵收。俾臺民輸納寬舒。以昭朕加惠邊方之至意。○大學士鄂爾泰等議覆編修

實錄未墾字三

七

楊開鼎進呈經史內稱學以敦行為主。尤以明經為要。請飭國子監及各府州縣學。時時以經學造士。學臣考校生童。亦務以經義與四書文並重。查六經為載道之書。國家設科取士。自州縣試以至鄉會。近奉諭旨。訓飭考官。不得專重四書文。而忽經義。請再行通飭考校各官。如四書文雖佳。而經義影響游移者。概置不錄。士子自必勉強學問。經義日明。至摺內稱教職一項。當於舉人副拔貢生中推選。其輪貢未至。願老者亦請挨班間用等語。已於尚書公訥親條奏內。一併定議。從之。○兵部奏請。嗣後凡八旗滿洲。補放外省。隸其管轄者。係五服之內。飭令迴避。其五服以外。毋庸迴避。從之。○工部議准。閩浙總督那蘇圖疏請。將閩省詔安縣之紅花嶺。新設守備一員。白葉村。新設把總一員。兵三十名。合溪埤頭坪。路村。新設三塘。每塘兵十名。添建一切衙署營房。所需工料。於地丁項內支給。

從之。○戊申祭

大社

大稷

上親詣行禮。○詣

皇太后宮問安。○諭今日朕親祭

社稷壇。張鵬翀於跼班之地連聲咳嗽。甚屬不

合。著交部察議。○諭鑒儀衛香步輦既改名

木輅。此後陳設四輅時。照爾等所定次序。將

涼步輦。即在香步輦處陳設。○己酉。諭軍機

實錄卷三十三

八

大臣等據江蘇學政開泰奏稱。聞得上江徽

州寧國二府。七月初五六日。大雨出蛟山水

驟發。徽州府城內水深數尺。城外深二丈餘。

寧國府城內深數尺至一丈許。其各屬水勢

大小不等。人口田廬均有淹損等語。徽寧二

府被水。未見該撫奏聞。想范璨已經起程。準

泰尚未到任。爾等可即寄信與準泰。令其查

勘辦理。無使小民失所。尋奏查歙縣休寧婺源

三縣。山多灘急。大雨連朝。又兼蛟漲。民人

遭水顛連。尤堪憫惻。績溪寧國旌德涇縣太

平建平等縣。同時被水。廬舍人口傷損無多。

宣城南陵蕪湖繁昌等縣。隄圩間有衝決。貴

池東流廣德青陽等州縣。或本地水發。或上

游蛟漲。經過旋即消落。其安慶宣州建陽三

衛田禾雖有淹損。而被災最輕。以上二十州

縣衛。已飭布政使委員一面撫恤。一面確勘

成災分數。并咨督臣尹繼善撥米八千石。運

往接濟外。復動司庫銀二萬兩。解存徽州府

實錄卷三十三

九

庫。以便就近支給。不致缺乏等因。得旨。據此

奏則甚妥協。堪慰朕懷矣。但須實力為之。○

戶部議覆山東巡撫喀爾吉善奏。青州滿營

兵米向動府倉貯穀支給。將兵米折銀貯庫。

秋後買補。嗣因穀價不敷。歲多賠累。屢經前

議。以青州買豆則易。買穀則難。鄒平等縣距

青較近。令將額徵漕米。撥給青州兵糧。再於

附近水次之禹城等州縣。從前改徵黑豆數

內。仍令徵米起運。其額運黑豆。即分飭鄒平

等縣於德州水次將青州兵米之價採買交兌。今鄒平等縣又以豆少價昂。不敷採買為慮。請將濟東二屬臨邑等十二州縣原額黑豆外。其隨豆一五耗米。令民一體完豆。以抵鄒平等處額豆。即以此項豆價歸臨邑等處為辦漕耗費。應如所議辦理。第查東省漕米除額徵外。每米一石。另納耗米一斗五升。原以津貼官丁修倉出運各費。今既一體完豆。抵作正額。其應給臨邑等處漕費。所有豆價歸項。曾否足數所用。應酌官民兵丁均無貽累之處。一面辦理。一面報部。得旨依議速行。

○庚戌

上詣

皇太后宮問安。○遣官祭

關帝廟。○戶部議覆江西巡撫塞楞額疏報江西省自五月以後。雨澤愆期。據布政使詳稱。南昌府屬之新建。豐城。臨江府屬之清江。新喻。新淦。峽江。撫州府屬之臨川。東鄉。建昌。

府屬之南豐。廣信府屬之玉山。饒州府屬之餘干。南康府屬之安義。九江府屬之德安等縣。早禾被旱情形。酌量撫卹。應如所請。飭該撫分別應賑應貸。加意撫綏。毋使一夫失所得旨。依議速行。○順天鄉試。以順天府府尹蔣炳為監臨。官工部尚書汪由敦為正考官。國子監祭酒崔紀為副考官。豁免安徽省雍正十三年分鳳淮二倉項下未完銀米。及常盈倉地租額。○辛亥。戶部議准山西巡撫阿里衮疏報。太原府屬文水縣之永樂等三村。秋禾被淹。澤州府屬陵川縣之桃山頭等八村。被雹傷禾。請酌借籽種口糧。以資接濟。其本年額賦及春借穀石。均請緩徵。得旨依議速行。○壬子。諭曰。海澄公黃仕簡著賞給資治通鑑。康熙字典各一部。上用緞二疋。寧綢二疋。仍令回籍。伊係功臣之裔。朕深望其成立。以繼家聲。在籍之日。可勤勉學問。間至督撫衙門。聆其教導。俟可以來京効力之時。再行

奏聞請旨。○戶部議覆河南巡撫碩色疏稱。豫省漕糧內。先經部議改徵黑豆七萬石。以供京師飼馬之用。現據兵部侍郎雅爾圖奏稱。京師豆價稍昂。豫省產豆甚多。請將該省額米一十五萬餘石。悉改黑豆起運。第該省產豆之地。仍不若產穀之廣。若盡改徵豆。價值必昂。伏查祥符等五十州縣。從前原徵額豆二萬九千餘石。嗣於乾隆五年。改徵米石。今請仍改徵豆起運。應如所請。從之。○癸丑。

太宗文皇帝忌辰。遣官祭

昭陵。○

上詣

奉先殿行禮。○諭國家賓興大典。原欲得品行端方。文學優贍之人。以為朝廷有用之材。成菁莪棫樸之治。無如科場之中。易藏弊竇。我皇考加意整頓。數科以來。內簾之關節。已覺肅清。而外簾挾帶之弊。一時難除。近則日益加甚。朕早已聞知。屢行申飭。至再至三。並非不

教而罰也。今當鄉試之年。又復先期告戒。以為若輩自謹遵功令。痛自悛改矣。乃昨日頭場點名。朕命親近大臣數人。前往監看。竟搜出懷挾二十一人。或藏於衣帽。或藏於器具。且有藏於褰衣禪袴中者。其喪心無恥。至於此極。朝廷之取士。蓋欲用之也。既欲用之。朕安得不重待之。乃朕欲重待之。而若輩自輕自賤。若此。以稱先法古之徒。竟同鼠竊狗偷之輩。冥頑不靈。不可化誨。若不立法嚴查。則

諸弊何由而除。真才何由而見。若欲擇人而施。又何從豫知其情弊之有無。而為之區別乎。滿洲原有呈身之路。弓馬技藝。何者不可見長。而必勉強於文場。以思僥倖於萬一。既欲讀書進取。則當潛心於學。恥為穿窬。至於江浙之人。未必不能作文。而乃存弋獲之心。為苟且之計。以致惡習相沿。視為泛常。違條觸法而不知。虧體辱親而不顧。士習日壞。風俗日漓。朕於執法之際。實惻怛哀矜。而深以

不能化導。抱愧於心也。查懷挾生員內。同陵泰。乃少詹事僊保之子。生員圖敏。乃原任禮部郎中穆臣之子。伊等平日。既不能教訓其子。又復縱容犯法。咎亦何辭。科場懷挾。原有處分父師之例。茲特申明其令。僊保。穆臣。俱著交部嚴加議處。嗣後倘有犯者。將父師一併查究。今年懷挾如許之多。而從前各科。悉皆朦混了事。著將乾隆元年以後。監試之御史。除內簾外。俱交部查出議處。至京師如此。則外省情弊。不問可知。該撫藩等專任監臨。提調之責。總視為具文。一味姑容。取悅於衆。深負委任。嗣後著照京師之例。監臨官董率各官。盡心嚴查。務使作弊之人。不得漏網。倘仍蹈舊轍。經朕訪聞。或被科道糾參。或朕差人前往搜出。必將監臨提調等。照今年處分從前疎防御史之例。一併從重議處。○又諭江南總督尹繼善奏稱。淮徐海道黃蘭谷。總理銅蕭等處水利工程。漫不經心。從未親身

一到。以致承修之員。任意草率偷減。甚屬曠誤。應請旨嚴加議處等語。黃蘭谷著交部嚴加議處。其淮徐海道員缺。著徐州府知府莊亨陽補授。徐州府知府員缺。著內閣侍讀定長補授。○大學士鄂爾泰等議覆御史李清芳奏稱。錢法一事。鼓鑄全賴銅觔。粵東前年開採官價。定以每觔一錢。後因商人工本不敷而止。現廣東福建。俱開爐鼓鑄。而銅觔皆從滇省運至。所費不貲。倘因時制宜。令其工本敷裕。則楚粵近地所產。省費何啻數倍。應如所請量加。俾商人踴躍赴公。官銅自無匱乏。至摺內稱。每銅百觔。輸納正課二十觔外。一半官買。一半聽商自賣。則民用有資。私燬之弊自絕。查民間銅觔果多。自不肯犯法私燬。況現在原不禁商售賣。所奏應無庸議。從之。○賑卹四川成都府屬各州縣。被水災民。并緩徵本年額賦。○甲寅。

上詣

皇太后宮問安。○戶部議覆山東巡撫喀爾吉善奏稱各省舉人會試向設車價銀在各州縣地丁項下解司勻給而新中舉人花紅公宴等銀於各州縣地丁項下自行支給該處中式人多則所給者少人少則所給者多如無中式解司充餉未免多寡不均請照會試車價例通計一省勻給如該處中式人少將餘銀協濟不足之處應如所請從之。○廣西布政使唐綏祖以擅動庫帑假公漁利革職。

清錄事堂

十六

調西安布政使帥念祖為廣西布政使以戶科掌印給事中慧中署理西安布政使印務。

○乙卯。

太祖高皇帝忌辰遣官祭

福陵。

上詣

奉先殿行禮。○諭各省科場懷挾之弊朕已降旨令各該省監臨提調照京師今年之例嚴行搜檢務使諸弊肅清以襄大典嗣後每科

有無懷挾若干人俱著該督撫具摺奏聞。○

兵部左侍郎舒赫德奏科場額中舉人一名向止錄取科舉三十名嗣後增至六十名近來部議增至百名本為江浙人文較盛故寬以收之至中邊小省固有不同不得濫取以足額請照百名之數遞加裁減得旨此奏是大學士九卿議奏尋議直隸江南浙江江西湖廣福建等六大省每舉人一名錄科八十名山東河南山西廣東陝西四川等六中省每舉人一名錄科六十名廣西雲南貴州等三小省每舉人一名錄科五十名順天中式滿合二字號共四十一名奉天夾字號四名宣化旦字號四名長蘆等處鹵字號一名南北四字號七十八名中四字號每二十卷中一名以上各字號現應試人數雖屬無多亦應令該學臣及監臣等嚴加考試務取三場精通方准錄送即應試人多亦不得過八十八名之額至滿合二字號除已經科試錄取照

冊咨送外。其未經科試者。學臣憑文錄遺。一併造冊咨送禮部。轉行兵部考試。馬步箭合式。方准一體入場。外省督撫等衙門亦不得復行大收。從之。○丙辰。

上詣

皇太后宮問安。○丁巳。

萬壽節。

上詣

大高殿。

實錄卷三十三

十八

壽皇殿行禮。○遣官祭

太廟後殿。○遣官祭

福陵。

昭陵。

昭西陵。

孝陵。

孝東陵。

景陵。

泰陵。○遣官祭

顯佑宮。

東嶽廟。

城隍廟。○詣

皇太后宮行禮。御太和殿。王以下文武各官。

進表行慶賀禮。○戊午。諭軍機大臣等。託庸

叅唐綏祖本內有銅觔鉛觔粟米三案。朕詢

問楊錫紱。據楊錫紱稱。唐綏祖曾經稟知巡

撫通融辦理等語。是以朕將此案。改交那蘇

圖查審。爾等可寄信與那蘇圖。令其秉公審

實錄卷三十三

十九

理。○吏部議覆署廣西巡撫託庸疏稱。新設之思陵及上下凍二土州吏目。閱俸已屆三年。報滿日。即委員前往交代。照例撤回內地。咨部候陞。應如所請。二土州吏目。准作沿邊烟瘴水土最為惡劣之缺。如遇缺出。該督撫於內地對品人員內。照例揀選。咨部調補。三年俸滿。撤回內地候陞。從之。○兵部遵旨議覆川陝總督公慶復奏。稱沿邊關隘要缺。未便將保舉之叅遊都守千總等員。同時給

咨赴部引見。以致委署之員。請嗣後將內地人員。分作二班。邊遠分作三班。陸續調署。給咨送部。再川陝從前候補守備。人多缺少。現在壅滯。且題補之缺。分用滿洲。再加豫保之員。則候補者更難得缺。并請斟酌變通。分缺補用。應如所請。其分用滿員之陝甘二省。及四川松潘一鎮。守備缺出。第一補用滿員。第二掣用豫保千總。第三四五題請候補人員。至川省並無分用滿員之營。守備缺出第一

實錄卷五十三

二十一

歸豫保千總。第二三四歸候補人員。從之。○兵部侍郎舒赫德奏科舉之制。徒尚空言。不適實用。墨卷房行。轉相抄襲。經義各占一經。擬題應試。表判策問。亦皆豫擬成文。隨題敷衍。請探本清源。別求遴選真才之道。得旨。大學士看。尋議科舉之法。自明至今。皆出時藝。窮其流弊。誠有如舒赫德所奏者。然謂時文經義表判策論。皆空言勦襲。無適於用。此正不責實之過耳。夫時藝所論。皆孔孟緒餘。作

文者必於聖賢義理融會貫通。而又參之經史子集。以發其光華。範之規矩準繩。以密其法律。然後得稱佳文。雖曰小技。而文武經濟之才。皆出其中。未嘗不適實用也。乃因積久弊生。不思力挽末流之失。而轉咎立法之非。不亦過乎。即經義表判策論。苟求其實。亦豈易副。今若著為令甲。經文與四書並重。其餘必淹貫詞章。而後可以為表。必通曉律令。而後可以為判。必論斷有識。而後可以為論。必

實錄卷五十三

五十一

通達古今。而後可以為策。凡此皆內可見本原之學。外可驗經濟之才。何一不切於實用。倘必變今之法。行古之制。如鄉舉里選。法非不良。但上以實求。保無下以名應。若乃無大更改。而仍求之語言文字之間。則論策今所現行。表者賦頌之流。是詩賦亦未嘗盡廢。至於口問經義。背誦疏文。如古所云帖括。則亦僅資誦習。而於文義多致面牆。其餘若三傳科。史科。以及明法書學算學等。或駁雜放紛。

或偏長曲技。尤不足以崇聖學而勵真才。惟懲循名之失。求責實之效。由今之道。振作而補救之。而司文衡職課士者。果能力除積習。杜絕僥倖。將見文風日盛。而真才日出矣。蓋立法取士。不過如是。無事更張定制為也。得旨。所議是。○己未。

上奉

皇太后幸悅心殿進宴。

實錄卷三十三

三十二

大清高宗法天隆運至誠先覺體元立極敷文奮武孝慈神聖純皇帝實錄卷之二百二十二

大清高宗法天隆運至誠先覺體元立極敷文奮武孝慈神聖純皇帝實錄卷之二百二十三

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

以官經筵講官太子太傅文華殿大學士文淵閣領事稽察欽奉 上諭事件處管理理部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

較修

乾隆九年甲子八月庚申。

實錄卷三十三

上詣

皇太后宮問安。○諭國家設科取士。原欲遴選真才。以備任使。典至重也。近來士習不端。不惟文風未見振起。抑且懷挾作弊。行類穿窬。詭計百出。竟有意想所不到者。朕早已聞知。屢行訓飭。今年順天鄉試。特遣親近大臣。嚴密稽查。頭場搜出夾帶二十一人。其四書三題。係朕親出。不過取其畧冷。不在外間擬議之中。而場內多人。遂爾闕筆。交白卷者六十

八人不完卷者三百二十九人。真草違式。及文不對題者二百七十六人。頭場如此。伊等尚不知儆。二場仍有搜出夾帶者二十一人。及見稽查嚴密。臨點名時散去者竟至二千八百餘人之多。士子品行如此。學問如此。是全仗懷挾作弊。以為應試取功名之具。而猶且嘵嘵嘖嘖。肆出誹言。以為搜查太過。夫不如此搜查。則盜風且日熾矣。風俗澆漓。至於此極。然朕總不能正己。以正士風。實增慚愧。

實錄卷三十三

二

而言之可為浩嘆者也。況朕所出三題。並非在四書之外。豈有身列儒林。一部四書。尚不能通解。而公然矢口觀光。應國家賓興之典乎。生員由學政錄科。貢監由祭酒等錄科。伊等所司何事。而將不能終卷之人。濫行咨送。甚屬不合。著交部察議。嗣後文藝荒疎者。俱不准錄送。京師既然若此。則外省防檢疎畧。瞻徇情面。苟且姑容。奸弊叢集。亦不問可知。士子讀書稽古。先崇品行。應試之時。乃伊等

進身之始。理宜循規蹈矩。豈應作奸犯科。無論外省之遠。朕不復遣人前往查察。即在京師。每科委員搜檢。如防盜賊。亦無此政體。而為士子者。顧乃頑鈍無恥。習為固然。以致人心士風。日益隳壞。尚何望人才蔚起。為國家分猷宣力之寄乎。至於內場之弊。則又豫擬題目。勦襲雷同。千篇一律。總由平日不肯專心向學。惟務僥倖於一時。希圖利祿。朱子云。場屋之文。必皆道其平日之學。胸中之蘊。而不詭於聖人。由是而仕。皆供其職勤其事。心乎國心乎民。而不為身計。試問今之為士者。能乎不能乎。二三場表判策論。既懸為令甲。士子自當一并留心。而平日視為具文。牕下並未寓目。惟有臨時抄寫之一法。若朕亦如四書之命題。則不能完場者。又不知幾千人矣。朕心不忍。是以仍循其舊。以全伊等顏面。然嗣後若不留心研究。如向之弊。因循而不改。朕亦將如四書之命題矣。彼時莫謂朕不

實錄卷三十三

三

戒而視成也。不然者。豈科場之題例應士子自擬。不應獨開生面乎。從來為治之道。貴乎覈實。一切因循姑息之習。皆當痛除。近者士風之囂。一至於此。而好諛之人。浮薄之士。尚言國家人文日盛。以冀開恩科。廣解額者。往往有之。初不以士習之邪正。文品之醇疵為念。嗣後若有以加科廣額為請者。必加以違制之處分。著為令。至於議減中式之額。則非眾所樂聞。或言士子類皆寒素。專藉科目為進身之階。或言一習舉業。則不能更為農商。謀生無計。甚至有言士心失望。或妄生議論。或別生事端者。此皆毫無識見之人。不知為政之體要。國家科目。豈為養老恤貧而設乎。若有造言生事者。是身投憲網。國法具在。何能逃於天壤哉。夫國家旁求俊乂。本欲量能授官。以熙庶績。若一味濫取廣收。如何可得真才實濟。現在解額已多。壅滯日甚。舉人需次。知縣約非三十年不可得。少年登科及乎

筮仕已屬衰遲。昏憤龍鍾。難司民社。則是以無用之人。塞有用之路。既於吏治有妨。而伊等當可用之年。又未遇應用之會。必相率而同歸於無用。當此之時。為上者欲棄置之。則無罪。欲姑用之。又不可。伊等固自貽伊戚。而辨天下事者。又安可委曲遷就。以從人便。而貽誤公事乎。朱子曾言。取士之流弊已極。不可不一變。以今之士習觀之。種種醜劣之行。既盡已敗露。朕明知濫收之為害。精選之有功。若仍復大度包荒。不為整頓。朕不忍為也。蓋愛惜培養者。朕之本懷。而慎重清釐者。政之大體。與其寬登選以啓倖進之門。不如嚴俊造以收得人之實。此朕寓矜惜於整飭之中。曲為調劑。萬不得已之苦衷也。其鄉試中額。作何量為裁減之處。著大學士九卿會議具奏。此次經朕嚴訓以後。如果文風日盛。士習克端。朕又何難停罷諸途專用科目之人。并將此曉諭中外知之。尋議直省解額酌減。

十分之一。查順天上科額中二百五十四名。內滿洲蒙古漢軍除總加五經中額二名外。滿洲蒙古額中三十名。酌減三名。漢軍十三名。減一名。南北四除總加五經中額四名外。南北四均三十九名。各減三名。中四向例。每十五卷中一名。酌改二十卷中一名。直隸貝字號一百八名。除奉天夾字號中四名。宣化旦字號中四名。長蘆等處鹵字號中一名外。貝字號減九名。江南上江五十名。減五名。下江七十六名。減七名。浙江江西均一百四名。各減十名。湖南四十九名。減四名。湖北五十三名。減五名。福建九十四名。除臺字二名外。減九名。山東七十六名。除四氏學三名外。減七名。河南七十六名。減七名。山西六十六名。減六名。廣東七十九名。除商籍一名外。減七名。四川六十六名。減六名。陝西六十七名。除甘肅律字號二名。寧夏丁字號二名。榆林等七處木字號一名外。減六名。廣西五十名。減

五名。貴州四十四名。減四名。雲南五十九名。減五名。以乾隆丁卯科為始。從之。○又諭吏部郎中王應綵之弟王應綸。以懷挾搜出。在弟兄之間。原可不問。及但王應綸當哈達哈面前。從口中吐出表判文。有何裁害之弊。而王應綵逢人極口稱冤。則是伊弟犯法。伊並不以為非。尚欲袒護。亦屬不合。著交部察議。○又諭江南海州沭陽贛榆三州縣連歲被災。今年雖收成較好。然元氣未必全復。所有帶徵之漕糧。係七八兩年未完之項。今若分限兩年。與本年新糧並徵。是仍於一年之內。並徵兩年之米。小民未免拮据。著將此三州縣七八兩年未完田地。緩漕。於本年起分限四年徵收。以紓民力。該部即遵諭行。○工科給事中吳煒奏。科場搜檢。凡情真罪當者。固不足惜。但以一二十人之不肖。累及千萬人。露體褻慢。恐非所以培士氣而鼓善類。且諸臣懸賞之令。每搜得一人。給銀三兩。聞有搜

役輩私入紙片以取利者。此中弊竇。請勅部詳審真偽。以定懷挾確情。立法更為盡善。得旨。吳煒所奏。知道了。科場懷挾之弊甚多。勢不得不嚴行搜檢。至於搜到褻衣之內。原屬非體。然若果無其人。則朕將治哈達哈等。以太過之罪矣。而無如竟有藏匿於禪袴中者。委查之員。何由豫知其孰為有。孰為無。而分別之。則不得不概行搜檢。而朕雖欲全諸士子之顏面。竟無辭以責派查之臣為太過矣。然此等敗類。必係目不識丁之人。而得與觀光之列。總由學政濫行錄送。以致紊亂考場。清濁不分如此。將來學政等。如何慎選錄送。併搜檢等事。如何詳悉定例之處。著原議之。大臣一併議奏。○辛酉。工部議覆河南巡撫碩色奏稱。硝磺嚴禁私販。請地方凡殷實之家。願開官硝店者。如官鹽店例。報官准開。貧民零賣硝觔。聽照時價收買。并設印簿。逐日登填。月底送州縣查核。庶免偷漏。查設立官

店。可杜囤戶私收。應如所請辦理。但恐挾資貿易之人。圖利居奇。難免輕出重入。抑勒價值等弊。且官為給照。易啟胥役需索。應令該撫嚴飭地方官。務令店戶按照時價。不得短價收買。遇採辦官硝。及本地匠鋪需用。須驗明印批。始行發賣。併嚴禁胥役。毋得需索。歲底將各店戶收發價值。及硝觔數目。逐一開明。出具並無偷漏甘結詳報外。仍嚴飭文武員弁。實力稽查。毋致私販出境。從之。○壬戌。

秋分夕

月於西郊。遣寧郡王弘皎行禮。○正紅旗都統等議覆正黃旗漢軍副都統王廷臣奏稱。康熙年間定例。操演火器營。有排列鹿角。九進連環陣式。及不排鹿角。五十步老連環陣式。嗣後竟將老連環陣式。置而不演。請飭各旗將二陣合操。應如所請。每年春秋二季。八旗四旗各合操二次。遇廬溝橋兵部閱操之年。仍照舊例操演。又稱。八旗礮位鳥鎗。三年一

次於九月初一日起赴盧溝橋操演一月。如遇秋禾晚熟。請改後半月。以免踐踏。亦應如所請。於開操前。都統等委員查勘。如八月內田禾尚未全登。及大雨泥濘。礮車難運。酌量展限。或十日。或半月。餘照舊於九月初一日開操。從之。○補行乾隆四年及七年分福建省大計。卓異官十員。不謹官一員。罷軟官一員。年老官五員。有疾官一員。才力不及官二員。浮躁官一員。分別陞賞處分如例。○癸亥。遣官祭昭忠祠。○賑恤廣東廣州府屬之東莞增城惠州府屬之永安博羅歸善潮州府屬之大埔海陽澄海肇慶府屬之高要高明恩平開平等十二縣。被水災民。○甲子。

上詣

皇太后宮問安。○大學士鄂爾泰等議覆浙江布政使潘思榘奏稱。浙省全賴溪湖。容蓄灌溉。如餘杭之南湖。會稽之鑑湖。上虞之夏蓋。餘姚之汝仇慈谿之孫湖。向稱巨浸。今已彌

望田疇。占湖之禁。雖嚴。皆由地方官奉行不實。一有報墾。濫准升科。并將舊有隄閘。損壞貽害農田。請行嚴禁。查湖蕩水利攸關。而奸胥地棍。每藉升科之名。任意侵占。一遇旱澇。成災議蠲。議賑所費。益鉅。應如所請。除從前已墾地畝外。如有報升。飭地方官親查。倘占湖為田。即行禁止。從之。○吏部等部議覆甘肅巡撫黃廷桂據按察使鄂昌奏。請將張掖縣縣丞移駐縣屬之東樂堡稽查正東東南一帶地方。并將東樂堡

驛馬亦令該縣丞管理。查張掖一縣地及千里。向係兩衛兩所分境管轄。其知縣縣丞同處一城稽查。難遍應如所請。移駐東樂驛馬歸縣丞經營。其東南十五堡額糧草束及洪水南古城二堡兵糧亦令徵收。原設書吏一名。另於張掖縣撥給三名。從之。○乙丑。以舉行仲秋經筵。遣官告祭。

奉先殿

傳心殿

上御文華殿講官暨侍班之大學士九卿詹事等行二跪六叩禮分班入殿內序立直講官四出就講案前行一跪三叩禮復位直講官班第梁詩正進講論語居之無倦行之以忠二句講畢上宣御論曰居之無倦者存誠之體行之以忠者致誠之事此夫子因子張之問政而告之以內聖外王之學也蓋內聖外王之學原無居與行之分而違有心與事之歧一誠而已夫何間焉自夫知誘物蔽而亡其正誠斯泯矣故居之心者不能不怠而行之事者不能不偽非特為政者作此而失恒即為學者因此而喪良者多矣故夫子因子張之問政而發明之苟其居之心者一朝乾夕惕之誠行之事者一不欲勿施之乎誠斯立矣政斯行矣何嘗分誠與政為二事又安用其以政而存諸心以政而達諸事乎講官暨侍班官跪聆畢興直講官阿克敦錢陳羣進講易經天地感而萬物化生聖人感人心而天下和平二句講畢

上宣御論曰天地無心以萬物為心聖人無情以萬民為情試觀春生夏長秋收冬藏而飛潛動植之倫各形其形而色其色孰非天地之心哉放勳之時平章百姓而黎民於變時雍孰非聖人之情哉萬物之化生不待天地之感而即見天地之感天下之和平亦不待聖人之感而亦即見聖人之感使天地有心而感萬物則自混茫以來至於今日不知其漏者有幾而斷者凡幾矣惟其以萬物為心是以萬物如是化生終古不窮人不能名強名之曰天地感而萬物化生至於熙皞之世首推唐虞自此以降雖有小康之時均非華胥之世也母亦以有情之感感人之有情此一情也彼亦一情也聖人方且惴惴焉而云天下和平是自欺耳然則如之何而後可曰聖時憲講官暨侍班官跪聆畢大學士張廷玉奏曰皇上統內聖外王之學綜盛德大業之全究極天人研精性命臣等敬聆

聖諭實深欽服。奏畢。諸臣出就拜位。行二跪六叩禮。禮成。

上還宮。賜講官暨侍班官等宴於協和門。○遣官祭賢良祠。○諭大學士徐本老成謹慎。宣力有年。今以抱恙。懇請回籍調理。朕心眷念。特賦詩篇以寵其行。並賜御用冠服。及內府文綺貂皮諸物。令御前侍衛都統永興齋往宣朕諭旨。朕於本月二十五日。行幸南苑。當親至大學士邸寓慰問之。○又諭向來主考同考官之子弟。俱令迴避。不准入場。雍正年間。蒙

皇考准其一體應試。亦未著為定例。是以每科該衙門以應否准其考試請旨。朕看來各科迴避官生。多寡不一。若遇人少之年。則入數甚易。於科場條例。亦不盡一。自以照舊迴避為是。嗣後不必一體考試。○掌盛京內務府關防佐領什圖奏。盛京銀庫貯物繁多。宜分貯他庫。隨時檢點。原設司庫庫使等員。不敷料理。請添設庫使六員。得旨。如所請行。○

丙寅。諭上年天津河間等處被旱成災。朕於常格之外。加恩賑恤。不使窮民失所。今春雨澤又復愆期。麥收歉薄。朕心更為憂慮。幸於五月半後

天賜甘霖。通省霑渥。禾稼豐稔。倍常。朕為萬民額手稱慶。念從前天津河間被災最重之二十六州縣。並續報偏災之霸州等五州縣。目下秋田雖復有收。恐元氣一時未復。著將所借麥種牛力牧費制錢等項。悉行豁免。俾積歉之區。民力寬裕。示朕加恩休養之至意。該部遵諭速行。○吏部議覆。川陝總督公慶復奏稱。陝西督糧道兼轄西鳳郿乾四府州。而驛鹽道向無統轄。請將督糧道加分守西乾二府州銜。照舊管理陝屬糧務。驛鹽道加分巡鳳郿二府州銜。照舊管理驛鹽事務。應如所請。各管分轄之府州縣。以均繁簡。從之。○禮部議准。直隸總督高斌疏稱。遵化州業改為直隸州。玉田豐潤二縣撥歸管轄。嗣後該

州歲科兩試應照大學例。歲試取進文章十八名。武童十五名。內定文武童生各三名於玉田豐潤二縣撥入科試。文章照例。其玉田豐潤舊隸永平府。向撥府學文武童生六名。業歸遵化。應照數裁減。從之。○工部議覆尚書公訥親等奏稱南旺一湖在運河西岸隄列斗門。以洩汶水盛漲。前河臣白鍾山議於湖中截築圈隄。分為內外兩湖。以資蓄水。請將餘地給民認墾。但查議圈之內湖更多高阜。即使截築成隄。亦不能蓄水濟運。應請停止。至湖內積窪之區。可容減下之水。本為耕種所不及。其餘高阜處水小之年。悉可布種。即遇汶水漫溢。數日消退後。仍屬腴田。請將涸出湖地令民耕種。水大時仍以受水免其輸租。歉收之年亦不得請賑等因。查南旺湖地藉洩運河暴漲之水。是以久經封禁。不令民間墾種。今經勘明形勢。請將高阜之地給民布種。應如所議。令河東總河會同山東巡

撫委員查丈。除河工柳園葦地及先賢祠宇墓地外。撥給無業貧民領墾。毋許富戶胥役侵占。并分別銀則。及每戶領給若干具題。所收租銀。即貯道庫。為河工之用。倘遇歉收。亦應如所議。免其輸租。不得請賑。從之。○順天府尹蔣炳奏。順天鄉試。業派親信大臣監同御史嚴行搜檢。至外省積弊。未能肅清。請於放榜後。令巡撫會同學政當面覆試。其卷解部。一并磨勘。得旨。如所請行。下部知之。○丁卯。世宗憲皇帝忌辰。遣官祭泰陵。○上詣奉先殿。壽皇殿行禮。○諭。江西巡撫塞楞額奏。稱江省所屬玉山德興樂平宜黃四縣。於七月初六七等日。山水陡發。居民被淹。已飭布政使遴委官員分頭查勘。隨帶銀兩撫恤賑濟。至有

應行題奏之處。俟臣出闈之日。逐一分別辦理等語。江省玉山等四縣。山水陡發。居民被淹。朕心深為軫念。雖據塞楞額奏稱。已經委員查勘賑恤。其一切應奏之處。亦應即行題奏。辦理不必待至出闈之後。可即傳諭塞楞額知之。○以兵部尚書班第為正黃旗蒙古都統。○戊辰。

上詣

皇太后宮問安。○諭昨日順天府府尹蔣炳條陳外省中式之人。應於榜後覆試一事。朕已降旨允行。但如何覆試之處。未曾奏及。各省難以奉行。必至參差不一。亦屬非體。從來科場取士。首重頭場四書文三篇。士子之通與不通。總不出四書文之外。今應令中式之人。填寫親供時。在巡撫衙門內。嚴行防範。該撫會同學政。出四書閒冷二題。不在擬議之內者。當面考試。聽其盡一日之長。試畢即將原卷與中式卷一并解部。聽候磨勘。如有文理

荒謬。及不能完卷者。該撫該學政不得瞻徇。即行舉出。另行奏聞。候朕降旨。餘照原奏行。該部即速行文各省知之。○又諭今年磨勘。不得照往年之例。著該部臨時請旨。朕另派官員磨勘。○工部議覆雲南總督張允隨疏。稱大理府洱海發源鶴慶府屬之觀音山。挾劍川浪穹諸山之水。歸鄧川之瀾沮河。至大理合點蒼山之十八溪水。匯而成海。下會趙州。蒙化之水。由波羅甸出天生橋。入合江鋪。而總匯於蘭滄江海。身長一百二十里。廣二十餘里。天生橋一帶海口。深寬不及一丈。長止七里有餘。泥沙易滯。每當大雨。海水泛溢。倒流沿海田畝。淹浸請飭瀕海州縣。調民夫挑濬物料。夫糧。於司庫收存官莊變價項內支給。此次疏濬後。如有淤塞。飭各地方官將海濱涸出田畝。令附近居民認墾。照民隄民修之例。責成墾戶修濬。應如所請。從之。○已。

上奉

皇太后幸南苑○

上詣

永慕寺行禮○詣

皇太后行宮問安○

上行圍○是日駐蹕舊衙門翌日如之○庚午

上奉

皇太后幸狼兒窪閱圍○詣

皇太后行宮問安○

上行圍○戶部議覆山東巡撫喀爾吉善疏稱

東省捐監悉照乾隆三年定例辦理外所有

本生輸納穀石時請令自行執攬平斛響攬

以杜官吏浮收之弊查從前捐監案內未經

議及應如所請飭該管道府不時稽查并嚴

禁蠹棍包攬胥役需索等弊從之○禮部

議覆湖北巡撫晏斯盛奏稱科場應試士

子向例許其連日宿場易滋弊竇嗣後應

請停止再貼例如遇題目錯落及文中錯

落過多者例應貼出至點畫小誤試卷油污墨

染字跡猶可辨認者應請免其貼出等因查雍

正八年議准鄉會宿場舉子令監試提調官傳

至至公堂看其謄寫伏思監試提調正當料理

次場印戳卷號之事勢難兼顧應如所請於

出題次日之晚盡令舉子散出如有容留宿

場者將監試提調及本生一并議處又題目

字句錯落應貼者必錯而已改落而已添及

油墨污跡細小者方免貼若錯處未經改正

落處未經添註則疎忽太甚應照舊例貼出

至遺漏全題而於夾縫添註則較題目字句

錯落過多者更甚均應貼出從之○兵部議

覆川陝總督公慶復奏請安西提督控制關

外甘涼西肅等處戰兵俱聽節制肅鎮去安

西尤近一切調遣甚便請將肅鎮所屬除甘

州城守一營外悉隸安西庶為周密查肅鎮

營弁俱在關內安西遙隔關外一切調遣未

便不如仍舊為善得旨著照所議行○工部

議覆兩廣總督調任閩浙總督馬爾泰奏稱潮州府屬之海陽縣地勢低窪。本年入夏後陰雨數日。潦水陡漲。東南北三隄。不無衝決。請動生息銀兩。及時搶修堅固。應如所請。從之。○以故雲南元江府新平縣丞楊昌祚子楊際泰襲職。○辛未。

上詣

皇太后行宮問安。○工部議覆江南河道總督白鍾山奏稱。江南河工各廳。鑲修工程。多用葦柴。惟徐屬豐碭銅沛二廳。地產秫稻。是以專辦秫稻交工。第向來印官河廳分辦。推諉遲延。應令該管河道查明工程險易。需用多寡。於每年七月。酌定銀數。分給各縣印官承辦。定限十月完半。年內全完。派不管河工之廳員。查驗秤收。倘有捐勒印官。及印官派累百姓等弊。該督撫查叅。再各處沿河灘地。有可種植蘆葦處。仍飭地方官勸民栽種。應如所請。從之。○是日。駐蹕南衙門。○壬申。

上詣

皇太后行宮問安。○

上行圓。○吏部議覆湖南巡撫蔣溥奏稱。佐雜官雖卑微。然中有才具可用。足資驅策者。亦有不守官箴。怠惰縱恣者。上司皆應留心稽察甄別。湖南苗疆要缺。自經歷。州判。以至巡察典史。各員。係督撫會同揀選咨補。查定例。道府州縣任內政蹟。令各員自行造冊。四季呈送藩臬核實。轉送督撫。至佐雜等員。一遇揀選缺出。止憑兩司舉報。殊非慎重要缺之道。且佐雜微員。或以政蹟不須造報。任意縱肆。而該上司亦姑容不即揭報。皆事所或有。嗣請佐雜等官。亦照道府州縣例。將任內事實。令該州縣據實按季造冊。申送府州府核實。轉送本道。移會藩臬。轉呈督撫存案。遇有揀選要缺。按冊可稽。微員知有考成。亦當奮勉。向上更有請者。道府州縣政蹟。向令自行造冊。應令本管府州核實轉造。加具

切實考語。呈送本道核轉。而知府直隸州事實。責成本道轉造。道員事實。則由兩司轉造。呈送督撫存案。應如所請。通行直省。一體遵行。從之。○戶部議覆。山西巡撫阿里衮疏稱。晉省太原府等屬六十七州縣。額設官役俸工銀兩。均係隔屬編支。往來領給致多跋涉。請畫一改編。各坐落之州縣。於起運項下。就近扣留支給。應如所請。於乾隆乙丑年為始。一例改正奏銷。其朔平府通判俸工。於坐落之左雲縣。才敷支領。又綏遠城等處同知坐落俱在口外。無可改編。均照舊在附近之朔州。平魯支領。垣曲縣橫嶺巡檢弓兵工食。亦仍就近於絳縣支領。從之。○又覆閩浙總督調任兩廣那蘇圖疏稱。閩省米價不能平減。閩安等營兵米。雖設有營倉。亦難源源撥借。兵丁買食艱難。宜改本色。應如所請。將閩安烽火。雲霄海澄等營。酌給本色四個月。南澳鎮標營。酌給本色六個月。均於臺運金廈提

鎮兵糧餘粟內碾給。或於各該縣倉穀內動借。俟臺穀運到歸款。其楓嶺營四個月本色。於浦城縣額徵內關支所有扣回折色銀兩。解庫充餉。從之。○浙江巡撫常安疏報安吉定海山陰上虞嵊縣蘭溪等州縣開墾額外田地山蕩池塘共九十四頃四畝有奇。以頭等侍衛宗室赫爾金為西安副都統。○是日駐蹕新衙門。翌日如之。○癸酉上行圍。○補行乾隆四年及七年分陝西省大計卓異官二十員。不謹官一員。罷軟官一員。年老官四員。有疾官三員。才力不及官六員。浮躁官三員。分別陞賞處分如例。○甲戌

上奉

皇太后自南苑還宮。○詣

皇太后宮問安。○是月直隸總督高斌奏查定例。農民值青黃不接時。領借籽種口糧二項。籽種免加息。秋收後止。將本數還倉。口糧酌

秋成分數其八分以上者。加息還倉。直隸順天等府州廳。上年被災。今春又值少雨。所有貧戶新舊借貸口糧。懇恩免其加息。奏入。報聞。○又奏。直屬本年夏月。早象已成。忽得甘霖大沛。嗣後雨暘時若。秋禾十分長茂。轉歉為豐。皆由

皇上至誠感通所致。得旨。覽奏。曷勝欣慰。但云朕誠感通。則實愧當。非謙詞也。若云朕誠感通。則春麥失收。彼時豈有不誠。而今始誠乎。總之望歲之誠。無時或已。任重道遠。通與不通。均非思議所及矣。○江蘇宣諭化導使編修涂逢震。御史徐以升。奏奉旨宣諭化導。業經遍諭淮徐揚海四府州屬。并報秋成豐稔情形。得旨。欣慰。覽之。至宣諭一事。尤應以實心化導。而不可稍涉文飾也。○江西巡撫塞楞額奏。江省蛟水陡發。廣信饒州撫州三府屬居民被淹。惟德興一縣地處萬山中。水長三丈有餘。衙署城垣倉廩多有衝塌。居民淹

斃甚多。宜黃玉山樂平次之。現查明被災戶口。動倉穀先賑一月。口糧得旨。所奏俱悉。加意撫恤。災民毋致失所。○閩浙總督調任兩廣那蘇圖奏。福建山海交錯。民俗刁悍。一歲產穀不敷口食。半取給於官倉。所有來春糶借之項。宜乘秋收購貯臺灣一府孤懸海外。並無土著。半屬游惰。現巡臺御史熊學鵬倡議墾荒。海疆重地。所慮者不在生熟。各番正恐無藉棍徒偷渡蜂聚。目下之利甚少。而將來有事。辦理甚費。周章臣蒙恩已調兩廣。既有所見。不敢不據實奏明。得旨。此奏甚是。知道了。○又奏。遵旨調補兩廣總督。隨將印信交撫臣周學健。即日起程赴任。得旨。覽。因汝督撫二人不和。則事必有掣肘。是以調用。然自汝至福建。雖無隕越之失。亦無大過人之處。今至粵省。必勉勉從事。以蓋前愆可耳。○浙江巡撫常安奏。浙省七月以來。晴雨調勻。除被水處。現在查勘外。其餘中晚二禾可望

豐稔。海塘大汎將過。亦俱穩固等語。得旨。所奏俱悉。浙省此數年尚屬有收。即今被水之處。加意撫恤。自不至失所。亦屬易辦。但汝意頗以此為諱。而必欲為豐亨豫大之說。甚非朕所取也。○浙江布政使潘思榘奏。浙省杭州。紹嚴各府屬。因七月初旬。風雨驟作。田禾人口。俱有損傷。惟嚴屬淳安。被水更重。已會同撫臣。動支庫銀二萬兩。倉米一千石。查賑并衢屬之常山。開化。水災亦重。動支庫銀五千兩。委員賑恤。飭令親詣村莊。逐一勘給。得旨。此等事。正汝地方官切已要務。必毋濫母遺。以期實惠及民可。○署湖廣總督鄂彌達奏。本年八月十四日。奉到諭旨。鄂彌達自署任以來。所奏事件。甚屬稀少。湖廣兩省地廣事繁。豈無應奏之事。可寄信詢問。訓飭之。并著議臺臣張漢奏請。疏通水利一摺。伏思有關國計民生之事。非灼見確知。不敢冒昧瑣瀆。即如水利一事。荆襄一帶。當洞庭江漢之

衝。上流多壅。即下流易潰。總緣民間堵截築壑。以致滯塞。其間孰淤孰險。宜疏宜殺。必俟親身查勘後。酌議具奏。得旨。看汝有姑息終老之意。非長策也。○又奏。湖南北今年雨澤調勻。歲收豐稔。米價平減。得旨。年穀順成。固朕所欣慰。而汝自到任以來。總無善政實蹟。以慰朕懷。值此有年。汝心不益放耶。則又朕所憂也。○又會同湖南巡撫蔣溥奏。靖州屬之綏寧縣地方。出產礦砂頗旺。請開採鼓鑄。得旨。若在他處。又何不可之有。綏寧相近苗地。何不為久遠之圖。而但顧目前之小利耶。不准行。○湖南巡撫蔣溥奏。遵科場例。每舉人一名。取錄科舉百名。業經札致學臣將定例曉示。得旨。所奏俱悉。覆試一事。秉公詳慎為之。切不可復蹈因循之弊。○山東巡撫喀爾吉善奏。拏獲空子教匪人朱廷謙等。據供河南湖廣多有傳授。誠恐株連三省。請將現獲首從。分別定擬。其餘業咨豫楚兩撫。密訪

有無再行酌辦得旨甚妥應如此辦理者○又奏東省連歲偏災倉儲未能充裕現屆秋成例應買補查黃黑豆并高粱之類民間亦可資生價值不甚昂貴請動穀價兼購分貯遇歉先動雜糧次及穀石其糶價仍歸倉穀項下得旨應酌量地方情形辦理者也○川陝總督公慶復四川巡撫紀山奏瓦寺土司屬之余保泰周起龍等誣控土司桑朗容忠剋扣恩賞土兵銀兩及私開疏廠暗造軍器

實錄卷二百二十三

五

欲通準噶爾各款本應按律問擬但係外番難以拘執常法因將余保泰等枷號發落均遣川東極邊地方安插以靖釁端得旨即如此辦理可也○慶復又奏據西安布政使帥念祖呈稱陝省各標鎮營兵丁於乾隆五年派撥護送準噶爾熬茶夷使至東科爾地方無力製辦行裝每名於肅州道庫借銀三兩共五百八十五兩原議回營日月餉內扣還可否照西寧鎮標派往哈濟爾卡路等候夷

使之馬兵每名賞銀四兩之例一體免扣得

旨著照所議行該部知道○又奏川省於七月十八九等日大雨江漲被水州縣業經會同撫臣查賑至成都省會衝淹房屋雖旗民一體賑修而旗下萃處滿城既無田產又乏貿易所有家具什物多經水淹都統永寧每旗借給公項銀一百兩可否懇恩免其扣還得旨所奏俱悉無庸特頒諭旨卿即傳旨賞給應咨部者咨部知之○又奏川省泰寧協

實錄卷二百二十三

五

屬巴底土司與打箭爐地方相近現巴底安撫司納旺與伊叔汪扎積有猜嫌而納旺係大金川土司之親汪扎係革布什咱土司之甥從前革布什咱被大金川搶占地方今各借護親為名構兵相鬥雖不敢擾及內地惟是相近西爐宜加防範現札商撫臣紀山提臣鄭文煥明白頒諭俾各知畏憚得旨此等雖屬細事亦不可忽視之諸凡妥協辦理據實奏聞可也○署固原提督段起賢謝署任

恩得旨。一切實力為之。不在多言。邊方要地。尤非內省可比。勤慎為之。○甘肅布政使徐杞奏。甘省臨河近山地方。間有被雹被水。損壞房屋人口。照例分別賑恤外。其河東河西各屬。連得甘霖禾苗滋盛。可望豐登。但以七八兩年。連獲有收。糧價平賤。該省僻處邊隅。素鮮外販。若非官為採買。轉有熟荒之患。得旨。欣慰覽之。恐致熟荒。官為採買。甚善事耳。較之歉荒為何如耶。○四川提督鄭文煥奏。

實錄卷二二三

五

前郭羅克與阿里克各酋目相仇。業與督撫公同酌定善後事宜。揀留漢土官兵四百餘員名。駐扎經理。頒示禁約。各酋番革面革心。恪遵憲法。請徹所留官兵。各回營伍。得旨。所奏俱悉。不可謂已經了事。置之度外。尚宜時刻留心。○兩廣總督馬爾泰議覆廣東提臣林君陞奏拔募新兵。恐有任情冒濫等弊。請令鎮臣於出巡時。將各協營本年拔募者。順便考驗。應如所奏辦理。其督撫五營及肇慶

水師營。提標五營。及東莞惠州二營。協向係督臣提臣。親自驗補。毋庸議外。尚有不隸鎮轄之廣州協增城營。請於鎮臣因公赴省時。就近調驗。亦應如所奏辦理。至肇慶協與督臣衙門同城。應同督標之兵一體閱操。其平海大鵬二營。僻處濱海。所有員弁因公隨帶之兵。及按季派撥護餉者。止係數名。不能俱赴省考驗。應聽提臣於保題軍裝案內。委員一并查點得旨。依議行。○又奏調任閩浙總

實錄卷二二三

五

督遵旨。速赴新任。得旨。閩與粵俱邊海要區。而閩之漳泉風俗頑梗。尚須化導。是閩重於粵也。一切政務。不偏不倚。毋縱毋苛。勉力為之。以副朕望。○署廣東巡撫廣州將軍策楞奏。粵東民多遊惰。習尚浮誇。有司以獲免考成為幸事。大吏以顧惜一己。為了局。蒙恩簡任封疆。每事勵以實心。總期吏治民風俱有起色。得旨。實力為之。固不可存欲速之心。亦不可日久而視為泛常也。○又奏粵省地當

瀕海。倘遇盜賊竊發。惟賴舟師追捕。現甲兵之內。每見一經上船。即頭暈嘔吐。不能起立。皆平日未練所致。應照閩省駐防水師旗分一例辦理。現詳加籌畫。酌定規條。加意訓練。得旨。是知道了。○署廣東布政使納敏奏。抵粵以來。地方情形。已得大畧。一切政務。上有督撫。下有州縣。羣諮博訪。和衷辦理。倘意見偶有參差。亦不敢依違附和。得旨。總在汝實心任事。不可謂上有督撫。下有州縣。將地方

實錄卷二百三十三

五

之事。一切置之膜外也。○署廣東提督陳訓奏。巡閱營伍。修整營汛。烟墩瞭樓等項。不敢稍怠。再經過高州。肇慶等府。目擊高下田禾暢茂。得旨。所奏俱悉。至營伍之整飭。誰不如是。陳奏而廢弛者實多。則外省之弊。大率可見。以後朕亦惟觀其行而後聽其言耳。○廣西左江鎮總兵楊剛奏。粵西鎮安府。歸順州等處。與交趾保樂地方接壤。現匪徒莫保與黎氏有仇。集黨報復。督鎮官率兵堅守。諒匪

徒不敢竄入內地。得旨。但固我防禦。使彼不敢擾斯可耳。豈宜豫料其不滋擾。而遂弛我防禦哉。○又奏。現緣交趾保樂地方。被匪徒占踞不靖。保樂距內地之鎮安府邊界不遠。當即會同驛鹽道王河。沿邊踏勘。再匪犯李捷三廖士美等。現留心跼緝。務在必獲。得旨。查辦邊隘之事。甚有關係。須無欺無隱。周詳慎重為之。至李捷三二犯。尤應嚴緝務獲。以靖地方人心者也。

實錄卷二百三十三

五

大清高宗法天隆運至誠先覺體元立極敷文奮武孝慈神聖純皇帝實錄卷之二百二十三

大清高宗法天隆運至誠先覺體元立極敷文奮武孝慈神聖純皇帝實錄卷之二百二十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆九年甲子九月乙亥朔諭內閣朕令翰

平定縣志卷之二十一

二

一

林科道輪進講章者原以講明義理裨益學問也若臣工有欲行陳奏之事自應明白直陳於君上之前何得借講書之名以巧用其術如黃明懿今日之講章朕披覽之下覺其意有所指因召見面問之曰汝之講章為書義而發乎抑因時事而發乎伊奏曰實因今歲北闈科場搜檢太嚴及於褻衣下體頭場二場搜出懷挾只四十餘人而聞風退避散去者遂至二千餘人之多士氣沮喪有關國

體等語國家之開科取士原欲得真才實學之人而用之懷挾作弊行類穿窬乃最惡劣之習大有害於科場者朕早已聞知先期告誡至再至三而伊等怙過不悛頭場搜出二十一人二場搜出仍二十一人即此數亦不為少矣豈黃明懿猶以為少乎況貢院門外拋棄蠅頭小卷堆積於牆陰路隅者更不計其數此皆何人者謂朕不知乎此豫備夾帶而臨時變計者且有含於口頰而搜檢時噤入腹中者至於頭場題目畧覺閒冷而交白卷及不完卷者遂有三百人此又不能夾帶而場中竟至闕筆者其二場點名時散去之二千餘人明係學問空疎又見不能夾帶託言搜檢太嚴待士非體以不願應試掩其無恥又有謂番役人等有意裁害者前二場搜檢時曾有搜出經文查與該生本經不合比將番役鎖拏一事而造言生事之徒遂以此為口實豈四十二人悉皆出於裁害乎至

於搜到褻衣之內。原屬非體。若果無其人。則
搜查官員過當之罪。自無所逃。朕前已明白
降旨矣。今既有其人。則有不得不通行之勢。
此又誰之咎乎。且士子有於褻衣下體懷挾
經文者。此人心之大喪。而讀書者之恥也。朕
前旨謂深自抱慙。並非虛語。而士大夫亦應
共愧共憤。默而不言斯已耳。猶且袒庇無恥
者起而攻搜檢之太過。則朕不得不明言矣。
議者徒謂以一二人之無恥。累及千萬人。孰
不知此一二。人非市井之徒。非穿窬之盜。而
即挾策應試千萬人中之一二人也。搜查者
豈能豫知其為有為無而分別之。設有所分
別。彼懷挾者方得以藉口。設無所分別。而一
槩從寬。則將來禪褲中竟成懷挾之藪矣。夫
使聖賢之經文。入人禪褲之中。而不為怪。獨
怪搜檢太嚴之失。士體則為是言之人。朕竟
不能知其為何心矣。或者其亦出於此道者
耶。夫稂莠不剪。則嘉穀不生。朕之剔弊除奸。

本欲使懷瑾握瑜之人。脫穎而出。整頓頽風。
培養士氣。正所以崇國體也。而黃明懿反以
為士氣沮喪。其謬妄已極。此必有不肖之士
子。造作浮言。互相煽惑。以鼠竊狗偷之行。而
有搖唇鼓舌之風。朕若不亟為整理。不但士
習日頹。無所底止。即伊等將來。亦不免清流
之禍。朕心不忍。是以法在必行。以挽救之。黃
明懿身為翰林。若欲建白諫諍。即當據實敷
陳。今乃借進講經書。隱諷時事。甚屬奸險詐
偽。著交部嚴察議處。○又諭。去年朕躬謁
祖陵。將軍額爾圖。指稱辦公。斂湊兵民銀兩。經
御史和其東參奏。不可不審明辦理。因特派
尚書來保。前往審訊。茲據來保等審明具奏。
兵民銀兩。皆由衆人情願。並非額爾圖勒派。
其借用銀兩一項。亦量當時所需借用。尚無
從中侵漁肥己情弊。額爾圖惟欲一切辦理
妥善。並未慮及借用湊斂之事。與例不合。一
味過侈。殊屬非是。至盛京習俗流弊已極。遇

有些微之事。輒敢衆論沸騰。亦非善事。此皆該地方將軍大臣等應辦正務。乃額爾圖在將軍任數年。未能整飭挽回。亦顯係伊未盡厥職。伊因此案。已解將軍之任。著回京候旨。○四川巡撫紀山奏。遊棍何如章。因巴底土司與革布什咱。大金川構釁捏造諭旨。聳令瓦寺土司發兵拒守。被該土司桑朗容忠察知其妄。即行押交汶川縣收禁。訊明捏哄情由。得旨。何如章著即在該地方立時處斬。並將罪惡宣播軍民番衆等知之。桑朗容忠窺破何如章奸妄情節。即行押交收禁。將造謀捏哄等處一一究出。甚屬可嘉。著賞給指揮職銜。該撫傳旨獎諭。並賞賜緞二疋。綢二疋。以示鼓勵。該部知道。○以右衛副都統準提保調補江寧副都統。以江寧副都統霄格調補右衛副都統。○丙子。

上御乾清門聽政。○諭天津等處添派駐防兵丁。竝派往拉林阿勒楚喀地方屯田兵丁之

缺。應照原議將八旗養育兵內銷除二千三百四名。但養育兵特為養贍。並無產業之孤獨人等。而設若盡所出之缺。全行銷除。則於旗人生計無益。著交與八旗俟駐防屯田兵丁起程後。將每月所出養育兵缺。暫行減半銷除。其餘一半著照常養贍。孤獨人等展限三年陸續銷除。○兵部等部奏各省廢弛營伍之督撫提鎮分別議處一疏。得旨。韓應魁著以叅將用。胡貴著來京該部帶領引見。又諭碩色著照部議所降之級從寬留任。朕念此係初次。是以格外加恩。從寬免其應得處分。倘各省督撫提鎮視為故常。不加意訓練。以致營伍廢弛。若被查出。則非不戒視成。必將伊等照例治罪。譚行義成元震完顏偉俱著罰俸六個月。吳進義著銷去薦舉紀錄一次。平常紀錄十次。尹繼善著銷去加二級紀錄四次。俱免其降調。喀爾吉善著銷去紀錄一次。免其罰俸。餘依議。○丁丑。

上奉

皇太后居暢春園。○幸圓明園。○禮部議覆署貴州按察使宋厚奏黔州民情好訟。士習未端。請飭學臣令各屬教官嚴加月課。不得視為具文。應如所請。每月集文武生員於明倫堂恭誦。

聖祖仁皇帝訓飭士子文及卧碑所載各條。并按月月課。書文之外。兼試策論。教官訓迪有方。著有成效。督撫學臣核實保舉。否則分別議處。生員內如托故三次不到。及無故終年不到。該教官詳明學臣。分別懲戒。斥革從之。○以翰林院侍講學士石介為太常寺卿。○戊寅。

上詣暢春園。問

皇太后安。○諭內閣著各省總督巡撫提督於所屬副將內。慎選可勝總兵之任者。秉公保舉具摺奏聞。○戶部議覆安徽巡撫準泰疏報。安省六月以內。大雨時行。河水陡漲。鳳陽

府屬之懷遠壽州鳳臺潁州府屬之阜陽潁上霍地被淹。又七月初四等日。風雨交作。蛟漲尤甚。徽州府屬之歙縣休寧婺源績溪寧國府屬之宣城南陵涇縣寧國旌德太平池州府屬之貴池青陽東流太平府屬之蕪湖繁昌廣德州并所屬之建平二十七州縣。又安慶宣州建陽鳳中四衛田禾淹沒。民房官舍城垣多有坍塌。現飛飭印官確勘設法宣洩。各屬應完新舊錢糧。請暫行停緩。其不成災之處。照例酌借籽種口糧。仍將成災田畝俟勘明分數。題請豁免。應如所請。分別極次大小飢口。動支存倉米賑恤。其歙休婺源等四縣該撫稱僻處萬山。市米缺少。應令各屬倉糧先儘本邑散賑。外不敷。即於鄰近州縣撥協。再貧生一項。如果被災不能謀生。亦應照乾隆三年諭旨。飭該教官造冊申送州縣。於存公項下撥交本學勻給。事竣核實題銷。得旨依議速行。○以陝西永昌副將陳其璘

為四川北鎮總兵。○已卯諭。山東省上年被災較重之陵縣等八州縣。應徵帶徵米豆。朕已降旨。緩至甲子乙丑兩年。各半分徵。其被災較輕之齊東等七縣。所有米豆。各緩至甲子秋後完納。朕思十月。即屆徵漕之期。自應按限催輸。但齊東等州縣。本年又有夏災。雖秋田幸獲有收。而民鮮蓋藏。尚需培養。以復元氣。著將原報災重之陵縣。德州。德平。平原。惠民。樂陵。高河濱州。八州縣。應徵乾隆八年分。緩帶米豆。再予寬限一年。俟乙丑丙寅兩年。各半分徵。原報災輕之齊東臨邑陽信。利津。恩縣。夏津。武城。七縣。應徵八年分。緩帶米豆。令其於本年各隨新漕完納一半。所剩一半。至乙丑年帶徵。至齊東臨邑陵縣平原。四處。應完六年帶徵米豆。亦令其於本年及乙丑年。各半分徵輸。俾民力寬紓。不至竭蹶。該部即遵諭速行。○刑部議覆。湖南巡撫蔣溥條奏。一凡五次緩決人犯。情罪稍輕者。請予

以可矜減等發落。應如所請。無論鬪殺及別項罪由。如有情罪可矜者。以乙丑年為始。該督撫於本內聲明。九卿秋審時。詳加察核。另摺奏聞。倘蒙寬減。仍出

聖主特恩。不為成例。朝審亦照此辦理。一凡州縣自理之案。不許擅用夾訊。其業經用夾者。申詳時。逐細聲明。該上司親加察驗。查例載問刑衙門。凡用夾訊幾次。年終申詳督撫。以杜濫用酷刑。及用多報少情弊。應如所請。不得擅用夾訊。及隨時聲敘。以便查核。一犯姦婦女。請免收禁。或情罪較重者。州縣另設禁房。毋使男女不分。亦應如所請。凡情罪輕者。錄供後。即行交與本夫。或親屬保領。不得羈禁。其罪重收禁者。亦必另設禁房。毋致雜處。從之。○旌表夫亡殉節之山西澤州府鳳臺縣民岳遐昌妻任氏。岳禪妻馬氏。代州生員黃秉鑰妻張氏。平定州廩生張法載妾王氏。○庚辰諭提督順天學政著內閣學士葉一

棟去。葉一棟未到任之先。其學政事務著工部侍郎呂熾暫行署理。○戶部議覆奉天府尹霍備疏稱奉屬各州縣除民地新收糧石。無庸開報氣頭。廩底外其額存常平米穀。按地方情形。照京通各倉例酌減每一萬二千石。氣頭不得過百石。廩底不得過二十石。并將成色八分者減價十分之二糶賣。七分以下者。以次遞減。應如所請。奉屬承遠等十州縣倉儲如數在四萬以上。米逾五年穀逾十年者。盤查時准照所議開報。其地勢稍高。或霉變不至此數者。仍令據實估報。再常平倉穀原有存七糶三之例。數年即可盡易新糧。該府尹所稱倘穀價平賤。無可出易。再遇五年之期。仍分別開報。恐地方官恃有此例。不能實力奉行。出糶採買。轉與倉儲無益。應無庸議。從之。○川陝總督公慶復奏。參西安布政使帥念祖違例營私縱容幕友家人招搖納賄一摺。得旨。這所參帥念祖著解任。其

縱容幕友家人等款著該督撫嚴審定擬具奏。該部知道。○以甘肅按察使鄂昌為廣西布政使。湖北糧道顧濟美為甘肅按察使。○豁免浙江烏程瑞安二縣。坍缺田畝共七頃三畝有奇。應徵額賦。○豁免山西大同鎮水衝石壓屯田二頃六十畝。應徵額賦。並朔平府屬右玉縣之殺虎口。坍廢市廩官房。應徵額課。○辛巳遣官祭黑龍潭。

昭靈沛澤龍王之神。○以安徽巡撫范璨為都察院副都御史。○調甘肅寧夏鎮總兵呂瀚為甘肅涼州鎮總兵。以候補總兵施廷專為寧夏鎮總兵。○豁免福建閩縣侯官長樂連江莆田南安同安安溪龍溪海澄南靖南平將樂建安甌寧崇安松溪政和邵武泰寧長汀清流歸化連城上杭霞浦福安寧德壽寧大田漳平等三十一縣。先後具報缺額民田共五百六十頃有奇。又閩縣侯官長樂連江羅源閩清永福惠安建寧霞浦德化等十

一縣續報缺額屯田共一十三頃五十畝有奇。無徵額賦。○以故喀爾喀輔國公衮布策凌子丹忠襲爵。○壬午諭山東濟武東青等州府屬內有連被災傷之州縣朕前加恩撫恤賑借兼施以濟匱乏。今秋成已屆幸獲有收。但念連災之後民鮮蓋藏未必即有餘資清完舊欠之公項。自應分別辦理以紓民力。著將上年秋禾被旱。今歲夏麥又復失收之齊東陵縣德平德州臨邑平原德州衛惠民陽信海豐樂陵商河濱州利津霑化恩縣並現被偏災之博興樂安等十八州縣衛。所有八九兩年借給各案內口糧籽種等項銀穀均緩至乙丑年麥後秋後兩次徵完。及上年夏麥被旱秋禾俱獲有收。今歲夏麥復被旱災之歷城章邱鄒平齊河濟陽長清青城蒲臺肥城平陰博平高苑等十二縣。所有八九兩年借給各案內籽種口糧等項銀穀均緩至乙丑麥熟後催還。其上年並未被災。今歲

止二麥被旱被雹並未深重兼有勘不成災之處如禹城蘭山沂水蒙陰館陶高唐臨清等七州縣所借銀兩米穀等俱於本年秋後催徵還項該部即遵諭速行。○又諭據阿里衮摺奏山西大同鎮總兵張朝良年已衰邁著以原品致仕。其大同鎮總兵官員缺著陝西河州副將王能愛補授。總兵為一鎮戎行之寄若不得人軍伍何由整飭。觀各省督撫頗有優容之意如阿里衮之據實陳奏實朕所嘉也。並諭各省督撫知之。○戶部議覆貴州總督兼管巡撫事務張廣泗疏稱黔省新疆之古州上江下江朗洞清江台拱丹江等鎮協營兵月糧除附近古州之各府州縣撥運外其有不敷原於楚粵二省分撥米四萬石以資接濟嗣以楚粵糧價日昂而近地苗民每年俱有變賣餘糧可以收買搭放業經收採二萬一千餘石經部議以有無妨碍苗民食米及久遠無弊之處行令妥議具題伏

思苗疆山地瘠薄。民間豈有倍收若盡數收採於民食未免有妨。莫若減買屯苗之餘糧。以仍裕屯苗之積蓄。現除附近各府州縣撥運外。約不敷兵糧一萬石。查黔省各屬。每年徵支餘存米五萬九百餘石。原奉部議。即將此項撥供新疆兵糧。以抵楚粵運米之數。請於附近各營之州縣量給腳價。與楚粵運費相等。庶不致多糜公項。俟各處查明里數遠近另題。至收買屯苗餘糧。應令各地方官。於秋收後照該處價值。領司庫銀給各屯苗採買。毋許絲毫減短。赴倉納米時。照部頒升斗斛式。令屯苗自行執攬平量。隨到隨收。應如所請。從之。○補行乾隆七年分四川省大計。卓異官十四員。不謹官四員。年老官六員。有疾官五員。才力不及官一員。分別陞賞處分如例。○命編修張為儀提督雲南學政。○癸未諭江南淮揚徐海四府州屬。於乾隆六十七年疊被水災。朕心軫恤。蠲賑頻施。又借給

籽種。以資耕作。復念積歉之後窮民一時無力輸將。今俟今年麥收後。再行分限徵收還項。今屆催徵之期。朕思各年借項數目有多寡。年分有遠近。自應酌定限期。分別辦理。以紓民力。查乾隆六年淮揚徐海四屬災戶共借大麥一萬一千三十餘石。穀三千六百一十石。零為數無多。歷年已久。自應於麥收後開徵。本年秋收照數全完。乾隆七年淮揚徐海四屬災戶共借籽種牛草銀二十五萬三千七百六十兩零。麥穀二萬一千四百一十二石。零為數已多。如分限太迫。則一歲之中難以一併完納。著於本年麥收後開徵。分作三年。至丙寅年秋收全完。再乾隆八年江鎮淮陽徐海等處被災歉收。所有安東阜寧鹽城海州高郵興化寶應等州縣共借銀三萬三千六百餘兩。穀五千五百餘石。均於今年催徵還項者。但此等窮民。即係連年積欠之戶。力量艱難。著准其分限兩年。自本年起到

乙丑年秋後全完。以示朕優恤貧民之至意。該部即遵諭速行。○戶部議覆浙江巡撫常安疏報。浙省七月初三等日。風雨驟作。山溪江水一時陡漲。又海潮泛溢。所有杭屬之仁和。錢塘。海寧。富陽。餘杭。新城。於潛。昌化。湖屬之安吉。歸安。烏程。長興。德清。武康。紹屬之山陰。會稽。蕭山。諸暨。餘姚。上虞。金屬之蘭谿。湯溪。衢屬之西安。龍游。常山。開化。嚴屬之建德。淳安。遂安。桐廬。分水。等三十一州縣。及杭州前右二衛。湖嚴二所。仁和之曹娥。錢清。鳴鶴。石堰。金山。并江南松江府屬。南匯縣之下砂。及下砂二三等八場。浸沒田禾。花豆。衝塌城垣。隄岸。倉廩。衙署。營房。民舍。人口間有淹斃。仰懇一體賑恤。其淳安。建德。常山。開化。等四縣。被災更重。業經照例動支公項銀米。查勘撫恤外。至被水各州縣。新舊漕糧地丁亦請暫停徵比。均應如所請。其修葺房屋。補給籽本。統於京餉餘平。及備公項下。動撥題銷。應

徵額賦。或分年帶徵。或確勘蠲免。另題請旨。得旨。依議速行。○甲申。

上詣暢春園。問

皇太后安。○諭軍機大臣等。自打箭爐至藍墩。安設塘站。遞送文書奏章。原議於裏塘。已塘。各設千把總一員。帶兵稽查管束。但塘務所關緊要。千把皆係微員。若無總理稽查之員。恐於塘務不無遺誤。應於大員內酌派一員。每年前往稽查一二次。始為有益。可傳諭紀山。令其辦理奏聞。○綏遠城建威將軍補熙奏言。右衛兵丁。自康熙三十三年設立後。一切軍器。未能整齊。其八旗滿蒙漢各佐領。及烏鎗營。轟六十七桿。旗三百四十八桿。請咨部領取舊者。留為操演行圍之用。再每兵四人帳房一架。及盔甲刀鎗弓箭等。均一體修理。共需銀一萬四千兩。係各兵應行自修之項。請於右衛經理錢糧同知處。應給月餉內。每兵豫支銀四兩修理。一年扣還。再該衛額

兵三千五百四名內。烏鎗手二千六百二十一名。弓箭手止八百八十三名。操練時多少不均。請將烏鎗手六百二十一名。改為弓箭手。查該衛現有烏鎗二千六百二十一桿。中用者止一千六百二十一桿。請於綏遠城烏鎗內撥三百七十九桿。移付右衛。以足其數。其綏遠城所用。即於該處收貯烏鎗內如數挑足。得旨。如所請行。下部知之。○乙酉。諭軍機大臣等。據那蘇圖奏稱。臺灣孤懸海外。並無土著。所聚民人。半屬游惰。現在巡臺御史熊學鵬。倡議開闢荒地。招養窮民。以圖生聚。但臺郡為五省藩籬重地。所當防維者。不在生熟各番。專在各處游惰之輩。從前朱一貴。吳福生。皆其明驗。雖有曠土可耕。而封禁已久。萬難開闢。若信奸民浮議。遽行召墾。恐游棍偷渡日多。利小而害大。臣因臺屬文武。皆言此番欲開禁地。係撫臣周學健。授意令熊學鵬。臺灣道莊年查辦。臣是以屢向撫臣。切

陳利害。撫臣亦以為是。今於撫臣入關之時。復諄切丁寧。望其中止等語。臺灣孤懸海外。聚處其地者。多無藉之徒。惟宜靜鎮彈壓。息事寧人。不應聽奸匪之浮言。圖目前之微利。遽議召墾。或致將來別生事端。甚有關係。朕意亦是如此。周學健與熊學鵬。俱是江西人。想果授意於熊學鵬。令其查辦耶。此事必不可行。可即傳諭周學健知之。○丙戌。遣官祭歷代帝王廟。○遣官祭

都城隍之神。○大學士等議。覆尚書公訥親。勘視江南河務。會同督臣尹繼善。河臣白鍾山。河東河臣完顏偉。直隸督臣高斌。條奏查洪湖上承全豫之水。並鳳泗諸流。源長勢盛。平時全湖專注清口。會黃入海。分入運口。以濟漕運。由瓜洲入江。水漲。則由寶應高郵邵伯等湖。歸入運河。分注泰州之運。鹽河歸江。興化鹽城之串場河。歸海。臣等詳勘形勢。一歸江之路。應浚鹽河。以資輸瀉也。查鹽河

上流深四五尺。如臯以下益淺。河底高於運河。不為豫計容受之地。則壅滯堪虞。請從現在河底挑深五尺。南至通州城河。東至丁堰河。一律疏濬深通。使芒稻等閘壩以下常存之底水。即足以資鹽運。然後視運河之水。幾尺以上。為有餘。酌量開放。至高郵寶應二湖相連之華家灘大新河。高郵邵伯二湖相連之王家港茅塘港。並邵伯通運之引河。均應逐加挑浚。俾三湖循次灌注。並達鹽運兩河。以各開啟。放為湖河遞減之法。又通州境內通江之路。如任家港等處之唐家鹽倉。各閘亦應挑浚。以備宣洩。其運口以內。通濟越河隄旁之文華寺閘。亦請開通河口。修整閘座。並疏濬河身。以洩運河上游之盛漲。應如所請辦理。一。歸海之路。應浚串場河。以資容受也。查串場河為衆水匯流歸海之路。第淺不過二三尺。與化各湖河無去路。請將鹽城以南南北二串場河。一律挑浚寬深。鹽運白駒

等閘。平時相機啟閉。盛漲一律開放。閘下引河。俱就現在河身。酌量疏濬。其興化以上之高郵官河。承南關車邏二壩。為減水總匯之路。并蚌蜒梓新車路。白塗海溝。與鹽界。以及東西官河。均為洩水要道。并請開浚寬深。至南關車邏二壩。前大學士陳世倌等議將壩面加高五尺。現議改為常開之壩。并水道浚深。則運河有餘之水。正應隨時多洩。應酌減二尺四寸。其范隄各閘口門。共寬僅三十六丈。來水多而去水少。易滋泛溢。宜多添金門。以廣洩水之路。亦應如所請辦理。一。天然二壩石工高堰。迤下二隄。俱可停止修建也。天然二壩。前大學士陳世倌等議改建滾水三石壩。倘過盛漲。於壩面分減而過。不必徹底開放。以致清水受虧。查此處所受之水。係洪湖異漲時。老子山漫溢分注之水。倒漾及此。其上游清水溝。蔣家閘以南。天長盱眙二縣境內。滙水并聖人山前淮漲分流。俱由此入

河宜早為減洩。倘全湖漲滿。三滾壩宣洩不及。則下流壅積。而上游蘆鳳諸水不能即下。勢必淹浸。請將天然二壩改與南壩相平。於南壩過水時。亦令過水。庶可及時宣洩。且二壩地亢難高。迴流水緩。無庸改建滾水石工。或用灰土夯築堅完。不使衝刷。或遇水大時。隨機堵築。毋致上下游被患。二壩既不用石工。其沈家西。林家西。磚石等工。俱應停止。再上游二壩及時減洩。則下游周橋以下。自無壅遏。其高堰舊有二堤。亦不必加築高厚。均應如所請辦理。所需工料。動支鹽庫銀兩。令商人分年還項。從之。○又議覆尚書公訥親。勘視浙省海塘情形。奏稱。浙省江海水潮。向由蜀山之南。中小疊出入。其近海寧之北大疊。近蕭山之南。大疊。悉皆漲沙寬濶。是以杭紹二郡。共慶安瀾。迨後中小疊漸就淹塞。江海大溜。悉由蜀山之北。故北岸衝刷浸溢為患。若將中小疊故道開濬深通。俾潮水江流

循軌出入。分減北大疊之溜勢。則上下塘工皆可安堵。無庸多費工築。即使中小疊不能遽行開通。潮汐衰旺。有期長落。亦易倘乘甫退時。將險要處所。多建坦坡。木石戢壩。俾得攔浪掛沙。實為捷要之法。蓋有高沙。則塘根即資鞏固。有新沙。則高沙不致坍塌。若得沙益堅積。水不通流。即老鹽倉一帶柴塘險工。亦可無憂衝潰等語。查蜀山之南。中小疊。雍正十二年。隨後隨淤。迄無成效。但原有故道可通。不可因淤塞已久。竟行停止。亦不可因淤出之地。悉成桑田。場竈。地方官為徵輸起見。遂致因循遷就。即使所挑之處。逼近山根。土性沙礪。艱於挑挖。亦可漸次疏通。每年可省搶修數萬兩之費。應如所議。飭該撫設法疏濬。再稱。老鹽倉至華家街迤西一帶。江面狹窄。一日之間。潮汐再至。況南有河莊。葛畧等山。逼臨江岸。若再於北岸建築石塘兩相夾峙。益多激盪之虞。惟柴塘其性柔軟。不致

與水相激。且北岸既建壩掛沙。即有衝損。臨時搶護亦自無難。再現在撫臣議用竹篾盛貯石塊。間段排築。以資抵禦。如有成效。不必改建石工。徒滋糜費。亦應如所議。飭該撫遵照辦理。從之。○吏部帶領河南降調知縣鄭鼎引見。得旨。鄭鼎人甚平常。該撫碩色為伊出考語。尚稱該員。雖才非肆應。而簡僻地方。尚堪勝任。夫地方雖有簡僻。豈少此等之人。碩色顯有瞻徇回護之意。著嚴飭行。從前曾

經降旨訓諭。嗣後倘有似此者。朕必降旨交部察議。鄭鼎著照部議降調。○丁亥。諭大學士等。今年浙江所屬被水之州縣頗多。常安具摺奏報時。朕恐其不無掩飾。屢次硃批。切切訓諭。今聞嚴衢所屬地方。有被水較重之處。而淳安縣為尤甚。近城之水。竟長至二三丈。不獨田廬禾稼受淹。即民人亦多傷損。且貧民乏食。竟有搶奪鋪戶食物。并強賒商米等事。常安俱未據實奏聞。止稱間有一二愚

民。强行借貸。其被水之民。已委員給賑一月口糧。看來常安之奏報災傷。顯有粉飾。其辦理賑務。亦覺草率。可即傳諭申飭之。令其加意撫綏。毋使小民失所。○又諭軍機大臣等。朱定元。丁憂回籍。今服制已滿。伊素經歷河工。若用為河東總河。較完顏偉孰優。如完顏偉能勝任。則仍舊亦可。可寄信詢問高斌。令其回奏。○大學士鄂爾泰等議覆。尚書公訥親奏稱。前奉

世宗憲皇帝諭旨。令各省督撫。於每年十二月。將奉行之各條款。如何施行。及行之已有成效。繕本具題。以儆外省因循之弊。乃行之既久。循例填敘。請勅下各督撫。酌量地方之大小。事務之繁簡。定以一年半之期。令該州縣。徧歷境內。確訪情形。將某事當與舉某事。當整飭。及行之有無效驗處。造冊詳報。該上司。即據此為考成。吏治庶崇實效。應如所請。凡該地方一切學校農桑河渠水利諸政。及

賭博健訟盜竊打降崇尚邪教諸事一一得之耳聞目見則相機辦理令督撫分別繁簡定限逐一詳明歲終彙入成效事件案內覈實奏聞再督撫統轄地方遼濶不若責成分轄之道府按季巡查尤為切近惟州縣徧歷各鄉不得紛擾道府巡行各屬不得派累違者按律議處從之○戊子諭據副都統索拜奏稱將挑取嫺於經卷之喇嘛及由準噶爾回藏之喇嘛羅卜藏丹怎等解送京師於七

月初七日。至察木多所屬之郭郊地方喇嘛羅卜藏丹怎帶伊僕役薩木都卜達什等騎馬逃亡等語喇嘛羅卜藏丹怎乃朕特旨令解送京師之人所關甚要。把總馬雄於途次怠玩致令逃亡情甚可惡著拏送京師交刑部從重治罪索拜於送此緊要之人僅派一陋劣把總與十五名兵解送亦屬疏忽著交部嚴行察議具奏其逃亡之喇嘛羅卜藏丹怎等速交郡王頗羅鼐四川巡撫紀山提督

鄭文煥等務嚴行捕獲鎖解京師如有隱匿容留濟助行糧之人亦即拏獲嚴審治罪再羅卜藏丹怎之逃亡必懷異志此去尋西路小道逃往俱未可定並速行文駐西寧之副都統莽古賚安西提督永常於一切塘汛地方及各處隘口俱令用心防禦務期弋獲○戶部議覆四川巡撫紀山奏稱川省收成分數向例夏熟於五月內詳題秋禾於九月內詳題較他省為更早第該省幅輿遼濶地氣

寒燠各殊物候遲早不一倘豫期約畧開報後或風雨失調收成稍減致與原報分數不符嗣請展後一月以本年秋成為始應如所請川省夏熟於六月底具題秋禾於十月底具題毋得絲毫假飾從之○禮部奏請另派官員磨勘各省鄉試中式硃墨卷得旨今年外省取中之舉人朕允蔣炳所請今在本省覆試將覆試卷解部朕另派官員磨勘今禮部請派官員磨勘闈中硃墨卷乃錯會朕旨

著仍照舊例行。俟各省覆試卷解到。再行請旨。○予故三等子兼佐領佛佑祭一次。○己丑諭內閣。駐藏辦事副都統索拜。於解送朕特旨令送京師之喇嘛羅卜藏丹。怎一事。並不選派強幹之人。飭令嚴加防範。至使中途脫逃。已將索拜交部議處。今既派出副都統傅清前往更替。索拜此際。若已經拏獲。則已如未經拏獲。傅清雖已抵藏。索拜亦不得即行回京。著解任。仍留彼處。俟拏獲羅卜藏丹。怎時。再行回京。並降旨郡王頗羅鼐。伊向來諸事奮勉。誠心報効。於查拏此等逃亡之犯。必能努力。然羅卜藏丹。怎。原係察木多之人。觀其行至原處逃亡。其中必有容留藏匿。濟助牲口行糧之人。伊所到之處。凡屬下之唐古忒等。念係喇嘛。瞻顧不行擒拏。亦未可定。著頗羅鼐留心嚴飭各處。實力查拏。務期弋獲。再。似此由準噶爾回藏之喇嘛噶津林沁等。前經頗羅鼐奏請。停其解送京師。安置於

扎什倫布廟內。但。以此次解送之羅卜藏丹。怎中路脫逃。而論。則伊等必懷異志。若將噶津林沁。仍留藏內。頗羅鼐能保其斷然無事。即無庸解送。若不能保。仍遵前旨。飭強幹人員。用心防範。解送京師。察木多之紀瓦帕克。巴喇胡土克圖。亦是荷蒙國恩之大喇嘛。於伊所屬一切地方。通行嚴飭。務令必獲羅卜藏丹。怎。斷不得稍有疏忽。以致漏網。可即行文曉諭知之。

大清高宗法天隆運至誠先覺體元立極敷文奮武孝慈神聖純皇帝實錄卷之二百二十四

大清高宗法天隆運至誠先覺體元立極敷文奮武孝慈神聖純皇帝實錄卷之二百二十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆九年甲子九月庚寅月食○

上詣暢春園問

皇太后安○辛卯

上奉

皇太后幸靜明園還居暢春園○戶部議覆漕運總督顧琮奏稱各省出運幫船過淮時扣留回空盤費銀兩據巡漕御史楊二酉條奏如給隨運員弁恐幫丁沿途私挪徇情先給以致回空乏費請飭總漕交與總押之同知通判收領抵通日分發各幫查同知通判管

押幫船既多前後相隔甚遠既不便令先到之幫丁在通守候又不便令丞倅等先行赴通散給致後幫管理乏人請仍交隨運二弁俟漕船抵通之日報明坐糧廳就便眼同散給應如所議以免幫丁在通守候其有先行給丁以致回空乏費者總漕即行叅處得旨如所議行○壬辰諭據湖南巡撫蔣溥奏稱臣到楚以來首以操守自勵嚴禁屬員不許餽送禮物乃有湘潭縣知縣李松才情原屬出衆屢經委審案件臣亦面許其可膺保薦乃該員於臣入闈之日呈送食運四桶臣開桶看視見每桶內有銀二百五十兩共銀一千兩臣不勝駭異所當據實叅奏請旨將李松革職其有無行求之處容臣出闈後嚴審究擬等語李松不遵功令暗行餽遺其無行止可知著革職交與該撫將有無行求之處一并嚴審究擬具奏○大學士鄂爾泰等議覆巡察歸化綏遠三城太僕寺員外郎寶全

條奏。一歸化城蒙漢雜處。而蒙古之十家長。漢人之鄉長等。向不互相糾察。日久廢弛。不肖易於藏匿。若令互察。又至妄生事端。請仍飭各自稽查。并交土默特佐領驍騎校等察究。如有扎薩克蒙古依本佐領下之人寄寓者。盡行驅逐。其扎薩克大喇嘛等各寺廟。倘容留他處喇嘛者。亦嚴查驅逐。應如所請辦理。該十家長鄉長等。或不及覺察。或知情隱匿。及窩留盜匪之家。與隣舍等。各照例治罪。該佐領驍騎校。亦分別查議。至窩留之喇嘛等。罰出牲畜。以備賞兵之用。一歸化城盜案甚多。設官不敷緝捕。請於土默特每佐領下添設委驍騎校一員。給與虛銜。充驍騎校督捕。再所罰捕盜不力各員之牲畜。即以獎賞勤於緝捕兵丁。逾限不獲者。量責示儆。查歸化城土默特兩旗。現六十二佐領。計叅佐領等官共一百六十餘員。除辦戶兵二司及各事務外。餘員足敷緝捕。未便再行添設。其獎

賞兵丁處。應如所請辦理。至限內不能緝獲者。鞭責示懲。限內緝獲者。遇前鋒領催缺出。挑補一大青山。東西綿亘三百餘里。其大山口共十三處。如烏里雅蘇台。哈郎桂等處。未設卡座。現殺虎口。至綏遠城。共設墩臺三十七處。派兵駐防。其新店子一帶卡座七處。實屬無益。請移置各山口安設。查新店子等處卡座。原擇要地。派兵安置。又有隨帶田屋。未可遽議更移。其應否撤回。及應否移設處。交該都統相度地勢。報部辦理。一黃河每冬河凍時。鄂爾多斯匪人。每偷渡來竊馬匹牲畜。請沿河設卡座。每日會哨。至春融冰解時。徹去。仍交渡口官兵看守。至卡座渡口捕盜官兵等。應行議敘獎賞處。均照歸化城例。其巡邏不力者。該都統嚴行懲責。均應如所請辦理。併飭綏遠城將軍。亦不時派員巡察。從之。○戶部議覆貴州總督兼管巡撫事務張廣泗疏。稱黔省威寧各廠。辦運京局鉛勛所需。

腳價。每百觔向給八分五釐。緣馱運艱難。前請量增一錢二分有奇。經部駁令核實具題。今委員前勘威寧至永寧。共程五百餘里。中分十三站。頓子坎至普市六站。間有坦坡一日可行五六十里為一站。其由威寧歷頓子坎至大灣七站。鳥道崎嶇。盡一日之力。止行四十里。即為一站。而人馬勞瘁尤甚。所給腳價。於食物草料。實有不敷。議增每百觔一錢二分有奇。萬難核減。應如所請。增給報銷。并飭承辦之員。毋得虛捏侵漁。運解遲誤。從之。

○癸巳。

上詣暢春園。問。

皇太后安。○諭奉天地方。原賞生息銀二十萬兩。嗣因所得利息。不敷賞賚之用。復加賞銀二十萬兩。奉天為商賈輻湊之區。果能以本銀四十萬兩。妥為調劑。足敷使用。何至仍有不敷。皆由從前辦理不善所致。著傳諭將軍達勒當阿另行詳悉籌酌。妥協辦理。奏聞。○

禮部議准。御史徐以升奏稱。嗣後各學政錄科時。酌量變通。其文風盛者。將一二等名數從多。文風未盛者。將一二等名數從少。三等前列者。仍照例酌送。其丁憂事故游學告病。未與科考。及科考未取。志切觀光者。原有錄遺入場之例。各省學臣。應視該處文風之高下。向來中數之多寡。通盤計算。慎選錄送。從之。○兵部議覆。江西巡撫塞楞額疏稱。安福永新二縣之壟西上西二鄉。一切刑名錢穀。改歸蓮花橋同知管理。文移往來。較前已多。舊設鋪兵六名。不敷差遣。請於蓮花橋至安福縣一百五十里中。添設三鋪。各添鋪兵二名。連原設共九名。所需工食。照兩處所轄地方。各於地丁項下支給。從之。○甲午。諭涼州西寧等處。遠在邊陲。民貧土瘠。朕所軫念。彼地舊欠錢糧。在乾隆二年以前。民力不能輸納者。朕已陸續降旨蠲免。查西寧縣尚有未完元年二年馬糧五百四十二石七斗七升。

實欠在民。均繫散戶零星。力量微薄。若照例催徵。仍不免於追呼之擾。著即行豁免。以示優恤。該部即遵諭行。○工部議覆。浙江巡撫常安疏稱。浙省仁寧一帶。觀音堂老鹽倉等處險工。前經督臣邵蘇圖及尚書公訥親等議。沙土虛鬆。毋庸建築石塘。請於柴塘外臨水處。間段用竹簍盛貯塊石。層層排築。俟根腳堅實。水去沙停。漸長淤灘。然後再議建築石塘。應如所請。築竹簍石壩四段。飭該撫委員趕辦從之。○乙未。戶部議覆。綏遠城建威將軍補熙疏。報清水河所屬村莊於六月二十八日。被雹傷禾。所有本年額賦。請分別蠲緩。其舊欠銀米。並請於來歲帶徵。再該處無力之民。來春量借籽種。以資耕作。應如所請。得旨。依議速行。○禮部議覆。工科給事中吳煒奏。稱科場搜檢。請詳審真偽。以定科條。又覆御史徐以升奏。稱士子懷挾。其有心作奸者。原不可貸。至於臨場倉猝。誤帶入場。情法

尚有可原。請量為區別。或行斥革。或止驅逐等語。查科場條例。最嚴懷挾。惟立法詳審。庶幾諸弊剔除。一。請先期修葺貢院。匠役人等搜明放入。以杜士子賄囑。將文字埋藏號舍之弊。一。聞中器用食物。先期運進者。在京派巡察御史二員。外省監臨。委佐貳二員。逐件查閱。并內外廉官隨役人等。亦應一例搜查。如有夾帶。立即究治。一。士子衣服用單。考籃考具。製用玲瓏。便於檢點。所用官蠟。令士子於納卷時。並交燭價。至散卷時分給。如燭不堅好。承辦官嚴懲。舖戶即飭另換。一。搜檢之法。京闈於磚門外。外省於貢院頭門外。各派官員。令士子聽搜點入。不得攙越。其頭門二門內。令搜役兩行排立。以兩人搜檢一人。如二門搜出。即將頭門未經搜出之官役懲治。士子懷挾者。其父師一并究治。一。主司命題。務仰體

皇上命題之意。避熟就冷。無使士子豫先擬議。

至搜出懷挾。如各場應用之經書文字表判策問等。固應照例處治。即或頭場夾帶二場。二場夾帶三場。焉知不豫為埋藏之地。不應如該御史所奏。或止斥革。或止驅逐。惟二場搜出頭場文字。三場搜出二場表判。諒係一時失誤。非出有心。請照今科北闈之例。從寬仍准入場得旨。依議。至本內議稱搜檢時。若二場誤帶頭場文字。三場誤帶二場表判。此係無心之失。應照今科北闈督搜大臣所辦。仍點入內場考試之例。准其入闈等語。科場條例片紙隻字。原不准夾帶。並未有誤帶者仍准入場考試之例。今年督搜大臣之仍准入場者。因二場有番役栽害一事。是以如此從寬辦理。究竟只應嚴懲番役之栽害。不應遷就從寬。以啟將來之弊竇也。若復著為功令。既與定例不符。且恐弊端轉由此而起矣。嗣後誤帶者。免其黜革治罪。仍逐出不准入場考試。○山西巡撫阿里衮疏報。代州屬崞

縣開墾地畝一十四頃三十畝有奇。○丙申。大學士鄂爾泰等議覆湖南巡撫蔣溥條奏苗疆事宜。一定例。苗地不許漢人往來。第永順。永綏等處。俱就苗地設立府廳縣治。人民搬住日久。與苗人買產借債。勢所不免。因設有禁例。私相授受。奸民每以愚苗可欺。侵占負賴。致生事端。請俯從民便。聽當官交易。若有欺占。許苗人訴官追究。查苗性愚頑。易致蠢動。是以例禁漢人往來。若許當官交易。買產借債。恐奸民毫無顧忌。轉得藉端欺占。應仍照例遵行。一定例。苗人戶婚田土細事。令具報府廳縣官。飭寨頭甲長。照苗例辦理。第苗向散處窩遠。赴報甚難。惟要隘各處。設有將弁分防。應許苗人就近具訴。移交文職存案。查該處既設丞倅。管理苗事。又令將弁兼理。恐統率不專。轉生擾累。無俟更張。一請飭文武各員。嚴禁兵役。毋許私與苗人往來。致滋虐詐等弊。每月取具兵役不敢擾苗結狀。

該管官加具印結。送督撫查考。再。苗地設有義學。令內地生員。前往訓誨。請飭地方官。會同教官。慎選方正之人。查兵役。擅入苗地。借端騷擾。屢經嚴禁。該撫請飭文武各官。每月取具結狀。送督撫查考。并慎選方正之人。前往苗崗化導。原屬加意整飭。應如所請。飭屬實力奉行從之。○戶部議覆署兩江總督尹繼善。署安徽巡撫。準泰奏。稱上江捐監各事宜。一安省舊額貯米九十一萬六千石。加以乾隆三年廬州府并臨淮等州縣。溢收捐米二萬六千二百二十石。零計再增五萬七千七百七十石。零共足一百萬石。派貯徽寧池太潁五府倉。以為常平定額。應如所請。其現缺額。俟收捐補足。一所捐穀石。前奉諭旨減二。收納第徽寧二府屬之歙。休等六縣。地處山僻。米價較昂。須照減定之數。再行減二。應如所請。俟穀價平減。仍照舊例。各屬生俊止許在本邑報捐。俟本邑額穀捐足。方許外

赴鄰邑。查上江米價不一。倘隨地報捐。則價昂之邑。勢必無人應如所請。以杜避貴趨賤之弊。一收貯倉儲。惟粟穀二項。可以經久。前因鳳潁泗不產稻穀。曾准兼收米麥。邇來徧植秋禾。若再捐米麥。朽變堪虞。應如所請。除鳳潁泗外。概收穀石。一部定每穀一石。收耗米三升。又公費銀一分五釐。作官吏辦公之資。亦應如所請。倘有不肖官吏。侵那折價。勒捐浮收等弊。即行叅究得旨。依議行。○兵部議覆。閩浙總督調任兩廣。那蘇圖疏。稱閩省沿海各營。俱係題缺。漳浦外通大海。內連海澄。雲霄等處。實為邊海要區。部選人員。未能熟悉情形。請將遊守各員。改歸題缺。應如所請。從之。○準噶爾部人達爾扎卜。巴朗等來降。命賞給安插如例。○丁酉。上御勤政殿聽政。○諭吏部禮部諸事。怠忽。今日送本。又復錯誤。著交部察議具奏。○刑部議覆。直隸總督高斌奏。稱龍門旗人穆延太

圖財害命應依律斬決查穆延太祖父係出兵陣亡可否照例減等發落得旨例內凡祖父出兵陣亡其子孫准免死一次者原係國家酬功之意其有因公事獲罪致死者自應照例寬免今穆延太圖財害命非因公事獲罪其祖父軍功與被殺之人何干若僅以枷責完結既不足以蔽其辜且將使不肖之子孫有所恃以肆惡矣穆延太著改為應斬監候秋後處決餘依議○命戶部尚書阿爾賽在尚書房行走○以鑲白旗蒙古印務叅領瑚必圖為正白旗蒙古副都統○以多羅順承郡王熙良子泰斐英阿襲爵○以故翰林院五經博士卜尊賢子卜科承襲○戊戌諭軍機大臣等前據準泰奏稱江南科場點名時搜獲懷挾之徐斌王曾培比即分別枷革等語據朕傳聞江南搜獲懷挾之人悉行釋放不知準泰所奏二人之外果有釋放之人否至於枷號例應一月為滿不知準泰照例

辦理否可寄信尹繼善令其查明具奏○又諭軍機大臣等湖北六月糧價晏斯盛於今日始行奏到甚屬遲緩晏斯盛向來尚有要做正人努力盡職之意在山東巡撫任內辦事差可但不免好名耳及調任湖北以來又不如在山東時居官一味因循只圖了事討好沽名其實心任事之處甚少可傳旨申飭之嗣後急須悛改○又諭曰德勒畢身居京城尚念伊祖母墳墓現在盛京奏請前往修理殊屬可嘉著加恩賞銀二百兩遣往○以鑲白旗滿洲都統旺扎爾兼管滿洲火器營事務○己亥上詣暢春園問皇太后安○詣雍和宮行禮○還宮○諭軍機大臣等廣東提督林君陞到京朕召見詢問地方營伍情形伊言語不清人亦欠爽利廣東地方甚關緊要看來林君陞總兵猶可稱職似不勝提督

之任。可寄信與那蘇圖策楞令其查明據實具奏。○庚子諭十月十二日。朕恭奉

皇太后前往湯山。所有應行豫備事宜。各衙門照例辦理。○又諭甲子再週。國家承平百年矣。今年朝審秋審各省情實人犯著照康熙二十三年甲子之例。停其勾決。○又諭上年直隸天津河間等屬被旱歉收。朕臨幸奉天目覩收成豐稔。米價平賤。即降旨高斌令其前往販運。至次年秋收為止。本年三月內。又經御史李清芳奏請寬限。朕已降旨寬至今冬在案。今據高斌奏稱。直屬米價。雖現在平減。而津屬慶雲等縣。現被偏災。慶邑本屬少米之鄉。天津又為商賈叢集之地。可否仰懇聖恩。准再將奉天海禁寬展一年。俾民食得有接濟等語。著照所請。奉天海運准再展限一年。該部即遵諭行。○補行議敘雍正元二年進勦桌子山番。受傷土官土兵等並賞給銀兩有差。○辛丑

孝慈高皇后忌辰。遣官祭

福陵。○諭今年浙江被水之州縣頗多。且有受災甚重之處。朕心深為軫念。已屢頒諭旨。令該撫加意撫綏。毋使閭閻一夫失所。頃據署浙閩總督印務周學健奏稱。各郡被災地方。除撫臣現在題報之三十一州縣三衛三所八場外。尚有先後具報被災之嘉興府屬海鹽平湖桐鄉三縣。寧波府屬鄞縣慈谿鎮海象山定海五縣。金華府屬金華東陽義烏浦江四縣。嚴州府屬遂昌一縣。共一十三縣。先據呈報。同時被災。續有勘報被災無多。請銷案者。亦有未據勘報。果否成災者。臣思此等各縣。同時被災。如果被災無多。或秋成尚有可望。其蠲免賑濟。自應無庸濫及。但被災雖屬稍輕。而民力難免拮据。可否仰懇天恩。將本年被水未成災之州縣。其被災村莊。本年地丁錢糧。寬至次年麥熟後開徵。有田畝被水減收者。飭令地方官酌借常社各倉穀石。

以為補種春花工本。俟明年秋成後免息還倉。其現經題報被災之三十一縣內。如有陸續勘明不成災者。亦照此辦理等語。今年浙省州縣水災情形。非尋常被水可比。小民顛連。深可憫惻。朕屢經訪問具悉。非加意賑恤。不足以蘇民困。著照周學健所請行。常安奏報災傷。顯有粉飾。而辦理賑務。亦竟草率。不能仰體朕意。著嚴飭行。諭旨到日。可竭力殫心多方救濟。務登斯民於衽席。督臣馬爾泰到任。亦應不時查察經理。以慰朕念。該部遵諭速行。○巡視西城監察御史舒敏奏。五城凡有事件。必令滿漢二員。公同審理。毋許私設刑具。獨行審斷。得旨。交都察院照所請行。○補行乾隆七年分甘肅省大計。卓異官四員。不謹官一員。年老官六員。有疾官四員。才力不及官二員。分別陞賞處分如例。○是日起。

上以孟冬享

太廟齋戒三日。○壬寅。兵部議覆川陝總督公慶復疏。稱前准部咨議覆戶部侍郎梁詩正等條奏。請將川省督撫提鎮協營。詳查雍正元年後續添兵丁。量行裁減。倘實有不敷巡防。不便裁減者。或將馬兵改為步戰。步戰改為守兵。以省糜費糧餉。并分晰可否情形。聲明具奏。查川省督撫提鎮協各營。雍正八年召募新兵一萬名。嗣於十二三年內。盡數裁完。其撥歸督標馬步兵二百五十名。嗣又撥補提標五十五名。尚存一百九十五名。於乾隆二年。撥歸新設之威茂協右營。其餘各標營。並未續添。無庸議外。惟重慶鎮三營。及黔彭永寧。敘馬兼武。大壩龍場等營。原係馬二步八。雍正六年。業改為馬一步九。至綏寧。威茂。青雲。沱龍。安南坪。小河營。寧越。越雋。寧遠。冕山。瀘寧。嘉順。懷遠。會鹽。會川。永定等營。自雍正十二年以來。業經節次裁改。添撥在案。但各營或界連滇省。或地屬衝途。或控制涼

山總口。或堵禦阿都後路。或控扼三渡屏蔽一方。均屬要地。要汛不便裁減。再巫山泰寧黎雅營汛遼濶。阜和孤懸邊口。普安安阜苗疆新聞。分汛防範最宜周密。就現在情形而論。實無可裁。并以馬改戰。以戰改守之處。應如該督所請。無庸裁減。又疏稱冕山一營額兵三百名。內馬兵六十五名。戰兵僅六十名。較各營馬糧獨多。戰糧獨少。請將該營馬兵裁減三十五名。改為戰兵。又越舊東南一帶逼近涼山。道路歧雜。通連普雄哈合阿羊六務等枝夷人。現五里菁濫田壩一路。有葛香汛捍禦紅岸子一路。有河東汛防守。惟馬蝗溝一路並未設汛。而各枝賊夷俱由此出入。此處舊有營基高阜。可以瞭望。現有戶口土田甚屬緊要。請安設一汛。即於越舊存城兵內撥十名。柏香汛撥二十名。並派外委一員駐守。一切官署兵房。即將柏香汛從前裁減兵丁空房拆移建築。入梁萬一營交接滇黔。

荆楚為川省下游要汛。該營額兵二百名。不敷防禦。請於夔州協撥兵三十名。巫山營撥兵二十名。歸弁管轄。均應如所請添撥。至稱龍場一營原設赤水河南。今河南一帶歸滇。河北一帶歸川。業將該營兵撤回赤水駐劄。請統入川省。會勘疆界案內具題。俟題到再議。從之。○癸卯。

孝敬憲皇后忌辰遣官祭

泰陵。○賜徽州紫陽書院

御書扁曰道脈薪傳。○諭大學士等浙江今年被水之州縣甚廣。其中有受災甚重之處。業經那蘇圖周學健先後具奏。從前常安有諱災粉飾之意。朕心深為軫念。已屢次降旨申飭。諭令盡心撫恤。毋使小民失所。今思該省被災既重。民人損傷。田廬墳墓多有漂沒。當此急迫之時。若仍照例辦理。則民困仍恐未蘇。非朕救濟災黎之本意。所當格外施恩。多方籌畫。務使早登衽席。可即傳諭該督撫等。

令其毋拘成例。即速賑濟。一面辦理。一面奏聞。至該省既被災歉。收恐將來有需米接濟之處。著將明年解京漕糧內。截留十萬石。以為備用。該部遵諭速行。○又諭。一品大臣告休回籍者。有賞賜本俸之例。大學士徐本雖解任調理。著格外加恩。准其食俸。以資頤養。○戶部議覆山東巡撫喀爾吉善疏報青州府屬博興樂安二縣秋禾被旱。業確勘情形。散給一月口糧。仍俟查明成災分數。題請加賑。其缺乏籽種貧民。動支採買麥石。俾得及時播種二麥。以資接濟。應如所請辦理。并令該撫將被災地畝。新舊錢糧。暫停徵納。得旨依議速行。○雲南總督兼管巡撫事務張允隨疏報開壘大姚鄧川二州縣久荒民屯田地共三十三畝。又宣威寧州景東麗江等府州額外民田一十一頃六十畝有奇。○是月拉林阿勒楚喀副都統巴爾品奏。統率屯田旗兵前赴駐防處所。中途盤費不敷。當即會

同盛京將軍達勒當阿籌辦。伏念兵丁到彼時。每名例得安家銀五十兩。是以一面奏聞。一面由盛京戶部。每名借給銀五兩。並行咨吉林烏拉將軍。即於安家銀內扣還。臣身任統率。乃以兵丁盤費不敷之故。半途延擱。洵屬罪無可逭。得旨。途中不能撙節。以致用度不敷。誠汝之罪。若如此辦理。殊屬可嘉。何罪之有。雖然。至該處若不嚴禁浮費。衆滿洲必至失所。則汝罪誠無可逭也。○吏部尚書協辦大學士劉於義直隸總督高斌奏。遵旨查勘水利。伏以東西二淀。諸水匯聚。非徧行履勘。不能洞悉源委。擬從東淀閱至西淀。自新安安州以至保定。清苑。方可得二淀全局。所有應行開濬各事宜。容勘畢詳籌奏聞。得旨。是。悉心詳酌。成此永久有益之舉。惟卿等是賴也。○直隸總督高斌奏。估修直屬各城以工代賑。查冀州城垣頽缺。武強前歲被災。均請列為要工。其深州任邱肅寧三處。請列為

緩工。又天津府屬之慶雲縣。現以偏災查賑。亦請列為要工。得旨。好。知道了。雖云以工代賑。亦不可聽不肖屬員。冒銷侵蝕。則工不固。而民亦鮮得實惠。將兩無功矣。○署兩江總督尹繼善。江蘇巡撫陳大受。署安徽巡撫準泰等。奏前奉諭旨。以江南昭陽湖水涸。魚子化蛹成蝗。飛至山東河南。令將捕蝗不力之地方官。查明叅奏。伏查州縣官積習。一見蝗蝻生發。即圖卸已責。諉之鄰封。上下江與山東河南接壤。或因彼此驅除。以致避入鄰境。現各屬稟報飛蝗自北而南者亦多。臣等俱嚴加申飭。毋許互相推諉。作速撲滅為要。得旨。此即汝等所云圖卸已責。諉之鄰封之習也。豈可信之。豈河東省之屬員。有此積習。而汝江南省之屬員。獨無此積習乎。不謂汝等徇庇至此。有旨諭部。○江南河道總督白鍾山奏報。秋汛安瀾。黃運江湖一切隄埽土石工程。均屬平穩。皆賴

皇上至誠昭格。河神默佑之效。得旨。以手加額。欣慰覽之。亦非朕之至誠。亦非汝之幹濟。蓋以前年方有大水。消息盈虛之理。

天地好生之德。是以此數年幸保無事耳。若不知此。而以為己之功。兼遂信人之浮譽。而侈然自足。則盛滿必覆之戒。汝其慎之。○江蘇巡撫陳大受奏。江南松江太倉二府州屬。沿海塘工。每年伏秋二汛搶修。碎石椿木柴草。在所必需。前經常鎮道張傳煥請發塘工平餘銀兩。採辦碎石一千方備用。除柴草易辦外。惟椿木一項。須赴浙省乍浦等處採買。茲據寶山縣詳請於平餘項內。豫買木植萬根。設廠備貯等因。得旨。知道了。此等事不可令其掣肘。以致貽誤工程。又不可無所稽察。任其浮冒也。○署安徽巡撫準泰奏。安徽省因鳳潁泗等府州屬。連年被災。賑饑平糶。所貯倉穀正需及時買補。仰懇將到任盤查倉穀三月。奏聞之案。寬至秋收買補完竣之後。逐一

查明於來年三月具奏得旨著照所請行然須實力稽察不可虛應故事而已○江西布政使彭家屏奏江省五六月間雨澤稀少各縣所得先後不齊七月初旬迭沛甘霖早禾受旱者亦復抽發晚稻十分暢茂惟永豐玉山二縣村莊不免偏旱現已查勘賑卹得旨所奏俱悉聞江西受旱頗重此奏不無粉飾乎一切料理妥協為之以期實惠及民○署閩浙總督福建巡撫周學健奏浙省各屬被水成災其在守分鄉農猶知靜候賑濟平日不務生業游手好閒之徒煽誘愚民劫竊私販勢所必至文員日事查賑勢難兼顧稽察防範事宜隨令督標將弁前往被災各縣巡查并飭駐防弁兵約束災民嚴戢奸匪得旨汝如此實心任事甚可嘉也○又奏浙省各屬被災後有紹興府屬上虞縣奸民金為章等哄誘貧民肆行勒借富戶穀米該縣遣役拘拏負固不服伏思此等奸民斷不容稍縱

致長刁風當即嚴飭設法擒獲得旨告之馬爾泰此事不可稍縱將如何處分之處摺奏以聞○又奏閩省臺郡於七月初旬風雨驟驟鹿耳門外損壞商船淹斃人口業經委勘外其餘晚禾秀發可望豐收內地漳泉一帶於八月十六七日連得大雨海潮上湧城市村莊間有被水之處近省地方七八兩月未得十分透雨節次遣弁查勘均不至水旱成災得旨所奏俱悉其被水被旱處雖不成災亦應撫恤毋致失所也○又奏臺郡鳳山縣民邱子剛等因越界築壩引水灌田俱被生番戕害查向來內地民人或侵入番境致被殘害生番罕有無故逸入內地戕殺民人者是欲保全內地民人惟有嚴越界之禁令邱子剛等被害皆緣不遵禁令釁由自致現惟嚴飭通事土目曉以利害諭以國法俾知畏懼漸令偵緝正兇毋許輕舉妄動致生事端得旨所奏俱悉只可如此辦理○又奏閩省

福興泉漳地窄人稠。民食官儲。內地則賴上游延建邵三府所餘。外地則藉臺郡所產。邇年動撥平糶。未經買補甚多。今歲早稻豐收。晚禾亦皆暢茂。正可乘此秋成。採買補足。現撥司庫銀兩。分發臺郡各廳縣。收穫後即照市價平買。毋累農民。得旨。所辦甚妥。知道了。

○河南巡撫碩色奏。前據四川按察使姜順龍奏稱。東省有蠶二種。食椿葉者名椿蠶。食柞葉者名山蠶。請飭撫臣將餽養之法。移咨各省。以收蠶利。查豫省開封彰德懷慶河南南陽汝寧及汝州陝州光州等府州屬。產有柞櫟等樹。可餽山蠶。近有東省人民。攜繭來豫。夥同放養。俱已得種得法。其餘祥符等七十九州縣。不產青柞等樹者。或植桑以養家蠶。或紡綿以織布足。應就土俗民情。所便時為勸導。不使游惰成風。得旨。所奏俱悉。行之。以實不懈。不擾可也。○又奏。謝降級從寬留任。恩得旨。汝自守有餘。而猷為不足。以後當

加意奮勉。若以姑息為得計。則未必然。○又奏。豫省今歲雨水調勻。收成豐稔。合計實有九分。現糧價平減。士民欣慶。得旨。覽奏。曷勝欣慰。既富矣。又何加焉。曰。教之。汝亦嘗留心於此乎。若夫似雅爾圖之有名無實。則不如無耳。○河南南陽鎮總兵蕭良金奏。報秋禾豐稔。所屬各營汛。合有九分。米價平減。得旨。此等奏報。須據實直陳。不可稍涉粉飾。至汝為總兵。整飭營伍。乃汝之責。況南陽因武備廢弛。故降調韓應魁而用汝。今到任。亦將半載。全未奏及汝整飭營伍之事。甚屬疎忽。若因朕此旨。而勉強陳奏。無料理之實蹟。則汝罪愈重矣。遠者尚不能欺隱。況汝河南為四通之區耶。○川陝總督公慶復奏。卜隆吉一營。並所轄之橋灣營。東至靖逆。僅一百三十里。請就近統歸靖逆協副將兼管。再踏實一營。離瓜州營僅百里。亦請就便改歸瓜州營。叅將兼管一切事件。由該副叅查察。提臣

仍統為節制得旨。著照所請行。下部知之。○又會同陝西巡撫陳宏謀奏。查陝省河山四塞舟楫鮮通。錢文流通甚少。價日昂貴。惟當開採銅觔鼓鑄接濟。茲有寶玉堂王家梁竹林洞銅洞坡青子溝五處。驗有銅信。現有商民等情願自出工本。先行採試。并聞華陰縣屬之華陽川產有鉛礦。應請一并開採。以供搭配鼓鑄。得旨。若不滋擾。而可多得銅觔。自是好事。總須妥協為之。○西安將軍博第奏

西安駐防兵丁生計風俗。近來甚覺頹靡。蓋緣差役不均。且逋負深重。以致技藝生疎。抵任以來。即飭八旗員弁等將借放重債。一切酗酒賭博等事。嚴行禁止。復為酌定喜喪事宜。衣服制度。均派差役。俾力革前非。勤習技藝。得旨。所奏不為不悉。亦只在爾力行而已。勉之。○河州鎮總兵周儀奏。自簡任邊疆。惟有督率將弁。整飭武備。按期訓練兵丁。不敢稍有廢弛。得旨。惟在實力訓練。兵丁之生熟。

一望而知。非若他事可掩也。勉之。○兩廣總督那蘇圖奏。報到粵日期。并請訓諭得旨。汝在閩省諸事。尚屬合宜。惟稍有因循之意。以致與周學健不合。則汝之短處耳。此後改此微失。以成全璧。則朕之所望者也。至兩粵開採一事。頗為目下急務。蓋不開採。銅觔何由得裕。而辦理少有不妥。諸弊叢生。有利什而害百者。不可不加之意也。○署廣東巡撫廣州將軍策楞奏。粵東商販鮮通。產米亦少。每遇青黃不接。無不仰給官倉。查各屬倉儲。自歷年平糶。存價未補者甚多。今歲幸遇豐收。現督同藩司。分別地方之繁簡。水次之遠近。出產之有無。價值之貴賤。發價酌買。漸次彌補。得旨。所見甚是。妥協為之。○又奏據暹羅國頭目沙大庫呈稱。從前暹邦需用銅器。因無匠作。特採買本地紅銅。裝載進廣。覓匠製造。嗣因銅器例禁出洋。未蒙許載回國。伏懇俯准給還等情。查定例。銅器不許出口。原指

販運內地銅觔出洋者而言。暹羅自行買備進口倩工製造與興販不同。請降旨恩准給還得旨。所見是然亦無庸特降諭旨。即稱汝奏聞轉傳朕旨給與可也。○署廣西巡撫託庸奏查土忠州土牧黃鑑濫徵苛派土民紛紛控告。該土牧同土幕梁奕卿捏造紅字告示文書語多狂悖希圖誣陷土民。現質訊明確候督臣會疏題叅得旨。此事得無隱飾耶。此等事斷不可存將就了事之念以隱貽後患。然又不可張大之以惑亂人心也。○雲南總督兼管巡撫事務張允隨奏金沙江上下兩游共一千三百餘里應開鑿大小八十三灘其中最險之蜈蚣嶺等二十五灘改修旱路下游計六十四灘又開修那比渡至副官村南岸一帶旱路工程業經過半各灘凡遇中洪洶湧不能行舟者築壩逼水將灘石燒燬鑿出船路以避中流之險次險者亦將水面水底礙船巨石鑿去於兩岸絕壁上鑿出

高低緯路一萬餘丈又將橫木灘至新開灘陸路千餘里蒙茸陡絕之區開路建橋以便行旅查金沙江自古不通舟楫自乾隆七年以上游開通川楚商船赴金沙廠以上地方貿易者漸多現試運銅觔至河口灘者四十三萬三千餘觔轉運至黃草坪者十萬二千三百餘觔下游告竣即可運至瀘州直達京局就目下情形計算每年可運銅百餘萬觔較陸運之費可省十之二三并將來川省商民聞風販運鹽米流通民食亦可資接濟得旨所奏俱悉若果實如所言自是美舉○貴州總督兼管巡撫事務張廣泗奏前署貴州布政使陳惠榮自京回任謹述諭旨云傳諭總督張廣泗武備萬不可廢弛伏惟黔省疆土新闢苗獮雜居獷悍難制且界連滇楚西粵四面環夷其地皆疊嶂層巒在在險隘武備尤為緊要比年以來軍裝器械漸次修整至教演之法弓箭鳥鎗各兵止知虛演架勢現

勤加訓練。俾資實用。所演陣勢。從前三才五花之名。於黔地叢林深箐。複嶂重岡。概無可用。現亦畧為變通。仿明戚繼光禦倭所製鴛鴦陣遺意。將弓箭鎗礮刀牌。朋成隊伍。於山林狹隘之區。皆可左右衝擊。首尾照應。并飭提鎮各臣。共遵諭旨。務期益加訓練。得旨。各省誰不云實力奉行。今年訥親所察。即其明效大驗也。朕亦惟觀其行而始信其言耳。○貴州古州鎮總兵崔傑奏。巡查營伍情形。得旨。所奏俱悉。不可虛應故事。巡查一番。必有巡查之實跡。而又不可生事滋擾也。

平定縣志卷一百一十五

三

大清高宗法天隆運至誠先覺體元立極敷文奮武孝慈神聖純皇帝實錄卷之二百二十五

平定縣志卷一百一十五

三

大清高宗法天隆運至誠先覺體元立極敷文奮武孝慈神聖純皇帝實錄卷之二百二十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履歷

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄四次臣德瑛經筵講官太子少保工部尚書紀錄六次臣曹振鏞等奉

敕修

乾隆九年甲子冬十月甲辰朔享

平定奏言

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

端慧皇太子園寢○詣

大高殿行禮○幸瀛臺○頒乾隆十年時憲書

○賜內閣

御書扁曰調和元氣○順天府行鄉飲酒禮○乙巳

上詣暢春園問

皇太后安○幸圓明園○丙午諭軍機大臣等據

喀爾吉善奏稱德州滿漢兵丁互吵一案已經

究審將綠旗兵丁孟文明白文學滿洲披甲阿

平定奏言

立白五義訥佟保照不應重律分別杖懲鞭責

發落免其革退該管將備該旗驍騎校等均屬

約束不嚴各記大過一次等語喀爾吉善辦理

此事失之過輕國家設立駐防滿兵原是彈

壓地方衛護百姓之意必與綠旗兵丁和

輯相安始為有益若滿兵輕視綠旗恃強凌

弱固屬不可倘綠旗兵丁藉稱受滿兵欺凌

動輒鼓聚喧鬧此風亦不可長看來此案內

之滿漢兵丁俱係多事不法之人豈可朦朧

完結仍留營伍以致他人效尤。自以革退名糧為是。至於該管將備該驍騎校平日所司何事。一任兵丁縱肆妄為。漫無約束。自應嚴加處分。或此時不便即行明參。則於別案糾劾之。或將來填入軍政內以示懲儆。可寄信與喀爾吉善。令其另行辦理。調西安副都統奇爾丹為青州副都統。大學士鄂爾泰等議覆調任兩廣總督馬爾泰奏稱。廣西省明江土思州地方新太協右營龍馘等營撥防之權相等隘。及鎮安協撥防之榮勞等隘。共五十餘逼近交趾。所設關隘。或據險要。或扼總路。或於商民出入貿易之所設立。官弁兼同土勇防範巡查。即間埽散漫之處。已俱壘石建柵。邊陲土崗之板蒙等隘。思陵土州之叫荒等隘。下雷土州之下骨等隘。共三十餘。緊連交趾。各土司等自設隘目。帶土勇巡查。應行捍蔽處。所木石堵塞。已為詳慎。土思州之那陶等六隘。及小鎮安地方之那蒿等

卡官兵星羅碁布。俱屬得宜。至南太鎮三府沿邊關隘。自建卡撥守以來。奉行尚未周密。應令各該地方官相其險易。及時增培。每年冬月沿邊查勘一次。壘石坍塌者修之。建柵朽壞者補之。濠溝淤積者濬之。再鎮安協與鎮安府因交趾保樂地方匪徒滋擾。請於原設隘卡外。多設新卡安兵。查右江一鎮三營。兵制原屬單薄。即通省標營亦未便更議抽撥。惟於平却魁勞等六卡似應添設。鎮安協原制兵七百五名。酌量險易緩急。足資防守。將來果有不敷。再於右江鎮標酌撥彈壓。再由村一隘當年題定封禁。原以平而水口兩關既開。商民得出入貿易。殊不知交趾驅驢地方為貨物聚集之所。距由隘不遠。徑捷利倍。寧明商販多願從由口出入。況明江汛近設新太協右營守備駐防。客商尤為輳集。即明江五十三寨無業貧民。挑擔營生亦藉就近為商雇。覓由隘一開。誠屬便商利民。惟是

邊民非比齊民。若不立法防範。使出入有數。可稽。恐奸匪隱混竄逸。查寧明州向置會館。設立客長。以為由隘出入之公所。應令該州慎選老成殷實數人充當。凡客貨出隘。許客長將客人姓名籍貫貨物及發往何處。一一註冊。報該州查實。給與印票。并刊立木榜。不許客長藉端需索。其五十三寨挑夫。亦令該州將姓名住址造冊取結。給與印票。令理土同知於該隘查明印票。給腰牌放行。有印票腰牌者。方許放入。其入關客人姓名從何處賣貨入內。令該同知註冊。報寧明州查對。倘有濫給印票者。責在寧明州。濫給腰牌。私放出入者。責在理土同知。凡客人在外貿易者。彼處若有回頭客貨。自應畧為等待。應酌給半月限期。過期即飭頭人保人。嚴詢究處。是由村一隘。實因便商養民起見。應請嗣後開放。責地方官慎密稽查。其平而水口。兩關俱屬河道。雖設弁兵防守。當夏秋水發之時。夜

深人靜。一樣飛渡。應設立鐵鍊橫江攔截。每月逢五逢十開放。夜則鎖截。至商販由平而水口出關貿易者。止許在太源牧馬附近之處交易。從由隘出口貿易者。止許在諒山驅驢附近處交易。不得逗遛交境。倘冒險遠出。許夷官攔回責處。又現在逗遛番地者。給半年限期。槩令夷官查明陸續驅回。安插原籍。如無籍可歸者。分撥梧。平。柳等府安插。又從前在彼已娶番婦生有子女與夷人結有姻婭。並廬墓田業情甘異域者。照例安插彼處。永不許進口。嗣後如有商民在彼私娶番婦者。應令該夷官查明離異。驅逐進口。押回原籍。交地方官照例杖責。以上各條。如果實力奉行有效。三年之後。請將現任辦理之文武邊員督撫提臣秉公核實。分別奏請交部議敘。倘有因循怠忽貽誤邊防者。即叅查該督等所議條款。已經勘驗明確。因地制宜。均應如所請。遵照辦理。從之。丁未。諭朕此次

恭奉

皇太后前往湯山。著莊親王、大學士鄂爾泰、張廷玉、尚書公訥親在京總理事務。○又諭明年二月會試。天氣尚未和暖。搜檢時不無寒冷。且各省俱須覆試。士子到京。未免稍遲。著改期於三月舉行。該部即豫行曉諭知之。○己酉。諭大學士陳世倌。假滿回京。著入閣辦事。○革額爾圖內大臣職。降補西安副都統。効力贖罪。○賑卹山西文水、陵川二縣被水災民。○庚戌。

上詣暢春園問

皇太后安。○諭據四川巡撫紀山奏稱。川省士習久患浮囂。每遇科場。肆行無忌。或捏造揭帖。捉影捕風。或不歸號房。覓人代倩。倚恃人衆。動輒喧譁。習以為常。已非一日。臣會同學政蔣蔚。宣布皇恩。丁寧告戒。今科嚴加搜檢。又逐號稽查。士子皆恪守場規。並無懷挾越號之事。蓋因學臣蔣蔚居官清正。訓士嚴明。

凡事認真。不務粉飾。是以士子信之。其言易入。理合奏明等語。蔣蔚實心教士。甚屬可嘉。今年乃更換學政之期。蔣蔚著再留任三年。○旌表守正捐軀之直隸雄縣民張達妻呂氏。○辛亥。工部議覆河東河道總督完顏偉疏。稱儀封汛北岸楊家橋隄工。對岸淤長沙灘。全黃大溜北趨。直逼隄根。亟應來時挑挖。引河一道。分順水勢。應自王家莊起。至趙家寨前止。共工七百七十五丈五尺。於河庫銀內。先行給發興挑。照例動撥司庫本年地丁銀兩歸款。應如所請。從之。○壬子。大學士鄂爾泰等奏。京師近年以來。錢價昂貴。實由耗散多端。若不官為查禁。設法疏通。則弊端難杜。錢亦無由充裕。謹據現在情形。公同酌議八條。一。京城內外。鎔銅打造銅器鋪戶。宜官為稽查。查京城內外。八旗三營地方。現有鎔銅大局六處。銅鋪四百三十二座。內貨賣已成銅器。不設爐鋪戶六十八座。外設爐鋪戶

三百六十四座。逐日鎔化打造。京城廢銅器無幾。崇文門過稅之銅。每年僅三百萬觔。斷不敷打造之用。勢必出於銷錢。應將爐座鋪戶。於京城內外八旗三營地方。現在查出官房三十六處。計七百九十一間。即令伊等搬住開設。鎔銅打造。其所住房。免納官租一年。以為搬移之費。一年後照例納租。所有官房內開設各鋪戶。交步軍統領等衙門。派撥官弁稽查。將每日進鋪銅觔若干。并鎔化打造出鋪銅觔若干。逐日驗明。如出數浮多。即行稟報根究。一京城各當舖。宜酌量借給資本。銀收錢發。市流轉。查京城內外官民大小當舖。共六七百座。錢文出入最多。現在平減錢價。各當舖如得官借資本。收錢上市發賣。在當舖既多添資本。而在市逐日又多添錢文。發賣兩有裨益。應將京城各當舖。無論官民。每大當資本豐厚。應派給銀三千兩。聽其營運。將所領銀兩存留作本。每一日交制錢二

十四串。運送官局上市發賣。每制錢一串。加錢十文。為局費。其賣出銀。仍交各當舖收回作本。至於小當資本。原有多寡不等。有情願借銀者。准赴局具呈。查明現有架本。酌量借給。所繳錢文。並賣錢易回銀兩。俱照大當一例辦理。再借給大小當舖資本。約銀五六十萬兩。核算每日可收錢數千串。須設公局收貯。派員經理。查有正陽門外布巷官房一所。地安門外鼓樓東官房一所。應作為錢局。至收錢發銀造冊文票。俱用順天府治中印信。為憑。其局內書算人等。令管局官挑補。所有市上原賣錢文。每制錢一串內。少腰串錢二文。以為局內官役飯食紙張等項之用。俟一年後。如果錢價平減。將該管錢局官交部議敘。倘有侵尅虧那。據實查叅。一官米局賣米錢文。不必存貯局內。查八旗內務府設米局二十七處。於乾隆三年三月議准。每局各給銀二千五百兩作本。收買米石。并給糶米二

千石平糶其收買糶賣出入銀錢向係各該旗內務府辦理再本年發給八旗內務府及五城各廠平糶米俱係將賣米錢三日一次赴市易銀交部各在案今現在議賣官錢應令八旗內務府將賣米錢不必存貯局內二十七局分為三班於三日內每日將九局賣米錢輪流上市易銀仍交各該局收貯其五城各廠賣米錢亦毋庸存貯廠內仍照舊三日一次將錢上市易銀交納戶部所有二項上市錢均聽派出管理官錢之員一體發賣一京城各當舖現在積錢宜酌錢數送局一并發市查京城當舖六七百座每於秋冬之際存貯錢最多此項雖係各當舖營運之資本以濟小民一時之緩急但堆積過多未能流通轉於民用不便現在錢價昂貴議開官錢局平價而開設之始錢尚不能充裕在各當舖時當冬令正值閒貯之際應將京城內外大小當舖無論官民每大當一徹出制錢

三百串小當一徹出制錢一百串俱自行運送官局交局員發賣陸續易銀給還如運局錢賣料及半各當舖陸續運送補足倘小當一時不能如數令將一百串之數陸續送足交局如已經領借官局資本前項錢免交一錢市經紀宜歸併一處官為稽查以杜擡價查錢市向設經紀十二名各舖戶有高擡錢價者責成經紀嚴諭平減不許壟斷但該經紀等散居各處早晚時價難歸畫一向無專員約束或與錢舖通同勒索查正陽門外為商賈雲集之地應令經紀等聚集一處每日上市招集買賣舖戶商人遵照官定市價公平交易以杜私買私賣之弊一京城客糧店收買雜糧宜禁止行使錢文查京城九門七市每遇秋成外來各種糧食俱係車馬載運投店賣錢即用車馬運回成千累萬斷不能日用行使或有不肖奸商在彼收買販賣或鄉僻之民收積藏貯應請九門七市雜糧店

俱用銀收買雜糧。京城錢文宜嚴禁出京興販。查國寶本貴流通。但京城都會之地。各省經營貿易。絡繹往來。奸商將錢裝載出京。於價貴處興販射利。再聞廣商船由海洋直達天津。回空時。聚用錢文壓載。運至本地貨賣。又各省漕船回空。亦多載錢文興販獲利。京局所鑄之錢。豈能供外省各處之用。此等興販流弊。不得不嚴查防範。應請嗣後出京客商。除攜盤費錢外。不許將制錢馬駝車載出京。近京地方因錢宜嚴行查禁。查近京直隸所屬各村莊鎮集。每多富戶。將糧草貨物賣錢去串。堆積一室。以防盜竊。此等鄉愚。祇圖一己蓄積。遂致錢文不能流通。向來原有明禁。恐日久懈弛。應行文直隸總督轉飭各該州縣。示諭鄉農富戶。不許囤錢至一百串以上。臣等伏思京城錢貴之由。大約不出八條之內。但舉行之初。不便於圖利之奸民。未免滋物議浮言。而於億萬兵民之日用大

有利益。現既派員經理。若不專委大臣督辦。恐無統率。查錢糧乃戶部所司。稽查禁約。乃步軍統領專責。一切鋪戶商民。則府尹所屬。應請專交兼管戶部事務尚書公訥親。戶部尚書海望。步軍統領舒赫德。並令順天府府尹蔣炳。協同辦理。從之。○吏部奏。各省督撫題叅疎防案件。應照定限。查明報叅。如逾限不行查報者。即將遲延之員。扣明逾限月日。隨疏附叅。不得將州縣道府公出日期。籠統扣展。再疎防限內。有前官未及詳報離任。經接任官具文詳報者。定例內。並無接任展限之條。其疎防限期。自應前後接扣。如有遲延。經該督撫查叅到部。將前官照限內却事例查議。後任官仍按違限月日。分別議處。不得將前官閱過限期。在後官任內。混行加展。請通行各省督撫遵行。從之。○補行陝西省乾隆四年七年二次大計。不謹官一員。罷軟官一員。年老官四員。有疾官三員。才力不及官

六員。浮躁官三員。甘肅省乾隆七年大計。不謹官一員。年老官六員。有疾官四員。才力不及官二員。四川省乾隆七年大計。不謹官四員。年老官六員。有疾官五員。才力不及官一員。分別處分如例。○旌表守正捐軀之河南商水縣民張學妻劉氏。○癸丑。

上御勤政殿聽政。○以丁憂起復前任山東巡撫朱定元。為光祿寺卿。○戶部議覆四川巡撫紀山疏。稱忠州營離省寫遠。所有應支官

兵俸餉。應照夔協之例。於夔關稅銀內。就近按季支領。應如所請。從之。○甲寅。諭軍機大臣等。鄭文煥。歷任雲南總兵。頗有才幹。朕是以加恩。擢為四川提督。近聞伊到任後。侈大驕矜。遇事取巧。且有徇情請託之事。深負朕恩。爾等可傳旨嚴行申飭。令其洗心滌慮。痛加浚改。以勉後效。○以工部侍郎呂熾。為順天武鄉試正考官。翰林院檢討德保。為副考官。○調湖北宜昌鎮總兵哈尚德。為陝西涼

州鎮總兵。以廣東廣州城守營副將蒙應瑞。為湖北宜昌鎮總兵。○大學士鄂爾泰等議。准內閣學士秦蕙田條奏。內稱。教官月課。宜重經史。請將已經頒發之周易折中。書詩春秋傳說彙纂。及性理通鑑綱目。併將次告成之三禮義疏諸書。令各省督撫藩臬。多行刷印。給發每學二部。以供士子抄誦。教官每月面課四書文外。兼課經史。又各省書院生徒。令州縣秉公選送。布政使會同專司稽察之

道員。考驗才可造就。實非佻達者。方准入院肄業。從之。○戶部議准。署廣東巡撫策楞疏。報乾隆八年分廣肇高雷四府屬。墾復遷稅三十一頃九畝零。編徵地丁銀一百一十四兩一錢零。又廣惠潮肇廉羅六府州屬。報墾額外水田稅二百頃四十五畝七分零。編徵糧差銀九十二兩零。又廣州府屬番禺香山二縣。歸併衛所屯田。墾復遷移屯稅三十九畝五分零。照減則科屯米三石五斗零。俱照

水田例。六年起徵。從之。○又議覆漕運總督顧琮疏稱。江淮衛六幫額運丁船三十二隻。內兌運江寧府屬之江寧縣漕船十一隻。兌運鎮江府屬之漂陽縣漕船二十一隻。兩處水次受兌。程途相去數百餘里。開行及過淮。先後不一。運弁一人。沿途稽查。難免顧此失彼。查有江淮衛九幫額船四十九隻。原有派兌上元縣漕糧之船。與江寧縣同城。應將六幫兌運江寧縣漕船十一隻。歸併九幫運官就近管轄。但六幫僅存額船二十一隻。為數太少。應於同兌漂陽水次之江淮三幫額船六十三隻內。撥船十一隻。歸六幫管轄。以補撥出之數。應如所請。從之。○川陝總督公慶復奏請將安西布隆吉一營。並所屬之橋灣營。就近統歸靖逆協副將兼管。踏實一營。就便改歸瓜州營。叅將兼管。得旨著照所請行。該部知道。○乙卯。

上奉

皇太后幸湯山。是日駐蹕湯山行宮。至丁巳。皆如之。○丙辰。諭前因江南昭陽湖等處。蝻子萌生。該地方官不能及時捕治。飛入山東。河南。隣近地方。為害禾稼。朕曾降旨。令該督撫將捕蝗不力之各員查叅。今據尹繼善等奏稱。今歲蝗蝻所生甚廣。即山東。河南。本地亦多。凡州縣官。一見飛蝗。即圖卸責。諉之隣省。是其積習。節據各屬稟報。飛蝗自北而來者。不一而足。臣等嚴加申飭。不許互相推諉。作速撲滅。業已淨盡。目下百穀登場。收成豐稔。請免查叅等語。尹繼善等此奏。甚屬錯謬。從來捕蝗之法。全在初生之時。竭力勦除。庶不致蔓延為害。今江南蝗蝻。既經飛入隣省。則該地方官捕治不力。罪無可辭。乃反稱自北而來。此即圖卸已責。諉咎隣封之陋習。且隣境已受飛蝗之害。該省雖云豐稔。與隣省何涉。焉能以此掩飾其咎乎。尹繼善等明係徇庇屬員。代為支吾。希圖開脫。準奏係新任。

尚在可恕。著將尹繼善陳大受。交部察議具奏。○丁巳。戶部議准。署廣東巡撫策楞疏報。乾隆八年分南高雷瓊四府屬墾復額內荒蕪稅一十四頃九十畝六釐零。編徵地丁銀一十七兩八錢零。復回原雷州衛裁併屯稅三十四畝。編徵米三石一升零。又廣潮肇瓊四府屬報墾額外荒蕪稅六十八頃六十畝零。編徵糧差銀三十一兩六錢零。又雷肇等府屬海豐徐聞感恩三縣及陽江縣歸併衛所屯田共墾復荒陷屯稅一頃二十四畝零。照減則科屯米一十一石零。帶派耗銀九分一釐零。又海豐縣報墾額外屯稅八十九畝零。照減則科屯米七石九斗零。俱照旱田例。十年起徵。從之。○戊午。戶部議覆漕運總督顧琮疏稱。直隸通州天津二所屯租。節年拖欠不清。以致旗丁辦運拮据。應照直屬撥補地畝代徵之例。令該州縣將各佃應輸租數。依限催徵完納。移交幫所官弁轉給軍丁濟

運。仍核明代徵完欠數目彙冊題報。應如所請。從之。○補行四川陝西甘肅乾隆七年分軍政卓異官五員。不謹官一員。罷軟官一員。年老官十員。有疾官三員。才力不及官九員。浮躁官二員。分別陞賞處分。如例。○是日。駐蹕三家店。

大清高宗法天隆運至誠先覺體元立極敷文奮武孝慈神聖純皇帝實錄卷之二百二十六

大清高宗法天隆運至誠先覺體元立極敷文奮武孝慈神聖純皇帝實錄卷之二百二十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次謹

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級重誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆九年甲子十月己未。

實錄卷二百二十七

上駐蹕盤龍山。○庚申。戶部議覆直隸總督高

斌疏稱。直屬蠲缺驛站工料銀兩。請於司庫。

乾隆九年地糧裁站起運銀內。照數撥給。應

如所請。至所稱遵化。三河。二州縣。因蹕路經

由。蠲免本年十分之三。其工料既無項可支。

亦應准其撥補從之。○是日。駐蹕髻髻山。

辛酉。駐蹕盤龍山。○壬戌。吏部議准雲南總

督張允隨疏請。鶴慶府維西通判。景東府屬

猛統巡檢。俱係烟瘴要缺。照例定為三年俸

滿。保題陞用。從之。○戶部議覆。山西巡撫阿

里衮疏稱。現奉部行。酌定常平倉額款。查晉

省原定三百四萬。酌減十分之一。以二百七

十三萬六千石為定額。除現存實數外。尚不

數額穀八十五萬三千四百石。歸於本地交

納本色案內。收捐補足。應如所請。從之。○是

日。駐蹕白澗。○癸亥。駐蹕盤山。翌日如之。○

甲子。吏部等部議准。山西巡撫阿里衮疏請。

裁汰平順縣虹梯關巡檢一缺。添設長治縣

實錄卷二百二十七

西火鎮巡檢。從之。○旌表守正捐軀之廣東

徐聞縣民陳子成妻詹氏。○乙丑。駐蹕白澗。

賜隨從王大臣等飯。○丙寅。禮部議准。戶科

給事中周祖榮奏請。八旗鄉試。先將應考生

監等冊送禮部。轉咨兵部。考試馬步箭。將箭

冊劄發順天府。並行順天學政。傳八旗生員。

前赴科考錄遺。國子監傳八旗貢監。一體錄

科。憑文錄取。造冊移送順天府。查明科冊箭

冊俱有名者。方准入場。從之。○旌表守正捐

軀之湖南芷江縣民蒲老應妻田氏守正被
戕之安徽亳州民呂天祥妻石氏○是日駐
蹕烟郊○丁卯。

上奉

皇太后還宮。○諭本朝所修古今圖書集成一
書蒐羅浩博卷帙繁富實藝林之巨觀為從
來之所未有者古稱天祿石渠為藏書之所
今之翰林院即圖書府也著將古今圖書集
成頒賜一部收貯院署俾詞臣等咸得觀覽
以廣識見以資問學○戊辰。

上詣

皇太后宮問安。○諭江南鳳陽潁州泗州三府
州所屬數年以來頻遭水旱朕加意撫卹蠲
賑疊頒惟恐閭閻一夫失所今雖漸有起色
而元氣尚難驟復查此三府州所屬舊有民
欠借項除已經完納外尚有未完乾隆六年
分米麥粟穀等項共二萬二千七百一十七
石零銀九千六百三十五兩零又未完七年

分米麥秫粟等項共一萬八千九十九石零
銀一十萬二千八百七十兩零俱應按限催
完之項但新舊同時并納小民未免艱難朕
心軫念著將六年分出借各項均緩至乙丑
年麥熟後徵完七年分出借各項緩至丙寅
丁卯兩年麥熟後分完如此遞歲分徵則民
力得以舒徐不致輸將竭蹶該部即遵諭行
○己巳四川巡撫紀山奏提標城守向有存
公銀兩分發各營買米酌量借給兵丁於秋
冬餉銀內扣還接續採買撫標向無此項兵
丁未免向隅請於官兵截贖項下每名借給
銀一兩共一千一百五十五兩除一百五十
五兩為建倉之費其一千兩於秋收價平之
時買米存貯所借銀兩分三年扣還得旨著
照所請行該部知道○庚午幸翰林院先是
上以翰林院署歲久傾圮發帑重修至是訖工
御書翰林院扁額賜掌院大學士鄂爾泰曰稽
古論思張廷玉曰集賢清秘勅所司諏吉日

送掌院大學士進院。親臨賜宴。是日車駕出長安左門。設鹵簿。掌院大學士及翰林官跪迎。車駕入謁。

先師孔子禮成中和韶樂作。

上陞座。丹陛大樂作。掌院大學士率羣臣至階下行禮。如大朝儀。進。

御宴。大學士鄂爾泰進爵。賜羣臣宴。大學士以下。翰詹諸臣。並部寺科道之由翰林出身者。咸與。

上召大學士鄂爾泰。張廷玉。福敏。陳世倌。史貽直。尚書彭維新。張照。汪由敦。左都御史劉統勳。侍郎阿克敦。梁詩正。錢陳羣。德齡。至。

御座前賜酒。諭曰。時當陽月。和煦如春。

天心訢洽。朕與諸臣交慶之。羣臣咸頓首稱賀。宣示。

御製詩。題曰。乾隆九年十月重葺翰林院落成。車駕臨幸錫宴。送大學士掌院事鄂爾泰。張廷玉。進署。以張說東壁圖書府五律字為韻。

賦東字音字二首。勅諸臣各分一字賦詩。詩曰。撫序權居北。占星壁在東。斯干歌翰苑。於樂也儒風。改殿當年異。登瀛此日同。三台司道筦。二老亮天功。樂具卿雲奏。筵開湛露融。底希光舊史。長此贊微躬。木天臨翠輦。駕侶集華簪。廣學心常切。因文道可尋。潢汾陰豈昔。來泮水猶今。禮樂於焉盛。觥罍取次斟。詩慙得珍字。辭喜獻官箴。返轡重城暮。猶聞歌誦音。又以人數為字所限。從臣編檢庶吉士。皆不獲與。復為柏梁體。

御製首句曰。重開甲子文治昌。大學士鄂爾泰。張廷玉。福敏。陳世倌。史貽直。禮部尚書任蘭枝。兵部尚書彭維新。刑部尚書張照。工部尚書汪由敦。左都御史劉統勳。吏部侍郎阿克敦。戶部侍郎梁詩正。倉場侍郎彭樹葵。兵部侍郎王承堯。陳惠華。刑部侍郎錢陳羣。工部侍郎德齡。呂熾。內閣學士宗室塞爾赫。德新。秦蕙田。副都御史勵宗萬。宗人府府丞任啟。

運通政使敷文。張若靄大理寺卿。嵩壽詹事。張鵬翀太僕寺卿。劉綸僉都御史。嵇璜左通政。張映辰右通政。鄧時敏少詹事。表曰。修侍讀學士。世臣子振。陳邦彥。涂逢震。侍講學士龔渤。祭酒鄂容安。崔紀。四譯館少卿余棟。順天府府丞鄭其儲。太僕寺少卿陳其凝。鴻臚寺卿梅穀成。光祿寺少卿竇啟璘。庶子周資陳。侍讀雙慶。周玉章。侍講觀保。雙頂。諭德興泰。洗馬李文銳。候補洗馬陸宗楷。中允于敏中。董邦達。贊善宋楠。司業鶴年。陳世烈。左叅議薄海。右叅議吳應枚。編修阮學濬。僧格勒。沈文鎬。檢討鍾音。編修陸嘉穎。白瀛。周煌。路斯道。檢討德保。編修秦勇均。檢討周長發。編修周正思。柏謙。張映斗。任端書。林蒲封。萬年茂。李龍官。曹秀先。檢討韓彥曾。周禮。郭肇璜。編修錢琦。董泰。宋邦綏。姚廷佑。葉酉。王居正。汪師韓。金相。孫人龍。潘乙震。楊述曾。徐景熹。湯大紳。檢討廖鴻章。編修蔡揚宗。王覺蓮。給事。

中鍾衡。程鍾彥。楊二酉。程盛修。王興吾。周祖榮。鄒一桂。胡定。馬宏琦。御史包祚永。李清芳。孫灝。吳文煥。張漢。馮秉仁。范咸。張孝捏。楊開鼎。馮元欽。歐堪善。沈景瀾。沈廷芳。庶吉士邵齊。燾。寶光。龔凌鎬。羅暹春。田沆。胡澤潢。王世仕。王太岳。朱標。張泰開。姚範。劉炳。孫廷槐。朱佩蓮。德保。蔡時田。徐瑋。經聞。王鈺。杜若拙。盛格。顧汝修。戈岱。劉錫齡。閻循琦。覺羅奉寬。惠元士。金洪。蔣辰祥。叢中芷。周孔從。王康佐。廖芳蓮。陳桂洲。熊為霖。黃遇隆。熊元龍。張日譽。陸樹本。周人驥。周燾。程景伊。邱柱。陳大論。出科聯。儲麟趾。以次賡續成章。上舉十八學士。登瀛洲事。顧大學士鄂爾泰。張廷玉。曰。卿等無媿房杜。顧朕弗逮唐太宗耳。二臣惶恐避席。奏言。陛下上法堯舜。過唐太宗遠甚。臣等謏劣。亦思孜孜日贊。少効交修之責。然限於才力。媿出房杜下。有負。

聖諭。因頓首謝。

上又因昆明池賦詩事。諭羣臣曰。翰林之職。雖在文章。要貴因文見道。爾諸臣當明體此意。羣臣竦然敬聽。復頓首謝。宴畢。賜樂善堂全集性理精義各一部。及綺絹茶果有差。

上起更衣。復宣示

御製七言律詩四章。詩曰。歡騰芸署小陽春。此日崇文引席珍。顧我慙為房杜主。豈伊獨數馬鄒臣。石渠典故應增舊。璧宿光華更覩新。影麗花磚爭到八。儘教霑醉酒三巡。瑞旭瞳矚靄扇鸞。筵開翰墨會衣冠。五車四庫從來紀。劉井柯亭取次看。玉版揮毫盈鳳沼。花瓷賜茗擘龍團。濟川自古資舟楫。便欲因尋學海瀾。昌辰天祿集鵷聯。欣詠斯干小雅篇。烏革輦飛躋君子。誦詩講易共高賢。光凝黼座垂華藻。篆繞猊鑪散瑞煙。咫尺玉堂清切地。底誇瀛島說登仙。百年禮樂慶昭融。保泰常持惕若衷。漫以新詩鳴豫大。誰將忠告贊欽

崇。傳巖夢賚應無藉。唐室賡歌訝許同。心喜百僚知我意。不將高議調升中。駕興隨幸貢院。頒賜

御書額曰。旁求俊乂。聯曰。立政在英材。慎乃攸司。知人則哲。與賢共天位。勗哉多士。觀國之光。並

御製詩曰。翰苑瓊筵酌令辰。棘闈來閱鳳城闈。百年士氣經培養。寸晷簷風實苦辛。自古曾聞觀國彥。從今不薄讀書人。白駒翺羽傳周雅。佐我休明四海春。盡道文章接上台。菁莪樂育濟時才。千秋得失非虛也。咫尺雲泥亦幻哉。若有淚眶啼桂落。那無笑口對花開。鳳池多少簪毫者。都向龍門燒尾來。萬里扶搖正翮搏。飛龍利見豈為干。志賢聖志應須立。言孔孟言大是難。見說經綸推國士。從來桃李屬春官。但令姓氏朱衣點。那惜三條淚燭殘。周遭園棘院沈沈。景物當前總入吟。材擬圭璋方特達。文歸雅正薄艱深。禹門魚變辭

凡水。喬木鶯遷出故林。寄語至公堂裡客。莫教冰鑑負初心。復幸紫微殿觀象臺。還宮。○諭曰。直隸布政使沈起元著來京以京員照例補用。布政使員缺著按察使方觀承補授。其按察使員缺著天津道陶正中補授。○諭前曾降旨。令索拜留藏。協同傅清等緝捕羅卜藏丹怎。不必即行回京。今據四川巡撫紀山奏稱將派出隨同傅清之綠旗弁兵。俟抵藏後。令於索拜回京時沿途隨回等語。若不

能即獲羅卜藏丹怎。必至弁兵久待。索拜既交該部察議治罪。一俟傅清到藏。無庸留藏。仍著來京。將查拏羅卜藏丹怎之事。交頗羅鼐傳清等遵朕前旨辦理。○辛未。

上御乾清門聽政。○禮部以慶賀

皇太后聖壽節。先期疏請得旨是。照例行禮。奉皇太后懿旨。今年停止筵宴。○諭向來鄉會試及考試生童俱在貢院。其餘考取中書筆帖式。膳錄教習。及貢監考職俱在午門等處朝

考。自雍正七年以後陸續改入貢院者。原為易於防範稽察起見。然文武鄉會試。派有內外巡緝員役。防範周密。而今科鄉試。尚有懷挾代倩。種種弊端。其餘考試。又未便照鄉會試之例。多派員役搜查。伊等入場。不過各歸本號。並無稽察之人。轉不若朝考有護軍人等監看。可以除傳遞代倩等弊也。嗣後除文武鄉會試。并考試生童。仍在貢院外。其餘各項考試。著各該部查照從前午門等處朝考舊例辦理。仍於取中之後。再行嚴加覆試。○吏部議覆。山東巡撫喀爾吉善疏請登州府知府永泰呈請終養。應照例准其回旗養親。得旨。依議。向例官員告終養者。俟養親事畢。方得補用。但旗人回京與漢官回籍不同。或在旗在部皆可補用。以供驅策。永泰到京。著該處帶領引見。請旨。嗣後旗員告終養者。悉照此例行。朕思旗員有老親在堂。銓選赴任。二三年內即請終養。曷若於臨選之時。令其

自揣難以久任。即將親老緣由。向該部具呈轉奏。不必補用外缺。恐因此或生趨避之弊。其如何定例之處。該部妥議具奏。○壬申。

上詣

皇太后宮問安。○申飭各省督撫。辦理刑名。輕重失當。諭從來明刑弼教。貴於平允。凡決獄之宜輕宜重。必須詳慎推勘。使情與罪符。方足以成信讞。今歲各省秋審冊內。情實緩決。可矜各案。經九卿改正者甚多。其中如貴州之李文仲。湖北之毛倫。湖南之石老六。文四仔。浙江之姚四。山東之張小蘭。顧小生。王璋。直隸之周存兒。陳三小等案。或前後案情不符。混行矜減。或以毀隄毆官之罪。而寬其情實。或以屢行謀殺之犯。而置之緩決。或犯姦阻控。毆死人命。或連掘數塚。開棺取物。或與族姪通姦。拒捕致死本夫。或毆斃尊長二命。或誣告伊主死罪。以及屢次行竊。持刀強姦。與故殺病妻。情極殘忍之人。皆予緩決矜減。

殊屬姑息。至於情有可原之案。該督撫又或失於推勘。草率擬斷。應緩決而置情實。應矜減而置緩決者。不一而足。夫法律為國之紀綱。出入關乎民命。過重則乖矜卹。過輕則長奸惡。該管大吏。所宜究心。今各省案件。朕舉其一二情跡顯然者。尚如此辦理。則各該督撫。平日所辦刑名之事。未能允當者。諒亦不免。著該部傳諭申飭。○兵部議覆山東巡撫喀爾吉善奏稱。登夏兩鎮。暨撫標兵丁。盜甲舊敝。請借動建曠製造。分四年扣還。但各營公費。每年俱有額定。現在實屬事繁用缺。懇照楚省邀恩成案。酌於每兵百名。額留公費守糧二分外。再暫留一分。將借支銀兩扣清之日。仍舊募補等因。查東省額兵。扣存公費三百七十餘分。每歲約銀四千餘兩。前因製造盜甲。借支建曠項下銀八千八百兩。將各營公費。分四年扣還。每年止扣銀二千兩。尚餘銀二千二百餘兩。足資營用。不便援照楚

省之例。應將該撫所請之處。毋庸議。得旨。如該撫所請行。○刑部等衙門。議准湖南巡撫蔣溥疏稱。湘鄉縣民周開基。調戲阮第佐妻余氏。自縊身死。將周開基擬絞。余氏請旌一案。嗣因周開基翻供。誣指余氏與人通姦。前往捕捉。致氏羞忿自縊。續經審出捏造污蔑各實情。應照原題。將余氏仍請旌表。從之。○賑貸直隸保定大城。通州。蠡縣。慶都。定興。雄縣。龍門。廣昌。新城。萬全。西寧。薊州。灤州。天津。慶雲。靜海。延慶等十八州縣。水旱蟲雹等災民。並分別停緩新舊額徵。○緩徵直隸寧河縣。早災舊欠。○卹長蘆屬慶雲縣。早災竈戶。分別蠲緩額徵。○以故奉恩輔國公齊努渾弟功宜布襲爵。○宗人府府丞任啟運故賞銀二百兩。○癸酉。

上詣

奉先殿。

壽皇殿行禮。○是月。奉天將軍達勒當阿奏。准

盛京刑部侍郎兆惠面奏摺一件。奉旨交臣議奏。查奉天各屬兵丁。於春秋俸餉。難以接濟之時。向本管佐領。驍騎校。領催等告貸。該管官不能週給。往往借取鋪戶。因有官賑鋪之名。誠如該侍郎所奏。以有限之錢糧。飽奸商之漁利。實由從前各官。辦理不善。竟成數十年陋習。今若遽行嚴禁。復恐兵丁猝遇緊急差徭。束手無策。必致貽誤。現在寒冬。兵丁領餉。必待來春。又恐仍向借取。臣已另摺奏懇。豫借乙丑年正二兩月餉銀。使之應差度日。將來如何長遠有益之處。容臣與各副都統。公商妥協。再行具奏。至該侍郎所稱。於滋生銀兩項內。動撥資濟。旗人生齒日繁。紅白諸事。費用甚廣。礙難辦理。應毋庸議。得旨。著依議行。○直隸總督高斌奏。勘估昌平州居庸關。居庸上關。八達嶺南口。沙河。鞏華城。三河。薊州。玉田。豐潤。盧龍。撫寧。十二處城工。應行修理。得旨。去年經過三河。看來尚屬整

齊。豈即有坍塌。此城有保固否。查明再奏。餘依議修理。尋奏。遵旨查明三河縣城垣。雍正五年原未全修。乾隆三年亦祇將坍塌工段修整。俱滿三年保固例限。此次估修工段。係從前未修之處。得旨知道了。三河仍照議修理可也。○署兩江總督尹繼善奏。辦理武關。如意嚴密。得旨。此等事。必俟朕申飭之後。而始拮据奉行。則置汝等督撫。所為何事。○江蘇巡撫陳大受奏。海州。靖江等處。辦賑情形。得旨。覽奏稍慰。但汝江南吏治。近來頗覺因循。惟飾外貌。且多寬縱。甚非朕所厚望於汝督撫者也。與尹繼善共觀之。○又奏。辦理武關諸務。得旨。所奏俱悉。不因朕旨。爾等亦不肯如此認真也。○江南河道總督白鍾山奏。奉到部文。親往面同督臣鹽臣。商辦河湖蓄洩機宜。得旨。所奏俱悉。此雖因公同商議。妥辦之事。而專責則在汝。大凡工程最易滋弊。稍不慎重。必有任其咎者。慎之。○署兩淮鹽

政吉慶奏。請將泰州通判王又樸。以陞銜留任。得旨。鹽政從無題留屬員者。以非甚要缺也。不准行。○江南蘇松水師總兵胡貴奏。海汛。救寧。得旨。覽奏具悉。蘇松水師廢弛。念汝新任。故從寬宥。過以後。實力整飭之。○江西南贛總兵章隆奏。收成分數。得旨。覽奏俱悉。汝為總兵。營伍是汝專責。何未一言奏及耶。○浙閩總督馬爾泰等奏。福建漳州府知府員缺緊要。俟簡發。以道府同知補用之胡寶琳。高景蕃。金溶。舒成。秦仁。等到省之日。酌量才具相宜。暫委一員署理。得旨。好。知道了。若此數人中。則莫若金溶可。然稍用聰明。須訓成之。○浙江巡撫常安奏。紹興府餘姚縣趙家臺營汛。粘插黃旗知單。據三山司巡檢張連。訪拏成末。費子麟。供與胡聖侯。胡世林。等素有讐隙。因地方奉文查拏。李開花。是以借此栽害。現飭細加研訊。究問夥黨。俟覆審確實。再行具奏。得旨。此等之人。應重處以示警。

作何處置之處奏聞。○又奏浙省紹興府民風每多好勇鬪狠。喜習拳棒。據該府周範蓮詳稱。上虞縣地方。地棍金為章等。窩留胡尚公為教師。集多人學習拳棒。逞強借穀。意在鼓惑窮民。將為搶奪之舉。現經陸續拏獲到案。研訊定擬。得旨。亦應嚴究者也。○又奏淳安縣水災加賑情形。並請修築城垣。土隄。以工代賑。得旨。應如是極力辦理。以稍贖前愆。○浙江黃巖鎮總兵蔣麟經。奏年歲收成。並近查海汛。考察陸路各營弁兵。得旨。諸凡實力為之。不可謂浙省武備。今歲未查。而生玩視之心也。○浙江衢州鎮總兵李琨。奏衢嚴等處被水撫卹情形。得旨。所奏不無為常安隱飾之意。且亦稍遲矣。○福建巡撫周學健。奏現在閩省收捐本色。與買補倉穀。一時並舉。歸於官倉者倍多。流通民間者自減。且發糶投捐。皆出富民餘粟。兩者並行。或貪圖貴價。則投捐者少。或急於功名。則發糶者鮮。勢

不能兼收其益。必當用其一。緩其一。方不致有礙民食。謹議將應行買補。節年平糶穀。暫停採買。聽生俊源源上捐。俟上捐一有成數。已足額儲。即將平糶存價。解歸司庫。另候撥用。如投捐者尚不足額。或將平糶存價。乘時採買。得旨。所見甚妥。知道了。○又奏蘇祿國王遣夷人緞冉末等。附商船來厦。齎有咨文。稱該國貢使馬光明等。事竣未回。遣伊等探問消息。查該國王。於乾隆八年遣使馬光明等。赴京進貢。事竣回閩。業飭配渡放洋。今遲至半載。尚未回國。必有在洋遭風之事。俟確查蹤跡。行文知照該國王。現將夷人緞冉末等。安頓撫卹。得旨。只可將此情告彼來使。令其回報伊國。復留彼在此無益。○福建布政使高山。奏遵旨前往臺灣。清查官莊地畝。安輯番民。得旨。所奏俱悉。此舉不過為民間清宿弊。並非為增益錢糧起見。不得錯會意也。○巡視臺灣給事中六十七等。奏福興。泉漳。

四府連歲歉收。經撫臣議撥銀五萬兩來臺。糴買穀十萬石。運送內地。其所撥之銀。尚未到臺。臣先與道府。按產穀處所多寡情形。預定派買數目。一面預備船隻。酌定運送章程。使內地倉儲。不致久懸。臺地船戶商民。亦無絲毫貽累。得旨。所奏俱悉。○湖北巡撫晏斯盛奏。請行簡明由單。將本年科定額數。分晰開載。以杜飛灑積弊。得旨。知道了。有治人。無治法也。○又奏。臣於雍正六年奏請學政考校。應將文行相比。分別等第。行優文高者列一等。於姓名下。註明孝弟廉讓公正端方字樣。行次優而文高者列二等。註明謹厚循雅字樣。行中文平者列三等。註明安分無過字樣。大比則將一二等生員。送主考明試之。以德行文藝超越儕輩者。列為解首房魁。拆卷填名。仍以文行相次。照冊註明行誼。如額送部。會試亦如之。進而廷試。欽定一二三甲。嗣奉部議。以不便施行。毋庸議。但所謂不便施

行者。不過糊名之例。難分優劣耳。然第記其最優次優。而不著其名。則仍在暗中摸索。臣前後一隅之見。不敢自隱。為此奏請訓示。得旨。汝言亦是。而亦實有難行之處。待朕緩酌之。○湖南巡撫蔣溥奏。請陞見得旨。且不必來京。但汝所云。寤寐如對朕。諸事設誠而力行之。則一切可以勝任而愉快。何異陞見耶。○湖南按察使徐德裕奏。由江蘇赴任。經過地方。歲收糧價情形。得旨。欣慰覽之。此等奏報。尤應據實直陳。不可稍涉粉飾也。○湖廣提督王無黨奏。巡察營伍情形。得旨。且容汝等實力整飭。以觀後效也。○湖廣襄陽鎮總兵張大猷奏。請聖訓。得旨。一切營伍實力整頓。器小易盈之習。戒之。○河南巡撫碩色奏。豫省應修城垣。現在估需工料二百兩以內者。限一年修竣。二百兩以外至四百兩者。二年修竣。四百兩以外至六百兩者。三年修竣。六百兩以外至八

百兩者。四年修竣。八百兩以外至一千兩者。五年修竣。俱令各州縣於額設公費內動用。至工料在一千兩以外者。存俟水旱不齊之年。以工代賑。得旨。知道了。亦應不時察查。勿致累民也。○川陝總督公慶復奏陝甘地方有卦子一項。男婦成羣。攜帶騾馬。借戲法乞食為名。乘機竊盜。大為民害。聚散無常。現飭文武員弁稽查盤詰。如有匪跡敗露。即行拏究。得旨。好。知道了。○又奏江卡汛撤回把總張鳳帶領兵丁三十六名。行至海子塘地方。遇夾壩二三百人。搶去駝馬軍器行李銀糧等物。現飭嚴緝務獲外。查官兵猝遇野賊。自當奮勇前敵。苟鎗斃一二。衆自驚散。詎該把總怯懦不堪。束手被刦。川省界雜番夷。弁兵積弱。向為悍番玩視。若不大加懲創。即擺設塘汛。俱屬具文。一面將該把總飭革拏問。再札致撫提二臣。將大海子地方遼濶。塘汛隔絕之處。作何嚴密防查。以杜後來竊刦。得旨。

所見甚是。應如是辦理者。○甘肅巡撫黃廷桂奏。洮州吉善寺僧丹巴加木榮呈出所領都綱劄付。查係禮部之劄。鈐蓋吏部堂印。且鑄給之印。體質輕薄。字跡不全。並未編列字號。鐫刻年月。所領勅書。上用寶二顆。體小而文不清。其為偽造無疑。據供。伊叔瑪尼徹只胡圖克圖等在京幹辦給予。情願解京質對。得旨。此事已據訥親奏過。係伊家奴所為不法之事。現交部審擬。但汝所奏似覺遲矣。不可。○四川巡撫紀山奏。江卡撤回把總張鳳。行至海子塘被刦。現在飭拏務獲。得旨。敦羅克之事甫完。而復有此。則去年汝等所辦。不過苟且了事可知。況此事慶復早已奏聞。意見亦甚正。而汝所奏遲緩。且意若非甚要務者。大失封疆大吏之體。此案必期示之以威。而革其心。首犯務獲。以警刁頑。不然。將來川省無寧歲矣。與鄭文煥看。爾等善為之。○兩廣總督那蘇圖等奏。承准廷寄。御史衛廷璞。

歐堪善條奏二件。請停緩開採礦山。奉旨交臣等定議。臣抵任後。即與臣策楞詳查案卷。并備詢屬員。博採輿論。竊惟粵東礦廠。自康熙三十八九年以來。議開議停。已非一次。臣等身膺重寄。何敢好大喜功。創此無益之舉。第敷政有體。當衡其輕重緩急。補偏救弊。而歸於至當。若兩御史所奏。雖因息事寧人起見。而臣等仰承下問。不敢不據實上陳。查粵省山海交錯。五方雜處。兵民商賈。在在需用錢文。鼓鑄一事。萬難緩待。而銅觔之產於東洋者。江浙等省。紛紛購買。尚慮虧缺。其產於滇南者。額解京局。及供應本處。與川黔等省鼓鑄。豈能源源接濟。今粵東現有礦廠。棄而不取。非計之得也。議者謂礦廠一開。奸良莫辨。海寇黎徯。刦壠踞山。事屬可慮。伏惟久道化成。數十年來。鯨鯢絕跡。必無意外之慮。即如雲南夷獮雜處。粵西苗獍交錯。頻年開礦。並未滋事。惟在司事文武。彈壓有方。便可杜

絕。況粵東山多田少。民人雖有胼胝之能。苦無耕作之地。與其飄流海外。作奸為盜。何如入山傭趁。使俯仰無憂。是開採非特為鼓鑄計。兼可為撫養貧民計也。若云本省米穀有限。丁衆食指浩繁。查產米地方。遠則江楚。近則粵西。皆一帆可達。購鄰省之米。養本省之人。有何食貴之慮。臣等隨時調劑。斷不使粵民向隅。如臺臣所云。因開礦而米價即貴也。似宜將現在報出銅鉛各礦。先行試採。自廣州肇慶二府起。由近至遠。以少及多。砂旺即開。砂弱即止。其衰旺緣由。及應開應停。作何抽課之處。容試採之後。陸續奏聞。至金銀二礦。民多競趨。恐其先金銀而後銅鉛。轉於鼓鑄有礙。應請停止。照舊封閉。其餘各項事宜。悉照戶部議定章程辦理。毋庸更改。得旨。大學士會同該部議奏。署廣東巡撫廣州將軍策楞奏。奉准。廷寄御史衛廷璞。歐堪善條奏二件。請停緩開採礦山。奉旨。交臣等定議。查

粵省人稠境窄。賴此產礦山場。乃天地自然之利。如果經理得宜。於民生殊非小補。且現議開爐鼓鑄。銅觔不敷。與其遠購鄰封。何如近取本地。惟是金銀並採。或啟紛爭之漸。自應將銅鉛等礦。先為試行。將來揀選砂旺山場開採。其金銀礦。仍概行停止。督臣那蘇圖到任後。與之詳加商酌。意見相同。其餘吏治官方。民情土俗。並水師營汛之疲玩。鹽務商欠之混淆。亦一一告知。不敢以事非本任。遂

為諉卸。得旨好。汝二人和衷辦理。以期地方日有起色。庶政以次畢舉。將來吏治民安。海疆寧謐。方慰朕懷也。○廣東瓊州總兵黃有才奏。收成分數。民黎安堵情形。得旨。所奏俱悉。不可因太平無事。而弛敬慎之心。一切政務。勉之莫忽。○署廣西巡撫託庸奏。廣西地方西北界。係苗疆要地。內地漢奸。往往欺凌勒詐苗民。以致激成事端。據柳州府知府譚襄世等查獲貢生唐代榮。馬玉彩。生員苗庭

等。或假借公事。派詐苗徭。或包攬詞訟。逞強武斷。又革兵張上才。革役陶畧。李老四。劉英等。潛入苗寨。勒詐擾累。現在咨革審擬。並飭各屬一體嚴查。得旨。諸凡如是留心。方副任使之意也。○又奏。逆犯李捷三等十餘名。多年在逃。未獲。據慶遠兵役。在黔省訪獲匪徒譚所學等三人。形跡詭秘。恐係李捷三等犯詭捏姓名。現咨貴州督臣審明定擬。後即將該犯解粵質對。得旨。留心緝拏。正犯固屬要務。但不可入無辜人以罪。而思銷案也。○貴州提督丁士傑奏。請特降諭旨。通飭各直省督撫提鎮。訓練將弁。惟以弓馬之生熟為考覈之殿最。得旨。此等諭旨。不當三令五申矣。亦惟汝等大員奉行如何耳。所奏知道了。○貴州鎮遠鎮總兵冷文瑞奏。擒獲苗疆漏網首惡生羊。解送督臣審擬。得旨。此事甚屬可嘉。知道了。

大清高宗法天隆運至誠先覺體元立極敷文
奮武孝慈神聖純皇帝實錄卷之二百二十七

實錄卷之二百二十七

三

大清高宗法天隆運至誠先覺體元立極敷文
奮武孝慈神聖純皇帝實錄卷之二百二十八

監修總裁官臣禮部侍郎太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲副都統世襲特都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍滿洲副都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆九年甲子十一月甲戌朔遣官祭

實錄卷之二百二十八

一

先醫之神○乙亥諭山東青州府屬之博興
樂安二縣今年有秋禾被旱之鄉村朕已照
該撫所請將災地新舊錢糧分別蠲緩今聞
二縣未被災之處即本年夏麥被旱之區秋
禾雖未成災而收成僅有六分未免歉薄若
將錢糧照例起徵民力難以輸納朕心軫念
著將博興樂安二縣內夏麥被旱秋收歉薄
之處所有本年錢糧緩至來年麥熟後徵收
以紓民力該部即遵諭行○大學士鄂爾泰

等議覆署湖廣總督鄂彌達疏稱遵旨交議御史張漢條陳湖廣水利一摺臣惟治水之法有不可與水爭地者所以祛民患也有不能棄地就水者所以從民便也所謂不可爭者疏湮濬淺導壅殺流向來洩水港汊毋令堵截致水四溢而為災也所謂不能棄者東洲西灘積淤成腴現在居民之圍田萬難開鑿致民離居而廢業也楚水之大者曰江曰漢江水自四川經宜昌荊州等府分流於洞庭而過漢口江固與漢會也漢水自陝西經鄖陽襄陽安陸諸府而出漢口漢亦與江會也江水之患江陵監利松滋石首諸縣實受其衝漢水之患鍾祥京山潛江天門荊門沔陽諸州縣實受其衝二水支流脈絡相通分注而互漲者各屬交受其衝今臺臣張漢所請者疏江之水曰調絃口曰宋穴曰楊林市曰虎渡口曰采穴曰龐公渡等處蓋欲導江水入洞庭分於支河而殺江之流也疏漢之

水曰白口曰操家口曰泗港等處蓋欲導漢水繞三台湖出五通口而殺漢之流也臣謹分言之江之調絃口虎渡口皆入洞庭之道向來河路寬深足資宣洩兩岸隄塍屹立無庸置議至宋穴采穴楊林市等處自宋元來久湮訪之故老考之傳誌舊跡無存其間隄岸綿亘田園廬墓碁布星羅若欲掘地成河勢必廢已築之舊隄又欲增無數之新隄不獨工費浩繁無從措手而田地為墟人民失所豈容輕議又龐公渡一處明天啟年間曾經開通後因泛溢國朝順治七年經該縣詳明堵塞始安此江水之不能疏者也漢之白口操家口距五通口計八九百里中間烟火萬家田疇彌望今若漫議開洩勢將千萬頃之良田胥為河流經行之道而兩岸隄防之費殆不可以百萬計況明神宗年間操家口決經官民畢力堵禦崇禎九年又決不能堵禦直至國朝順治七年用各縣民夫合築經

數十餘年之久。始成樂土。並非年久淤塞。現在沙洋一隄。經前督臣阿爾賽題請動帑興修。壅之方懼為患。曷敢言洩。至於泗港。居天門之上流。泗港一疏。天門殆將為壑。他若通順等河。不通小港。水大無能宣洩。水小遂成涸澤。此漢水之不能疏者也。又張漢請疏便河郝穴。使江水從了角廟東注。則江水必入於漢水。方欲疏漢以殺其勢。而又引江水以灌之。未便置議。張漢又云。操家口達五通口。為漢水故道。查禹貢載漢水至於大別。南入於江。大別去五通三十餘里。非故道也。臣思滄桑屢易。禹跡茫然。昔之由地中行者。故軌久已難尋。三楚之水。百派千條。其江邊湖岸未開之隙地。須嚴禁私築小垵。俾水有所匯。以緩其流。臣所謂不可爭者也。其倚江傍湖已闢之肥壤。須加謹防護隄。俾民有所依以資其生。臣所謂不能棄者也。其各屬迎溜頂衝險難之處。長隄聯接。每歲責令分管水

利各員。逐一查勘。督率居民。增高培厚。寓疏濬於壅築之中。此全楚所以興水利。而除水害之大概也。臣躬親閱勘水道情形。如此。臺臣張漢所請疏洩之處。似無庸議等語。查興修水利。全在便民。今該署督鄂彌達身在地方。親經閱勘水勢。既已備細分析。則是江漢二水。皆不可疏。應將該御史張漢所奏。俱無庸議從之。○吏部等部議覆江蘇巡撫陳大受奏。稱各省編徵孤貧口糧銀米。照額開銷。俾無告之民。衣食有資。州縣官果能實心愛民。自必加意稽查。不致稍有虛冒。無如漫不經心。以致胥役等朋侵串蝕。已成錮弊。是以朝廷之仁政。飽奸貪之慾壑。藐法肆行。莫甚於此。若不大加懲創。無以示儆。除印官染指分肥。或明知故縱者。據實叅處。照例究追外。如漫不經心。例止失察處分者。照例於侵冒之胥役各名下追解歸款。仍於失察之印官名下按數追出。以為地方公用。應如所請。並

通行各直省一體遵行從之○丙子豁免江蘇沛縣乾隆八年昭陽湖水沉田地並乾隆五、六、七、八等年水沉老荒麻地額徵○丁丑上詣

皇太后宮問安○戊寅

上御太和殿視朝文武陞轉各官謝恩○禮部等部議覆雲南總督兼管巡撫事務張允隨疏稱東川昭通二府及鎮雄州永善縣自雍正五年改隸滇省以來應試生童漸多請於

乾隆十年為始

每學設廩增各八名

照例十

二年後出貢應如所請又稱東昭二府生童遠赴曲靖應試跋涉艱難請於昭通府城添建考棚查滇省幅幘最廣程途寫遠若添建考棚學政按試勢難周徧況二府改隸以來即歸曲靖考試相安已久應毋庸議但既稱該屬生童歲科二次遠途赴試維艱應令學臣按試曲靖時即將東川昭通二府及鎮雄州永善縣等學生童歲科接連考試從之○

已卯兵部議准貴州總督張廣泗疏稱古州鎮滾縱地方於乾隆四年題准將分防王嶺之鎮標右營守備一員兵三百名移駐防守在案查該汛深居苗穴甚屬要隘應建石堡礮臺並衙署營房等項○斗於黔省節省水腳銀內動支從之○賑貸江蘇靖江丹徒丹陽清河桃源安東銅山海州沐陽贛榆泰興等十一州縣及徐州衛本年被潮災民並分別蠲緩新舊額徵○蠲賑安徽歙縣休寧婺源績溪宣城南陵涇縣寧國旌德貴池東流蕪湖鳳臺鳳陽懷遠廣德建平十七州縣安慶宣州建陽鳳陽等四衛被水災民並緩徵太平青陽繁昌壽州阜陽潁上等六州縣新舊錢糧○庚辰諭據劉於義高斌奏稱直隸現在興修水利天津道所屬河道甚多必得該道親身督查始克有濟今陶正中蒙恩補授按察使查有保定府知府吳謙誌為人謹慎辦事實心隨臣等查勘水利並議辦保

屬水利事宜。俱能通曉妥協。合無仰懇天恩。將吳謙銑署理天津道事務。令與清河道王師協同總辦。臣等仍不時指示。以期漸加諳習等語。吳謙銑著照劉於義高斌所請。補授天津道。昨所用吳煒著留於直隸。俟再有道員缺出。該督即行題補。○以光祿寺卿朱定元為內閣學士。原署福建巡撫孫嘉淦為宗人府府丞。○命工部侍郎呂熾提督順天學政。辛巳諭醫宗金鑑一書告成。和親王大學士鄂爾泰。暨本館經理總修。提調纂修校閱。收掌謄錄等官。並該院官員人等。著各賞給一部。吳謙亦著給一部。再各直省布政司俱著發給一部。聽其翻刻刷印頒行。○戶部議覆直隸總督高斌疏稱。涿州樂亭無極等三州縣水衝沙壓地九十二頃零。應除地糧三百一十一兩零。芝棉五釐零。丁匠銀六十四兩零。地閏銀一十九兩零。米一十三石零。耗米四斗零。草折米四石零。草一百六十一

束零。照例應准豁免。惟查樂亭縣水衝沙壓地二十四頃零。據稱乾隆二年潮淹賑竣之後。居民大半往關外覓食。錢糧歷未徵收。因何各該年奏銷冊內未完項下並未聲明。再老荒地例不徵糧。內樂邑老荒地五十七頃零。從前自無額徵。今何又請豁免。應令該督再行確查具題。從之。○壬午

上詣

皇太后宮問安。○以直隸督標中軍副將王朝輔為山東兗州鎮總兵官。○甲申諭前據準奏。稱江南科場點名時。搜獲懷挾之徐斌。王曾培。比即分別枷號等語。朕復聞江南搜獲懷挾之人。悉行釋放。令尹繼善查明。準奏於所奏二人之外。果有釋放之人否。并查例應枷號一月為滿者。準奏果照例辦理否。今據尹繼善奏稱。查得今科江南文闈八月十一日二場點名。搜出廣德州增生徐斌。懷表文一篇。又拏獲吳江縣附生王曾培。表判一

卷經準奏發外監試江寧府知府官保訊供據徐斌供因頭場患病恐二場不能終場故帶表文一篇便於照寫等語據王曾培供在龍門前地內拾著一個紙卷當被拏獲等語官保錄供回覆準奏當日即令枷示場前又查得同日在貢院大門以外查獲淮安府學生員張再蠡於考籃內帶表文一篇當經外監試官保回明準奏諭以門外查出尚未帶入門內免其枷示即行釋逐是準奏所奏徐

平定人下

斌王曾培二人之外實釋放張再蠡一人此外俱係於未搜之先自行拋棄者也至懷挾定例應枷號一月徐斌王曾培於十一日枷起即於十四日二場完竣放枷均於例限未滿再查定例生儒懷挾應發為民今徐斌已經準奏咨草其王曾培因提調張九鈞等議詳係拾取紙卷與自行挾帶者有間請免咨草準奏據詳批飭從寬免草發學重責三十板示儆等語夫國家掄才大典必須稽察嚴

密按法懲創使懷挾勦襲之徒不能僥倖庶選取皆得實學朕諄諄誠諭至再至三今準

奏將例應枷號一月之人未滿即放例應褫革之人免其咨草并將懷挾表文之張再蠡因在門外查獲即行釋逐明係有意疎縱深負朕釐清積弊遴選真才之至意準奏著交部察議張九鈞亦著察議以為疎縱者之戒生員王曾培張再蠡俱著褫革○諭曰山東布政使喬學尹著來京候旨其布政使員缺

平定人下

著按察使圖爾炳阿補授其按察使印務著直隸口北道王芥園前往署理口北道員缺著吳煒補授○乙酉

上詣

皇太后宮問安○丙戌

聖祖仁皇帝忌辰遣官祭

景陵○

上詣

奉先殿

壽皇殿行禮。刑部等衙門議奏革登州總兵馬世龍科派兵丁計贓五百一十二兩依律擬絞監候得旨如所議。○定邊副將軍額駙策凌奏巡查準噶爾放卡情形。准軍機處咨準噶爾以防範逃人為辭。從原舊放卡處漸次移近我卡。經額駙策凌於二月內奏報。有厄魯特在布爾哈台阿達克布爾噶蘇放卡。七月內奏報。有厄魯特在巴爾楚克口察罕布爾噶蘇放卡。竊照厄魯特等稱在巴爾楚克口察罕布爾噶蘇地方放卡者。即是前在布爾哈台阿達克布爾噶蘇地方坐卡之人。換回坐卡等語。查此兩處地名不符。詳對繪圖亦甚不明。經本處奏請應行文額駙策凌令將巴爾楚克口與察罕布爾噶蘇地方或在阿爾台山前或在山後再此地方與內地之卡相對離距遠近詳查具奏。以便俟夷使來時曉諭令其撤回。臣查去年十一月內在巴爾楚克卡座遇厄魯特巴爾袞額木可扣

在布爾哈台阿達克布爾噶蘇地方放卡。經該卡護軍校烏得等查得巴爾袞等現住之卡與我兵所住之巴爾楚克卡座相對在阿爾台山後相距卡座馬行一日一夜可到。又據薩拉布拉克坐卡護軍校安金保報稱準噶爾得木齊沙喇卜所住之處與我兵所住之薩拉布拉克卡座相對馬行一日一夜可到等語。今年七月內據前赴南路畧地之三等侍衛佛保等報稱出喀勒占和碩到埋藏木記處有厄魯特巴濟給伊棟等放卡居住。臣等將伊等先後所報之處訊之通知地方之蒙古等俱稱阿達克布爾噶蘇與察罕布爾噶蘇俱是一道在阿爾台山後至去年厄魯特額木可扣等所住之布爾哈台與阿達克布爾噶蘇及今年厄魯特巴濟給等所住之察罕布爾噶蘇俱是一處地名與我巴爾楚克薩拉布拉克兩卡相對與薩拉布拉克又覺稍近約畧有一百餘里奏入報聞。丁

亥諭向來武職因病解任俱留於本省調治。俟病痊以原缺補用。近准其照文職之例。回籍調治病痊之日。令原籍督撫驗看。送部引見。蓋恐其羈留本省。轉致食用艱難。是以定有此例。朕思此例未定之先。亦有因病不能留於本省。照例告休者。其中或有年力壯盛。屢次出兵。著有勞績之人。病痊之後。坐致廢棄。殊屬可憫。著將從前因病告休之遊都守備等官。回籍調養。今已痊愈。而年力尚壯。曾

平定縣志卷之二十一

十一

經隨師顯著勞績。領有部劄議叙者。俱令原籍督撫驗看。一體送部引見。以示朕愛惜人材。廣為錄用之至意。該部即遵諭行。○賑山東博興樂安二縣被旱災民。並緩新舊額徵。○撫卹廣東瓊山海豐陸豐饒平惠來潮陽大埔羅定電白信宜茂名石城化州吳川萬州等十五州縣被風被水災民。○賑貸甘肅河州平涼平番岷州西寧寧夏天通靈臺華亭狄道西固階州漳縣西和隆德鹽茶固原

靖遠崇信安化真寧合水環縣寧州文縣古浪鎮番靈川花馬池碾伯禮縣隴西平羅寧朔中衛等三十五廳州縣衛被雹及水風霜蟲等災民。並分別蠲緩新舊額徵。○戊子是日起。上以冬至祀天於圓丘。齋戒三日。

平定縣志卷之二十一

十一

大清高宗法天隆運至誠先覺體元立極敷文奮武孝慈神聖純皇帝實錄卷之二百二十八

大清高宗法天隆運至誠先覺體元立極敷文
奮武孝慈神聖純皇帝實錄卷之二百二十九

監修總纂官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務正黃旗滿洲都統世襲副都統軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務

世襲副都統軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆九年甲子十一月庚寅

上詣

南郊齋宮齋宿。○欽差協辦大學士吏部尚書
劉於義等奏臣等遵旨酌議直隸水利以期
有益無弊。一經理錢糧宜由清河天津二道
覈轉查該道原有經理河道錢糧之責此次
興修水利二道所屬為多應將工程一切需
用錢糧統責其支放稽查造冊申送題銷一
水利次第舉行若通俟工竣報銷案牘繁積
應令地方官等於完工日不拘一二處分案

具題請銷。一水利工程動用錢糧三萬兩以
上者遴委專員辦理。一二萬兩內外者委員
協同地方官辦理。仍以地方官為專責並嚴
禁夫頭包攬。一要工處所如必須專員董理
該督等於通省員弁內題請移駐其餘承辦
各員遇交代時必將工程錢糧逐一指交清
楚倘有漫不經心坐廢成功者查明叅處一
築隄開河間有占用成熟地畝旗地就近撥
補民地照例給價並即開除額糧一工程銀
兩例用京市平發給其平餘銀兩扣除解部
飯食紙張等銀每兩一分外其在工派委佐
雜千把微員以及隨工繪圖書役丈量人等
分別給飯食工費統於平餘銀內支銷下部
議行。○辛卯冬至祀

天於

園丘

上親詣行禮。○遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

端慧皇太子園寢 詣

皇太后宮問安○諭朕聞金德瑛在江西學政之

任操守甚好取士公明著再留任三年○壬辰

上以冬至節詣

壽康宮行慶賀

皇太后禮王大臣於

慈寧門衆官於午門行禮○御太和殿受賀○

癸巳

上詣

皇太后宮問安○幸瀛臺 戶部議覆江南道

御史李清芳奏稱臣見撫臣周學健奏福建

減數收捐監生一事經收各員於部定倉費

飯食之外每名索取規禮二三十兩至四五

十兩不等查每名監生統計捐費不過百十

金今公家收其二官吏取其一雖曰減價其

實加價閩省如此他省亦必不能免請飭各

省督撫實力稽查如有留難勒指及私收規

禮者嚴叅究處不得稍存姑息應如所奏通

飭遵行從之○準噶爾部人察罕庫克新率

親屬六人來降得旨察罕庫克新前來投誠

數次俱被擒獲始終克矢誠心來投甚屬可

憫著格外施恩授為七品官賞給官用緞二

端布十疋○甲午以內閣學士王會汾為明

史綱目副總裁○貴州道御史張惟寅奏福

建巡撫周學健因本年武闈鄉試有領催金

朝榮同民人吳必誠起意撞騙該撫風聞密

諭外委宜子勉等託名謀中武舉發銀一千

五百兩擡至吳必誠家立寫合同旋據擊解

審辦等因在該撫此舉固欲杜絕弊端不知

以詐防詐誘人犯法成何政體請將周學健交部察議得旨張惟寅所奏自屬情理之正但周學健職司考試急欲查隱弊以肅科場是以如此辦理初不覺其蹈於智取術馭有乖正道也然此端一開恐各省效尤啓誘人犯法之漸殊非政體爰降此旨將張惟寅奏摺批發俾中外知之周學健亦不必交部察議賑恤雲南白鹽井被水竄民 乙未上御乾清門聽政以翰林院檢討德保充日

講起居注官吏部議准甘肅按察使鄂昌奏州縣奉調入闈交代之案照公出日期展限從之工部議覆河東河道總督完顏偉疏稱河南下北河廳屬蘭陽縣汛北岸耿家寨臨河隄工地處上游最關緊要乾隆七八兩年南岸漸長淤灘大溜由北岸衝激離隄漸近本年五月陰雨連綿河水長發全河直射隄根勢甚危險隨經下埽保護又值汛水陡長大溜奔騰匯注舊隄坦坡土鬆蟄卸帶

動新隄隨鑲隨墊晝夜搶護並內外月隄搶幫寬厚各工實估用銀二萬八千四百一十兩零先於河庫并各該年存貯銀兩物料內借撥動用應照例動支司庫銀兩歸款至下北河同知孫浙名下應賠漂走埽料銀一萬一千一百四十兩零并核減買土銀二千八百三十九兩零亦先於司庫銀內照數撥歸原款一面勒追解司完項應均如所請從之○丙申以原任直隸布政使沈起元為光祿寺卿○吏部議工部滿主事員缺掣籤將寧古塔年滿驛站官薩哈那擬補得旨據擬陞工部主事年滿驛站官薩哈那奏稱不識漢字情願在本處効力著交與該將軍以伊本處應陞之缺補用其工部主事一缺著歸於月分銓選向來奉天等處倉官年滿後應以在京主事等官陞用者伊等如有無力移產不能來京情願守候本處武職員缺原有送部引見以本處武職缺出陞補之例嗣後似

此年滿驛站官。於將用京缺之時。爾部行文該將軍詢問。如有情願在本處當差者。即照此例留於本處陞補。○戶部議覆福建巡撫周學健奏稱。臣於乾隆八年十二月內。訪知閩省自減數收捐監生之後。各屬仍有收受規禮之事。仰懇准令收受各員據實自首。如不遵首報。即據實糾參。奉旨徹底清查妥辦。當與督臣那蘇圖會同商酌。留心密查各員收受確數。一面通飭經收捐監之各府廳州縣。據實自行首報去後。茲據查辦齊全。確加覆核。通省經收各員。共收過規禮一萬五千九百三十六兩零。應請照數追出解司。撥充地方公用。謹將通省各員收受細數。另繕清單呈覽。得旨。該部分別察議具奏。今將閩省府廳州縣收受捐納監生陋規。及失察家人犯贓之興化府知府曹顯庚等。分別處分。得旨。此案收受陋規。及失察家人犯贓各員。本應照例處分。朕念人員衆多。特格外加恩。曹

顯庚等著照部議革職從寬留任。陸福宜等著照部議所降之級從寬留任。潘汝龍。俟補官之日。亦著照部議所降之級從寬留任。以上各員。部議革職提問者。俱俟六年無過。再行開復。部議降一級調用者。俱俟四年無過。再行開復。餘依議。○工部議覆署湖廣總督荊州將軍鄂彌達奏稱。武昌城西南保安門外金沙洲之左偏。為荻麥灣。緊臨大江。向有老隄為府城保障。緣江流衝激。日漸坍塌。須退入灣裏築大隄一道。約需銀一二萬兩。安陸府屬之沙洋。最為漢江險工。現在動帑修築。第漢水日就南滾。設遇暴漲。人力難支。須添築月隄。約需銀三四萬兩。請借帑銀四萬兩。合前督臣阿爾賽題請歲修借帑本一萬兩。共五萬兩。分交武漢行舖。按照每月一五生息。每年可得息銀九千兩。三五年間。兩處大工次第克舉。陸續歸還成本。臨期酌量留存。以為逐年歲修之資。又襄陽府之老龍石

隄。舊有子隄。已多坍塌。每年僅歲修銀三百餘兩。實不敷用。查該府庫內有積貯軍需銀二萬兩。請撥銀五千兩。交襄屬當舖生息。每歲可得息銀九百兩。合歲修銀共千餘兩。以充歲修隄工之用。均應如所請。從之。○丁酉。

上詣

皇太后宮問安。侍膳。○戊戌。

皇太后聖壽節。遣官祭

太廟後殿。○

上詣

壽康宮行慶賀

皇太后禮。王大臣於

慈寧門衆官於午門行禮。○奉

皇太后幸重華宮侍宴。○己亥。

上詣

皇太后宮問安。○辛瀛臺。○庚子。吏部議覆盛

京刑部侍郎兆惠奏稱。臣部職司刑名。承辦

奉天通省案件。較之盛京各部。實為繁劇。今

吏部酌定司員。裁減舊額十餘缺。均論俸陞選。並未議留題缺。將來年久諳練之員。推陞別部。新任者未諳審斷。難保全無錯誤。自應量為變通。查現在本部額設郎中員外主事司庫等官。共十九員。其蒙古員外二缺。滿司庫一缺。例係由京補放。其餘各缺。除一半遵例由京陞選外。所餘一半。應陞用盛京人員之郎中二缺。員外三缺。主事四缺。內滿堂主事一缺。請作本部題缺。其餘八缺。請照刑部保題之例。一歸吏部銓選。一留本部於司員筆帖式內。按應題品級。擬定正陪。送部引見。恭候簡用。倘一時不得其人。即會同五部侍郎。公同揀選。酌量題補。應如所請。從之。○辛丑。諭。朕聞佟保在貴州學政之任。操守廉潔。士子悅服。著再留任三年。○大學士鄂爾泰等議覆河南道御史范咸奏。順天鄉試中額。宜分晰明白。查本年九月。禮部遵旨酌減中額一條。內稱。各直省解額。於十分中酌減一

分。直隸貝字號額中一百八名。內除奉天夾字號額中四名。宣化旦字號額中四名。長蘆等處鹵字號額中一名。俱無庸議減外。貝字號酌減九名等語。是夾字。旦字。鹵字。皆在貝字號中額數內。及議覆申嚴錄科之額一條。內稱夾字號中四名。旦字號中四名。鹵字號中一名。現在應試人等。雖屬無多。但不得概行錄送。以致冒濫。其直隸貝字號額中九十九名。應取科舉七千九百二十名等語。是夾字。旦字。鹵字。又在貝字號中額之外。臣在內場監試時。見近科題名錄。夾字。旦字。中額。皆在貝字號之外。其鹵字號。本年因不足五十名之數。未經取中。而舊時稿案。皆稱在貝字號中額之內。直省解額。既於十分中酌減一分。直隸原額一百八名。除零數不計外。其成數一百名。不應祇減九名。前後兩議舛錯。請勅分晰酌定。查順天貝字號。除夾。旦二字號外。額中一百八名。加中五經五名。共一百十

三名。其鹵字號。取中一名。即在一百八名之內。除零數不計。十分中酌減一分。應減中額十一名。前議因將來旦字號中數。歸貝字號一百八名之內。未經詳晰聲明。加中五經。亦未算入。應行改正。將貝字號中額。減十一名。取中一百零二名。准取科舉八千一百六十六名。所有禮部承辦疎忽之員。請交部查議。再湖廣中額。原係九十七名。加以五經五名。共一百二名。自湖北。湖南分闈以後。湖北取中五十名。湖南取中四十七名。其五經五名。或二。或三。兩省輪中。原議內酌減之數。雖無錯誤。但未將五經輪中之處。聲說應再為分晰。以便輪流取中。其兩省錄科之數。亦應以輪中之數。照例錄送。又滿合字號。總加五經二名。南北。皿字號。總加五經四名。俱臨時酌文取中。並非劃然分定。所以原奏議減之處。未行算入。今應一併聲明。以便嗣後遵行。從之。

○蠲免甘肅寧朔衛被霜災地本年額徵○

壬寅。

上詣

皇太后宮問安。○幸瀛臺。○停止月選官考試律文。諭每月吏部補選各官考試律文已行之年餘率多敷衍湊泊而律文浩博律意精微究竟何能明曉不過虛文塞責於吏治無所裨益即使各員能悉實力體究於此而長民之意初別有在反如東坡所誚耳嗣後著停止至於九卿驗看之事行之已久仍照現行例辦理。○又諭新授直隸口北道吳煒爾在工部做官甚好在御史任內亦無不好之處所以用爾爾曾因水利奏過高斌但高斌是正氣人斷不存此意見若存此意見亦不成其為高斌了朕亦斷不將爾放在直隸去矣爾即將此旨下與高斌知之爾亦不可因此與之牴牾若效謝濟世之與許容便是爾有不是之處爾在言官則盡言官之職在下屬則盡下屬之道方於地方有益倘地方有

水旱之災最宜實心體恤無負朕愛民之至意尋據直隸總督高斌覆奏吳煒前在御史任內陳奏河務乃其本職此時即蒙恩諭並不敢稍以為嫌今吳煒補授直隸巡道為臣屬員若猶存芥蒂則徧衷私意不但有累身心亦且自滋愆咎仰蒙俯鑒微衷實深感激合行奏覆得旨彼甚疑懼故有此諭也。○調盛京刑部侍郎兆惠為刑部侍郎以刑部侍郎托時為盛京刑部侍郎。○癸卯兵部等部議准直隸總督高斌疏稱天津水師營增駐滿兵一千名並添設副都統及左右司應請照例添建公衙門一所從之。○工部議覆江南河道總督白鍾山等疏稱徐揚二道所屬各廳辦運楊椿按照豫省椿規分別圍圓丈尺并查明各廳相距豫省產楊各府縣程途里數酌定木價運費自乾隆乙丑年為始於歲搶估銷冊內據實造報長為定例應如所請從之。○豁免浙江修倉案內無力完繳之

民人朱有章名下應追銀七百七十兩。○是月直隸布政使方觀承奏謝陞任恩附請陞見得旨汝係朕深知之人但勉力實心任事無他可諭也且不必來京明年隨便即可見朕也○直隸按察使陶正中奏謝陞任恩附請陞見得旨汝諸事實心而今年辦賑尤為嘉悅今用汝為按察明刑弼教之意汝其勉之且不必來京明歲即當見面諭汝也○署兩江總督協辦河務尹繼善奏淮揚等屬下河田傍向有民築圩圍日久坍塌上年委員查勘悉心講求知築圩實為保護田疇之要隨令高寶等屬加意勸導照業食佃力之例實力舉行現已辦有成式泰州興化俱聞風興起江都甘泉山陽鹽城亦諄切飭行乘此年豐農隙之時通力合作酌定分限三年逐漸增培最高之處向來水不能到者無庸概築其最窪之地原不種植五穀者仍留為容水之區不許占築與水爭利誠恐地方官漫

無分別經逐一指示令隨地相度妥協經理並責成該管道府董率稽察俟報有成數臣於查河之便親往驗看分別勸懲得旨若果三年有成亦可謂惠而不費矣但須務實妥協為之○江蘇巡撫陳大受奏訪聞江寧府知府官保上年暫署龍江關務於發給吏役辦公等銀七折扣銀入已又將解餉到部所帶添平餘剩銀兩入已並未報出得旨此事尚細若此後有簞簞不飭之處即當叅奏時加察訪可也○又覆奏凜遵諭飭振刷吏治得旨勉力改過有厚望焉○江南河道總督白鍾山等奏會商河湖蓄洩機宜查興舉大工欲治上源當先治下游欲挑河道當並籌鹽運如高郵以下等河俱由串場河歸海而串場一河又與泰州鹽河相為表裏其間河渠湖蕩上下相承脈絡貫通一處稍有未協即動多窒礙且各場產鹽之所皆坐落南北串場河一帶地方鹽運既不可暫停而挑河

又不便遲緩。必兩無貽誤。方為妥協。至河道之寬深合度。開壩之高下適宜。在在均關緊要。現在公同慎選熟諳工程之員。逐一指示。酌分先後。令其相度情形。細心確估。容臣等核實奏請。

聖訓遵行。得旨。所奏俱悉。不可苟且完事。必期有益無弊可耳。○閩浙總督馬爾泰奏。嚴協被災汎兵。再行借給一月餉銀。以度冬寒。得旨。知道了。○浙江巡撫常安奏。海寧縣南門外。鎮海廟迤西。至老鹽倉。一帶塘工。近因護沙坍卸。水臨塘根。甚屬險要。現於北岸存水刷卸之處。先行興工。多建木石戢壩。其南岸引水工程。容親往察驗具奏。得旨。知道了。海塘工程。詳慎為之。○又奏。浙省文武鄉試。查有出號懷挾代倩各生。分別咨革究辦。得旨。覽奏俱悉。亦不過因今秋順天鄉場甚嚴。汝方如是辦理耳。總之事不出於誠實。而觀望以為得計者。無一而可。○又奏。調任金衢

嚴道程光鉅。平日居官。操守甚為廉潔。辦事亦極勤敏。得旨。覽既有如此賢員。何不早奏。○浙江布政使潘思渠奏。辦理賑務事宜。得旨。所奏俱悉。今歲浙省辦賑。常安則有諱災之意。實難為汝也。○巡視臺灣戶科給事中六十七等奏。操演巡視情形。得旨。臺地遠在海外。此等奏報。須據實在情形奏聞。不可稍涉粉飾也。○署湖廣總督鄂彌達奏。楚省弁兵。現有並無衙舍。僦居廟宇舖店者。又有久經派撥。因無住址。尚未移駐者。現在飭行查辦。守備每員。給瓦房五間。千把總每員。瓦房三間。兵丁每名。草房一間。仍照例瓦房一間。不得過四兩。草房一間。不得過二兩。統於前任督臣阿爾賽奏准修造汎房等項。動支銀內。通融給領。添造齊全。得旨。是。知道了。○湖北巡撫晏斯盛奏。州縣監獄。輕罪人犯。查明並無親人看顧者。於每年十一月至正月。酌給口糧。又輕罪逾期不結。無故留滯。過三案

以上者將迂緩之吏照例題叅議處以清庶獄得旨待朕酌量降旨。○湖南巡撫蔣溥奏據長沙縣知縣汪度稟稱十月十九日有解回湖北沔陽州原籍收管犯人王元昇到縣隨即查點收禁備文轉解適有毆死蕭連芳擬絞人犯張東友在監即向裏闌據張東友供稱王元昇本名蕭癩子當日蕭連芳係伊毆死因在逃未獲畏刑誣認旋據王元昇亦稱從前畏罪在逃又別處改名犯事解回適與張東友同監見面天網不漏無可抵賴查原案初報文內張東友供有蕭癩子在场相鬧要求拏到審問之語後因蕭癩子未經獲到詳免入招臣以此案所關重大如果枉擬則從前承審各官誤入人死罪俱干嚴例何敢稍為瞻徇但事經五載張東友經三次秋審並未鳴冤偶於圜圉邂逅即指王元昇為正犯而王元昇並未刑求亦即自認不諱其中有無輾轉設局賄囑之處亦未可定臣又

何敢以事涉新奇即認為昭雪沉寃之舉現飭按察使徐德裕親提原卷犯証質訊務得實情得旨所見甚是。東公據實詳悉辦理可也。○河南巡撫碩色奏豫省社糧實貯既三十餘萬石其積欠陸續清還加以逐年捐貯為數益多若經理不得其人收貯又不加謹必致微變侵蝕現在各州縣社糧或有收存公所及暫貯寺院者已飭通行估建社倉准將所收息穀變價興工至經理一切固應責成正副社長但糧數漸增收存必需蓆片鋪墊出入必需斗級盤量若責令捐出未免賠累而聽其浮收又致勒派里民可否於每年所收息穀內酌留一升給社民為雜項之用得旨是知道了。○河南河北鎮總兵丁山奏巡查營伍事宜得旨惟應實力為之不可謂今年查過且不到汝處也。○山西大同鎮總兵王能愛奏謝陞任恩得旨大同為要鎮又當積玩之餘汝其勉力整飭營伍以副任使

之意。○兩廣總督那蘇圖奏鹽課徵銷數目得旨覽。緝私尤為要務也。○又奏粵西南寧太平鎮客三府與安南界接。向因奸匪跳梁。夷民廢耕。商販裹足。現在米價騰貴。恐生滋擾。必須豫防。擬將漢土奸民及安南匪類潛至關隘。圖搶糧食者。立即查拏。分別究結。其良善夷民。至邊求食者。知會黎夷領回安插。庶奸良不致混淆。而柔遠之道。即寓於防禦之中。得旨所奏俱悉。○署廣東巡撫廣州將軍策楞奏惠來茂名電白。吳川化州信宜石城等七州縣。蟲災情形。恐有司官泥於題報。秋災不許過九月之例。或因蟲傷之處無多。以熟蓋荒。牽算分數。以致小民失所。現飭藩司逐一確勘。酌量請蠲錢糧。並分別撫恤。及借給籽種。得旨此見甚是。甚慰朕懷。○廣東按察使張嗣昌奏請定各省道府等按季巡行所屬。順途勘驗水陸要隘。塘汛。壯丁。監獄等項。得旨此係自然應行者。不然所體驗者

何事。○雲南總督張允隨奏請開修川省接壤滇境之羅星渡河一道。可以直達川江。分運威寧銅觔。每年計節省陸路運脚銀二千九百六十兩零。照例借項動支。約二年所省脚價。即可歸款。不特銅運得濟。滇民往來亦有利。得旨既稱有益。妥酌為之。○又奏遵旨條對教養事宜。今就滇省現行實事。逐一陳奏。如各府州縣境內水泉可資灌溉者。通飭及時疏濬。共計一百餘處。現在灌注民田。變瘠壤為膏腴。滇省向無蠶桑之利。布疋亦取給外省。通飭各屬製造機軸。教令紡織。十餘年來。漢夷婦女皆能習熟。鹽井所需柴薪。無算。飭屬勸諭百姓。廣為種植。現俱暢茂成林。材木不可勝用。滇民性耽翹糞。多糜米穀。好奉神會。每費貲財。通飭實力查禁。此養民各條之實事也。滇省蠻夷之性。雖云獷野。而樸直無欺。結以恩信。咸知感格。時時勉勵各屬躬行倡導。現在夷方保族。亦解好施。嬰女

蠻媛漸知守志。並增建義學三百七十餘所。捐置田畝。以充館穀。選擇師儒。以司訓課。現在肄業諸生中。不乏篤學好修之士。此教民各條之實事也。得旨。所奏俱悉。教養二端。固不可偏廢。然亦須因地制宜也。

大清高宗法天隆運至誠先覺體元立極敷文奮武孝慈神聖純皇帝實錄卷之二百二十九

大清高宗法天隆運至誠先覺體元立極敷文奮武孝慈神聖純皇帝實錄卷之二百三十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹
將教習經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣等謹將內大臣戶部尚書錄藍旗滿洲都統軍功紀錄五次
尋常紀錄十四次臣等謹將經筵講官太子少保工部尚書紀錄六次臣等謹將尋常

教修

乾隆九年甲子十二月甲辰朔兵部尚書彭

維新等奏臣等奉旨磨勘湖北舉人覆試卷內楊曰垌周雲龍二名文理蒙疵照議罰停會試二科其主考同考及錄送之該學政應一并察議得旨依議覆考之事原交巡撫會同學政辦理者況晏斯盛尚係知文之人而此次並未實心考覈其所奏亦屬含糊了事晏斯盛亦著交部察議○大學士鄂爾泰等議覆福建道御史范廷楷奏會計錢糧出入於各省奏銷到齊之時彙總開造清冊將一

歲部庫支放俸餉等項數目一體列入註明從前歲入歲出若干。現今歲入歲出若干。其開除項下註明某年某款。此多彼寡各緣由進呈等語。查每年各省官兵俸餉應支應扣等項按數奏銷尚不至參差。惟一切雜項支給報銷等款。即一省中亦前後互異。彼此不一。今於每年奏銷後通盤覈算一次。在部司人員固得詳慎出入。而外省亦有實數可稽。於錢糧有益。請自明年為始彙總奏聞從之。

禮部奏請定各省府州縣童試之額。以入學名數為差。每入學一名。准州縣取六十名。府取三十名。大小中學各照名數定額。其從州縣學撥入府學者亦應查照撥入之多寡照數增取。得旨此奏是依議。○河南道御史彭肇洙奏各省關繫民生風俗重大之事。雖經題結。仍宜年終彙奏一次。如戶部則曰計今歲某省旱。某省澇。某省旱澇不為災。某省豐。某省歉。某省豐歉居半。如刑部則曰計今

歲某省強盜案件若干。姦淫案件若干。鹽梟案件若干。謀故殺案件若干。鬪殺案件若干。干犯名義案件若干。於封印日簡明彙奏。總計天下水旱豐歉姦詐盜偽之數。歲歲考之。則各督撫平日留心地方教養斯民。有無成效之處。可見一斑。褒獎切責。功罪不至相掩。得旨著照所請行。該部知道。○賑貸廣西永寧州被水災民。並除水衝田六十二畝八分額賦。○乙巳諭據鄂彌達晏斯盛奏稱湖北有待撥直隸米二十萬石。現在存貯。今年直隸已獲豐收。無須接濟。楚北年穀全登。亦無需用之處。惟浙江先後被水。恐來歲青黃不接之際。米價易騰。應請將湖北現貯之米酌撥十萬石。運赴浙省。以備賑糶之需。所糶之銀。歸還楚省。買補倉儲。此外存貯米石。如不需要。即於來春糶抵倉儲等語。鄂彌達等所奏是著照所請辦理。該部即遵諭行。○刑部議覆署福建按察使王廷諍奏稱乾隆八年

定例。私造鉛錢。照私鑄銅錢原律。為首及匠人擬絞監候。為從及知情買使者各減一等。但私鑄鉛錢。多寡不同。其糾黨廣鑄。至百十餘千。勾通販賣者。固應照例問擬。其愚民貧無聊賴。僅以鐵瓢鎔化些須鉛觔。造錢數千文。及三五百文者。概擬縲首。似覺情輕法重。請量子末減。查絞犯減等。罪止擬流。恐私造鉛錢之奸民。恃例禁稍寬。散法漁利。勢無底止。私鑄定例內原有分別法無可貸情有可原之文。其法無可貸者。照例立決。情有可原者。請旨發遣。如果鎔鉛造錢不及十千者。即照情有可原之例。於疏內聲明請旨。無庸另立科條。其為從及知情行使者。依次遞減。從之。○丙午。

上詣

皇太后宮問安。○蠲緩山西文水。陵川。二縣。被水災民。本年額賦。○大學士鄂爾泰等會議。協辦大學士吏部尚書劉於義等奏稱奉旨。

查辦直隸水利事宜。履勘各屬。舊有淀泊河渠。與擬開泉渠河道。並隄埝涵洞橋閘等項。悉與司道守令。暨地方老民。熟籌確訪。審水性之強弱。地勢之順逆。民心之好惡。權以利害之輕重。定措施之次第。將現在應辦各工。酌定規條。○宛平良鄉涿州各河溝諸水。俱會入牝牛。歸於拒馬。為受水之地。但河身淺狹淤阻。往往瀝水不能導送。以致漫溢。應將良鄉上游。宛平房山境內各河溝。照舊例用民力疏通。歸入廣陽茨尾二河。其宛平之北岡窪趙新店及房良二邑之順水河溝雅河。良邑之黃屯河廣陽茨尾二河並良涿之牝牛正支河。均應挑濬。又通濟橋橋孔低矮。有礙水道。應將舊橋拆造起高。趙新店之南。地勢窪下。應建橋疊道。以通往來。○新城雄縣境內之白溝河。為拒馬下流。眾水歸宿。雄縣新城地勢窪下。夏秋漲不能分減。應將十里鋪支河一道。又十三里支河一道。開挖寬深。

舊有之盧僧河。一并開通。分減白溝漲汎。十九垓支河。五里之下。馮家營起。直南開河一道。接入盧僧河。并以挑河之土。兩岸堅築子埝。自十里鋪起。至新橋窰。亦築子埝一道。又新城南關等處。應疊道建橋。雄縣王克橋。西槐。二支河。應開挖寬深。一趙北口。浚為西南諸水匯歸之地。內有支河。以為疏消水道。由直沽入海。其塌河為瀦蓄北運河。洩水之要區。由陳家口賈家沽入海。應於張青口北。另開支河一道。分洩。又玉帶河之支流。為中亭河。張家嘴河。應開展。西河之六郎隄。應幫築高厚。臺山河。趙家房河之木橋。應改建活板通舟。一東淀河道。為

陵糶漕艘往來經由。河身迂曲。易於淤狹。查有勝芳舊河一道。東北直注。形勢徑捷。土人名為照直河。應開通。再楊家河。自莊西至下河頭。應展寬挑深。莊東北至中河頭。應裁灣取直。一子牙河上游。為滹沱河。發源山西之泰

戲山。經直隸衡水縣。會滏陽河。北注大成縣王家口。每年清渾並漲。迤南數十百村莊。悉遭淹浸。及汎退泥停。散漫淤墊。應於王家口北莊兒頭起。堵截子牙河下流。另於陳家泊展開河身一道。改溜東行。使清渾永不相混。一正定府屬之井陘平山二縣民人。於各村莊河灘。營治稻田。均應修理。請借給井陘縣民人。工本銀三千七百七十二兩零。平山縣民人。工本銀五千五十九兩零。按照十年完繳。俟成後照例升科。又正定府屬并定州八州縣。通計營成稻田。共六百六十餘頃。接連地面。尚可開拓。應將已經營成之田。查丈清楚。造報戶部。以上應辦各工。約估需銀四十萬三千四百餘兩。請將直賑項內。撥銀五十萬兩。豫為料理。春融次第興工。均應如所請。得旨依議速行。○丁未。命右衛副都統調任江寧副都統。準提保。留京候旨。○吏部議奏酌定旗員終養之例。查旗員補用外任。如

陵寢及東三省官員筆帖式各省駐防將軍城守尉督撫隨印筆帖式等告養者仍照舊例辦理外其滿洲蒙古現任布按道府同知通判州縣及滿洲蒙古理事同知通判等官如遇祖父母父母年老例得終養者准呈報上司出考題奏臣部咨查該旗具結報部令回京各該處帶領引見請旨至漢軍外任官員從前告養者俱照漢例辦理查漢軍與滿洲蒙古均旗人旗部皆可補用嗣後漢軍外任官告養者亦照此例此等人員引見時除奉旨以旗員補用者聽旗辦理奉旨指明以何部何官即用者照例補用外如奉旨以部員改補者應按品級改補如布按大員應補京堂照例與應陞人員開列具題道府應以各部郎中員外補用理事同知通判及漢缺同知應以主事補用知州與漢缺通判應以七品小京官補用知縣一項滿洲蒙古知縣由應用小京官之進士舉人選用者應仍以科

甲小京官改補漢軍知縣應補只太常寺博士一缺未免壅滯至漢缺七品京官俱係知縣應陞品級不甚相對查漢軍七品筆帖式例得陞用知縣應將現任漢軍知縣告養者以各部院衙門漢軍七品筆帖式改補以上改補京缺各員俱無班可歸應酌定班次銓選其應改補小京官以上人員俱於雙月陞選五缺之後用一人其漢軍知縣應改補筆帖式者入於各本旗應用筆帖式內無論是否積缺五缺後用一人至現任京職應陞外任各員如老親在堂二三年即屆終養之期自揣難以久任情願終養亦准具呈轉奏若屆輪班應選時始行具呈不無趨避臣部酌量各項應陞應選外任之員於將屆應用前每項按人數多寡截取數員咨查該旗令於該旗呈明取結咨部轉奏停其補用外缺仍在現任京職上行走再候選各員滿洲蒙古漢軍候選外任者祇有進士舉人出身之筆

帖式並間散進士舉人應選知縣一項滿洲蒙古係現任之員仍令現任上行走係間散科甲以應用科甲小京官照科分名次補用漢軍間散進士舉人在京無應用之缺應照現任知縣告養之例以七品筆帖式補用此等人員亦於將屆選用前每項截取數員咨查該旗如有親老願請終養者呈明該旗照例保結報部註冊停其選外此等外任改補及候選改補與現任停陞選外缺各員如養親之際遇在京陞缺仍准與京員較俸陞轉查養親無一定年限至應補外缺之時不無衰老應令各該堂官於各該員起復時查明該員年力並無衰老咨報臣部仍以應得外缺補用如年力衰老停其補外仍在京職上行走再此等人員在京養親之際未經陞任者如係外任改補京缺之員遇應得之缺照丁憂起復例補用如係在京現任及候選改補京職之員歸於本班遇應得之缺先儘選

用如養親之際已經陞任者照伊現任京缺品級應用之外缺不論雙單月陞補選用五缺後用一人以上各員如有應揀選引見者亦照例與記名人員一同帶領引見至以旗員補用人員養親事畢亦令該旗都統將該員年力曾否衰邁之處查明咨部照部院文職之例分別辦理再查州縣佐貳以及雜職漢軍人員亦例得選用但佐貳雜職俱係微末之員在京無可改補無論現任及候補候選如有告養者俱無庸題奏移咨臣部轉咨該旗遇應挑補差使之處准其挑補俟養親事畢仍以各應得外缺歸於本班先儘選用至漢軍捐納各項人員原係指缺捐用外任之員與進士舉人應選知縣尚得改補者不同如因親老告養不便概以京缺改補養親事畢仍歸原班選用再服滿候補開復赴補並由現任降補各員俱曾經得缺之人與未經得缺者不同如尚有老親願終養者即令

該員於起文赴補時。呈明該旗。保結報部。俾其補外。令各該處。照現任外官終養之例。將該員帶領引見請旨。如蒙恩以京缺補用。亦照品級。以京缺補用。至一應陞轉。與養親事畢。補用外缺之處。俱照現任外缺改補人員之例辦理。此等人員。如咨查時。不豫行呈明。及赴任二三年內。復請終養者。概不准行。倘假捏事故。浮開年歲。借端規避。一經發覺。將該員及出結各官。照例議處。從之。○禮部先期題請。乾隆九年

玉牒告成。擇於十二月十二日午時進呈。是日設鹵簿。大駕於太和殿前。王公滿漢文武大臣官員。朝服齊集。宗人府官於

玉牒館捧

玉牒安綵亭內。總裁王大臣。及纂修各官。朝服行禮後。隨行。導以黃蓋御仗。由大清門進天安門。其齊集之王公文武大臣官員。分翼跪迎。綵亭至太和殿丹墀。纂修各官捧

玉牒進中和殿。陳黃案上。總裁王大臣及纂修各官行禮。

上禮服。御中和殿。恭覽

玉牒。御太和殿。陞座。樂作。總裁王大臣及纂修各官行禮。

上還宮。總裁王大臣率纂修各官捧

玉牒至乾清門。交內監捧進。禮部官陳綵亭於乾清門前。俟

玉牒由內捧出。接安綵亭內。由太和門。協和門。

東華門。出。送至

皇史宬尊藏。得旨。是朕遵照典禮。於中和殿恭覽

玉牒。不必陞太和殿。餘依議。○蠲緩浙江仁和錢塘海寧富陽餘杭新城於潛昌化安吉烏程歸安長興德清武康山陰會稽蕭山諸暨餘姚上虞蘭谿西安龍游常山開化建德淳安遂安桐廬分水等三十州縣。及嚴州所被旱被水災民。新舊額徵。○以故鎮國將軍敬

順子恒昌。照例承襲輔國將軍。○戊申。

上御乾清門聽政。○詣

皇太后宮問安。○幸瀛臺。○賑貸浙江仁和錢

塘海寧富陽餘杭新城於潛昌化安吉歸安

烏程長興德清武康山陰會稽蕭山諸暨餘

姚上虞蘭谿西安龍游常山開化建德淳安

遂安桐廬分水等三十州縣。杭州前右二衛

湖州衢州嚴州等所。仁和錢清曹娥金山石

堰等場。水旱災民屯竈。並緩徵勘不成災之

金華湯溪二縣。及鳴鶴下砂頭二三場。新舊

額徵。○旌表守正捐軀之山西定襄縣民皇

甫三小子妻梁氏。○己酉。

孝惠章皇后忌辰。遣官祭

孝東陵。

上詣

皇太后宮問安。○旌表守正捐軀之安徽阜陽

縣民劉世安妻楊氏。○庚戌。命國子監祭酒

崔紀提督江蘇學政。翰林院侍講觀保提督

安徽學政太僕寺少卿陳其凝提督浙江學
政。○命吏部侍郎宗室德沛兼管國子監祭

酒事務。○辛亥。

上詣

大高殿行禮。○奉

皇太后幸悅心殿進膳。○命翰林院檢討吳嗣

爵提督福建學政左春坊左中允于敏中提

督山東學政翰林院侍讀宋邦綏提督湖北

學政翰林院編修官獻瑤提督廣西學政翰

林院編修汪士鋐提督河南學政。○兵部議

覆湖南巡撫蔣溥奏稱武闡鄉試有年力就

衰者不准列合式之內。毋使再入三場。以杜

鎗代之弊。應如所請。通行各省。年屆六十之

武生。即不准入場應試。從之。○賑卹四川成

都華陽金堂新都郫縣漢州崇慶崇寧簡州

溫江新津新繁彭縣什邡雙流灌縣綿州羅

江德陽眉州彭山青神邛州樂山資州資陽

仁壽內江遂寧蓬溪等三十州縣。被水災民

○旌表守正捐軀之浙江建德縣民余九倫媳張氏。○壬子。

上詣

皇太后宮問安。○先是安西提督永常奏稱準噶爾遣宰桑哈柳等請安進貢。攜帶貨物。懇請貿易。得旨。軍機大臣議奏。尋議。哈柳違議帶貨。自應不准貿易。但乾隆七年。吹納木喀來京。帶有貨物。再四哀懇。已准售賣。此次應仍准交易。令該提督一面護送夷使來京。一

面令其運貨往肅州出售。至是。諭軍機大臣等曰。據永常奏稱夷使哈柳稟稱。此次帶來駝馬。係隨路更換。並非貨賣。祇求將牛羊留下售賣。即是恩典。情辭極為恭順。其所帶牛羊。並乏弱馬匹。已留於哈密。如蒙恩准其赴肅貿易。請照吹納木喀之例。派官兵照料前往等語。從前進貢夷使。隨帶貨物。亦曾加恩准其貿易。此次哈柳所有牛羊等物。著准其所請。在肅交易。爾等可寄信與慶復。黃廷桂。

令其派委幹員。照例辦理。并傳與永常知之。

○甲寅。諭各省督撫提督所保能勝總兵之副將。朕俱降旨令送部引見。但此等保舉之副將。一省中或有數員。若一時送部。則營伍辦事未免乏人。著各該督撫提等斟酌先後陸續送部引見。○乙卯。

上御中和殿。恭覽新修

玉牒。○丙辰。

上詣

皇太后宮問安。○諭據川陝總督慶復奏稱。興漢鎮總兵任懷德。年逾六旬。氣血漸衰。現在患病。難以供職。懇請休致。回籍調理等語。任懷德著准其休致。回籍調理。其興漢鎮總兵員缺著改光宗補授。○又諭。從前甘省擺羊戎等處。建築城堡。興工之時。於鎮海。巴暖等營。派兵赴工巡防。借給過各兵口糧鹽菜銀二千四百六十餘兩。例應追扣還項。朕念兵丁離汎旅食。原與在營不同。且事歷數載。多

有事故開除之人難於逐一抵償。此項借給銀兩。著加恩免其追扣。以示優恤。該部即遵諭行。○刑部議覆協理山東道御史胡蛟齡奏稱。各省散給獄囚衣糧。有名無實。請勅下督撫嚴飭所屬。留心查覈。毋使吏役人等侵蝕中飽。至有病監犯。務令刻速醫治。分別取保散禁。如有病故。捏供率報詳結者。即行指叅。應如所奏通行從之。○丁巳。命協辦大學士事務吏部尚書劉於義在紫禁城內騎馬。

○戶部議覆山西巡撫阿里衮疏稱。會同綏遠城建威將軍補熙酌議。綏遠城駐防官兵。應領月餉。以穀搭放。自行碾食。於本地情形有益無弊。應如所議。准以穀搭放。每年於九月開徵後。將十一、十二、并正、二、共四箇月兵米。於額交米內。儘收儘放。不敷。仍於倉貯舊米內支給。其三月至十月。共八箇月。應放兵米。以穀二米八搭放。其穀在歸化城倉貯軍需穀內動用。俟秋收。照數買還歸款。所有綏

遠城現存舊米。如遇可糶之時。即令出易。以免霉變。并令嗣後米穀兼買。米於本年支放穀備貯。遇米價騰貴之年。即以二穀一米搭放。兵丁自行碾食。從之。○直隸總督高斌奏。各省府州縣試。儒童名數舊例限以二倍一倍。後復改為不必限數。照常考送。奉行已久。近日禮部因科舉定額。並請定童試名數。固屬慎始。進嚴冒濫之意。顧臣再四思維。據平日見聞。實有難行之處。蓋儒童小試。與生監科舉有別。今定以入學一名。州縣取六十名。府取三十名。如大縣入學二十五名。則州縣應取一千五百名。府取半之。在北五省。尚恐不及此額。仍無可為。去取南省。如福建、江西、江南、浙江。則一州縣儒童常至盈萬。少亦數千。照應取名額。則得應學政試者。纔十之一。不能與試者。且十之八九。竊念士為四民之一。通天下計之。何止百萬。其粗識文義者。惟恃村師童塾為養生之資。乃不得一與童

試為宗族鄉黨所譏笑。求為村師童塾而不可得。且積習相沿。驟更嚴例。恐考試之期。衆情遏抑。勢必訴告紛呶。而守令奉行不齊。未必能一例妥辦。必致滋生事端。福建海疆。尤屬囂凌。即使鈴伏一時。終難相安久遠。如謂人數過多。代倩傳遞之弊。皆從此生。查學政錄取。必經覆試。乃定。倘文理字跡。稍涉疑似。即可嚴擯。非若鄉會試之糊名易書。驟難稽察也。臣竊以為儒童不限名數。於取士之法。未見其有弊。即使學術荒陋者。託名赴試。而其人既別無可執之業。則應寬以自存之地。康熙年間。改去舊例。不限名數。必有深意。與其事難通而滋擾。不若仍照通行之例為便。謹密摺陳奏。伏乞

聖訓。得旨。待朕酌量降旨。○豁免無力完繳追賠軍需之原任陝西華州知州王德地等十四案。共銀一萬一千八十八兩有奇。粟米一十八石有奇。炒麪三千三百觔有奇。馬二匹。

○戊午。諭向來州縣考取童生。送學政衙門考試。例有定額。後因儒童日益衆多。於康熙三十九年定例。不必限定額數。遵行在案。今年禮部奏請。照每學入學額數。限定錄送之多寡。以杜冒濫。朕已降旨允行。今思各處赴試童生。多寡不等。若限以錄送數目。恐有浮多於額外。而擯棄不取者。即有不足於額中。而強取充數者。未必俱能允當。況該府州縣錄送學政衙門。其去取全在學政。並無關於入泮之數。應稍寬其途。以鼓舞之。亦廣育人材之道。嗣後仍照舊例。不必限定考送之額。但將文理不通者。擯棄不錄。可即傳諭該部。將此旨通行各省知之。○左副都御史范璨奏。戶部議覆河南按察使王丕烈條陳內稱。青黃不接時。米價昂貴。地方有司。自應諄勸蓋藏充裕之家。令酌留食用外。陸續糶賣。原不必繩之以法。如有積米數多。閉糶妨民者。酌量情形。勒令出糶。可謂適中而無偏重之

弊矣。然臣以為尚有當參末議者。查原奏有云。貧民不能向買。勢必歸於富有之商販。斯言正當理會。如其為本地之商。誠如原奏所言。一困於富戶閉糴。再困於商販居奇。如其為外來之商。或數百里數千里之遙。與本地全無涉。竊慮富家平日必有親熟牙行。既不許閉糴。羣趨便捷。濱水州縣。舟楫可通。朝夕至。搬運一空。夫向日所患民之貧者。無擔石之儲。空虛猶居半也。逮富者一無留餘。此日之空虛。乃真空虛也。然問之富戶。富戶曰。功令宜遵。問之商販。商販曰。過糴有禁。有司亦無可如何。國家雖設常平倉。安得有如許穀米。為之補苴。臣愚以為民間患其浪費。而喜其積蓄。誠以天時難測。嘗有二麥將穫。而水汎驟發。秋穀將登。而蝗雹告侵者。設當其時。非富民之尚有蓋藏。是賴而誰賴乎。臣屢任在外。如逢雨暘時若。收成可保。無不開倉發困。市集山堆海積。惟恐米價漸減。爭先出

糴。則樂歲毋容勸也。惟是儉歲歉收。青黃不接之候。市價騰踊。待哺嗷嗷。斯時急宜密勸富戶。惇睦鄉里。如數百石之家。令自行零星出糴。倘盈千累萬之戶。令其附近村落。分設糴局。親自經理。務使本地買食窮民。均霑實惠。如此辦理。庶不為商販遠運一空。且既係儉歲。民食艱窘。尤當諭以任恤之誼。其不願減價者。不必強之。如有樂於行善者。州縣官覈其所糴若干。所減若干。量為嘉獎。或賚花紅。或給扁額。行善者多。或統作一碑誌。以為鄉黨勸。富民益加鼓舞。貧民大有裨益。臣在安省。曾試行之。頗得其濟。有每石減五分者。有減一錢者。甚有買米來家。仍照原價出糴者。此即使民相養。非全仰給於公家之大義也。然臣所謂勸諭富戶。而必用密者。何也。蓋有餘之家。眾所覬覦。未形之患。法宜豫防。查乾隆七年之冬。八年之春。湖廣、江西、江南等處。搶糧之案。俱未能免。而江西尤甚。一邑中

竟有搶至百案者。彼時猶未彰明較著也。若大張告示。不許久貯。保無奸頑之輩。聲言朝廷之惠。愛窮黎若此。煽惑良善。糾黨成衆。或踵門陵辱。或逞毆行兇。或本屬小康。而妄稱巨戶。或稍留食用。而指有餘藏。或勾通地方總甲。而私相勒詐。或朋比衙門胥吏。而裝點捏呈。其尤甚者。本挾制之有因。肆搶奪之惡習。如是而富民不重累乎。如是而富民尚肯好行其德乎。臣故以為宜密為勸導。不特貧者無挾制之緣。而富者且更有樂善之舉。總之地方不可一日無積貯。無富民是無積貯也。貧與富皆赤子。弭其釁乃以調其平。今使閭閻各自零星糴濟。則富有之惠人者良多。官民實以情誼感孚。則惻怛之動人者最速矣。得旨。這所奏是。該部密議速奏。尋議。該左副都御史范璨奏請。儉歲歉收。密勸富戶自行出糴。既可以杜本地富戶之囤積。又可以絕外來商販之遠運。本地積米自多。而日買

升合以餬口之貧民。得以均霑實濟。洵可補臣等部議所未及。又稱樂於行善之家。量為嘉獎。查士民樂善好施。原有題請議叙之例。而捐輸社穀。亦有遞加獎勵之條。今殷實富戶。如有情願減價平糴。以濟貧民。數在千石以上者。應如所奏。酌加旌獎。至稱恐有奸頑之輩。煽惑搶奪等弊。宜密為勸導。竊思民生日用。原限於豐嗇之不齊。富者每有獨擁之利。貧者易生覬覦之心。偶遇歉歲艱食。遂致激成搶奪。此皆有司經理未善也。果能先行勸諭。多方開導。令積粟之家。篤念桑梓。出其有餘。以平市價。以惠鄉黨。則卹貧正所以安富。而息事即可以寧人。正所謂弭其釁乃以調其平也。國家之禁令。必萬姓易知易從。今使儲粟者敦雍睦之行。需食者無挾制之緣。阻飢無虞。而貧富均安。此即使民相生相養之道。可家喻而戶曉者。似不必密為勸導也。應仍請勅下各直省督撫。於歉歲先行出示

曉諭使富戶知功令之宜遵。違者有在官之禁。從者蒙賞賚之榮。即地方有挾制滋擾等弊。各督撫嚴飭所屬。實力查禁。如不肖有司。乘間作奸。及有勒詐挾制搶奪等事。不能禁抑者。即照例叅處。庶於民無累。而於法相安矣。得旨。依議速行。

實錄卷三十一

二十六

大清高宗法天隆運至誠先覺體元立極敷文奮武孝慈神聖純皇帝實錄卷之二百三十

大清高宗法天隆運至誠先覺體元立極敷文奮武孝慈神聖純皇帝實錄卷之二百三十一

敕修

世襲總兵官經建漢官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲總兵官經建漢官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲總兵官經建漢官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲總兵官經建漢官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲總兵官經建漢官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

乾隆九年甲子十二月己未以故三等奉義公嘎爾薩子英泰一等子色克圖姪楊桑阿三等子佛佑子博清額俱照例襲爵。○庚申諭曰唐紹祖係浙江湖州府知府因不勝外府之任改補京員今歷員外郎中之任論俸陞授雲南武定府知府前日隨班引見時朕遠觀未及詳察已依部議允補今日赴任請訓朕見其人年已老邁於事務亦不明晰不能稱知府之職著留京以禮工二部郎中用其武定府缺著吏部照例銓補。○又諭各省

府道有不勝外任之員。該督撫奏請內用。或朕降旨調來引見。改用京職者。該員在京歷俸數年。挨次應陞道府之時。著吏部於引見時。將該員內用情由。夾單詳開。奏聞候旨。○雲南總督張允隨奏。大關境內。鹽井渡通川河道。與金沙江相為表裏。經奏請借動陸運銅脚開修。凡閱三載。業已工程完竣。銅運坦行。商貨駢集。克收成效。所有用過工費銀六千七百八十五兩。即將水運京銅。省出脚價歸款。並酌定歲修銀三百兩。亦於節省項下支銷。至承辦官員。大關同知。今陞麗江府知府樊好仁等。皆能實心出力。合併聲明。得旨。此事卿擔當妥辦之處。實可嘉悅。若如所言。永收利賴之益。則甚美而又盡善矣。至在工官員。勤勞可嘉。有旨。議敘。尋諭。據雲南總督張允隨奏稱。開修鹽井渡通川河道。工程已經告竣。銅運坦行。所有承辦此案工程之大關同知。今陞麗江府知府樊好仁。協同監修。

之鎮雄州吏目繆之琳。大關遊擊。今陞奇兵營叅將蕭得功。昭通鎮把總楊英。陳玉。皆能實心出力等語。樊好仁等。在工効力。勤勞可嘉。俱著交部議敘。○吏部議覆。江蘇巡撫陳大受奏稱。銓選定例。各官。遇隔省員缺。在五百里內迴避。但查各省捷徑小路。接壤之區。紛錯不一。應否與官塘大路。一體迴避之處。例內未據指明。請勅部查議。畫一。應如所請。并通行各省督撫。如現任各員。有與原籍鄉僻小路。在五百里以內者。俱令迴避。從之。○

辛酉

上奉

皇太后詣

雍和宮行禮。○諭。鄭文煥著來京。陞見。四川提督印務。著李質粹前往署理。○壬戌。

上御乾清門聽政。○詣

皇太后宮問安。○命翰林院檢討夏之蓉。提督廣東廣韶學政。翰林院編修孫人龍。提督廣

東肇高學政。○禮部奏。朝鮮國王李昫使知中樞府事李樞。到部咨稱。本年六月中。平安道觀察使金始炯等呈稱。五月十五日。有上國人二十三名。撐馬尚船三隻。自高山里。轉入江界府屬古閭延等地界。六月二十五日。又有十五名。撐馬尚船二隻。自竹巖仇非地方。轉去咸鏡道界。二十六日。又有十二名。撐馬尚船一隻。自竹巖仇非地方。向咸鏡道界小邦向因沿邊採捕。慮惹事端。咨請嚴禁。自

蒙

聖祖仁皇帝

世宗憲皇帝降勅申禁。波猪江一帶。馬尚船人。絕不往來。薦自昨年春間。又復成羣出來。幸奉天將軍遣兵追捕。謂可永戢。不意今夏採獵行走。又復如前。此係

大朝所嘗軫慮。有非小邦私自呵禁而止者。為此具咨懇請轉奏等語。查此項越境船隻。有無票文。係何處人民。由何處越界。乞勅奉天

將軍查明具奏再議。得旨。若照部議。令該將軍查明再議。殊屬遲緩。況內地人民。違禁冒出朝鮮地方生事者。原奉

皇祖

皇考諭旨。准該國王即行追拏擒送。使匪類共知畏懼。今據該國王咨稱。昨年春間。有撐船人等。成羣出來。幸將軍遣兵追捕。不意今夏又復採獵行走等語。此等違禁越境之人。該國王即應遵奉

皇祖

皇考諭旨。於此時擒拏解送。或即飛咨奉天將軍。嚴拏務獲。不令兔脫。乃該國自行疎縱。但具文咨部。懇請轉奏。以致曠日持久。匪類遠颺。殊屬不合。該部可傳旨該國王。並即行文奉天將軍。嚴行查拏務獲。毋得忽視。○刑部議覆山東道御史儲燧奏。稱各省保甲之法。未見實力奉行。請嗣後強竊案件。於題咨完結後。該督撫查明保甲人等。舉首失察起數。

年終彙題一次。刑部會同三法司察核具奏。查盜案題結。保甲失察治罪之處。業經疏內聲明。若於題咨完結後。重複彙奏。似屬無益。應令有司官。將該管地方。所有強竊案件。查明牌甲人等失察緣由。年終彙報督撫。倘有捏飾。隨時叅奏議處。從之。○予安徽故亳州知州朱之璉。甘肅故西寧道歷陞湖廣總督少保楊宗仁。入祀各該省名宦祠。直隸故候選主事趙方觀。故御史趙方頤。故錢塘縣知縣芮淮。故貢生馮濂。安徽故廣東肇高廉羅道胡永亨。江西故貢生張時為。故禮部侍郎魏方泰。故給事中帥我。故封光祿大夫甘顯祖。故吏部尚書甘汝來。湖南故生員黎啟淳。山東故吏部郎中顏光敏。故河東鹽運使顏光猷。故翰林院檢討顏光燾。故雲南縣知縣韓侯振。故蘇州巡撫徐士林。陝西故貴州巡撫劉蔭樞。故處士康呂賜。王心敬。入祀各本籍鄉賢祠。○癸亥。諭。上年朕降諭旨。各省搭

放兵餉。自甲子年為始。每錢一千文作銀一兩。使兵丁各霑利益。今聞江西南贛鎮標之十一營舊例。自春夏以至秋仲。八個月兵餉俱就近於贛關稅銀內支給。秋末至冬季四個月兵餉。因稅銀不敷。仍赴司庫支領。其在司庫支領之四個月。則一例搭放一成鑄錢。其在關稅內支領之八個月。則無錢文搭放。兵丁等便不能霑格外之恩。查關稅所支八個月稅銀。共四萬六千四百七十一兩零。計一成搭放。共需錢四千六百四十餘串。該省存庫錢文。儘足搭放。所需水脚亦屬無幾。著從乙丑年為始。南贛鎮屬兵餉。每年四季亦一例搭放一成鑄錢。該部可即傳諭該省巡撫等知之。○大學士等議。覆兩廣總督那蘇圖等奏請。粵東開採銅鉛。以裨鼓鑄。先於肇。二府近處礦廠試採。俟有成效。再行定議。漸次舉行。至金銀二礦。原與鼓鑄無涉。仍舊封閉。應如所請。從之。○戶部議准。甘肅巡撫

黃廷桂疏稱。中衛縣沙塍劉家等灘。原報開墾地畝內。於乾隆三、五兩年。并節年陸續被河水衝沒。以及沙灘高亢。不堪耕種地。共三千三百八十六畝零。應徵糧六十石零。銀一十八兩零。草一千一十五束零。請照例豁除。從之。○工部議覆。漕運總督顧琮奏。稱北運河撈淺。請照子牙河下游。用埽船挖沙之法。將所挖淤沙。運至隄畔。應動用旗丁紅剝銀兩。排造埽船二百隻。添設役夫六百名。查子牙河渾流泛漲。水過沙停。今北運河一帶橫淺。多板沙老底。是否一例。請勅令直隸總督會同倉場侍郎。確查定議。或先造船數隻。試撈。如果有效。即照該總漕所議。仍酌定事宜。據實題覆。得旨。依議速行。○蠲免山東歷城。章邱。平原。蒙陰。沂水。臨清。恩縣。鄒平。齊河。齊東。濟陽。臨邑。長清。陵縣。德平。肥城。平陰。利津。霑化。高唐。禹城。德州。惠民。青城。陽信。濱州。蒲臺。博平。海豐。樂陵。商河。高苑。等三十二州縣。

衛。旱電等災。本年額徵。○以故奉恩將軍愛隆阿子安楚珩。阿襲職。○浙江定海鎮總兵官顧元亮。以老病乞休。允之。○乙丑。

上詣

皇太后宮問安。○蠲免直隸保定。大城。薊州。新城。天津。靜海。津軍。灤州。延慶。萬全。西寧。等一州縣廳。水旱電蟲等災地畝。本年額賦有差。○丙寅。諭曰。雷鉉著賞給額外諭德。照現任諭德食俸。○丁卯。

上詣

雍和宮行禮。○戊辰。

孝莊文皇后忌辰。遣官祭。

昭西陵。○

上詣

皇太后宮問安。○諭曰。刑部尚書張照之父張彙。義方有素。訓子成名。在籍病故。張照力疾奔喪。深可軫惻。大臣之父母身故者。有賜祭之例。張照之父。著於本籍賜祭一壇。該部即

遵諭行。○又諭曰。安徽按察使蘇昌丁憂。其按察使印務著給事中都隆額速行前往署理。○調工部尚書汪由敦為刑部尚書。以工部左侍郎趙宏恩為工部尚書。○準噶爾部人輸庫爾來降。命賞給安插如例。○蠲免安徽歙縣休寧婺源績溪宣城南陵涇縣寧國旌德貴池東流蕪湖鳳臺懷遠廣德建平鳳陽等十七州縣。並安慶宣州建陽鳳中等四衛。被水災民。本年額賦有差。○是日起。

上以歲暮禋祭

太廟。齋戒三日。○己巳。諭禮部所修禮書。漢文屢次錯誤。尚書任蘭枝。不得辭其責。著交部察議。○庚午。以歲暮禋祭。遣官祭

太廟中殿。

後殿。○辛未。禋祭

太廟。

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

端慧皇太子園寢。○遣官祭

太歲之神。○詣

皇太后宮問安。○諭據福建巡撫周學健奏。稱閩省自八月以來。雨少氣亢。所屬州縣內。有數處居民房屋失火。至閩縣南臺地方。則延燒至二百餘間。霞浦縣則多至七百餘間。現在查辦撫恤等語。向來外省火災為患。皇考切降諭旨。令各地方豫備救火器具。臨時則令文武官弁督率兵役。竭力搶護。不使蔓延。朕御極以來。又曾再三諄諭。務期凜遵。迺閩省數州縣先後不戒於火。且延燒多家。為害頗熾。馬

爾泰周學健不能訓飭防範於平日又不能督率屬員搶救於臨時甚屬疎忽著傳旨申飭嗣後毋得仍前怠視○又諭據莽古賚奏稱脫逃喇嘛羅卜藏丹怎已經拏獲解川等語此等兇惡之犯身獲重罪恐情急又生別想可即傳諭巡撫紀山於解京時務須選派幹員加意防範無使再行免脫更不可疎忽或至畏罪自盡○直隸總督高斌奏訪得奉天錦縣越獄盜犯宋義南皮縣越獄盜犯孫三黑俱逃往口外教漢地方仰懇降旨密交教漢台吉等密行緝拏得旨知道了若諭部緝拏恐其聞風遠颺有密旨諭教漢王貝勒矣尋諭軍機大臣等據高斌奏稱越獄盜犯宋義孫三黑現今訪聞俱逃往口外教漢地方等語朕已降旨交教漢王貝勒等密行嚴查務獲但思此等兇惡之人行踪詭詐高斌不可因已經奉旨交與教漢王等而直隸地方遂不留心捕緝可寄信與高斌直隸所屬及八溝一帶與教漢相通之處可密令文武官

弁留心察訪不可疎忽至今免脫○以副都御史勵宗萬為工部侍郎三品頂帶在樂部大臣行走何國宗為副都御史○調廣州副都統沈之仁為西安副都統西安副都統馬瑞圖為廣州副都統○壬申

上詣

皇太后宮問安○御保和殿筵宴朝正外藩左翼科爾沁親王阿拉布坦羅卜藏袞布郡王齊默特多爾濟伊錫班第貝勒多爾濟貝子拉錫貝子職銜達爾瑪達都公拉瑪扎布瑪哈瑪玉爾和碩額駙拉錫納木扎爾多羅額駙色旺諾爾布固山額駙拉里達多爾吉虎索諾木教漢郡王吹木丕勒貝勒羅卜藏固山額駙吹濟扎勒浩齊特郡王車布登班珠爾翁牛特貝勒朋蘇克扎魯特貝勒索諾木公察漢凌華阿巴哈納爾貝子班珠爾喀喇沁貝子瑚圖凌阿公敏珠拉布坦鄂爾多斯貝子納木扎勒多爾濟扎薩克台吉布木布拉錫喀爾喀貝子巴特瑪旺扎勒

扎薩克台吉特克錫達錫端多布郭爾羅斯公
多爾濟巴林公琳沁多羅額駙丹津烏珠穆沁
公德里克旺舒克青海扎薩克台吉哈爾噶斯
台吉巴勒丹右翼喀爾喀親王策凌德沁扎布
額琳沁多爾濟貝勒車布登噶勒桑旺扎勒丹
津貝子楚木楚克扎布公格木丕勒蒙庫恭格
扎薩克台吉巴朗羅卜藏拉布坦成家扎布達
錫丕勒科爾沁郡王阿旺藏布固山額駙吉里
第四子部落郡王阿拉布坦多爾濟青海長子
索諾木丹津貝子丹巴台吉達奇達爾濟茂明
安貝勒玉木楚克鄂爾多斯貝子拉錫色楞厄
魯特貝子散都布烏喇特公索諾木扎木散哈
密公岳素布阿巴噶公鄂勒哲依圖教漢和
碩額駙多爾濟拉錫朋蘇克拉錫多羅額駙
齊旺多爾濟德木楚克固山額駙旺扎勒郭
爾羅斯固山額駙蘇瑪第喀喇沁固山額駙
羅卜藏端多布及領侍衛內大臣大學士等
宴召科爾沁親王阿拉布坦羅布藏袞布郡

王齊默特多爾濟伊錫班第教漢郡王吹木
丕勒浩齊特郡王車布登班珠爾教漢貝勒
羅布藏科爾沁貝子拉錫喀爾喀親王策凌
德沁扎布額琳沁多爾濟科爾沁郡王阿旺
藏布四子部落郡王阿拉布坦多爾濟青海
長子索諾木丹津喀爾喀貝勒車布登至
御座前賜酒成禮○是月直隸總督高斌奏各
屬糧價得旨今秋如此有收而米價究未大
減是何也○又奏遵旨條對教養實效查直
隸地方民風本屬淳樸尚可為施教之地而
室家素鮮蓋藏未能裕生養之資伏思政治
得人為要而州縣於民最親果使有司存愛
民之心百姓皆信有司之教化導休養可漸
而幾州縣中居官行事能近此者臣皆畧其
所短督率訓勉以期相與有成至於端士習
崇經學重農功勤樹植實倉儲以及興修河
渠浚洳之水利撫恤鰥寡孤獨之窮民遵照
歷年奉到諭旨暨議行條奏辦理惟有矢竭

愚誠實心實力以副

皇上撫育萬方。牘迪羣倫之至意。得旨所奏俱悉。實力行之可也。○又奏修理直隸城垣。請將密雲。石匣。懷來。三處。列為要工。東安。永清。固安。涿州。定興。新城。雄縣。七處。列為緩工。分別估需動支。派員領辦承修。得旨皆准興修。拱極城亦應畧為修補。○署兩江總督協辦河務尹繼善奏。水師戰艦。平時操防。有警禦敵。所關甚鉅。臣留心察訪。其中積弊多端。司事之員。並未實心經理。驗收亦不詳細。察看近有狼山鎮各營。大小戰船十隻。具報完工。飭鎮道赴廠驗收。多不照原估。混用舊料者。合計偷減工價銀二千餘兩。據承辦官開報。各衙門書辦及管船人等。陋規浮費。除將同知嚴宗詰。都司袁文通。嚴叅究審外。查下江修造戰船。共設江寧。蘇。松。鎮。江。淮安。太倉等廠。今既查有侵蝕等弊。各廠已可概見。所有各項陋規。現已盡行革除。其必不能省之費。

與其暗中侵損。無寧明定章程。於平餘出色銀內。酌量支用。並咨會將軍。總漕。蘇。撫。就近嚴查。於收工時。遴員逐細驗看。如有不符。即行嚴叅究追。得旨近亦有人議及此事。因汝等已叅奏。故未頒發。然汝等亦不能免失察之咎也。○江蘇布政使愛必達奏。吏治民風。實在情形。得旨好。諸凡如是留心。朕所喜悅也。勉之。○江南提督吳進義奏。巡查沿海地方情形。得旨所奏俱悉。勉力整飭營伍。以贖前愆。○署安徽巡撫準泰奏。教養之法。實有體用相生之義。鳳。潁。淮。泗。之間。地既瘠薄。其力穡者。於深耕易耨之法。昧然不識。惟仰聽天時。懶惰成習。其蠶桑樹植。亦多坐失地利。至陂塘積貯。更非小民所能自為。一遇水旱。流移轉徙。甚至鋌為盜賊。總由安省吏治因循。大都以簿書期會。竭蹶無誤。即為奉職。其留心教化者。未能多見。臣愚以為化民之本。察吏為先。而察吏之道。又必激揚懲勸。悉歸

切實。惟有悉心察覈屬員賢否。次第甄別。得
旨所奏俱悉。不可欲速。亦不可終怠。實力妥
協為之。○江西布政使彭家屏奏。欽天監天
文生。以備學習推策。但需人自有定額。臣見
欽天監行文原籍取結者。本年已有七十八
名。江西如此。他省可知。此等人數。未必熟悉
天文。多係醫卜星相之流。廁名監中。以圖誇
耀鄉里。而愚民往往信為奇異。易生事端。似
宜防其太濫。臣因江西好習數學。故就所見
陳奏。得旨。此奏是。著該監明白回奏。○又奏
請隆冬減刑。得旨。待朕酌量。○閩浙總督馬
爾泰等議。奏福建按察使王廷諍奏。稱教民
莫先於教士。閩省風俗頑悍。村落之聚族而
居者。多有生監散處其間。請將

聖諭廣訓。及歷年奉到教民之

上諭。並採集律例中緊要條款。為閩民最易犯
者。彙刊成帙。每遇朔望。令教官傳集生監。共
赴明倫堂。將

訓諭律例。反覆發明。証以聖經賢傳之同揆。示
以日用率行之最樂。再將彙刊之書。使之齋
回本鄉。散給鄉民。宣揚傳播。以本鄉之生監。
教本鄉之民人。鄉語易通。性情易洽。惟是生
監住居遠近不齊。在城者。每月朔望。俱應齊
集聽講。離城二十里者。月朔一次。五十里以
內者。季首一次。百里內外者。每年三九兩月
各一次。無故不到者。以曠學記過。果能轉相
告戒。著有成效。該鄉村無犯法事件。一年教
官給扁獎勵。三年知縣給扁獎勵。仍轉報督
撫學政。分別勸懲等因。臣等悉心體察。俱切
中閩省情形。其所請奉行之處。亦屬簡便。應
如該司所奏。通飭各屬遵照辦理。得旨。如所
議行。○巡視臺灣戶科給事中六十七等奏。
遵旨會同布政使高山。清查臺灣民番互控
地畝。各歸原業。現飭開列土名。查造四至清
冊。永遠不許絲毫越占。得旨。所辦甚妥。知道
了。○浙江巡撫常安奏。嚴衢紹興一帶查賑

情形得旨所奏知道了。一切實心妥協為之。
○湖北巡撫晏斯盛奏。現在淘汰年老之教諭訓導等官。部文內開恩貢之應選復諭。歲貢之應選訓導。於每科鄉試後。各督撫學政將年力學業堪司教者。准註冊備選。其精神衰憊者。給應得職銜。勒令休致。查年力強健。驗看立明。學業優劣。非考試則難知。自應淘汰之時。驗考並行。但此項人員。選期尚遠。或將年至七十以上者。概行淘汰。毋庸考驗。以免龍鍾跋涉。又恩歲貢生。註冊送部後。未經銓選。計年至七十。即於先一年將該生來歲年已七十之處。聲明送部銷名。給以原銜頂帶。毋庸銓選。得旨。此未可以概論。譬如逾七十而強壯者。亦不可銓選乎。未至七十而病憊龍鍾者。亦可姑容乎。總在汝等實力辦理。所見甚迂。○河南南陽鎮總兵蕭良金奏。各營兵弁先令分轄之都守叅遊。每年巡查一次。分別優劣造報。然後出巡較閱。得旨。如此

則汝出巡。應在一二年後矣。所奏殊屬含糊。如此糊塗。豈能當振刷之任。朕甚為汝憂之。
○川陝總督公慶復奏。甘省洮岷土司。地方遼濶。番目衆多。該土司楊冲霄。不善撫恤。父子兄弟。並肆苛暴。本年五月間。並不由地方官詳報。突以逆番聚衆等事。遠控到臣。即檄該鎮臣周儀。會同洮岷道赫赫。確查起釁情由。並諭土司以撫下之方。示土民以奉上之分。革除苛虐。勒立規條。經詳議批結定案。訪得洮岷副將何榮。伊子與楊冲霄之子。係武舉同年相好。武弁既與土司往還。安能復加彈壓。但該協才具可用。尚無劣蹟。若調置他鎮。猶堪驅策。查有定邊協史宏蘊。幹練有為。足資控馭。請以何榮對調。得旨。著照所請行。
○甘肅巡撫黃廷桂奏。寧夏寧朔等處。試種木棉有收。得旨。好。知道了。○青海副都統宗室莽古齋奏。遵旨查拏在路脫逃之準噶爾喇嘛羅卜藏丹。現已拏獲。解送四川。訊究

辦理得旨好。知道了。在事人等畧加賞賚。以示鼓勵。○四川巡撫紀山覆奏江卡撤回官兵。被夾壩搶刦一事。查打箭爐至西藏番蠻種類甚多。而剽悍尤甚者。莫如瞻對等部落。每以刦奪為生。此次搶奪官兵行李。理應奏請懲以大法。緣雍正八年征勦瞻對。大費兵力。總因該番恃險。攻擊匪易。惟恐不籌畫於事前。未免周章於日後。是以此案檄飭裏塘土司追拏賊盜。原欲以蜜制蜜。相機酌辦。斷不敢視為非要。稍萌輕忽之念。但前摺中。未將通局籌算緣由聲明。且具奏遲緩。罪實難逭。現據番人等交出贓物。扎商督臣慶復。如瞻對即將夾壩首犯獻出。另行請旨完結。倘或刁頑不悛。其作何示之以威。并善後之法。以及派委何員前往專辦之處。容與督提二臣。公同酌籌會奏。得旨。所奏俱悉。○兩廣總督那蘇圖奏請廣西應加秤頭鹽觔一項。酌定配入正鹽餘鹽之內。發埠銷售。以充公用。


得旨以朕之意。只可清其此後。不必問其已往妥協為之可也。○又奏廣西苗徭情形。得旨。馭苗之法。惟應去其擾累。置之化外。而示之以不可犯。則得矣。○是年旌表孝子安徽等省張孔綱等二十四人。孝義福建省劉奇遠一人。孝婦江蘇等省顧氏等三人。守節合例。八旗滿洲原任佐領兼叅領沙通阿等妻。閑散宗室傅保之女等一百七十二人。蒙古圖薩圖等妻莫氏等二十五人。漢軍蔡維政等妻吳氏等三十人。奉天等處駐防楊萬龍等妻張氏等五十七人。奉天等省舉人劉義華等妻王氏等一千九百五十二人。夫亡殉節。湖北等省王宗楷等妻謝氏等九人。未婚守志。江蘇等省馬嘉謨等聘妻蔣氏等三十人。未婚殉節。湖南等省榮春甲等聘妻唐氏等三人。烈女貴州省張氏等二人。百歲壽民。廣東省黃仲覺一人。壽婦安徽等省劉氏等七人。各給銀建坊如例。○一產三男直隸

等省李福貴等八家○會計天下民穀數各省通共大小男婦一萬六十六百八十萬八千六百四名○各省通共存倉米穀麥三千二百八萬八千九百三十七石九斗九升零

實錄卷三三一

六十四

大清高宗法天隆運至誠先覺體元立極敷文奮武孝慈神聖純皇帝實錄卷之二百三十一



統一書號: 11018·1355-17

定 價: 52.00 元